

Soc. 3963 e. $\frac{52}{51}$

BIBLIOTHEK

DES

LITTERARISCHEN VEREINS

IN STUTTGART.

LI.

57



STUTTGART.

GEDRUCKT AUF KOSTEN DES LITTERARISCHEN VEREINS.

1860.

**PROTECTOR
DES LITTERARISCHEN VEREINS IN STUTTGART:
SEINE MAJESTÄT DER KÖNIG.**

*

VERWALTUNG:

Präsident:

Dr A. v. Keller, ordentlicher professor an der k. universität in Tübingen.

Kassier:

Dr Zech, ordentlicher professor an der k. universität in Tübingen.

Agent:

Fuchs, sortimentsbuchhändler in Tübingen.

*

GESELLSCHAFTSAUSSCHUSS:

Dr Böhmer, stadtbibliothekar in Frankfurt a. M.

G. freiherr v. Cotta, k. bayerischer kämmerer in Stuttgart.

Dr K. v. Gerber, kanzler der k. universität in Tübingen.

Hofrath dr Grimm, mitglied der k. akademie in Berlin.

Dr G. v. Karajan, vicepräsident der k. akademie in Wien.

Dr E. v. Kausler, vicedirector des k. geheimen haus- und staats-
archivs in Stuttgart.

Dr Klüpfel, bibliothekar an der k. universität in Tübingen.

Dr Klumpp, director der k. privatbibliothek in Stuttgart.

Dr Maurer, ordentlicher professor an der k. universität in München.

Dr Menzel in Stuttgart.

Dr Pauli, ordentlicher professor an der k. universität in Tübingen.

Dr Wackernagel, ordentlicher professor an der universität in Basel.

DECAMERON

VON

HEINRICH STEINHÖWEL

HERAUSGEGEBEN

VON

ADELBERT VON KELLER.



STUTTGART.

GEDRUCKT AUF KOSTEN DES LITTERARISCHEN VEREINS

NACH BESCHLUSZ DES AUSSCHUSSES VOM FEBRUAR 1859.

1860.

DRUCK VON L. F. FUES IN TüBINGEN.

DIE VORRED.

Hie hebt sich an das pûch von seinem meister In greckisch genant decameron, daz ist cento nouelle in welsch Vnd hundert histori oder neüe fabel in teutsche, Die der hoch gelerte poete Johannes
 5 Boccacio ze liebe vnd fruntschaft schreibet dem fürsten vnd principe Galeotto. Die in zehen tagen von syben edeln frawen vnd dreyen iungen mannen zû einer töllichen pestilenczischen zeiten gesaget worden,

Es ist menschlich, vnd natürliche recht das geben die zeclagen, vnd
 10 den leyte helffen tragen, die mit schmerzen pein vnd trübsal vmgeben sein, sölches einer iglichen vernünftigen person wol zû stet, sunder den die zû solchem sein begert vnd gefordert worden, vnd die ovch sölches trüsten notörftig gewesen sein, vnd den pey etlichen funden haben, vnd vnder den ob ye keiner was dem sölches liebet, oder do von früde
 15 enpfinge, Ich der einer pin; Dann von meiner ersten iugent piß auf dise zeit an masse in der edeln hoche liebe enczündt gewesen pin vnd auch villeicht mere dann meinem wesen vnd standt zû gepürt het, wie wol [1^b] ich des von den die eines sölchen kuntschaft hetten gelobet vnd gepreist was, vnd für clüger gehalten. doch alleweg das ze vertra-
 20 gen mir herte was, fürware nicht vmb hertigkeyt willen der frawen die mir liebet; sunder alleine vmb überflüssiger enphangner liebe willen In meinem gemüte, vnd das vmb vnmessiger begirde willen. die mich in keinen wege wol zemüte sten liesse, mir oste mer vnürê prachte dann ich notörftig gewesen were. Doch sölcher schmerzen pein vnd vnürê, mir
 25 von etlichem prachten lieplich gespreche, lobe vnd troste Darumb fürware in stäter meinung pin, do von allein bekumen sey das ich nit tode pin. doch do des gefallen was, der on ende ist vnd der vns zû stätem gesece geben hat, alle weltliche dinge sich enden süllen. Also auch mein liebe die über all ander liebe was, die sich weder durch forchte röte oder
 30 schame nye hat prechenn noch erweichen mügen. Nun durch sich selbes, in kleiner zeit gemindert hat, vnd das in masse das sölche liebe in mei-

nem gemüte gancz gelassen hat die freud die sy gewonet ze gebenn ist,
 den die ire tieffe wasser durchgründen wollen. Darumb es mir ser mü-
 sam gewesen ist. Doch [1^c] nun alle vnrue ab mir genommen hat vmb des
 willen ich mich freye vnd frölich sprechen mag Nun wie wol die pein
 5 nachgelassen hat, doch darumb die gedächtnuß nicht geflochen ist der
 empfangen dinste, die von ir durch ander person vmb freundschaft willen
 vil dicke zû mir getragen worden. Darumb ich nach dem ich gelaube
 wie vnter andern tugent, die tugent pey den gelerten genant gratitudo,
 das ist dankung, Die besunder zeloben vnd ir widerwertigkeit zeschel-
 10 tenn sey vnd damit ich vndanksam nicht verdacht werde, Han ich mir in
 meinem kleinen vermugen für genommen in widerkerung empfangner
 dinste, Seitmal ich mich freie vernime zeschreiben hundert histori. Die
 in zehen tagen von einer erbern gesellschaft gesaget worden von syben
 edeln frawen vnd dreien iungen mannen, in einem grausamen sterben
 15 vnd tötlicher zeitt In den selben historiën ir gar mancherley geschefte
 der edeln liebe vernemen wert, die sich begeben haben etliche mit grossen
 lust vnd freuden etlich mit grossem iamêr pein leyte vnd schmerzen.
 Nicht minder pey vnsern zeiten als vnser eltern Darum ir mein aller
 liebsten frawen mein sin vnd meinung [1^d] ist euch freude zegeben da
 20 mit ir gûcz rates pflegen müget, vnd zû erkenen was euch zethun oder
 zelassen sey in eürem vnmüte, waz ir flichen vnd welichem ir nach fol-
 gen sult. doch sölliche dinge nicht albege an müe ergen mügen got gebe
 das es an eüer müe geschehe. Ir lieben edeln frawen ich mit mir selv
 vil dicke bedacht han wie ir gemeiglich von nature alle diemütig seyt
 25 Auch wol erkenne vnser wercke nach eüer vrteile gar einen grausamen
 anfang haben wirt, vnd das vmb der grausamen pestilencz gedechtnuß
 willen. Doch wille ich nicht daz ir in disem pittern anfang schrecken
 enfahet Sunder als wert ir ein hoch gepirge vnd pösen wege aufstigen,
 vnd nach dem in eine schöne eben kommen; vnd ye müsamer euch der
 30 pöse weg vnd hoch gepirge gewesen ist, ye schöner vnd lüstiger euch
 die eben duncken wirt Zû gleicher weiß als traurigkeit alle schöne
 enbicht, Also auch freude vnd lust alle trübsal vernicht. Darum ir schö-
 nen czüchtigen frawen habt ein klein gedulte, dann allzehant nachuolgen
 sol die freude die ich euch versprochen han. in der warheit het ich euch
 35 mit zucht durch andere wege do dann mein sin hin stet [2^a] füren
 mügen; dann durch sölliche herte gedechtnuß, fürware gelaubt mir ich
 het es gern gethon; Aber die warheit zû sagen das ist die vrsach als ir
 palde vernemen wert; das selbig het ich nicht wol on sölliche pittere ge-

dächtnuß beweisen mügen; darum von lauter note bezwungen also ze schreiben gewesen pin.

Darum ich anhebe vnd spriche. In den iaren der heylsamen frucht vnsers herren Ihesu Cristi gotes sun der zale tausent drey hundert acht-
 5 undirczig in der edeln über alle andern in Italia stat Florencz, an hüb die grausam vnd tötlich pestilencz. villeicht mer vmb vnsere sünde vnd übeltät willen oder villeicht der lauffe der planeten oder gestirn das gabe; oder got selber in seinem zorn vns zů ein straffung vmb vnsere
 10 pösen wercke willen gesant hat. Auch etliche iare vor in allem auffgang der sunnen gereigirt vnd den betrübet hat. Dar nach abgestigen gegen dem nidergange von einem lande zů dem andern, auß einer stat in die andern. Also alle gegent klaglichen durchgangen hat; vnd dofür weder sinne noch weistum noch kein menschlich fürsech[2^b]ung gehelfen mocht; als amptleut gesezt auch verpieten was schedlich gesein mocht. auch
 15 niemant zů der stat weder auß noch ein lassen; Grosse ordnung vnd rate die kranken ze versehen; Auch mit vil diemütigem gepet vnd processen gemacht; auch durch andere weg als durch götlich menschen vnd heilige person grosser gotz dinst verpracht warde alles zů rettung vnd beschirmung der edeln stat; Aber do erscheine nicht anders dann wie
 20 aller troste verschwunden wer vnd wie got sich an vns wölt rechen. Also in dem anfrage des sumers des egenanten iares an hub die grausam pestilencz ze beweisen ir grosse tötlichen wunder. Vnd einem iglichen dem sein nase schweyset oder plütet; der des leidigen todes on vnterlaß gewise was. darnach zů hant einem iglichen gleich weib vnd man
 25 komen peulen oder geschwulst vnter den prüsten grosse als die eyer etliche grösser etliche kleiner Dar nach sich söliche krankheit verkeret in schwarze flecken an armen vnd peynen vnd an allem ende der person; waren alles zäichen zuekünftiges todes. Auch daucht kein ratt der erczte gehilfflich wer, vnd alle erczney ir tugent verloren [2^c] hat, vnd die
 30 natur der krankheit keinerley verdeüen möcht. Dar vmb gemeinlichen alle an welchen dise zäichen erschienen; in dreyen tagen auß diser welt geschiden waren; auch etlichen in minder etliches in mer on alle fieber starben. Dise pestilencz was von sölicher sterke vnd kraft das sy flogte auch von dem kranken zů dem gesunten. Zů gleicher weiß als das
 35 feuer in dem stro thut auch nicht alleine das reden dem gesunten mit dem kranken den gesunten krankheit pracht vnd tode; Sunder auch das anrüren sein gewant oder anders; ze hant daucht wie der gesunde der krankheit pesessenn were. Es ist ein grosses wonder das ich da sagen

sol, vnd wer ein söliches von erwirdigen leuten vnd meinen augen nicht
gesehen wordenn. Ich czweiffel ob ich yemant söliches gelaubt het; ich
wil geschweigen söliches ze schreiben; für ware ich spriche das dise
töttliche pestilencze söliche vergiffte macht vnd kraft hat! in anspringen
5 von einem zû dem andern; nicht alleine von einem menschen zû dem
andern; mere sichtiglichen gesehen worden ist das gewa[2^d]nt oder
dinglach des menschen der in sölicher krancheit vergangen oder tode
was. von andern tiren die nit von menschlicher natur waren. die nit
alleine von dem anrûren die pestilencze enpfingen; sunder gächlich
10 nider fielen. darum ich mit meinen augen; als ich vor gesprochen han
Sache eines tages dise wunder vnd experiencz. Es waren auff die gassen
oder gemeinen wege geworffen, eines armen mans gewant der an der
genantenn pestilencz tode was; dar über komen czwey schwein, vnd
nach irer gewonhet von erst mit dem rüssel hin vnd her beworffen; dar
15 nach in das maule genomen vnd in kleiner weile sich waren vm dräen;
zû geleicher weise als ob sy hetten peyde gift genomen. ze hant gächlich
nider fielen auff das zerissen gewant vnd tode beliben. Von sölichem
wonder manchem menschen grosse forcht vnd sorge zû stunde vnd man-
cherley gedancke einfielen, vnd gemeiniglich alle zû einem ende ze gen
20 genuck herte vnd erpärmlich Vnd das was ir meinunge ze fliehen alle
krancken vnd ire ding. also ein iglicher im selbes heyle ze suchen. Auch
et[3^a]lich lerten vnd sprachen man solt mässiglich leben, vnd sich vor
aller übrheit hüten, vnd ich von einander scheidenn, vnd ferre von den
krancken, vnd ein züchtig leben fûren in essen vnd trincken, vnd gûte
25 speise nyesen; doch allwegen der masse nicht vergessenn, vnd alle vn-
keusch fliehen auch mit wenig leuten reden nitt schade were, vnd weder
von krancken noch krancheit icht wöllen vernemen; sunder alleine in
freude geben, mit seyten spil vnd mit singen, vnd alles das prauchen
doch albeg mit zucht vnd masse, do von freude bekommen möcht. Etlich
30 ander waren die sprachen man solt wol trinken vnd essen, vmb gen vnd
frölich sein vnd allen lust vnd willenn ein genügen tûn, vnd kein ercney
nicht pesser gesein möcht; gleich als sy sprachenn also sie auch theten,
vnd sölichem vichischen leben also nach komen; tag vnd nacht mit
schimpffen vnd schercken essen vnd trincken, von einer tabern in die
35 andern, on alle masse vnd ordnung iren willen verprachten! Zû gelei-
cher weise als sy nicht mer leben wölten, vnd vor irem tode in wölten
gar ein gût leben schaffen [3^b] vnd frölich sterben; Auch sy hätten alle
ire gûter frey gelassen vnd alle ire dinge waren gemeine worden; Nie-

mant hielt nicht mer für daz sein der frömden mocht eines andern güt
 gleich prauchen vnd nyesen als der herre selber. Auch allwegen mit
 disem vichischem fürsacz vnd pösen leben sie die krancken fluchen nach
 allem irem vermügen. Es was vnser stat in sölichem iamer daz der wir-
 5 dig gewalt der gesezze gleich als wol geistlich als weltlich ser zergangen
 was; dann alle die söliches pfleger vnd verweser warn als wol tode vnd
 schaden genomen hetten als die andern menschen; Dar vmb sie keinen
 gotz dinst oder anders nicht mer verpringem mochten, dar vmb sy sich
 geduncken liessen ein iglicher wol tün möcht sein gefallen Auch etlich
 10 ander person waren die nomen für sich ein mittel des vorgemanten
 lebens. messig mit essen vnd trincken als die ersten; auch nicht als die
 andern; sunder alle dinge mit massen prauchtem nach nottorfft der
 natur, vnd nicht mere. Sie sperten sich auch nicht ein; sunder sy
 gingen hin vnd here vnd trügen [3^c] in iren henden wolschmeckende
 15 kreuter etlich plümen vnd mancherley specerey, vnd die offte vnd dicke
 für ire münde vnd nasen gehalten, vnd meinten söliches möcht nicht an-
 ders dann güt gesein zü dem haubt vnd ze kreften das geplüte; dann es
 nicht anders daucht aller lust were gift das peköme von dem grossen
 pösen geschmacke der krankheit vnd tode leichnam. Noch waren mer
 20 etlich ander menschen von herterm gemüte dann die ersten, andern
 vnd dritten Die selben sprachen kein arczney pesser wer für alle pesti-
 lenz dann ferre von den krancken ze fliehen, vnd söllen iren herten
 willen also nachkomen vnd ir eygne stat vnd landt peyde liessen; auch
 mer vnd erger die kinder liessen vater vnd mütter vnd alle freunde; Der
 25 man liesse weybe vnd kinde. Die frawe mann vnd kinder; do hat alle
 liebe vnnnd freuntschaft ein ende Alle barmherczikeit waz verschwunden;
 do pey man wol mercken möcht daz der zorn gotz komen was ze straf-
 fen die menschen vmb ir poßheit vnd grosse sünde willen; mit diser
 kläglich vnd iämerlichen pestilencze. Sie meinten [3^d] auch wo sie auß
 30 der stat fluchen sy sicher wern, vnd allein die innerhalb der mauern
 gemeint wern ze straffen. auch meinten vnd in zü versten gaben kein
 mench dar inne lebendig beleiben sölt vnd zü seinem lesten ende komen
 were; kein ander peystande beliben was dann alleine etlich vmb grosser
 geytikeit willen die man mit gelte über gabe den krancken ze warten
 35 wie wol der auch nicht vil was von mann vnd weyben; auch von grober
 natur vnd söliches dienstes vngewonet den krancken keinerley hilffe
 geben mochten. dann alleine ze reichen zü zeiten wes er begeret, oder
 ze warten seines todes. Auch sich oft füget das die selben das haubtgüt

mit dem lone verloren; Also waren alle kranke gelassen von allen nach-
 parn von allen gûten freunden vnd gûnnern, vnd vmb der teûrung der
 diener willen kan es zû einer gewonheit es weren frawen oder iunck-
 frawen, wie schöne oder erber sie weren; als palde sy kranck warn so
 5 hetten sie nicht mer achtung wer ir wartett oder wer in dienet man oder
 weybe, iunckfraw oder altte an alle schame; alle ende des [4^a] leibes
 offenwarten die frawen den mannen als weren es weyber; Nûr was die
 krankheit ires leybs begeren mocht Darumb manche frawe vnd iunck-
 frawen nach ir kranckheit ewig dester minder scham hat. auch manches
 10 starbe; het es ein kleine hilff gehabt es were gesunt worden Darumb
 vrsache pöser wartung der kranken vnd grosse krafft der pestilencze
 willen warn ir so vil die pey tag vnd nacht sturben das es grausam ze
 sagen were; ich will geschweigen ze schreiben oder ze sechen. Es was
 gar ein widerwertig dinge der vorigen gewonheit der purger; Dann
 15 wann ein mensche 'starbe als wir heut pey tage sechen vnd thon die
 frawen vnd freunde vnd nachpauren in der toden leiche hause ze samen
 komen weinten vnd klagten den todenn Vnd die nachperschafft vor dem
 hauß iglicher mit seinen nächsten vnd freunden stunden, vnd dar nach
 der tode von grossem geschlecht was; dar nach kome die pristerschafft
 20 nach im vnd etlich seines geschlechte; vnd seines gleichen mit einem
 züchtigenn geprenge vnd toden gesange in zû der kirchen vnd begrebnûß
 [4^b] fertigen wo er dann vor seinem tod hin begert hat; do hin sie in
 beleyten. Nun was der kleglichen pestilencze stercke also grosse daz
 das volcke nider fiele als daz viche vnd niemant hetten der vmb sie wey-
 25 net, oder trauret! sunder manches mensche on alle gezeugnûße ver-
 ginge, vnd gar wenig waren den die kläglichen diemütigen zeichen ze
 teyle wurden irrer freunde; sunder es waz zû söllichem komen an der
 selben zächer stat; man begonde frölich ze sein, vnd vmb sölcher ge-
 wonheit willen die frawen zû rücke gelegt hetten alle freuliche diemüti-
 30 keit, vnd daz alles vmb ires eygen heyles willen Die toden waren nit
 von zechenn oder czwainczig menschen zû der begrebnûß tragen, noch
 von iren gûten freuden Sunder von einem schnöden vnd schantlichem
 volcke zû diser zeit auf gestanden vnd sich nenten bechini Aber nun
 geheissenn bethamorti; getragen worden dar vmb sie sich pezalen theten
 35 die selben trugen die par vnd leiche mit grosser eylung; nicht allwegen
 zû des toden pfarrekirchen; sunder zû der nechsten kirchen die in am gele-
 gensten was, vnd welich grab [4^c] sie geschikte funden mit dem schnel-
 sten den toden dar ein schuben. Jämerlicher vnd erparmlicher dinge

ward nye mer erhört noch gesehem. wol pey tausent des tages krank wurden den keyner ley dinst oder hilffe ze teyle worden alle on vuterlaß sturben. Auch vil pey tage vnd nacht auf gemeiner strassen iren geist aufgaben; auch vil in iren heusern tode lagenn das niemant wissen waz
 5 vnd also lange lagen piß daz man den faulen geschmack der toden leichnam in den gassen, vnd der nachtperschafft empfinden vnd schmecken warde vnd zeichen gaben ires todes Von den vnd andern die allenthalben sturben; alle weg vnd gassen vol mit piterm geschmack waren, vnd vmb
 söliches pösen starcken gestanckes willen warn ir vil in einer meinung
 10 vnd willen pereit Aber mer pewegt von dem pösen geschmacke, dann von parmherczikeit willen der toden leichnam Sunder da mit in sölicher geschmack nit schaden præcht; sie mit hilffe etlicher sündler wann sie die gehaben mochten sie des nachtes die tode körper auß den heußern namen vnd die auf die gas[4^d]sen legten; wer vmb die weg des morgens
 15 gangen were; wunder vnd on zale ir gesechen het; dar nach schafften, komen pare vnd priester von allen kirchen vnd die totten zû dem gewichtten fertigen auch oft vnd dicke czwen oder drey tode leichnam in einer pare man zû dem grabe trug oft den man vnd das weybe mit einem kinde oder czweyen. Auch oft czwen oder drey prüder oder ge-
 20 swistret. Diser sterbe übet sich in sölicher masse das es sich oft begabe das der prister mit dem krefcze nach einer toden leiche ginge ee er wider ze hause kom im drey oder vier pare nach folgten wo sie meinten einen toden haben zû pegraben, so hetten sy acht oder mere, vnd ir keinem weder mit liechte noch zächern warde gesellschaft gethon Es was
 25 auch so ferre komen das man der toden menschen gleich achtet het als der schaffe. Auch die toden ze begraben das gewicht erdrich nicht klecket; iglichem besunder grebnuß zû gebenn; Man machet grosse gruben vnd die toden leichnam nach dem hundert dar ein leget. Zû ge-
 leicher weiß als man das holcz klaftertt. [5^a] Darnach das erdrich so
 30 subtile vnd dünne darauf also lange das die gruben vol waren.

Wie wole söliche iämerliche zeit vuser stat durch gangen hat, doch da pey der die vmb die stat warn nit vergessenn noch gespart hat; Lassen wir sten die gemauert castel die die ir grösse halb der stat gleich warn; Aber in den elenden dörffern vnd in den feldern die armen pau-
 35 ren mit allem iren volcke vnd hausgesinde on alle hilffe vnd diener der arczte vnd arczney in iren heusern vnd in den feldern nicht als die menschen; sunder als daz viche nider fielen vnd sturbenn, vnd zû allem dem komen warn als der purger in der stat alle ire dinge gelassenn,

kein acht mer keines dinges weder vihes noch fruchte; Nicht anders pitten dann des leydigen todes Ir oxsen küe vnd roß alles sie selbes auß iren heusern triben in die schönen felder, vnd getreyde das noch nicht abgeschnitten was ich will geschweigen ein geleet. Auch etlich
 5 vihe in im menschlich sinne peweiset wann es des tags in den feldern im het ge[5^b]nucke gessen des nachtes es sich von im selbes zů hause füget on alle hute vnd hirtten. Der tötlich iamer was also grosse vor der stat vnd in der stat; vmb des willen die krancken ir nottorfft nicht gehaben mochten, vnd von den gesuntten vmb forcht willenn alle ge-
 10 lassen warn.

Darvmb man spricht, vnd für ware gelaubet das mere dann hundert tausent menschen inderhalb der mauern der stat Florenz von dem lebenn zů dem tode genomen warn Auch mancher vor dem sterben nicht gelaubt hat das so vil creature vnd menschen dar inne gewest werenn.
 15 O wie mancher schöner palast vnd herliche vnd schöne geheuse die vor mit edelm vnd würdigem gesinde grossen vnd kleinen besessen waren. Nun alle söliche gezirde vnd schöne gepewe öde ligen. O wie manches edels vnd groses geschlechte vnd auch schöne erbere grosser namhafter reichthum gesehen worden an erben, noch yemant der ir begert. O wie
 20 manche weise redliche männer, vnd schöne züchtig frawen, iunckfrawen hübsch iüngling! Die alle [5^c] von dem grossen meyster Galieno Ippocrate Exculapio gesunt vnd frisch gemeint vnd geurteilt worden weren; die des morgens vnd abencz mitt iren güten freunden ze tische sassen, darnach an dem andern morgenn in der andern welt mit iren voderen waren.

Für ware es ist mir swere vnd leydt von ganzem herzen vnd pin sein gar verdrölich worden ze wandern in sölichem kläglichem iamer. Darumb ich nudalest lassen wille daz ich mit zucht wol fliehen vnd meiden mag. So sprich ich do vnser stat stunde in sölichem iamer, vnd von menschen läre was; Es sich pegabe als ich von erwirdigen geleublichen
 30 person vernome; wie in der würdigen kirchen genant sancta Maria nouella an einez dinstag früe nicht vil menschen waren ze hören daz götlich ampt in swarcz gekleidt als dann sölicher zeit zů gepürtt hat.

Sich syben frawen alle von gesippe oder nachtperschafft oder besunder freuntschafft zů einander gefüget hetten. Vnter denen keine
 35 über acht [5^d] vnd czwainczig iare alt was; Noch die iüngest vnter acht czeihen iaren; alle weise, züchtig, wol geziert mit tugeten Der namen ich mir selbs für genomen hab ze geben, vnd das darumb, da mit vmb der her nach geschriben historien oder von dem zůhören ir schame enpfahen

müge; Dann der pösen vnd peissenden zungen vil sein; Der neide widerwärtig ist dem löblichen leben; Auch damit der züchtigen frawen lobe in irem reden nicht gemindert werde Vnd auch dar vmb; was ir igliche saget oder redt daz ein solches ir in keinem über auf genommen, 5 noch sie dar inne verdacht werde.

Ir aller namenn waren die. Die erste vnd elste wir nenen wollen Pampinea. die andern Fiametta. Philomena die dritten Die vierden Emilia. dar nach die funfften Lauretta. Die sechsten Neyphile Die letsten nicht on vrsache Elisa; wir nennen nicht daz sie sich vmb be- 10 sundere sach oder begire willen in der genanten kircher zů einander gefüget hatten; Sunder on geferde on alles geferd zů ein komen vnd [6^a] Sich in cirkels weise nider saczten mit etlichen seufzen. Alle pet vnd pater steen liessen, an huben zu reden mancherley igliche besunder iren iamer vnd ir leyde ze klagen der iemerlichen zükünftigen 15 zeit. Dar nach etliche rede vergangen sy alle stille schwigen. Zů hant aufstunde Pampinea an hube ze reden vnd sprach also.

Mein aller liebsten frawenn ir müget geleich als ich wol vernomen vnd gehört haben daz der niemant vnrecht tůt der mit zucht sucht was pillich vnd recht ist. Auch natürlich recht geben einem iglichen ze 20 suchen fristung seines lebens das ze beschirmen, vnd behüten nach allem seinem vermügen.

Nun seytnal menschlicher natur solches verlihen ist sich ze beschützen; So ist vns auch wol pillich ze suchen fristung vnsers lebens; Dann wen ich bedencke? wie wir vns auf disen morgen haben 25 zů einan[6^b]der gefüget, vnd bedatht vnser reden vnd aller meinung Ich wol vernime, auch ir daz vernemet; vnser igliche ir selbes fürcht, das mich nicht fremde noch wunder nimptt. Doch eines von vns fremd lasse bedüncken. Seitnal wir alle vernunft vnd freuliche synne haben; das wir vns auch nicht fürsechen vnd pedenken das des wir sorge vnd 30 forcht haben. Wir siczen hie züchtiglicher weise also. wir gezeucknúß geben der zale der toden leichnam die man ze begrebnúß tregt, oder ze vernemen ob die münch der zale sich auch sere gemindert hat zů rechter zeit ir ampt begen oder züwarten, ob vns yemant erscheine in kláglichem swarczem kleide ze niern vnsern iamer vnd schmerzen. 35 Gen wir dann von hier auß oder wir sechen tode leichnam oder krancke leute vmb die wehe gen oder tragen. vnd nicht anders wir weder sechen noch vernemen mügen dann von den die in dem tode ligen vnd sten in gotes gewalt tode sein oder schicken ze sterben. Gee wir dann

in der statt hin vnd her; des selben gleichen hören wir daz grosse geschrey vnd kläglich weinen, [6^c] ge wir dann in vnsere heuser Ich weiß nicht ob euch geschicht als mir, ich von allen meinen gesinde niemand finde! dann alleine mein meyt oder diern do von mir grosse
 5 schrecken bekumpt; auch mich stäcz bedüncket wie mir alle meine hare auff geperge gen, vnd düncket mich wo ich hin gee oder stee? wie ich stäcz seche den schein meiner vergangen mit grausamen angesicht; die mir peyn vnd schmercen pringen; Darum ich weder hie noch anderswo mich sicher duncke lasse auch mer duncket mich es niemand
 10 namhaftigs belibenn sey, dann wir allein. Der yndert hin ze gen oder ze fliehen hab als wir haben; vnd ob yemant mer belyben ist, die haben kein vnterscheide mer was züchtig oder vnzüchtig ist, Ersam oder vnersam zetün oder ze lassen sey, nür sy iren willen pey tag vnd nacht verpringen mügen! Alle freude vnd lust süchen. Auch die ver-
 15 sperten in den klöstern in zü versten geben vnd gelauben sölches in zimlich zē thon sey alle gehorsam vnd vntertenikeit ires ordens ze rücke gelegt haben, vnd sich geben haben zu aller vnreinikeit der vn[6^d]keuscheit, mit dem sie meinen dem tode vor seyn. Ist nun das also als meniglichem wol sihet? was thue wir wes peginen wir, schlaffe
 20 wir, oder traumt vns? warumb seyn wir träger zü vnserm heyle dann alle andre die noch pey leben sein? hab wir vns vnwerder dann ander leut tün Oder gelaube wir vnser leben zü vnserm leibe mit sterckern keten gepunden sey dann ander person; Wir sullen gelauben was von himel herab kumt daz es gottes gewalt sey; auff das wir sullen sorge
 25 haben daz sie vns mügen schädlich sein. wir irren vnd petriegen vns selbes, Wir thon törlich sölches ze gelaubenn. Wir sölten gar eben begencken wie vnd welche iunge manner vnd frawen von der grausamen pestilencze seyen überwunden worden; Darvmb deucht nicht ob es eßer gefallen were, so sprech ich das es wol getün wäre geleihe als
 30 wir sein; wir tatten als vil ander vor vns getün haben Wer mein meinung wir zügen auß der stat auf vnsere dorffler vnd pallast der vnser igliche ein nottorft hat, vnd do ständen in lust vnd freuden nach allem vnserm vermügen [7^a] Doch albeg daz mit zucht vnd eren vnd mit nicht übergē das zeichen der gerechtikeit. do höret man das süsse
 35 gesange der edeln walt vögelein, vnd sechen grünen die preytē wisen vnd anger mit iren schönen plümlein. Die eben felder mit iren getreyde vnd fruchten. Die klar vnd preyte des himels mit seinem gestirn wie wol der almechtig got wider vns in zoren ist; Doch seine grosse

ewige wonder niemant verlaugnet; die für ware schöner sein ze sechen
dann die lären mauer vnser stat; Auch der luft ist frischer, Vnd zû
diser zeit mer des leibes nottorft ist vnd minder das petrübet; wie wole
die pauern also wol sterben als in der stat die purger; so ist es doch
5 vns minder ze klagen dann in der stat. so kan ich auch wol erkennen
das wir niemant von den vnsern lassen. wol sprechenn mügen mit der
warheit, wir von inen gelassen sein; dann die vnsern sen tode oder
geflochen den tode Zû gleicher weise als wer wir nicht ir, vnd vns
alleine in disem iamer gelassen han. Darum kein straffe weder vns
10 von niemant sölichem meinen ratte nach ze volgen [7^b] gefallen mage,
vnd einem sölichem nicht nach ze komen. Es stet dar auf vil ee töt-
licher schaden dann anders. Dar vmb ye pesser; Ist mein ratt vnd
meinung wir nemen vnser meide vnd machen vns auff den wege auß
der statt heut an ein ende vnd morgen an das ander mit der freude
15 vnd lust die dann söliche zeit geben mag, ich gelaub söliches an
czweifel sey wol getûn Vnd also lange vnser leben füren in disem form
piß wir vernamen das ende vnd ob got sich über vns wölt erbarmen
vnd seinen zorn zû vns wölt wider rüffenn.

Die andern frawen Pampinea ratte vernomen hätten nicht alleine
20 dem gelaubet; sunder mit begirde dez also nach ze volgen vnd igliche
besunder mit ir selbes alle ir sache pedacht hatten, vnd ze hant sy
nach irem auf sten sy pereit sein sölten auff den wege; Auff stunde
die züchtig frawe Philomena vnd sprach; meine lieben frawenn als
Pampinea [7^c] gesprochen vnd geratenn hat ist wol geredt vnd wol
25 gethon. doch nicht also zûlauffend als mich düncket ir tûn wölt Eines
ich euch gedenke; wir alle frawen sein, vnd ist keine vnter uns so
kindisch, ir sey kundt was frawen sein, vnd an fürsehung auch der
männer wir können vns in keinerlei wessen; wir sein vnstäte vnd
wanckel, vnbeherczent vnd forchtig! Dar vmb ich besorge hab wir
30 nicht ander fürung; versehung dann die vnseren das sich vnser ge-
selschaft palde ende; vnd das mit kleinen vnsern eren; Darvmb wer
gût vor vnserm anfang pas ze versehen. Auff söliche rede antwürt
Elisa vnd sprache für ware die manne sein der frawen häubter vnd on
ir ordnung selten icht gerätt, vnd vnser wercke nymer zû güttem lobe
35 komen? Wie mügen wir aber söliche menner gehaben dann der meyste
teyle der vnsern tode sein. Die dann noch pey leben sein wer weiß
wo die sein hier oder dort vnd alle geflohen sein das wir da suchen
ze fliehen, vnd in vnser gesellschaft främde mann zenemen ist nicht

füglich; Dar vmb wölle wir dem nachuolgen vnd suchen vnser heyle; So müssen wir gedencken weg ze finden [7^d] vnd in sölicher masse vnser ordnung machen wo wir hin komen freude ze nemen daz uns nicht schande noch laster wachse.

- 5 Nun die weyle die edeln frawen sassen in sölicher rede vnd gespreche; zû der kirchtüre ein gingen drey iunge manne doch nicht minder der iüngste vnter fünffundczwäinczig iaren alt waz. Die weder pettrübnuß sölicher zeit oder vorlust gûter fründe oder forchte sein selbs ir grosse liebe hat mûgen leschen; ich geschweige die ein kleine zû er-
- 10 kelten. Der erst was genant Pamphilio. der ander Philostrato. der letste Dioneo voller zucht vnd tugent, alle giengent spaciren zesuchenn ire aller liebsten frawen; die villeichte alle drey in der zale der syben frawen waren vnd mit den andern sie alle gesipt vnd gefreunt waren; zû hant von den frawen ersehen worden; edann sie die frawen sachen
- 15 Pampinea mit lachendem munde an hub vnd sprach. Lieben frawen nempt ware wie sich dan gelûke schiket zû vnserm anfang vnd in vnser trübsale vns hilflichen ze sein, vnd hat vns zû gesant drey züchtig iüngling die vns williglichen vnd gern mit irem dinst zue willen wern vnser fûrer vnd diener [8^a] ze sein, wöllenn wir sie nicht verschlahen Neyphile
- 20 in irem angesichte ein kleine rôte vnd schame enpfinge; Dann sy waz der eyne die von den drëienn einer liebe hat; auf das antwürt Pampinea vnd sprach. Sich was du nun zemal redest aber ich weiß wol daz wir die iungen man nicht verpersern mûgen dann ir iglicher grössers geschäftes wirdig wer mir zweyfelt nicht an ir züchtigen gesellschaft;
- 25 wie wol das ist das ir etlicher vnter vns besunder liebe tregt. darumb ein klein besorglich ist fûre wir sie mit vns das vns nicht an vnser schuld do von schande bekome Auf söliche rede antwürt Philomena vnd sprach; söliches gibt mir nicht zeschaffen; wo ich züchtiglichen vnd on straffe meines gewissen lebe; rede vnd sage wer da wölle, gott vnd die
- 30 warheit sey vnser schilt vnd schirm. Nun sey iczund fertig vnd schiket wer mit vns zekomen fûr ware als Pampinea gesprochen hat wir sprêchen möchten das gelücke vns peystand vnd gehilflichen sein wölt. Die andern frawen Philomena reden gar eben vernomen hetten, alle willig waren den iungen mannen zû in zerüffen in alle ire meinung kunt vnd
- 35 ze wissen theten. Vnd sy [8^b] paten daz sie in inn sölichen iren geschefte gen vnd wandern wölten gesellschaft tûn. In dem Pampinea auf stunde die ir etlichen von gesippe nahender freunt was den iungen mannen entgegen ginge die mit frölichem angesicht iren grusse gab, vnd do

pey in ir aller meinunge zů wissen thet vnd von ir aller wegen sie pate
 daz sy sich mit pröderlichem vnd freuntlichem gemüte schikten vnd pe-
 reiten in gesellschaft zethou. Des die iungen man von erst meinten die
 frawen triben ir abeiß mit in. Doch zehant iren ernst vernomen mit
 5 frölichem müte alle sprachen sy pereit wern in ir aller diunst; vnd ee sy
 do von ein ander schieden. sie alle ordnung gaben wes man sich halten
 sölt Do nun alle ding zů aller nottorfft pereit waren vnd vor alle ende
 gesant hätten do dann ir meinung hin was zekomen. vnd den andern
 morgenn an dem mitwochen ee das licht des tages erschein; die frawen
 10 mit iren meiden, vnd die iungen man mit iren knechten zů der stat auß
 gingen czwu kleine meile von dann auf ein gesässe do ir erste ordnung
 hin gewesen was. Das selbig gesässe oder geheuse gelegen was auff einem
 kleinen pühelein, [8^c] pühelein oder höche ferre von allen strassen vmb-
 geben mit mancherley schönen grünen vnd lüstigen plümlein alle verdekert
 15 mit grünen pletern vnd mancherley edel gefruchte die besunder grosse
 früde gaben zesechen; geswigen die ze essenn. An dem öbristen an der
 höche ein köstlich vnd wolgezirt pallast mit schönen salen vnd kamern mit
 köstlichem gemäle geziert nach allem wunsche vmb den pallast waz ein
 schöne grüne wisen oder anger geziret mit mancherlei schönen plümlein
 20 darumb schöne garten, dar inne vil edel gefruchte frische prunnen, weier,
 flissende küle wasser nach allem lust vnd fruden auch küle frische kälér
 in dem pallast mit mancherley edels getranke vnd güttem wein Aber füg-
 licher guten trinckern gewesen were dann den züchtigen frawen. Auch
 alle kamern des pallast wol geziert mit schönen petten vnd fürhangen
 25 vnd alle pestreut mit wolschmekenden kreütern vnd plümen, die dann
 söliche zeit gab, alle söliche dinge fande die edel vnd wirdig gesellschaft
 nicht mit kleinen freüden. In der ersten zůkunft sich nider sezten ze-
 rasten. Do sprach der iunge genant Dioneo vol mit aller zucht vnd man-
 cherley edel sprüche von mei[8^d]sterlichem gesange. Ir lieben frawen vil
 30 mere die eütern sinne dann vnser versehung vns hergeführt vnd geleit
 habenn. Ich kan nicht bedenken wes etre gedanke vnd sinne weginnen
 wern, die meinen han ich vnter der porten der stat gelassen, do ich mit
 eüch des nicht lange ist her auß ginge. Darumb gedenkt vnd schicket
 eüch zů allem lust vnd freüden mit lachen kürzweilen vnd frölich mit
 35 mir zesingen, oder ir mir vrlab gebt wider an die porten vnd meiner
 sinne wider zesuchen, vnd in der petrübten stat mein zeit vnd leben ze
 vertreiben. Auf söliche red Pompinea in gleicher masse auch also
 sprach sy die iren von ir getün vnd in der stat hat gelassenn. frölichen

antwürt vnd sprache Dioneo hat wol geret wir frölichen stülen leben,
 dan allein trübsal vnd trauriheit vns haben her pracht vnd flichen mahen.
 Aber alle ding die on ordenung sein in die leng mit geweren mügen.
 Ich pin gewesen der anfang durch den sich söliche schöne wirdige gesel-
 5 schaft zů einander gefüget hat. vnd da mit vnser gesellschaft mit freuden
 lange weren sey, Laß ich mich bedunken nottorfft sey vnter vns ein
 haubt ze machen vnd erwelen daz wir ernen [9^a] vnd dem vntertenig
 sein als vnserm öbristen. In dem alle vnser sorg vnd nottorfft ste vnd
 vns mache fürn ein frölich leben an vnser aller sorg vnd domit vnser
 10 iglichs hab zeuersehen vnd sölicher sorg, swörung müe vnd arbet teil-
 haftig sey, auch da mit mit neide wachse düncket mich vnd spriche vnser
 iglichs söliche müe pürde vnd auch ere einen tage gegebenn werde, vnd
 wer des ersten erwelt sein sol das ste in vnser aller wale. dar nach wer
 nach der ersten welung sol erwelt wern. das ste zů des gefallen das von
 15 erst ist erwelt worden vnd den tage gereigiret hat, vnd die zeit die
 iglichs herschafft wert sol es petrachten alle vnser nottorfft vnser lebens
 vnd vns schiken zů aller frölikeit Alle dise wort der ganczen gesellschaft
 grosses gefallen was, vnd alle mit einer styme schrien Pampinea sey
 vnser haubt vnd künigin Philomena schnelle zů dem ölpaum lieffe, ein grü-
 20 nen czweige ab prache dar auß ein schönes krenzlein gemacht vnd die
 neßen künigin do mit gekrönet dann sie oft vernomen hat die wirdirgheit
 des selben, vnd wie grosse ere er dem prechte der dann sölicher krö-
 nung wirdig were, vnd auch das zů einem [9^b] offenwaren zeichen ir
 küniglichen herschaft.

25 Darnach ů hant Pampinea künigin gepote zesweigen vnd schaffte
 für sich komen die drey knechte der iungen manne vnd fier der frawen
 meide, vnd sprache da mit ich auch von erste anweisung vnd peyspil
 gebe vnd vnser gesellschaft yelenger in güter ordnung vnd freude ir
 leben führen müge in wollust on schande vnd laster vnd lange weren sey
 30 mit liebe vnd freüntschaft. Ich von erste mache vnd secze zů vnserm
 marschalk Parmeno Dioneo knecht dem schaffe ich alle sorg über alle
 vnser diener vnd allem dem das zů dem sale gehört, Das ist vnser
 erster amptman Dar nach mache ich, secze schaffe vnd wille daz Sirischo
 Pamphilo knecht sey vnser außgeber vnd einnämer vnser schacz, vnd
 35 sey vntertan vnd volge Parmeno geschefte. Tindato der dritt sey alzeit
 pereit in dem dinst Philostrato vnd der andern zweier iunckhern in auß
 warte vnd iren kamern Darnach ich schaffe vnd gepetute meiner meide
 vnd Eliciescha. Philomena diern in die kuchen vnd alle gerichte mit

fleiß nach Parmeno gescheffte zů pereiten. Die andern zwů Chimera vnd Stratilia. Lauretta [9^c] vnd Fiametta meide außrichten reine halten der frawen kamern. söliches ist vnser geschefft pey der pen vnser hulde, auch wir schaffen wöllenn vnd gepieten auch einem iglichem, wo es hin
 5 ge oder ste, hört vernäme oder seche keinerley neüwe histori such, noch vns zů hause prenge, dann do von vns frůde bekommen müge, daz pey der pen vnser hulde Der künigin ordnung von frawen vnd man sere gelobet warde.

Nach disen worten die künigin frölich auf stunde zů irer ge-
 10 selschaft sprach, wir haben hie schöne garten lustig geordnet, In den get vnd sucht eüeren lust spaciren, piß auf terczeit so füget eüch herwider, damit wir pey der küle, vnd frische mügen vnser speyse enphahen Also gab die neüe vnd erste künigin vrlaub ir frölichen geselschafft. Die iungen man mit den schönen frawen, mit züchtigem lieplichem frölichem
 15 vnd schön reden, vnd senfften driten in die lustigen grünen schönen garten gینگen, von den schönen rosen vnd mangerley plümlein krenzlein machten, mit frölichem gesange die zeit verdriben. Nun die zeit als die künigin gebotenn hat komen was, sich zů hause fügten vnd funden daz Parme[9^d]no sein ampt mit vleiß hat an gefangen, oder anfangen
 20 geben Sie eingingen in einen kostlichen sale do die tische vnd tafeln peryt, vnd mit schneweißē tüchern pedeket waren dar auf die silbren drinckgeschirre vnd an allen enden die gelben genester plümen gestrüt waren. Darnach zehant daz wasser zů den henden geben, als der künigin gefallen was, vnd nach Parmeno ordnung zetische sassen, die edeln gerichte vnd güte getranke auf allen tischen pereit warn mit grosser zucht
 25 vnd stille von den dreyen kneechten gedienet waren. Do die züchtig geselschaft die schönen ordnung sachen, do von grosse fröde hatten, an huben zekurczweilen mit etlichen meister sprüchen, eines mit dem andern, also mit freüden assen Dar nach die künigin gepote die seyten spil zekomen, vnd von geschefft der künigin Dionco die lauten, Fiametta die geigen
 30 peyde anhuben mit süslichen vnd lieplichen stimmen ze spilen Die künigin auf stunde mit senften züchtigen driten, mit den iungen manne vnd frawen an hube frölich zedanczen Nach dem dancze züchtiglich zesingen In disen fröden also lange stonden piß die künigin zeit dauchte ruwen,
 35 vnd schlaf[10^a]fen zegen, vnd allen vrlab gab Die drey iungen manne in ire kamern gingen, die gestündert von der frawen kamern waren Do sie ire pette nicht mynder als den sale mit wolschmeckenden plümlein gezirt funden Zegleicher weise die frawen, die iren theten, do sich auß

zugen zepette gingen. vnd nach dem do non zeit vergangen, vnd die
 künigin auf gestanden was, ir gesellschaft wecket vnd schuff auf sten,
 sprach, ze vil schlaffen des tages dem leib schedlich were, mit in auß
 dem palast spaciren ginge in ein schöne grüne wisen an einen külen
 5 schatten der sich zû der stunde begeben hette komen, vnd nun die sonne
 den mern teile irer kraft verloren het, vnd die külen wint alle gegent
 der grünen wisen vmbgeben hetten. An disem ende die künigin sich
 nider seczet, vnd ir gesellschaft sich radescheibe vmbe sy auch nider
 seczten, mit den die künigin an hube vnd sprach, Lieben frawen mein
 10 als ir wol secht wie die sonne hoch vnd ire hicze noch grosse ist Dar-
 umb anderßwo hin zegen wer torheit, hie ist es frisch vnd küle als ir
 wol secht. do sein spilprete, karten vnnd schafzägel do mit ir kurzweilen
 müget wie wol es mein klein gefallen ist [10^b] Dann die gemüte eines
 vnd andern sich vil dicke von sölichem spile betrüben vnd in zorn fallen
 15 vnd das an alle frûde der zûsecher geschicht. Aber was neûs zesagen
 von vnser einem den andern allen frûde geben mage, daz sich von dem
 spile nit begibt In den ee eûer igliches ein nûe histori gesagt hat, die
 wirt ze genaden sein vnd ir hicze geendet. Dar nach wir aber mûgen
 nach vnserm willen spacziren gen vnsern lust vnd frûde weiter suchen.
 20 Darumb delft mich vnd were mein gefallenn, wo es euch liebet wir
 theten als ich gesprochen han neûe histori sagten. Doch wo daz euch
 nicht liebet, so pin ich ye geschiket zetûn eûer gefallenn vnd eûer ig-
 liches piß auf vesperzeit thue sein gefallen. Die frawen alle mit sampt
 den mannen, der künigin rate lobten neûe fabeln zesagen, vnd do die
 25 künigin irer gesellschaft gûten willen vername zû in sprach, seitmal es
 eûer gefallen ist, auf disen ersten tage. Ist mein sin vnd meinung ieder-
 man frei zesagen waz im liebet vnd sein gefallen ist nach dem sich gen
 Pamphilo keret der ir zû der rechten seiten sasse zûchtiglich zû im
 sprach. Er mit einem seinen nûen histori den andern den anfangen gebe.
 30 der sich nicht saumet [10^c] schnelle an hube vnd sprach. Mein aller lieb-
 sten frawen es ist pillich waz ein iglich person thut vnd begint vnd ver-
 pring daz ein söliches geschehe in des namen der aller ding ein anfangen
 vrsach vnd schöpfer gewesen ist. Nun seitmal ich den eûeren neûen
 fabel vnd histori sol den aufgang geben, so ist mein syn an ainem sei-
 35 nem grossen wunder an zeheben vnd das darumb da mit vnser hofnuig
 zû im stâter vnd bestendiger sey, vnd sein heiliger name von vnß mit
 lobe geerte sey dann eûer iglichem wissent vnd kunt ist, wie alle dinge
 in in vnd ausserhalb in zergenklich vnd tötlich sein, vol aller müe trûbsal

vnd arbet mancherley vnglück vntertan. Des wir an zweifel an die götlichen genade, vnd an ir fürsehung nit vertragen möchten. auch wir nit glauben sullen daz wir ein sölches vmb in verdient haben, noch seiner genade wirdig sein Sunder er vnß das zů verleichen von seiner
 5 grossen barmherczikeit zetůn beweget ist, vnd das vmb pete wegen inpetriert von den, Die als wir hie tůtlich gewesen sein, vnd auf erden seinen willen getůn haben. nun mit im sálig sein, in seinem reiche vnd ewigem leben. Ir lieben diemůtigen [10^d] edelen frawen wie wol mein troste den notůrtigen klein ist so ist doch mein syn den zekeren do die
 10 note am grůsten erscheint, vnd do von sich eůer nucze mere vnd nit minder Nun wer wille der sein der nit spreche, vnser wercke, můe vnd arbet nicht ee den zůchtigen schůnen frůlein zůgeben sey dann den mannen, die vnter ieren průstlein iren herczen forcht sorge vnd schame, der verporgen liebe tragen, die in vil vnleidlicher ist ze uertragen dann die
 15 offenware, nach dem den kunt ist die es versucht haben vnd noch versuchen, sunder den die von vater vnd můter vnd iren mannen strenge vnd herte gehalten sein Darumb sůlcher irer liebe sy klein frůde haben, můssig vnd traurig siczen, vmb des willen in mancherley gedancken zů sten, in ein fallen dar umber sy nymer frolich werden vnd daz vmb umber
 20 flůssiger liebe willen enpfangen in iren herczen, die sy so lange verporgen tragen můssen piß in netze gedanke zůfallen vnd die alten vertreiben, also in alle ire můe der liebe halben swerer dann den mannen ze leiden ist, Dann die manne, der gemůte von sůlcher lieb beschwárt ist, sich mit mancherley behelffen můgen, des die zůchtigen frůlein nit tůn,
 25 [11^a] noch ze thon zů stet als spaciren gen, iagen fogeln reiten kaufeschacz handeln Daz sein alles ding die man gar oder ein teyle seine schwere gedanke ringern vnnd mindern můgen, vnd da mit die beschwerten vnd betrůbteu freulein; auch ir ein teyle irer verporgen traurikeit můgen ein klein fride geben, vnd die mit zucht in freude kern, han ich
 30 Arigo in das wercke machen vnd in teutsche zungenn schreiben wůllen, Als ir mit zucht lesent vernemen wert Auch do pey eůer liebe, rate, troste vnd hilffe on zweifel finden wert, vnd das getůn habe da mit ich ze liebe werd den die eins sůlichen zů mir begert haben; so ist mein meinung wo ich sůlichen erbern manne vnd schůnen frawen můchte ze
 35 liebe vnd willen werden das ein sůliches wol gethon were; Darumb ich mir in meinem gemůte vnd kleinen vermůgen fůr genomen han in dem namen gotz, dem des an mich begert ist, nach ze komen. dann villeicht auch mir von den edeln zůchtigen frawen lobe, ere vnnd frucht be-

komen möchte; des mir nit czweifelt dann sie alle diemütig von grossem diemütigen herczen vnd milte sein.

[11^b] Nun seytmal wir auß der tötlichen pestilenz komen sein, Als der poete gesprochen hat vnd das hoche grausam gepirge überwunden s haben vnd in die schönen eben komen sein vnd euch bekome als ich versprochen han, So wölle wir in dem namen gotz anheben, vnd von erste sagenn vnd schreiben von dem pösten man Judas außgenomen der auf erden ye geporen warde vnd nach seinem tod für heylicher dann sant Francisco gehalten was vnd an gepett waz.

DIE ERSTE TAGREYSE.

Von erste vnter dem gewalt vnd reigiment der künigin Pam-
 pinea Die wirdig gesellschaft sagen wirt von abenteuerlichen
 ergangen gescheften vnd von der künigin gepote iglicher person
 5 auf disen ersten tage frey ist zesagen waz im liebe vnd sein ge-
 fallen ist.

Wie ein notari oder offen schreiber genant der Ciapelleto mit
 einer seiner peicht einen heiligen hochgelertenn man betroge vnd
 nach seinem tode für heilig an gepett ward.

- 10 [11^c] Nv vnser künigin gepote ze verpringen Pamphilo mit freuden
 an hebt die ersten histori vnd nette fabel vnd spricht also. Lieben
 frawen nach dem ich vernomen vnd gehört han wie ein kauffman in
 Frankreiche genant Muciatto ze ritter gemacht warde, Der selbig mit
 hern Karolo an lant der des küniges pruder waz von dem pabst Boni-
 15 facio gefordert in Tuschana reyten must Im gedachte seiner handel
 vnd kaufeschacz halben die etlichem über ze geben vnd die ze handeln;
 Im sein schulde von seinen schuldigern ein ze pringen; zů allen seinen
 sachen palde wege sinn fande, Dann alleine wem er etlich schuld etli-
 cher Borgondie gelassen, möchte die ein ze prengen, dann wol vernomen
 20 het wie die Borgondier ser listig vnd pöse leutt weren vnd so palde
 nicht bedenken mocht als ein listigen der im sölche seine schuld ein
 precht vnd sich der Borgondier vnter wünde Doch nach dem langem
 bedenken, im zů gedanke kome einer genant der Ciapeletto, der zů
 zeiten pey im auß vnd ein ginge gar ein zütätig männlein; der was ein
 25 notari oder offenn schreiber; [11^d] Des natur vnd leben waz also; Er
 het in groß übel wo seine briefe vnd instrument, wie wol er der nicht
 vil machet, anders dann vnrecht falsche vnd zů nichte funden worden
 Der er also vil gemacht hett als ir im hetten ze handen komen mügen;
 Die selben falschen brief oder instrument vil lieber ir zehene vmb sunst
 30 vnd on lone gemacht hette, dann ein gerechtes allein vmb grossen
 solde, falsche gezeugnüß ze geben sein freude waz, wo'er dar zů begert

warde; doch des vnbegert willig was vnd selbes das stäcz suchen ging.
Auch zů der zeit eyde ze schweren in Frankreiche grosse kraft hettenn.
Do fraget der Ciapeletto nach; er hett ir liebe zehen falche vmb sunst
dann einen alleine gerecht vmb gelte geschworen; nůr er seinenn wi-
5 derteyle hette überwinden mügen Auch vneinikeit vnd kriege vnder
gůten freunden ze machen, er meister waz dar an allen seinen fleyß
vnd studiren dar an keret, vnglücke schande vnd laster zů ze richten Es
wer vnder geistlichen daz oder weltlichen das sein grůste freude waz
ye schentlicher wercke er verpringen mocht ye pas er meint begangen
10 hette; Auch tode schlege zů [1^a] bereiten vnd die selbes mit seinen
henden zů verpringen wo er zů sůlichem begert waz daz niemand ver-
sagt; sunder mit grossen freuden dar zů ginge Er was ein grosser
schelter vnd flucher gotz aller seiner heiligen vnd himlichen here er
were zů tausent malen des tage dez feűers wirdig gewesen; er waz
15 ein grosser swerer pey got vmb alle kleine ding Er floche die kirchen
als der teuffel das kreucze kom gar seltenn dar ein oder gar nimer
Auch das sacrament oft schentlich in seinen mund nam, vnd sein ge-
spůt dar auß machet. Die tafern waz sein gotzhauß vnd alle andere
vnersame ende sein wonung hat do kam er selten auß! er het lust zů
20 schönen frawen als der hunt zů dem prűgell mer dar wider dann kein
pösser mensche ye ward. Ein grosser heimlicher dieb; er hat es mit
dem atten an sich gezogen wer es můglich gewesen wo es im hat mügen
werden frässig vol vnd trunken. Ein grosser lůgner vnd spiler mit
falchen wűrfeln; Was sol ich mich mer eins pösen menschen műen
25 Ich halte auff erdrich wűrde nye pöser mensch geporn dez poßheit
lang zeit auf het gehalten der gewalt des genanten ritters Muciatto
[1^b] die vnrecht die er verpracht vor gericht wider arme leutt dem
ritter ze liebe sein geschonet vnd im vertragen wurden. als ich vor
gesprochen han wie der pöse leichnam Serciapellett dem ritter in sein
30 gedanke kom dem seine werck vnd pöes leben wol kunt was; ze hant
im gedacht; er der sein solte, der mit seiner poßheit der Borgondier
listikeit über winden sůlt vnd in schűffe für sich komen zů im sprach
also. Serciapellet als dir wol wissende ist wie ich suche, etlich schul
ein ze prengen von etlichenn Borgundiern daz gar fortelhaftig vnd listig
35 kaufleut sein. nun weiß ich nicht wem ich getrauen sol daz mein von
sůlichen leuten ze pringen; Duncket niemant mir fűglicher sey dann
du. Seitmal du iczund műssig vnd on gescheffte pist; Wo du dich
sůlicher sache vnterfachen wilt, so will ich dir hilffe schaffen vor allen

sachen mit des küniges briefen, vnd waz du einpringest do von dir sol ein güte genügen geschehen Serciapellet zů diser zeit sich an handel sache, übel ze rosse mit weniger parschaft, vnd auch dem zů dinst der da lang zeit sein schirm vnd schützer gewesen waz mit sein ern sicht dez
5 nit wol entschla[1^e]hen mochte; pezwungen was nicht nein zů sprechen; Sunder mit gütem willen vnd frölichem angesicht sich begabe allezeit in seinem dinst pereyt sein Also peyde der sach eins wurden Der ritter in procuratore machte vnd gehilffliche priefe von dem künige gabe. Serciapellet sich pald in Borgondia füget do er nicht vil pekant waz, vnd auß-
10 halb seiner natur diemütig vnd züchtig sich gegen seinem widerteyle erzeiget; An hube vmb des willen er was darkomen; zů gleicher weiß als er im den zorn behalten wölt auff das letste. Sein herberg vnd wonunge pey zweyen prüdern die warn Florenczer vnd warn wuchrer dem ritter Muciato ze liebe vnd freuntschaft sie Serciapellett grosse ere peweisten.
15 In kurzzer zeit sich pegabe daz Serciapellet ser krank warde, palde die czwen prüder in versachen mit güten erczten diener vnd dienerin nach aller nottorfft Dar nach die erzte vernamen daz sich die krankheit meren vnd argern ward von tag ze tag vnd wol verston den der tod mit im begonde ze ringen; ein sölches den zweyen prüdern ze wissen
20 theten; des sie sich worden beküern; die vrsache Eines tages gar nahet pey der kamern dar in der kranke lag [1^d] mit in selbes an huben ze reden, vnd einer sprach zů dem andern; wes beginne wir oder waz thue wir mit disem manne. seinthalben haben wir nichtz gůtz vorhanden; Es ist vns ein grosse schand kranke auß vnserm hauß ze
25 schickén, vnd yederman sprechen wirt? was pedeut das die haben den in seiner gesuntheit geert vnd in der krankheit sy in auß treiben Auch mer und arger er ist als ein pöser leichnam all sein tag gewesen, daz er weder peicht noch puße begeren wirt, noch kein sacrament nemen noch keinerlei gotz diust tůn Darum kein kirchen seinen leichnam pegra-
30 ben wirt, vnd in auf dez felde werffen tůn als man den andern hunden thut Peicht er sich dann so seyen seine stůne so grosse vnd grausam daz im sy kein priester vergeben wirt noch ablaß dar über sprechen, so würt er aber vnder die hund geworffen; vnd wo ein sölches geschicht wir übel daran sein; dann daz ganz volcke diser stat vns überfallen
35 vnd lauffen wern vmb vsers wuchers willen do von sy stätz übel reden vns ze berauben vnd daz on zweifel geschicht als ich vor gesprochen han vergeet er on peicht vnd puße vnd die ganz gemeine schreyen wol- auf all an die lampartis[2^a]chen wuchrer vnd hunde die kirche will ir nit,

wir süllen sy auch nit leiden Auch nitt die sorge alleine ist peraubt ze sein ich förcht ergers sie möchten vns da mit auch das leben nemen. Darumb stirbt der pöse mensche on zweifel wir verloren sein in leibe vnd güt; Serciappellet nahent do pey lage do die zwen ir rede vnd gesprech hetten; als der kranken gewonheit ist, ein subtiles hörn haben, alle rede der zweyer prüder vnd ir klagen wol vernomen het; ze hant sy zû im rüffet vnd zû in sprach also Lieben freunde vnd gûnner ich wille nit daz ir an mir zweifelt noch von mein wegen keinen sachen habt; dann ich eüer rede alle wol vernomen han, vnd on zweifel gelaubt es sich also ergen würde; aber seyt on sorg es sol sich anders machen Ich han so uil übels in meinen tagen begangen vnd wider got getûn; ob ich im vor meinem tode ir noch eine thue weder minder noch mer ir ist. Darumb gedenket vnd schaft mir komen ein gûten seligenn weisen man wo ir den gehalten mügt dem last mich peichten vnd meine ding schaffen; für war ich wil mein sache vnd die eüern in söllicher masse an richten das ir da von ere vnd nucze haben sölt. vnd euer wolgefallen sein soll; wie wol die zwen prüder klein [2^b] hoffnung hatten doch sy gingen zû einem münche fragten wo sie gehalten möchten einen heyligen gûten man peicht ze hören einem Lambärden der in irem hause krank lege. Do warde in gegeben ein heiliger gûter alter wirdiger man ein naister der heiligen geschrift; zû dem alle purger der stat besundr andacht hatten; den sie zû iren kranken fürten, vnd do der gûte man in kamern kame do Serciappellet inne lag sich nider saczte zû im in begonde ze trösten; dar nach in fraget wie lang er nicht gepeicht het Auf daz Serciappellet der alle seine tag zû keiner peicht nye komèn was; dem guten man antwürt vnd sprach. Lieber vater mein gewonheit ist zû dem minsten die wochen ein fart ze peichten wie wol ich oft mich mer gepeicht han Es ist wol ware syder ich in diser krankheit gewesen pin; deß über acht tag vergangenn sein ich mich nichtt gepeicht han; des ist mein swere krankheit vrsach gewesen. Do sprach der gûte vnd heilige man. Lieber sun an dem hastu wol getûn also soltu hin für thon; Ich vernym wol es mir kleine müe sein wirt dich ze hörn; seytmal du dich so oft gepeicht hast. do prach Serciappellet O herre vnd vater nit sprecht also ich han mich so ofte nye gepeicht ich (2^c) hab mich alwegen aller mein sünde erklagen wöllen die ich von meinen kintlichen tagen piß auf dise zeit begangen han; darvmb mein lieber vater ich pitt euch daz ir mich gänzlich fraget nicht minder dann als het ich mich alle meine tage nye gepeicht, vnd schonet mein nicht meiner krankheit ze

liebe; dann mir ist vil lieber mein sele dann mein leib, vnd mir lieber ist
 ich den bekümer dann das ich im rüe geb, vnd daz ich thet daz meiner
 sele verdamnuß were; die mein heiler vng schöpfer mit seinem heiligen
 tode an dem galgen des heiligen kreuczes gekauft hat. Dise wort ser
 5 gefielen dem gûten man vnd in daucht daz wern alles zeichen gûtes vnd
 seliges menschen, in tröstet vnd stercket also hin für ze tûn. Do er
 Serciappellet seiner gûten gewonheit getröst hat An hube in ze fragen
 vnd sprach ob er in vnkeusheit mit frawen ye gesündet het; Serciappellet
 mit grossem vnd swerem seufzen antwürt vnd sprach Lieber vater
 10 ich mich schame euch die warheit ze sagen vnd Sorge han ich sünde
 in der sünd der eytellere. Der heilig man sprach sag an frölich lieber
 sune; In der peicht vnd auch anderswo die warheit ze sagen kein
 sünde ist. Do sprach Serciapel[2^d]let lieber vater seytmal ir mir do
 für verspricht es nicht sünde sey so will ich euch es sagen für ware ge-
 15 laubet ich ein keusche iunckfraw pin geleiche als do ich von mûter leibe
 kam O gesegent seystu von got sprach der heilige man selig seistu an
 sele vnd leib got dich stercke also hin füre zetûn; grosser lone vnd
 danck von got dir bereit ist. Nun sag mir fürpaß lieber sune hastu
 wider got ye getûn; in der sünde der fraßheit. Aber er mit grossem
 20 seufzen sprach O heiliger vater mein vasten ist leider klein gewesen;
 die fasten vnd goldfasten außgenommen; ich zû dem minsten nach meiner
 gewonheit in wasser vnd prot drey tag in der wochen han gefast; selig
 seyest du vor got sprach der peichtiger. lieber vater ich mich schuldig
 gib auch oft vnd dicke mit grosem lust vnd begirde das wasser ge-
 25 truncken han; sunder wann ich müde gewesen pin oder in kirchferten
 gangen pin zû gleicher weiße als die grossen sauffer auff den dörfern
 tûn vnd daz essen vnd trincken mich pesser han lassen dúncken dann
 einem fastenden durch gotz willen zû gehört. Der gût man sprach
 lieber sun dise sünd sein natürlich; ich wil nicht das du dein gewissen
 30 da mit beschw[3^a]erst. Daz pekumpt einem iglichen heiligen oder
 vnheilig nach langem fasten vnd grosser müe essen vnd trincken gût
 dunken. Serciappellet sprach O lieber vater nicht sagt mir das ze
 trost; ich weiß wol alle dinge die durch gotz willen gethon werden
 lauter vnd rein sein sullen on alle mackel des gewissen; wer anders
 35 thut der sündet. Dem heiligen man wol zemût waz vnd grosseg gefallen
 het von dem reinen gewissen Serciappellet. Fürpaß in fraget vnd sprach?
 sun hastu gesündet in begerung mer dann pillich gewesen ist? oder
 hastu icht daz dir nitt zû gehört. über das antwürt Serciappellet. Lieber

her vnd mein vater ich wölt nicht das ir gedächt darum das ich in diser
bucherer hauß pin; ich han nicht mit in zeschaffen. sunder wist daz
ich her zû in komen pin sie ze straffen vnd ob ich sy von irer bucherey
vnd pösen werken pringen vnd keren möchte on zweifel es mir geraten
5 were het mir got dise kraucheit nicht zû gesant. Ir sült wissen daz
mich mein vater ein reich man liesse vnd als er starb gab ich den
gröstenn teyle meines gütz durch gotz willen vnd darnach mit dem
wenigen, ich mein leben hine möcht bringen vnd auch den [3^b] armen
möcht gehilfflich sein han ich ein wenig kaufeschacz gehandelt, vnd waz
10 ich gewonen han alwegen den halbenn teyle den gotz armen mit geteylt
han das ander halbt Eyl zû meiner nottorfft gekert; Dar vmb mein herre
got vnd schöpfer alweg gehilfflich ist gewesen vnnnd meine sach sich stätz
gemeret vnd gepessert haben. Nun habe ymer danck sprach der güt
man Nun sage mir sunne das dich got gesegen? wie hast du dich oft
15 erzürnet O sprach Serciappellet, do sprich wol daz ich das oft han getûn.
Nun saget mir lieber vater wer möcht sich des enthalten den ganczen
tage nicht anders sechen dann die menschen übel tûn vnd kein gepot
gotz nicht halten kein forcht haben keines seines vrteiles. Es ist oft
der tag gewesen ich het lieber den tode dann lebendig sein, gesechen
20 han ich die iungen nachgen iren pösen willen, mit schweren schiltten
vnd fluchen got vnd seinen heiligen nimer gen kirchen gen kein ver-
driessung haben den ganczen tag in dem pirhauß steen, vil ee dem pösen
weg der welt nachuolgen dann den wege zû got suchen. Do hub an
der heilige man vnd sprache. Lieber sun daz sein güt zorn ich möcht
25 dir dar über kein puß sprechen sag mir fürpaß sun? Hat dich [3^c] zorn
oder neide ye zû keinem todschlag pracht oder yemant übel nach ze reden.
Vber daz Serciappellet antwürt vnd sprach. awe herre ir mich dunket
ein mensch gotz? wie müget ir nûr ein sölchs gedencken ich gesweige
ze reden, vnd daz mir nûr ein sölches ze tûn wer in mein gedanke ko-
30 men gelaubt, daz ich gelaube daz mich got nicht ein tag leben lassen,
Daz sein werk die puben lötern vnd pösen leuten zû gehörn vnd wo
ich der ye keinen gesehen han zû den ich alweg gesprochen han, gang
hin daz dich got bekere; mer sage mir sun daz dich got gepare pistu
oder hastu ye wider yemant falsche gezeugnüß geben oder von yemant
35 oder von den seinen übel geredt. Herre vnd vater sprach Serciappellet,
Ja das han ich oft getûn vnd übel geredt. Ich liet eins mals einen nach-
pauru der teglich vmb sonst vnd nichte sein weyb schlug sölches mich
sere erparmet daz ich es iren freunden saget als oft er heim kam nymer

lere kame alweg vol vnd trunken was; so waz die arm schlege gewise.
Lieber sun du sagest mir auch wie du seyest ein kauffman gewesen
hastu yemant petrogen als gern der kaufleut gewonheit ist mit deinem
kaufeschacz. Herre vnd vater ich mich schuldig gib es ist wol war
5 [3^d] doch weiß ich nit wer er ist, der het mir gelt pracht vmb tuch daz
ich im verkauft het daz legt ich vngezelt in einen kasten. Darnach
über einen monet ich fande daz des geltes mer was dann sein solt vier
haller; die behielt ich wol ein gancz iare ob er sich indert fünde der
mir sy geben hat; dar nach ich sy gab vmb gotz willen, daz was ein
10 klein ding sprach der güte man doch waz es wol getün. Auch mer vnd
anders in der heilig man fraget auf alle frage er im sölche antwürt gab;
Nun der peichtiger in nit mer fraget vnd im ablaß über sein sünde
sprechen wolt; do sprach Serciappellet vater ich han noch waz sünde vor
handen der ich euch nitt gesagt han Do fraget der güte herre was sünde
15 daz weren, mir ist in gedanke komen wie ich an einem samstag nach
der none zeit machet daz hauß kern mittinen knecht mit dem ich vneret
den heiligen sonntag. O sprach der peichtiger daz sein kleine sünde
sy gen mit dem geweichten wasser weg; do sprach Serciappellet; nicht
sprecht sy seyen kleine es ist wol übel genug gethon. dann den heiligen
20 sonntag man eren sol; dann an sölchem tag got der almechtig von dem
tod erstund Der güte man sprach, Sun hastu anders getün daz sage mir
Er sprach herre vnd vater [4^a] ich hat nicht wohin, darum ich eins
mals in die heiligen kirchen speybe oder speyct. Dez der heilige man
lachte vnd sprach; sun daz heist als nicht getün; wir alle in vuserm
25 orden täglich dar ein speyen. Vber das Serciappellet sprach dar an thut ir
grosses übel vnd vnrecht dann kein ding soll reiner gehalten sein dann
der tempel gotz in dem man täglich das heilig ampt beget. Söllicher
abeyse er dem güten man vil sagt; dar nach an hub ze weinen vnd ze
seufzen. als des der sölches meister was? sun was pricht dir sprach
30 der güte man Er im antwürt! vater ich han ein sünde noch vor handen
der ich mich alle meine tage nye gepeicht han; also grosse scham vnd
erschrecken mir do von bekommen wenn ich die pedenk Ich als ir wol
secht weinen müsse vnd mich laß on zweifel gedunken got mir die
nymer vergebe Der hilige man sprach; sun lasse abe? waz ist daz du
35 sagest; wern alles menschee sünde vnd die noch süllen gethon wern,
die weyle die welt stet in einem menschen alleine vnd er darüber reue
vnd leyd hat; als ich in dir vernyme; die parnherczigkeit gotz im die
alle wil vergeben. dar vmb piß on zweifel sag frölich allen dinen gepre-

chenn. Do [4^b] sprach Serciappellet Awe lieber vater mein sünde ist so groß daz ich nit gelauben mag Es geschehe dann durch eüer pete für mich zů gote, anders sy mir nymer vergeben werden Sag an mein sun ich dir verspriche got für dich ze pitenn Serciappellet nicht antwürt nür
5 stätz geweinet, vnd der gůte man in albeg tröstet ze sagen, vnd do Serciappellet daucht er den gůten seligen man mit seinen öden teydigen vnnützen Worten genug auf gehalten het vnd mit seinem weinen er genliesse ein grossen seüfzen vnd sprach mein allerliebster herre vnd vater; seyt mal ir mir verspricht got für mich ze piten so will ich es
10 euch sagen; wist lieber vater do ich kleine was; ich meiner müter fluchet vnd sie schalte Do er daz gesprochen het wider an hube ze zefetze vnd weinen. Do sprach der gůte man lieber sun dñket dich daz als ein grosse sünde, die menschen fluchen täglich got vnd seinen heiligen vnd er vergibt in daz williclichen vnd gern wer dar über reüe
15 hat vnd du meinst er sülle dir nit daz vergeben weine nit hof in got vnd tröst dich vnd werestu der einer die got an das kreucz genagelt hatten, vnd hest die reüe die mich dunket du habest, one [4^c] zweifel er dir vergebe. Do sprach Serciappellet awe vater waz sagt ir meiner lieben müter die mich in irem leibe neün monet vnd an iren armen wol hundert male getragen hat, der zů fluchen vnd ir übel ze reden für war daz
20 ist ein übergrosse sünde; darum pit ir got nicht für mich er mir sölicher grossen sünd nymer mer vergibt Der gůte man wol vernam daz Serciappellet nit anders ze sagen het; im aplaß sprach über sein sünde; im den segen gab vnd für einen heiligen menschen hielt vnd für war
25 allas daz gelaubet daz er im gesagt het. Aber wer weer der gewesen der nit gelaubt hat einem an dem tod pette. Nach allen disen vergangen Worten der gůte vater sprach zů Serciappellet mit der hilffe gotz ir pald gesunt solt werden, vnd ob es sich füget daz got der almechtig über euch gepüte vnd euch zů seinen genaden nāme; wer es
30 euer gefallen eüerm leibe herberggeben in vnserm kloster sprach Serciappellet herre ich begere nyndert anderswo ze sein dann pey euch; seyt ir mir versprochen hat für mich got ze piten wie wol ich alwegen besunder neigung han zů eüerm orden gehabt Mer ich euch pitte, als pald ir ze hause komet zu ha[4^d]nt mir schaffet komen daz heilig sacrament,
35 daz ir des morgens auf dem altare handelt wie wol ich sein nicht wirdig pin; doch das mit eüerm vrlaub vor meinem letzten ende gern enfahen wölt dar nach die heiligen ölung. Sitnale ich in diser welt als ein sündler gelebt han; doch daz ich sterbe als ein kristen mensch. Der

heilig man zû im sprach er daz gern thon wölt vnd ze hant geschehen
 sölt vnd also geschahe. Die zwen pröder die sere czweyfelten vnd
 sorge hatten sie von Serciappellet betrogenn würden seiner peichthalben,
 sich verporgen secztenn pey der kamern do Serciappellet vnd der münche
 5 mit einander ir rede vnd gespreche hatten peyder rede wol vernomen
 hetten in peyden grosse müe was das lachen ze verhalten vmb der spöt-
 lichen peicht willen des pösen menschen; zû einander sprachen waz
 pösen leichnam der ist das der nicht an sicht weder sein alter noch
 swere kranckheit noch forcht des tods den er in so nahen sicht Noch
 10 das vrteile gotz daz er nicht lange verget wol empfinden wirt; wie es
 sich vmb sein pöses verganges lebenn ergen wirt Alle dise ding in nicht
 pekeren mügen das er [5^a] nicht in seiner poßheit sterben wölle! Doch
 frölich vnd on sorge waren dann wol vernomen hattenn das geweichte
 im ze teyle ward; dar vmb für paß on sorge seinthalben waren. Zû
 15 hant dar nach sich communiczirt vnd die heylig ölung empfinde vnd vmb
 in es sich ergern ward als mit dem der tode range vnd ein klein über
 vesper er verschiede vnd starbe Die zwen pröder ordnung gaben in er-
 berlich ze begraben palde nach den münchen schikten nach ir gewon-
 heit des abencz im vigilge sunen vnd des morgens den leichnam ze
 20 kirchen trugen. Der heilige man sein peichtuater vernomen hat wie
 Sernappellet verscheiden vnd tode was, schnelle zû dem prior kom vnd
 schaften zû capitel leuten die münche alle zû einander komen Der gûte
 peichtiger vnd heilige man fürleget vnd sprach, Nach dem vnd in Ser-
 ciappellet peicht vernomen hat; Er für ware vnd on czweifel ein heiliger
 25 man vor got were, vnd er hoffet got durch in grosse wunderzeichen
 durch in thon würde, vnd daz man seinen leichnam mit grossen eren
 vnd wurden enpfahen sölt; dez der prior mit dem ganczen conuent
 willig warn, vnd ze hant des [5^b] abencz gingen in ein wirdig vigil
 sunen; dar nâch des morgens alle in korrökenn mit dem kreuce
 30 vnd wirdigem gesange in ir kloster vnd kirchen trugen, vnd in nach-
 uolgt alles volke der ganczen stat von mannen vnd frawen groß vnd
 klein iunck vnd alte. Der heylig man sein peichtiger auff stunde
 über in ze predigen; von erste sein grosses fasten vnd heiliges leben
 lobet; nach dem von seinem reynen keuschen leben vnd iunckfrawe-
 35 schafft von seiner grossen einfeltikeit Auch noch vil mere anders daz
 Serciappellet für sein gröste sünde im mit weinenden augen gepeicht het
 Nach dem sich gen dem volcke keret vnd sprach mit schreiender styme
 O ir vermaledeiten von got, vm balle kleine vnnütze ding die sich vnder

eßer füsse wickeln ir got vnd seiner lieben müter flucht; darum euch
 got geben wirt den lone der ewigen pein Noch vil mer vnd anders er
 von dem pösen Serciappellet saget sunder seiner grossen treüe vnd rei-
 nikeit; vmb des willen alle menschen die pey dem gegenwürtigen ampt
 5 warn; do daz ze end komen waz mit grossem getreng zü dem körper
 trungen im hende füsse kusten, sich selig sein dauchtenn die sein ge-
 wante an [5^c] rüren vnd gehaben mochten das im alles von seinem leybe
 gerissen warde vmb seiner heiligkeit willenn, vnd dem volcke ze liebe;
 man in einen ganczen tage must also sten lassen da mit in daz volcke
 10 vnbegeben sechen, vnd im seine hende vnd füsse küssen, Dar nach pey
 eytler nacht man in in ein merbelsteins würdigs grabe leget, vnd an
 dem nechsten tage darnach vil tausent liechte im züeren auf dem grabe
 anzündet worden, angepet als einen heiligem man Sein name vnd heil-
 likeit in allem lande warde außgepreit vil menschen vmb kranckheit oder
 15 ander betrübung willen sich zü im gelobten mit ieren wechsen opfer zü
 im walten vnd genant was sant Ciapelett, on czweifel meinten vnd ge-
 laubten got durch in vil zeichen thon würde, weliche person sich im
 diemütiglich befülhe also habt ir vernomen wie der Ciapelett sein leben
 auf erden füret, vnd nach seinem tode also für heilig an gepett warde.
 20 Ich wille des auch nicht laugen noch neyn sprechen, daz er vor got
 nicht möcht heilig und selig sein; wie wol sein leben als ir vernomen
 habt pöse was. Doch söliche reüe in seinem ende möcht [5^d] über
 seine sünde gehabt haben, das im villeichte got die vergeben hette,
 vnd in zü im in sein ewiges reiche aller freuden genommen het; daz
 25 möchte nun alles sein, dann die parmherczikeit gotz on ende ist Doch
 ich sein ser czweifel mütlicher vnd geleuplicher ist, er in abgrunde der
 helle in des teufels hende verdamnet sey dann in dem himel sey Wer
 es aber als oben gesprochen ist, grosse ist die diemütikeit gotz, all vnser
 irren wol erkente! doch allweg an sicht die reinikeit des herczen, vnd
 30 vnser schlechten gelauben, Daz wir einen seinen feinde zü vnserm für-
 sprechen zü im machen; Es stet dar auf das wir vnser pete von im erhört
 werden, nit minder als durch pete eines heiligen wir zü im vn genade
 rüffen. Also auch wir mein aller liebsten frawen, vns durch sein ge-
 nade in diser gegenwürtigen grausamen pestilencz an das ende zü ein-
 35 ander gefüget habenn Darum wir zü im rüffen vnd schreyen süllen; er
 vns sein genade vnd parmherczikeit mitteyle vns vnsern gesunt verliche
 vnd nach disem leben daz ewig leben, da mit loben des namen, in dem
 wir her komen sein, dem wir vns in vnsern [6^a] nöten befehlen süll-

len; des wir on zweifel von im erhört werden; wo wir mit andacht zů im rüffen.

Do nun die wirdig gesellschaft in Pamphilo neüe histori genug des pösen manns der Ciapeleto gelacht vnd gelobet hetten, der künigin gefallen was, das Neyphile der angefangen materi nachuolget, die nitt minder von czucht vnd miltikeit geomnirett was als von tugent vnd schöne, mit kurczen worten sprach sie willig weren ze thon ir gefallen, Die also sprach; Vns hat Pamphilo in seinem sagen genug wol beweist wie grosse die parnherczikeit gotz ist Der vuser irren nicht zů aller zeit an sicht; 10 waun wir sölches irren nicht vernemen, vnd ze irren nicht von herczen komet; sunder on geferde geschicht. Nach dem auch ich euch in einer meiner histori beweisen meine, wie die selbig diemütig wirdig miltikeit gotz so gedultiglichen leydt vnd verdregt die grossen übel vnd das schwere irren der die da von inselbs mit worten vnd wercken ires irren 15 ware gezeugnúß geben.

Wie Abraham vnd der Iude [6^b] durch freuntschaft vnd rate Gianotto kaufman von Parisy, Wie wol er der Cristen herren pöse werck vnd übel gesehen het zů einem güten Kristen warde.

Mein aller liebsten frawen vnd auch ir iungen manne. Nach dem 20 ich vernomen han; wie zů Parisy ein reicher kaufman wonet der waz mit namen genant Gianotto von Cingni, ein gerechte aufrichtig redlich kafman; der selbig besunder gunst vnd freuntschaft zů einem reichen Iuden het genant Abraham; der auch ein gerecht güť kaufman in seinem iudischen gelauben gehalten was, des güte vnd gerechtikeit von 25 Gianotto erkant was vnd im vmb den Iuden sere leyt was daz also eines güten gerechten man sele solt verdampft sein, gelaubens halben sölte zů der ewigenn pein komen; Eins tags sich zů im füget in freuntlich pate daz er den iudischen gelauben liesse vnd kristenlicheunn gelauben an sich nem, den er heilig, güť, vnd stäcz meren seche; wo er seinen iudischen 30 gelauben widersins mit stättem abnemen vernem. Der güť Iude Gianotto antwürt vnd sprache. Er keinenn andern [6^c] gelauben weder heilig noch gerecht verneme dann alleine dem iüdischen, in dem er geporn were vnd dar inne meint ze sterben noch keinerley gesein möchte das in dar ab precht, Gianotto vmb des Iuden herter wort willen nicht abe 35 ließ, vnnd nach etlichem vergangen tage sich mit züchtigen wortenn wider an in machet mit im nach der kaufleute gewonhet begonde in dem

gelauben zů disputiren wie der kristliche gelaube pesser dann der iudisch were, vnd wie wol der Iude in seinem gelauben vnd iudischen gesecze Ein groß meister vnd raby was; Doch darumb Gianotto wort nicht verschluge sunder ee nach gabe; ob dez die grosse frentschaft
5 vrsach waz oder ob der heylig geyste in dem kaufman vnd auf seiner zungen würcet ir mir nicht wissent; Dann eines ist mir kunt das Gianotten wort den also erweichten das er sie on masse gern höret; Doch alle weg feste vnd starck in seinem gelaubenn stunde sich in keinen wege wolte bekeren lassen, vnd ye fester er in seiner meinung stunde
10 ye fester im Gianotto zů seczet vnd minder ab liesse, das er also lang treibe das sich der Iude über[6^d]winden liesse vnd zů Gianotto sprach; Ich siche wol das es dein wille ist, das ich ein Kriste werde; Nun pin ich bereyt ze thon dein gefallenn. Aber ich will vor gen Rome den pabst ze sechenn, den du sprichst er eüer got hie auf erden, vnd got des hern
15 vicari sey; ze vernemen sein vnd seiner prelaten güte sitten; Des selben gleichen seiner pröder cardinale; mag ich pey in vernemen daz der kristenlich gelaub pesser dann der iudisch sey nach dem du mir hast ze versten geben, so will ich gern thon als ich vor gesprochen han ein Kriste ze wernn, wo ich aber nicht finde als du gesprochenn hast so be-
20 leybe ich sten ein Iude als ich pin. Do Gianotto des Iuden rede vnd meinung vername, ser übel ze müte zů im selbes schweigent sprach, Ich hab müte vnd arbeit verloren die ich meinete so wol angelegt hat, Ich hoffet ich het den bekert So pin ich ferrer doch von dann ye; dann komet er gen Rom vnd sicht das hoffertig pöse lebenn der cortesou vnd
25 der gestlichen ordnunge; Nicht das er sich von Iuden zu Kristen mache Sunder wer er ein Krist on czweiffel er zů einem Iudenn würde. Nach sölchem bedenken [10^a] sich gen dem Iuden keret vnd zů im sprach; Abraham gütter freünd wes wilt du dich zeichen dir dise müte zenemen; vnd in also grosse speise vnd sorge zekomen als dir zů sten wirt gen
30 Rome ze zichen; An das daz es einem erbern man als du pist über mere vnd über lant sere besorglich ist; meinstu nicht hie zefinden der dir die taußf gebe; du zweifelst villeicht an dem gelauben? wo sein grösser lerer vnd meister der heiligen geschriff dann hie zů Parisy do man dich des du zweyfel hast mer dann anders wo vnterrichten mage, vnd dich dines
35 irren klar machen Darumb ich dein romfart über vnd on nottoft schacze, bedencke das die geistlichen prelaten nicht ze Rome sein dann als du sie hie gesehen hast, vnd noch so vil pesser als sie dem heiligen vater dem pabst nechner sein. Darumb volge mir vnd meinem rate vnd

behalte die müe zů ander zeyt, etliche genade zů erwerbenn Des ich dir
villeicht gesellschaft tůn würde, dem der Iude antwůrt vnd sprach;
Gianot ich enzweyfel gelaube im sey als du sagest; doch mach wir auß
tausent Worten ein rede vnd wort; ich pin gancz geschiket wiltu anders
5 daz ich thue [10^b] des du mich gepeten hast gen Rome ze ziehen die heiligen
stat ze besehen anders ich tůe ir keines des du an mich begert
hast. Do Gianott des Iuden meinung vnd willen vernam zů im sprach so
zeuche in dem namen gotz got gebe dir gelücke vnd heile; wol gedachte
kōme er gen Rome vnd seche den rōmischen hoff mit seiner grossen hof-
10 fart er kein Kriste nimer würde, da mit seine wort endet, vnd der Iude
so er peldest mochte auf ze roße sasse gen Rome reyte; Do er von den
andern Iuden mit grosen eren empfangen warde, do er etlich zeit sein
wonunge het; niemant sein gescheffte ze wissen thet, do er gar wol vnd
eben des pabst der cardināl, pischoff vnd aller prelaten weise, sitten ge-
15 perde gesechen vnd nach aller nottorfft vernomen het. vnder den allen
er eines weisen mannes war nam; zů dem er sein gemüte keret vnd sein
grosse kuntschaft nam, der Iude des an in begert ze wissenn ornlich
vnterricht. Do er sach, greiffe, vnd fandte von den höchsten grōsten vnd
kleinsten gemeinlichen alle in vnzucht offenlichen in aller vnkeusche
20 erplint lagen; nicht allein in natůrlichen sachen sunder in vn[10^c]natůr-
lichen sůnten vnd daz on alle masse vnd zaumunge ir selbes, vnd das in
maß das de macht der vnzůchtigen frawen vnd manne mer genade vnd
alle grosse dinge ze impetiriren vermōchten. Dann der gůten vermügen
was; der on zweifel wenig waz, Vber daz grosser sauffer vnd fůller mer
25 dem pauch ze liebe dann got lebten den vnuernůftigen tieren geliche.
Mer fůrpas er ware nam ir grossen überflüssigen geitikeit Nicht alleine
das menschlich plůte, sunder die gōtlichen vnd heiligen wie die gesein
mōchten es were heiligtum, beneficia oder sacrificia; die offenlichen vmb
gelt verkauffen vnd hingeben sache wer am meisten darum dabe, mer
30 grosser kauffleut vnd vnterkāufel dann zů Venedig vnd Parisy tuchver-
kauffer sein. Also gemeinlich mit der heiligen gůt vmb gen sichselbes
mit sampt den andern mit irem ũbel tůn in ab grunt der helle versenken.
Aller diser geschener dinge, der Iude der ein zůchtig, messig weise man
was, grossen vngefallen het; vnd wol dauchte er sein ein genügen ge-
35 sechen het, aufsasse wider heime gen Parisy reyte. Do Gianotto vernam
das sein Iu[10^d]de von Rom wider kōmen waz klein hoffnung seiner an-
gefangen materi hette; doch pald zů im kam grosse freude fast einer
dem anderen machet. Nach dem in Gianotto fragt wes in des heiligen

vaters des pabst seiner cardinale vnd pischoff deüchte Dem der Iude palde antwürt vnd sprach; Lieber Gianotto mich bedünket nichtz gůtz weder irer wort noch werke got geb in iren lone als vil ir ist, vnd sage dir in der warheit do ist weder andacht noch heiligkeit keinn gůt werck
 5 noch züchtig leben wol vnkeusch, geitikeit, fraßheit do pey alle vnmes-
 sige füllerey, neyde haß vnd hoffart Das sein die dinge die ich in eüer kort zů Rome sichperlich gesechen han vnnd für ware nicht ergers het sechen mügen, keinerley nye anders sach dann tetffische vnd vngöttliche dinge; Auch eüer heiliger vater der pabst söllichem nachvolget, Dar
 10 vmb alle andere als er wol thun mochten, vnd nach allem meinem beduncken mir nicht anders erscheint dann wie sie mit ganzem vleisse suchen den cristenlichen gelauben zů der erden zewerffen; wo sie des beschirmer vnd merer sein sölten Doch wol erkenne das sie [11^a] suchen gen nicht geschehen sol Sunder mer dann ye kristenlicher gelaube sich
 15 meren vnd stercken sol; Darum für war gelaube got der vater sun vnd heiliger geiste kristenlichen gelauben ein gruntfeste vnd auffhalter sein, vmb des willen wo ich piß in meinem gelauben herte gestandenn pin vnd mich zů kristenlichem gelauben han keren wöllen, Nun ich dir ganz zů sag ein Kriste vnd nicht mer ein Iude ze sein, dar umb gee wir
 20 palde. da mit ich mit der heigen tauffe versechen werde vnd kristenlichen gelauben enpfawe. Gianotto der in keinem des von dem Iuden warten was, aller frölich vnd wol ze müte mer dann man auf erden palde mit im zů vnser frawen von Parisy ginge, der priesterschaft begert, daz sie Abraham die heiligen tauffe geben; daz sie willig vnd gern theten,
 25 vnd Gianotto mit vil andern hern vnd purgern Abraham taufften vnd auß der heiligen taufe huben, vnd mit namen Johannes nenten, Also volkommenlichen den heiligen kristenlichen gelauben enpfing Des er in kleiner zeit mer dann Gianotto kuntschaft het. Nach dem lange zeit mit freüden in heiligem gůtem leben sein [11^b] eben endet.

30 Wie ein Iude genant Melchisedech mit einer natürlichen histori vnd neuen fabel grosser sorge vnd angste entging die im von künge Soldan bereyt was.

Do der diemütigen frawenn Neyphile neue histori die ere vnd daz lobe enpfangen het geschwigen was, vnd nach dem als die künigin ge-
 35 fallen waz, Philomena die driten histori deß ersten tags an hube vnd sprach. Ir aller liebsten frawen, die züchtig gesagt histori frawe Neyphile,

Auch mir ein zweyfelde vnd geschehene materi in mein gedanckenn
 pracht hat, Die auch einem weisen iuden zů stunde. Dar vmb mein aller
 liebste frawe vnd künigin ir sůlt wissen zů gleicher weise, als vnser
 pōses gewissen zů manch malen den man von seligem stant nimet vnd in
 5 grosse armůte sezt. Also auch die gůten vernůfftigen sinne den weisen
 man auß grosser sorge vnd angste pringen In freie sicherung vnd růe
 seczen, Vnd das die torheit vnd eyfeltigkeit manchen auß gůtem wesen
 [11^c] zů argem pracht hat Iczund nicht nott thut das ze peweisen, dann
 teglich wir des peyspil sechen, vnd das die vernůfftigen sinne aller
 10 freude vrsache sein; ir in einer meiner kurczen histori vernemen sůlt.
 Dar vmb ir wissen sůlt wie kůnig Soldan von Babiloni nicht allein vmb
 seines grossen weistum willenn zů Babiloni Soldan gemachet ward Sun-
 der auch mit seinem grossen weistum grosse streite wider heiden vnd
 Kristen gewan; Doch sich zů der zeite in grossen kriegem vnd nōten
 15 fande, als der da den merern teile seiner schecz verkrieget hette, vnd
 zů der zeit einer grossen summe geltes nottorftig was, nicht weste wo
 die so palde ze nemen; vnd nach langem bedencken im Melchisedech
 der Iude ze gedanke kam, der gar ein reicher buchrer vnd zů Alles-
 sandria gesessen was, den er meinet er im mit iglicher grossen summe
 20 geltz dienen möchte wo er wůlte, Aber er in on mase geytig erkante;
 darumb besorget er im von gůtem willen nicht mit sōlcher grosser
 summe gelt ze liebe wůrde, Vnd wie wol in groőe not zwang doch dar-
 umb in nicht nōten wolte, vnd da mit im der Iu[11^d]de dienet, oder gůter
 vrsache halben dienen můste. In vngeferbten Worten versuchen besante
 25 vnd fůr sich kōmen schufe, zůchtiglich enpfinge, zů im nider seczet vnd
 sprach Melchisedech; Erber gůter man ich han vernomen wie du in gōt-
 lichen gescheften ein weise vnd wissen man seyest; dar vmb ich gern
 von dir versten wůlte welches von den dreien gesezen des Iuden, hei-
 den vnd Cristen du fůr das pest vnd warhaftigest gelaubest Der gůte
 30 Iude der on zweifel ein fůrsichtig man was, im wol gedachte der Soldan
 anders dan das ze wissen von im haben wůlt, vnd das allein ob er mit
 im in vneinigkeit kōmen möchte thāte; Im gedacht lobet er im der
 dreier geseze eines fůr das ander, daz villeicht der Soldan an dem
 selben nitt ein genůgen het; Dar vmb im gedachte er antwůrt geben
 35 můst do durch er weder verdacht noch in seinen Worten mōcht gefangen
 wern, allen dreien gesezen ein genůgen tůn můste pald sein weise sinne
 gespiczet het Dem Soldan antwůrt vnd sprach Genediger herre euer fůr-
 gelegte materi ist schōne vnd aller eren wirdig vnd do mit ich euerm

fragen [12^a] mein meinung müg zů versten gebenn, vor ich euch ein
 kleine histori sagen, vnd was sich dar inne erging, erzelen musse, dar vmb
 vernempt. Es sey dann sache daz ich irre so lasse ich mich ye bedunc-
 ken wie ich ofte habe sagen hören, Wie ein mechtig reiche man was,
 5 der selbige vnder allem seinen reichtume vnd schacze ein schön kleinot
 het das er ob allen andern kleinotten lieb het; Das was ein edel schöne
 guldin rincke, den er vmb seiner grossen schöne vnd tugent willen eren
 meinete das er nymer mere auß seinem geschlechte kem; des er sein or-
 nung also gabe; das alweg bei seinem eltsten sun der ringe beleiben
 10 solte, vnd des vor den andern sölt erbe sein, vnd alweg vmb des ringes
 willen von den andern solt geert sein. Also lang zeit der ringe in dem
 geschlechte von einem zů dem andern geerbet ward, alle des erstenn
 ordnung hielten Nun sich begabe das der ringe einem zů handen kam
 der het drey sün alle gerade vnd schöne irem vater geleihe; vmb des
 15 willen der vater sie alle drey in gleicher liebe lieb hette, Nun die gůten
 iungen seine sün, des ringes tugent vnd wir[12^b]dikeit alle westen, Ig-
 licher begirig was den zehaben; damit er mer dann die andern von den
 seinen geert würde Vmb des willen iglicher besunder den vater vmb den
 ringe pat, wen got über in gepůte vnd zů seinen genaden nem im vor
 20 den andern den ringe widerfaren liesse. Der gůte alte weise vater, der
 seinen dreien sün geleihe liebe trug, nicht wol gewissen mocht wel-
 lichem er den ring geben vnd lassen sůlte, vnd dem iglichem besunder in
 geheim versprach; allen dreyen nach langem bedencken meinete ein ge-
 nůg tůn, vnd verporgen an yemant wissen zů einez goltschmide ginge
 25 vnd zwen ander ringe dem ersten gleich machen liesse; Die der meister
 dem gemachten seinem ring also gleich machet, daz er selbes do man
 sy zů einander leget einen von dem anderen nicht erkennen mochte; nitt
 mer gewissen mocht welches der erste oder der ander, oder dritte gesein
 mochte, also natůrlich gůte die zwen ringe dem dritten ringe geleihe
 30 warn. Do nun der gůte alte man kranck ward vnd villeicht wol erkante
 seines lebens nicht mer were. Iglichen sun besunder vnnnd vor den
 [12^c] andern verporgen zů im rűffet also iglichem einen ring gab; Dez
 iglicher nach seines vater tode meinete erster vnd wirdigster erbe ze
 sein seinen ringe fürpracht, sein gezeugnůß gabe wie er der erst vnd der
 35 wirdigst pillichen vnd mit recht sein sůlte. Sůlliche sach für erber per-
 son prachte, vnd geschoben ward zů erkennen wellicher der recht erbe
 sein solte. Do fande man daz die drey ringe alle ein ander also gleich
 waren das man des rechten vnd des ersten ringe nicht erkennen mocht

Vmb des willen welicher der rechte ringe vnd erbe sein sölte hangen beleybe, vnd mit der warheit nyemant dar über sein vrteyl sprechen wölt. Also mag ich edeler herre eüer fürgelegten materi sprechen Der dreyer gesecz halben die den dreyen geschlechten von got gegeben wurden Dez
 5 iglich geschlechte das sein für das peste vnd gerechtest helt vnd gelaubt. Aber welches vnter den dreyen daz gerechtest sey hangen als der ring beleybt. Dann alleine das got wissent ist. Do der Soldan des Iuden weißheit vernomen het Da pey er kante, das er sich auß dem lacze dar inne er in meinete hette, also züchtiglich [12^d] hette losen mügen.
 10 Dar ane der Soldan nicht minder gefallen het als hette er in, in dem gerichtten lacze gefangen Nach dem der Soldan im alle seine note öffnet, vnd waz er mit im in willen het ze tün im zü wissen thet, wo er sich also züchtiglich von im nicht hette reden kunnen; der Iud den hern also glimpfflich sahe nicht gelassen mocht aller der summe geltz der er not-
 15 torft was. der er im williglihenn zü liebe ward, Dar vmb im der Soldan ein genügen thet über das in wirdiglichen begabet, vnd für seinen besondern güten freunt hin für alzeit hielt.

Wie ein iung münch in sünd felt, wirdig grosser pein; der seinem abte auch sölche sünd probirt vnd in dar ein füret, Also sich
 20 selbes sölcher bereyter pein frey vnd ledig macht.

Die züchtige frawe Philomena ires sagen geschwigenn ist, Daz Dianeo der neben ir sasse vernomen hett wol erkante was neues zesagen an im were, vngepiten der künigin gepote an hube vnd sprach. Meine aller liebsten frawen pin ich icht betro[13^a]gen oder han ich recht vernomen
 25 So sey wir her komen mit nülen histori ze sagen vns freude ze geben, vnd iglichem müglich sey, nach dem vnser künigin gepoten hat, ze sagen was im liebet, nür vns freude da von bekome. Ir habet vernomen, wie durch Gianoto güten rate Abraham sein sele heyle machet vnd zü einem Kristen warde, vnd wie Melchisedech der Iude durch sein sinne vnd
 30 weistum sich selbes vnd seinen reichtum vor künig Soldan pewartet, so ist mein meinung In einer kurczen histori euch ze sagen wie ein iunger münch durch seine gescheide list grossenn vnglücke entginge Es waz in Lunisana der alten stat die nicht ferr von hinn ist ein münchs kloster, vor zeiten mit mer heiligen münchen besetzt dann nun ist In dem
 35 vnder andern iungen münchen ein iung münch was, dem in seinem heiligen leben das fasten nicht schedlich gewesen waz Der zü seinem gelück

oder villeicht vnglücke eines tages Zû mittag zeit do alle andre münch
schlieffen, er vmb sein kloster spaciren ginge; Das gar an einem eynigen
ende was In söllichem sein geen im ein iunges meydlein zû [13^b] ge-
sichte kam genug seuberlich, Die eines paueren von der gegent tochter
5 was, vnd grasen in dem anger pey dem kloster ginge; Die der gûte
iunge münch so palde nicht ersehen mocht, Das er nitt von grosser hiezi-
ger fleißlicher begirde an gesprungen würde; Des er sich palde zû ire
nächnet, mit dem gûten meidlein zû rede kam ein wort daz ander pracht,
vnd nach langem reden mit einander eins wurden, vnnnd sie mit im in
10 sein zellen ginge dez nyemant war genommen het, do peyde der süssen
liebe mit einander spilten, und daz villeicht mer dann sie getün haben
söltenn theten In dem der abte des klosters von dem schlaffe auf gestan-
den was, vnd in stille in dem schlaffehauß auff vnd abe spaciren ginge,
vnd do er für des iungen münches zellen kam der daz schöne meidlein
15 pey im hette; ir schimpfen vnd scheretzen in dem zellein gar wol ver-
name; vnd do mit er eygentlicher vernem wer pey dem münche were,
sich zû der türe der kamern nachnet, vnd die weybes stimme dar inne
vernam, zû hant aller willen hette in machen auf tün ze besechen wer
daz weybes pilde gesein möchte die so be[13^c]herczent were in sein
20 kloster on sein vrlaub ze komen; doch nach langem bedencken wider in
sein kamern ginge zû warten wenn der iung münch seinen kirchtag auß
gemacht het, vnd wie wol der münch mit dem iungen meidlein grosse
freude het, Doch in eins czwey bedaucht, wie er vor seiner zellen waz
gen höret, palde auf fure vnd an ein klunsen der türe lieff, vnd den abt
25 an der kamertür sten vnd losen sach, im wol gedachte er alle sach solte
vernomen haben, wie er das meidlein pey im in der kamern hette, In
grossen sorgen vnd angsten was nicht weste wes er sich halten solt, mit
eren vnd on schande auß disen vnzüchtigen sachen ze komen; Dann on
zweiffel grosser pein warten was on massen traurig, gar mancherley im
30 gedencken warde, wie er doch sein heyle finden möcht; vnd in söllichem
seinen gedenken im ein nette syn vnd listikeit ein fiele, vnd wie er im die
gedachte, also es im erginge, vnd nun wol sich bedüncken liesse wie er
pei dem iungen meidlein ein genügen gewesen were, zû ir sprach liebe
lasse dich nicht belangen. Ich wille gen sehen wie du wider hin auß
35 dem klo[13^d]ster komest, vnd von niemant gesehen werest; darumb ste
ein klein alleine piß ich wider zû dir kom, Also von ir schiede vnd zû
dem abte in sein gemach ginge vnd antwürt im dem schlüssel seiner
kamern als dann ir gewonheit was vnd alle andre münch theten wann

sie auß dem kloster gingen, mit frölichem angesicht zů dem abte sprach?
herre ich möchte nit auf disen vergangen morgen das holze das ich
hette abe slahen tůn prengen, Darumb will ich mit eñerm vrlaub iezund
gen vnd das prengen machen das da abe geslagen ist; Der abt sich des
5 münches fremde name, im wol gedacht do er an der kamertüre außer-
halbe stünd sein nicht solte war genomen haben des schlüssels froe waz
den zů im nam wol gedacht daz weib noch in des münches zelle sein
sölte, dem münch vrlaub gabe ze gen wo er zů schaffen het. Do nun der
iung münch von im gangen was Der abte an hube ze bedencken wie er
10 die sache handeln sölt ob er die kamern gegenwůrtig eins ganczen co-
uent auff tůn solte da mit einem iglichen dez iungen münchs sůnde wis-
sent wůrde, vnd er wider in nicht sprechen möcht [14^a] In geschehe
vnrecht, vnd gewalt, oder ob er selbes alleine sich der sache vn-
richten sölte. Doch nach langem bedencken vmb minder schande vnd des
15 pesten willen mit im selbes ze rate warde alleine in der kamern ze gen,
vnd von ir von erste erfahren wölt wie sich sölche sache begeben hette,
auch im mer gedachte es möchte villeicht sölliches mans tochter oder
weybe sein Das ich ir in keinem wege hette solche schande vergůnnen
wölln Darum in pesser deũchte vor ze besehen wer sy doch gesein
20 möchte, nach dem tůn was in gůt deuchte mit grosser stille zu des
münchs zellen ginge; die auf thet darein ginge vnd palde zů sperret.
Do das iunge meydlein den abte komen sach, scham vnd forcht halben
an hube zeweinen. Der abt des schönen weydein palde war genomen
het, vnd wie wol er ein alte schwere man was; Doch darum im nicht
25 minder als seinem iungen münche geschache; In fleischliche begirde zů
hant enczündet, zů im selbes sprach? war vmb nyme ich mir nicht mit
disem iungen meydlein ein kleine freude, seytmal ich es nach meinem
[14^b] willen gehaben mag. Dann sy ist iunck schöne vnd lieplich vnd
nyemant ist kunt daz ich hie pey ir pin, Ich weiß nitt warum ich es
30 lasse, wer wirt sein inne, so ist vnwissende sůnde halbe vergeben; Dann
villeicht mir ein sölliches gelůcke nimer mer zů handen komet Ich lasse
mich beduncken es kome von mere sinne daz zů der zeit zenemen wen
es got geyt. Nach sölchem bedencken aller von seiner ersten meinung
abe stunde, vmb des willen er dar komenn was, sich zů dem iungen
35 meidlein nachnet pey seiner hant nam tröstet vnd pate das sie von irem
weinen liesse, on alle sorge were ir solt nicht args zů sten, nůr frölich
were. Nach dem ir seinen willen endecket freuntlich vnd lieplich pat sie
im zů seinen willen gehorsam were, Das gůte iunge meidlein dem das

süsse holcz vor wol geschmecket hette, dapey weder von eysen noch diamante waz, genug pald zû des abte willen sich erbeichen liesse vnd zû seinem willenn geschicket waz, der sie zû mer malen e er auf des münches petlein steyge halset vnd küsset, vnd auch villeich sein alte
 5 schwere wirdikeit an sahe [14^c] vnd des meydlein weiche alter vmb seiner schwerung willen vnd da mit dem meydlein nicht ze wee geschehe; Er ir nicht auf ir weiches leiblein steyge, sunder sy auf den seinen steigen thet, Also gût zeit sein freude vnnnd lust mit ir hette; In dem der iung münch der an verporgem ende in dem schlaffhauß gewesen was;
 10 dem abt het ze versteen geben wie er ze holcze ginge, für sein zellen kam, durch ein löchlein zû der kamern türe ein sache, vnd alles das der abte mit dem schönen meydlein beginge ersache, vnd gar eben warnam Do er aller sache ein gût nottorft gesechen het, wider an sein verporgen ende ging; vnd der gût abte seinem vnkeuschem willenn auch ein genü-
 15 gen mit dem iungen meydlein getûn hett von ir ginge die zellenn wol versperte vnd in die seinenn ginge. Nicht lang dar nach do er vernam das der iunge münch ze hauße was im für sich rüffet den er on czweifel straffen meinete vnd in gefencknûß legen, vnd daz alleine dar vmb; damit er den gewunnen raub allein besiczen vnd zû seinem willen haben möcht
 20 vnd do der gûte münch für in kam [14^d] mit herten Worten in begonde ze straffen vnd in gefencknûß füren wolt; Der iung im antwürt vnd sprach? Herre ob ich etern willen nicht getûn hab das last euch nicht fremde duncken dann ich pin so lange in sand Benedeichten orden nicht gewesen das ich alle ding igliches besunder lernen mügen; dann ir habt
 25 mich noch nicht vnterrichtt, noch gelert, wie die iungen münch mit den iungen frawen leben sullen wo sie sich pey in finden Als ir nûch dann des fasten vnd peten vnterweist habet, ob die gûten münch ob den schönen frawen oder vnder in ligen stülen; daz ich netlich zû gûter maß von neûen von euch gesechen vnd gelert han. Darumb wo ir mir das verge-
 30 bet; ich euch pey meiner trewe verspriche in sölchen sachen nymer ze sünden; sunder alzeit tûn sol als ich euch nit lange zeit ist in meiner zellen gewesen. Der abt der ein gescheider fuchs waz palde des iungen münchs rede vernomen het, Im gedachte als dann ware was wie er alles daz er mit dem iungen meidlein gethun hette sölt gesechen haben, sich
 35 mer dann der iunge münch seiner eygenn [15^a] sünde schamet als der, mer dann der iunge münch iglicher grossen pein vnd straffe würdig gewesen were; Also er dem iungen münch sein sünde vergab da pey im gepote das er von im gesechen hette pey im verporgen hielte Nach dem

verpörgenst das iunge meidlein weg schickten, auch wol ze gelauben ist daz sy das güte meidlein zu mer malen widerumb komen theten.

[15^b] Wie die marggreffin vonn Monferrato des küniges von Franckreich grosse vnörliche liebe mit etlichen hübschenn Worten
5 straffet.

Dioneo neüe fabell von erste den frawen ire herze mit einer kleinen scham verwunt, des ire angesichte mit röte zeichen gaben, Eine die andern ansache mit mar[15^c]ter das lachen des iungenn meydlein vnd des alte abte halben verhalten mochtenn. Doch do des ende
10 komen waz vnd er die züchtigen frawen getröst het wie sölche neüe fabel nicht alweg vnder erbern frawen ze sagen güt wer Nach dem die künigin der züchtigen iungen frawen Fiametta ir gepot thet, Die mit züchtigem geperde vnnnd senfter stimme an hub vnd sprach, Lieben frawen mein gefallen ist euch ein kleine histori ze sagen Vnd die ist
15 was sterck kraft vnd macht die vernüfftigen schnellen antwürt haben. Auch was grosser sinne pey dem man sein muß erber frawen liebe ze gewinnen Auch in den frawen grosse vernunft sein muß, sich vor den mannen wissen ze hüten, ir ere zü pewarten, sonder vor den grossen herren die zü zeitenn mer gewalt dann vernunft präuchen, Als ir dann
20 wils got durch meine neüe fabeln vernemen sült; Wie sich ein schöne edele frawe mit Worten vnd wercken vor einem künige beschützen kund, vnd den der ir zügesetzt het beschamet ließ.

Es was ein marggraffe von Manferrato gar ein redlicher [15^d] fürsichtig man, vnd der heiligen kirchen pauer herr; der zü disen zeiten
25 mit den Kristen vnd gewapentder hant über mere zoche, Des selben marggraffen redlicheit von herren Boria an des küniges von Franckreich hoffe; der auch über mere ziehen sölte, gesagt warde Do pey ein ander ritter sprach wie vnder dem himel vnd allem gestirn nit czwey eleut wern; die in zucht schöne ere vnd tugent dem marggraffen vnd
30 seiner frawen gleichen möchten. Dann vnter allen rittern er den preise trüg, vnd sein frawe ob allen frawenn die schönest were, sölche wort dem künig von Frankreich der da gegenwürtig waz sein gemüt vnnnd herze in masse durch gingen, das er sie vngesehen von ganzem herczenn lieb het, vnd in vnörliche liebe gen ir enzündet vnd in kei-
35 nen weg über mer ze farenn meinete er weste dann eygentlich gen Genoua ze komen, vnd das darum damit er vrsach gehalten möcht die

schönen marggraffin von Manferrato die nicht ferre von danne wonet
ze sechenn; Dann im wol gedachte der marggraffe zů der zeit zů hause
nicht sein solt vnd auch wo dem also were [16^a] im villeicht dez er
willen het gelingen möcht, vnd wie er im für nam dem er als nach
5 kame. vnd den merern teyle seines volkes voran schiket, vnd er mit
etlichen seinen herren in des marggrafen von Monferrato lant kame,
vnd do er auf ein tagreise kame do die marggrafin ir wonung hett er
sie wissen liesse wie er auff den andern tag, als piß morgen mit ir daz
male essen wölte des die erber züchtig marggrafin dem poten antwürtt
10 vnd sprach; Das ir liebe vnd besunder genad were. Nach dem be-
denken warde was des küniges zů ir komen bedeuten wölte! dann im
woll kunt were daz der marggraf ir man nicht ze hause wer, ir seines
komen nicht gůtz gedencken mochte, wol besorget ir schöne vnd iugent
in dazu prechte; Doch nicht minder dann als ein redlich fraw sich
15 schicket in zů eren, Etlich erber manne zů ir rüffet, mit den ir ord-
nung gabe den künig zů eren, vnd pald alle die hennen die man ge-
haben mocht abtöten liesse, vnd von den alle speise zů essen irem koch
gepote er da von machen solte. Nun der künig auf den benanten mor-
gen nach [16^b] dem er der frawen enpoten het kam Von der frawen mit
20 grossen eren vnd wurden empfangen ward vnd do er die frawen an-
sichtig ward, des keinen czweifel het das er schöner frawen alle seine
tage nye mer gesechen het zů tausent malen mer dann er von dem
ritter vernomen vnd gemeinet hette sich sölcher grosser schöne vnd
tugent zucht vnd geperde in einer frawen nicht verwundern mochte,
25 vmb des willen noch vil mer dann vor in, sie in vnmessige lieb enzündet.
Nach dem in die marggrafin in ein köstliche kamern füret; die im
zů eren zů bereyt was, ein klein ze rüen also lange daz die zeit ze essen
käme. Do sie in mitt seiner wirdigen gesellschaft liesse, vnd sie ging
ordnunge zů essen ze geben; In dem die zeit ze essen komen was; der
30 künig vnd die marggraffin mit sampt den andern hern ze tische sassen,
vnd nach küniglicher gewonheit von der marggrafin diener mit grosser
stille vnd zucht, von edeln wein vnd speise gedienet waren. Der künig
der gegen der schönen frawen über sasse zů zeiten ein lieplichen augen-
pliche schiessen liesse die schönen [16^c] frawen ze sechen, im besunder
35 freude pracht. Doch wie vil köstlicher speise vnd gerichte er komen
sache, vnd wie wol grosse vnterscheid von einer zů der andern was;
So waren doch alle gerichte von nicht anders dann alleine von hünern
vnd hennen gemacht Das den künige fremde nam Daz er die gericht

alle vol wilprecz vernome, vnd auch er den frawen sein komen so lange vor hette zewissen getün, Daz sy wol hette mügen iagen vnd wilpret fachen lassen Vnd wie in das fremd dauchte, doch im ander vrsache nam; dann von hennen mit ir ze reden. mit frölichem angesicht zů ir sprach? frawe gräffin wachsen in diser gegentt alleine die hennen on hannen Die frawe die da listig vnd fürsichtig was vnd sein fragen nicht vmb hünern willen was; sunder vnornliche liebe suchen ginge Auch sy daucht wie ir got genug füglich antwürt sölchem fragen eingeben vund begert het, im ieren willen vnd meinung ze peweisen, dez, des er dann suchen ging, Im ernstlich antwürt vnd sprach; wie wol sie in eren vnd kleydung von den andern vnterscheidung haben, So sein sich doch hie als die and[16^a]ern geschaffen. Der künig der auch ein güter verstender waz der frawen verporgen tugent rede vnd wort vnd der gericht von den hünern gar wol vernomen het vnd wie sein red mit sölcher frawen kein stat hette; Auch seinen gewalt zů prauchen an dem ende kein weg hette, vmb des willenn wie er möcht sein vnornliche entpfangne lieb, vnd daz prinent feuer sölcher in im selbes leschet, vnd on alle hoffnung das male asse; der frawen nit mer zů sprach dann ir hertte wort besorget, vnd als palde er das male enpfängen het, sein schande vnd vn- zucht darkomen bedecken warde; der frawen der ern die sie im peweist het danke saget, vnd so er peldest mocht auf sasse gen Genoua reyte.

-Wie ein weise man mit einer züchtigen rede die grossen gey-
tikeit vnd ypocrisia der prelaten vnd aller geistlichenn straffet.

Emilia die da nachent pey Fiametta saß vnd nun von allen der marggrefin züchtig strasse des küniges von [17^a] Franckreich gelobet hetten, vnd als der künigin gefallen waz Emilia an hub vnd sprachte Auch ich das nit verschweigen mag? wie ein weise weltlich man einen geistlichen seiner geytikeit straffet, nicht minder ze lachen als ze loben Es was ee ir iungen frawenn dez nit lang zeit vergangen ist In vnserer stat ein parfusser münch inquisitor der keczerey Der sich mit ganzem vleiß heilig gen iederman peweiset Als gern ir aller gewonheit ist; Aber pey aller seiner heilikeit er ein güter sucher was Der die den seckel schwere hetten, den in helfen leren, vnd vmb seiner grossen heilikeit vnd vleiß willen im ein alter erber man ze handen kam Mer reiche an gelte dann an sinnen; der nicht czweyfels kristenlichen gelaubens halben im verklaget was; Sunder eyfeltighen, villeichte übriger hiez

des weins oder freude vrsach gewesen was Das eines tages wider etliche seine gesellen gesprochen het, wie er als einen gûten wein hette das in Kristus selbes trüncke; Söliche red vnd wort dem parfu er mûnch inquisitore zû gehöre kamen; der des gûten mans der die wort
5 geredt het, reichthum vnd swe[17^b]ren seckel vernomen het, schnelle cum fustibus et gladiis ein hert swere proceß wider in machet, wol gedachte er im mit dem follen seckel nitt engen sölte; kem er im anders zû handen, Er müst im in den schweren seckel plasen vnd die guldin federn dar auß stieben machen, Vnd nicht lange verginge dem gûten man als
10 einem keczzer vnd vngelaubigen Kristen für sich ze komen gepote, vnd do er für in kam in fraget? ob daz war were als er vernomen het, wie er got zû einem sauffer vnd weintrincker gescheczet hett waz der gût man geredt het dem inquisitore saget vnd im des sein meinung zû versten gabe. Der gût inquisitor der des heiligen hern sant Iohans mit
15 dem guldin munde, andechtiglicher diener was antwürt vnd sprach. so machest du vns vnsern herrenn Kristum zû einem trincker, als wer er Ciciglione oder etters gleichen, ir truncken vnnützen ze nichten pubenn, ir solt euch in etere hercze schamen got mit etern grossen trüncken in etern mundt ze nemen Vnd du wilt mir iczund zû versten
20 geben es kleine vnd gering ding also ze reden sey es ist nit als du dir ze versten [17^c] geyst. Du hast das fewer vnd den tode als ein pöser keczzer verschult; man sol dich als andre keczzer prennen, wo das vnser wille vnd gefallen ist. Sölche vnd andre wort der heilige inquisitor dem eyfeltigen man zû versten gab Nicht minder hert hielte also het
25 er der heiligen driualtikeit verlaugent; In kürze er den gûten man erschreckt vnd sölche forcht auf thet daz er nicht wol weste wie er seinen dingen tûn solte da mit er mit eren von dem mûnch keme Doch nach langem bedencken durch etliche seine gût gûner, dem mûnch mit einer gûten sum sand Iohans mit dem guldin munde genaden die hende
30 salben thett Das zû der stunde der pestilenczischen geytikeit, der prelaten vnd parfusser münche die kein gelte an greiffen ein grosse hilff was; Das der gût man alles dar vmb thet, do mit er pey dem geytigen münche parmherzikeit erwürbe Das derselben tugent ist wie wol Galieno vnd Ipoerite nit do von schreiben, so vermöcht sie doch das sich daz groß
35 troen des inqui itor in ein kreütze bekeret, In gleicher maß als er zû dem heiligen grabe [17^d] faren müste. Im gepote ein schönes gelbes paner ze machen. Do der geytig münche durch dise weg etliche gûte sum geltens von dem eyfeltigen man empfangen het, vnd etlichen tage

pey im auff gehalten het, nach dem im vrlaub vnd ze pusse gab, daz er alle tage zů den parfussen messe höret; Dar nach wider vmb essen zeit zů im kam; dez der gůt man willig vnd gehorsam waz; Nun eines morgens sich begabe das der gůt man meß höret, vnd in dem euangeli ver-
5 nam etliche wort die also lauten. Ir wert hundert vmb einen den ir gebet enpfahen, vnd nach dem daz ewig leben besiczen. Sölliche wort der gůte man in seine haubt fast vnnd zů im nam, nach dem zů dem münch ging Vnd sich im antwürt als er im dann gepoten het, den er zů tische siczen fand Der münch in fraget ob er des selben morgen meß
10 gehört het; der schlecht man palde ia sprach. Der münch in fraget? ob er in der epistel vnnd euangeli der messe icht vernommen het dar an er czweyfelt. Der gůt man sprach, für ware neyn ich herre Ich gelaube on allen czweyfel alles das, das ich hab [18^a] in der messe gehört han; Es ist wol ware ich vernam etliche wort, die mich vmb eßer vnd
15 eßer pröder willen grosses leyte haben tragen machen, Das ir in gener welte also ein hertes strenges pöses leben haben sölt? wie dem sprach der heilige geitige inquisitor? welche wort sein das, die dich vmb vnseren willen also betrübt haben. Der eyfeltig man sprach; Ich vernam in dem heiligen euangeli wort die also sprachen; Ir wert für einen den
20 ir gebt hundert wider haben. Der inquisitor sprach, das ist ware du hast recht gehört vnd wol vernomen? Aber sage mir waz vrsach haben dich dise wort in söliche gedencken gesezset, Das sult ir wissen sprach der gůt man Syder ich hie mit euch gewonet hab ich alle tage vor eßer porten des klostere vil armes volkes fundenn han Do pey alweg czwen
25 oder drey grosse kessel mit suppen vnd prüe, die man euch nymt vnd durch got den armen geyt, Sult ir nun in gener welt alweg für einen kessel mit suppen hundert wider habenn, Ir wert so vil prüe vnd suppen haben daz ir on zweifel dar inn ertrincken müst. Dez die, die mit dem inquisitor ze tische [18^b] sassen alle lachten, Vnd der münch sölliche
30 wort in grossem übel auff nam, Dann wol vnd mere dann die pey in ze tisch sassen vernomen vnd erkanten das in der gůte man mit prüe vnd suppen, in vnd ir aller grosse ippocrisia vnd geytikeit stache, Sich aller vmb söllicher wort willenn betrübet, vnd wer nicht gewesen das er grösser sorge vnd schande sein selbes besorgett hette, er het dem gůten
35 man ein ander proceß zůbereyt vnd wider in gemacht, vmb des willen das er in vnd die andern geytigen münch mit also züchtigen Worten gestochen vnd gepissen het, czörniglich zů im sprach daz er an den galgen ginge thette was er wölt nür nicht mer zů im keme.

Wie Bergamino mit einem seinenn neuen historien den abte von Grüning hern Caneschala Einer geitikeit sticht vnd mit worten peyset, Neulich zů gestanden.

[18^c] Emilia histori die künigin vnd ire gesellschaft nach langem
 5 loben genug wol hette lachen machenn. Nachdem Philostrato an dem
 daz sagen was, vnd er was nettes ze sagen an hüß vnd sprach Ir edelh
 züchtigen frawenn der güte schlechte eyfeltige man mit ganczer warheit
 den inquisitor vnd falschen münche seiner geitikeit genüg züchtiglich
 straffet; sunder des das sie armen geben vil .c. in vnd für die schwein ze
 10 werffen were den armen leuten ze geben. Dises münches geitikeit auch
 mich zetücht euch von einem ze sagen genant Can Schala der sich vnder
 dem adel nitt der vnedest daucht in dem ein gächling pöse geitikeit er-
 scheine; der auch durch ein züchtig straffen eines andern gestraft vnd
 gestochen wart Nach dem ich meine aller liebsten frawen vernomen han
 15 vnd in aller welt erhalt, wie misser Cane Schala dem alle seine tag daz
 gelücke grossen peystandt getün hab Der was für den aufrichtigsten vnd
 redlichstenn man gehalten; der von keyser Fridrichs des andern, zeit-
 ten piß her in dem keysertum ye ge[18^d]wesen waz; der im einest für-
 genommen her ein grosses fest vnd freude in seiner stat pern ze machen,
 20 vnd dar auff vil grosser hern von rittern vnd knechten geladen het; In
 dem sich gächling, waz die vrsache waz ist mir nicht wissen dann er sich
 anders bedacht vnnd in sere gereüen ward sich gancz das er an gefangen
 hett do von zoche, vnd die person die im nun ze hoff komen waren er
 mit einem kleinen für sach vnd palde vrlaub gabe Alleine einen außge-
 25 nomen der was genant Bergamino; der in allen landen für einen schnel-
 len grossen reder gekronet was; der mit keinerley, weder mit vrlab
 noch andern verseeen waz; Doch also sten vnd hoffen beleib; im wol
 gedacht das ein solches an seinen grossen nucz nicht ergeen sölte; Doch
 in wol dauchte, wie er hern Cane auß seiner gedechtnuß komen wer;
 30 dar vmb was er im zů liebe thete in das feuer geworffen were Doch kei-
 nes gleichen thet vnd nach etlichen vergangen tagen do er sich nye-
 mant zů dem das sein hantwerck waz weder prauchen noch rüffen sach,
 sich auf der herber mit groser speiß vnd zerund ligen sache [19^a] des
 er sich betrüben ward vnd nicht wol getün sein daucht Sich on gelte
 35 vnd zerunge fand wol reiche schöne kleider mit im pracht het, die im
 von andern hern geschencket waren; In solchem langenn seinem zeren
 der wirt wolte von im bezalt sein dem er einen rock für die zerunge,

vnd den andern zepfand gab; nun auf den dritten an hube zů zeren vnd nicht von dann meinete ze kómen er het dann denselben auch verzeret, nach dem er von dann reiten wolt, vnd die weile er auf daz drit kleide zeret; Sich begabe das er sich einest pey hern Cane fande do er asse
5 vnd zů tische sasse genug traurig vnd übel zemůte vor dem tische stunde, Des der herre war genomen het, mer zů spůtte dann ze freůden; zů im sprach Bergamino wes gepricht dir daz du also traurig pist sage vns was neűes. Der palde anders bedacht an hub vnd sprach, herre als euch wol wissende ist wie Primaso ein hoch geleret man in gramatica
10 was, vnd des seinen ein grosser vseczer, in seinen nůten im daz selbig im mer ere dann sein gramatica zů manch malen pracht; Daz manchem ze versten gabe wer Primaso waz. Nűn [19^b] sich einest begab das er gen Parisy kam in armes mannes wesen als er dann den mern reyle zů aller zeit was. Dann sein grosse kunst pey im klein geacht was; sunder
15 von den die was vermochten Auch mer ich von dem abte von Grűning vername der der rechtest prelate aller kristenheit ist den pabst außgenommen, von dem ich grosses wonder seiner herlikeit halben han sagen hůren Sunder mit herlichem hoffe zehaltenn; Auch nye warde noch ye yemant zů im kame der an seinem hoffe essen vnd trincken begeret das
20 ein sůliches dem begerer nicht geben wůrde, vnd das besunder wann er ze tisch saů; Das dem kunstreichen Primaso ze wissen kam; wie der abte von Grűningen also ein milte herlich man were des im selbes freůde nam, Im gedachte sůliche herlikeit des abte ze sechenn vnd nach des abte hauůe vnd vnd hoff fraget; das im von Parisy auf sechs meile ge-
25 weist warde; Das der gůt arm Primaso piů auf none zeit zů essen wol erreichen meinete, sich des weges palde vnterricht vnd ze fusse darauf machete; Dreű prot zů im nam auf ein fűrsorge ob es sich begeben das er nicht zů essen het [19^c] das er doch mit dem seinen versechen wer, die selben dreű prot in seinen pűsen schobe zů Parisy auß ginge vnd
30 gůt zeit vor essen kam, do der abte wonet do er in einen seinen kůstlichen palast einging, die tisch vnd taffeln alle zů essenn wereit fande; dez selben gleichen die kűchen mit edeler speyse; formirt sahe, do pey im wol gedachte der abte der herlichsten man der welte sein sůlte, vnd aller seiner herlikeit war name, In dem der salemaster das wasser zů den
35 henden nemen gepote, nach dem zů tisch seczet vnd on alles geferde Primaso gen der kamertűr durch die der abte ze tische gen solt geseczet warde. Nun waz an des abte hoffe ein sůliche gewonheit wie wole yeder man zů tische gesessenn was so gab man doch weder wein noch prot auf

keinen tisch also lange piß der abte zû tisch gesenssen was. Do nun yeder man zû tische gesessen was, man dem abte daz ze wissen tet wenn im liebet er auch gen möchte; Dem abte sein kamertür geöffnet ward, vnd do er dar vnder kam, der erste man der im zû gesichte kam

5 das was Primaso der genug übel in seinem harnische ze tische sasse, den der abte vmb [19^d] seiner übel gerüstung in dem ersten ansechen nicht erkant Do der abte den gûten Primaso also zerissen zû tische siczen sache, im ein pöser gedanken einfiele, zû im selbes sprache. Nun sich nûr an wem ich daz mein zû essen gibe vnd mitt mir ze tische secze;

10 wider zerûk in die kamern ginge die sperren schuffe, vnnnd die pey im waren er fraget wer der zerissen loterpube wer, ob yemant were der in kante, des im zû antwûrt ward wie sein nyemant kuntschaft het. der gût Primaso der do grossen hunger het als der des selben morgens von ferre komen was, vnd lange zefasten nit gewonet het, vnd den abte ze

15 tische nicht komen sache, seiner prote eins auß seinem pusen zoche das er von heimet auß getragen het; an hûbe zû essen Do nun der abte ein gûte weyel in der kamern gestanden waz Einem seinen diener gepote ze besechen ob der zerissen pube weg gangen were. Der im zû antwûrt prachte vnd sprach. herre er siczet noch ze tisch vnd isset trucken

20 prote, das er mit im soll her pracht haben; So esse nûr von seinem des vnsern soll er auf disenn tage nicht versuchen, sprach der abte er hette gewöllet daz [20^a] er von im selbes weg gangen were, darum er zû tisch ze geen verzoche; dann wege ze iagen in nicht wol getûn dauchte, Do nun Primaso daz ein prote gessen het vnd des abte nicht komen sach;

25 nach dem andern prote in den pusenn greyffe, das dem abte palde gesaget ward; der von neuen het besehen lassen ob Primaso weg were. Do er nun daz ander brot auch gessen hett, vnd des abt nit komen sach Das dritte prot er zû seinen henden nam, das auch dem abte ze wissen kam; Der mit im selbes bedencken warde, vnd sprach; was neuen dinges auf disen

30 dage daz nûr gesein mag, daz mir mein gemûte also betrûbet helt, vnd mich wider disen armen in geitikeit der tötlich feint, ich alle mein tag gewesen pin heltet, vnd das meine einem iglichem arme vnd reiche wer des begeret hat der geitikeit zû leyde ich mit geteylt hab Auch spilern pûben vnd raßlern vor augen zû manch molen gesehen hab, vnd mir als

35 iczund sölche pöse gedanken nie zû fielen als vmb des armen willen mir auf disen dage zûgestanden ist, Fürware du falsche geitikeyt du solt mich nicht vmb sunst oder eines [20^b] armen mannes willen so gächling angesprungen sein, für ware daz soll waz grosse geschefte sein, der mich also ein

zû nichter man düncket vnd im des meinen nicht vergünne. Ze hant nach
 söllichen seinen gedanken fragen liesse wer er doch were. Do fandte er daz
 es Primaso was vnd komen was alleine sein herligkeit ze sechen, nach dem
 er zû Parisy vernomen het, den der abte vor langen zeiten in vnd sein
 5 löbliche kunst erkant vnd durch mange erber person vernomen het, sich
 des das er getûn hett sere schamet, williglichen bereyt was Primaso zû
 ern vnd in aller schmachheit ergeczen vnd die im mit gabe wider keren,
 vnd do man gessen hett der abte Primaso schuffe nach seiner wirdigkeit
 herlich kleiden, roß vnd gelte gab zû im sprach; ze reyten oder pey im
 10 ze beleiben zû im stünde; Des Primaso im den dancke saget; des dann
 sölche gab wirdig was, vnd wider gen Parisy von danen er ze füße gan-
 gen was ze rosse geriten kam Do her Chane Bergamino rede vnd histori
 vernomen het des abte erste geitikeit, doch wider alle sein natur vnd
 darnach sein grosse miltigkeit in Primaso ge[20^e]prauchet. Er als der
 15 ein wise man was, wol verstanden het waz Bergamino mit seinen
 fabeln von Primaso meynen wölte, lachent zû im sprache; Bergamino
 du hast mir genûg wol dein meinunge vnd note ze versteen vnd zû er-
 kennen geben; da pey dein tugent vnd mein geitikeit, do von für ware
 mein gemüte niemere betrübet ward dann iczund; Aber ich sol sölcher
 20 pösen vntugent iren weg geben; vnd als sie vnwirdig ist von mir gen
 lassen; vnd zû hant Bergamino wirt schufe bezalen vnd im die dreüe
 kleide wider löset, Daz waren die dreü prot die Primaso an des abte
 tisch gessen het, Nach dem in herlich mit einem reichen kleide begabet;
 dar zû golde gelt roß vnd harnasch ritterlich von im weiset.

25 Wilhalm Vorsiere mit etlichen hübschen züchtigen worten her
 Erminio Grimaldi vonn Genoua einer seiner geitikeit sticht vnd
 peisset.

Frawe Laureta nahent pey Philostrato sasse, vnd Bergamino grosse
 liste vnd geschedickeit het loben hören vnd wol vernomen; Nun an [20^d]
 30 ir were was neües ze sagen; on ander gepote züchtiglich an hub vnd
 sprach; Die gesaget histori auch mich zeucht Meyne lieben frawen euch
 eine von einem redlichen hofman ze sagen; der einen reichen kauffman
 mit etlichen züchtigen worten nitt on kleine frucht stach vnd straffet,
 Die wirt in geitikeit der gesagten hystori geleich sein; Nicht minder
 35 gût ze hörn als die gesagt gewesen ist, seytmal sie sich zû also gûtem
 ende füget.

Es wonet in der wirdigen stat Genoua ein edel man genant Erminio Grimaldi; der do nach dem iderman meinete vnd gelaubete, wie der an gelte, gütern vnd erben der reichste man in Ytalia were, vnd wie er ob allen mannen der reichste were. Also er auch ob allen der
 5 geitigste was, vnd seines gleichen in der welte nitt in geitigkeit gesein mochte; Nicht alleine ander leute ze eren er den seckel enge hielte; sonder in allen dingen die zu seinem eygen leibe gehörten, vnd daz wider aller löblicher gewonheit die gemeinlichen alle vnd edelich kleiden, Das er vmb seiner grossen geitikeit willen nicht thun mochte dez selben
 10 gleichen in essen vnd [21^a] trincken; vmb des willen den über nam Grimaldi verlasse vnd von iederman der geitig Erminio geheissen waz. Nun sich begab in der zeit dieweile er stetz ein leget vnd nit außgab geen Genoua ein redlicher hoffman kam der waz gar eyn zuchtig wolredend man mit namen genant Wilhalm Borsiere Nicht
 15 den heutigen edeln vnd hoffleuten gleiche, die aller ubel vnzucht vnd bößheit vol sin vnd edel wirdig person geheissen wellen sein, die man billicher essel dan edel heissen möchte; die in aller vneinikeit an den heren höfen erzogen sein wo sie vor alten zeyten studierten fride vnd son zemachen irrung vnd vneinikeit ze leschen, wirdig heiret zu zerrichten grosse wirdige freundschaft vnder einander zemachen vnd mit
 20 züchtigen worten die betrübten zetrosten, freude vnd an den höffen mit zucht zemachen vnd mit züchtiger straffe vnd ernstlichen worten die bösen vnd vnzüchtigen zestraffen So sein sie auf disen heutigen dag zu nicht anders gut dann zu rauben vnd stelen, alle vneynikeit in der welt
 25 ze sehen von einander vbel reden vnd noch vil erger tûn vnd mit iren bösen falschen züchten [21^b] die edeln gemüte betriegen, sich stäcz schicken by aller vneynikeit ee dann by eynikeit zu sein vnd zu solchem komen ist daz der böse mer dann der gûte von den grossen hern geeret ist. Nune ich wider zu myner matery keren will, do von ich abe gedrehten waz Des mich ein klein zorn vbertragen hett So sprich ich wie der
 30 vorgebant her Wilhalm Borsiere von allen Genobinern geeret sere waz; In dem er von der grossen geitigkeit Erminio vernomen hete, den er von ganzem herzen begeret ze sehen Nun het der geitig man her Wilhalm grose redliche weisheit vernomen, in als die andern freuntlich enpfinge
 35 mit im mancherley zerede kam nach dem in mit sampt andern hern heym in sin hause füret daz er genug köstlich durchpauet hett. Vnd do er im alle herlichkeyt des Hauses gezeiget hette Er zu herr Wilhalm sprach. Her Wilhalme ir der da vil dinge sein tage gesehen vnd gehört habt? Wisset ir

mich icht neües zů vnterrichten vnd waz ze lern daz nye mer were
weder gesechen noch gehört worden, Das ich in meinem hauß vnd schönen
sale möcht machen lassen. Do her Wilhalm sein [21^c] vngeschickte frage
vername im antwürt vnd sprach. herr Erminio dinge die nye mere weren
5 gesechen noch gehört worden; west ich euch nicht ze lern; Doch seytmal
es eüer gefallen ist so sol ich euch leren des ich gelaube ir nye mer ge-
sechen habt. Herr Erminio palde sprach des pitte ich euch freuntlich
sagt mir was; Aber der antwürt nitt wartet palde sprache; Lasset die
edeln miltickeit mit irer tugent in eüern schönen sale malen. Do
10 her Erminio hern Wilhalm lere vnd rede vername aller in grosse
scham fiele Im in masse dise wenige züchtige wort zů herczen gingen
das er sich gancz von seiner geitickheit bekeret; Zů herren Wilhalm
sprach. Her ich hab zů diser stunde in masse malen lassen das weder
ir noch yemant anders mer mit dē warheit sprechen sol das ich die
15 selben tugent nicht bekant habe, vnd hin für yederman sprach wie
her Wilhalm wenig wort mer kraft vnd macht hetten dann gancz Genona;
also her Erminio der miltest man in geben ward der gen Genona ye
kam noch do geporen warde.

Wie ein künig von Cipri von [21^d] einer edeln frawen von
20 Guaschongna mit worten gestochen was, vmb des willen von einem
nichten man redlich warde.

Nach der gesagten histori Elisa wol dauchte waz neües ze sagen; nun
an ir were frölich an hub vnd sprach. Ir iungen frawen es hat sich oft
begeben, daz man weder durch wort straffe, oder pein etlichen von seinen
25 pösen würcken vnd gedanken nitt hat bekeren mügen, vnd auch offte vnd
dicke ein eyniges wort in sölchen person grosses wunder getün vnd ge-
prahlt hat; Als dann Lauretta in der gesagten histori ist peweisset worden,
vnd auch in meinen reden vernemen wert. So spriche ich das pey des
ersten küniges von Cipri zeiten; do daz heilig lant von Gotfrede ge-
30 wunnen warde. Sich begabe das ein edel frawe von Guaschogna in pil-
grams weiß zů dem heiligen grab zoche, vnd auf irer widerfart in Cipri
bekame; Do ir von etlichen pösen puben groß widerdriesse zů stunde,
des sie sere vnmutig vnd betrübet was; Ir fürname das dem künige zů
klagen. Aber ir gesaget waz wie sie ir müe dem künig ze [22^a] klagen
35 verlüre, dann er wer sölcher natur vnd als zů nichte das er nicht allen
andern leüten schaden gern seche sunder ein aufhalter der die do übel

würckten nicht allein wider die fremden sunder in selbes, Darumb wer do möchte der möchte sich selbes der enpfangen widerdrisse rechen Do das die gute edel frawe vernam wol gedacht sich an iren feinden nicht gerechen möchte; Doch wie dem waz für den künig kam vnd in mit etlichen stichworten vmb sein also ze nichts leben meinert mit zucht ze straffen, vnd weinent für in nider knyet vnd sprach. Herre ich kom nicht für dein genade mich meiner enpfangner widerdriß ze rechen, Sunder vmb der willen die dir vnd deiner krone teglich getûn sein; dar vmb ich dich diemütlich pite du mich lerest vnd vnterrichtest wie du doch
 10 sölche widerdrisse als ich vernim dir gethun sein vertragen vnd mit gedulte geleiden mügest, Da mit ich durch dein lere die niemant mit gedulte auch als du vertragen müg vnd got sey dez mein gezeuge, so geb ich dir gern mein vnmût; seytemal du sölches als ein gûter vertrager pist. Der künig der piß [22^b] auf dise stunde faule spat vnd trege zû
 15 aller gerechtikeit gewesen was Nun von der frawen wort nicht anders dann er als erste von dem schlaffe erwachet were. An dem daz der edeln frawen von den pösen puben getûn was, an hube vnd daz mit grosser pein der die die frawen beschemt hetten, die frawe rache vnd gerechtikeit thet, Dar nach ein herter straffer vnd püsser aller der die
 20 wider gerechtikeit thetten.

Meister Albert arczte von Boloni züchtiglichen ein schöne frawen straffet vnd beschamet, die im daz meinert zetûn.

Frawe Elisa ires sagen geswigen ist, vnd der künigin lezte müe ging Die frölich an hub vnd sprach Ir erbern iungen frawen, geleich als
 25 die leuchtende stern des himels schöne vnd ornament sein; Also auch in dem angende des meien in dem grünen anger die schönen plümlein des angers ornament sein, Also auch daz kurcze züchtig reden der frawen ornament vnd ere ist; dann lange reden den frawen nicht zû stet, wie wol sich zû zeiten begibt das etlich mit iren vil Worten ander [22^c] leüte
 30 schenden vnd straffenn meinen, vnd selbes mer straffe würdig weren; dann die sie straffen wöllen, vnd gern sölchen straffern, die schande vnd der schaden selbes heim rint da wist euch nach ze richten Dann daz gemeyn sprichwort ist wie alweg gern die frawen daz ergest erweln. seytmall mich die lezt histori diser tagereise antrift ze sagenn So wille
 35 ich daz euch mein nette fabeln ein anweissunge vnd lere sey, Vnnd geleich als ir durch diemütigkeiteit von den mannen geschiden seyt, Also

auch durch ander tugent vnd zucht euch zů stet; Iglichem gůte vnd ere ze peweisen. Es ist nicht lange zeit vergangen das in der stat Boloni ein kōstlich arczte wonet; des namen durch alle lant erklange, Der was mit namen genant meister Albertus, ein bedagt man pey sybenczg iaren
 5 alte, des geyst vnd gemůte so edel waren; wie wol im sere alle natůrlich geyste verschwunden waren, Doch darum die flamme vnd prunste der liebe in nicht auß geschlagenn, noch sein vergessen het; Der eyns tages ein schōne iunge frawen die ein wittib was an einem fenster gesechen
 10 het, mit namen genant frawe Marga[22^d]reta, der selben schōnen iungen frawen er von ganzem herczen hulde vnd liebe trug, vnd das in masse daz in gedauchte er die nacht nicht gerůen mōcht wo er sie des selben tages nicht gesechen hett, vmb sōlcher seiner prinender liebe willen táglich für der iungen hause reyte vnd ging; Sōliches sein fůrreyten vnd
 15 gen die nachparschaft war genomen het, des mit einander vil dike lachten vnd in des freude namen daz sie also bedackten alten man puelen sachen gen, Dann sie meinten nyemant anders dann alleine den iungen eyfeltigen leůten die liebe ire gemůt beschweren sōlte, als in prinende lieb enczůnden, Also meister Albertus wege stācz da fůr ginge; Nun in sōlichem seinen fůr reiten vnd gen sich eins feiertags begab das die selbig
 20 schōne wittib mit andern frawen vnd iren nachperin vnder irer haustůre in kurzweile sasse, In dem den arczt iren puelen von ferren gen ir geritten komen sache vnd ir mit sampt der andern frawen rate vernam mit im seines liebe halben vnd puelen schimpfe vnd kůrczweile ze nemen, vnd do er zů in kam die zůchtigen erbern frawen alle geleiche gen dem
 25 erbern [23^a] manne aufstunden, in erten vnd paten daz im liebet zů in an die frische vnd kůlen schaten ze siczen; Des der erber man willig vnd wol ze můte waz mit dem die frawenn alle in das hause an die kůle gingen do die schōne iung wittib von mancherley wein vnd edelm confecte komen thet; iren puelen den arczte ze eren, Nach dem mit genug
 30 zůchtigen worten die frawe alle in fragten, wie das gesein mōcht daz er in die schōnen frawen ire aller nachperin In also grosse prinende liebe mōcht enczůndet sein; Dann die liebe pey allen betagten person von natur kalte wer vnd natůrliche recht verloren hett; Do sich der meister die frawen also ze reden dringen sache, mit frōlichem angesichte
 35 zů in sprache, ob ich die frawen liebe habe des sol sich nyemant wunder nemen, sunder ir erbern frawen; dann wie wol dem alter die stercke der dann sōlcher liebe begeren ist im genomen sein, so mag im doch der gůt wille wider seinen gedanke nicht genomen werden das er nicht

was liebe habe vnd lieb haben sey, sunder schöne frawen die im mer dann dem iungen erkant sein. Die hoffnung die mich peweget daß [23^b] ich alter liebe hab euch, Die da von vil iungen lieb gehabt sein, Das ist die vrsache, daz ich zû mer malen pey frawen mâren gewesen pin die
 5 porri vnd lupini assen, Vnd wie wol in dem selben porro nichtz gûtz ist doch sein haubt ze essen in dem munde am minsten schedlich ist vnd gemeinlichen ir frawen das selben haubt in der hant behalt vnd seinen zagel der am schedlichsten ist esset, Daz nicht alleine zû nicht ist, sunder von argem pösen geschmacke ist Also mag ich mir sprechenn
 10 ir lieben züchtigen frawen, waz weiß ich ob ir in erwelung eines liebhabers vnd puelen auch also thet so wer ich der der on zweifel von euch für eüern liebhaber erwelte wer Die schöne iunge frawe mit sampt den andern vnd einer kleinen schame sprach. Meister ir habt vns mit genug züchtiger antwort vnsers törechten fragen vnd übermütes gestraffet,
 15 vnd sag euch ernstlich zû daz mir eüer hulde lieb haben sol liebe vnd wert ein; als mir dann eins iglichen weisen mannes liebe haben sein sol, vmb des willen vnuersert meiner ern mit mir thut was euch liebe ist. Mit dem der meister 'auf stunde [23^c] vnd des sich im die frawe erpoten het ir danck saget, lachent vnd frölich von ir vnd den andern
 20 vrlab nam. Also die gûte züchtig frawe nicht gancz bedacht mit wem sie schimpfet, sie meint in überwinden; do ward sie mit sampt den andern von im überwunden. Darumb seyt ir weyse so wist ir euch wol ze pewarten.

Die sunne mit irem schein sich gen dem nidergang gericht vnd ir
 25 grosse hieze sich geendet hat, vnd der syben frawenn vnd der dreyer iunge menner netie histori sagen auf disen vergangen tage zû irem ende komen waren vmb des willen ir künigin züchtiglich zû in sprach; Lieben frawen vnd auch ir iungen man, auf disen tag mir nicht anders mer ze thun ist, Dann euch ein netie künigin ze geben; die vns vnser leben freude
 30 vnd ere peware, vnd da mit sie sich auf den zükünftigen tage zû vnser notorffte schicke. Ich sie iczund erwel Darumb in des namen durch den alle creature leben im zû lobe vnd vns ze freudenn Philomena die züchtige sey vnser künigin vnd regirerin Mit dem auf stunde das lorper krenczlein ab irem haubt nam, das mit zucht Philome[23^d]na aufseczet,
 35 Nach dem die gancz gesellschaft ir gelücke wünschet sich alle gen ir mit gehorsam freuntlich enputen, Des sie ein klein schame enpfinge; nach dem Pampinea vor gesprochne wort bedachte dem selben sie auch nach komen wölte Nach dem ir ordnung gabe was man tûn solte an hub

vnd sprach. Mein aller liebsten frawen vnd gespielen, wie wol mich Pampinea mer vmb irer miltickeit dann vmb meiner tugent willen zů eüer künigin erwelet hat so wille ich doch dar vmb nicht on eüer gefallen thun, noch alleine meinem rate folgen, sunder den eüern mit sampt den
5 meinen prauchenn vnd waz mein syn ze thun ist In wenig worten euch das peweyssen wil, han ich mich anders recht pedacht, den wege den Pampinea auf den vergangen tag gehalten hat der vnß löblich vnd kürztweilig gewesen ist, Dem ich hoffe auch also noch ze komen vnd vor
10 mein ordnung geben will do mit sich vnser freunde mere; Dann waz Pampinea ze tůn ze spate was, mein syn ist daz selbig ze verpringen, vnd da mit ir euch was mein syn ze thun ist wisset ze richten, vnd waz ze sagen mein meinung ist [24^a] Ir euch gar wol sölcher materi bedencken ist; es anders eüer gefallen Als euch allen wol wissend ist, wie von anfang der welt Die menscheit von mancherley trübsal bestritten
15 ist, vnd daz piß in daz ende der welte sein wirt. Auf sölche materi euch gar eben bedencket. Vnd von dem vns wiß ze sagen; Denn grosse trübsal vnd traurigkeit zů gestanden ist, vnd on alle ir hoffnung doch zů gütem ende komen ist; Das die frawen vnd manne sere lobten alle prachen Do von ze sagen wol getůn were, Alleine Dioneo do die andern
20 geschwigen waren, Frawe als yederman gesprochen hat, auch ich spriche wie eüer ordnung löblich vnd gůt ist; Doch einer besondern genade ich an euch beger vnd des ich begeren pin, das ist, daz ich nicht bezwungen sey, anders ze sagen dann das mein selbes gefallen ist, vnd da mit ir nicht meinete das ich des begere; Darumb das ich nicht neües
25 ze sagen vor handen habe, vmb des willen ich gern alwege der leczte sein wil Die künigin die in allzeit frölich vnd kürczweilig erkante Ir wol gedachte er daz vmb mer freude willen thete wen die andern alles ires sagen [24^b] müde weren, das er sie mitt einer seiner histori alle sölte lachen vnd frölich machen, vmb des willen mit sampt dem andern
30 des er begern was vergande; mit dem von iren siczen auf stunde, sich zů einem kűlen frischen laufenden wasser daz vnter etlichen schönen grűnen paumen sinen lauf hett gingen, do piß auf das nacht male ir zeit vertriben mit danczen singen vnd springenn Nach dem das selbig enpfingen vnd schlaffen gingen.

Hie hat die erst tagreiß ein ende

HEBT SICH AN DIE ANDER

vnder dem gewalt vnd regimente der künigin Philomena do die
 züchtig geselschaft sagen wirt von den person den grosse vnge-
 lücke vnsälige widerwertikeit zû gestanden ist vnd nach langer
 5 trübsal vnd traurikeit sich doch ze güttem seligen ende gefüget hat.

NVn die sunne mit irem schein vns den neuen tage pracht hat, Die
 vögelein die in dem grünen walde haben an gehalten ze singen, dez vns
 vnsere oren gezeügnuß geben vnd die künigin mit iren frawen vnd iungen
 manne auff gestanden was in den schönen garten den külen tawe vnd
 10 grüne graß mit senften driten [24^c] über schritten hetten, mit hübschen
 sprüchen kürzweiligen gesange als sie den vergangen tag getün hetten;
 in dem die zeit ze essen komen waz sich ze hauß fügten, das male ein
 namen nach dem ein klein rüen gingen darnach auf gestanden vnd als
 der künigin gefallen was in die schönen grünen wisenn giengen, do sich
 15 die künigin an den külen schaten nider seczet, vnd ir geselschaft rade-
 scheybe vmb sie. Do sie der iungen frawen Neyphile ir erstes gepote
 thete, daz sie der für gelegten materi vnd neuen histori mit einem der
 ir den anfang gebe; Die on alle außrede frölich an hub vnd sprach Aller
 liebsten frawenn es begibt sich offe das sich etliche fleyßen ander leüt
 20 ze spotten Sunder etlicher die ern vnd lobe wirdig sein; sölchen zû zeiten
 das gespötte die schande vnd auch der schaden selbes heim rint, Do mit
 ich vnser künigin gepote vntertanige vnd gehorsam ze sein; vnd ich der
 materi neue histori ze sagen nach volge. Ist mein meinung euch kunt
 ze tûn; wie einem vnserm purger groses vngelücke zû stunde vnd pereyt
 25 was, vnd dar nach mit kleiner seiner hoffnung, sich doch zû güttem
 ende füget.

[24^d] Einer genant Martellino zû versten gabe wie er lam were
 an allem seinem leibe, Vnd wie in der heilig sant Arigho von Teruise
 wider gesunt machte; sein grosse schalcheit erkant ward gefangen
 30 vnd wol geschlagen warde. Auch nit ferre dar von er wer an den
 galgen gehangen worden. Die erste histori der andern tagreiß.

Es ist nitt lange zeit vergangen ein Teütscher gen Teruise kam genant Arigo ein güt arm man; der sich neret oder sein narung gewan mit sbürung ze tragen vmb lone wes des an in begeret. Ein güter vnd heiliger göttlicher mensche von yederman gehalten was, vmb des willen nach dem als die Teruisaner sprechen Es sey ware oder nicht ware; do er starbe vnd auß diser welt schiede, in seinem tode sich alle die glocken die in Teruise waren vngezogen von in selbes leüten vnd vmb solches wunderzeichen willen sie alle sprachen er heilig were, vnd das gancz volk der stat in das hause komen do sein leichnam lage, vnd zü geleicher
 10 weise als einen heiligen in mit grossen eren in die grossen kirchen trugenn [25^a] vnd dar zü im furten, krump lame plinte vnd alle die mit kranckheit beschwert waren welcherley vnd wie die waz vnd nicht anders meintenn vnd gelaubten dann von dem anrüren der toten leichnam sie sölten alle ire gesuntheit empfahe. Do warde das geschrey vnd daz
 15 lauffen in der stat von dem volcke so grosse das es nicht ze sagen ist, In dem sich begabe in sollichem geschrey lauffen vnd numerdum zü der stat eingingen drey Florenczer; Von den der erste genant was Stochi, Der ander Martellino, der dritt Marthese, Es waren abentefürer, die von eines hern hoffe zü dem andernn zugen, mancherley abentetier vnd spile trieben do mit sie den hern vnd züsechern grosse freude gaben. Ir keiner zü
 20 Teruise mer gewesen waz Sich wunderten des grossen geschrey vnd lauffens des volkes; Doch die vrsache palde vernomen hetten, auch begirig waren die wonder dez heiligen mannes ze sechen vnd an die herber gingen ire geräte von in legten. Do sprach Marthese gee wir sechen das heiligtum; Aber ich besorge nach dem als ich vernime das getrenge so
 25 grosse vnd der placz mit söldnern pesetzt sey [25^b] daz nyemant fremder zü dem heiligen mann komen müge; auch die kirchen vol sey, auff das Martellino Stochi antwürt. Das sol vns nicht iren, noch wenden das wir nicht den heiligen sechen süllen. Ich sol den wege wol finden. nun wie
 30 sprach Marthese Martellin antwort das vernim. ich will mich verkern Zü gleicher weiß als ich an henden vnd füssen vnd allem leibe verdorben vnd lam sey, vnd als ob ich weder gen noch sten möchte; vnd du vnd Stochi mich czwischen euch peyde nemet, auff haltet vnd traget, vnd des gleichen thut als wölt ir mich zü dem heiligen tragen das er mich wider
 35 gesunde mach; für ware niemant sein wirt der euch den weg were oder versage, sunder willicklichen euch wern gen lassen Das Marthesen vnd Stochi peider wol gefallen waz sich nitt samptenn zü der herber auß gingen an ein verporgen ende kamen. Do Martellino seine hende peyn

vnd füsse dar zû sein maule krümen warde. Auch die augen vnd daz gancz angesicht verkeret, In sölicher masse daz grausamer vngestalter mensch nye mer gesechen ward, vnd niemant der sein kuntschaft nit gehabt het [25^c] anders hette sprechen mügen dann er were alle seine
 5 tage also lame vnd ein krüppel gewesen. nun Marthese vnd Stochi sich mit irem armen krüppel zû der grossen kirchen nacheten, in geleichnúß grosser diemütikeit, vnd vmb gottes willen paten man in den wege zû dem heiligen leichnam gebe Der in williglich pereit was dar zû alle gemeinlichen schriren. weiche weiche ab gebt den piderleütten den
 10 weg. zû hant sie kamen für den heiligen leichnam vnd etliche purger die dar vmb stunden. Martellinum namen vnd auf den toten leichnam legten; do mit er den dienst der heiligkeit gar enpfinge; do er ein kleine weil also gelegen waz; Er an hub als der da söliches meister was vnd zû sölicher abentetür wol kunde; einen finger nach dem andern strecken
 15 warde, dar nach peyn hende vund füsse, vnd aller wider zû im selbes kam vmb söliches wunderzeichen willen. Dem heiligen sant Arigo ze lobe vnd ere daz volck großes geschrey vnd romore machten, In sölicher masse Das tonern man nit gehöret het; vnd zû Martellino vngelücke Ein Florenczer zû Teruise gesessenn nachent do pey [25^d] stund der
 20 sein kuntschaft het Aber do er sich so vngestalt gemacht vnd sich aller ding verkert het; er in nicht erkant het an dem hin zû führen wol an aufsten do er sein natürlichen form wider an sich genomen het er in wol kante, vnd an hube ze lachen vnd sprach Nun daz in got schende werhet nicht gelaubet do man in her zû truge daz er nicht wer ein krüppel
 25 vnd lam gewesen Dise wort etliche Teruiser vernomen hetten ze hant den Florenczer fragten ob er also lame gewesen were als er sich erzeiget het vnd sie in gesechen hetten. Das wölle got nit sprach der Florenczer Er ist also gerade von allem leib vnd das alle sein tage gewesen, als vnser keiner ist noch ye warde. Aber sölicher abentetür vnd
 30 abeise er der gröst meister ist den ir ye gesechen habt sich ze verkern vnd ander form ze nemen als ir wol gesechen habt. Als palde sie die wort vernomen hetten mit gewalt durch das volcke auf Martellino drungenn, mit grossem geschrey sprachen fahet den schalcke den spöter gottes, vnd seiner heiligenn; Er ist weder lam noch auf dises mal
 35 nicht gewesen; sunder zû vns [26^a] herkomen ist in krüpels weise zû gespötte vnserm heiligen; Greiffet in an, rauet vnd schlacht in wol; strecket dem schalck sein har wol. Do daz volcke disse wort vernamenn sich nicht saumpten Martellino fiengen pey dem häre zû dem erdrich

zugen mit gûten herten feusten wol geschlagenn im sin haut vnd har
gar wol erzugē; Der genade vnd heiligkeit mit trucken streichen im
genug gaben; Er hat sich nit eyn Krist gedeticht; der sant Arigo genade
vnd ablaß in seinem hare nicht geholt hett vnd zû sölchem geschrey
5 vnd numerdum nit geloffen were Sie liessen inn auch zû keiner rede
komen; nûr hert mit fûssen gestossen pey dem har gezogen. Der gût
arme Martellino an hube ze schreien, gnade lieben herren gnade vmb
gottes willē; Er behalffe sich wie er mochte es waz aber alles nicht;
Das geschrey vnd daz getreng zû aller zeit sich meret; das Sthochi vnd
10 Marthese wol vernomen vnd sachenn zû in selbes sprachen. do wirt
nicht gûtz auß; sie dorsten im nicht helffen noch sich erzeigen; dann
villeicht sie auch mit schlegen weren eingeweicht worden, darum sie
im nicht helffen dorsten; sunder mit den [26^b] andern schriren, an in
her an in man sol in nit leben lassen Doch stâcz gedachten durch wel-
15 chen wege sie im gehelffen möchten, vnd dem volcke auß den henden
pringen; dann für ware sie in getöt hetten wer ein argument nicht
gewesen das Marthese von im selbes pedacht het, vnd zû des hern rich-
ter ginge vnd sprach; Herr ich pitt euch das ir mir gehilfflich seyet. do
ist ein pöse man der hat mir einen seckel mit hundert gûlden ab ge-
20 schnitten; wer mein syn ir grift nach im da mit mir das meine wider
würde; er ist in des volkes henden ich besorge ich verliese den man
mit sampt dem gelt. Do des richters knechte das vernomen hetten palde
ir pey czwelfen luffen do der arm Martellin on kamp von dem volcke
gar wol waz gestreilt worden mit grosser müe daz volck prachen vnd in
25 den schedlichen man auß den henden namen, vnd pald für den richter
geführt, Auch vil im nach folgten do sie vernamen das in der richter
vmb seckel abschneiden gefangen vnd weg geführt hat; Dann ir etlichem
was gar wol der seckel ab geschnitten worden. vnd da mit man im der
heilickeit, vnd das hare vnd der palck [26^c] on kamp paß gestrigelt
30 worden Sie alle schrien in ire seckel ab geschnitten wern. do der richter
der ein holczpock was das vernomen het, Er Martellino auf ein ort
füret, in begonde ze fragen ob im also were als die über in sagten Mar-
tellino mit einem halben gespött zû gleicher weiß als ob er der ge-
fencknûß keine acht het aller klage langnet. Der richter in zorn fiele
35 vnd sich petrûbet in palde schuffe an das seile pinden vnd im etlichen
gûten zuge gabe in der meinung ob er icht bekenet in an den galgen
ze henken Do man in auf gezogen vnd wider nider zû dem erdriche
gelassen het Aber in der richter fraget wes er bekennt. auf das Mar-

tellino antwürt vnd sprach. Herr der richter ich pitt vnd beger genade, vnd willig sein wille ze bekennen was euch liebe ist; fraget alle die ire seckel sprechen verloren haben vnd in abgeschnitten worden sein, wo, wenn wie vnd an welchem ende das geschehen sey, so wil ich euch
5 für ware sagen, weliche vnd weliche nicht ich ab geschnitten hab; Daz des richters wolgefallen waz ir etliche fraget Einer sprach vor acht tagen, der ander vor sechs tagen, der [26^d] dritte vor vier tagen, etlicher an disem morgen; Das alles Martellin wol vername vnd zû dem richter sprach. Herre vnd richter sie liegen alle in ir helse, vnd ich
10 sag euch die warheit vnd daz ware machen vnd beweisen wil. Also wer es nicht ware vnd ich in dise stat ye komenn were; als ich dann nye gewesen pin Nun komen pin den heiligen man ze sechen vnd mein vnglücke ze suchen; do ich pin on schulde außgericht vnd on strigell gestreilt worden als ir wol sechen müget; Lieber herre daz es war sey
15 als ich vor gesprochen han, sie liegen alle, vnd ein sölches mit des herren amptnan an der bulletenn weysen vnd klar machen wille Dem ich mich von ersten antwürt als ir in seinem puch finden vnd sechen sölt; auch das mit meinem wirt beweisen mag. Erfint sich nun ein sölches an der warheit? warumb wolt ir mich vmb sunst vnd nicht also
20 iämerlichenn martern vnd töten; In dem Martellino gesellen Sthochi vnd Marthese vernomen hetten wie der richter über iren gesellen wölt richtenn vnd in meinete ze töten, des sie sere traurig vnd bekümert waren vnd zû im selbes sprachenn, [27^a] Wir meinten wol tûn so haben wir übel getûn; wir haben den auß der pfannen genomen vnd in das
25 feüer geworffen Doch nicht feyrten vnd fleyß theten, vnd als sie in dem volcke auß den henden pracht hetten also auch sie meynten in dem richter ze nemen, vnd palde zû irem wirt komen im alle sach für legeten vnd sagten, Der sie mit grossem gelechter füret zû einem seiner gûnner genant Allessander Agolante Der pey dem hern grossenn gewalt hette;
30 dem sie ir leyde clagten, vnd was sich Martellino halben ires gesellen verlossen het, Nach vil grossem lachen der abentëuerlichen materi. Er mit im zû dem herren ginge vnd an in begeret das er nach Martellino schicket. Das also palde geschach, vnd die nach im kamen in vor dem richter in dem hemde sten funden; dann alles sein gewant im von dem
35 volcke von seinem leybe zerissen ward; dann der richter nicht mer seinthalben hören noch vernemen wolt; Dann er den Florenzern besunder neyd trug; darum er sich villeicht meinete an Martellino ze rechen vnd in an den galgen hencken, vnd in keinen weg in dem hern geben

wolt vnd das verzoche also lange [27^b] daz man in im mit gewalt wider seinen willen nemen must, vnd do Martellinus für den herren kam vnd im alles sein vnglücke erzelet vnd gesagt het; In durch gottes vnd durch aller heiligen willen pat das er im vrlab gebe vnd seinen weg gen fiesse; Dann in stäcz deucht er den strick an dem halse het, vnd sich nicht sicher meinte piß das er innerhalb der porten der stat Florencze were Der her von Martellino abenteuerlichen handels grosse freude het im vnd seinen gesellen iglichem ein netts hoffgewant gabe do pey sein vrlaub mit einer zerung alle drey on ir hoffnung doch mit kleinen ern
10 zû Teruisi auß schieden frisch vund gesund heim kamen.

Von Rinaldo dAsti wie der peraubet ward nacket in eynem hemde in einer kalten winter nacht zu dem castel Gilielmo kam beherbert von einer schönen frawen, vnd seiner schaden wider ein kam frisch vnd gesunt wider heim kame.

[27^c] Die frawen alle nach dem als sie von Neyfile vernomen hetten des gespöters Marcellino vnd seines vnglückes halben in des wol gelacht hetten besunder die iungen manne; Philostrato der nachent pey Neyphile sasse dem die künigin gepote; Er nacht volget dem das da an gefangen were; der sich nicht lange saumet schnelle an hube vnd sprach
20 also. Lieben frawen ich ein klein bezwungen pin euch von geistlichen geschefte vnd trübsal ze sagen; doch die mit liebe gemenget; Das euch zû hörn nach einem gedunken nicht anders dann nütze vnd güt sein wirt; sunder den die besorglichen weg der liebe pauen vnd farn, vnd sand Juliana pater noster nicht gesprochen haben; wie wol sy zû zeiten
25 gûte pette ze ligen haben doch darum nicht despas beherbert sein; Darumb vernemet vnd mercket Zû den zeiten des marggrafen Azo von Ferrar; Ein iunger kauffman genant Rinaldo von Aste vmb geschefftes willes gen Boloni geritten was, sein sach palde do auß gericht het; wider zû rücke kam. Dar nach zû Ferrar außbreite gen Pern wercz
30 Auf dem wege er zû etlichen [27^d] als sich ongeferte begab, kame an der gestalt vnd geperde erber leüt dauchten; doch grosse rauber vnd mörder waren zû dem er sich nit seinem knechte gesellet; Die rauber pald vernamen vnd sachen daz er ein kauffman was; auch villeicht meinten er grosses gelt pey im fürte, vnd mit einander eins wurden
35 einer zeit wenn die käme sie in berauben wolten; vnd do mit er sölches on sorg were sie stäcz mit im von grossen würdigen sachen sagten;

als dann erber leüte gewonheit ist, vnd nach allem irem vermügen sich gen im diemütigent vnd züchtig in worten vnd wercken beweisten; dar vmb er im das zů einem besundern gelücke schaczte daz im got sölche güte gesellschaft zů gefüget het. Dann er alleine mit seinem
 5 knechte zů rosse was. Also mit einander ritten vnnd ir gespreche von mancherley materi hattenn auß einer rede in die andern In sölchen worten sich begabe von gepeten ze sagen; die die menschen zů got vnd den heiligen tůn In dem einer von den raubern der do drei waren zů Rinaldo sprach, Vnd ir pider man? Waz sein eüre gepete über lant;
 10 dem Rinaldo antwürt In der warheit in dem ich [28^a] eynfeltig vnd grobe pin, wenig gepete vorhanden han lebe nach der schlechten alten gewonheit; laß czeihen pfenning für vierundzwainczig haller gen. Doch alweg mein gewonheit gewesen ist wann ich über lant reyte ee ich aus der herber kom zesprechen ein pater noster vnd aue Maria zů
 15 iobe sant Iuliano vmb seines vater vnd mütter sele willen Den ich pite das er mir die selben nacht güte herberg beschere. Auch oft es sich in meinen tagen mir gefügt hat Ich über lant in grossen sorgen gewesen pin dar auß komen pin, vnd des selben nachtes gar wol beherbert pin dar vmb ich für ware gelaub daz sant Iuliano in dez ern ich sy spriche;
 20 Er mir von got daz erborben habe wann ich die spriche den selben tag vnd nacht ich nicht übel gefaren müge Auf daz der, der in vor gefragt het Zů im sprache pider man? habt ir aber eüer gepet auf disen morgen auch gesprochen Ja ich sprach Rinaldo Nun der da wol west wie es sich machen würde; Zů im selbes sprach vnd im gedachte Es
 25 wirt dir not sein das du vil pater noster gesprochenn habest, Es fele mir dann, so gedencke ich mir ye du wer[28^b]est dise nacht übel herbern. nach disen gedencken er ü Rinaldo sprach; Ich des selben gleichen vil geritten vnd gangen pin pey tag vnd nacht vnd sant Iulian gepet nye gesprochen han; wol es dicke han loben hörn; doch darum
 30 dester übler nye geherbert han vnd auch villeicht ir auf dise nacht sechen wert, were paß herbern were; ir der sant Iuliano gepet gesprochenet hat oder ich der sein nicht gesprochen han. Es ist wol ware an dez stat ich spriche an dem salme Dirupisti vnd intemerata, Auch den profundis; Nach dem als mir mein vren saget sie von grossen tu-
 35 genden sein. Also nun auf dem weg mit einander von mancherley sagten, die weyle vertribenn piß ir zeit kam. Nun der pösen leüte zeit vnd der aben komen was; die sunne begonde sich zeverpergen. nicht ferre von dem castel Gilielmo in einem tiefen grunde vnd getrücke, da

durch ir wege ginge pey einem wasser; Die drey den gûten Rinaldo angriffen vnd im namen alles das er het, in dem hemde gen liessen vnd zû im sprachen; gee hin vnd sich ob dem sand Iulian dir wöll gûte herber geben; der vnser vns sy geben hat. Dar nach durch [28^c] das
 5 wasser iren weg ritten Do Rinaldo knecht seinen herren sache an greiffen vnd perauben; Er nicht thet als der getrewe knecht seinem hern pflichtig ze tûn ist; sunder als ein schalck, dem rosse die sporen gabe vnd rennens nicht aufhöret piß er sich in dem castel Gilielmo sach in die herber reyte nitt ferrer nach seinem hern fraget; Rinaldus beleyb
 10 alleine nacket parfuß in dem hemde on allen trost vnd hoffnung mit der nacht auf dem halse in tieffem schne nit weste wo hin. Darumb von der grossen kelten peczwungen was ze traben vnd lauffen also lange piß er zû dem castell Gilielmo kam; doch nitt west ob sein knecht dar in waz oder nicht. Aber zû spat kam alle porten gesperte waren; were
 15 leydiger dann der gût Rinalde nicht west wie er seinen dingen thon solt; alle ding verspert sache vnd die schlag prucken auf gezogen waren, Also sich herausen fande mit weynenden augen cziterem leibe auf vnd vmbdach ob er inder ersehen möcht do er sich vor dem schneien hin verpergen möcht Vnd zû seinem gelücke ersehen het ein hause auf
 20 der mauern herauß ginge ein ercker geleiche; dar vnter er steyge [28^d] vnd do meinete beleiben piß an den morgen; vnter dem erker in der mauer ein klein türlein hin ein ging aber verspert waz in das er sich mit ein wenig stroe das er dapey fand seczet; oft vnd dick sein leyd klaget dem heiligen sand Iuliano vnd zû im sprache; das ist nicht
 25 die hoffnung die ich alweg zû dir gehabt han; doch der heilig sand Iulian sein nit vergessen het, vnd in in kürcze mit einer gûten herber versechen har; Es was in dem castell gar ein auß der massenn schöne frawe, als man villeicht in dem lande eine het finden mûgen; Die der marggraffe von Ferrare on masse liebe het; nicht minder dann als sein
 30 leibe vnd leben, die er in disem castell hielte zû seinem leibe; die selbig frawe vnd wittib in dem hause stund; in der türe sich Rinaldo gesezt hette vnd zû seinem gelücke des tages dar vor der marggrafe dar kommen was mit seiner schönen frawen ze kürczweilen, vnd in mit ire freude zû geben, vnd heimlichen in der frawen hause ein volpad het
 35 lassen zû richten, vnd daz nacht mal mit ir meynet ze essen vnd also die nacht pey ir schlaffen, als dann sein gewonheit was, vnd die frawe nicht an[29^a]ders wartet dann seiner zûkunft dann alle dinge bereyt waren Es sich füget in dem im genötig potschaft kam zû hant auf sasse

vnd wege reyte vnd der schönen frawen pote auf dise nacht er nitt komen
 möchte; vrsache grosser geschefte. Die frawenn die der süssen liebe war-
 ten was, vnd auf dise nacht die ir von irem hern nicht werden mochte, Sich
 ein kleins petribet vnd nicht west wes sy alleine beginnen sölt; doch
 5 sich perite in das pade saß das dem marghrafen pereyt was; das selbig
 pade nachent pey dem türlein was inerthalben do sich außersthalben Ri-
 naldo ein gesezset het; vnd do die frawe in dem pade saß, sie das grosse
 wemern kläglich vnd weinen hören vnd wol vername irer meyde rüffet
 vnd zü ire sprach. Gee hinauf vnd sich über die mauern abe vnd nim
 10 war wer vor vnserm türlein so iemerlichen weine vnd sein leyde so sere
 klag; frage wer es sey vnd was es an dem ende thue. Die meyde pald
 an das fenster ging vnd von dem schein des himels wol erkante das es
 ein nackender mensch was darzü parschenkel in einem hemdlein arm
 vnd [29^b] elendlichen in dem türlein sasse. vnd von frost zittert als
 15 ein espen laube; Sie in fragt vnd sprach? güter mensch vnd man wer
 pist du waz thustu da? wo komest du do her an das seltsam ende zü
 diser zeit in sölicher grossen kelten. Rinaldo der von froste czittern
 vnd wemern seinen worten kein form noch gestalt geben mochte domit
 er were erkannt worden, vnd wie da here komen wer; Doch nach sei-
 20 nem pesten vermügen vnd kürczten er ir sein trübsal ze versten gabe.
 Dar nach sie diemütlichen vnd durch gotz willen pate möcht es gesein
 vnd mütlich were; in auf dise nacht vor der keltenn vnd grossen frost
 nicht sterben vnd so iemerlichen vergen liesse. Die güte meid voller parm-
 herczikeit palde zü irer frawen lieffe; alle sach des güten armen Rinaldo ze
 25 wissen thet; die frawe nicht minder diemütig vnnnd parmherczig dann die
 meyde was; Auch ir sere zü herczen gangen was, daz grosse weynen das
 sie in dem pade vernomen het, vnd in ir gedancken kamen die schlüssell zü
 dem türlein das zü zeiten dienet wann der marggraffe heimlich vnd ver-
 porgen [29^c] zü ir vnd von ir gen wolt; zü der meyde sprach Gee hin
 30 nym die schlüssel vnnnd thue mit stille dem armen man auff so geben
 wir im etwas ze essen; so haben wir in auch wol ze legen. die meyde
 die frawen grosse parmherczikeit sere tröstet. Dar nach palde ging vnd
 Rinaldo nahent erfroñ auf sperret vnd einliesse; zü dem die frawe
 sprach. Güter man palde siez in das warm pade Er sich nicht lange pit-
 35 ten ließ sicht nicht saumet palde darein gesessen vnd die wirm vnd das
 pade in sterckten vnd kreftigent; das in nicht anders dauchte wie er
 von dem tod zü dem leben komen. die frawe schuff im pringenn etlich
 gewant die ires mannes der nicht lange zeit vergangenn tode waz ge-

wesen warn; die er an leget; vnd nicht anders dauchten dann als weren sy an seinen leyb gemacht worden. Nach dem er aber wartet der frawen gepote; doch nitt vergessen het götz hern vnd sand Iuliano das sie in on alle sein hofnung auß sölicher argen nacht der er on czweifell warten

5 was geholffen vnd dar auß genomen hetten vnd zû sölicher gütenn herber gesant hetten Zû hant nach dem [29^a] paden die frawen gerwet waz In dem sale ein groß feier schuffe machen; dar zû sie kam nach dem güten manne fragen ward, vnd wie es vmb in stünde. Die meyt ir antwürtet vnd sprach; Fraw er hat sich angeleget vnd ist ein iunger schöner man

10 als ich in lang ye gesechen han von erber gestalt vnd züchtigem geperde So gee hin sprach die frawe rüffe im her zû dem fetter vnd essen dann er sol nicht gessen haben. Die meyt im rüffet zû der frawen; er palde kam zû dem sale ein ginge die frawen ersehen het; in daucht sy von grossen werden vnd eren wer Die er mit zucht grüset vnd ir fleissig

15 dancket der grossenn dienst die sie im beweyset het Do die frawe Rinaldo gesechen vnd sein züchtig reden vernomen vnd gehört het sy vil mer dauchte dann sie von der meyde vernomen hette, Vnd in lieplich vnd freuntlich enpfinge; In zû ir zû dem fetter seczte vnd fragen warde? weliche vrsach in so armlichenn in diser kalten nacht do here getragen

20 het; wie vnd was sich seinthalben verlossen het Er der schönen frawen alles nach ordnung ze wissen thet Die frawe het wol was ver[30^a]nomen vnd hören sagen von Rinaldo knecht der in das castell geflochen was. Darum was ir Rinaldus saget daz alles für ware gelaubet. Auch sie im saget was sie von dem knecht gehört het, vnd wie er in des morgens on

25 czweifel finden würde. Nun der tisch pereyt was ze essen; Die fraw sich mit Rinaldo ze tisch seczet das nachtmale ein zû nemen; vor das wasser zû iren henden genomen als dann der frawen gefallen was sich peyde zû tisch seczen. Rinaldus was von angesicht vnd leybe gar ein schöne iunge züchtig gerade man mit lieplichem vnd löblichem geperde; iunck zû hal-

30 bem alter. Auf alle dise dinge die frawe grosse achtunge het, vnd ire augenn zû mele malen das auf geworfen hat vnd wol pedacht wie der marggraffe auf dieselben nacht pey ir sölt geschlaffenn haben, vnd von sölicher gedechtnuß von vnketischem überflüssigem lust vnd pegird pe- weget der in irem gemüt empfangen vnd sich begeben hett Do nun die

35 frawe vnd Rinaldus das nacht mal empfangen hetten Die frawe die da von inprünstiger liebe enzündet was, von dem tische auff [30^b] stunde vnd irer meyde rate het? wes sie sich halten sölte vnd ob es sie wol getün deüchte; Seytmal sie der marggraffe also auf dise nacht getetüschet

het, vnd ir das gelük ein söliches widerumb geben vnd peschert het; ob
 das auß ze schlagen sey oder nicht In keynen weg nicht sprach die meyt;
 die irer frawen sin vnd meinunge wol vernomen het Sunder die frawen
 nach allem irem vermügen tröstet vnd stercket daz auf ze nemen das ir
 5 got zû gesant het. die frawe ze hant wider zû dem fewel kam do sie
 Rinaldum allein gelassen het; In lieplich an sache vnd zû im sprache.
 Rinalde wie sizet ir so gar traurig in ettern gedancken czweyfelt ir das
 euch nit ein rosß vnd etlich gewant wider müge kert werden daz ir ver-
 lorn habt. Gehabt euch wol vnd seyt frölich, thut als wert in etterm
 10 eygen hauß; auch euch mere sage; Seyder ich euch in disem kleide vnd
 gewant gesechen han die meines lieben mannes waren, Ir mich er
 düncket, vnd ze hundert male in willen gewesen pin mit meinen armen
 vmb euch ze fallen vnd euch ze küssen; hett ich nicht forchte ge[30^c]-
 habt es eüer verdriessen oder vngefallen gewesen were. Rinaldus der
 15 frawen wort vnd die prinenden fackeln irer augen wol gesechen hett.
 Zû geleicher weiß als der do auch nit geschlafen hat. Der schönen
 frawen geperde wol wargenomen het mit offen armen ir entgegen kam;
 züchtiglichen in vmbfinge vnd zû ire sprache. Aller liebste frawe mein
 Ewig ich sprehen mag mein leben ich von euch habe wenn ich bedenck
 20 do ich waz vnd do ich nun pin; Darum ich vndancksam wer wo ich
 nicht thet das euch liebet vnd eüer gefallen were dar vmb mich halset
 liebet vnd kisset; Des selben widerumb ich euch lieplichen vnd gern
 thun will Do was nit mer note wort noch pulerey; sunder zû den wer-
 cken komen. Die frawe die von grosser liebe alle prant in mit iren
 25 armen vmbfinge lieplich an ir prüstlein trücket zû hundert malen kisset,
 vnd halset, vnd so vil wider umb gehalset vnd gekisset warde; Von
 dann aufstunden in die kamern auf daz petlein gingen; wes sie begun-
 denn ist mir nicht ze schreiben. Ein iglicher pey im selbes pedenk
 Doch peyde irem willen Ee [30^d] der morgen kem ein gentügen theten
 30 Dar nach der morgen warde her dringen vnd des tages schein pringen;
 der schönen frawen gefallen waz peyde auf stunden, Vnd damit sich
 nyemant arges verdencken möcht im etlich ires gewantles on gabe ge-
 nugk pöse; auch etlich schilling in den seckel gabe, vnd söliches yemant
 ze sagen im verpote vnd in vntrricht het in daz castel ze komen vnd
 35 sein knecht ze finden, vnd mit stille zû dem türlein auß gelassen do er
 ein komen was. vnd in dem die porten wurden aufgethon, vnd er ginge
 als er gar ferre her käme In dem castell seinen knecht fand sich von
 seinem eygen gewante widerkleydet vnd anleget. daz der knecht in

einem batsacke auf dem pferde geführt hat, vnd auf siczen wolt auff des knechtes roß In dem sich füget, das man wol sprechen möcht es ein zeichen von got were; Alle drey die in beraubt hetten des tages dar vor gefangen komen vmb ander übel das sie gethon hetten. Nicht lange
 5 der vor, vnd in das castel geführt worden von in selbes bekanten wie sie Rinaldo des fordern tages be[31^a]raubt hetten, vnd im sein roß vnd sein gelt vnd gewante alles wider ward; nicht anders verlose dann czwen stifel riemen do von die rauber nicht westen ze sagenn; vmb des willen Rinaldus got vnd sant Iulian lobet vnd dancket auf sasse wege reyrt mit
 10 freuden wider heim kame. Die drey rauber gen holcze furen süllen noch wider komen.

Wie drey iunge gesellen von grossem reichthum in grosse armüt kamen. vnd von einem der ir fetter was genant Allessander aller irer schäden wider komen Der mit einem abte auß Flandern gen
 15 Rome reyrt vnd fande das der abte des küniges von Engellant tochter waz; die den genanten Allessander zû einem manne nam Darnach künig in Schotten lant warde.

Die vergangen histori von Rinaldo von Aste mit fleyse von den frawen vnd mannen nicht mit kleinem wunder gehört vnd gelobet warde
 20 Alle got vnd sant Iulian danckten das sie im in seinen no[31^b]ten also gehilfflich gewesen waren. Es ward auch nicht die schön frawe wie wol man in geheyme das von ir saget dester eynfeltiger darumb gehalten; Das sie das güte daz ir got geben vund zû gesantt het; das hat können aufnehmen Die weyl sie von der güten nacht sagten die Rinaldo mit schö-
 25 nen frawen begangen het. Pampinea Philostrato an der seiten saß; ir wol gedachte es an zesagen sein würde, vnd mit ir selbes pedacht was sy sagen möcht. Auch der künigin gepote vernomen het; nicht minder frölichen dann wol gemüt anhub vnd sprach. Ir aller liebsten frawen, vnd auch ir iunge manne Seytmal wir von dem gelück oder glücksälighen reden süllen; ye mere ich seiner werck bedenck ye mere ich mich
 30 düncken lasse dar von ze sagen sey; Als wir täglich sähenn als ir in den gesagten fabeln oben wol vernomen habt. Doch seytmal es vnser künigin gefallen ist; für paß do von ze sagen villeicht nicht an kleinen nucze der zû ze hören ich auch hoffe vnd nicht zweifel ir von meiner
 35 histori groß gefallen haben wert; Dar vmb vernemet. Es was in vnser [31^c] stat ein ritter gesessen, genant Debald; Etlich sprachen er wer

von dem geschlecht Lambartini. Etliche von dem geschlecht Agolanti;
 Wie dem sey das wöllen wir fallen lassen Pey des zeiten in vnser stat
 nicht reicher man was; Der het drey süne. der erste genant Lamberto.
 der ander Tedaldo. der dritt Agolant alle gerade schöne iunge gesellen;
 5 wie wol der elste nicht über fünfezehen iar alte was do in ir vater
 starbe, vnd sie als seiner kinde alles seines gütes vnd reichthums erbe
 gelassen het; Die iungen sich reiche sachen von ligenden güttern von
 kleyneten vnd grosser parschaft Darumb sie on alle masse ordnung vnd
 widerhaltung an huben. In freude vnd lust ze leben, Nach allen iren
 10 gedencken in dem in kein gelt auß geben zů vil oder zů schwere dauchte.
 sie hielten grossen hofe von meiden vnd knechten von grossen rossen
 von hunden fackeln vnd sperbern; sie schanckten vnd gaben Sie stachen
 vnd prachen auch nicht alleine irem adel ein genügen theten; sunder
 auch iren iungen vnweisen willen sie ein genügen thon wolten Ein sö-
 15 liche vnörnliche speyse [31^d] in die lenge noch ewig nicht geweren
 mocht; Also in kurcze ir schacze vnd reichthum abgenommen het vnd der
 angefangen speyse nicht mer ertragen mocht; An huben e verseczen
 vnd ze verkauffen ire gelegne güter eines nach dem andern, vnnd keiner
 armüt Ee nicht enpfunden piß do sie nicht mere ze verseczen hetten.
 20 Erst in auf gethon worden die augen, die in der reichthum lange zeit het
 verspert gehalten Eines tages der elter pruder genant Lamberto seinen
 czweien prüdern zů im rüffet, vnd sprach lieben prüder Ir wist wol wie
 vnser vater als für einen weisen vnd reichen man gehalten was, vnd wir
 seine süne im also gar vngeleiche worden sein, vnd wir denselben seinen
 25 vnd vnsern reichthum so vnornlichen auß geben vnd an wordenn haben;
 Als ir wol secht, wir in grosse armüt komen vnd gefallen sein Darumb
 ee vnser armüt einem iglichen wissent werde, vnd das wenig das vns be-
 liben ist sich auch nicht mindert Deucht mich wir nemen daz selbig we-
 nig vnd zügen dar von dann vnser wesens ist nicht mei hie wölle wir
 30 nit gar ze schanden [32^a] werden; Das geredt vnd geraten auß der stat
 gezogen ein ding waz; Also on yemant vrlaub auß der stat Florencze
 zugen nicht feyrten noch rasten piß sy sich in Engelant in der stat
 Londra funden Do sy ein heußlein auf namen vnd gar subtile ir speyse
 vnd leben furten, vnd an huben mit aller ir macht ze buchern In dem in
 35 das gelücke grossenn peystant thet; In sölicher masse daz sie in wenig
 iaren ires grossen schaden gar sere wider einkamen, vnd mit grossem
 gelt vnd güt einer nach dem andern auß Engelant wider gen Florencze
 zogen, vnd den grosten teyle ir verseczten güter wider lösten vnd kauf-

ten, vnd weyber namen; Doch iren handel in Engelant nicht liessen den stätz triben, vnd an ir stat do gelassen hetten einen iren fettern genant Alessander. vnd ze hant in wider vergessen was ir voriger schadenn; vnd vnornlichs auß gebenn wie wol sy in grosses gesind wider komen
5 waren; von neuem wider an huben als vor on alle masse das ir auß gaben vnd den merer teyle hinwegriffen grossen glauben vnd der den kauffleuten widerumb erworben hetten iglicher gro[32^bsen summe gelcz man in gelaubt het Aber ir vnornliche speise der handel in Engelant vnd Alessander nicht ertragen mochten, Vnd das was die vrsache daz in der
10 handel in Engelant nicht antwort als er vor gethon het. Alessander hat vil grossen herren auf ire gült vnd schlösser grosses gelt gelichen In dem es sich füget vnd begabe in Engelant zwischen dem künige vnd einem seinem sunne sich groß kriege an hub, vmb des willen sich der hern vnd die gancz insell in czwey teyle geteylt hetten das ein teyle mit dem
15 künig das ander teil mit dem sun In sölichem lauffe Alessander die schlösser vnd alle gült genomen warde; Doch von tage ze tage stätz hoffet frid vnd einigkeit sich beydenthallen begeben sölt, vnd in dem im der gewin mit dem haubte güt wern sölt; In sölicher hoffnung Alessander stätz was, Darumb nicht von der inseln zoche. In diser zeite die drey
20 pröder ze Florencze ir alte gewonheit nicht abgingen stätz entleheten wo sie mochten auf Alessander hoffnung; In dem sie den glauben verloren vnd die in gelichen hetten an in czweifelten, vnd nit alleine [32^c] den glauben verloren, sunder ir schuldiger sie fachen stöcken vnd plöcken liessen, vnd in alle ire güter namen ire weyber vnd kinder arm
25 vnd ellende belibenn. Nun Alessander des frides in Engelant etlich iare gewart het, vnd dar zü kein hoffnung mer het; auch seines lebens nicht wol sicher was vnd wol vernamen sein warten verloren were Im fürname er wölt wider in Tuschana farn vnd sich alleine auf machte gen Prücke in Flandern fure. Darnach zehant zü Prücke auß reyte vnd sich zü sei-
30 nem gelticke begabe, ein abt auch do auß reyte mit grosser gesellschaft von münchen vnd dienern mit grosser salmarei Vor dem riten czwen alte ritter des küniges von Engelant freunde; Der Alessander güte kuntschaft het desselben gleichen sie sein hetten zü den er sich gesellet das ir groses gefallen waz in gern in ir gesellschaft hetten vmb des willen
35 daz er auß dem lande was do ir sin hin ze reyten waz Er die ritter fraget wer der abte vnd die münche alle weren die mit so vil dienern vor vnd nach riten. Einer von den rittern zü im sprach; der da voran reydt das ist ein iunger abte vnser freunde neulichen [32^d] erwelt zü einem abte

in der pesten abtey in Engelant; vnd darumb das er noch etwas ze iung
ist söliche wirdikeit ze enfahen nach dem als geistlicher recht gewon-
heit ist vnd ire gesece inne halten. Darumb wir mit im gen Rome rei-
ten von dem heiligen vater den pabst ze impetiren daz er mit im pispē-
5 sret, vnd in sölicher wirdikeit bestete. Doch ein söliches lasset pey euch
beleyben Als nun gewonheit ist der hern die mit grosser gesellschaft über
lant reyten; etwann vorn etwan hinden etwan in der mitte reyten als
wir dann täglich sechen. Es sich begab in dem reyten das der iunge
abte Allessander nachent pey im reyten sache; der von leibe vnd ange-
10 sicht als ein schöner iüngling was als man in zehen künigreiche het fin-
den mügenn tugenthaft züchtig mit allem geperde. Der dem iungen abte
in dem ersten ansechen paß gefiele dann im kein ander man ye gefallen
hette; in zū im rüffet züchtiglichen mit im begunde ze reden, vnd in fra-
get wer er were; vonn wem er kem wo sein sin hin stünde; Allessander
15 dem iungen abte alle seine sach ze wissen thet was sich seint^{halben} in
Engelant verlossen het vnd [33^a] des abte fragen ein genügen thet Auch
do pey sie sich im behalff vnd sich in seinem dinst verpant wie wol sein
vermögen klein waz; doch daz im gehorsam machet. Do der abte das
züchtig ornlich reden vernomen het Im gedacht wie wol sein handel
20 schnöde gewesen was ander leuten zu dienen; doch es nicht anders ge-
sein möchte dann von edelm stame; grosse freude von seinem wolreden
het; Auch im leyde tragen half den empfangen schäden in Engelant, vnd
in tröstet zū im sprach er hoffen sölt zū got, der in pringen möchte zū
höherm stant dann er ye gewesen were. Darnach in pat. Seytmal er
25 gegen Tuschanawercz rite im liebet pei im vnd seiner gesellschaft zū
beleiben. Dann sein meinunge auch were in Tuschana vnd gen Rom ze
reiten; vmb des willen in Allessander grossenn danck saget vnd sich all-
zeit erpote in seinem dinst ze sein. Nun also reyten dem alte gar
mancherley gedanke im daz herze verwunten des schönen iungen Alles-
30 sanders halben. Es sich füget nach etlichem vergangen tag, sy eines
naches in ein dorf kamen; dar inn güte herber teüer waren do der abt
mit seiner gesellschaft her[33^b]bern müst vnd nit fürpaß reyten moch;
Allessander in pey einem schlechten wirt des kuntschaft er het macht
ab siczen der wirt im sein eygen kamern gabe vmb mer rüe willen. In
35 dem des abte marschalcke das ander volck hin vnd here in dem dorffe
nach dem pesten vnd er mochte versechen het Nun do der abte zenacht
gessen het vnd etlich stunde der nacht vergangen warn; der abt auch ze
pette gangen waz, desselben gleichen yederman. Allessander den wirt

fraget wo er sein nacht vertreiben solt; für war sprach der wirt. Ich weiß nitt wol wo ich dich hin legen sol du siehest wol es ist an allen enden vol; Ich vnd mein gesind auf den pencken schlaffen müssen; Doch in dez abt kamern sein etlich korn secke auf die ich dir will ein petlein
5 legen ist es dein gefallen, vnd thue so du pest magst auff dise nacht du mit mir müst gedult haben. Do sprach Allessander wie möcht ich in des abt kamern ligen es ist so enge daz seiner münch keiner hat nügen darinn ligen. Doch hette ichs besonnen ich het die münch auf die secke gelegt, Es ist geschehen do magst du wol ligen sprach der wirt wenn der
10 abte ze pette ist vnd der für[33^e]hange für das pette gezogen ist So will ich dir mit stille ein petlein legen darauff du wol solt ruen; Allessander wol sache das man daz an des abt irren nicht wol thon mochte Doch des willig was als der wirt gesprochen het, pald mit stille das pette pereyten auff die secke; Der abte nit schlief Sunder die neuen gedancken seiner
15 empfangen liebe bedacht vnd wol vernomen het alle rede czwischen dem wirt vnd Allessander seines schlaffenn halben; vnd wie er in seiner kamern schlaffen würde dem wol ze müte waz, vnd gedacht got mir gesant hat weyll vnd zeit meinen willen vnd begirde ein genügen ze thon Nim ich es nicht wann ich es gehaben mage? wenn sol ich es nemen wenn es
20 mir nicht werden mage. Es möcht sich auch wol begeben es keme mir nymer so eben, vnnd in nun wol bedaachte wie alle ding in dem hause sich gestillet hetten, vnd yederman schlaffen gangen were; Im ganzlich für genomen het zů diser stunde vnd in diser nacht seinen willen zu verpringen vnd mit halber stimme Allessander zů im rüffet pey im ze
25 schlaffen, des er sich weret vnd züchtiglich wider redet; Doch dem [33^d] hern ze liebe er sich zů im leget, vnd also palde er in das pette komen waz; der abte im auf sein prust leget, vnd in an warde greiffen; zů gleicher weiß als die iungen manne mit iren pulen thon; söliches greyffen Allessander sich nitt verwundern mochte vnd sorg het den abt
30 vnzüchtige pöse liebe wider die natur etc in also an zegreiffen darzů prechte; Sölicher gedancke von Allessander der abte im wol gedachte, vnd eins sölichen anhuben ze lachen vnd im ein schneweisses hemdlein auß oder abe zoche, vnd Allessander pey der hende nam vnd die im selbes auf sein prust leget, vnd sprach Allessander allerliebster freunde
35 mein lege von dir alle sorge vnd pöse gedancken Greyf nym ware vnd erkenne was ich verporgen trage; Allessander ein wenig höher greyff do er fande czwei radscheibe herte prüstlein Do pey er wol erkant der herr vnd iung abt ein frawe müst sein; ze hant sy mit seinen armen vmb-

finge vnd an ir mündlein küssen wolt; dez im die iunckfrau nit gestatten noch verhängen wolte Sunder zû im sprach-Allessander ee du mir nächter komest. Vor vernim waz ich dir sagen wil. Als du wol [34^a] mercken vnd vernemen magst wie ich ein frawe pilde pin, vnd nicht ein man vnd
5 do pey ein iunckfraw, vnd von heimend auß geschiden pin; in der meinung zû dem heiligen vater dem pabst ze reiten daz er mir ein man gebe vnd mich verheyret; das dein gelücke vnd villeicht mein vngelük sein wirt; Dann do ich dich den ersten tage sache vnd erkante Ich gänzlich in liebe in dich enzündet; in sölicher masse daz ich glaube das
10 frawen pilde zû mannen grösser liebe nye hat noch ye gewan; Darumb ich dich mir han auß erwelt, vor allen mannen auf erden; auch mir keiner paß gefelet, wie wol ir vil ist die mir hettenn mügen werden; Darumb ich mir für han genomen dich zû meinem elichen manne ze nemen; doch so ferre daz es dein gefallen sey, vnd mein begerest, Vnd wo dir
15 ein söliches nit füglich were ze tun noch dein gefallenn were; so hebe dich palde an daz ende do von du her zû mir komen pist. Allessander der iunckfrawenn kurcze wort vernomen hett; wie wol er ir nicht kunt het noch were sie gesein mochte Doch angesehen ir grosse wirdige gesellschaft vnd nicht an[34^b]ders im gedenckenn mocht dann daz sie von
20 grossem adell vnd reiche were, schöne züchtig on masse er sy sache; Darvmb er ir palde antwurt vnd sprach. O werde iunckfrawe von hoher art, in stäter elicher trette on allen wanck will ich euch wesen vntertan; darvmb edele iunckfrawe machet es nicht lange, last ettern willen paß verstan waz eüer gefallen ist das ist mir liebe, vnd besunder
25 genade ettern willen ze tûn; Auf söliche seine rede sie peyde in dem pett auf sassen vnd sich kerten gegen einer taffeln daran bezeichent, was vnsers hern marter; vor der sie peyde einander eliche treue schwuren vnd die iunckfraw Allessander einen guldin-ring gabe mit dem er sie mächlet elichet vnd sponsiret; Darnach sich wider nyder legten Nicht
30 mit kleiner peyder freude dise nacht vertriben mit einander der liebe spiltenn piß gen dem lichten morgen Dar nach ir ordnung gaben wez man sich auf dem wege in geheyne vnd stille sölt halten Allessander heimlich mit grossen freuden seins herczen sich auß der kamern füget, den wege durch den er eingangeun was nyemant [34^c] west wo er des
35 nachtes geschlaffen het Der abt mit seiner schönen gesellschaft sich wider auf den wege füget; vnd nach etlicher vergangen wochen vnd tagen In die wirdigen stat gen Rome kamen; Da etlichen tage gerüet. darnach als des abte gefallen waz Er mit den czweyen seinen alten rittern vnd

Allessander für den heiligen vater den pabst kam vund den mit zymlicher ere geeret hetten als pillich was. Nach dem der abt anhub vnd sprach also. Heiliger vater; euch mere dann yemant andern kunt vund wissent ist; wer mit zucht tugent vnd eren in diser welte leben will.

5 Daz der nach allen seinen vermügen flieche alle dinge die da vrsach geben mügen anders dann wol ze tûn vnd do mit ich in zucht, als dann meine begirde ist ganz vnd volkumenlichen leben müge. Ich als ir mich sechet in disem geistlichen gewant vnd abtes form wie wol ich ein frawen pilde pin mit grossem reichthum heimlich von meinem vater künig von

10 Engellant iunck als ir mich vernemen müget geflochen pin; Die vrsach ist. Mein vater der künig mich einem alten künig von [34^d] Schotlant zû einem weyb geben wolt; vmb des willen ich zû eîer heilikeit komen pin Damit ich zû einem man durch eîer wirdikeit versehen wird. Auch mich nicht allein des küniges von Schotlant alter auß Engellant hat

15 flichen machen; sunder mer die forcht meiner iugent, wo ich dem alten künig were zeteyl worden; ich nicht über gangenn oder über treten het das gepot der heiligen ee vnd gesecz vnd wider daz küniglich plût meines vaters ere vnd götliche recht gethon hette; doch got der almechtig dem alle ding kunt sein, vnd der eines iglichen notorft wol erket. Die

20 meinen besunder durch sein parnherczikeit erkannt hat, vnd mir zû gesant hat, den der in gefallen gewesen ist, vnd der mein elich man sein soll; des nempt ware daz ist der iungling, vnd mit dem finger sy zeigt auf Allessander den ir hie nahent pey mir sten sechent; des zucht vnd tugent einer iglichen grossen edelen frawen würdig sein. Daz plûte nye-

25 mant den adel geyt als ir wol wist; Sunder alleine die tugent den geyt Darum er mir für alle andre man liebet. es sey meines vaters ge[35^a]-fallen oder anders; Den ich zû einem elichen man haben wille; gefall es wem es wöl So ist es doch mein gefallen Darumb heiliger vater ich die namhaftigsten vrsache vmb der willen ich auß Engellant gezogen waz

30 gützeit ist ich die auß gericht het. doch do ich so ferre komenn was mich daucht es wol gethon were eîer heilikeit do heym ze suchen, vnd do mit gegenwürtig eîer würdikeit vnser peyder mein vnd Allessanders Etliche sach außgetragen warde; Darumb ich euch diemütighen pite; seytmal es gotz vnd mein gefallen ist Es auch eîer gefallen sey, vnd vns

35 mit eîerm segen bestete Damit wir mit mer freuden des, des verweser ir seyt lange zeit mit ern wol leben vnd an den lesten wol sterben mügen. Do Allessander der frawen rede vernomen het; in fremde dauch vnd groß wunder nam das sie des künigs von Engellant tochter was; von

grosser verporgner freude im sein hercz erfüllet ward Auch die czwen alten ritter fremde daucht der frawenn torheit Einen hochwirdigen künig ze lassen vnd einen schlechten armen kaufman zû ei[35^b]nem manne ze nemen; Der sache sich sere petrübten, Vnd were es nicht vor dem heiligen vater gewesen; für ware sie Allessander vnd der frawen nicht gütz beweist hetten; auch den heiligen vater den pabst frömde daucht ir kleider halben; in den sie für in kumen waz in münches form Darnach ir erwelung ires mannes halben gar ein frömde sache dauchte, das sie als einen wirdigen künige zû der ee verschmehet. Doch die sach czwischen 10 ir vnd Allessander in sölicher masse sich verlossen het das es in keinen götlichen wege mer wider ze rück gen möchte. Daz der pabst alles wol erkante, vnd darvmb er sie aller pete gewern vnd ein genüg thon wolt; Vnnd von erste die edeler ritter er tröstet die er betrübt sache, vnd sie mit der frawen vnd Allessander in fride vnd freude seczet. Darnach 15 auf einen genanten tage gegenwürtig aller Cardinal vnd ander grossen hern die er zû diser feste der frawen zû ere geladen het; er die frawen schuffe in iren köstlichen frawen kleidern für sich komen Die von irer schöne vnd grossen zucht über alle andre frauen von den hern gelobet vnd [35^c] gepryst warde Desselben gleichen Allessander in köstlichem gewant geziret was. In tugent zucht vnd eren nicht iunge daucht, 20 noch daz er ye vmb bucher gelichen het; sunder alle seine geperde küniglich waren, vnd von den zweien rittern sere geeret was. Do man sie peyde gegenwürtig aller hern vnd fürsten zû einander gab, grosse feste vnd hochzeit machten mit freuden Darnach der heilig vater der pabst mit seinem segen in vrlaub gabe. Vnd als Allessanders vnd seiner 25 frawen gefallen was von Rome schieden, gen der sen wercz; Darnach gen Florenz kamen von den purgern mit grossen eren vnd wurden empfangen wurden Da etlichen tage mit freuden gerast, Vnd Allessander die drey prüder auß gefencknuß ledig machte vnd ire schuldiger bezalen 30 macht; sie wider in alle ire güter seczte vnd die frawe in grosse schankung tet Darnach mit grosser liebe, vnd freutschaft Allessander mit seiner frawen von Florenz vnd seinen freunden schiede Vnd mit im furte Agolante seinen vettern. In kurzenn tagen in der edeln stat zû Parisy warn do sie von dem kü[35^d]nige von Paris mit eren empfangen worden; 35 davon in schieden die czwen alten ritter, vnd heim über mere in Engellant furen, vnd mit dem künige der frawen vater fride vnd eynigkeit czwischen dem vater vnd der tochter machten Damit er die tochter vnd den eyden mit grossen freuden vnd eren wider in genad name, vnd nicht

lange darnach vergangen was er in mit der ritterschaft begabet, vnd im eingab, das lant vnd herschaft genant Kornauaia Do er mit weistum ein redlichs herlichs leben füret, vnd sich übet vnd prauchet in grossen gescheften, vnd den vater vnd den sun in fride seczet seinen schwäher den
 5 künig, vnd sein schwager des küniges sune. Do von sich in Engelant vil gütes begabe Do von Allessander von yederman gelobet vnd seine werck gepreiset worden Vnd Agolante sein vetter alle seine verlorne schuld pey den hern wider einprachte mit grossem gewin vnd reichthum wider gen Florencz kam vnd der graffe vnd ritter Allessander mit seiner
 10 edeln vnd hochwirdigen frawen peyde mit einander ein götlichs ersam herliches leben furtenn. [36^a] Auch der künig in vil prauchet in seinen grossen gescheften; auch nach dem als ich vernomen han vtid etlich sprechen wöllen wie er durch seine sinne vnd grossen weistum mit hilffe seines schwehers dem künige von Schotenlant; das gancz künigreiche
 15 nam vnd sich mit gewalt künig machte, den alten künig auß dem lande vertreyb vnnd do von die kron enpfienge.

Von einem kaufman genant Landolffo Ruffelo; der zû einem rauber oder Corsale auf dem mere ward. Darnache von den Genouesern gefangen ward; Der schiffe in dem mere zeprachten, vnd
 20 Landolffo auf einen kasten darinn waz grosser schacz; mit dem leben darvon kam.

Lauretea die edell frawe nahent pey Pampine sasse wol vernomen het ir histori sich geendet het; nicht lenger gesweygen mocht, an hub ze reden vnd sprache also. Mein allerliebsten keynerley werck no[36^b]ch
 25 vermügen des gelückes nach meinem gedüncken, größer nye gesehen noch gehört worden ist; dann einen schlechten armen man zû einem grossen künige ze machen Als dann vns Pampinea mit irer neffen histori pweist hat. Nun seytmals wir von der für gelegten materi des gelückes sagen vnd nachuolgen stülen So spriche ich das ich mich des
 30 zesagenn nicht schamen wille Ein histori oder neffen fabeln; Die nicht vil minder mit armüt vmbgeben ist; als die gesagtenn gewesen sein. Doch sich nicht zû sölichem durchleuchtigen ende gefüget haben; Darumb villeicht söliche meine historien von euch nicht mit so grossem fleyss mag gehört werden; dann auf disen tage ich nicht anders be-
 35 dacht pin, darum mir verzeihet Lieben frawen nach dem als vil glauben vnd ich daz ofte vernomen han; wie das lant vnd die gegent

pey dem mere von der stat Regio in Calabria piß zu der stat Gaietta
 die schönest fruchtperste vnd lüstigest sey aller welschen landen; In
 dem lande nit ferre von der stat Salerno an dem mere eine kleine ge-
 gent ist dieselben vnd in der gegent [36^c] die von dem lande nennen,
 5 Malfa wol beseczet mit kleinen schönen steten, lüstigen garten, frischen
 prunnen vnd fließenden wassern; auch gar reiche kauffleut dar wonen
 vnder den steten eine genant Adravello In der ein reicher purger
 wonet genant Landolfo Der sich als der geytigen gewonheit ist; an dem
 ist daz im got geben vnd beschert het nicht genügen liesse vnd seinen
 10 reichthum meinete ze meren Vnd es sich gar schire begeben hette er
 sich selbes mit sampt dem gût verloren het Nun er als der kauffleute
 gewonheit ist im für nam über mere in Cipri ze faren, vnd ein grosses
 schiff kauffet vnd das mit seinem eygen gelte lude mit mancherley kauf-
 manschacze sich auf daz mere machet; In kurzzer zeit gen Cipri kam;
 15 da er fand vil manche schiff; alle geladen mit dem das er geladen het;
 vmb des willenn er nicht alleine sein kaufmanschacz wolfeil geben müst
 wolt er sie verkauffen Sunder er die hin werffen müste daz sein grosses
 verderben was; dar vmb er sich sere betrübet, nicht weste wes er sich
 halten sölt; darumb er schir verczweifelt het sich ze se[36^d]chen also
 20 von so grossem reichthum in so kurzzer zeit in armût komen sein; In
 dem er im gedacht als der verczweifeltenn gewonheit ist; Er ee wölte
 sterben mit rauben dann arm wider heim ze komen. vnd sein grosses
 schiff verkauffet vnd ein klein sottile schif oder galle kauffet das aller
 dinge zû dem rauben vnd seinem dinst bereyt was; von der inseln Cipri
 25 weg füre vnd sich genczlich zû dem rauben gab auf yederman gût; sun-
 der auff die Türcken die der inseln Cipri vnd seinem handel gar gelegen
 waren; In dem im daz gelücke gehilfflich was vnd grössern peystand
 thet dann in der kaufmanschacz getûn het In sölicher masse im dienet;
 das er im in einem iare so vil türckischer schiff finge vnd den Türcken
 30 name; Das er nicht allein seiner scheden ein kam; sonder czwir noch
 so vil darzû gewan, vnd seiner ersten trübsal vorlust vnd armût puß
 thet vnd sich benügen liesse, vnd do mitt er nicht in die andern trüb-
 sallen vnd armût kem an dem daz im das gelücke beschert hett wolte
 er sich benügen lassen vnd sich heyimwercz auf die fart bereyt vnd nit
 35 mer weder rauben [37^a] noch kaufmanschacz treiben meinete, vnd die
 riemen in das wasser geschlagen gegen dem nidergang der sunnen ze
 hauß wercz sich keret, vnd do er in daz mere Arcepelago komen waz;
 sich begab eins nachtes ein starcker grausamer wint auf stund der im

schedlich vnd seinem weg wider was, vmb des willen sich daz mere ser
 betrübet vnd grosse ward; das sein subtile schiff nicht ertragen mocht;
 er hinder ein kleine insel fure sich do behalfe so pest er mochte, vnd
 do meinete gütz wetters ze harren in sölchem betrübten weter sich füget
 5 czwey grosse Genoueser schiffen auch ze flichen; das Landolfo geflochen
 het hinder die inseln kamen vnd das klein schiffe gesechen vnd erkant
 hetten; von stunde gedachten do sie die zerunge gewinnen wölten,
 vnnnd im palde den weg namen damit er on ir vrlaub nicht möchte dar
 von gefarn; dann sie wol vernomen heten wie grosser reichtum dar auf
 10 were; Als dann die Genoueser von natur alle geytig sein sich palde pe-
 reyten Landolfo ze fachen vnd im sein schiff ze nemen, vnd auf die
 inseln vil schützen absezten daz die wern sölten daz nymant von der
 kleinen gal[37^b]le ab sässe darvon ze fliehen Darnach ire grosse schiff
 auf das kleine zugen, vnd das mit kleiner müe mit allem volcke on
 15 allen iren schaden fingen daz güt alles auf ire schiffe trugen, vnd Lan-
 dolfo auf der schiff eins furten Ermer dann er ye warde; in der iopen
 peleybe, vnd sein schiff die Genoueser in den grund des meres senck-
 ten. Darnach an dem andern tage das weter vnd der wint sich warde
 aufrichten; die zwey schiffe ire segell gegent ponent wercz richten Den-
 20 selben tage mit freuden furen vnd segelten, vnd in dem do sich tag vnd
 nacht scheiden sölten aber auf stunde ein heftiger starcker wint grau-
 samer dann der vorder gewesen waz von dem daz mere sich pläen vnd
 wachsen warde, vnd die czwey schiffer von einander teylet vnd schiede,
 vnnnd mit gewalt des wintes, das mere daz ein schiff darauf Landolfo ge-
 25 fangen was auf ein inseln genant Czanfronia truge vnd do zü trüern
 ginge als wer es eytel glesere gewesen; do het man grossen iamer ge-
 höret von den armen schifleuten mit grossem leyde zü got schrien nye-
 mant oder gar wenig die waren die von got erhört worden die da nit
 ertrunken vnd [37^c] den fischen ze teyle wordenn Daz mere mit der
 30 kaufman schacz pedecken was Do het man gesechen die grossen pallen
 vnd kasten den winte in dem mer hier vnd dort werffen dezzelben gelei-
 chen das holczwercke von dem schiffe segel grosse paume taffeln als sich
 in sölcher trübsal gern begibt in dem grausamen mere hin vnd her swun-
 men; wie wol die nacht finster waz vnd daz weter grausam Doch wer
 35 swimen kunde der sich behalffe die weyle er möchte, vnd vil menschen
 waren ir leben nach dem lengsten zefristen etlicher an ein pallen, etlich
 an kasten oder paume sich hingen oder was im zü dem ersten ze handen
 kam, als dann der die sich ertrincken sechen gewonheit ist; waz sic be-

greiffen nit lassen piß sie tode sein Auch der arm Landolfo der des tages
davor zû hundertmalen dem tode gerüfft vnd dez begert het vnd im er-
welt het vil ee ze sterben dann arm wider ze hauß komen; Doch do er
den tod sichperlich vor im sache im grausen warde vnd in keinen weg
5 sterben wölte Sunder sich behelffen ward als die andern vnd im auch ze
handen kam ein groß pret oder tafel daran er sich mit [37^d] aller krafft
hinge do mit sich sien sterben oder ertrincken also lange verzüg piß in
werleich got erhöret vnd pesser hilffe schicket, darauf er gritlinge saß
sich behaf so er pest mochte, von dem wint vnd mere her vnd dar ge-
10 worffen piß an den lichten morgen. do er sein haubt ein klein in die
höhe richt nicht anders sache dann daz grausam mere; auch ze zeiten er
nahent pey im ein kasten sache der in zû zeitenn iret vnd sorge hette er
in ab der tafeln stisse; darumb wie er mochte er in von im stiesse Doch
einst sich begabe ein grosser sturm winte ab aus den gewülcken fiele in
15 das mere schlug vnd daz mere in den kasten schlug vnd der kasten in
die tafeln stiesse darauf Landolfo saß oder lage vnd der tafeln daz vn-
ters ze oberst keret; wer betrübter dann er vnd die tafeln mit gewalte
lassen müste; vnterginge vnd swiment wider auf über das wasser kam
mer von forchte sich beholffen dann von seiner stercke. Die tafeln ferre
20 von im sache wol gedachte er ir schwiment nicht ereylen möchte vnd den
kasten ersehen het, zû dem er sich füget Der im nicht ferre was vnd
sich mit seiner prüste darauf legt [38^a] vnd so er peste mocht den ka-
sten mit den armen vmbfinge, vnd geleich hielte wie er mochte Also vn-
gessen als der sein nicht hette von dem mer her vnd dar geworffen, vnd
25 getruncke mere dann im lieb was vnd gewölt het Auch er nit gedencken
mocht wo er doch in dem mere were dann nicht anders seche dann was-
ser. In dem er denselben ganczen tage vnnd darnach die nacht schwame.
Darnach als gotz gefallen was; oder ob es sich von der grossen kraft
des wintes begabe; er auf dem kasten mer dann halber tod lage mit er-
30 starten armen vmb den kasten; als die sich ertrincken sechen was sie
begreifen des nicht lassen; er in der inseln krum vnd lang kame on sein
wissen; dann in im alle sinne vnd vernunft verschwunden waren, von
einer frauen die ir gewantlein pey dem mere wusche; ersehen ward
Doch nich erkante ob er ein menchen pilde were oder nitt keiner men-
35 schen form in güter zeit nicht erkennen mocht vnd czweyfelt mit ge-
schrey sich zertücke zoche forcht vnd erschrecken halben. In dem sich
der kaste zû ir an das lande nähenden warde vnd menschen form dar-
auf vernome [38^b] vnd ir zû herzen ginge den menschen also auf dem

kasten ze sechen der ir kein antwort gabe, vnd nicht anders meinete dann er tod wer, wie wol klein leben pey was; Sy ein wenig in das wasser daz da stille was; vnd Landolfo pey dem hare name in vnd den kasten an das trucken lant zohe vnd im mit marter die arme vnd hende von dem kasten prachte vnd sach wol daz er nicht tode waz; sunder auf dem kasten von forcht vnnnd amechteikeit erstart waz Sy mit einer ir tochter die pey ir was Landolfum in die stat trugen vnd in ein pastuben legten mit warmen wasser riben, also lange das die verschwunden geiste der wirme enpfunden vnd wider kamen Darnach in mit gûten starken weinen labten mit zucker vnd confect piß die verloren stercke vnd leiplich kraft wider zû ir selbes kame vnd erkennen warde wo es was. Do er nun in etlichem tage waz gar wol wider zû im selbes komen. Die gûte frawe im dem kasten wider gabe den sy im mit fleiß behalten hett vnd zû im sprach gûter man such dein gelücke fürpaß als er dann thet wie wol er des kasten vergessen het vnd nicht [38^e] mer daran gedacht; doch in name do in im die frawe gab vnd gedacht er möcht so wenig nicht wert sein er im etlichen tage die speyse thet; doch in gar geringe daucht, vmb des willen im also sein hoffnung entginge; sich füget die gûte frawe nicht ze hause waz Er den kasten palde auf prache ze sechen waz doch darin gesein möchte. Darinne er fande grossen schacze vnd reichthum von edelem gesteine gefast vnd vngefast; der er sich wol verstunde vnnnd wie sie köstenlich vnd grosses geltes wert waren; Darumb er got dancket das er in noch nicht verlassen het sich freuet vnd tröstet. Doch als in das gelücke zû dem ersten vnd dem andern male in trübsal geseczet het; Auf das dritte sorg vnd forcht hett, vnd daz waz wie er die kleinet vnberaubt möchte ze hause pringen; doch die nach den pesten versorget; da mit sie pey im nicht gemercket wurden Er sie in zerissene alte hadern pante, vnd zû der gûten alten frawe sprach dez kasten er nicht bedorfte daz sie so wol thät vnd im mit einem alten sacke ze willen würde. des die fraw willig was; Er ir freuntlich dancket aller dienste die sie im [38^d] beweist het, von ir vrlab nam vnd mit seinem sacke über die achseln sich auf den wege gen Malfiwercz machet; doch vor gen Trani vnd Brandicio kam do er etlicher seiner purger fande von den als vmb gotz willen wider gekleidet ward Den er alle seine trübsal, vnd was sich nach seiner außart im begegnet het, daz in zewissen thet. Die im ze hant gelt roß vnd geselschaft piß gen Adrauello gabenn; do in erste daucht er sicher were; got dem almechtig dancket daz er im wider ze hause gehoffen het Do er von erste seinen

sacke auf pand. vnd den mit fleyß von netzen durchsuchet, daz er von
 erste nicht gethon het; er fande so groß güt von edelm gesteine; Nür
 die vmb ein geleiches zegebenn nicht zů verkauffen nach dem des sy
 wert sein mochten; Sunder nach dem wolfelsten verkauffen. Er fand
 5 nach aller seiner außbrechtung, daz er gleich zwir sovil gütz het als do
 er von heyme aus fure. darnach als sein gefallen was seine kleinet zů
 richtet vnd verkaufet vnd der gůten frawen gen Kurfu ein gůte summ
 geltes schicket; die im in seinen grossen nōten mit irem getreuen dienst
 was zů willen woren [39^a] vnd die in pey dem hare auß dem mere ge-
 10 zogen hette; desselben gleichen den von Trani die in vmb gocz willen
 gekleydet hetten, die begabet; dar nach kein kaufman mer sein wolte,
 vnd ein erber leben fürpaß füret, sich genügen an dem liesse daz im das
 gelücke gegeben het; Ein züchtig erber leben füret piß in seinen tode.
 Also hat Landolfo Ruffolo aus der gegent; Malfi vnd stat Adrauello ein
 15 ende Got vns die hernach komen histori auch zů gutem ende wende.

Von einem genant Andreuczo vonn Paruse der gen Napols
 reyte roß ze kauffen; den drey tōtliche sache oder trübsal in einer
 nacht an stinssen. Da pei er alles das er do hat verlosse doch im got
 von in allen halfe vnd mit einem kōstlichen rubin wider heim gen
 20 Paruse kam.

Die züchtig vnd edel fraw Lauretta ir neües mere vnd histori von
 Landolfo zů gůtem ende pracht hat; daruz ir frawe Fiametta wol ge-
 dacht es nun dalest an ir were, vnnd ir in gedanke kam ein histori
 nicht minder in ir selbes grausam dann die gewesen ist die vns Lauretta
 25 gesaget hat Doch so [39^b] vil vnterscheyd ist; waz Landolfo in etlichem
 iare trübsal anstisse, vnd von dem ich ze sagen meyne alles sich in einer
 einigen nacht begabe. Darumb lieben frawen nach dem als ich vernomen
 han, wie in der wirdigen stat ze Paruß ein iunger waz genant Andreuczo,
 demselben iungen gar wol was mit schönen grossen rosse; Er vernomen
 30 het wie sōliche grosse roß zů Napolis gar in gůtem kauffe werenn vnnd
 auf sasse fünffhundert guldin in den seckel nam, vor nye mer auß ko-
 men waz, vnd gen Napolis reyte. Do er an einem suntage vmb vesper-
 zeit hin kame, vnd von seinem wirt der stat gewonheit vnd des roß-
 marckes vnterricht warde Dez montags frūe auf den roßmarck kame,
 35 vil schöner roß er feyset vnd darumb kauffet; doch kein kauff im für
 sich ginge als dem der ein iunger pūffel waz, vnd nit übrichs verstan-

den, vnd damit man sechen vnd versten möcht; er roß.ze kauffen dar-
 kommen wer vnd oft gegenwürtig yederman seinen seckel auff thet, vnd
 sein fünffhundert guldin sechen liesse. Es sich füget er in einem kauf
 was vnd sein schöne gülden gezeyget hett In dem ein schöne iunge
 5 [39^c] frawe; doch geschicket einem iglichen vmb ein klein gelt sy sich
 im williget; Dieselbig in dem für ginge, vnd Andreuczo gulden vnd
 seckel wol ware genomen het, vnd in ir selbes gedachte O wern die gul-
 den mein, wem möchte mere dann mir paß gesein. Doch keinen gelei-
 chen enthet, als ob sie icht gesechen het fürginge sie hat mit ir alte meit
 10 Do dasselbig alt weybe Andreuczo gesechen het, sie die iungen gen
 liesse, vnnd mit grossen freuden zu Andreuczo lieffe; In freuntlichen
 empfinde; des die iunge frawe wol ware genomen het, stille sweige aber
 wol gedacht Es möcht noch güt wern, Andreuczo dem alten weybe dan-
 ket vnd sy wol kante zů ir sprach sie solt zů im an die herber komen,
 15 er mocht iczunt sein nottorft nicht mit ir reden, Sie von im schiede; Er
 wider anhuben ze kauffen doch nicht kauffet noch keines kaufs eins warde
 auf disen morgen; Daz iunge weyb die Andreuczo seckel war genomen
 hett vnd ir altes weybe so gar freuntlihen mit im het sehen reden; zů
 hant gedacht sie versuchenn wölt ob ir die gesechen gulden alle gar oder
 20 zum minsten ein teyle werden möcht Vnd [39^d] in geheyme das alte
 weybe fraget wer der iunge man were wo her sy sein kuntschaft hette
 das sy so freuntlichen zů im gethon het. Daz alte weyb ir alle sache von
 stücke ze stück saget vnd wie sie pey seinem vater in Cicilia vnd auch
 darnach lange zeit zů Paruse gedienet het vnd pey gestanden were, auch
 25 ir saget wo Andreuczo an der herber lege, vnd vmb wes geschefte wil-
 len er were gen Napolis komen Das iunge weybe von dem alten alle
 sache von seinem vater von allen seinen freunden zů Paruse vnd ir
 namen iunck vnd alte nach allem irem willen gar wol durch lernet het;
 Zehant ir gar ein subtile poßheit erdacht het, vnd dem alten weyb so
 30 vil des tages geschefte gab, daz sie nitt des tags wider zů Andreuczo
 komen mocht. Darnach sy ein iunges meydlein zů Andreuczo schicket,
 das sy zů sölichem dinst gar wol gemeistert het, das dierlein an die her-
 ber kame, vnd zů seinem gelücke den ersten den es nach Andreuczo
 fraget, das er selbes was auf der porten der herber alleine stunde er zů
 35 dem meydlein sprach? wes begerstu Ich pin es, Das meydlein in auf
 ein ort füret vnd zů [40^a] im sprach. Herr ein edele vnd erbere frawe
 vonn diser stat mich zů euch gesant hat, die het genötigs mit euch zere-
 den wo es eüer gefallen wer Gern sprach Andreucz, vnnd sich selbes an

hube zeschawen vnd wol sich daucht der meczen sun seytmal die schö-
 nen frawen von Napolis nach im begunden ze schicken, vnd nemlich im
 gedachte die frawen sein begeret vmb seines schon leibes willen; zû dem
 meidlein sprach, er bereyt wer wo vnd wenn die edel frawe mit im
 5 wölte reden; Das meydlein sprach. Herr wer es etier gefallen in irem
 hause sie ewer wart. Andreuczo palde zû dem meydlein sprach, so
 nym den wege so will ich dir nachvolgen, Also er dem meydlein nach
 ging In der herber nyemant da von saget zû der schönen frawen in das
 hause kame; Die da wonet in der gassen genant zû dem pösen loche,
 10 pey dem namen man wol mercken mage die frumkeit der gassen. Do
 weste Andreuczo nicht von ze sagen Er meinet es an den erbersten in
 der stat were, vnd er zû einer erbern frawen vnd nicht zû einer pûbin
 gangen were. Nun er dem meydlein nachvolget vnd nit gar halbe stigen
 aufgangen [40^b] was; die schöne frawe köstlich gezirt, gerade von leibe
 15 vnd schön von gesichte im pey dreien staffeln abercz die stigen entgingen
 ginge mit auf gethou armen, mit eineni schweren setfutzen in vmb fing in
 kleiner weyle nicht gesprechen mocht zû geleicher weise als ob sie vor
 grossen freuden vnd liebe nicht gereden möchte, Als gern der frawen
 gewonheit ist wann in seltsame grosse freude ze hause komen sie von
 20 freüden weinen vnd nicht gereden mügen. Des gleichen thet dise
 schöne frawe auch, vnd mit weinden augen sie Andreuczo an seine wang
 küsset, mit kleglichen senften worten zû im sprach O Andreuczo mein
 piß mir ze tausent malen got willkomen Sölicher grossen freuntschafft
 vnd liebe, Andreuczo sich frömde nam vnd sere wundert; Doch ir züch-
 25 tiglich antwürt vnd so vil dancke wider vmb saget; Sy in pey der hant
 name über die stiegen auf in den sale füret, vnd auß dem sale vngeredt
 in die kamern gingen; die von edelm gesmacke geziret was Dar in ein
 köstlich pette mit seinem fürhange; Die stangen alle mit schönen kley-
 dern behengt vnd pedecket warn, auch als der [40^c] Napolitaner gewon-
 30 heit ist die went mit köstlichem reichen harnasch verdeckt waren. Do
 Andreuczo söliche schöne dinge sache, als der ein netier außgefflogner
 volgel waz, im für ware gedachte das ein edell mechtige fraw sein sol
 Do sy sich peyde für das pette auff ein kasten seczten; Die schön frawe
 an hube zû Andreuczo sprach also. Ich wol vernim dich wundert der
 35 fremden freuntschaft die ich dir beweyst han mit meinen zächern vnd
 weinenden augen, Als der da meiner kuntschaft nit hette, vnd auch vil-
 leicht mein nye hat gedencken hörn. doch paß vernamen solt es dich
 grösser wunder nemen sol, Als es dann ware ist, ich dein leiplich schwe-

ster pin, auch dir sage, Seytmal mir got die genade gethon hat daz ich vor meinem tode einen meinen pruder gesechen han des mein begirde stäcz gewesen ist ze sechen, ich mag nun dalest zů der stunde nicht sterben, daz ich nicht frölich sterbe, vnd ob dir ein sölliches nicht wis-
 5 sent oder kunt ist; so verime mich gar eben Peter dein vater vnd mein, Als ich glaube dir wol mag wissent sein wie er lange zeit in Cicilia zů Palerma sein wonung gehabt het [40^a] vnd vmb seiner gůte vnd tugent willen, von yederman wol gehalten was. Doch ob allen die in lieb het-
 10 ten, mein můter in lieber hette; die ein frawe vnd zů der zeit ein witib was; die in lieb het űber alle mame in söllicher masse sich in liebe vnd freuntschafft mit einander vermischten daz ich von in peyden empfangen vnd geporen warde, vnd pin als du mich siehest. dar nach vrsach hal-
 15 bet sich begabe daz Peter mein vater vnd dein von Palerma schiede vnnnd heym gen Paruse zoche vnd mich kindes weyse meiner můter liesse. Dar nache weder an mich noch an mein můter nyemer gedacht het geleich als ob er mein vater nye gewesen were vnd meiner můter nye gesechen het gar vndancksam gen meiner můter gewesen ist, ich will meine geschweigen der liebe die er mir als seiner tochter. nicht ge-
 20 poren von vnnűzer frawen tragen sůlt, Die nitt weste wer er was, vnd im iren leibe vnd freuntlich liebe gab vnd mit teylet; Aber alle űbel ge-
 25 thone ding der gedechtnűß vor langer zeit vergangen vnd vergessen ist, sein vil geringer ze straffen dann wider ze keren, Doch sey im wie im wůl[41^a]le so ist es doch also Er liesse mich ein iunges kint in Palerma; do ich gewachsen pin, als da wol sechen macht vnd mein můter die ein
 30 reiche frawe was, die mir einen edeln man zů der ee gab, vnd mir vnd ir ze liebe kam gen Palermo sten, Vnd als der ein grosser Guelfo was mit vnserm kűnig Carlo wider kűnig Friderich von Napolis waz sache zů gericht hetten kűnig Karlo zů bilffe vnd kűnig Friderich zů schaden, vnd ee ein sölliches zů ende kam, kűnig Friderich sůlchen handel wider
 35 in vernomen het, vmb des willen mein man auß Cicilia weichen vnd flichen műst, wo ich meint die grůst ritterin worden sein die in allem kűnigreiche was; Darumb wit namen das wenig daz vns werden mochte, das gar kleine was ze schaczen gen dem grossen das wir lassen musten als dann waren vnser heűser vnd schlůsser vnd andre gelegne gůter,
 40 vnd her gen Napolis geflohen sein, do vnser herren des kűniges genade so genädig gen vns gewesen ist, vnd vns ein teyle vnser schaden wider kert hat die wir vmb seinen willen in Cicilia empfangen hetten, vnd vns hatt [41^b] geben heűser vnd etliche gelegne gůter, Vnd pey dem allem

Er meinem manne deinem schwager stäcz güte prouision geben hat als
 du wils got palde sechen solt, Als pin ich hie got sey lobe, vnd im von
 nettem vmb sein halse mit iren armen fiele, mit weinenden augen in an
 sein wange züchtiglich küsset, Do nun Andreuczo der schönen frawen
 5 wort vnd märe so ornlich vnd eben vernomen het Der das wort in kei-
 nen weg in irem munde, oder czwischen iren ezennen starbe Ir was ir
 czung mit fleisse gelöst worden stamelt nicht Im wol in gedechtnuß kam
 wie er vernomen hette; das sein vater etlich zeit in Cicilia vnd zü Pa-
 lerma gestandenn waz, Auch pey im selbes wol gedachte Es iunger leüt
 10 gewonheit were schöne frawen lieb ze haben, vnd ze sechem die kleg-
 lichen weichen zäher vnd das lieplich halsen vnd züchtig küssen. Er für
 ware gelaubet was im die schöne frawe gesaget het, nicht anders gesein
 möchte dann ware; Er ir antwürt vnd sprache Frawe last es euch nicht
 fremde düncken ob ich mich wunder euch die warheit ze sagen? warumb
 15 mein vater ein solches gethon hat, noch waz [41^c] er mit eüer müter be-
 gangen hat; Do vonn han ich von im keynerley ye vernomen, vnd ob er
 eüernthalben mit yemant ist ye zę rede komen, solches mir vnkunt ist;
 Darumb nicht möglich ist ich eüer kuntschaft hab mügen habenn; Zü
 gleicher weiße als wert ir nye worden, vnd ist mir so vil dester lieber;
 20 das ich ein schwester hie funden han, der ich nicht hoffet ze haben,
 Auch keinen man so mechtiger kenne; dem ir nicht für ein swester söltet
 gefallen vnd liebe sein, ich will mein gesweigen Doch eines ich euch
 pitte ir mich bescheydet vnd klar machte, wie seyt ir mein gewar wor-
 den, oder wer hat euch von mir gesagt, Sy im antwürt vnd sprache; An
 25 disem vergangen morgen mir es zü wissenn thiet ein güte arme frawe die
 zü zeiten pei mir auß vnd ein get, die pey vnserm vater nach dem als ich
 von ir vernyme lange zeit zü Palerma vnd auch zü Paruse gestanden ist
 vnd were nicht gewesen das es mich füglichher daucht vnd erberlicher
 were du zü mir in dein hause komest dann ich zü dir in ander leut heu-
 30 ser, Ich het mich so lang [41^d] nicht gesaumet; ich were zü dir komen,
 Nach allen disen vergangen Worten, Sy von nettem an hube ze fragen
 na allen seinen freunden wie es iglichem besunder ginge; der namen sie
 alle von dem alten weybe erlernet het. Vmb solches fragen willen An-
 dreuczo noch mer gelaubet des, daß da minder not waz ze glauben
 35 Darnach sie schaffe komen güte frische küle wein vnd mancherley con-
 fectione, nach sölicher zeit gewonheit dann die hieze grosse was; Also
 Andreuczo mit ir trancke vnd collacion machte, Dar nache sich von ir
 scheiden vnd heim auf die herber das nachtmale zü essen gen wolte; das

die schön frawe in keynen weg leyden wolt, vnd des gleichen thet als ob sie sich darumb sere petrübet vnd traurig were In aber mit iren armen vmbfienge vnd sprach hay lassame Awe mir we wol ich erkenne, dein liebe klein zü mir ist vnd so gar nicht bedenckest das du pey einer
 5 deiner nye gesechen schwester pist, pey der do du her kamest ab gessen söltest, vnd von der du dich scheiden wilt essen gen wilt auf die herber, des wölle got [42^a] nicht das ich dich indert gen lasse, wiewol mein man dein schwager nicht do heyne ist das mir schir leyt ist; Ich nach frawen vernügem dir wol ein kleine ere tün sol auf das ir Andreuzo nicht weste ze antworten, dann alleine zü ir sprach, frawe ich
 10 hab euch liebe als mein leipliche swester, Aber gee ich mit heyne so wart man mein die ganczen nacht das wäre nicht wol gethon; Ey des sey got gelobet sprach die frawe; Das ich villeicht nyemant han den ich schicken müge daz man dein nicht warte wie wol du paß thetest mir ze
 15 liebe deinen gesellen schickest das sie her kemen mit vns essen, vnd dar nach alle mit eine heyne gingent; Er ir antwort seiner gesellen auf dise nacht nicht wölt müen; Aber seyt es ir gefallen were sie mit im thette was ir liebet, Nun die fraw des gleichen thet als ob sie schickt an die herber aber nitt thet. Dar nach zü hant sich zü tische seczten mit
 20 herlichen richten peyde wol gedienet waren mit den es die frawe mit fleise nach dem lengsten verzoche, Da mit der nachte dester mere verginge vnd sich [42^b] es dester tieffer dar ein verzöge, Da mit sie mere vrsache hette in pey ir ze behalten Da sie nun das nachtmale verpraecht hetten, vnd von dem tische aufgestanden waren, vnd Andreuzo an sein
 25 herber meinete ze gen, vnd von ir daz vrlab begeret daz sie im in keinen wege verhengem noch geben wolt, zü im sprach; Napels wer nicht ein stat dez nachtes vmb die wege ze gen, sunder gestalten vnd fremden Vnd als sie dem wirt dez nachtmals halben enpoten het Also sie auch im schlaffen halben gethon het; Er der falschen frawet gelaubet was sie im
 30 saget, Also pey einander sassen vnd mancherley wort peydenhalben sich verlossen hette, Die zeit schlaffen ze gen vnd ein güt teyle der nacht vergangen waz, Nicht on vrsache in so lange mit dem schlaffen gen, auf hielte, doch do ir zeit komen was, Sy in mit sampt einem kleinen püblein, das im die heymlichen gemache weisen sölte, In ir kamern schlaffen
 35 weiset, vnd sie mit iren frawen in ein ander kamer schlaffenn gienge Nun die hieze zü sölicher zeit grosse waz, vnd Andreuzo sich [42^c] alleine sache, vnd sich ze frischen vnd külen sich palde außzoche, vnd sein gehässe zü den haupten auf das pette leget vund der leybe von überiger

schwörung des pauchs' seine natürliche recht begeren waz vnd nit weste
 wo hin, Den iungen knaben fraget der im an einem orte in der kameren
 ein türlein zeyget, daz hinauß auf einen gang zû dem heymlichen ge-
 mache ginge. Andreuczo on alle forcht vnd sorge zû dem türlein auß
 5 gen dem heymlichen gemache werceze ginge. Nun zû seinem gelücke
 oder vngelücke, wie es sich begabe er in dem gen auf ein pret drate an
 einem orte daz an dem andern mit auf genagelt was, an dem selben auff-
 gnappet vnd mit Andreucz hinabe fiele, wie wol er etwaz hoch gefallen
 was vnd sich vom vnflat in sölicher maß außgericht het das er keinem
 10 menschen mer geleich waz; doch got im so vil genade thet vnd in so
 liebe het daz er im in dem fallen an dem leibe keinen schaden thet; vnd
 do mit ir paß verstet wo vnd wie daz vnsauber ende was, Es waß ein
 enges geßlein czwischen czweyen heüßern, von den czwey hölczer von
 einem hauß zû dem andern gingen, dar auf vnangenag[42^d]elte priter
 15 lagen darauf man zû dem heymlichen gemach ginge; der selben vngna-
 gelten priter eins mit im hin abe fiele. als ir vernomen habt. sey nun
 wie im wölle Andreuczo sich do in dem kote fand wer trauriger dann er
 dem iungen knaben begunde ze rüffen; Aber als palde der knab ver-
 nomen het daz Andreucz hin ab gefallen was; Er zû der frawen lieffe
 20 vnd ir daz ze wissen thet Die pald zû der kamern eingegangen kam
 nach seinem gehässe oder gewante suchte vnd fandte auch do pey die
 fünf hundert guldin, wer fröer dann sie, vnd trauriger dann der arm
 vnd vnweise Andreuczo Der nyemant getrauet vnd stäcz pey im söliches
 gelte getragen het, vmb des willen ein swester von Palerma einem pru-
 25 der von Paruß den lacz gericht hett, Nach im nicht mer fraget das tür-
 lein palde zû sperret, do der vnselig mesche hinauß gefallen was, vnd
 do der knab im kein antwort gab; Er sein styme erhöchet, vnd lauter
 schrey, aber sie schreyen vmb sunst waz, im grauen vnd gedencken
 ward die sache ginge nit recht zû; aber es ze spät bedacht nicht west
 30 wo aus oder ein, Doch über ein maueren do mit das gäs[43^a]lein ver-
 mauert waz er steyge vnd auf die rechten strassen für die türe des hauß
 kame vnd wol erkante daz er des tages da ein waz gangen, Do er erste
 anhub ze rüffen vnd schreyen Do auch lang zeit sein müe verlose vnd
 mit weinenden augen als der do alles sein vnglücke klare sach, vnd zû
 35 im selber sprach, Awe mir, wie in so kurzzer zeit han ich fünf hundert
 gulden vnd ein swester verloren, vnd nach vil andern Worten vnd kla-
 gen; Er wider an hub mit grossem geschrey an die tür ze schladen, Das
 so lange treyb daz etlich in der nachperschaft im seins pleüen vnd

schreyen nit mer vertragen mochten, im übele zû retten, Auch eine der
 frawen meyde an daz fenster gar schlaffriger kame mit pösen vnzüch-
 tigen worten fraget wer da were O sprach Andreuczo kest du mich niht,
 Ich pin der frawen Fiordilis pruder, sy im wider antwort vnd sprach,
 5 güter man hastu ze vil getruncken so gee schlaffen vnd kom piß morgen
 her wider; ich kan noch weiß dir von keynem Andreucz noch deinen
 öden teydingen nicht ze sagen gee daz dich got berat vnd laß vns schlaf-
 fen? wie sprach Andreuczo mag es gesein daz du [43^b] mich weder
 kenst noch verninst, Für ware ia du weist wol wer ich pin, Auch wol
 10 verstest was ich sage, Ist es dann der Cicilianer gewonheit pröderlicher
 trüe vnd swesterlicher freuntschaft in so gar kurezer zeit vergessen, so
 gib mir doch mein gewantlein wider die ich zû den haubten auff dem
 pette gelassen han, Das dich got pewar damit ich gen müge meinen weg
 hin den ich her komen pin Die meyt im wider antwort vnd sprach güter
 15 man dir hat getraunt oder du pist vol vnd truncken, mit dem sich hin
 ein zoche daz fenster ze schluge. Andreuczo seiner schaden aber mer
 eygenschaft het dann vor, vor leyt vnd zorn schir von sinnen komenn
 were, vnd im gedacht das er durch seine wort nit gelaben möchte Er
 sein stercke prauchen wölte, vnd von neüem mit einem grossen stein
 20 stercker dann ye In die türe lieffe mit aller macht dar ein schluge, vmb
 des willenn vil in der nachperschaft auf stunden an ire fenster gingen
 vnd meinten es were etwer der das der nachperschaft mer zû leyde thet
 dann der frawen an der hause er anschlug im ze schreien als zû einem
 frömden hunt vnd sprachen? waz grosser pübery [43^c] ist das an dir zû
 25 sölicher zeit in der nacht ze komen an güter frawen heüser, vnd nye-
 mant in der ganczen gassen schlaffen lassen, ge weg an den vnseligen
 galgen; hastu mit der güten frawen was zeschaffen so kom piß morgen
 her wider, vnd laß vns heint schlaffen, In dem einer der villeicht der
 schönen frawen rüffian sein möcht an das fenster kame; den Andreucz
 30 in dem hause weder geseheenn noch gehört het, mit grober grausamer
 styin sprach? Wer ist da niden der yns nicht schlaffen lat; Andreuczo
 sein haubte auf hub vnd wol einen sach nach dem als in daucht vnd
 vernemen möchte wie er ein grosser bacalarius sein sölte, mit einem
 dicken kolschwarzen part, vnd zû goliecher weyse thet als er von dem
 35 schlaffe erstanden were mit ginendem manle sein augen reybe, als gern
 der schlaftruncken thut Dem Andreuczo nit mit kleiner forcht anwort
 vnd sprach Ich pin Andreuczo der frawen pruder die in dem hause
 wonet, Der partat bacalari nitt wart daz Andreucz seine wort zû ende

prächte, sunder vil grausamer dann er vor getün het Sprach; sicher vnd fürware ich nit weiß wer mich heltt [43^d] ye wider mein natur daz ich nit hin abe kam vnd dir dein haut so vol schlache daz es mich selbes erparme, vnnützer trunckner esell der du pist vnd nyemant in diser nacht
5 schlaffen lest; In disem wort sich zü rücke zoche das fenster zü spert; Etliche von den nachpern die des partheten bacalari kuntschaft hetten; zü Andreuczo sprachen güter man wilt du auf dise nacht nicht ze stücken geschlagen werden so ge vmb gotz willen deinen wege vmb deins pesten willen dann du weist nicht mit wem du ze schaffen hast; das rate wir
10 dir in treffen Andreuczo der von der grausamen styme vnd angesich sere erschrocken was vnd von dem rate der güten leute Die in dauchten von parmherzikeit pewegt weren, peczwungen was dar von ze gen petrübter dann kein man ye warde vnd sich seines gelcz genczlich verwage, vnd den wege hin ginge den er mit dem meydlein her des tages komen waz,
15 Doch nit weste wo er ging noch in der stat waz Doch gegen seiner herberwercez meinete ze gen vnd ab im selbs im grauete, vnd sein selbes vngefallen het des vnsaubern geschmacks halbem der im von im selbes kame, vnd [44^a] willen het zü dem mere ze gen sich zü waschen, vnd zü der lincken hant durch die gassen Catalana abschlugen nicht lange gangen
20 was; Er gegen im czwen mit einer latern komen sache, von den er sich besorget vnd meinete es weren die stat oder des richters knechte vnd die meinete ze flichen; Er ab dem wege in ein altes gemeüer ginge. Die czwen mit der latern gleiche als wern sie mit fleiß dar geladen oder gepeten worden; zü dem selben alten gemeüer auch eingingen, vnd da
25 mancherley werckzetüge von in legten. als eysne stangen peyhel hacken vnd do mit einander mancherley gespreche hetten vnd die weil sie also mit einander retten Ir einer sprache was pedeüt das; duncket dich als mich, mir bekummet vnd empfinde des pösten geschmackes den mich düncket ich ye gerochen habe, in dem die latern aufhebt vnd den armen
30 vnseligen menschen gesehen hat; Des peyde erschorcken; doch fragten were da wer; aber Andreuczo schweyge Sy fürpas zü im gingen vnd in fragten waz er do also kotiger thet Andreuczo alles das im zügestanden waz in saget vnd zü wissen thet. [44^b] die czwen wol gedachten wo das möchte geschehen sein, Als in des Scharabone Buttouoigo hause zü im
35 sprachen güter man wie oder wo du dein gelt verlorn hast, so hastu doch got sere ze dancken das du also in das kot gefallen vnd dar von komen pist Dann wer dir das nicht widerfaren. als palde du entschlaffen werest, so werstu on czweyfel getöt worden vnd mit dem gelt den leybe

verloren hettest; Aber was hilfft dich nun dalest dein weinen, dann dir
möcht dez geltes gleichen so wenig wider wern als dir wern möchte der
steren des himels, du macht da durch noch wol erstochen werden wo er
verneime daz du davon icht geret hettest. Nach disen worten die czwen
5 sich berieten, darnach zü im sprachen; Güter freundt vns ist leyt vnd
erparmp dein schaden; Doch wilt du ein güter geselle sein so wöllen
wir dich mit vns nemen etliche sache zethon do wir iczund hin gen daz
ze verpringen, vnd czweyfelt nicht dir zü deinem teile mer mern sol
dann das du verlorn hast Andreuczo als der da an im selbs czweyfelt zü
10 in sprach er willig vund bereyt were alle ding ze thon. Nun [44^e] es
sich den tag darvor begeben het das der erzbischof von stat tode was,
vnd mit grossem reichthum vnd köstlichen kleynaten was begraben wor-
den; sunder mit einem köstlichen rubin den er an der hant in einem
ringe hette; der fünffhundert guldin gescheczt warde, Do waz der
15 czweyer meinung hin ze gen vnd den pischoff ze berauben als sie dann
theten; Zü dem sy den armen Andreuczé zü in namen, An anders be-
dacht sich alle drey mit einander auf den wege machten gen der grossen
kirchen wercz. Nun des vnsaubern geschmackes halben die czwen groß
verdriessung hetten; Einer zü dem andern sprach: möcht wir nicht sinne
20 finden das sich der wüsché wo das were, Damit er nicht so gar lämer-
lichen stüncke; das wölle wir wol thon, sprache der ander hie nahen ist
ein prunne do ist alwegen ein grosser Cickel oder eymer an do mügen
wir in gar wol waschen Do sie zü dem prunnen kamen wol das seyle
dar an man daz wasser schöpffet funden aber der eymer was nicht daran;
25 Doch palde eins wurden; in an dar seyle punttem vnd in den prunnen
hin abe liessen, vnd wenn er gewaschen were das [44^d] er das seyle rüt-
telt so wölten sy in wider hin auf ziehen; Do sie nun den in den prun-
nen gelassen hetten vnd schier gewaschen was, sich füget etlich der stat
oder richters knecht die etlichem nach geloffen waren vnd sich erhiezt
30 hettenn Darvmb sie grossen durst heten zü dem prunnen kamen do
meinten ze trincken; Das die czwen palde vernamen vnd von dem prun-
nen flochen; Nun die knecht zü dem prunnen kamen vnd der czweyer
nicht gesechen hetten noch Andreuczo der in dem prunne was sich gar
wol gewaschen vnd gepatt het vnd das seyle rüttelt; Die dasigen die
35 gern getruncken hetten ire tarzen vnd schwerter von in legten do sie
des eymers nit funden sie meinten er in dem prunne were; sich an das
seyle richten nicht anders meinten dann sie den grossen Cickel herauf-
zügen, vnd do sich Andreuczo nahent an dem port des prunne sache

sich mit henden vnd armen daran warffe; daz die knecht sachen, von
gächlichem erschrecken von forchte daz seyle liessen, vngeret darvon
fluchen so sy pest mochten swert vnd harnasch pey dem prunne liessen,
nitt anders meinten dann sie hetten den teuffel auß dem prunne ge-
5 zogen. Do Andreu[45^a]czo auß dem prunne was in gar frömde daucht
seiner gesellen nicht zefinden; wol die tarzen vnd schwerter do sachen
ligen söliches sein gesellen nicht dar pracht hetten in noch fremder nani
wo das here komen were; Aber petrübet was nicht west was er tün solt,
im selbes sein leyde klaget, vnd keinerley an rüret von dann ging nicht
10 west wo hin Doch in seinem gen er seinen gesellen bekame; die wider
kamen in aus dem prunne ze nemen; sich wunderten vnd in fragten wer
im aus dem prunne geholffen het, do von er in nicht kunde sagen, dann
alleine was er pey dem prunne funden vnd gelassen het; dopey die
czwen wol merckten daz es die statknechte müsten gewesen sein; des
15 lachten vnd im sagten? warumb sie von dann geflochen wern vnd wer
die gewesen warn die in aus dem prunne gezogen hetten Nun sich die
mittenacht wurde nachem, sich zü der grossen kirchen fügtenn on müe
gar palde dar ein kamen, vnd daz grabe daz von merberstein was dar in
der pischoff lage palde auf gethon hetten vnd vnterseczt, also hoch daz
20 einer wol hin ein schlieffen mocht Do das also geschehen was, [45^b] ei-
ner zü dem andern sprach? welcher vnter vns wirt hinein steygen. der
ander sprach werlich ich nit. der erste wider sprach, Andreuczo sol hin
ein steygen, trau neyn ich sprach Andreucz; Die czwen sich gen im ker-
ten vnd sprachen warvmb wiltu nicht pey got wilt du nit so mustu, oder
25 du müst dir dein haut vol schlagen lasen oder villeicht gar ze tode do
wisse dich nach ze richten Andreucze mit grosser sorge in das grab
steyge, vnd wol gedacht die mich auch petriegem werden, dann wann ich
in alle dinge hin auß geben han ee ich hin nach komen pin sy mit dem güt
darvon lauffen weren vnnnd mir nicht geben ich arm beleyb als vor, vnd
30 im gedachte er seinen teyle im selbes nemen wölte, vnd der köstliche
ringe mit dem rubin im in gedechtnuß kam, Do von er sein gesellen
vnter wegen het hören reden; Als palde er in das grabe kam er dem
pischoff den ringe ab der hente zoch vnd dem im selbes stieß Darnach
den pastoral die infell die hentschue mit allem andern daz er vmb vnd
35 an het seinen gesellen herauß gab] vnd den pischof nacket in einem
hemde ließ; zü sein gesellen sprach Er nit mer fünde. Die nach
[45^c] dem ringe fragten vnd sprach das er wol suchet dann er ye da
solt sein er fast dez gleichen thet als ob er suchet, vnd sie also mit

peyten aufhielten Die alweg sprachen such wol Als die in mit vntrüe
 meinten; do es sie zeit dauchte vnd ir pürde gar eben gepunden hetten,
 sie den stüczel do mitt sie die decke des grabes vnterseczet hetten auß-
 schlugen vnd die decke niederfallen liesen die da von merbelstein vnd
 5 schwere was vnd den güten Andreuczo also in dem grabe versperten.
 vnd mit dem güte darvon luffen; Wer in grösserm ianer angsten vnd
 leyde dann der güt Andreuczo, daz ein iglicher pey im selbes bedencke;
 Er sich zü mermalenn versuchet mit dem haubt vnd achseln ob er den
 Stein erheben möchte aber nitt möglich was, vmb des willenn von pein
 10 amacht vnd schmerzen überwunden, nider auf den toden leichnam
 sancke; Der in da gesechen hette, nit wol het erkennen mögen wer töter
 gewesen were; er oder der erczpischof. Darnach über ein kleine weyle
 wider zü im selbes kame anhub kleglichen zü weinen, vnd im gedachte
 würde daz grabe von nyemant auf getün; Er vor hunger vnd [45^d] pö-
 15 sem geschmacke des toten leichnam sein leben da müst enden, vnd ob
 auch yemant kem das auf ze thon vnder darinn funden würde, aber ge-
 leiche als vor; er für einen dieb gefangen vnd an den galgen gehencket
 würde Also er ein kleine zeit in solchen betrübten geducken gestanden
 was, Er in der kirchen vnd vmb das grabe leut vernam, vnd höret aber
 20 in grossen sorgen was Das waren etlich puben die auch komen waren ze
 thon; das Andreuczo mit seinen gesellen gethon hett; Des er im wol ge-
 dachte; weren es rechtfertig leute sie pey tage daher kemenn. Zü hant
 die sich an die archen richten den stein palde auf gehaben vnd vnter-
 stülczelt hetten; Darnach nicht eins waren wer in das grabe stig; ig-
 25 lichem grauet darein ze steigen; doch nach etlichen Worten ein pfaffe der
 mit in was zü in sprach? wez besorgt ir euch oder vor wem habt ir
 forcht die toten essen nyemant, wille eüer keiner hinein so will ich das
 thon, vnd der sein, vnd seinen mantel palde von im geworffenn vnd sich
 auf den port des grabes schwang vnd sich mit den füssen hinabe meinete
 30 ze lassen Daz der güt Andreuczo ersehen [46^a] het sich nicht saumet
 palde lauf seine füsse sprang, vnd den pfaffen pey den peinen vnd
 füssen nam dez gleichen thet als ob er in hinabe ziehenn wölt. Do das
 der enpfande an masse erschrack vund ein grossen schrey thet vnd sich
 aus der archen warffe; Die andern sein gesellen nit minder erschrocken
 35 dann er. darvon fluchen das grab offenn iessen vnd alle lieffen vnd flohen,
 nicht anders dann als sy von hundert tausent teuffel geiagt weren. wer
 fröer dann Andreuczo palde sich auß dem grabe vnd auß der kirchen
 machte den weg den er hinein komen waz; In dem es sich gen dem tage

nahet; Er on geferde ginge vnd zů dem mere kame do er sein herber fande vnd erkante Do er einging den wirt vnd sein gesellenn fande; die sich alle sein wunderten also macket vnd vngestalt heym ze komen, in fragten wo er doch here keme; daz er in alles nach einander saget vnd
 5 ze wissenn thet, von dem anfang zů dem ende, was sich in der einigen nacht seyenthalben verloffenn hett. Vber das sie sich mit einander beyten vnd ir rate vnd gedüncken waz. Andreuzo sich mit dem ersten so er mocht [46^b] auß der stat machte; der rate er volget, auf sasse wider gen Paruse reyte daz sein verbechfelt het vmb ein guldin ring wo
 10 er auß geritten was roß ze kauffen mit einem köstlichen rubin wider heym gen Parusse kam.

Von einer edeln frawen genant Beritola Die mit czweien rechern auff einer inseln in dem mere von dem marggraffenn Mala spini funden ware; die iren man vnd czwei kinder peyde knaben
 15 verloren het. Darnach über lang zeit der selben ir sün einer des marggraffen diener warde im ein tochter schwechet peyde von dem marggraffen gefangen worden. Darnach er von dem hern erkant warde vnd im die tochter zů einem weib gab vnd der ander sein pruder auch funden ward, vnd ir müter mit den czweyen sün in Ci-
 20 cilia in irem ersten stant vnd herschaft wider gesezt worden.

Die edelen frawen vnd iungen manne in der abenttürlichen sache Andreuzo halben gar wol vnd genug gelacht hetten; Nach dem als von frawen Fiametta gesagt worden die frauen Emilia wol daucht [46^c] es an ir were, auch der künigin gepote vernam, sich nitt saumet frölich an
 25 hube vnd sprach also. Nach meinem geduncken ye mer wir von dem glücke oder vngelücke sagen ye mer vns do von ze sagenn einfelt vnd in gedechtnuß kompt, wie wol da von grosse wunder vnd dinge sein gesaget worden. Doch mein meinung ist auch der eine ze sagen nicht minder warhaftig als kläglich parmherczig vnd diemütig wie wol die an den
 30 letsten zů frölichem ende kame so was doch ir trübsal vnd traurikeit so grosse gewesen daz ich nicht wol glauben mage das ye mer süsse frölicheit genczlich mer mochte nach volgen Darumb ir aller liebsten frawen vnd gespilen, als euch wol mag wissent sein, wie pey den zeiten vnd nahent seines todes Des aller durchleüchtigisten hern vnd fürsten
 35 keiser Friderichs des andern Ein künig in Cicilia gekrönt warde genant Maufred pey dem ein redlich edelman vonn Napels genant was Arigett

Capez der mechtigest vnd 'fürnemest waz vnd der anbrichtigest der
 ganczen inseln der hat ein edele vnd wirdige iunckfraw zů einem weib
 genant Beritola Nun in des genanten herren [46^d] Ariget hant stunde
 daz regiment des ganczen künigreichs Es sich begabe das künig Karlo
 5 der erste die stat Beneuent gewonnen vnd ein genomen het, vnd künig
 Manfred von Cecilia gefangen vnd getödt het, das dem gubernatore Ari-
 get ze wissen kam; Aber kleine hoffnung zů den Cecilianern hette; sun-
 der sich schicket seines hern feint auch zů flichen, das etlich Cecilianer
 vernamen vnd in mit etlichen andern künig Manfredi dienern künig
 10 Karlo in die hendē vnd gefangen gaben; des geleichē im alle seine
 güter genomen worden in sölichem geschrey vnd nummerdum. Die fraw
 Beritola von irem herrn vnd manne nicht ze sagen west Doch alweg des
 sorge hette das im dann züstunde, vnd vmb grosser sorge vnd forcht
 willen alles das ir gelassen vnd mit einem iren sunē der acht iar alt
 15 was genant Ginfredi, vnd eins andern groß schwager was; des sie täg-
 lichen wartet ze geligen, armglichen auf ein kleins schiffein sasse in
 die inseln Lipari floche do die arm elende edele frawe ires kindes ge-
 lage vnd einen andern sun gepare den sie nennet Loschatschato, Daz
 [47^a] ist als vil gesprochen als den veriatgen Zů dem sie nam ein amman
 20 vnd wider auf ir schiffein sasse vnd gen Napolis zů iren freunden meinet
 ze farn; aber sich anders füget dann ir wille was, Dann das arm schif-
 fein daz gen Napolis gen solte mit gewalte der wint getragen warde in
 die inseln Puncza; In der kein mensch wonet öde vnd wüste ist. do die
 güte fraw meinet gütz wetters zewarten. Die edel frawe als die andern
 25 ab dem schiffein an daz lant ginge ein güte ferre hin von do sie ein
 altes gemetier fande, dann die insel vor alten zeiten gar köstlichen be-
 seczt waz, nun ein eytel walt vnd wüste ist vnd vol alter gemetier Nun
 in das alte gemetier frawe Beritola ginge, Do sie anhubē iämerlichen ze
 weynen vnd iren man Arigett mit 'grossem leyde klagen, daz sie täg-
 30 lichen ein fart thet die weyl sie in der insel waz vnd keinen tag on söl-
 ches weynen vnd klagen vergen liesse Es sich begabe eines tages sie
 an irer klage was vnd nyemant von dem schiffein west wo sy was. Ein
 subtile galle da für ginge vnd das klein schiffein ersehen het vnd das
 übereylten ee ir das schiffein gewar warde vnd das mit allem dem
 35 [47^b] daz darauf waz namen vnd wegfürten Nun do die arm elend edel
 fraw ir tagzeit mit klagen verpracht het vnd den wege wider zů dem
 schiffein nam ir kindler ze sachen als dann ir gewonheit was zethon.
 Sy nyemant fande, daz sy von erste wonder nam, sere erschrak wol

sorge het des das do geschehen waz Ir angesichte auf hube ferre über mere sache palde die galle vnd das kleine ir schifflein hinden daran waz gepunden gesechen hette, do pey sie wol mercket zü geleicher weiß als sie iren man verloren het, Also auch sy ire peide kinder vnd stüne verloren hette, Do alleine armer elender frawen nye mer gesechen warde, on allen trost vnd hofnung weder iren man noch kinder ymmer mere zü sechen, in ölicher gedechtnuß irem man vnd kinder rüffte, vund von leyde vnd amacht nider sancke auf den griesse, Do was nyemant der die edeln frawen mit einem troffen wassers galabt oder getröst het; 10 vnter iren verschwunden geisten wider zü dem leyb gerüfft het Darumb dieselben geist wol faren mochten wo in hin liebet; doch darnach do der elende leybe mit kläglichen zächern seiner kraft vnd stercke ein teil[47^e] wider empfangen het vnd von dem ertrich auferstanden waz Sy lange zeit in dem walde vnd der wüstung iren kinden vnd manne rüffen vnd 15 suchen ginge, wol alle ire müe verloren sach vnd wol erkaute es sich gen der nacht nahet, vnd sy west nicht wo hin sy sich verpergen möchte, an ir altes gemüer dachte do sie ir tagzeit vnd täglich in ir gepett gesprochen, vnd ir leyt gor geklaget het, Darein sy ginge vnd sich got, vnd der wilnuß befalhe Darnach mit grosser forcht die grausamen finstern 20 nacht mit weinen vnd manchem herten zäher überwunden het Die nette tage kamen, vnd nun tercze zeit vergangen waz vnd des vergangen tages darvor keinerley speiß ir leyb empfangen het, von grossem hunger bezungen das rohe graß vnd seine wurzen ze essen so sy pest mocht die nosse, vnd stäcz mit weynen ir gar mancherley gedachte ires vergangen vnd nun gegewürtigen lebens, In dem die weyle sy in sölichen gedanken was, sie gegen ir komen sache ein rott wildes, vnd nicht ferre von ir in ein höle ginge, nitt lang verginge wider darauß vnd durch den walde seinen weg ging Die elende frawe auf stunde [47^d] gen der höle werez vnd darein ginge ze sechen was doch das wille darin gethon hett 30 Do sie fandte czwey iunge rechlein, die villeicht das wilt denselben tage geporn vnd geworffen het, die sy dauchten so schöne vnd lieplichen daz sy sich dar abe nicht verwundern mocht Auch der frawen vmb ir neülichen gepurt ires iungen Kindes willen die miche ir prüst ir noch nicht verschwunden noch ir verdrucket was, die czwey iunge rechlein nam 35 vnnnd die peyde an ir prüste seczet vnd sie sayget die güten tierlein der armen frawen dinst nicht außschlugen ir narung von ir namen nitt minder als von ir natürlichen müter, vnd hin für von der frawen vnd dem wilde kein vnterscheyde mer hetten ze saugen vnd ir leipliche narunge

zů enfahen, Also die elende edel frawe pey den wilden tiren ir wonung
 het, vnd ir gedachte doch sy ein kleyne gesellschaft über komen het mitt
 den sie pflege stäcz die rohen kreüter vnd wurezen ze essen vnd daz
 wasser ze trincken vnd also ofte sy an iren man Ariget vnd ire kinder
 5 vnd ir vergangen leben gedencken ward Also ofte sie weynen müste vnd
 ir gänzlich für genomen [48^a] het In der wüste also ze sterben vnd das
 alte wilde oder reche mit ir so heymlich waz als die iungen warn Nun
 vil mancher monet vergangen waz das die edel fraw mit den wilden tiren
 elendiglichen ir zeit vertriben hat. Es sich begabe eines tages das ein
 10 Pisaner schiffe das aus Püllen kirchferten kam, das von dem wint vnd
 gewalt des mers in die inseln vnd an das ende do die fraw Beritola mit
 irem schifflein hin geflohen was kame vnd do auch güter zeit meinete ze-
 warten; Auf dem schiffe waz ein marggraff mit seiner haußfrawen ge-
 nant marggraffe Cunrad Malaspini, die kirchferten kamen von allen hey-
 15 ligen enden die in dem künigreiche zů Püllen warn, Vnd wider zů hause
 furn, vnd do in der öden inseln etlich tage rubten vnd rasten. Der mar-
 graffe mit seiner frawen damit sie etliche zeit vertriben ab dem schiffe
 an daz lant mit etlichen iren dienern vnd hunden die sie mit in hetten
 spacziren gingen durch die wüeste vnd walde; Nicht lange gangen warn
 20 an das ende kamen, Do die edel arm elender frawe ir wonung het, Die
 hunde die czwey iungen rechlein funden hetten die nun etwas grosse
 [48^b] waren, die ir speise in dem walde suchten in nachuolgtenn, die ir
 zůfluchte nyndert hin hetten dann in die höle zů der frawen Beritola die
 daz geschrei der hunt vernomen het pald zů einem reise liefe vnd die
 25 hunt zů rücke treybe vnd in weret das sie den tierlein nicht theten; Der
 marggraffe vnd sein haußfrawe den hunden nachuolgtenn zů der höle ka-
 men, vnd die armen frawen pey den iungen rechern funden swarcz mager
 pleiche vngestalt sachen vnd alle zerissen funden, Das den hern vnd die
 frawen wunder nam, desselben gleichen frawe Beritola fremde daucht
 30 dise leüt ze sechen darnach vnd der herre der armen frawen ze liebe
 seine hund gestillet het Er vnd sein haußfrawe peyde frawen begonden
 ze piten daz sie in saget waz sy do an dem wilden ende so armlichen
 thet, sie anhuben ze weynen vnd mit dicken hertten zächern dem mar-
 graffen vnd seiner frawen alle ire trübsal saget vnd genczlich ze wissen
 35 thet, vnd wie sie nicht weste ob ir man Ariget Capecz lebendig tode
 oder gefangen wer Desselben gleichen von iren czweyen kinden nicht
 west ze sagen. Der marggraffe der [48^c] Arigetto Capecz groß kuntschaft
 het Im vnd seiner frawen der armen frawen trübsal vnd grosser iamer

vnd leyde gar sere pebegt vnd in zů herczen ginge, vnd nicht gelassen
 mochten peyde mit der frawen weynen vnd klagen musten Darnach der
 margraffe sie tröstet vnd sein fraw also pest sy mochten, vnd der herre
 zů ir sprache liebe frawe tröst euch vnd gehabt euch wol vnd dancket
 5 got daz wir euch funden haben vnd last fallen eüre hertte fürsecz in
 diser wildnuß wöllen sterben, da sey got vor ir sült mit mir vnd meiner
 haubfrawen komen in vnser gegent vnd laut, ir sült keinen mangel haben
 die weyl ir lebt in eren vnd eüers mans willen euch halten sol als mein
 eygne schwester, do ir also lange beleybet piß euch got pesser gelücke
 10 geyt vnd zů schicket; Aber der frawen meinung ye was in der wildnuß
 alleine ze sterben. Der margraffe zů seiner frawen sprach daz sy schafte
 von dem schiffe komen speyse von essen vnd trincken do mit etliche
 kleider vnd sie an leget vnd nicht von ir keme sie mit ir in das schiffe
 füret In dem von danne weyter mit seinen hunden spacziren ginge Die
 15 margraffin pey ir [48^d] beleybe, vnd do mit ir irer grossen trübsal gar
 wol geklaget vnd genuek geweynet hetten In dem die speise vnd kleyder
 komen waren Die margraffin die armen frawen mit marter vnd müe dar-
 zů, prachte die speyse ze empfangen vnd die zů essen. Auch ir meinung
 waz nymer mer ze komen do sy bekant were; Doch die margraffin sie
 20 so vil pete an leget, das die güte frawe mit mere neyn gesprechen mochte
 mit ir ze farn, Sich gütiglichen ergabe vnd mit den iungen rechern vnd
 alten die auch in der weyle komen waz, nicht mit kleinem wunder den
 edeln frawen grosse fest vnd freüde gemacht het. Auf das schiff gingen
 darnach als got dem almechtigen gefallen waz vnd das seine pilgrem
 25 wider zů hause mit freüden kemen. er in güt wetter vnd winte schicket,
 vnd in kurer zeit in daz süsse wasser genant die magra kamen. do
 sie da heym waren vnd mit freüden got lobten absassen zů hause gingen
 Die. edel frawe Beritola in witib kleyde diemütig mit zucht vntertenig
 der margraffin nicht mynder als ir andern iunckfrawe eine waz, auch al-
 30 weg grosse liebe zů iren rechern het, der nit vergaß stäcz [49^a] in ir
 narunge gab. Nun die rauber die der frawen ir schiflein mit iren pey-
 den kinden vnd ammen beraubt vnd genomen hetten, vnd ir in der in-
 seln nicht ware genomen noch gesehen hetten, sunder on ir wissen sy
 alleine in der büst gelassen hetten, vnd mit dem schiffe vnd das darauf
 35 was gen Gefioua komen warn, Do der patron von der galle seinen raub
 des vnd anders daz er geraubt het teylet, vnd einem genant Casparin
 Doria von dem raub zů seinem teyle geben warde, Die czwey kinde mit
 der ammen; die zů hause sant, Die meinet nun ze halten als andre seine

schläuen vnd verkaufften, in dem hauße ze thou waz nottörfftig were,
 Die gûte amme on maß traurig vmb ir verlorne frawen vnd ir wol ge-
 dachte die edelen kindern nit anders gehalten würden dann als andre ver-
 kaufte, darumb sie täglich weynet vnd ir leyт klaget, doch wol erkante
 5 mit irem weynen vnd klagen in nicht geholffen were, Auch sich selbes
 mit sampt den knaben armlich vntertänig sache mer dann pillich waz,
 wie wol die gûte frawe arm waz doch weyse vnd vernüfftig von erst so
 sie pest mocht ich selbes tröstet Darnach pedencken war[49^b]de wo sie
 mit den kinden hinkomen were, sorge hette wörden die zwen knaben er-
 10 kant wer sie weren, in villeicht dovon schaden vnd noch grosser vnglück
 zû sten möchte, dann sie nit gewissen möchte wer in der stat ires vaters
 Ariget feind oder freude was. Dar vmb sie ir gedacht ein sölches ver-
 porgen halten, auch hoffet vnd gedacht; Es sich noch etwan begeben
 möchte, daz sich das gelücke wider zû rücke schlug vnd sich alle ding
 15 verkeren möchten, weren dann die knaben in sölcher zeit pey leben, sie
 villeicht in iren verloren stant wider komen mochten; Darumb sie ir
 genczlich fürnam nyemant ze sagen wer sie wern noch wem sie zû ge-
 hörten, sie seche dann die zeit vnd peyde knaben in geheim zû ir rüffet
 vnd zû ir sprache, ob sie von yemant gefraget würden wer sy wern oder
 20 wem sie zû gehörten, das sie ein sölches verschwigen vnd nyemant
 sagten wer ir vater vnd müter were, sunder alleine sprechen sy ire kin-
 der wern, vnd den grossern der Ginfredi genant was den namen ver-
 keret vnd in nante Giouanotto von Procida; Den iüngsten nit not waz
 sein namen ze verkern dann er was nicht in Cicilia ge[49^c]porn, vnd
 25 den eltern knaben warumb sie das thet mit fleyß vnterricht vnd die
 vrsach zû verstén gabe; Wo sie erkant würden in vil ee vnglück zû sten
 möchte dann gelücke, sölches sie im gar oft gedacht, auch der knob
 vernüfftig was vnd der ammen lere also volget Die knaben nun etlich
 iare in Casparin Doria hause stunden übel gekleydet vnd pöblicher be-
 30 höst vnd pesücht; zû allem schmöden dinst geprauchт waren; das alles
 vertrngen vnd gedultiglichen lyden, Nun Gionanotto der pey dreyzehn
 iaren alt waz gescheide vnd vernüfftig von grossem gemüte vnd herczu
 mer dann einen schöden verkaufften zû stunde sich schmöder arbeit scha-
 men warde die den schläuen zû gehört, ir keine in keinen weg mer tun
 35 wölt, vnd in seines hern Casparin dinst mit mer sein wölt vnd auf ein
 schif sasse vnd gen Alexandria fure, Also lange zeit hin vnd her fur
 aber nit für sich pringen möchte. Do nun dreü oder vier iare also ver-
 gangen waren; Ein gerader iunger hübscher auß im waz worden; Er

auch wol vernomen het wie er seinen vater den er tode meinete noch pey leben were. Aber in künig Karlo gefencknüss vernam; darumb [49^a] er sich alles gelückes vnd hoffnung verwegen het lang zeit in dem lande also vmb ginge doch an dem letsten sich beriete etwan zů einem edeln
 5 manne zekomen vnd den vmb sein solde dienen; Es sich begabe an beferde sein wege durch die stat Lunisana ginge do der marggrafft Kunrad Malaspini sein wonung het, pey dem fraw Beritola was des iungen muter. Zů dem er sich für einen seiner diener verdinget. sich in sölicher maß hielte daz der margraf seiner diinst grosses gefallen het von im gelobt
 10 vnd gepreist über alle andre seine diener was; Aber wie wol er seine muter die stäcz pey der marggraffin was die sahe, doch ir nicht erkante noch sie in; aber das was kein wunder vrsache der zeit vnd iare die sich verlossen hetten in grosser trübsal sunder die muter vnd er ir entwachsen waz; darumb sich peyder gestalt genczlich verkert het von dem
 15 letsten tage do sie einander gesehen hetten pis auf dise zeit, in dem die weil Giouanotto in des hern dienst was sich begab daz dem graffen ein eiden starbe vnd sein tochter genant Spina; ein witib beleiben waz vnd wider heim zů dem vater kame iunck schön vnd hübsche nit vil über dreyzehen [50^a] iare alt was, vnd nun alle süsikeit der welt erkant vnd
 20 versucht het. In witib stant also etlich zeit gestanden; darnach pewegt von inprünstiger hieze der süssen liebe vnd die fackeln ir augen vil dicke vnd oft gegen dem iungen Giouanott irs vater diener ward werffen. Daz er palde vernomen hette, im von ganzem herzen gefallen vnd lieben warde; in sölicher maß gen einander enzünften das ir liebe überflüssig
 25 vnd on masse was; darumb nit lange verginge peyder lieb peydenhalben ein genügen geschahē vnd mit einander die letsten rure der liebe verprachten; das etlichen monet mitt einander triben ee ein söliches von nyemant gemercket warde, vmb des willen sich mer sicher meinten, vnd mit minder fürsechung ir liebe prauchten dann sie in dem anfang gethon
 30 hetten vnd als sölicher liebe zů gehört het. Es sich pegabe eins tages der marggraffe mit seiner frawen vnd tochter auch der merteyle seines haußgesindes spaciren durch einen walde oder gestreiche mit etlichen seinen hunden gingen; Die iung fraw Spina mit Giananotto; die gesellschaft liessen vnd vor an mit einander gingen, vnd do es daucht daz
 35 [50^b] sy wol die andern so ferre für gangen hetten daz peyder wille wol möcht verpracht werden ee yemant her nach kōm; Ab dem wege ein klein ginge sich in das grüne graß saczten do peyder willen in süsikeit der liebe verpracht warde, vnd sich etwas zů lange saumten. In sölichem

luste vnd freuden die lang zeit sie kurecz gedaucht het übereylt wurden, von erste die margraffin; darnach der margraffe selbes zů sölchem kommen, vnd sölche sünde der czweyer liebe sichperlich sachen sich peyde betrübten vnd in grossen zorn fielen, Doch nicht sprachen noch keines
 5 gleichen theten als ob sie icht gesehen hetten; doch zů hant der margraffe schuffe mit dreyen seinen pesten dienern vnd Giouanotto peyde gefangen vnd gepunden furten in das castell in sein gefencknůß vnd da gar wol behüt; des margraffen meinung was, die czwey liebe ein schantlichen tode anlegten Die margraffin der tochter halben sere betrübt vnd
 10 pekümert waz; doch sie die tochter vmb ir grossen sünde willen iglicher sweren grossen herten pein wirdig schäczet, Auch wol des margraffen meinung durch seine wort wider die czwey schuldigen vernomen het. Den [50^c] herten tode den sie von dem hern leyden sölten; des im die edel vnd diemütig frawenn nit vertragen noch verhängen mochte mit grosser
 15 eyle zů irem zornigem manne kam an in begeret vnd in diemütiglichen pat waz er der czweyer sündler halben tůn wölte, das ein sölches on zorn gescheh anders er kein gerechtikeit gepruchen möchte; Auch mer in pat er in seinem alter an seiner tochter vnd seinem eygen plůte nicht wölt schuldig werden noch seine hende verunreinigen an einem seinen
 20 knecht sunder er ander sinn erdächte vnd fůnde da mit seinem zorn vnd auch der gerechtikeit ein genügen geschehe, als sie in gefencknůß halten vnd hungern hert halten mit essen vnd trinckenn da mit sie ire verprachte sünde peweynen vnd klagen möchten. Die gůte vnd heylige fraw im so vil sölcher vnd ander wort im vor saget, das er den mern
 25 teyle seines zorns fallen liesse, vnd schuffe iglichs besunder in gefencknůß zů legen wol behüt vnd mit kleiner speise gehalten, also lange piß er sich irenthalben anders periete; also geschafft vnd geschehen ein dinge waz, Die czwey armen liebe ir leben in stātem weynen vnd trauren [50^d] fůrten offte mit lengerem fasten dann ir nottorft gewesen were, daz
 30 ein iglich diemütig herez pey im selbes pedencke was leben der elenden wesen sein möchte, Also ein ganzes iare vergangen was, das die czwen in sölcher trůbsale vnd gefencknůß gestandenn waren, vnd villeicht der margraffe an ir keins nymer gedacht het In dem sich begabe ein auf-
 lauffe in Cicilia, vnd durch ordnung vnd anrichtung eins edel mans genant Giono von Procide, Die ganz insell Cicilia sich von kůnig Karlo
 35 schluge vnd sich an kůnig Piero von Arogon wurffen dem gehorsam ze sein In fůr iren kůnig auf wurffen, vmb des willen der margraffe Kunrad Malaspini des kůnigs von Arogon grosser freunt vnd diener waz vnd

auch grosse freude vnd feste do von macht Ein söliches der iung Giauanotto in der gefencknuß von seinenn hüttern vernomen het vnd im alles waz in der inseln Cicilia verlossen het sagten. Do er nun alle sache gar eben vernomen het vnd bedencken warde sein gefencknuß do er sich zu
 5 seinem gelücke iczund in fande, vnd auch on alle hoffnung ymmer dar auß ze komen; im von seinem herczen [51^a] Ein kläglicher vnd schwerer seüfezen ginge in dem er sprach Ach got von himel awe mir Nun ist es pey virczelen iaren daz ich daz elende gepaut han nit anders gehoffet han dann zu erleben das, daz sich iczund begeben hat, vund do mit ich
 10 nicht mer hoffen müge, mich in gefencknuß funden hat, vnd villeicht nymer darauß dann toter ze komen, Nach disenn Worten er im selbes erparmet; vnd anhub kläglich ze weynen vnd sein leyt zu klagen, Ein söliches die hütter fremd dauchte daz sich der iunge so sere betrübet. Nun wie sprach der hütter einer zu im? waz geyt es dir ze-schaffen oder
 15 waz ist dir damit geholffen, waz die grossen hern vnd künige mit einander außrichten oder thon was hastu in der inseln Cicilia ze schaffen. Dem der ellende Giouanot antwürt vnd sprach mir ist nit anders dann ob sich mein hercz in meinem leibe entzwey spalte, wann ich bedencke was mein vater in der inseln Cicilia vnd allen iren künigreiche ze
 20 schaffen het, fürware wie wol ich ein iunger knabe was do ich mit meiner muter auß der inseln floche doch mir wol ingedencke ist daz ich meinen vater pey künige Manfredi säligen zeyten ein [51^b] verweser vnd reygirer des ganczen künigreichs Cicilia sahen Der hütter fürpaß fraget sag mir lieber sun? wer was dein vater, meinen vater ich nudalest wol
 25 offenwaren machen seytmal ich mich seinthalben on schaden sprechen mag dez ich dann alweg vor han müssen Sorge haben, er ist genant. ist er anders noch pey leben got wöls Arigetto Capecz vnd ich der mich Giouanoto nennet Ginfredi mein rechter namen ist auch mir nit czweifelt wer; were ich auß diser gefencknuß vnd mich funde in Cicila, Deß mei-
 30 nen ich hoffet ein gütten teyle wider ein ze komen der hütter nit mer fraget vnd sich nit saumet, so er erste möcht alles das er von dem iungen in der gefencknuß vernommenn hat, seinem hern dem marggraffen das saget vnd zewissen thet Vnd do der marggraff den gütten man sein hütter vernomen het keins gleichen gen im nitt thet als ob er darauf achtung
 35 het. Zu hant zu der frawen Beritola ginge vnd sie gar diemütiglichen fraget ob sie ye mit irem man Arigeto ein sun gehabt habe; Der Ginfredi genant were, die frawe im mit weynenden augen antwürt vnd sprach, wen der gröst von den czweien sünden die ich mit [51^c] im ge-

habt han pey leben were Er Ginfredi genant wer, vnd in dem alter pey
 czweyundczwainzig iaren were. Do der herr die fraw vernomen hett im ge-
 dachte der junge in der gefencknûß on czweyfel der recht were vnd im
 gedacht seytmal im also ist als ich vernyme, auch fürware nit anders ge-
 5 sein mag so mag ich wol mit prauchung der parmherczigkeit aller ern
 meiner tochter halben wider ein komen wo ich im die zû einem elichem
 weyb gib vnd in schafte heymlichen für sich komen, vnd in fraget alles
 seines vergangen lebens von der zeit do er auß Cicilia floche piß auf
 dise zeit; daz Gianotto dem margraffen von dem anfang piß zû dem
 10 ende alles saget vnd zû wissen thet; do pey der margrafe eygentlichen
 wol erkante das er Ginfredi Ariget vnd der frawen Beritola sune was
 vnd zû im sprache; Giouanotto als dir wol wissent ist der schande vnd
 schmachheit halben die ich von dir in mein leiplich tochter empfangen han,
 nach dem als ich dich wert vnd lieb hielte ob allen meinen dienern;
 15 darumb ich dir sölches nit getraut het gemeinet het, du in sölchen sachen
 mein vnd meiner ern soltest geschonet haben als dann ein [51^d] iglicher
 getrüer diener seinem hern flichtig zethon ist; es wer mancher gewesen
 er het dich schentlich sterben machen; des ich nicht han thon wöllenn
 noch mein diemütigkeit ein sölches ze thon mir nitt hat vertragen wöl-
 20 len; Nun seytmal im also ist als du mir sagest wie du eins edel mans
 vnd edeler frawen sun seyst; Darumb mein sin vnd meynung ist wo es
 auch dein gefallen ist; dich aus armüt trübsal nemen darinne du pist,
 vnd zû einer stunde dein vnd mein ere zû gûtem vnd frölichem ende
 pringen vnd in ewigen fride seczen Als du wol weist Spina mein tochter
 25 die du liebe gehabt hast des selben gleichen sie dich vnd eüer peyder
 liebe vnd freuntschaft wider alle götliche ere vnd recht gewesenn ist,
 Auch ir heym stetier gû vnd nicht klein ist Ein witib ist, ir vater vnnd
 mûter dir kunt sein, vnd von deinem gegenwürtigen stand vnd wesen ich
 nicht spriche; Darumb wilt du so pin ich bereyt vnd geschickt, wo sy
 30 vor zû den vnern ist dein lieb vnd freundin gewesen, daz sy hinfür mit
 zucht vnd ern dein liebe haußfraw vnd elich weib sey vnd die weil es
 dein gefallen ist hie ze sein du pey mir mit [52^a] ir nit anders solt ge-
 halten sein als mein leiplich sun; Die gefencknûß dem iungen sein leybe
 vnd gestalt entwicht het Er was mager pleich swarcz vnd vngestalt,
 35 Aber sein grosses hercze vnd edel gemüt im nicht gemindert het, noch
 auch die grosse liebe zû seiner frawen Spina nicht nach gelassen het,
 sunder grosser dann ye warde; darumb er von genczem herczen begeren
 was; Des sich im der alte herre zethon erpoten het; Zû hant im sein

groß gemüt riete dem hern zû antwûrten vnd also sprach Herr margraff
 weder begire grosser herschaft noch reichthûms noch keinerley ander vr-
 sache mich haben dez ettern begern machen als dann der pösen vnd fal-
 schen gewonheit ze tûn ist Es ist wol ware ich han eûer tochter Spina
 5 lieb ob allen frawen vnd wil sie lieb haben die weyle ich lebe; dann ich
 sie meiner liebe nicht vnwirdig schätz, vnd ob ich pey ir minder dann
 zû den ern gehört gewesen pin; als nun etlich halten vnd in die sünde
 gefallen pin; die ir wõnung pey der iugent hat, vnd die iugent stätz pey
 ir tregt wölt wir nun die selben sünde ab thon vnd vertilgen, so müste
 10 ye die iugent vor wege genommen werden; dar[52^b]unb wann die alten
 bedechten das sie iunck gewesen wern vnd eins andern sünde pey den
 iren wölten messen, vnd ire pey eins andern bedencken; so wer es nin-
 dert so hæfftig noch so schwere Als ir es vnd auch villeicht ander alte
 machen; Darumb man sprechen mag Ich getun hab als ein freunt vnd
 15 nit als ein feynd; vnd wes ir euch zû mir iczund erpoten habt, sölches
 ich stätz in meinem herezen begern gewesen pin. Vnd het ich gelaubt
 das ich sölches solt von euch sein gewert worden; ich het es vor langer
 zeit begeret; Darumb es mir nun so vil dester lieber ist als vil mein hof-
 nung vor mynder gewesen ist Aber wer es eûer meynunge nicht nach
 20 dem eûer wort mir beweist haben, nicht tröst mich mit lärer hoffnung,
 vil lieber mir ist ir mich wider in die gefencknûß schicket vnd mich do
 haltet also lange es ewer gefallen ist, vnd in der masse ich eûer tochter
 Spina lieb habe Also ich auch euch vmb iren willen sol liebe haben Do
 der alte herre den iungen vernomen het; in wunder name des iungen
 25 rede groß hercz vnnd gemütte do von besunder gefallen het; auf stunde
 zû im ging in halset vnd an sein wang kûsset [52^c] Zû hant verporgen
 nach der tochter sant Die palde für in gefürt warde mager iämerlich vnd
 pleiche nit mer dauchte die sie vor gewesen was Desselben gleichen
 Giauanotto ein ander man daucht Die man do peyde mit peider willen
 30 gegenwürtig des alten hern margraffen Kunrad einander zû der ee gabe,
 vnd nach vnser gewonheit den anfang gabe zû der netten hochzeit, doch
 noch alles in geheyme vnd stille der alte herre in einem schönen köst-
 lichen gemache in schuffe ein gût leben Nun des etliche tage vergangen
 warn ir peyde mit grossem fleiß essen vnd trincken vnd allem dem do
 35 von fretide bekomen mocht warn gewert worn In dem in gûter masse
 waren wider zû im selbes komen; darnach den hern zeit dauchte peyde
 mûter auch ze erfreuen, seiner haußfrawen vnd frawen Beritola zû im
 ruffet zû im also sprach? waz spricht ir darzû fraw Beritola wann ich

euch eüern eltern sun schüffe wider haben, vnd das er einer meiner
tochter man wer Die frawe dem hern antwürt vnd sprach Ich möcht nit
anders gesprechen dann wenn ich euch möcht mer pflichtig sein dann
ich euch pin, doch noch so vil mere ich vflichtig [52^d] were, wann ir mir
5 gebt daz mir lieber wer dann ich mir selbes pin, sunder in sölchem
stand vnd wesen als ir gesprochen habt, fürware ir alle meine verlorne
hoffnung wider zü meinem leibe präch, vnd von grossem weynen nicht
mer reden mocht stille schweige. darnach der her sich zü seiner frawen
keret vnd sprach? fraw wes dēcht dich wann ich dir einen sölchen
10 eyden gebe. zü dem die fraw sprach; Ich sprich nicht ein sölchen eyden
als der, die do von edeler art geporn sein sunder einen loter wann es
dein gefallen were daz mein auch sein sölt. Der herr wider zü peyden
frawen sprach Ich hoffe gar in kurezen tagen euch peyde erfreuen. Nun
aber etliche tag vergangen waren vnd er gesechen het die czwey eleüte
15 in iren ersten form wider komen waren frische schöne röslet vnd gesunt
waren Auch in köstlich gewant bescheiten Er zü Ginfredi sprache. Nun
sage mir Ginfredi was gebest du darumb oder waz wer dir lieber zü der
freude die du hast, dein muter iczund hie ze sechen, Ginfregi dem heren
antwürt vnd sprach; herre ich nit gelauben daz sie ire grosse pein vnd
20 auch gar grosse schmerczen so lange haben leben lassen [53^a] wo sie
aber pey leben were sy zü sechen mir besunder freüd precht als dem
der noch durch iren rat vnd weistum hoffet den grösten teyle vnsers
stancz in Cicilia wider einzekomen Zü hant nach disen worten der mar-
graffe peyde frawen schafte komen, Die mit grossem wunder freude vnd
25 feste peyden eleüten gelücke wunschten vnd sprachen das besunder ge-
nade von got were die den hern in seinem zoren gediemütiget het, das
er die czwey iungen menschen zü der götlichen ee gefüget vnd geben
het. Nun als die edel frawe Beritola durch des hern wort vernomen het
vnd iren sune Ginfredi warde ansechen vnd in ir erwachten etliche kint-
30 liche zeichen in seinem angesichte die ir in gedechtnuß kamen, dopey
sie in gar wol erkante vnd nicht ferrer begeret zewissen, Sunder schnel
mit iren auf gethon armen in vmbfinge, vnd von überflüssiger mütterlicher
liebe beczwungen waz nicht ze reden, vnd alle tugent ir vernunft in ir
verschwunden vnd dem sune in seine arme amechtig saucke, auch in gar
35 fremde daucht als oft er sie gesechenn het als er sie nye erkennt het, vnd
zü hant mütterliches geschmackes en[53^b]pfinden warde vnd genczlich
erkante daz sie sein rechte müter was vnd sie diemütiglichen in seine
arm enpfinge mitt überlauffen zächern der augen ir kintliche trüe pe-

weiset vnd sie an iren munt kisset. Darnach do frau Beritola durch
 labung vnd trost der czweyer frawen iung vnd alte ire tugent vnd geiste
 ir waren wider komen, sie von neuem mit weynenden augen vnd süssen
 lieplichen Worten vol mit mütterlicher weicher liebe wol ze tausent malen
 5 oder mere in halset vnnd kisset, die er diemütiglichen mit zucht von ir
 empfinde; Do nun die mütter den sun vnd der sun die mütter zů
 czwir drey oder viermalen, einander nicht mit kleinen freuden der
 zůseher also einander erkant vnd empfangen hetten, vnd ir iglichs
 dem andern sein trübsal vnd vngelucke gesagt vnd erzelt hetten In
 10 dem marggraffe Kunrad die neuen freuntschaft seinen freunden vnd gū-
 nern zů wissen gethon het vnd zůrichtet grosse freude vnd hochzeite mit
 stechen vnd turniren, alsdann an der fürsten hōffe gewonheit ist. Der
 iunge Ginfredi zů seinem swāher dem marggraffen sprach, her Kunrad ir
 habt mein muter lang zeit in eren [53^c] gehabt vnd mich mit ir auff
 15 disen tage erfreut hat do mit nicht versaumt werde, das durch euch ge-
 schehen mage Darumb so pit ich euch daz ir mein muter mein hochzeyte
 vnd mich noch eines erfreut mit einem meinen pruder, der in eines ar-
 men knechtes weise pey misser Casperin Doria ze Genoua stet, als ich
 euch vormals gesaget han, wie er vnß peide in der inseln Puncza ge-
 20 fangen vnd gen Genoua gefürt het, auch mer wer mein sin ir palde in
 Cicilia schicket, vnd do in stille sechen suchen vnd erfarn liesset wie es
 in der inseln ste, vnd auch ob vnser vater Arigetto noch pey leben oder
 tode sey, Wer er dann pey leben, in welchem stande vnd wesen er sey,
 ein sölches man heymlich erfare vnd zů vns herwider kome; Daz alles
 25 des marggraffen wol gefallen was palde gen Genoua vnd in Cicilia pot-
 tschaft schicket. Da nun die potschaft gen Genoua zů hern Casperin
 Doria komen was vnd an in begerten von des marggraffen wegen den
 iungen genant Schatschato, vnd do pey sein amman die in erzogen het;
 Auch im ze wissen theten alles daz der marggraffe mit Ginfredi vnd sei-
 30 ner muter gethon vnd bega[53^d]ngen hette, Des sich der Casperin nicht
 verwundern mochte zů der potschaft sprach, Es ist war mit we ich dem
 marggraffen möcht ze liebe werden on czweyfel daz thet ich gern Es
 mügen pey virczehen iaren sein das ich in meinem hause han gehabt
 einen iungen mit seiner mütter nach dem ir fragt vnd des ir begert, den
 35 ich euch willicklichen vnd gern etüerm hern zů liebe vnd das anders
 geben wille, Doch saget meinem hern dem marggrafen das er dem Gioua-
 notto nicht zevil gelaube der sich nun Ginfredi nente; er ist aller liste
 vol. Die potschaft er ein kleines verziehen hiesse, vnd in geheym die

ammen fraget vnd von ir alle sache vername der warheit, Auch die amme wol vernomen het wie sich die insel Cicilia widerumb geborffen het, vnd wie Arigetto der knaben vastr pey leben were Sy Casparin alle versach saget wie vnd warumb, ie dem grössern knaben den namen verkert het-
5 ten vnd wie sie in het zů versten geben das sie sprechen solten sy ire kinder wern. do Casparin vername das sich der ammen wort mit des marggraffen potschafft wort wol geleichten, Er alle sach waz im die potschafft vor gesaget hett [54^a] gänczlich vnd für war gelaubt vnd sich et-
was warde schamen vnd leyde enpfinge daz er den iungenn Scatschato
10 so smächlich gehalten het, vnd in widerkerung sölicher smacheit Er er schöne tochter het pey czwelf iaren alt sein mochte die er dem iungen mit einer herlichen heymsteuer zů einem weybe gab, vnd nach etlicher fest vnd freüden mit den iungen vnd der tochter vnd des marggraffen potschafte vnd der güten ammen auf ein wol gewapente galle sasse, vnd
15 gen Lunisana zů dem marggraffen furen von dem sie alle mit grossen freüden schön enpfangen worden. Do sich aber neüe freüde anhub mit stechen prechen vnd turnirn O we wie grosse mochte die freüde sein der edeln elende frawen Beritola, vnd müter wider ze sechen ire verlornе kinde In sölichen grossen eren freüden vnd schall O wie grosse die
20 freüde der czweyer pröder wider ze sechen ir liebe müter mit der getreuen ammen. Darnach aller mit einander hern Casperin mit seiner tochter vnd eyden; Der marggraffe mit seiner frawen kindern vnd allen seinen freunden, fraw Beritola mit iren peyden sūnen vnd iren hauß-
frawen [54^b] An czweyfel die freüde was so groß das ich ir weder mit
25 worten noch gedacken durch gründen noch schreiben möchte, das laß ich euch lieben frawen bedencken, vnd damitt alle freüde genczlich erfüllet werde got der almechtig der aller güte ein überflüssiger geber ist, ee söliche grosse freüde verpracht warde vnd den pesten was Er schieket vnd füget auß Cicilia neüe fröliche fabel von dem leben vnd neüen güten
30 stant Arigetto Capecz peyder iunger vater vnd frawen Beritola man sich begabe in dem do die frawen vnd man warn zů tisch gesessen der ersten richt warten. Der pote der in Cicilia desaut waz wider mit den neüen fabeln für den tisch kam vnd vnter andern mārñ Er sprach vnd saget von Arigetto do er in künig Karlo gefencknūß was, vnd do sich das ro-
35 mor vnd aufflaufe wider den künig an finge wie das volcke der stat zů der prisauñ lieffe vnd alle hūter dez kerckers ze tode schlugen vnd Arigetto dar auß genomen hetten, vnd wider den künig vnd alle Franczosen in zů irem haubtman machten vnd alle Franczosen mit sampt dem künig

tode schlugen, vnd aus der insel triben. vmb sölcher grosser [54^c] red-
ligkeit willenn Arigetto pey künig Pietro von Arogon grosse genade vnd
gunst fand vnd erwarbe, Im alle seine schlösser vnd güter wider worden
vnd pey dem künig in grossen eren vnd stand waz; auch mer saget der
5 pot wie er von im mit so grossen eren wer empfangen worden, vnd wie
so grosse freude er seiner potschaft halben gehabt hett, besunder do er
vername daz sein haußfraw noch pey leben waz do er nye mer nicht het
hören sagen, Darnach er sy an dem letsten gesehen het. Mer er sprach
wie er geschickt het ein erbere potschaft von edel leuten mit einem
10 schiffe, die in dem zû der stat eingingen von dem schiffe ab gesessen
waren. der pot warde mit grossen freuden empfangen vnd gehört Zû
hant der margraffe mit etlichem seinem freunde vnd edelleuten von dem
tische auf stunde vnd der potschaft entgegen kamen, die nach frawen
Beritola vnd iren sünen komen war Die er mit zucht frölich entpfinge.
15 Des selben gleichen Beritola mit peyden sünen; Nach dem alle von
neuem ze tische sassen vnd der ersten richt noch warten, Doch ee daz
Arigetto potschaft keinerley speise enpfinge vor ires hern Ari[54^d]getto
potschaft worben, den marggraffen von seinen wegen vil dinst vnd danck
sagten aller liebe eren vnd freuntschaft die er seiner frawen beweist het,
20 vnd sich im freuntlichen erpote in welchem er im vnd den seinen möchte
ze liebe werden er alweg bereyt vnd in seinem dinst willig wer. darnach
zû Casparin Doria sprachen Er on czweifel sein sölt wann Arigetto ver-
nam die freuntschaft die er Scatschato beweiset het er in darumb be-
sunder dancke sagen würde. Nach disen worten mit freuden anhub ze
25 essen, vnd nicht einen tag alleine der marggraffen seinen eyden vnd
freude schuffe sunder vil manchen tage das thet. Nun etliche tage in
sölchen freuden gestanden vnd gerüet hetten, Der frawen Beritola Gin-
fredi vnd auch der potschaft gefallen was wider in Cecilia heyme zefaren
die schiffe bereyt vnd die segell in die luffte gericht waren allenthalben
30 mit grossem weynen von einander schieden; die iungen mit irer mûter
vnd iren hausfrawen auf die schiffe sassen vnd in kurzen tagen mit
gütem winte vnd weter sich in Cicilia in der stat geheissen Palerma fun-
den, Do sie alle geleiche von herren Arigetto, [55^a] mit grossen freuden
empfangen worden, in sölcher masse das es nicht zesagen ist darnach
35 lange zeit sâliglichen in freuden lebten vnd got den almechtigen mit
andacht stâcz lobten vnd der empfangen dinst danckten.

Künig Soldan von Babiloni, Eine sein tochter dem künige Garbo

verheyret vnd zů einem weyb geben het die er im über mere schickte vnd der schiffe in dem mere versancke nyemant mit dem leben dar von kam dann alleine die iunckfrau mit czweyen person, Die in vier iaren manchen man zů vneren ze teyle ward auch manch
 5 man vmb ir grossen schöne willen sein leben verlose, von künigen herczogen hern vnd fürsten, vnd doch an dem letstenn irem vater Soldano für ein keüsche iunckfraw wider geben warde, des selben gleichen künig Garbo irem man geantwort warde.

Für ware es sich nit lange verzogen hat solt frawen Emilia histori
 10 lenger gewert habenn Die iungen frawen alle hetten der edelen frawen Beritola; ir leyde mit weynenden augen helffen klagen müsen; doch ze ende komen was vnd der kü[55^b]nigin gefallen was, Daz Pamphilio den gesagten history mit einer seiner fabeln nachvolget; der sich nicht saumet schnelle anhub vnd sprach also. Ir lieben vnd diemütigen frawen,
 15 es ist vns gar ein schwere sache, vns zů erkennen wes wir vns in diser welte halten sullen do mit wir frey vnd on sorge vnglückes halben leben möchten, dann oft vnd dicke ist gesehen worden vil die da meinten wenn sie reich bern wol on sorg dez vnglückes leben wölten, vnd nit alleine ein sölches durch pette an got begerten; sunder mit grossem
 20 fleisse müe vnd arbeit keinerley besorglich ding außgeschlagen, den etliche andre durch besorglich streyte vnd ir eygen plütuergiessen auffgestigen sein zů küniglichen eren vnd hoher sälligkeit, vnd allem vnglücke meiten entgangen sein vnd tieffer dar ein schwummen Zů hant sachenn vnd erkanten daz in der tod als wol bereyt was als den andern
 25 vnd an irem küncklichen tische die gift enpfügen; mer ander sein gewesen die mit inprünstiger begirde begert habenn leylich schöne vnd stercke, vnd etlich ander czirung des leybes Des so palde nicht begert hetten; sy sachen vnd erkanten [55^c] sölches in vrsache sein würd pösen lebens vnd schantlich todes; darumb ich sprich kein lebendiger mensch sprechen mag das er durch reichthum oder weltlicher selikeit vnglückes sich
 30 frey oder sicher sprechen müge es stünd wol dar auf wir vns des sicher vnd on sorge sprechen möchten wann wir wol lebten vnd paß würckten Das nemen vns schickten vnd bereyten ze besiczen; das vns der gebe dem alleine vnsere nottorft wissent ist vnd der vns geben mag; darumb
 35 wir mann in mancherley begire schwerlich sünden, wo ir lieben frawen in einer allein größlichen sünt, Das ist in dem; dann euer igliche stätz begeren ist die schönest ze sein, vnd euch an euer natürlichen schöne nitt benügen lasset; sunder die mit grossem fleiße vnd künsten suchet "

mern; Darumb mein sin vnd meinung ist euch ze sagen wie so gar vnglücklich ein schöne heydenische iunckfraw was, vnd was ir vmb irer grossen überflüssigen schöne willen in vier iaren netter hochzeit halben wol zů neun malen zůstunde. Es ist nit lange zeit vergangen zů Babilom
5 ein soldan genant Bominedamb was; Dem in allen seinen tagen daz gelücke nach [55^d] allem seinem gefallen grossen peystant gethon het; Der hat vnter andern seinen vil kinden sün vnd tůchter ein tochter genant Alathiel Die was nach dem als alle die sprechen die sie gesehen haben; die aller schönste iunckfraw die zů der selben zeit in aller welt gesein
10 mochte. Nun zů diser zeit künig Soldan mit hilf dez küniges Garbo von Feß einen grossen sig vnd streit wider volck genant Arabi gehabt het die im sein lant behert hetten vmb des willen künig Garbo dieselben schönen iunckfrawen an dem soldan iren vater zů der ee in sunderheit begeret. Die im der soldan nit versaget Sunder williclichen vnd gern
15 die im zů einem weybe gab vnd die im mit Erlicher gesellschaft von edeln frawen vnd man mit grossem reichtum auf ein wol gewapent schiff seczte, vnd über mere got befalhe heyme dem künig Garbo schicket. Nun die schiffleut daz gůt weter vernomen hetten ire segel aufgericht zů Allexandria außfuren gegen dem nidergang der sunnen, den spicz des
20 schiffes richten, vil manchen tag mit freůden sälliglichen segelten, Vnd nun die inseln Rodi Cicilia Sardingna ze rücke geschlagen hetten [56^a] vnd schir zů dem ende ir reyse komen warn Sich eines tages begabe mancherley widerwertig wint gegen einander auf stunden das mere betrůben vnd das schiffe dar auf die schöne iunckfraw waz swerlich mit sampt
25 dem mere pestriten, in sůlicher masse das sich zů mer malen die schiffleůte des lebes verwegen hetten doch als redlich leůte alle kůnste stercke sinne vnd vernunft ze schiffen suchten vnd prauchten, das czwen tag triben vnd aufhielten; Die dritte nacht komen was vnd on alle die- můtikeit der wint vnd merß stāecz mit grosser kraft vnd zorn das arme
30 schiff pekůmert was vnd nicht gewissen mochten wo sy oder in welchem ende in dem mere mern; dann die nacht finster waz vnd die gewůlcken dem mon sein schein gēomen hetten. Doch nicht ferre von der inseln Maiolica warn, do sie vernamen das sich daz arm schife auf spielte an hube ze prechen, Als das da von dem grausamen mere der grossenn
35 stōsse vnd stůrm nicht mer erleyden mochte, darumb die armen hern man vnd frawen wol sachen nicht da für gesein mocht; sunder alle ertrincken vnd sterben můsten; darumb ein iglichs sein selbs ware name in den [56^b] grossenn schiffenn gewonheit ist zů irer nottorft czwey kleine

schifflein ze füren, etliche nenen sie barcha etlich palascalmo, die selben sie in daz mer wurffen vnd die hern vnd pesten dar auf sassen, Dar nach einer nach dem andern, wem es zû seinem vnglück mocht so gût wern dar auf sprange den tode meinten ze flichen, vnd im alle in die hende
 5 gingen, dann die palascalmo ir niche aller ertragen mochte vnder ginge mit allem volck ertrancke, vnd das grosse schif wie wol es ertrent vnd auf gethon vnd mer dann halbs mit wasser waz, doch also von dem heftigen wint vnd grausamen mere mit der schönen iunckfrawen die alleine mit czweien andern mer dann halbe tod beliben was, auf die inseln
 10 Maiolca nahent an das lant in den griesse truge vnd do pestecket von dem lande auf einen steinwurf, do es die ganzzen nacht von dem wilden mere pestriten was Doch so tieffe vnd hart in den sant stecket daz es sich nit mere weder von wint noch mere berüren mocht also da sten beleyb. do nun der nette tag komen waz vnd sich das mere vnd der wint
 15 gestillet het, die iunckfrawe die mer dann halbe tod was, ir haubt aufhub als amech[56^c]tig sie was anhub iren dienern ze rûffen, aber die gerûften ir zû ferre waren, vnd do ir nyemant antwûrt gab nyemant sache noch vername sie das frömden nam, groß forcht vnd erschrecken enpfinge vnd so pest sy mochte auf stunde iren frawen die da lagen eine
 20 hie die ander dort als die totten menschen mit kläglicher stymme dem rûffet, ir wenig fande die pey sinnen waren, Als die do von dem wilden mere vnd forcht des todes alle ire vernunft verloren hetten vmb sölliches willen der schönen iunckfrawen iamer forcht vnd sorge aber gemert warde Doch mit ir selbes not halben raczs beczwungen was, dann do sy sich
 25 alleine on alle mans trost sache nicht west wo sie was vnter heyden oder cristen; dar vmb petrübter dann iunckfrawe ye warde, das ein'ighs diemütiges hercze pey im selbes bedencke; doch sich so vil müet daz dy die noch pey leben waren auf stunden, Das schiffe sy nachent pey dem lande alles zeprochen vnd zerissen sachen on manne, vol mit
 30 wasser sere erschrocken; die iunckfrawen kleglichen mit iren frauen an hube ze weynen got vnd Machomet ir leyt ze klagen, Er was auch wol über none [56^d] zeit ee sie von yemant von dem lande gesehen warn der sich über sy erparmet het vnd in zû hilffe komen were, doch sich füget in dem ein edel man mit etlichem knechte spaczirn zû irem gelücke
 35 von einem seinen gesasse geriten kom des wege do für ginge der was genaut Pericon; das schiffe ersehen hette, im wol gedacht dez Das dem schiffe zû gestanden waz, vnd mit gewalt des mers do ze rissen vnd über die czwerche gangen wer; zû hant mit einem seinen knechte schuffe er

dar zů wüte vnd dar auf stige seche was dar inne were in das wissen lisse, wie wol es dem knechte müesam waz doch darauf kam vnd die edeln schönen iunckfrawen alleine mit czweyen andern frawen vnder dem spicze des schiffes kläglich weynent verporren fande, Die diemütighen zů im genade vnd parnberczikeit begerten; doch wol dauchte wie sie nicht vernomen wern vnd durch zeygen vnd deütung so sie pest mochten im ir groß vngelück ze versten gaben. Nun der knechte alle ding gesechen vnd vernomen het ab dem schiffe steyg vnd wie er mocht daz seinem heren Peiricon ze wissen thet, Der sich nit saumet die iunck-
 10 frauen [57^a] palde ab dem schiffe mit allem dem pesten daz man gehalten mocht name, vnd sie mit im auf sein gesässe oder schlosse furet do er sie mit güter wartung vnd rubung labet vnd tröstet, vnd durch ir herlich geperde vnd köstlichen reichthum den er pey ir fande, vnd an dem ern daz ir die andern frawen theten, er wol vernam sy von hoher
 15 art vnd edelm stame sein solt, wie wol sie von leibe vnd angesicht pleiche vngestalt vnd übel gerüst waz vnd das von manchem grossen erschrecken die sie in dem mer enpfangen het, darumb nicht vnvillich was ob sie etlich ir schöne verlorn het; Doch von leibe wol vnd adelich geformiret do von Pericon besunder gefallen het, vnd im gedacht het sie keinen
 20 man er sy zů der ee nemen wölt, vnd ob er sy zů der ee nicht haben möchte so wölt er sie für sein liebe vnd freündin halten, Nun was der selbig Pericon von leybe vnd angesicht ein gerade hübsche man, vnd het der iunckfrawen nun etlichen tag mit ganzem fleisse lassen außwarten, da mit sie ein güet teyle getröst was vnd zů ir selbes vnd ir ersten gestalt
 25 vnd schöne wider komen waz. Darumb sie schäczte über alle ander frawen die er ye gesechen hett [57^b] die schönest, traurig on maß daz er mit ir nicht reden kund Darumb er mit weste mer sie was, vnd on masse in ir schöne täglich mer in liebe enzündet oft vnd dick durch zeygen oder deüten mit fleiß sich gen ir leiplich beweist vnd erpote vnd
 30 versucht ob er sie mit liebe zů seinem willen pringen möcht, aber vnkeinen was dann keinerley in vnern weder versten noch vernemen wolt alle freuntschaft sölicher sache außsuge, vmb des willen Pericon mer von inprüntstiger liebe beczwungen waz sy liebe ze haben. Do nun die iunckfrawe vil manchen tage mit Pericon also gestanden was; vnd ir wol ge-
 35 dencken warde nach kristenlicher gewonheit wie lange es sich verzüge, doch an dem letsten sie Pericon mit gewalt oder liebe müst zů liebe vnd willen wern wider iren gedanke vnd willen, vnd ir in irem grossen gemüt fürnam alles ir vngelücke vnder ire füsse zewerffen, vnd zů iren

frawen der noch czwü waren sprache vnd in gepote, das sy nyemant
 sagten noch offenwarten wer sy were; Es wer dann sache das sy
 sich fünden an sölichem ende da sy offenwar hilfe ir freyheit er-
 kennen vnd sechen nach dem sie peyde frawen besunder patt [57^c] vnd
 5 tröstet ze behalten ir reyne keütscheit, dann sie ir gänzlich fürge-
 nomen het sy mit der iren keinen man ze liebe wern wölt noch von
 ir freude haben dann allein ir elich man, sölich sie die guten frawen
 trösten vnd lobten vnnnd ein söliches auch sy nach allem iren vermügen
 thon wölten, Pericon von tage ze tag mer in liebe der iunckfrawen en-
 10 czündet, vnd das so vil mer, als vil er sich des begerte näher sache, vnd
 im das selbig versagt vnd verlaugent was, vnd nit nach seinem willen
 werden mocht, Auch wol sache keinerley freuntlich geperde in zü ir nicht
 halfe, Darumb im fürnam sy mit kunst versuchen, vnd sein gewalt vnd
 stercke auf daz lest behalten, er vernam wol vnd het des ware genomen,
 15 das der iunckfrawen der wein sere, als die sein ze trincken vngewont
 was, dann ir gesece in keinen wein in verhenget den ze trincken, In
 dem im Pericon gedacht die iunckfrawen zü seinem vnkeütschen willen
 ze pringen vnd sie über winden vnd zü gleicher weiß als ob er nicht
 mere acht het das ir wider was vnd im nit verhängen wolt, vnd nach et-
 20 lichem vergangen tage ein köstlich nachtmale etlichen seinen freu[57^d]n-
 den von frawen vnnnd man machen liesse, do die elende iunckfrau auch
 mit ze tische gesezt warde, vnd Pericon mit dem der, der iunckfrawen
 ze tisch dienet an leget vnd schuffe, daz er ir mancherley wein gemischt
 durch einander ze trincken gebe, Daz der selbig mit fleiß thet Des die
 25 schön iunckfraw nicht warname noch erkennen mocht, vnd von dem süssen
 lieplichen getrancke bezwungen, des mer ze nemen dan ir iunckfraw-
 lichen zucht zü gepürt het, vnd frölich warde aller ir vergangen trübsall
 vergasse Nach dem nachtmal die frawen nach Maiolitaner gewonheit
 danczten vnd frölich waren Die iunckfraw nach Alexandriner syten auch
 30 danczet Do Pericon das sach, wol vernam er nahent were dem des er
 stäcz begeret het vnd im nicht wern mocht vnd sy noch öffter ze trincken
 laden schuffe, vnd söliche freude auf daz lengest in die nacht verzoche
 Doch an dem letsten die geladen vrlaub namen ze hauß gingen Die
 iunckfrau allein in ir kamern ging mer warm von wein dann messig von
 35 zucht, nicht anders als Pericon ir frawen eine were, on alle schame ge-
 genwürtig sein, ir gewant auß zohe von ir leget [58^a] ze pette ging, Pe-
 ricon sich nit saumet ir palde nachvölget, alle liecht geleschet, sich an
 ir seyten leget vnd in seine arme enpfinge On alle widerrede mit ir

der süßen liebe spilet vnd seinen willen verpracht Do sy nun sölicher süßigkeit empfunden het vnd nicht vernomen het mit was hörner die manne stiessen; sie grosse rewe vnnd leyd het das sy Pericon ein söliches so lange verzogen vnd versagt het Do er sie zů sülichen süßen
5 nachten geladen het. Dar nach oft vnd dicke sich selbes lude, nit mit worten, denn ir keines das ander verstunde; aber mit wercken nicht mit kleinen freüden peydenhalben etlich zeit mit einander vertriben, aber das vngelücke seinem willen noch nicht ein genügen hat getun noch content stunde, Dahn die eines küniges weyb sein sölt, einem schlechten
10 man zů seinem lieben pule geben het aber noch vil mer vnd grausamer freuntschaft zů sante, Pericon hat einen seinen pruder pey czwey vnd zwainzig iaren alt frisch iunck gerade schöne als ein rosen genant Marato dem warde die schöne fraw seines pruder liebe, auch lieben vnd daz über alle andere frawen gefallen [58^b] auch sich gedüncken liesse
15 nach dem als er durch ir gesichte vnd geperde vernemen möcht, wie er genczlich in irer genade were vnd keynerley dez er an sie begeren möcht, Im nyemant neme dann alleine Pericon fleissig hute, vmb des willen im ein herter grausamer gedanke zů stund dem er also nach kam vnd verpracht. Es sich begebenn hat, zů diser zeit in der porte der stat Maiolica
20 ein schiffe mit kaufmanschacz geladen vnd zu stunde außfarn wolt gen Chia- renza in Romania, des czwen Genoueser patron vnd hern warn, des segel auf gericht weg ze farn bereyt warn, nit anders dann gütz wincz warten, Mit den selben czweyen patron Marato eins warde, wie sie in vnd ein frawe die zůkünftigen nacht in daz schiff enfahen sölten, In dem der abent kam do
25 er sich geschicket vnd bereyt fande seinen pösen willen ze verpringen, von dem sich Pericon nicht besorget noch west ze hüten, er heymlich verporgen vnd vnerkant mit etlichem seinen gesellen sich des nachtes in daz hause verparge vnd nach ordnung geben vnter in, do in zeit dacht tür vnd tor öffent mer et[58^c]liche sein günner der er zů sölichem begert hat ein
30 liesse, darnach In stille die kamern do Pericon pey der schönen frawen schlieffe die öffent, vnd Pericon schlaffent das leben namen vnd tötten In dem die frawe erbachte sere erschracke anhubे kleglich zů weynen die sie mit troem stiltten, vnd mit dem pesten seines gütes vnd der frawen ee sy von yemant gemercket worden sich zů dem mere vnd auf
35 daz schiffe fűgtenn; Maraco mit der frawen alleine vnd sein gesellen wider ze rücke in die stat gingen, Der gűt wint bereit was, von dann segelten iren wege furn, Die elende fraw gar pitterlich ir erstes vnglücke vnd auch nun das kleglich beweynet, Aber der iunge Marato mit

dem heyligen sant Cresci in dem vnterkleyde, got geb vns heyle, sy anhub ze trösten in sölicher masse daz sie sein gar palde gewonet vnd Pericon vergasse, vnd nach irem gedüncken, sy dauchte nun zû güter masse wol stünde, Aber das gelücke ir schnell zû bereyt nete traurikeit
 5 vnd an den vergangen sich noch nicht bentigen liesse, die frawe also iniglichen schöne was als ir zû mer malen ver[58^d]nomen hat vnd on masse von löblichem geperde vnd güten syten vmb des willen die czwen Genoueser patrone des schiffes peyde vmb ir hulde worden vnd in liebe sie enczüntin, in sölicher masse das sy alle ire geschefte liessen ir allein
 10 meinten dienen vnd in allen sachen zû liebe wern, doch iglicher besunder sein liebe prauchet ir keiner von dem andern nicht west vnd Morato sich nicht mercken liesse, Doch in etlicher zeyt die czwen patron einander gemerket hetten vnd ir liebehalben mit einander eins wurden, der frauen liebe in gemein vnd auf gleichen teyle prauchen wolten Zû ge-
 15 leicher weiß als sie mit dem gewin vnd verlust ihr kaufmanschazhalben theten Aber zû der frawen in keinen weg vor Marato komen mochte; darumb iren pösen vnkeüschen willen nicht zû ende pringen mochte. Doch eins tages sich füget daz schiffe gar güten wint het vnd gar schnell ginge, vnd Marato auf dem poppenn des schiffes stunde sein angesicht
 20 hinauß gen dem mere gekert het sich vor nyemant besorget, die czwen patron in hinderwertig angriffen auf huben über die poppen [59^a] ab in das mer wureffn, vnd ee sein yemant war genomen het, er wol ein weyle hinder dem schiffe was; Darumb im nicht mer ze helfen was, do das die schön frawe vernam vnd keinen wege sache durch den man im
 25 möcht zû hilffe komen, Aber nete herczen leyde zû ginge, Die czwen iungen patron palde bereyt sie zû trösten mit lieplichen süssen Worten vnd grosser erpietunge sich gen ir, wie wol sy ir reden wenig vername, nicht alleine iren verloren man, sunder ir grosses vngelücke weynet vnd iämerlich klaget, doch die czwen patron sie stäcz trösten vnd nach man-
 30 cherley rede, einer vnd der ander peyder willen mit der frawen geschah, vnd meinten sie sülten nun zû güter masse wol getröstet seyn, Darnach peyde patron mit einander ze reden kamen mit welchem die frawe die ersten nacht schlaffen sölt des iglicher der erste sein wolt vnd kein einigkeit czwischenn in werden möcht, von erstenn mit pösen vn-
 35 züchtigen Worten an einander kamen, In zorn fielen zû iren waffen griffen ze hant der ein den andernt tode schlug, der ander schwerlich gewunt doch pey leben beleybe. Die fraw aber in [59^b] grosser sorge angst vnd leyde als die alleine on yemant hilfe vnd rate beliben was,

aber arger dann ye, dann sy grosse sorge het aller zorn der czweyer
 patron an dem leczten an ir würde auß gen, vnd fürwar wer der gewunt
 patron nit mit seinem grossem piten gewesen Ich kann nicht vernemen
 wie es ir möcht ergangen sein, anders dann übel In dem palde ir reyse
 5 verprachten vnd gen Chiarenca kamen do die frawe frey vnd sicher
 des toten mans halben was, mit dem gewunten ab dem schiffe in ein
 herber ginge. Nicht lang verginge der frawen grosse schöne sich auß-
 preyt in der ganczen stat nicht anders saget vnd zů gehöre kam dem
 fürstenn der stat vnd aller Morea der zu derselben zeit in Chiarenca
 10 waz, der die frawen begert ze sechen, vnd do er sie gesechen het, noch
 vil mer schöner in daucht dann er vernomen het Zů hant in sie en-
 czündet in sölicher vnmässiger liebe das es nicht ze sagen ist, an kei-
 nerley mer gedencken mocht dann alleine an sie, vnd wol vernomen het
 im welchem form sy darkomen waz, wol dauchte sie im wern möchte
 15 den gewunten patron beschickt [59^c] vnd sie an in begert als pald des
 gewunten freunde das vernomen das ir der fürste begeret, zů hant sie
 im schickten, do von der herre grosse fretide enpfinge, desselben ge-
 gleichen die frawe auch daucht wie sie grosser sorge vnd forcht engangen
 were, Den fürsten die frawe nicht alleine schöne daucht, sunder auch
 20 mit grosser zucht vnd edelen küniglichen tugeten geziret vnd geformirt
 sache, im nitt anders gedencken noch glauben mocht dann sie were von
 edeler art vnd hoher gepurt darumb sein liebe zů ir czwifach warde,
 vnd sie in grossen eren vnd wurden hielt, Sie nicht als ein freunden oder
 pulen als der liebhaber gewonheit ist hielt, sunder als sein eliche frawen
 25 eret, vnd nach dem als der güten frawen mancherley trübsal vnd vn-
 glück zů gestanden was, sy sich gedüncken liesse iczund wol stünde,
 sich selbes tröstet vnd frölich warde In dem ir schöne stäcz meret, vmb
 des wilen in aller Morea von keiner frawen schöne man saget dann
 alleine von ir; Ein söliches dem herczogen von Athena ze wissen kam,
 30 vnd wie schöner frawe auf erdrich nye geporn were; die auch begert
 ze sechen [59^d] der des fürsten Morea nachender freunt was, vnd zů
 geleicher weiße als ob er den fürsten kem ze sechen als er dann offte
 thet. Zů etlicher zeite in dem iare spaciren zu im iagent kam sich auf
 den wege macht vnd gen Chiarenca mit wirdiger gesellschaft füget, do
 35 er von dem fürsten mit ern enpfangen warde, vnd nach etlichem ver-
 gangen tage von der schönen frawen zů rede kamen Der herzog den
 fürsten fraget ob im also wer als man saget vnd er vernomen het, wie
 die so wunder schön sey Der fürst antwürt vnd sprach Noch vil mer

dann man gesagen kan, vetter nicht meinen worten gelaube, sunder dein augen des gezeugen sein stülen peyde mit einander gingen do sie die frawen fundenn Die peyder komen wol vernomen het, vnd sie mit züchtigem fröhlichem angesicht empfinde. Der fürst sie czwischen sie
 5 peyde seczte mit ir ze reden kein freude man gehaben mocht, Dann sie gar ein kleines oder gar nicht krichis vernam, Darumb sie mit grossem wunder ir schönehalben allein an gesehen warde sunder der herczog der nicht wol gelauben mocht daz sie menschlich [60^a] oder tötlich were, sunder götlich wer vnd nicht war nam in seinem anseñen daz er die
 10 gift der liebe mir seinen augen trancke vnd mit dem seinem lust vnd willen meynt ein genügen thon das nit müglich was, dann die empfangen gift er nicht on sünde verdewen mocht vnd im zû herzen ginge in sölcher masse das er gancz von sinnen kam nicht mer weste was er thon oder lassen sölt sasse als ein stocke; Darnach peyde hern von der
 15 frawen schieden Der herczog im zeit vnd weyle name sich mit imselbs ze bedencken vnd der vergiften liebehalben rate haben, alle sache bedachte In dem in dauchte der fürste über alle heren vnd fürsten de säligest were sölche schöne ding ze besiczen vnd die zû seinem willen vnd lust prauchen, Darnach nach vil vnd mancherley gedancken im ge-
 20 dachte vnd gancz für seczte, er den fürsten seiner sälkeit vnd schönen frawen enpfremden wölt, vnd sich nach allem seinen vermügen sölches sällig machen wölt, vnd sein pöses gemüte im riete nit zû feyeren noch nachzelaßenn alle güte vnd gerechtikeit auf ein ort geleet, vnd wie er den fursten betriegem vnd die schönen frawen nemen möchte zû [60^b] dem
 25 alle seine sinne vnd gedancke schicket, vnd mit einem der des fürsten innerster kamerer was anlegt vnd eins ward Als versehenlich ist er in nit gelt übergeben oder villeicht anders, vnd zû gleicher weise als ob er weg reyten wölt seine roß schuffe ze satteln vnd zû ze richten vnd der selbig kamerer der Ciuriaci genant waz In des nachtes mit einem
 30 gewapenten man seinen getreuen ein liesse vnd im des fürsten gemach vnd kamern heymlichen öffnet, Denn er alleine schlaffent die frawe an der frische in einem fenster nacket fande sten, mit dem angesichte gen dem mere die kule dez luftes ze enfahen gekert was, Der herczog seinen gesellen vor aller sache vnterricht het wes er sich halten sölt,
 35 Der mit senften triten über die kamern zû dem fenster ginge, Do er den fürsten hinterwercz wunt vnnd durch stache mit macht auf hube über das fenster ab warffe, Nun was des fürsten pallast gar hoche vnd czwischen dem pallast vnd dem mere etlich alt gemeüer vnter dem fenster.

do der furste toter einfiele, Do gar selten oder nymer yemant hin kame
 Als dann der herczog von ord[60^e]nung geben het. Do mit des fürsten
 tode oder fallen von nyemant gehört würde. Do nun ein solches ge-
 schehen vnd verpracht was. Des herczogen diener vnd geselle, des
 5 gleichen thet als ob er gar grosse freuntschaft, zů dem verräter Ciuriaci
 suchet vmb der freuntschaft vnd dienst willen die er dem herczogen
 gethon het vnd in dem er im ein stricke an den halse warffe, Den er
 im mit fleiß pracht het In sölicher maß mit behendikeit den stricke zů
 zoche das der verräter weder geschreyen noch gereden mocht, in also
 10 erwürgten vnnnd über das fenster auß, ab zů dem fürsten wurffen. Das
 auch geschehen waz vnd weder von der frawenn die da in irem schwere
 schlaffe lag noch yemant anders weder gesechen noch gehört warn.
 Nach allem dem der herczog ein liecht in sein hant nam über das pet
 zů der frawen ging schlaffent fand, die er alle entdackte sy nackent ze
 15 sechen, vnd nach dem gesechen sy besunder lobet, het sie im in iren
 kleydern vor gefallen vnd geliebet. Nun nackent er sy keiner mensch-
 lichen person, sunder einer göttin geleychet, vmb des willen in noch vil
 grösser hicziger liebe enczündt [60^d] auch der verprachten sünde keyn
 erschrecken empfangen het, mit plutigen henden sich zů der frawen an ir
 20 seyten leget die alle schlaffrige meinte es ir fürste were, do er der ver-
 giften liebe leczte rure mit ir verprachte, vnd etliche stunde also pey ir
 gelegen was auf stunde etliche seine diener zů im ruffte vnd die frawen
 namen zů einer falschen porten zů der er was ein komen außging auf
 zů rosse saß so er stilste mochte mit der schöne frawen dar von gen
 25 Athene wercz reyte, Aber darumb das er ein frawen het, er nicht in
 Athena hielte sunder vor der stat auf ein schön gesässe nahent pey dem
 mere, do er die betrübten vnd on masse traurigen fräuen heimlich hin
 füret vnd do sie'erlichen behütten vnd wol gedienet nach aller nottorfte
 thet. Nun des morgens des toten fürsten diener in den sal für des hern
 30 kamern kamen als dann täglich ir gewonheit was dez fürstenn zů wartenn
 wann er auf stunde vnd außginge. Nun none zeit vergangen was, Sie
 gar frömde daucht dann sein gewonheit nicht was so lang ze schlaffen
 an die kamern die vngespert was palde auf thet vnd dar ein ginge nye-
 mant fundenn [61^a] vnd gedachten der furste mit der schönen frawen
 35 were etwan hingangen mit der frawenn sein freude zů habenn, nicht
 weyter fragtenn noch keines argen gedachten Nun an dem nachsten tage
 dar nach sich fugt ein vnweisser oder narre in das öde gemeur da kame
 do der fürste vnd Ciuriaci peyde tode lagen, vnd Ciuriaci pey dem stricke

nam den er an dem halse het, vnd den im hinden nach durch die stat
zoche; Der nicht mit kleinem wunder palde erkant warde vnd den nar-
ren mit süssenn Worten vnd vil verheissen überwunden das er das volke
füret an das ende do er Ciuriaci genomen hat, Do mit grossem leide
5 alles volckes der stat iren fürsten vnd hern tod funden, den sie palde mit
fürstenlichen eren zů der erden bestäten vnd bedencken wurden wer doch
das grosse mort begangen het, auf den herczogen czweyfel vnd gedencken
wurden do man sein nit mer sache vnd wol vernamen daz er heymlich
wege geriten waz darumb nyemant verdachten dann in alleine vnd die
10 schönen frawen mit im weg gefüret het; Zů hant des toten hern pruder
zů irem fürsten namen [61^b] vnd hern machten; Der sich palde mit
aller macht bereyt wider den herczogen von Athena seinen prűder ze
rechen, alle seine freunde fürsten vnd herren an rűfte vnd daz groů
mort ze wissen thet; In kurczer zeit ein grosses vnd redliches volcke zů
15 einander pracht mit dem er sich gen Athenawercz richtet Ein sůliches
der herczog vnd amme desselben gleichen mit aller seiner macht den
fürsten entgegen kame vnd von dem keyser vor Constantino der sein
schwāher waz grosses volcke zů hilff geschicket warde, Sunder im schi-
cket einen seinen sun genant Constantin vnd Manuello seines pruder
20 sun mit grossem czeuge Die peyde von dem herczogen vnd der herczogin
die Constantin schwester waz gar herlich enpfangen wordenn Nun es sich
zů dem kriege täglich mer nāchnet Die herzogin ir zeit vnnd weyle
name peyde iren pruder vnd fettern heymlich zů ir ruffet vnd mit wey-
nenden augen ir leyde klaget vnnd in alle vrsache des krieges czwischen
25 dem fürsten vnd der Morea vnd irem man dem herczogen saget vnd zů
wissen thet vnd wie [61^c] er ir der schönen frawen zů leyde hielte
heymlich vnd verporgen vnd ir als sein eliche frawe kein acht het; also
sie den herczogen gen dem pruder vnd fettern verklaget, vnd sy peide
pat dem herczogen zů eren vnd ir ze liebe, sich sůlicher sache berieten
30 vnd darin theten das sie das pest deucht. Die czwen iungen herren alle
sache vor langer zeit verstanden hetten was sich allenthalben ergangen
het, die frawen nit ferrer fragten, so sie pest mochten die frawen trůsten
vnd neűer hoffnung erfüllen. die sy peyde vntrricht wo die schöne
frawe ir wonung het, in dem von ir schieden, wol vernomen hetten wie
35 die frawe so gar überflűssig schön were das man an ir wunder seche,
vnd die begerten zesechen an den herczogen der sie geweret vnd sechen
thet, vnd nicht bedacht wie es dem fürsten der Morea zeygenczhalben
ergangen was Sy peyde mit im in einen schönen garten den der palast

hat do die schön frawe wonet füret, vnd do in ein köstlich essen zübe-
 reit het mit weniger geselschafft Constantin mit der schönen frawen ze
 tische sasse, sy warde an sechen vnd ir grosse schō[61^d]ne sich nit ver-
 wundern mochte, mit im selbes das bestät er mit augen schöner frawen
 5 nye gesechen het, vnd fürwar gelaubet dem herczogen oder wer der were
 ein sölches in keinem übel auf ze nemen wer ob er ein sölliche schöne
 frawen ze gewinnen ein verreter oder mörder worden were oder weliche
 andre vnerliche sach gethon oder verpracht hett, vnd ein vnd ander male
 die frawen sache sich ir mit lobe nicht genügen mocht, vnd geleich wie
 10 dem herczogen geschehe also es im auch erginge, gancz von herczē in
 sy in liebe enczündet mit vrlaube dem herczogen vnd der frawen von
 dann auß dem garten schiede vnd alle seine sinne vnd gedanke zekrie-
 gen gelassen bedencken warde wie er dem herczogen die schönen frawen
 nemen vnd entpfremden möchte, Doch das feter seiner liebe dez pey
 15 im prant also verporgen truge sich nicht mercken liesse In dem die zeit
 wider den fürsten ze ziehen komen was der sich des herczogen stete
 vnd lant stätz nächent vnd do mit der fürst nit fürpaß züg der herczog
 mit Constantin vnd irem zeüge im den weg nam Aber Constantin heim-
 lich übel [62^a] ze müte alle seine sinne vnd gedanken pey der schönen
 20 frawen warn, vnd im gedacht seytinal ir der herczog ferr wer im wol
 möchte seiner grossen liebe begir vnd willen puß werden, vnd vrsache
 nemen wider gen Athena ze reyten, sich kranck machet vnd zü versten
 gabe er seines leben besorget, solt er ze felde ligen, darumb im der
 herczog ein willig vrlab gabe vnd er Manuello seinem vettern sein volcke
 25 befalhe vnd wider gen Athena zü der herczogin seiner schwester reite,
 vnd nach etlichem tag der herczogin aber der schönen frawen halben im
 über den herczogen klaget vnd in fraget; ob er sich icht bedacht het ir
 ze helffen Er zü der schwester sprach wo es ir gefallen were, er bereyt
 were ir ze helffen vnd die frawen nemen vnd aus dem lande füren Die
 30 herczogin meinete ein sölches Constantin ir zü liebe vnd nit vmb der
 schönen frawen willen thet, Dar zü iren willen vnd wolgefallen gabe;
 doch so ferre daz sy von dem herczogen in sölchem nit verdacht würde
 das sy weder hilff noch rate darzū geben het Das ir Constantin ver-
 sprache dez sie on czweifel were Zü hant er ein klein schiffe bestellet
 35 vnd das eines [62^b] abencz nahent zü dem garten schicket der an dem
 mere waz do er mit der schönen frawen das male gessen het, vnd die
 auf dem schiffe warn er aller sache vnterricht het vnd mit etlichem sei-
 nen diener zü der frawen in den pallast ginge vnd von den die zü irem

dinst vnd auch ir gar schöne empfangen warde, vnd als peyder gefallen was mit einander spacziren in den garten gingen, Zü gleicher weiß als er von des herczogen wegen mit ir genötig ze reden het vnd mit ir gegen einer porten die auß dem garten gegen dem mer was gingen Die von
5 einem seinen diener geöffnet warde nach ordnung dem schiff das zeichen gegeben vnd die frawen mit gewalt genomen vnd mit im auf das gesezet vnd sich gen iren dienern keret vnd sprach, ir keiner sich verrüre als liebe er sein leben hat Dann mein meinung nicht ist den herczogen seiner schönen frawen ze berauben, sunder wege ze nemen
10 widerdrifß schande vnd schmachheit die meiner schwester durch diese frawen von dem herczogen empfangen hat vnd ist beweist worden, über solche rede nyemant so beherczent waz im ze antworten, mit dem er von dan [62^c] schiede nit alleine redlichen, gerudert sunder heflogen, die ganczen nacht also furen dez morgens gen tag sich zu Adegina funden,
15 Do Constantin mit der schönen frawenn absasse die do stätz ir leben mitt weynen füret, do etliche stund gerast vnd gelabt vnd getröst vnd mit der schönen frawen etliche seine kürzweyle verprachte, Darnach wider aufsasse vnd in wenig tagen gen Schio kam vnd nicht gen Constantinoppell dorste, dann vmb der geraubten frawen willen sich vor
20 seinem vater besorget das er in straffe an leget, darvmb gen Schio fure vnd do sich sicher meynet dann anderswo Do die arme betrübt frawe ir leben stätz in weyen vertrybe, Doch von Constantin stätz getröst was vnd auch ir selbes gedennen warde mit irrem klagen vnd weinen nit ir geholffen were, aller ding got sein wölt walten lassen, vnd das nemen
25 wie irs das gelücke bescheret vnd gebe, Nur die weile Constantin also mit der schönen frawen in lust vnd freunden stund, Sich begab Osbet der Türcken künig des keyzers von Constantinoppel feynd zü der zeit in die inseln Smirre kam; Do er vernam wie Constantin mit einer sch[62^d]öen frawen die er geraubt het in vnkeusch zü Schio lege mit
30 etlichem kleinen schiffe, sich palde zü bereyt vnd eins nachtes mit grosser stille vnd geheym mit macht hin fure vnd die stat überfiele ee sein yemant war name Die alle beraubt darnach verprant mit dem rauh vnd güt dar von wider in die inseln Smirre fure, Do Osbet der ein iung
35 gerad man was seinen raub ward besechen, als dann von den gefangen leüten, vnter den er fand die schönen frawenn wol gedacht sy die sein sollte do pey Constantin in dem pette waz gefangen worden, Wer fröer dann er vnd sy ze hant mit grossen freüden Im selbes verheyret vnd köstenlich hochzeit macht manchen monet mit ir in freüden lebet. Der

keyser Constantin vater e sich sölches begabe als ir vernomenn hat er mit Bassano künig von Capidocia hat ein punt vnd ordnung gemacht wider Osbet der Truncken künig. Das er mit gewalt auf einem teyle wider in züge, so wölt er mit gewalt auff dem andern auch also thon vnd
 5 in die mitte nemen Daz sich piß auf dise zeit verzogen hat nit ee hat mügen ze ende komen, dann Bassano [63^a] on den keyser waz vnpillichs begert het dez im der keiser nit gestaten wolt vnd do er vernam war Osbett zü Schio begangen het; er Bassano nachgabe vnd seinem begeren ein genügen tet Do mit so erste möchte auff Osbett züge. Nun
 10 ein sölches Osbett ze wissen köme peyder hern püntnüss wider in. Er sich auf machte mit aller macht ee sie in in die mitte nemen; dem künig von Capidocia entgegen kam vnd in der inseln Smyrre sein schöne frawen einem seinem getrüen bedagten diener vnd güten freünde gelassen vnd beholffen het. dar nach nicht lange verginge er mit künig
 15 Bossano ze streit kame do er schaden nam vnd tode enpfinge vnd alles sein volcke zetreut nicht einer pey dem andern beleyle. Do Bassano den sig vnd den streyt gewonen het; freys mütes mit gewalte gegen der inseln Smirre mit macht kam, do daz Osbett diener vernam der Antiochio genant was der schönen frawen hüter wie wol er ein bedagter man
 20 waz, doch die frawen so iniglichen schön sache daz er seines hern trwe vergasse vnd von überflüssiger vngezanter inwendiger prunst der liebe In die schönen frawen enczündet vnd mit ir, er ir spra[63^b]che reden kunde da von sy besunder freide hette; Als die piß auf die selben zeit als ein stumme gewesen was vnd gelebt hat als die vngehörten, darumb
 25 im minder müe dann den andern iren manne gewesen was sein willen mit ir zü verpringen, dann sie keinen menschen nye vernomen het mit dem zü reden, dann alleine durch deutung oder zeygen. Nun mit Antiochio sy ir note reden mochte vnd sich mit einander in freuntschaft vermischten, vnd vnter dem leylach freuntlicher liebe spilten, doch nicht
 30 ze lauge mit einander in sölchen freuden lebten dann nit lange verginge sie peyde vernomen ir herre Osbet tode empfangen het vnd wie sich Bassane zü der inseln Smirre nächnet, sich peyde mit einander berieten Bassano ires herren feyde auch zü flichen vnd nicht zü peytenn vnd alles das nomen von kleyneten vnnd schacze das in ze nemen was vnd
 35 in geheyne mit einander gen Rodi furen, Da sie nicht lange miteinander wonten, Das Antiochio in schwere vnd grosse krankheit fiele vnd starbe doch vor seinem tode er einen kaufmann auß Cipri der pey im wonet vnd sein groster freunt waz [63^c] Do er sich seinem lesten ende

nahenden sache vnd erkante er dem tod nicht entgen mochte, im ge-
 dacht alles daz er het vnd da mit sein schöne frawen den befehlen vnd
 lassen wölte, vnd peyden person zů im rüffet zů in also sprach; mein
 allerliebster freunt vnd güner, vnd du mein aller liebste frawe, ich mich
 5 sich on czweifel sterben, das mir besunder pein vnd schmerczen pringet
 Dann erste mir daz leben wer lieber gewesen dann ye, Doch nit anders
 gesein mag, vnd die warheit ze reden ich dester williger pin ze sterben,
 seytmal ich ye sterben sol. Das ich mich sterben sich in den armen
 vnd henden der cweyer aller liebsten person die ich auf erden ye ge-
 10 wan, das pist du die ein person mein aller liebster freunt, Daz ander
 ist dise frawe die ich vil mer lieber gehabt han dann mich selbes, seyt
 ich sie ye erkante In der warheit es ist mir von herczen leyt irenthal-
 halben, dann nyemant ist der für sy sey elende vnd frömdē in disen
 landen vnd nyemant hat wo ich stirbe der ir weder rate noch helfe;
 15 darumb mir der tode noch mere vnd schwerer wer wo icht nit vernām
 Als ich dann gelaube vnd hofe mir ze liebe der du sein wirst [63⁴] Der
 sy im wirt lassen befohlen sein als wer ich selbes, solches trauen vnd
 hoffen ich zů dir han auch daran nit czweyfell, darumb ich dich freunt-
 lich pit; ist sach das got über mich gepeñt das du dir alle meine sache
 20 vnd auch sy lassest befohenn sein, ist mir in gener welt vmb dich zů
 verdienen, da pey ein vnd ander das dich düncket meiner sele heyle
 sein, Vnd dich du mein allerliebste fraw pite du nach meinem tod mein
 nit vergesest Da mit ich mich dort in gener welt sprechen vnd rümen
 müge, Ich in diser welte sey lieb gehabt von der schönsten frawen auf
 25 erden, die von der nature ye geformiret warde Gewert ir mich diser
 czweier pete hie auf erden on czweifel ich frölich zů der andern welt
 faren. Der kaufman sein freunt vnd auch die elende frawe alle seine wort
 woll vernomen hetten mit kläglichem weinen in trösten vnd im auf ire
 trüē schwuren vnd versprochen alles das zethon des er begeret het, wer
 30 sahe das er mit tode abe ginge; Darnach nich lange er auß diser welte
 schiede vnd erberlich zů begrebnuß von in bestet Darnach etlichen ver-
 gangen tagen, der kaufman sein sach zů Rodi ge[64⁴]endet het vnd
 wider in Cipri meint ze farn, Aber vor die schönen frawen begune ze
 fragen in disenn sachenn was ir meinung vnd wille were ze thon dann
 35 er wider heim in Cipri farn wölte; sie im antwürt wo es sein gefallen
 were, sie gern mit im farn wölte, dann sie zů yemant weder trost noch
 hoffnung het dann alleine zů im, vnd ir wol kunt were vmb Anthiochio
 willen sy pey im behüt vnd versorgt were als sein eygne schwester; dez

er ir anwürt vnd sprache on czweifel ein sölches sy sich zů im ver-
 sehen solt, vnd waz ir liebet ze tun wer sein wol gefallen vnd do mit
 sie dester sicher were er sprechen wölt sy sein ee frawe were; Also
 auf ein schiffe sassen gen Cipriwercz furen, Do man in peyden in der
 5 poppen des schiffes ein kamern gabe, da mit die wercke den worten ge-
 leichten, als er dann gesprochen het wie sie sein wēyb were, vnd in
 einem genug kleinen petlein pei einander schlieffen; Do sich peyder-
 halben pegabe, daz weder eins noch anders willen was do sie zů Rodi
 auß furen geladen wurden von der wirn des engen petlein des stercke
 10 nicht klein sein, vnd Anthiochio liebe vnd freuntschaft nit [64^b] vergassen,
 sunder peyde geleiche eins willen vnd lieplicher begirde bezungen
 an huben mit einander ze schimpffen ee sy gen Baffa kamen mit ein-
 ander netze freuntschaft der edeln liebe gemacht hetten vnd do in freū-
 den etliche zeit mit einander vertriben; Sich begabe von geschafftes
 15 wegem gen Waffa komen waz ein edel man genant Antigono ein alt
 betagt mane reich von sinn vnd vernunfte aber nit an gůte, dann in des
 küniges dinst das gelücke ee wider in dann mit im gewesen waz; Der
 eines tages on geferde von dem hause darinne die schön frawe mit dem
 kaufman wonet, Der zů der zeit in Ermonia gefaren was, auf vnd ab
 20 spaciren ginge, vnd die schönen frawen an einem fenster ersehen het,
 vnd die ernstlichen ansache vnd sich gedüncken ließ er sy mere gesechen
 het, doch das so gächling noch in keinen weg nicht bedencken mocht,
 Die arme elend frau mit der das gelücke lang zeit sein spile vnd willen
 gehabt het, nun sich enden wolt vnd alles ir vngelücke sich wider in ge-
 25 lücke keren sölt, Sy Antigono auch als wol gesechen hette als er sie. Zů
 hant ir in gedechtnuß kame wie sie in [64^c] zů Alexandria in dez kün-
 ges von Cipri potschaft an ires vaters hofte nicht in kleinen vermügen
 vnd stant gesechen het do von ir grosse freude bekam on czweifel hoffet,
 durch in vnd seinen weistum wider zů küniglichem stant vnd iren eren
 30 ze komen Vnd do ir kaufman nicht do heyme was so sy erste mocht An-
 tiogino zů ir rüffet; der sich nicht saumet schnelle zů ir kame, den sie
 mitt zucht vnd schame fraget ob er Antiogino von Famagost wer als sie
 deuchte vnd gelaubet Antiogino ia sprach er wers Vber das er wider
 sprach frawe mich düncket ich stulle euch kennen, doch das nicht be-
 35 dencken mage wo ich euch gesechen hab, darumb ich euch pit lasset es
 euch nit schwere sein; mir zů gedencknuß pringt wer ir seyt. Do die
 frawe eygentlich vernam daz er Antiogino was, sy mit weynenden augen
 auf gethon armen in vmbfinge, das in gar fremde nam, zů im sprach ob

er sie ye in Alexandria gesehen het. Zû hant Antiogino in gedechtnuß kam vnd erkante das sie Alathiel des küniges von Babilonia tochter was, die man meinte vor vier iaren in dem mere ertruncken tode vnd vergangen were, vnnd [64^d] wolt sie eren als dann küniglichem plût zû-
 5 gepürt, des wolt sie im nicht gestatten, sunder in pate er ein klein pey ir verzüge vnd zû ir nider sässe des er willig was, Vnd mit czucht die frawen er anhube zû fragen? wie wenn vnd von wanne sie doher komen were; dann in allem Egipten lande man für war gelaubete sy tod were Dem die fraw antwürt vnd sprache für ware mir gelaube ich von herczen
 10 gern wölt mir also geschehen were, mir lieber wer der tode gewesen dann zû füren das leben daz mir zûgestanden ist; Des geleich ich gelaube mein vater wölt wo im mein vergangen leben ze wissen keine. Vnd also gesprochen anhube kläglichen ze weynen iren grossen iamer vnd leyde zû klagen; Auf söliche rede ir Antiogino antwürt vnd sprache;
 15 Edele fraw tröst euch vnd seyt gütz mutes vnd nicht entröst euch on note, last mich wissen alle eure sache vnd geprechen, was sich eürnthalben piß auf dise zeit eüers lebens verloffenn hat, vnd seyt on czweyfel mit der hilf gotz ich hoffe eürn sachen rat vnd hilffe finden. Die schön fraw zû Antiogino sprach, Sicher in der warheit Antiogino do ich dich sach mich
 20 [65^a] dauchte wie ich meinen vater seche, vnd pey der liebe treüe vnd gehorsam die ich im schuldig pin vmb der willen ich pewegt pin wo ich mich dir het mügen verporgen sein; ich mich dir han geöffent vnd zû erkent geben, vnd gar wenig person ich het sechen mügen die mir lieber oder den ich mere zefride gewesen were als dein oder vor allen andern
 25 het gesechen oder erkennen mügen, Darumb mein hoffnung ist allein zû dir, vnd alles daz mir in meinem vnglückhaftigem leben zû gestanden ist hab ich verporgen gehalten. Ein söliches dir als meinem vater wille offenwaren vnd zû wissen thon, vnd wenn du mich vernomen hast, düncket dich mir zû helfen sey vnd mich wider in meinen ersten stant
 30 ze pringen, Pit ich dich freuntlich du das mit fleiß thon wöllest Wer aber sache das du dir eins sölichen nicht getrauest zethon, Pit ich dich in besunderheit du keinem menschen sagest daz du mich ye gesechen oder icht von mir ye vernomen habest Antiogino sie von neuem stercket vnd tröstet; vnd daz sie aller sache on czweyfel were. Zû hant sie an-
 35 hube vnd im alles das ze wissen thet daz sich von dem tage do [65^b] sie zû Magiolica mit dem schiff nach der twerchs an daz lande ginge vnd prache piß auff den heutigen tag alles saget Antiogino ir kläglich weinen auch zû herczen ginge, nit gelassen mocht mit ir weynen muste, Doch

sie bedachte zů der frawen sprache, Aller liebste frawe seytmal alle
 euere sache als ir spricht vnd ich vernym verporgen ist, so sey on
 sorge dann mir czweifelt nicht ich euch in eůrn ersten stant pringen
 will, vnd euch euerm vater erberlichen antwůren sol, vnd im lieber sein
 5 sůlt dann ir im ye gewesen sey, die frawe in fraget als wie Des er sie
 palde vnterricht, vnd do mit ir keinerley ander vngelůcke zů stunde so
 er erste můchte; Sich gen Famagost zů dem kůnige fůget, vnd also zů
 im sprach genediger kůnig wer es euer gefallen, so můcht ir auf ein
 stunde grosse ere vnd dancke erwerben, vnd mir armen eűerm diener
 10 grossen frummen pringen. Der kůnig in fraget mit we vnd wie; des er
 in vnterricht. Der kůnige sprach mit we er im gedienen můchte er alzeit
 willig were sunder wo sein lobe vnd ere dovon gemeret wůrde. Antiogino sprach. Herre gen Baffa in euer porten ist komen ein [65^c] schůne
 edele iunckfrawe des soldan von Alexandria tochter Die nach dem man
 15 lang zeit ist tode gesagt hat; der grosse trůbsall ir ernhalben die zů beschůtzen ir zůgestanden ist Doch starck vnd feste darinn gewesen ist,
 iczund in grossem elende vnd armut sich fint, begert wider zů irem vater
 zů faren Darvmb dēucht mich wer es eűer gefallen; Ir im die vnter mei-
 nem gewalte vnd hute geschicket het, fůr war es precht euch grosse ere
 20 vnd do pey mir grossen nucze Ich kan nicht gelauben das dem soldan,
 sůlcher dinst nymer vergessen műgen werden Der herr von kůniglicher
 ere pewegt Antiogino zů saget er des willig were, vnd zů hant mit erber-
 licher gesellschaft nach ir sant vnd gen Famagost schafte komen, Do sie
 von dem kůnige vnd der kůnigin mit grossen eren empfangen ward Dar-
 25 nach von in aller irer trůbsall durch fraget warde, Den sie mit zucht
 nach lere vnd meisterung Antiogino antwůrt vnd aller sache vnterricht,
 vnd nicht lang verging der kůnig sie mit erber vnd zűchtiger gesellschaft
 von frawen vnd mannen, vnder Antiogono gewalte dem soldan irem
 vater heym gen Alexan[65^d]dria schicket ob sie do mit grossen ern vnd
 30 freuden von dem vater empfangen warde do frage nyemant nach, Des
 selben gleichen Antiogino mit seiner gesellschaft. Do sie nun etlichen
 tage gerast vnd gerűet hetten; Der soldan von der tochter begert ze
 wissen wie es sich ir vnd des schiffes halben ergangen hat daz sie noch
 pey leben were, vnd wo sie so lange gewesen were; das sie im ir leben
 35 vnd wesen nicht durch potschaft bezeichnet hett, Die fraw die dann An-
 tiogino lere gar eben vnd wol behalten het, zů irem vater also sprach.
 Lieber herre vnd vater an dem czwainzigsten tag nach vnser aűfart
 von euch, von einem grausamen wint vnd grosser fortun des mers vnser

schiff sich auf thet oder trennet in einer gegent, in dem nidergang der
 sunnen genant aqua morta In teütsche das tode wasser, gelegen in Pro-
 uinza, vnd also von dem mere vnd wint mit gewalt an das lant in einer
 finstern nacht getragen warde do es sich gar zestiesse vnd prache vnd
 5 pey dem lande auff ein steinwurffe mer dann halbes in den griesse vnd
 grunt sancke. Die manne die pey mir auf dem schiffe warn ich nicht
 gedencken noch ver[66^a]nemen mocht wo der ye keiner hin komen were.
 Do nun der morgen komen waz vnd ich von dem tode zů dem leben er-
 quickt was, vnd vnser iämerlichs zerissens schiffe ertruncken sache vnd
 10 nyemant darauf dann mich alleine o lieber vater bedencht pey euch sel-
 bes wes ich mir gedencken möchte. Nun vnser vergangen schiff von den
 lantleütenn was gesechen worden alle pewegt daz ze berauben Ich vnd
 czwu meiner frawen an das lant gesezt worden; Zů hant wir von den
 iungen mannen benomen warn mit einer hin vnd der andern her gezogen
 15 vnd geflochen; wo mein frawen hin komen ist mir nit kunt, vnd mich
 czwen iunge gefangen hette vnd pey meinem hare mich gen walde werz
 zugen In dem vns vier manne reitent bekommen die mein kläglich weynen
 vnd schreyen vernamen, sich gegen mir kerten; das die czwen iunge
 puben ersehen hetten mich palde liessen vnd ze holcze flochen Die vier
 20 manne fur ware mich piderleute dauchten zů mir riten mich fragten Wer
 ich were, aber ich weder von inen noch sie von mir verstanden warn,
 doch nach etlichen iren bedencken ir einer mich hinder [66^b] sich ze
 rosse seczet, vnd mich in ein frawen kloster nach irem gelauben vnd
 orden fürten, was sie do mit denselben frawen retten ist mir vnwissen
 25 Dann alleine von den säligen frawen ich wirdiglichen entpfangen warde,
 mit sampte den ich alweg in grosser andacht gedienet hab dem heiligen
 sant Cresci in Praga, den die frawen von demselben lande eren vnd
 vnterthon sein; pey den ich nun etlich lang zeit gestanden was vnd ir
 sprache nun zů guter maß begriffenn het, Die frawen mich begunden ze
 30 fragen wer ich were vnd von wanne ich were Nun het ich sorge saget
 ich in die warheit, ich von in als ein feindin irer gesezze auß getriben
 von in vnd gestossen würde; darvmb ich zů in sprache, Wie ich eins
 edel manes tochter auß Cipri were der mich in Creci verheiret het vnd
 mich zů meinem manne schicket, vnd ich von der fortun dem wint vnd
 35 mere do her were getragenn worden, vnd in vil manchen sachen forchte
 halben ich iren gelauben vnd ir gesezze genczlich hielte, Darnach von
 der oberstenn die sy die ebttessin nennen gefragt ward ob ich wider
 heym in Cipri faren wölte; der ich antwürt, Ich [66^c] nicht anders von

got begeret Aber die erber frawe meiner ern grosse sorge het, vnd nitt
iglichen die in Cipri furn über mich getrauen wolt, dann nun pey czweyen
moneden vergangen sein, sich füget aus Franckreiche etlich edelleüte
mit iren haußfrawen, vnter den etlich der ebtessin geporne freünde
5 warn, die vernomen het wie sie gen Ierusalem zů dem heiligen grabe des
den sie für iren got halten sol sein begraben worden Do er von den
Iuden getöt warde, zihn sölten, denselben erbern mane vnd frawen sie
mich befalhe vnd sie pat das sy mich meinem vatter in Cipri antwürten
wie mich dieselben erbern leüte in ir gesellschaft enpfingen In ern vnd
10 zucht hielten, do von lange ze sagen were. Zů hant auf ein schiffe sassen
vnd nach etlichen wochen vnd tagen gen Baffa in Cipri kamen Do ich
mich aber alleine vnd elende fand vnd nicht west waz ich nun zů den
erbern leüten sprechenn solt, Die mich meinem vater antworten solten
als in von der ernwirdigen frawen ebtessin waz befolhen worden, Doch
15 mich got beriet dem ich villeicht erpamet do wir ab dem schiffe sassen
an das lant gingen In [66^d] dem Antiogino mir zů gesichte kam dem ich
palde rüffet; vnd domit ich von den erbern leüten nicht vernomen were.
ich in vnser sprache mit im redet das er mich für sein tochter enpfinge,
vnd zů seinen henden neme. der mich pald vernomen tet vnd mit grossenn
20 empfinge, vnd den erbern manne vnd frawen nach seinem armen vermügen
dancke saget vnd zů hant mich zů dem künige von Cipri füret, der mich auch
mit grossen eren enpfinge, vnd mich als ir secht euch wider heym gesent
hat, lieber herre vnd vater ich möcht euch in langer zeit sagen waz sich
meinthalben sider ich von euch schiede verlossen hat ob was anders ze
25 sagen ist Antiogino dem ich zů mer malen mein trübsalle geklaget han
Euch paß dann ich mancherley vnterrichten mag. In disen worten An-
tiogino gen dem soldan kèret, Also sprach; her als sy mir offit vnd dicke
gesaget hat vnd ich auch von den erbern leüten die mir sie antwürten
vernomen han, Sy euch alle ding vnd sache ze wissen thon hat, Dann
30 eins alleine sy vergessen hat, vnd das villeicht nach meinem gedüncken
gelassen hat, vnd meint ein sölches ze sagen ir nitt [67^a] zů ste; Das ist
daz die erbern manne vnd frawen mit den sie in Cipri komien ist, mir
sagten wunder von dem erbern züchtigen vnd lobsamen leben, daz sy mit
den klosterfrawen geführt het, vnd das grosse klagen vnd weynen das sie
35 theten do sie von ir schieden, vnd solt ich euch alles das sagen das mir die
erbern leüte von ir tugent sagten, Ich daz euch auf disen tage nit gesagen
möchte sunder die nacht dazů nemen müst; Darumb an dem gesagten euch
benügen last, vnd nach dem als ich sichperlich gesehen han, vnd durch der

erbern leüte wort mir ist beweist worden Ich in der warheit sprich Ir euch
 rümen vnd sprechen müget Ir die schönsten tugenthafitgen tochter
 habet über aller herren der welt die kron tragen, Von allen disen worten
 der soldan besunder freühe hat got dancket vnd pate er im genade ver-
 5 lieche Damit er allen den die sein tochter geert hetten dancke vnd lon
 sagen möchte, sunder dem künig von Cipri der sie im so erberlich ge-
 sant het; darnach palde grosse gabe vnd schanckung zů bereyt Antio-
 gino ze geben In seinem abscheiden ein genädig vrlaub gabe, vnd durch
 brieffe vnd potscha[67^b]ft dem künig grossen dancke sagt sich gen im
 10 in allen seinem vermügen freuntlich erpote, Darnach zů hant sein ge-
 fallen was, die angefangen freuntschaft mit künig Garbo die zů ende
 ziehen im alle sache zů wissen thet was sich iunckfrawen Alathiel seiner
 haußfrawen halben verlossen het wölt er sy haben das er dann selbes
 nach ir schickte, von disen historien künig Garbo besunder freüde het vnd
 15 mit grossen ern nach ir sant vnd frölich enpfinge, vnd sie, die da mit acht
 mannen in vier iaren wol zů tausent malen geschlaffen het, sich dem künig
 für ein reyne iunckfrawe an sein seyten leget vnd zů versten gabe im also
 wer; vnd ein künigin mit im lang zeit in freüden lebet, Darumb man spricht
 Bocca basciata non perde ventura; Anzi rinoua chome fa laluna, Geküstem
 20 mund warde nye vnglück kunt, Sunder als der mon sich vernetten kan.

Wie ein edelman von Angfers von einer künigin von Franck-
 reich falschlichen verklaget warde, Vnd vmb grosser forrcht willen
 alles das sein gelassen vnd mit czweyen seinen kinden einem kna-
 ben vnd tochter in das elende floche [67^c] peyde kinder in Engelant
 25 hier vnd dort liesse alleine in Schotlant zoche ze dienen, vnd nach
 etlicher vergangen zeit in armen knechtes weise wider in des kün-
 nigs von Franckreiche lant vnd hofte kame do erkant warde vnd
 wiger in seinen ersten stant vnd erste herschaft gesezet warde.

Die grossen seüfzen die edeln frawenn alle klagten vnd leyde tru-
 30 gen der also schentlichen vnd petrübten sache halben Die der schönen
 frawen Alathiel in vier iaren zů gestanden waren Aber wer weyß war-
 umb sie söliches klagen beczwungen warn, villeicht etliche vnter in was,
 nitt minder von begire so mancher hochzeit darzů die schön frawe so
 ofte geladen was beczwungen was ze seüfzen, dann vmb erparmung wil-
 35 len Das lassen wir iczund fallen; Doch in Pamphilio letsten worten die
 frawen in allen ein genüge lachten, als die so manchen man beschlaffen

het, Vnd darnach sich für ein keüschē iunckfrawe einem künig an sein
 seiten leget etc. Nun die künigin wol vername, wie sich Pamphilo hi-
 stori geendet het Sich gen frawen Elisa ke[67^d]ret ir gepote daz sie mit
 einer irer histori der gesagten materi vnd ordnung nachuolget. Die frö-
 5 lichen anhubē also sprach. Ir aller liebsten frawen vnd gespilen seytmal
 wir fürpaß volgen vnd sagen sölle von dem gelücke des macht on ende
 ist, So ist mein sin vnd meinung euch auch eine genug klegliche histori
 oder netze fabel ze sagen nicht minder erparnlich dann die gesagten ge-
 wesen. Darvmb ich sprich zû den zeiten do daz keiserlich reich von den
 10 Francosen zû den Teütschen getrahen warde vmb des willen peyden-
 halben groß czwittraachtung kriege vnd feintschaft wuchse, vnd der künig
 von Franckreiche seine lant ze beschützen mit einem seinen sun vnd
 aller macht seines künigreiches aller seiner freunde vnd gûner begeret,
 Ein grosses volck von reisigem zeüge wider die Teutschen auf vnd zû
 15 samen prachte Daz es nicht ze sagen ist Vnd ee er auß dem lande zoch
 vor das mit einem verweser versechen wolte vnd seinem kunigreiche ein
 guten reigirer an seiner stat geben wolt, vnnd im in sein gedechtnuß
 kam der edel vnd fûtsichtig wise man Gualtiere grafe von [68^a] Angfers
 fein getreuer rate vnd diener, wie wol er in streyten ein kluge man was
 20 doch an seiner stat er in geschickter dauchtt dann kein ander man sei-
 nes künigreiches, dem er daz reigiment an seiner stat befalhe vnnd über
 gabe; Darnach den wege wider seine feinde name, vnd der graffe von
 Angfers mit grossen sinnen vnd weistum sein ampt übet, Doch keinerley
 on der künigin wissen thet noch verpracht in allen sachen der künigin
 25 rate pflage wie wol sie im von dem künige in sein hute vnd befolhen
 waz; doch sie stätz als ein künigin eret. Der graffe waz von leybe gar
 ein auß dermassen gerade vnd schöne man, In dem alter pey virczig
 iaren Do pey diemütig züchtig vnd aller tugent vol seines gleichen in
 keinem lande waz, vnd über daz ein adelicher wol geczitter ritter als er
 30 in langer zeit in allem künigreiche waz ye gesechen worden. Der seinen
 leibe vnd person örnlicher hielte vnd cziret; Nun der künige vnd der
 sun peide zû felde vnd streite lagen, vnd dem grauen Gualtiere sein
 haußfrawen mit dem tode abgangen was vnd er witbe was vnd von sei-
 ner frawen im czwey kinde beliben warn ein knabe [68^b] vnd tochter
 35 Nun sein gewonheit was des künigreiches-geschefte halben er mit der
 künigin gar vil darauß redet, vnd in vil sachen iren rate nam wie wol
 es nit not thet, sunder ir zû eren das thet, Nun die künigin den graffen
 so züchtig vnd tugenthafft sache das sie gancz in liebe in in enczündet

vnd ir augen vnd gesichte auf in warffe alle ire gedencke zů im stunden
 vnd mit besunder freuntschaft sein zucht vnd schönen leybe mit ir selbes
 ofte bedachte, vnd von sölchen gedenccken von verporgner liebe beczwun-
 gen was, in liebe von ganzem herzen zů haben Sich iuncke vnd frisch
 5 vernam den graffen on weybe sache; ir gedachte sy in mit kleiner müe
 zů irem willenn pringen möchte, vnd keinerley ir hindrunge oder irung
 prechte dann ein sölches on in zepringen oder begern Dann alleine freü-
 liche schame; Doch an dem letsten ir für nam alle forcht von ir schluge,
 vnd einest sie zeit dauchte sich alleine fande, vnd nach dem edelen graf-
 10 fen schicket als het sie gar genötiges mit im ze reden Der graffe dem
 sölliche gedanke ferre vnd fremde warn von der frawen gedanke palde
 zů der künigin kame vnd als ir gefallen waz sich zů ir auf [68^c] ein pet-
 lein seczet das in der kamern was, Nun der graffe die frawe zů dem an-
 dern male gefraget hat waz die vrsache sey oder wes sie begere daz sie
 15 also in eyle nach im gesant habe, sy aber sweyge. doch an dem letsten
 von der verporgen überflüssigen liebe beczwungen was ir vnmessige liebe,
 Dem graffen offenwaret In irem angesicht rote vnd schame enpfinge,
 halb weinet alle czittret mit senften Worten an hůbe vnd also sprache,
 mein aller liebster herre vnd freünt, Eüer weißheit wol vernemen vnd
 20 erkennen mage wie die schwaheit des fleisches der man vnd frawen also
 grosse ist, vnd das mancher vrsach halben, doch mer in einem dann in
 dem andern; darvmb wol pillich were vor einem rechten richter ein ei-
 nige sünde durch mer person verpracht, Doch nicht einerley pusse söl-
 ten gepüßt wern wer ist der, der da nicht spreche, Das ein armer man
 25 oder frawe nicht mer straffe oder pein wirdig sey, die mit grosser müe
 vnd arbeit ir narunge vnd leben suchen müssen wann dieselben von
 schwachheit des fleisches bekümert sein in liebe fallen vnd söllicher liebe
 nachuolgen, dann ein reiche fra[68^d]we die stäcz müssig vnd in folten
 leben ist vnd keinerley ir nye gemangelt hat nach ires herzen begire,
 30 für ware ich gelaube nyemant sey der nicht spreche als ich spriche; dar-
 umb ich mir zů versten gibe ein sölches; In sölcher frawen dienst ir in kei-
 nen weg in übel auffzenemen sey ob sie sich verschiesen lasset einenn an-
 dern man on den iren liebe zehaben sunder wo sy ir den weysen vnd kluge
 erwelt hat, Des mich düncket ich gethon hab Auch mere vnd ander
 35 sache sein die mich czwingen vnd nöten liebe ze haben, Als ich dann
 mein weiche iugent vnd die ferre vnd lenge von mir meines mannes.
 Nun müsen von euch auf ersten in meinem dienste in hilff meiner pri-
 nenden liebe, die dasigenn die pey dem weysen mügen vnd ir wonung

haben, Darvmb ich euch pit rat vnd von euch begere. seytmal mir mein man so ferre ist vnd ich der schwache meines fleisches in prinender liebe nicht wider sten mage; der macht vnd stercke so groß ist, das sie ofte die starcken man ich will geschweigen der weichen freülein überwunden
5 haben, vnd daz täglich thon. Nun ich als ir wol secht in müssigem vnd geczier[69^a]tem leben pin, Das alles vrsache sein vnd mich haben übergemachen der liebe lust vnd freüde ze suchen, wie wol ich erkenne wo ein söliches zû licht keme nicht wol noch erlich gethon mere, wo das aber verporgenn ist, ich es in keinen wege vnerlich schacz Sunder mich
10 gedüncken lasse wie mir in sölicher liebe besunder genade geschehen sey vnd mir mein vernunft nicht gemindert noch genomenn habe, einen liebhaber zû erwelen, sunder mir die gemeret habe, vnd euch würdig mein zû erwelen gewest habe; darumb wo ich nicht von meinem beduncken petorgen pin So düncket mich ir der edelst vnd weyest ritter sey der
15 in vnserm künigreiche sey, vnd ich mich on einen man sprechen mag pin geleihe als ir on frawen seyt; Darvmb seyt gepeten vmb der liebe willen die ich euch trage daz ir mir der eütern nicht verlaugent der mir freuntlichen vor andern frawen vergünnet vnd euch mein iugent erparmen lasset die für ware zû gleicher weise als das eyse in dem feüer
20 vmb eütern willen abnimpt vnd zerget, vnd auff söliche wort anhub kläglich ze weynen nit mer gereden mocht [69^b] ir haupt neyget, vnd sich dem graffen an sein prust sincken liesse. Der graffe als ein redlich weiser ritter die frawen mit zucht ir vnmesseige liebe begunde ze straffen do pey aller zucht vnd eren trösten vnd sy meint von sölicher schantlichen liebe
25 ze zichen, aber vmb keinen was In sölichen worten sie sich im meinte an seinen halse ze werffen; des er ir nicht gestatet vnd sprach dez wölle got nit vnd pey dem sacrament schwure er sich ee vierteylen lassen wölte dann in sölichen sachenn wider seines hern ere noch yemant anders thon wölte. do das die frawe vernam gächling aller liebe vergasse
30 in czoren enczündet vnd sprach, so pin ich euch pöser vnnüczter ritter meiner pete vngewert Nun wölle got nicht leyt ir mich töten wölt, ich euch vor töten vnd auß diser welt iagen vnd treiben wille, vnd als ein verzagte mit peyden henden in ir hare fiele vnd ir prust auf gerissen als ein vnsinnig weybe mit hoher stimme an hube zû schreyen retta io retta
35 io vor dem pösen graffen von Angfers er will mich nöten vnnd freuntlichen meiner eren empfinden, vnnd die mir auch mit gewalt nemen [69^c] Do das der edel ritter vnd graffe höret sache vnd vernam forchte enpfinge vnnd sorge hette der hoffleüt neyde der Im von manchen ge-

tragen w vnd wol gedachte der pösen falschen künigin man ee gelaubet dann im wo er ein söliches wider reden wölte; darvmb so er peldest mochte on yemancz rate oder hilffe die flucht gabe zů hause ginge, do er seine peyde kinde ze rosse seczte vnd sich auß dem land gen Caless
 5 wercz füget vnd floche, Nun zů der künigin geschrey vnd rumore vil zů luffen, sie iämerlichen klagen vnd zerissen funden, Die vrsache ires klagen vernamen nicht allein vmb ires schreiens willen ir gelaubten, sunder mer darzu legten vnd sprachen der graffe hat nit sein person vmb gotz willen stäcz so ornlich vnd schöne geziret, sunder alleine vmb der edeln
 10 künigin willen das gethon hat, Damit er die künigin zů seinem willen pringen möchte, vnd mit grosser eyle zů dem graffen hause luffen, vnd do sie sein nit funden das hauß beraubten darnach von den höchsten pis in den grunt nider wurffen Söliche mere dem künig vnd dem sun alle ze wissen kamen sere peyde betrübet, Den vnschuldigen graffen vnd alle
 15 die [69^d] seinen auß dem künigreiche panten, grosses gelt auf in legten wer in den graffen lebendig oder tode gebe. Der edel vnd traurig graffe der aller sache vnschuldig waz, mit seinem flichen sich schuldig gab vn-erkant mit seinen kinden gen Kaleß kam, Zů hant sich nicht lange saumet über fure in Engelant in armes petlers form gen Londra kam; Doch
 20 ee er dar kam vor seine peyde kinder mit worten so er pest mocht lerte vnd meistert besunder in czweyen sachen, von erste daz sie in irer armüte gedultig vnd mit leydig wern Darein mit sampte im on ir schulde daz gelücke pracht vnd gethon het, vnd vor allen sachen fleiß hetten sich nyemant eygen noch zů erkennen geben wem sie zů gehörten noch wez
 25 kinder sie weren als liebe sie ir leben hetten; der knabe waz genant Loise vnd in dem alter pey neun iaren. Die tochter was genant Violante pey den sibem iaren alt waz, doch nach peyder weichen vnd kleinem alter ires vaters lere in güter masse enpfingen Als hernach durch ire wercke peweyst vnd erscheinen würt, vnd damit sie verporgner vnd
 30 vnerkant belibenn, Als dann des alten ires vaters gefallen waz [70^a] Er in ire namen verkeret vnd den knaben der Lose hiesse Pierotto nennet vnd die tochter Gianetta, vnd also armlichen gen Londra kamen zů geleycher weiße als die armen petler thun vmb das almusen gingen vnd des begerten, vnd in sölichem dienst an einem morgen daz almusen ze
 35 suchen für ein kirchen komen was; darein auch auf denselben morgen ein grosse edel frauwe komen was die des küniges marschalck weybe was. Die nach dem verprachten ampte zů der kirchtür außginge, vnd den graffen mit den czweyen kinden daz almusen zů enpfaben gesechen bet,

den sie fraget von wann er were vnd ob die kinder sein weren; Er der
 frawen antwort vnd sprach er auß Picardia were, vnd vmb missethat ei-
 nes seines eltern sunes er mit den czweien kinden habe auß dem lande
 weichen vnd flichen müssen. Die edel frawe ir gesichte auf daz meidlein
 5 hat ir von herczen wol gefiele dann on masse schöne vnd gentile was Zü
 dem graffen sprach gütter man wiltu mir dein töchterlein geben vnd pey
 mir lassen so will ich es gern aufnehmen; dann sein gestalt vnd geperde
 mir gefelt vnd sere liebet so wil ich sie mit zucht le[70^b]ren vnd aller
 meistern, thut sie dann wol vnd volget mir vnd meiner lere so wille ich
 10 ir muter sein vnd mit einem manne in sölicher masse versechen daz sy
 ir lebtag wol sten sol, Ein söliches des graffen grosses gefallen waz, der
 edelen frawen palde antwort, vnd weinenden augen ia sprach vnd ir
 williglichen sein töchterlein vergünnet vnd gabe vnd trülichen befalhe,
 Do er die tochter also versechen het vnd nun wol weste weme; Im ge-
 15 dachte nicht lenger in Londra ze beleyben, vnd wie er mochte als der zü
 fusse gen nit gewonet was, sich wider zü rücke gen Chalesse füget mit
 Pirotto dem knaben, Do auch ein marschalck wonet verweser des künig-
 es von Engellant mit grossem hofe vnd volck; Do der graffe mit dem
 sune ir narung ze suchen zü zeyten an dem hofe auß vnd eingingen; sich
 20 begabe das des marschalcke stüne mit etlichen andern etlichen edeln
 knaben, In dem hofe ir kürzweyle triben. als mit ringen springen vnd
 die wette lauffen, mit dem sich Pierot des graffen sune mischet mit in
 kintliche spile ze treiben vnd alle ire spile paß thet vnd die geschickter
 waz ze tun dann die andern knaben [70^c] Dez der marschalck hat zü man-
 25 chem male ware genomen gesechen grösser gefallen von den iungen hatte
 vnd fragen warde wes der knabe were, Im von seinen hofleuten geant-
 würt warde wie er eines armen mannes sun were der zü zeiten an den
 hofe vmb das almüsen kame. Der marschalcke liesse des knaben on den
 vater begern, vnd der graffe als der da von got nicht anders begeret
 30 wie wol es im schwere was den iungen zü lassen, doch in dem marschalck
 williglichen gabe vnd befalhe vnd im gedacht, seyt er den sun auch ver-
 sechen het do nit lenger beleyben wölte, Vnd nicht allein in Engellant
 fure sunder fürauß vnd ferrer in Hirlanda in die stat Astanfort kame,
 do er sich zü einem ritter verdinget alles das ze thon, das dann einem
 35 dienstknecht zü gepürt ze thon keynerley außgenommen, alle armüt ge-
 dultiglich leyde, sein leben etliche iare also füret in grosser mæie vnd ar-
 beit der er dann zü thon vngewonet was, auch do pey von keinem men-
 schen nye erkant warde, In sölicher vergangen zeit sein tochter Violante

mit irem rechten namen Gianetta genante pey der edeln frawen zů Londra sere [70^d] von leybe tugent vnd schöne wachsen warde, vnd in grossen genaden der edeln frawen hern vnd alles anders volckes des hauses waz vnd aller der die ir kunt hetten In sölicher masse das ein
 5 iglicher der ir zucht tugent vnd edeles geperde bedacht, das der nicht spreche, sie iglicher grossen ere vnd lobe würdig were, vmb des willen die edel fraw die sie von irem vater dem graffen genomen hette vnd auch nye anders het vernemen mügn wer er doch hat mügn sein dann als vil sie von im vernam Doch ir ye für genomen hett nach allem iren
 10 vermügen sie erberlichen verheireten vnd ein man geben nach dem ir zů gepüret vnd mit einer güten heymstetter begaben; Aber got der almechtig der seiner getrüen nicht vergisset, Der iunckfrawen adel vnd tugent wol erkante vnd schwere pusse an alle schulde vnd sünde getragen hett Es anders irer heyret halben schicket dann der edelen frawen meinung
 15 was vnd damit die edel iunckfraw keinem schlechten oder vnedeln zů teyle würde, Ich fürwar gelaube was sich irenthalben hernach begabe, Ein söliches er ir auch mer zů liebe durch seine grosse diemütigkeyt [71^a] verhenget. Nun hat die edel fraw do pey Gianetta wonet einen einigen sune mit irem man dem marschalcke den sy peyde ob allen dingen
 20 liebe hatten, auch nicht alleine liebe hatten vmb einiges kindes willen, sunder vmb seiner grossen tugent willen; Als der da aller güten zucht vnd sitten do pey schön vnd liebe weyse an vernunft vnd sinnen waz vnd in dem alter pey secht iaren mer dann iunckfraw Dianetta alt was, Die er so iniglichen schöne vnd von allen tugeten geziert sache, daz er
 25 von ganzem herzen in sie in liebe enczündet, in sölicher maß wann er ir nit sach in dauht er alleine were vnd nyemant seche, Doch ir nider gepurt dicke bedachte; darumb im zů der ee an vater noch muter nicht begeren dorste, vnd domit er nicht verdacht würde das er sich liebe zů haben so nider gelassenn hette, wie er mochte sein liebe verparge, Die
 30 in mer betrübet dann das er sein liebe geöffent hette, vmb des willen in grosse vnd swere kranchheit fiele, vnd vmb seines heyle vnd gesuntheit willen vil arczte gefordert wurden die sein kranchheit beschauten sein pulß vnd harm sachen vnd griffen, Aber die vrsache seiner kranchheit in ferre [71^b] vnd frömde was alle an im verczagten, vmb des willen vater
 35 vnd muter in grossem leyde warn, in zů manchem male freuntlichen paten daz er in seinen geprechen ze wissen thet vnd saget. Aber ander antwort von im nicht gehaben mochten dann alleine eytell seüfzen, vmb der willen er stäcz abe vnd von leibe name Eines tages sich begabe ein

iunger arczte pei im asse, ein durch grünter meister vnd doctor der
 erczneye, der den iunge pey dem arme vnd pulse hielte do gemein-
 lichen alle erczte von erste des menschen krancheit suchen In dem die
 iunckfrawe Gianetta von der frawen des iungen muter etlicher vrsache
 5 halben in die kamern geschickt warde, do der iunge lage vnd der arczte
 was, vnd als palde sy der iunge gesehe hette, on wort vnd vnuerrürt
 mit mer stercke seines herezen der prineden enpfinden ward, vmb
 des willen sein pulß fester vnd stercker schlachen ward dann im vor
 gethon het; Ein solches der arczte palde vername in fremde daucht,
 10 doch stille schweig vnd sechen wolt wie lange der pulß also tun wölt vnd
 als palde die iunckfrawe [71^c] wider auß der kamern ginge der pulso
 wider gestund nach der alten gewonheit, vmb solches willen den arczte
 dauchte er zů güter masse die vrsache des iungenn krancheit vernomen
 het, vnd zů gleicher masse thet als ob die iunckfrawen was genötiges
 15 fragen wölte, ir schuffe wider rüffen vnd stäcz des iungen arme in den
 henden hielte, Die schnelle kam, vnd so palde in die kamern nicht komen
 waz Des iungen polso wider anhub ze schlachen als er dann vor gethon
 het, vnd als bald ir der meister vrlaub gabe vnd auß der kamern ginge
 zů hant der pulß aber verschwant Nun der arczte klar ist, vnd sich ge-
 20 duncken liesse er eygentlich verneme des iungen gepresten, Auf stund
 vater vnd muter auf ein ort name, In alle vrsach saget des iungen
 kranckheit zů in sprach. Herre vnd fraw, die gesuntheit euers sunes stet
 nicht in hilffe noch gewalte der arczte, sunder alleine in den henden der
 iunckfrawen Gianetta ist als ich eygentlich durch zeichen gesehen vnd
 25 vernomen han Dann der iunge aller in ir in liebe print, auch ich wol
 vernym vnd gemercket han sein liebe zů ire ir vnwissennt ist, [71^d] Dar-
 umb wisset was ir ze schaffen habet seinthalben ist euch sein leben liebe.
 Do das der herre vnd die frawe vernamen wol ze mute warn Seytmale
 man seiner kranckheit möcht pusse finden wie wol es in etwas schwer
 30 waz vnd sorge hettenn sie im die iunckfrawen zů einem weybe geben
 müsten In dem der arczte von in schiede, sie peyde zů dem krancken
 irem sun gingen, die muter zů im sprache Mein allerliebster sun ich
 het nicht gelaubet daz du dich vor mir keiner deiner begire oder willen
 verporgen oder geschüchet hettest, sunder wo du dir selbest nicht het-
 35 test mügen helffen vnd dinem willen ein genügen thon, vnd dir ee ein
 solches an deinem leibe hast lassen schaden pringen dann mir ein sol-
 ches ze wissen tun vnd doch wol wissen soltest das keinerley sache dir
 zů liebe, wie wol es minder dann zů ern gehört were, Das ich dir das

nicht ze liebe thet als mir selbes, Doch wie dem sey got der almechtig
ist dir parmhercziger gewesen dann du dir selbes gewesen pist, vnd
damit du auch deiner kranchheit nicht vergeest vnd sterbest, Er
mir do die vrsache deiner kranchheit verkünt hat [72^a] vnd dein
5 kranchheit nicht anders ist dann überflüssige empfangene liebe in dei-
nem gemüte vnd herczen, die du etlicher iungen frawen verporgenn
tregst in deinem herczen? wer die ist das ist dir kunt, Aber für-
ware du dich des nit gen mir soltest gescheucht haben sunder mir
des gesagt haben dann deinem alter vnd iugent nudalest zü gepürt liebe
10 ze haben vnd zü enpfahen, vnd wo du nicht liebe hetttest ich dich trege
vnd faule schaczte, darumb mein lieber sun nitt verpringe noch schame
dich vor mir sage mir frölich allen deinen geprechen willen vnd vnge-
mute, vnd wo her dir dein kranchheit zü gestanden ist vnd schlahe von
dir alle deine vngemute vnd tröst dich, vnd fürware mir gelaube kei-
15 nerley nicht ist damit deinem willen ein genügen geschehe daz du zu
mir begerest vnd ze tun auf seczest, Das ich das nitt williglichen vnd
gern nach allem euerm vernügen thue Als die dich lieb hat als sich
selbes, lege von dir alle scham vnd sorge? sag mir ob ich dir in deinem
liebehaben müge gehilfflich sein; versuche vnd findest du nicht daz ich dir
20 getreulich diene, so habe mich für die hertsten muter die ye [72^b] kint
gepare. Do der iunge der muter wort vnd ir grosses verheissen ver-
nomen hette, von erste ein kleine schame enpfinge, doch gedachte nye-
mant seinem willen noch im möchte gehilfflicher sein dann sie, alle
schame von im gelegt Anhub zü der muter also sprach frawe vnd muter
25 kein ding hat mich euch meinen geprechen vnd grosse liebe verschwei-
gen machen dann alleine ich zu vil malen von mere person vernomen
han wenn sie sere altent sein nicht mer bedencken das sie iuncke ge-
wesen sein, Doch seyt ich euern gütenn willen gegen mir vernyme vnd
ir meinen geprechen nach dem als ir spricht vernomen habt, dez ich
30 euch nit laugne vnd euch des paß vnterrichten sol doch so ferre ir mir
versprochen habt, nach euern worten die wercke volgen wölt ir mich
anders gesunt haben Aber die frawe ein söliches zethon, des ir selbes
zü vil getrawet das ze haben das ir in keinen wege wern mochte, vnd
dem iungen in der form als sie ir ze thon gedacht het frölich antwort vnd
35 sprache; Aller liebster sun mein on alle sorge mich deinen willen wis-
sen laß, vnd piß on czweyfel on alles das verzichen [72^c] ich thon vund
schaffen sol damit dein wille erfüllet werd Mein aller liebste muter
sprach der iunge Die vrsach meiner kranchheit das ist die schöne vnd

das löblich züchtig geperde vnser iunckfrawen Gianetta; der mein liebe die ich ir lange zeite getragen han vnwissent ist, vnd ich als der forchte hat vnd vnbeherczent ist mein liebe nyemant han wöllen offenwaren; darumb ich komen pin als ir mich sechet vnd als ir mir nun versprochen habt; Durch einen oder andern wege, wo das nicht geschit vnd nach volget so seyt on czweifel mein leben auf ertrich kurz sein wirt. Die frawe mit troste vnd auch straffe lachent zů dem sun sprach, awe mein allerliebster sune, vmb ein sölches du dich lassest we haben vnd krancke; piß wol ze müte vnd frölich nicht bekümer dich mere
10 sölches lasse mich schaffen, werde nür palde gesunt domit ich zu ende bringen müge das dir liebet vnd ich dir versprochen han Der iunge aller güter hoffnung erffüllet In kurzer zeit großlich sein pesserunge vnd gesuntheit peweiset, vmb des willen vater vnd muter besunder freude hetten, vnd die muter sich bereytet vnd schicket [72^d] ze versuchen ob ir gelingenn wölt das sie dem sun versprochen het, vnd eines tages ir iunckfrawen Gianetta zů ir rüffet, vnd in schimpffes form mit zucht sie begunde ze fragen ob sie keinen pulen oder liebhaber hette. Die iunckfraw mit schame in irem angesichte röte enpfinge; zu irer frawen also sprach. Edele frawe mir armen meyde die von irem hey-
20 met auß getribenn ist als ich vnd in ander leüte dinst ist nit zů stet noch gehört söllicher sache vnd liebe ze pflegen. Zů der die frawe sprach Iunckfraw habt ir dann keinen so wölle wir euch mit einem versehen damit ir in luste der liebe lebet, vnnd euer schönhalben mer freude dann also ze leben enpfahen müget Dann nicht füglich vnd grosser
25 schade ist sölliche schöne iunckfrawe als ir seyt on einen pulen vnd liebhaber zů sein. die iunckfrawe der frawen antwürt vnd sprach; frawe ir nempt mich meinem armen vater, vnd mich erzogen- habt els eßer tochter; Darum ich pillich eüern willen pflichtig wer ze thon. Aber in sölchem ich euch nit mage zu liebe noch willen weren, doch wo es euer
30 gefallen were vnd mir einen elichen man gebet dez wer [73^a] ich wol ze fride, denn mein meinung ist über alle andre manne liebe zů habenn vnnd keinen andern nicht dann von meinen eltern mir zů meinem erbtyle nicht anders worde noch beliben ist dann alleine mein ere Die ich, ist es gotz gefallenn behüten vnd beschützen will die weyle ich lebe,
35 sölche wort waren gancz wider der frawen meinung zů bringen das sy dem sun versprochen hett wie wol sy die iunckfrawen ir güte vnd tugent lobet vnd tröstet, als dann weyser frawen zů gehört ze thon Doch zů ir sprach; nun saget mir iunckfrawe ob vnser herre der künig der ein

iunger ritter vnd man ist, vnd ir ein schöne frawe seyt, euer hulde
vnd liebe zu seinem lust vnd freuden begeret? wöltet ir im die versa-
gen vnd der im laugnen Die iunckfrawe schnelle sprach, Macht vnd
gewalte mir der künig thon möchte, aber mit meinem willenn von mir
5 unerlicher sache halben nicht haben sölte, die fraw der iunckfrawen
Gianetta meinung vnd stät gemüte wol vernomen het vnd abe von iren
worten liesse, vnd ir einen andern wege gedechte zů versuchen, vnd
das den sun ze wissen thet vnd sprache wann er gesunt würde sy wölt
sy die [73^b] iunckfrawen zu im in ein kamern verschliessen, vnd do er
10 mit ir seinen willen versuchet ze pringen mer zu im sprache Es ir nicht
zu stünde noch erlich deuchte das sie zu gleicher weyse als die rüffia-
nyn thon für den sun prediget vnd ir iunckfrawen vnerlicher sache pete,
Eines sölchen der iunge in keinem wege der muter gestatē wolt der
iunckfrawen zů vnern begern, Zů hant alle seine pesserung wider ver-
15 schwant, in die ersten krankheit fiele. do das die frawe sach sie ir
iunckfrawe Gianetta alle ire meinung saget vnd öffnet Die sie besten-
diger vnd stäter fürsaczung fande dann sie vor ye, vnd das dem mar-
schalck irem man, waz sie des sunes halben vnd der iunckfrawen gethon
het alles zewissen thet vnd sich des peyde einten, vnd sich dez begaben
20 wie wol es sy gar schwere dauchte dem sune die iunckfrawen zů einem
weybe ze geben, doch nicht anders gesein mochte wolten sie den sun
pey leben behalten, Darumb sich des williglichen ergaben vnd den sun
lieber mit einem weybe sein vnwirdig noch irem gedüncken pey leben
behaltenn, dann tote on ger keine. Zu hant nun ein sölche ire sin vnd
25 meinunge [73^c] an die iunckfrawen prachten die des willig vnd wol ze
mute was, mit andechtigem vnd diemütigem herzen got dancket eret
vnd lobet das er ir noch nicht vergessen het Doch alwege nicht anders
dann für eines armen Picharden tochter gehalten waz. Nit lang verginge
der iunge marschalcke sein hochzeit mit grossen eren vnd freuden beginge
30 paß zů müte dann iunge manne ye warde. Nun lasse wir die iunck-
frawen mit irem man ein frölich leben füren, vnd sechen wo ir pruder
Pirotto den ir vater zů Galesse bei dem andern des küniges marschalcke
gelassen hat. Der in grossen eren tugeten vnd seines heren genade auf
erwachsen waz Ein redlich fürsichtig man ze felde vnd streyten als man
35 einen yndert finden mocht, In stechen vnd turniren sein geleihe nicht
was, vnd in allen gegenten für Pirotto Pichard genent vnd erkent waz,
vnd zů geleiher weiß als got seiner schwester nicht vergessen vnd ir in
grosse ere geholffen hat, also auch im thet vnd zů grossen eren vnd

wurden halff In sölicher zeit sich begab ein grosse vnd grausame pestilencz vnd dem lande vnd gegend auf stunde mer dann den halben [73^a] teyle der menschen starben, Die andern in ander gegent geflochen waren darumb alle gegent öde dauchten, vnd in sölichem sterben der marschalke Pirotto herre mit sampt seiner frawen allen kindern vnd geschlechte starbe, außgenommen ein einige tochter von im beleybe, die manzeitig waz mit etlichem diener vnd Pirotto Die einig iunckfraw mit etlichen lant leuten der gar wenig beliben waz sich beriete vnd den iungen Pierotto der für einen weisen klugen fürsichtigen man gehalten waz vnd daz zü mer malen pweist hat in grossen gescheften zü einem elichen manne name; vnd alles das ir von irem vater beliben was, im vntertänig vnd gehorsam machte; darnach nit lange verginge dem künig von Engellant zu wissen kam wie sein marschalk zu Kalese tod wer, vnd wie Pirotto des marschalcke tochter geheiret vnd zü der ee genommen het, Des redligkeit im mer kunt was dann yemant, vnd an des toden stat in für seinen marschalcke erwelt vnd bestätigt. Also gar kürzlich sich begabe, der czweyer vnschuldigen des graffen von Anfers kinder die er hier vnd dort für verloren gelassen het als gote gefallen waz [74^a] zü grossem stant komen warn vnd nun das achtzehest iare vergangen was das der edel graffe von Parisy geflochen was, vnd in Irlanda in grosser armüte sein leben gefüret het, mancherley trübsal in seinem alter geliden vnd vertragen hat, vnd sich nun gar er altent sache, grosse begire vnd willen hette ze wissen wie es doch vmb seine kinder sten möchte, vnd ob sie noch pey leben oder tode wern Der güte graffe von leybe vnd gestalt von seinem ersten form aller verandert was, vnd daz vmb der grossenn schweren arbeit willen der er vngewonet zethon was. die er piß auff dise zeit gethon hat, vnnd genug armlichen sich auf den wege gen Engellantwercz machte vnd kam do er den sune gelassen het, den er fande des künigs marschalcke vnd ein mechtig lant herre frisch vnd gesunt, gerade schöne von leybe. Do von der arme graffe grosse freude empfinde; Doch sich nitt eygen noch zu erkennen geben wolte, piß er seiner tochter stant vnd wesen auch verneme, sich wider auf den wege gen Londra wercz macht nitt rast piß er in die kame, do er heymlich nach der frawen do pey er die tochter gelassen het [74^b] fraget. Do er fande daz sy des andern marschalcke sune weybe waz, do von aber fröer dann arm man nye warde, got den almechtigen lobet vnd eret, vnd aller seiner vergangen trübsal vnd armüt vergasse, vnd die für nicht mer schaczet, seytmale er seine peyde kinder pey leben vnd in grossen

eren vnd reichthum sache vnd fande grossen willen vnd besunder begire
hat die tochter ze sechen, vnd als ein arm man sich nachent pey irem
hause auffhielte, vnd zů zeiten des almusen begeret vnd an einem tage
der arm graffe von seiner tochter man gesechen warde, genant Gianetto
5 Lamiens, den er vmb seiner erbern gestaltt erparmet vnd mit einem
seine knechte schuffe das er in zu hause füret vnd essen vnd trincken
gebe vmb gotz willen, das der knecht palde thet, Nun hat des graffen
tochter mit irem man Gianetto etliche kinder gehabt, vnder den das
grosse pey acht iaren alt was, Die schönsten kinder die nye gesechen
10 warn, vnd als palde sie den graffen essen sachen alle vmb in warn im
grosse freude vnd fest machten geleich als were er alle sein tage pey
in gewesen, oder als ob in von einer verporgen tu[74^c]gent kunt vnd
ze wissen gethon were das er ir anherre were vnnnd sie seine diechter
weren, vnd er widerumb als seiner tochter kinde nach seinem vermügen
15 sich freuntlich gen in beweiset, vmb des willen die kinder nye von im
lassen noch komen wolten, wie wol in zů mermalen ir schulmeister
ruffet, aber sich nicht daran kerten Daz auch frawen Gianetta vername
auß irem gemache kame do der arme graffe ir vater waz, den kinden
troet zu schlachen theten sie nicht ires meisters gefallen. Die kinder
20 alle an huben ze weynen vnd sprachen; Sy wölten pey dem erbern
man sein, der sie vil lieber hette vnd sie getreülicher meinete, Immer
liebten dann irem meister Sölicher wort die frawe vnd auch der graffe
lachten, Der graffe gegen der frawen die sein tochter was aufstunde
nicht als ein vater sie eret. sunder als ein armer man, vnd einer söl-
25 chen edelen frawen zů gepürt ze thon, grosse freude do er sie also
sache vnd wol erkante do von enpfinge; aber sie in weder vor noch
nach erkante also gar was er in seinem angesichte verandert, als der
da grae alt vnd vngestalt was vil mer dann do er [74^d] sie gelassen
het; darumb ein ander man dauchte dann der graffe von Angfers. Do
30 daz die frawe sache daz die kinder ye nit von im wolten vngeweinet zů
dem meister sprache daz er sy sten vnd pey dem guten man liesse;
Die kinder stunden vnd waren also pey dem vnerkanten graffen irem
anhern. In dem der herre ir vater zů hause kame, vnd der kinder hal-
ben von irem meister alle sache vername, vnd wie sie vngeweinte von
35 dem armen manne nitt pringen möchte, vnd wie es die frawen verübel
hette sy pey dem armen man ze sechen. der herre zů dem meister
sprache wölten sie dann nicht von im kommen so lasset sie sten in des
vnglückes namen daz in got gebe, Sie thon geleich den do von sie ko-

men sein; darumb lasset es euch nicht fremde düncken, dann von mütterlicher art sie von petlern sein, söliche wort der graffe wol vername; im grosse pein vnd schmercen prachten. Doch die las der vil manche andre geliden hat die auch mit gedulte überwante vnd vertruge. Nun
5 der herre vernomen hette die grossen freude die die kinder mit dem vnerkanten man hetten wie wol es nicht übriges sein gefallen was, Doch die [75^a] kinde so liebe het das er in ir freude nicht mindern sunder meren wolte, vnd ee er sy wölt weinen hören ee er in den alten man ze liebe halten wolt, vnd in fragenn liesse ob er pey im sten
10 vnd beleyben wölt des der graffe willig waz, aber sprach zu keinerley er zu prauchen were dann allein rosse ze warten damit er alleine seine tage vertriben het, Im gegeben ward eins rosß ze warten, wann er das gethon hett er mit den kinden sein zeyte vertrib. Nun in sölicher zeit die der graffe pey der tochter vnd iren kinden stunde, Sich füget das
15 der künig von Franckreiche mit den Teutschen fride gemacht het vnd in dem mit tode ab ginge vnd der sune des weybe den graffen vertriben het als ir verummen habt ein künig gekrönet ward vnd die vor gemachten fride ein ende genomen hetten, vnd von neuem mit den Teutschen grosses krieges ein giengen Den der künige von Engelant
20 als ein netter freunt mit grossem volcke zu hilffe kam, doch nit personlich, sunder vnder dem gewalte vnd reigiment Pierotto seines marschalckes, vnd Giethetto Lamyens des andern marschalckes sune, [75^b] mit dem der edel arme graffe von Angfers auch zoche vnd also ein gut zeit in dem here vnd felde seiner tochter man stalknecht was,
25 vnd auch zu zeitenn mit guten räten mer dann einem stalknecht zugepürt wol thet vnd paß würcket. In diser zeit sich begabe daz die künigin starbe vnd mit dem tode abginge, Doch ee sie starbe wol erkante ir lebens nicht mer gesein mochte grosse reue vnd leyde ir sünde het, sunder der die sie mitt dem graffen von Angfers begangen hette, dem
30 erczpischoff von Roan peichtet vnd ir sünde klaget der für yederman für ein gerechten vnd heiligen man gehalten was, Dem die künigin vnter andern sünden peychtet vnd klaget das grosse vngöttlich vnrecht das sie dem graffen von Angfers zu gezogen het, Auch sie nitt dauchte das sie irem gewissen nicht ein genügen gethon het das sie söliche schantlihe
35 sünd dem erczpischoff allein gepeicht het, sunder die offenwaren vor aller menge vnd erbern leuten alles das sich irenthalben vnd des graffen verlossen het saget vnd den edelen graffen aller missetät entschuldiget, pate vnd begeret, daz man [75^c] mit dem künig redet das er den

vnschuldige graffen suchet vnd wider in genade neme, In vnd seine
 kinde wo die pey leben weren wider in iren ersten stant vnd wesen
 seczet; Darnach nicht lange verginge sie auß diser welt schiede mit
 küniglichen eren zů der grebnůß bestett warde, Sölicher mere dem
 5 künige ze wissen kamen, der frawen tode vnd auch ir peichte des
 graffen von Angfers halben, wie sie den also entschuldiget het; Der
 nach erlichem seüfczenn des grossen vnrechtes mere dann der frawen
 tode, daz er den edeln graffen on alle parmherczikeit peweist het, gancz
 10 pewegt in gerechtikeit auß gepieten liesse in seinem here, vnd auß
 schreien schüffe, in allen gegeten vnd landen wer den graffen von Ang-
 fers weste in vnd seine kinde czeiget precht oder weyset dem wölte er
 grosses güte geben, Dann der graffe pey im grosse genade durch die
 toten künigin funden het, vnd in aller sache durch ir letste peicht vn-
 schuldig saget vnd bekent het; Darvmb er von im in daz ende were
 15 gepant vund gesant worden, vnd im seinen ersten stant vnd wesen
 wider verspre[75^d]che ze geben, vnd hin für pey im in grossern eren sein
 sölte dann er ye gewesen were. ein sölches außrüffen vnd schreyen von
 des küniges wegen geschahe. Der arm edell graffe in der stalknechtesweise
 seyner tochter man dienet, gar wol vernomen het, vnd ware was. Zů
 20 hant gedachte nun ist komen die zeit das ich mich offen mage got sey
 gelobet das er mich sölcher zeit pei leben gelassen hat, vnd palde zů
 Gianotto der tochterman ginge, in freuntlich pate daz er mit im zů
 Pierotto ginge, Dann er wölte in peyden zů wissen thon vund zů versten
 geben wes der künige dez graffen von Angfers halben irre ginge vund
 25 suchet, Also die drey sich zů einander fűgten vnd der graffe von Pierotto
 sprach Pierott lieber sun, Giathetto der da gegenwűrtig stet, ist dein
 schwager vnd hat dein leiplich schwester zu einem weibe, vnd sie hat irer
 heimsteuer noch nicht gehabt, Darumb mein sin vnd meinung ist sie
 nyemant habe dann er Ir habt peyde des kűniges gepote vnd außrüffen
 30 wol vernomen, vnd was er verspricht, Dir Pirotto als des graffen sun von
 Angfers vnd Fio[76^a]lante dein schwester Giathetto eliche haubfrawe, vnd
 mich graffe Gualtiere von Angfers eűer peyder vater mich nudalest frűlich
 dem kűnig wille zů erkennen geben, Damit wir wider in vnserm stant vnd
 herschaft komen műgen der ich vnschuldiglichen so lant zeit pin wider
 35 got vnd recht enpfremdt gewesen, Do Pierotto dise wort vernomenn
 het den vater ernstlich ansache in zů hant formirt vnd erkante, vnd
 mit weinenden augen im zů fussen fiele mit seinen armen vmbfűenge vnd
 dieműtűglichen sprach O mein allerliebster vater seyt mir gotwűlkomen

zů tausentmalen. Giachetto dez graffen wort nicht minder dann Pierott
 vernomen het; Darnach gesechen waz Pierotto gethon hette zů der
 stunde als von grossem wunder vnd freuden überwunden das er sten
 beleybe als ein stock nicht weste waz er thon oder reden sölt, vnd für
 5 ware alles daz der graffe sein schwäher gesaget het gelaubet, aber grosse
 schame enpfinge; der vnzüchtigen schnöden wort die er zu zeyten dem
 graffenn zu geret het, auch weynent auf seine knye für in nieder fiel
 in diemütiglich vmb [76^b] vergebung vnd genad pate; Der graffe in auf-
 hube halset vnd küsset, Darnach mancherley des graffen gescheftes
 10 halben mit einander redten vnd grosse freude mit einander hatten;
 Pierotto vnd Giachetto den graffen kleyden wolt; aber dez graffen
 meinung nicht was, sunder vor wolte das Giachetto den versprochen
 lone von dem kunige verneme Darnach in dem künige in seinem armen
 gewante vnd form antworten, damit der künige grösser schame en-
 15 pfinge, Also Giachetto vnd Pierotto mit dem graffenn für den künig
 kamen; Zů dem sprachen, ob er noch in der meinung were nach dem
 er hat lassen ruffen des graffen Gualtiere von Angfers halbenn ob der
 lon bereyt weren den die im den graffen vnd seine kinder antwort als
 er in seinem außruffen verheissen vnd versprochen het? Warumb aber
 20 nicht sprach der kunig williglich vnd gern volgen sol als ich verspro-
 chen han, vnd zu hant komen schuffe köstliche vnd reiche kleynet von
 golde vnd edelm gesteine, Dez sich Giachetto wunder name; zu Giachetto
 sprache, vnd im gepote; trag weck alle ding vnd [76^c] pringe mir den
 edeln fürsichtigen graffen von Angfers! indem sich Giachetto vmb keret
 25 vnd den alten eysgrawen armen seinen stalknecht für sich name Zů dem
 künig sprache heilige krone vnd maiestat, Das ist der vater vnd der
 sune Die tochter ist mein elich weybe vnd haußfrawe, sy ist aber nit
 hie die, doch mit der hilffe gotz sült ir sie auch palde sechen. Do das
 der künig sache vnd vernam vnd den graffen ward ansechen, wie wol
 30 er alt vnd vngestalt waz doch in figurirt vnd zů hant erkante, vnd mit
 czahern der augen do er vor im knyet. in aufhube halset vnd küsset
 vnd freüntlich enpfinge; Des selben gleichen Pierot des graffen sun
 thet. Zů hant das arme gewante dem graffen schufe ab nemen vnd mit
 seinem eygen gewant begabet vnd kleydet. Vber das der künig Gia-
 35 chetto des graffen eyden vnd Pierotto schwager in grossen eren stätz
 hette, vnd er Giachetto die gabe vnd schanckung enpfinge vmb des
 willenn das er dem künige den graffen vnd seinen sune geantwürt hette;
 Vor der künig alle sach vnd trübsal die dem graffen in seinem elende

zugestanden waren vernemen wolt [76^d] Darnach der grafie zů Giachetto seinem eyden sprach lieber eyden nym hin die gabe vnsers genedihen hern, vnd pis ingedencke deinem vater zů sagen, daz deine kinde sein vnd meine diechter, von mütterlicher art vnd gepurt nicht von armen petlern komen sein Giachetto enpfinge die gabe vnd zů hant seiner haußfrawenn sante vor Genetta, aber nun Violante genant gen Parisi kame, auch Pirotto haußfrawe dar kam vnd do in grossen freuden den grafen enpfingen Den der künig in seinen ersten stant vnd grafschafft wider gesezt hette grosser vnd mechtiger waz dann er ye warde vnd Giachetto mit Violante des grafen tochter seiner haußfrawen wider heym in Engelant fure; desselben gleichen Pirotto mit der seiner thet, Vnd der grafie in grössern eren vnd wirdenn mer dann ye zů Parisy piß an seinen tode frölich liebet, Also hat des grafen von Angfers histori ein ende, got die her nach volgen auch zů güttem ende pringe.

15 Barnaba von Genoua falschlichen von Ambrogiolo von Piacenza betrogen, fünf tausent gulden verlose in verczag[77^a]nůß fiele mit seinem knechte schafte daz er sein weybe töte; Dem sie mit pete vnd diemütigen worten überwant pey leben beleybe in mannes form auß dem lande floche gen Alexandria fure, lange zeit dem soldan 20 dienet, Darnach den betrügner Ambrogiolo in Acri fandte in schwerlich straffet, nach Barnaba irem manne gen Genoua sante, vnd gegenwürtig des soldan wider frawen orden an sich nam frölichen vnd reiche mit Barnaba gen Genoua fure.

Do frawe Elisa ir klegliche histori verpracht het, Philomena die 25 künigin selbes, Die mit zucht schöne vnd lieplich über alle andere frawen gepreist was, Anhube also sprache. Wir stullen Dioneo sein gedinge halten, dann nyemant mer ist icht ze sagen dann ich vnd er alleine, Darumb mercket vnd vernemet meine wort. Es ist vnter den gelerten ein gemeins sprichwort, das der betrügner alweg gern pey dem 30 betrogen ze fusse beleibt, Doch düncket wie ein sölches durch keinerley warheit müß beweist weren, wann ein sölches sich nitt selbs begibt vnd geschicht; darvmb ich der gesagten materi [77^b] ich auch nachfolgen wil mit meiner histori, vnd mir in gedanken kome ist, damit ir euch des paß vor den falschen lügner oder betrügner wißt ze hüten, Darumb 35 vernempt vnd habt liebe daz ich euch da sagen wille Es sich begabe als oft geschicht das sich zů Parisy in Franckreiche auf einer herber

gar mancherley kaufleüte von Walhen on geferne zů einander fügten
 iglicher besunder gescheftes halben als der kaufleüte gewoheit ist; Sich
 begabe an einem abent das nachtmale frölich mit einander empfangen
 hetten Anhüben von mancherley abenteüer ze sagen von einer in die
 5 andern komen, vnd von iren haußfrawen zů reden wurden die iglicher
 seine do heyme gelassen hette, vnd in abweyse form; Etlicher sprach
 ich weiß nicht was die meine thut wann ich nicht do heyme pin, Aber
 das weiß ich wol wann mir hie etwaz iunges zu handen komet vnd mir
 gefiele, daz ich die liebe die ich meiner frawen trage nit auf ein ort
 10 leget, vnd die freude die mir werden möchte neme. Der ander sprach
 desselben gleichen ich thäte, vnd ob ich gelaube oder nicht gelaube
 das mein frawe ir gelücke auch [77^c] suche so sie es thon mag do laß ich
 sie für sorgen yedes thue gefallen. Der dritte auch in sölcher meinung
 was, vnd sere alle einen sin hatten, wann sie außritten vnd ire weyber
 15 alleine do heyme liessen, das sy ir iunge zeit auch nicht verliesen wöl-
 ten; Dann einer vnter in außgenommen, genant Bernaba Lamolin von
 Genoua, der alle ire gespreche vnd wort ernstlich wider redet, Vnd
 sprach so hat mir got besunder genade geben vnd gethon vnd mir be-
 schert vnnd zu gesant als ein volkomne tugentreiche fräwen als man
 20 eine in allen landen finden möcht; Darzů schöne von leybe vnd gestalte,
 vnd alles das kane daz einer erbern frawen zu gepüret ze wissen, als
 mit seiden näen got sticken des mere vernympt vnd kane dan frawe
 auf erden, vnd alles das zů eines erbern mannes tische gehöret ale-
 licher außrichten kan mit fürschniden, dann ich keines hern diener ye
 25 gesache noch fandte, über alles das weyse kluge vnd fürsichtig geczi. et
 mit aller tugent. Darnach paß reyten vnd einen feder spile außwarten
 künde dann kein fogler, Desselben gleichen mit schreiben vnd lesen
 ires gleichen nicht were, ein ig[77^d]liche rechnung nach wunsche ze
 machen als ein ander kaufman Nach manchem andern lobe Er sprach
 30 vnd schwure reyner vnd keütscher frawen man nicht fünde dann die seinen.
 vnd fürwar gelaubet wann er zehen iare von ir were daz sie vnkeütscheit
 halben mannes nymmer begeret. Nun waz vnter disen keuffleüten ein
 iunger man genant Ambrogiole von Piacenza, der von des letsten
 loben das Bernaba seiner frawenn geben hette anhube zů lachen vnd
 35 sein zů spotten zů im sprach ob er des keyser prieffe mer darumb
 hette dann ander leütt vnd ob im mere verlichen were dann andern
 Dar vmb sich Bernaba etwaz betrübet vnd sprach nicht der keyser, sun-
 der got mir die genade gethon hat der mer vermag dann der keyser

Ambrogiolo sprach, Barnaba mir czweyfelt nicht du gelaubest, vnd ware weinest zů sagen, Aber nach meinem gedüncken so hast du gar kleine kuntschaft freüntlicher natur, hettestu sie aber paß pedacht ich sich dich nicht so eyfeltig noch von so grober nature das dir nicht solt
 5 wissent sein auf sölche materi maßlicher ze reden, gelaustu darumb daz wir also alle gerett haben daz die [78^a] vnsern frawen darumb anders sein dann die dem ist nach vnser meinung, doch allweg von natürlicher begire sich ein sölches gar wol begeben möcht als wir dann gerett haben; darumb Barnaba güter man ich musse mit dir diser materi
 10 halben ferrer reden, Ich han alweg vernomen wie vnter den tötlichen tieren der man das würdigest sey daz got beschaffen habe dar nach die frawe, Aber der man als wir dann stätz sechen vnd glauben vnd durch alle ir wercke vernemen on czweyfel volkomenlicher vnd steter ist dann die frawen sein; Die frawen gemeiniglich wanckelmütig vnd vnstet
 15 sein das man durch vil natürlicher recht beweisen möcht wann es not thet das ich iczund sten lasse; seytmal den man von steterm vnd sterckerm gemüte ist dann die frawen sein, vnnd sich eins sölchen nicht enthalten mage sunder wo er dez gepeten ist, ich geschweige die im zů sölchem gefelt vnd der er begern ist, vnd alles daz thut da mit er pey
 20 ir sein müge vnd daz nicht ein fart des monecz sunder zů tausent malen dez tages, darumb wes hofstu daz ein frawe die von natur wanckel vnd vnstätte ist, widersten müge dem, dem der man der stercker ist nicht widerstenn [78^b] mag, sunder wann ir der man liebet, auch zů zeiten durch gabe oder pete willen sich überwinden lassen besunder wo sie
 25 von weisen mannen würt lieb gehalten, gelaubestu das sie sich sölches entschlagen möchten, für ware rein sy, wie wol du mir wilt zů versten geben das ich ein sölches glauben sülle daz du es gelaubest Dann selbst sprichest dein weib sey ein frawe von fleisch vnd peinen als die andern sein; darumb natürliche hicze begire der liebe in ir als pey den andern
 30 sein sol, wie wol sie erber frum vnd züchtig ist Doch alweg pey ir alle dise natürlichkeit sein mügen nicht minder als pey den andern, darumb mich an dich auch gar fremd dünckt daz du dich so gar wider vns alle seczest; über sölche rede Barnaba antwort vnd sprach; Ambrogiolo wisse daz ich ein kaufman vnd nit ein pfylosofo pin mit dir ze disputirn
 35 vnd als ein kaufman rede vnd dir antwort gibe. Ich spreche das ich gar wol weyß vnd erkenne als du gesagt hast, Das sich alle dise ding in einer vnweisenn frawen gar begeben möchten In der weder schame zucht noch erp ist; aber die weisen haben sölche sorg irer ern daz sy

stäter vnd bestendiger dann die man sein [78^c] Die sölcher ern nicht
achten noch für schande halten; Der ist mein fraw eine. do sprach
Ambrogio, fürwar ir keine nicht ist als oft sie an sölliche materi ge-
dencket vnd die in irem herczen von eygem willen suchen, so vil hör-
ner in an iren stirnen wüchsen, die geczetügnuß geben wes sie in irem
herczen begert vnd gedacht hett. Ich will gelauben ir man wenig fünde
die sölchen vnersamen sachen nach folgten, Aber nicht alleine in die
hörner wachsen, sunder in nymer von der stirn kemen, voraus den
die do weyse vnd kluge sein vnd iren sülchen sachen mit zucht können
nach gen, vnd die suchen, Dann allein der frawen schande ist vnd stet
wo ir verporgne liebe zů licht keme vnd offenware würde Darumb so
sie peste mügen ir liebe verporgen halten, vnd habe das für ein ganzte
warheit; daz die alleine keusche ist an die vnkeuscheit ist nye begert
worden; Wann ich ein sölches nit durch natürliche recht west vnd ver-
neme daz im also were ich mich schamen wölte icht do von ze reden
vnd ein sölcher zů manchen malen nicht versucht vnd gesehen hette
Mer ich dir sage wer ich nächer deiner heiligen fra[78^d]wen mir
czweyfelt nicht ich sy zu sölchem pringen wölte; darzů ich manche
pracht han Sölche wort Barnaba betrübten zů Ambrogio sprach mit
worten ze kriegen es möcht sich weiter preiten, du sagest vnd ich rede,
Das alles nicht anders dann wort sein, Nun seytmal als du sprichst
das sie alle so weiche vnd wanckel sein vnd wie du dich also vermügent
sichst, und damit ich dich meiner frawenn ern vnd zucht müg warhaftig
vnd gelaublich machen, so wille ich mich meines hauptes verdfenden
vnd daz verliesen wo du sie zů sölchen vnerlichen sachen vnnd deinem
willen pringest, vnd wo du des nicht thuest so wille ich daz du nicht
anders verliessen solt dann tausent ducaten in golde, Ambrogio der
nun in sölchen worten vnd reden erbarmt was antwort vnd sprach;
Ich weiß nitt waz ich mit deinem haupt plüte oder tode gethon oder
beginnen möchte wann ich gewünne; ist dir aber ze willen die proba
ze sehen dez do von wir piß her gerett haben, So secze mir fünf tausent
gulden die dir minder lieb sein stülen dann dein haupt wider mein tau-
sent; aber kein zeit So will ich mich verschreib[79^a]en vnd verpinden
der genanten summe wo ich verletüse vnd gen Genoua ziehen, vnd iner-
halb dreyer monet nach dem tage dar an ich von hiere auß zeüche, dein
frawen zů meinem willen geschickt vnd pracht haben, vnd zů wort-
zeihen dir ir schönsten kleynet pringen Das vnd ander mere do mit du
selbes sprechen solt; ich redlich gewonnen habe, Doch so fere daz

du mir versprechst bei deiner treue an eydes stat nich gen Genoua in diser zeit ie komen noch keinerley deiner frawen diser sache halben icht zů schreiben noch ze wissenn thon, das sich Barnaba alles williget vnd sein wol gefallen waz; Die kaufleute die da gegenwürtig waren söliche sach geren nidergelegt hetten wol sachen da von wenig gütes bekommen mocht; Aber der czweyer gemüte gen einander enczündt warn, in sölicher maß nicht alleine peyder wille groß sunder ernstlich gen einander verschriben, vnd durch ir eygen hant geschrift sich einander verpunden. Do nun das geschehen was, Barnaba zů Parisy beleib, vnnd Ambrogiolo sich mit dem ersten gen Genoua füget Do er nun etliche vergangen tage gewesen was, vnd sich der schönen frawen [79^b] namen weise vnd geperde der gassen vnd ires hauses erlernet hette, vnd aller irer gewonheit in geheyme gar wol vnterricht was vil mer von irem lobe vernam dann von Barnaba irem manne gehört hatte vnd gedencken warde der grossen torheit die begangen het; doch mit seinen eren vnd on verlust nicht wol ze rücke kern mochte, vnd sich mit einer frawen eynet; die er mit gelt übergabe Die gar vil in Barnaba hause wonet auß vnd ein ginge zů zeiten der erbern frawenn mit irem armen dienst zů liebe warde, darumb sie ir zů zeiten was gabe vnd das almösen zů zeytenn enpfinge sere wol gehalten was von der erbern frawen. Dise arme frawen Ambrogiolo gancz nach seinem willen geschickt het vnd einen kasten machenn liesse dor ein er sich versperret vnd nach ordnung peyder nicht alleine von der armen frawen in der erbern frawen hause, sunder in ir eygne kamern getragen warde, vnd der erbern frawen zů versten gabe wie sy für etlichen tage auß der stat auf das dorffe gen wölte, vnd also ir den kasten befalhe piß sie wider kem als dann die ordnung von Ambrogiolo gebenn was Also beleybe der kaste in der [79^c] erbern frawenn kamern; Do nun die nacht komen was, vnd Ambrogiolo dauchte die erber frawe solt entschlaffen sein, Er inwendig seinen kasten auf thet vnd dar aus in die kamern ginge vnd ein klein liechtlein anzündet vnd alle gelegenheit der kamern erlernet als was gemäle vnd anderm daz darinne was dez alles gar eben war name vnd mercket in seinem gemüte, Darnach sich zů dem pette nahent, do die frawe mit einem kleinen meydlein lage vnd schlieffe, Die er gar gemelichen vnd mit stille aufdeckte nackent also schön sache als angeleget, aber kein zeichen an irem leybe nicht genemen noch gemecken mochte, das er Barneba pringen möchte, dann alleine vnter der lincken pruste sie ein kleine warczeln hatte darumb etliche goltfarbe härlein; Do er

die gesechen hette; In dauchte er ein gütt wortzeichen hette sich genug
 liesse ires leybes vnd sie zů dackte, wiewol er sy also schöne sache
 doch so beherczent nicht was das er sich zů ir geleget hette vnd an sie
 icht begeret hett zů vneren, Dann ir stät gemüte vnd hertikeit wol ver-
 5 nomen hette, Vnd also den [79^d] meren teyle der nacht in der kamern
 vmb ginge vnd der frawen kasten auff thet, darauß name was im eben
 was zů gutem wortzeichen do mit er zů Barnaba sprechen möcht sölche
 kleinet im sein weybe geben het, von erste er der erbern frawen nam
 ein kōstenlicheen peßtell darinn vil manch gülden ringe mit edelm ge-
 10 steine, Darnach ein gulden gürtell mit vil ander kleynet das alles in sei-
 nen kasten truge, vnd selbes auch wider darein ginge vnd sich wider
 versperret als vor also thet er czwu necht nach einander das die erber
 frawe sein nicht ware name, Darnach an dem dritten tage nach der ge-
 geben ordnung das alte weybe wider nach irem kasten kame, vnd zů
 15 hause wider heyme truge, Ambrogio darauß ginge, das alte weyb
 peczalet, vnd auß richtet als er ir versprochen het, vnd so er erste
 mochte sich mit den kleineten die er der erbern frawen gestolen hette
 wider gen Parisi füget, Do er den erbern kaufleuten rüffet die da pey
 vnd gegenwürtig waren do er sich mit Barnaba verschribenn vnd auch
 20 verpunden hette, Zů den er also sprach, wie er [80^a] verpracht vnd
 gewonnen het als er mit Barnaba seins weibes halben gewet vnd sich
 versprochen het, vnd da mit sich ein sölches in der warheit erfunde, Er
 von erste alles daz er in der kamern gesechen hette von gemäle vnd
 anderm das darinne was mit aller gelegenheit den kaufleuten vnd Bar-
 25 naba saget, Darnach die schönen gestolen kleynet sechen liesse, vnd zů
 versten gabe wie sie im Barnaba weybe geben vnd vmb grosser liebe
 willen geschencket hette. Darumb er sprach vnd meinet er redlich die
 fünf tausent guldin gewonnen hette, Barnaba antwürt vnd sprach, der
 kamern halben waz er do von gesagt hette war were, auch wol erkent
 30 die kleinet seiner frawen gewest weren, Aber ein sölches durch meyde
 oder knecht erlernet het müge haben die gestalt vnd gelegenheit der
 kamern, Desselben geleich auch die kleynet im haben mügen worden
 sein, Wo er im nicht anders saget oder weste, In gedeuchst an den ge-
 sagten alleine im zů gewinnen die fünf tausent guldin nicht ein genügen
 35 were über das Ambrogio im antwürt vnd sprach, Barnaba fürwa[80^b]re
 du soltest ein genüge haben vnd dich nundalest benügen lassen, Aber
 seytmal es dein gefallen ist so will ich dir zů liebe weren vnd fürpaß
 sagen So spriche ich fraw Geneñra dein haußfraw hat vnter ir lincken

prüste ein warczeln zů guter masse groß darumb sten pey sechs golt-
farbe hare, Do das Barnabe erhöret vnd vernome in dauchte wie im ein
schwert sein hercz durch ginge vnd sich aller in seinem angesicht ver-
keret vnd entferbet do pey man wol mercken vnd vernemen mocht, vnd
5 ein offenwar czeichen was alles das Ambrogiolo gesagt hette das es alles
war sein mocht Vnd nach etlichem inwendigem schmerczen vnd seüfzen
Er sprach lieben freünde vnd günner was Ambrogiolo gesaget hat ist
alles ware, vnd hat redlich bewunnen; darumb kome wann er wölle so
will ich in erberlich außrichtenn vnd bezalen, vnd an dem nechsten tag
10 darnach Ambrogiolo die fünf tausent güldein enpfinge, vnnd Barnaba
von Parisy schiede, Ein schwere pöses gemüte wider sein eliche hauß-
frawen hatte, Gen Genoua wercz do sich richtet Doch nicht da hine
kame, [80^c] sunder czwainzig meyle darvon auff einem seinen dorffe
vnd gesesse beleybe, vnd einen seinen getreuen diener oder knechte mit
15 zweyen pferden vnd brieffen gen Genoua zů seiner frawen sante vnnd
ir sein zůkunft ze wissen thet vnd so sie erste möchte zů im kem vnd
dem knechte er gepote wann er mit der frawen kem an daz ende do es
in an dem fügligsten deüchte das er sie on alle parmherczikeit tödet
vnd ir das leben neme vnd sich schnelle wider zů im füget, Do nun der
20 knecht gen Genoua kam der frawen seines hern brieffe vnd potschaft
geben vnd geantwürt hette vnd mit grossen freüden von ir empfangen
warde Den andern tag darnach mit dem knechte auffsassse zů irem
manne Barnaba meinten ze reiten. Nun etliche meile geriten waren In
ein einiges finsters tale komen, do den knecht gůt vnnd zeit dauchte
25 seines heren gepote ze verpringen, sein schwerte außzoche die frawen
pey irem arme name zů ir sprach Frawe befelhet euch got; dann hie
an disem ende ir eüer leben lassen müsset, Die arme fraw das ploß
schwert vor ir sache vnd die herten wort ver[80^d]nomen het, mit er-
schrockenlichem herczen sprach, O genade mir vmb gotz willen wez
30 zeichst du mich ich pite dich ee du mir mein leben nymest sag mir vor
durch got? waz sein die widerdrisse die ich wider dich begangen han,
darvmb du mich so lesterlich töten wilt vnd dein hende in meinem vn-
schuldigen plüt verunreinen wilt, Frawe sprach der knecht ich klage
mich über euch, aber waz ir eürem manne meinem hern gethon habt;
35 oder wes er euch zeihet ist mir vnwissent, Dann ein sölches ze thon er
mir pey seiner hulde gepoten vnd befolhen hat, daz ich euch auf disem
wege on alle parmherczikeit töten sülle, vnd wo ich ein sölches nicht
thet er mich mit seiner eygen hent henken vnd erwürgen wölte Ir wist

wol wen ich im schuldig pin Dar vmb got sey mein zeuge mir vmb euch von herczen leyde ist, vund im doch nicht anders thon mage, Zû dem die frawe mit weynenden augen sprach, Ich pit dich piß mir genädig durch got nicht schuldig wöllest wern an dem do von dir nye leyt geschehen
 5 ist, einem andern zû liebe, Dann got der almechtige der alle dinge weiß vnd auch daz sieht [81^a] das ich wider meinen manne sölches nye begangen han darumb ich todes schuldig sey, noch söllichen iämerlichen tode von im zû empfahen. Doch lasse wir das alles sten, du macht ob du wilt zû einem male got vnd auch deinem hern vnd auch mir ein ge-
 10 nügenn thon in disen sachen, vnd daz also; Nyme mein gewant zû zû vnd gibe mir alleine dein iopen die doch gar kleines gelter wert ist, vnd reit wider zû deinem herren Barnaba meinem manne, vnd sage im wie du mir an disem ende das leben genomen habest So wille ich dir versprechen vnd zû got schweren vnd pey dem heile das ich auf disen tage
 15 von dir enpfah, das ich so ferre auß disen landen gen vnd ziehen wille, das weder du noch Barnaba noch lebendig mensché auß diser gegent nymmer mere icht von mir vernemen sol. Der gûte knecht dem die vn- schuldig erber frawe erparmet vnd sy nicht gern vmb ir leben prachte gar gerincklich sich diemütihet vnd ir gewantlein name vnd ir sein iopen
 20 gab vnd etlich gelt liesse vnd sy pat daz sy so sie erste möchte auß dem lande vnd gegent zûge, vnd sie also zû fusse alleine in dem wildenn tal liesse, [81^b] vnd zû seinem hern reyte Zû dem er sprach sein gepote er nicht alleine verpracht hette sunder der frawen toten leybe vnter den wolffen gelassen het. Nach etlicher vergangen zeit Barnaba gen
 25 Genoua kam der von den andern kaufleuten etwas verschmächet was vmb der vnuernünftigen kaufmanschacz willen die er mitt Ambrogiole begangen hat im in grossem übel von yderman ward aufgenommen arm vnd verdorben beleibe. Nun als ir vernomen habt, die elende frawe alleine on allen troste beliben was vnd so sie pest mocht sicht verkeret,
 30 domit sy von yemant erkant würde, nicht ferre von dann in ein dorfflein ginge do sy sich pey einer alten frawen zûricht vnd bereyt in mannes form vnd ir des knechtes iopen zû irem leybe machte, vnd auß irem hemde mans hemde vnd niderkleyde machte vnd ir schönes langes frawen hare abschneyde sich gancz schicket in mannes geperde vnd schiffe
 35 knechtes form, vnd sich palde in ein porten zû dem mer füget, do sie zû irem gelücke ein katelanisch schiffe fand, von dem der patron des schiffes genant was Enchanach der an das lant ab gesessen was [81^c] süßes wasser auf zeladen von einem prunne, mit dem die frawe in knechtes

form zû rede kam vnd sich zû im für ein schiffknecht auf daz schiffe verdinget vnd sich nante mit namen Sicurano von Finale do sy sich gancz von neuem mit mannes kleydern versache, vnd dem hern des schiffes in sölicher masse dienet das sie gancz sein genade het vnd über
 5 alle andre knechte erbarbe Nit lange verging der Chatelon mit grossem güte in Alexandria füre vnd mit im etlichen falcken füret dem soldan ze schicken; der auß zû warten Sicuran grosser meister was, vnd in zû mer malen in des soldan hause vnd palast gegenwürtig des soldan hat zû essen geben, Vnd der soldan ware genomen hette, Sicuran schnelle vnd
 10 behende dienst, nit allein dem falcken ze warten, sunder in allen andern sachen fürsichtig vnd kluge waz, als mit schreiben vnd lesen rechnen vnd in allen andern diensten aufrichtig, Seine tugent vnd geperde In sölicher masse im liebten vnd gefielen das er Sicuran an seinen herren den Catelon begeret, vnd wie wol es dem Catelon schwere was, doch dem
 15 soldan nicht neyn sprechen mochte [81^d] vnnnd im Sicuran vergünnet. Sicuran in kurczer zeit nicht minder des soldan genade het mit seinem wol thon erworben als er des Chatelon gehabt hette. Darnach nitt lange verginge in Acri der stat die vnter dez soldan heshafft vnd gewalt ist, ein grosse messe ein ginge, als dann ierlichen zû sölicher zeit in dem
 20 iare gewonheit was. Do von allen landen grosses volcke auf kame. sunder von kristen kaufleuten vnd do mit die kaufleute vnd ir güte dester sicher were, waz sein gewonheit alweg an alle andre ampteleute einen seinenn lant hern dar zû schicken der der stat vnd auch der fremden kaufleute acht vnd sorge hette, damit nyemant wider recht gethon würde;
 25 Do nun söliche zeit vnd messe komen was, der soldan Sicuran für seinen verweser vnd gubernator schicket gen Acri, do er mit grossem fleiß yderman seine recht thet, als dann seinem ampte zû gepüret, vnd den kristen kaufleuten grosse freuntschaft peweiset wo er die sache oder fande Als dann waren Cicilianer Pisaner Genoueser Lombardi vnd Venediger vnd vil andre manche kaufleute von Walhen, mit den er grosse
 30 kuntschaft name gern pey im waz [82^a] von seines landes wegen, von einem ende zû dem andern, in der stat auf vnd abe reyte sich begabe ongeferde für einen laden kome darinn Venediger wonten, do er geladen warde ab zû siczen etliche kleynet zû sechen, des er willig was absasse
 35 in den laden ginge die schönen kleynet ze sechen vnd vnter vil manchen kleyneten im zû gésichte kam ein schöner peütell mit einem gulden gürtell nach Genouiner gewonheit, den er pald erkante vnd peyde peütell vnd gürtell sein gewesen waren; In gar ein fremde sach dauchte wie

seine kleynet den leuten möchten zehanden komen sein, aber keines gleichen nit thet Dann alleine mit zucht fraget wes die schönen kleynote weren vnd ob sy feyle weren Nun was Ambrogioło von Piaczenza mit vil vnd mancherlei kaufmanschacz auf einem Venediger schiffe auch auf
 5 die messe in Acri komen, vnd wol vernomen hatte wie der hauptman vnd gubernator der stat fraget wes die kleynet wern vnd wem sie zů stunden, palde her für drate zů dem hauptman lachent sprach, herr die kleynet sein mein aber sy sein mir nich feyle, aber wo sie euch lieben vnd gefallen so will [82^b] ich euch sy schencken, Sicuran sache
 10 Ambrogioło lachen vnd etwaz czweyfel het ob er in erkant het oder in etlichez seinem geperde geformirt hette, Zů Ambrogioło sprach waz lachstu, dich nympt villeicht fremde daz ich ein söldner pin vnd nach sölchen frawischen dingen frage; Dem Ambrogioło wider antwort vnd sprach Herre ich lache des nicht daz ir sprecht, sunder ich lache des in
 15 der masse sie mir worden sein. Zů dem Sicuran der hauptman sprach? Nun sag mir daz dir got vfl glückes gebe, Ist es dir icht schwere wie sy dir worden sein, vnd wie du sie gewonnen hast. Herre der hauptman sprach Ambrogioło; den peüttell vnd gulden gürtell schencket mir ein edel fraw von Genoua genant madanna Geneūra Barnaba Lamolin weib
 20 in einer nacht die ich pey ir schlieffe, vnd pat mich das ich ir do pey gedächte, herre daz ist das des ich vor gelachet han wenn ich bedencke die grossen eyfeltickeit Barnaba ires mannes, der also törlich thet vnd mir fünftausend gulden an tausent seczet, das ich so vil nitt vermöcht daz ich sein frawen zů meinem willen schicket, vnd den prachte ze thon,
 25 Daz thet ich vnd gewan fünftausend [82^c] gulden; Darzů dise kleynet als ir secht, die sy mir durch grosser liebe willen gabe vnd schencket, vnd nach dem als ich vernomen han Barnaba wider gen Genoua kam wie er sie ein seinen knecht töten schuffe. Do Sicuran Ambrogioło wort gehört vnd gar eben vernomen het palde erkant waz die vrsache Bar-
 30 naba zorn wider sie gewesen was, vnd wol vernam vnd fürwar erkante daz das der were der alles ires grossen iamers vnd vnglückes vrsache gewesen were, im wol gedacht sölche kleynet vngepüset von dann nicht führen sölt, Doch sich in keinen weg mercken liesse, sunder sich gen Ambrogioło beweiset wie er sölche abenteüerliche sache gern gehört
 35 hett vnd mit im grosse freütschaft machet, in sölcher masse do sich die messe in Acri geendet het Ambrogioło durch troste rate vnd hilffe des hauptmans Sicurano er mit im gen Alexandria reyte, do im Sicuran einen reichen laden zůrichttet zů verkauffen vnd kauffen, vnd im grosses

gelde vnter seine hende gabe do von peyden grosser gewin zů stůnde,
 vmb des willen Ambrogioło fast gern in Alexandria wonet in dem Sicuran
 nicht feyret vnd [82^d] Barnaba Lamolin seiner vnschuldikeit klare
 machen wolt vnd durch Genoueser kaufleute so vil zů wegen prachte
 5 vrsache nettes gescheftes halben das Barnaba gen Alexandria genug
 armlich kam Do Sicuran mit etlichem seinen freůnde vnd gůnner ver-
 lassen hett; Die in auffhielten also lange piß in zeit defůcht seinen wil-
 len ze verpringen vnd gůte meinung, Nun hat Sicuran vor dem soldan
 dise histori Ambrogioło zů mermalen sagen machen vnd den soldan do
 10 mit freůde geben, vnd nudalest in zeit daucht nicht lenger zů verzichen
 seytmalle Barnaba auch gegenwůrtig sein mocht; darzů tage vnd zeit
 name von dem soldan impetirt das er nach peyden Ambrogioło vnd
 Barnaba schicket, sie peyde schuf fůr sich komen vnd gegenwůrtig Bar-
 naba schaffet Ambrogioło von nettem alle sache ze sagen vnd ze be-
 15 kennen als er vor gesagt vnd bekant hett. Damit die rechte vnd er-
 loschen warheit wider an den tag vnd zů liecht keme, Des dez er sich
 von Barnaba weybe gerůmet hette; Nun durch des soldan geschefte
 peyde Barnaba vnd Ambrogioło fůr in kame; der soldan mit ernstlichem
 angesichte Ambrogioło gepote, daz [83^a] er die warheit saget, wie er
 20 Barnaba von Genoua die fůnf tausent gulden an gewonnen het. Nun
 Ambrogioło Barnaba gesehen vnd erkant het, vnd im gedacht da nicht
 gucz sich gefůgen můcht, doch sein hoffnung zu Sicurano so groß was
 das er kein hoffnung het des das im dann zu stunde, Der soldan von
 neuem mit czornigen vnd schwerem troen zu Ambrogioło sprach; Nun
 25 sage mir die warheit als lieb dir dein leben ist, do von sůlchen heftigen
 wůrten Ambrogioło groß erschrecken enpfing Das er gegenwůrtig Bar-
 naba vnd des soldan vnnd vil mancher fůrsten vnd herren das da ge-
 logen was sůlt fůr ein gancze warheit sagen. Doch ander pein nicht
 hoffet noch warten was dann alleine widerkerung der fůnf tausent gul-
 30 den vnd die wider zů geben, An hube was sich peydenhalben vnd allent-
 halben sein vnd Barnaba vnd seiner frawen Geneura verlossen het saget,
 vnd von nettem aller menge zů wissen thet. Do er nun sůlche seine
 rede geendet het; Sicurano als ein verweser, vnd richter dez soldan zu
 Barnaba sprach, vnd du Barnaba gůter man wes hast du vmb diser
 35 grossen falschen lůgen [83^b] willen mit deines erbern vnd frummen
 frawen begangen. auf sůlche frag Barnaba antwort vnd sprach, Herre
 ich waz von czorn vnd grossem leyde őrberunden vmb meines verloren
 geltz willen vnd auch der schmachheit halben die ich meinete von meinem

weybe solte empfangen haben das ich sie einen meinen diener töten schuffe, vnd als ich von im vername als palde er ir den tod gethon hette sie zů hant von vil wolffen zerissen warde, Der soldan peyder rede wol vernomen het, doch Sicurano meinung nicht vernemen mochte; der
5 dann sölche ordnung gemacht vnd geben hat, oder auf was meinung oder zů welchem ende er dise materi pringen oder füren wölt. Sicuran zů dem soldan sprach, Herre vnd durchleüchtigster fürste eüer genade wol vernemen mag, wie sich die gůte frawe des der da spricht ir puele vnd liebe gewesen sey vnnd auch ires mannes trösten möchte, Dann'ir
10 lieber puele mit falschen lügen sie irer eren vnd gůten leymet genomen vnd enpfremdet hat, vnd auch ire man falschen in armüt pracht vnd verderbet hat, vnnd die hertikeit ires mans wider sy mer dem falschen lügner ge[83^c]laubt hat dann ir, die er in so langer zeit nye anders dann in trewen vnd eren gesehen funden vnd erkant hat, Darnach die
15 schuffe töten vnd den wilden tieren zů essen geben Auch mere die liebe vnd freündtschaft die ir von dem der da spricht er ir puele sey getragen warde, Die im vmb grosser liebe willen so köstliche vnd schöne kleynet geben vnd geschencket hat Iczund lange zeit pey ir gelebet vnd gewonet hat vnd ir nye erkant hat Darvmb ir mercket vnd wol vernemen müget
20 was Ambrogioło piß auf dise stunde gesaget vnd gerett hat von der erbern frumen ist alles erlogen gewesen, Darvmb eüer genade bedencke das grosse falschlich vnrecht daz der gůten frawen von in peyden Ambrogioło vnd Barnaba irem manne zůgestanden ist Her nun richtet nach gerechtikeit; Doch in besunder genade ich begere vnd euch pit.
25 Der lügner vnd falche betrügner straffe enpfahē vnd dem armenn vnd betrogen vergeben werde, Dann gegenwürtig eüer vnd ir ich euch wille die frawen sechen lassen vnd die warheit zů liecht pringen Der soldan stäcz bereyt was in Sicu[83^d]ran gefallen vnd dienste, zů im sprach das er die frawen schaffte komen; Daz Barnaba gar ein fremde sache
30 daucht die er tode meinēt, noch pey leben were, sein hercz mit pein vnd freuden gemischt was, Ambrogioło sein vngelücke gegenwürtig vnd vor im bereyt sache; argers forcht dann widerkerung der fünftausent gulden, noch in fremder dauchte die frawen der kuntschaft er nye gehabt het, vnd iren man Barnaba do vnd an dem ende ze sechen; Dann
35 in fremde daucht was sich piß auff dise zeit verlossen hat. Nach allen disen worten Sicuran für den soldan nider auf seine knye fiele mit kläglichem weynen zů dem soldan sprache. Herre ich pin die arme elende fraw genant Geneñra sechs gancze iare in mans form daz elende vnd

eüere lant gepaut han Barnaba Lamolin eliche haußfraw, von dem ver-
räter Ambrogiolo meiner eren beraubt vnd enpfremdet gewesen pin
vnd von meinem manne vrsache Ambrogiolo in den tode vnd den wil-
den tieren geben worden pin. In sölichem reden alle menschliche
5 stymme vnd rede gelassenn hatt, vnd nicht mere für mannes [84^a] pilde
wolt erkant sein, vnnd das gewante von der prüste aufreyß vnd die
freüschon prüstlein weiset vnd sechen liesse vnd sich dem soldan vnd
allen seinen hern für die, die sy waz zů erkennen gabe, Darnach sich
mit herten scheltworten gen Ambrogiolo keret vnd in fraget nach dem
10 als er dann sich gerümet vnd gesaget het Vnd sprach? nun sage mir
du pöser verflüchter man wo oder an welchem ende hast du zů Genoua
ye mit mir gerett oder ich dein ye kuntschaft gehabt; hastu dann mit
mir nye geret noch ich mit dir? wie macht du mich dann ye beschlaf-
fenn haben. Auf söliche red Ambrogiolo ir nit antworten kunde grosser
15 forcht vnd erschrecken halben stille schweige in keinen wege mere
reden mocht Der soldan vnd alle seine herren als die da Sicurano stäcz
für einen erbern fürsichtigen man gehalten hetten, vnd nun für ein
weybes pilde sachen vnd erkanten. sich der ergangen sache nicht ver-
wundern mochten, Das sich söliche erloschne warheit also liderlich züch-
20 tiglich gefüget het, Des kein mensch der welte weder gedacht noch ge-
laubet het. Dez der soldan mit sampt allen seinen herren, die züch-
tig[84^b]en erbern frawen Geneüra nit verloben noch verpreisen mochte
irer also grossen bestendikeit. Zů hant im frawenn kleyder vnd gesel-
schaft nach der frawen begern komen schuffe der frawen ze dienen vnd
25 ir gesellschaft ze thun, vnd Barnaba was er wider sein eygen weybe ver-
schult hette vergabe; Der sich mit kläglichem weynen für sein frawen
nider auf seine knye sencket durch got vergeben vnd ir huld begeret,
sy freüntlich pate das sy im verziche, wie wol er sölicher erbern frawen
nicht wirdig was, doch im williglichen vergabe, von der erden aufhube
30 in ire arme name freülich halset vnd küsset. Nach dem hünig Soldan
gepote daz man Ambrogiolo neme vnd an dem höchsten in der stat an
einen pfale pünde vnd in gar wol mit hönig salbet vnd do von nicht ge-
nommen würde also ange das in die mucken vnd bespen ledig machten
Daz geschafte vnd getun alles ein dinge was. Nach dem Ambrogiolo
35 güte vnd reichthum der soldan alles frawen Geneüra geben schuffe, Das
über zechen tausent ducaten wert sein mocht Nach dem er sy selbes
vnd Barnaba besunder mit grossem reichthum von golde silber vnd
[84^c] edelm gesteine begabet; Das auch pesser dann pey zechen tau-

sent gulden wert was Nach dem ein reiches wol gewapenez schiffe zů
bereiten thet, vnd mit grossen freüden allenthalben; In sein vrlaub gabe
wider heym gen Genoua schicket do sie mit grossen freüden reiche vnd
mechtig hin kamen, vnd von allen Genouinern vnd iren freünden mit
5 ern vnd wurden lieplichen empfangen worden sunder die edel fraw Ge-
netüra die yederman meinete vnd gelaubete sie tode vnd von den wolffen
zerissen nicht mere pey leben were, Ambrogio der an dem pfale ge-
punden stunde nicht alleine von den mucken vnd bespen getödet, sun-
der piß auf das peine gegessen waz, alleine das gäder das gepeyne
10 pey einander behielte, Die gezeitignuß gaben seiner falscheit vnd gros-
sen lügen die er in die erbern frawen begangen het, Also beleybe der
lügner zů fusse pey dem betrogen.

Wie Pagamino der mer raubermeister Rinaldo sein weyb nimet,
Nach dem meister Ricciardo sein groß freünt wirt, Das weybe an
15 in begert des er sich gen im gar willige pe[84^d]weyset, doch so
ferre daz er der frawen willen habe, dem sy neyn sprache mit im
nicht mer zů sten, die Pagamino nach ires mannes tode für sein
elich weybe nam.

Iglich person der edelen gesellschaft der künigin netie fabel on
20 masse gelobet hetten. vnd alleine Dioneo auf den tage noch ze sagen
waz, der nach langem loben der künigin netie histori an hube vnd sprache.

Ir edeln züchtigen schönen frawen, Ein teyle vnser künigin netie
histori mich des dez ich mir zesagen für genomen het, vrsache geben hat
daz vnter wegen ze lassen, vnd waz anders zů sagen, vnd des selben ist
25 vrsache; Die grosse torheite Barnaba vonn Genoua wie wol es im an
dem ende seiner trübsal wol auß ginge, doch alle die in zů versten ge-
ben vnd glauben das er im zů versten gabe nit weise sein mügen, sun-
der die in der welt hier vnd dort ziehen als er thet mit andern frawen
dann den iren zu schaffen haben vnd glauben wöllen, Ire weyber die
30 sie zů hause alleine lassen das ire hende vnder die gürteln stecken vnd
feyern, Zů gelei[85^a]cher weise als ob wir der frawen natur nicht ken-
ten; nachdem ir in einer meiner fabel vnd netien histori von den die
in söliche torheit zů versten geben vernemen wert, vnd noch vil mer
grösser torheit ist den Die sich stercker dann die natur sein meinen
35 mer ze thon meinen dann in von natur verlichen ist, sich nöten einen
andern zů glauben machen daz sie vnd ir torheit gelaubt wo die natur

dem nicht hilffet der von in zů sölcher torheit gezogen ist. Darumb
wisset wie in der keiserlichen stat Pisa ein geleter doctor der erczeny
gesässen was, der was mit namen genant meister Riciardo mer vonn
leylicher stercke dann mit sütilikeit begabet; der da villeicht auch
5 meinet seinem weybe mit einem grossem studirn zů pette ein genügen
ze thun als er dann im selbes thete, vnd dar vmb das ein reiche wolha-
bend man was vmb des willen er auch ein schönes iunges weyb haben
wolte; aber mit dem im geschahe als den gern geschicht die andern leütten
raten können vnd in selbes weder helffenn noch raten wissen Dann daz
10 daz er do suchen ginge mit allem fleiß sölte geflochen hab[85^b]en ein
iunge weyb ze nemen die im vmb seines reichthum willen von hern Lotto
Galandi gegeben warde, vnd waz mit namen genant Bartolomea eine
von den schönsten iunckfrawen die in Piser lant was Dieselben schönen
iunckfrawen der doctor arczte zů hause füret ein herlich hochzeit machet
15 vnd die ersten nacht do er sie beschlieffe die mit einer fart endet vnd
der göttlich ee ein genügen thet, vnd auch gar ein klein gethun het er
sie on dieselbigen einigen fart gelassen het, Dann vmb derselben einigen
fart willen er sich des morgens gar früe mit frischen eyern confett vnd
Malfasire laben muste, Dann ein alte vugestalte mager manne waz vmb
20 der herten nacht willen wider in die welte ze komen darauß er mer dann
halber was, die er im selbes vmb seiner preüte willen geben hette vnd
nun sein stercke des leybes pas vnd mer dann vor erkennen warde;
Nach dem seiner schönen frawen der iungen kinder kalender zů lesen,
vnd wie nicht alleine alle tage eines heiligen tage were, den man eren söl
25 sunder vil mancher, vmb der willen man keuscheit pflegen söl vnd alle
[85^c] wochen zů dem minsten den freytag vnd samstag fasten, Darnach
alle vnsere frawen vnd czwelfbotentage vnnd die vier goltfasten mit
keusche sten ern vnd fasten, den heiligen sonntag got den hern mit gepete
loben vnd keusche ern, Auch etliche puncte des mone vnd gestirn man
30 keusch vnd heilig sten sölte, der güten schönen iungen frawenn zů ver-
sten gabe geleihe wie man alle heilige zeit vnd tage feyret also auch
man zů pette des nachtes thon sölte, Das dem iugen schönen fretlein
nicht ein klein pein was, die er dez monecz mit marter ein fart an
rüret; Also er daz schöne fretlein vil manch lange zeit fastent vnd
35 feyern hielte so sie vil lieber gessen vnd gearbet hette vnd das grosser
hute thet da mit sy nicht von andern manen gelert vnd vnterricht würde,
welche tage in der wochen zů arbeiten vnd zů feyern weren. Nun
eines tages sich begabe daz gar grosse hicze was vnd meister Riciardo

zû willen kam, auf ein sein gesässe daz nahent vnter dem schwarcz-
 perge an dem mere gelegen was mit seiner frawen spaciren zû zeiten
 neuen lufte ze nemen vnd ein klein freude pey dem mere ze nemen
 [85^a] Do er nun do hin kam etlichen tage also gestanden seine gûter be-
 5 sechen het eines in mere freude zû geben er mit etlichen fischern vnd dem
 weybe auf czwey kleine fische schifflein sassen das weybe auf eines vnd er
 mit den fischern auf das ander vnnnd also fischent sich in das mere auf ein
 vierteyle einer meile verschussen Des in die frawen grosse freude na-
 men, In dem on geferde sich zû irem vngelücke begabe das ein galeotta
 10 nahent pey dem lande für fure, des die fischer nicht ware genommen
 hetten, die was eines raubers der was genant Paganino von Monacho
 ein offen rauber auf dem mere, vnd der fischer e ware dann die fischer
 sein genommen het, palde sein galeotta gen fischern keret. Do das die
 fischer ersachenn sich gen dem lande kerten aber in ze spate was, vnd
 15 das schifflein darauf die frawen waren von Paganino gefangeunn warde;
 Aber dar abe nitt anders name dann alleine die die iungen schönen meister
 Ricardo frawen. Do daz der meister der nun an dem lande abe gesessen
 was sache vnd wege gen holczwercz die flucht gabe der nit alleine
 seines weybes von andern manne besorget, [86^a] sunder vor dem lufte
 20 ir sorge vnd forcht het sy sündet wider sein lere, ob er traurig waz do
 frage nyemant nach, auf allen ecken der stat sein leyd klaget nitt
 gewissen mochte wer im seines schönen weybes beraubt het vnd wohin
 sy doch were geführt worden. Do nun Paganino die frawen die er
 den fischern genommen het also schöne sach in nit übel daucht er auf
 25 den tage gethon het, dann er kein weyb het darumb im gedachte
 er die frawen sein lebtage behalten wölte, vnd sy die da sere weynet
 vnnnd ir leyte klaget, er freüntlichen tröstet In dem die nacht kam
 vnd ir der kalender ires manne enpfallen was aller feste vnd feyer-
 tag vergessen het, dann Paganino sy nit alleine als der arczte mit
 30 Worten sunder süssen werken tröstet vnd daz in masse thiet e sy gen
 Monacho kamen sy ires arczte vnd seiner gesetzte ganz vergessen het
 anhub mit Paganino frölicher ze leben dann frawe auf erden ye ge-
 thet; über daz do er gen Monacho kame, die freude die er ir gabe daz
 waz daz er sy hielte als seyn elich weybe. Nun nach etlicher ver-
 35 gangen zeit meister Riciardo zû gehöre kam wie sein schönes weyb pey
 Paganino zu Monacho were, Ir von ganzem herzen begere waz auch
 [86^b] im gedachte nyemant anders dann er selbes im pesser gesein
 möchte sein weyb wider ze haben von Paganino, Im für name selbes

zu Paganino ze faren vnd sy von im vmb gelt losen, vnd nach sölchen
 bedencken palde auf ein schiffe sasse gen Manacho fure, vnd als pald
 er gen Monacho kam sein frauen sach vnd sy in sache dez sy pald Paga-
 nino vnterricht waz ires mans halben ze tun were dann in keinen weg mer
 5 mit im sten wölte wo er ir wider begeret peyde irer sach eins wur-
 den den arczte wider wege zeschicken als er darkomen were, vnd an
 dem nechsten tage darnach meister Riciardo zů Paganino kam vnd
 wenig stunden sein grosse kunschaft naz, doch Paganino stäcz dez
 gleichen thet als ob er sein nye mer gesechen het, zů besechen was ende
 10 er doch seiner rede komen wölte Doch nach langem reden do meister
 Riciardo zeit dauchte; in die vrsach seiner zůkunft ze wissen thet in
 freündlich pat daz er die summe geltes von im nem die er selbes wölt vnd
 im sein weybe wider gebe, Dem Paganino frölich antwort vnd sprach;
 meister Riciardo, nun seyt mir wilkomen; es ist war ich hab ein iunge
 15 frawen in meinem hause; ob die eüer oder anders mans weyb ist daz
 ist [86^c] mir nit kunt; Ich kenne weder euch noch ir nit dann so ferre
 daz sie mit mir etlich zeit gewonet hat? seyt ir ir man als ir sprechet
 vnd als ir mich ein erber man düncket so sol ich euch zů ir füren vnd
 euch des als ir begeren seit zů liebe weren, so weise ich wol ist sy eüer
 20 weibe sy sol euch erkennen vnd gern sechen; spricht sy dann als ir
 spricht sie sey eüer weibe vnd wölle mit euch komen so will ich ir daz
 gern vmb eüern willen vergünnen mit eu heym ze farn, vnd waz ir mir
 vmb iren wilen gebt oder tůt des pin ich zů fride, Wo im aber nit
 were als ir gesprochen habt so tet ir vnrecht mir sy durch sölche wege
 25 ze nemen dann ich auch ein iunge man vnd vermage als wol als ein
 ander ein iunge frawen ze halten sunder die die mich die freuntlichest
 duncket die ich mit augen ye gesache; Meister Ricrado sprach werlich
 das ist pey got geschworen sy ist mein elich weybe, vnd pringstu mich
 do sie ist du solt die warheite sechen; Ich weiß für war als palde sie
 30 mich ansichtig wirt sy sol sich mir von freüden an meinen halse werffen;
 daz wille ich gern sechen sprach Paganino ge wir nür ze sechen was
 sy sprechen wölle vnd mit dem arzte in einen seinen schönen [86^d] sale
 ginge der frawen zů im rüffet die auß einer kamern auf den sale waz in
 reichem köstlichem schönen gewant gekleydet gegangen kam, vnd mei-
 35 ster Riciardo irem man nit anders enpfinge noch zů sprach dann als sie
 einen andern fremden getün het der in Paganino hause komen were.
 Meister Riciardo der in grosser hoffnunge waz von seinem weybe mit
 freüden enpfangen sein; dez sy keines gelechen gen im thete daz in

ein sere fremde sach daucht daz in das weybe nicht kennen sölt vnd
 doch nit lange zeit von im gewesen waz; aber wol gedacht der grosse
 vnmüt den er iren halben gehabt het syder her er sy verlorn het; der
 selbig vnmüt im sein gestalt verkeret het; in masse daz sy in nicht er-
 5 kennen möchte zû ir sprache weib es hat mich teuer koste dich fischen
 zefüren, dann sölcher pein sider her nye überwunden han syder ich
 dich verlose, vnd du mir genomen warst vnd noch erger mir zû stet;
 ich laß mich beduncken du enkennest mein nit mere, Seytmal du mich
 so schlechtlich enpfangen hast; siehestu nit daz ich dein meister Ri-
 10 ciardo doctor der arcznei pin vnd pin her komen dich frei vnd ledig
 auß gefencknuß ze machen, vnd dem piderman vmb dich geben waz er
 begeret [87^a] nür ich dich wider habe vnd dich gen Pisa zû deinen
 freunden füre, des der erber man got lone im willig ist; darumb schick
 dich freuntlich mit mir heim ze komen. Die frawe nach langem seinen
 15 reden mit einem kleinen schmuczen sich gen im keret vnd sprach;
 herre redet ir mit mir mich bedunckt ir habt mich für ein andre er-
 sechen dann für war ich eüer nie mer gesehen noch euch erkant han
 Ey neyne liebes weib nit spriche daz, sich mich recht an! bedencke
 dich so findestu das dein doctor Riciardo pin, Die frawe wider sprach
 20 herr ir wert mir verzeihen dann mir ist nit zimlich euch anders ze be-
 sechen noch mich zû bedenckenn als ir dann gen mir tun müget, dann
 icht nit bedencke möcht daz ich euch yemer gesehen het, sölcher rede
 der doctor sich pis in sein hercz betrübet, Im gedacht die fraw vil-
 leicht also spreche darumb daz Paganino gegenwürtig were vmb des-
 25 willen der warheit nicht bekennen wölte vnd spreche sy kennet sein
 nicht, sich zû Paganino keret in freuntlich pate er im mit ir vergünnet
 in die kamern zû gen do mit er allein mit ir sein nottorft reden möchte,
 des im Paganino williglichen vergünnet, doch so ferre daz er sie wider
 iren willen nitt [87^b] küsset, palde der frawen gepot daz sy mit mei-
 30 ster Riciardo in die kamern ginge sein rede vnd meinung gar wol ver-
 nem im rede vnd antwort gebe nach irem gefallen; also peyde in ein
 kamern gingen sich nider seczten Der güt man anhub zû der frawe
 sprach O du außerweltes lieb meines herczen trost vnd hoffnung mei-
 ner sele; mag das hesein daz du mich nit kennest gedenck an den
 35 der dich lieber hat dann sich selbes, Nun wie mag das gesein das
 ich mich so in kurzzer zeit verkert han daz du mich nitt erkennen
 solt, du liebes weyb ob allen weyben thu auf dein schöne eüglein
 sich mich ein wenig an nym war deines meyster Riciardo der dich

also liebe hat. Die fraw nach langem seinen piten vnd begeren anhub
zū lachen vnd zū im sprach, traun ia gūter man ich will nit daz ir mich
so für eyfeltig haltet vnd gelaubet daz ich euch kenne vnd nit wisse
daz ir meister Riciardo seyt mein man; aber do ich pei euch waz ir
3 mir gar klein peweiset das ir mich kent, als dann wol pillich gewesen
wer vnd ir euch für ein weisen man hielt sōltet ir auch wol erkant
haben mein nottorft do ir mich also iunck frisch frōlich sachet wol
sōltet bedacht haben daz die iungen frawen auch anders [87^c] dann
schōne kleider haben wōllen wie wol sy dez scham halben nit begern
10 ir selbes mein notorft zū pette sōlt gedacht haben, vnd do euch das
studirn mer dann ein iung weyb liebet sōltet ir euch noch mich be-
kūmert haben, doch mich nye bedauchte das ir ein studirer oder do-
ctor, sunder ein außrüffer der feyertage fasten peten wert het ir etern
arbeitern die etier felder pauen so vil feyertage geben als ir dem gabet
15 der mir mein kleines felt sōlt gepaut haben ir hettet das iare weder
korn noch weicze abe geschniten vnd eingelegt. Nun hat got gewōlt
als der meiner iugent ein getreuer fürseher gewesen ist mich dem zū
gefüget hat der mich gern icht vnd mir mein felt paut nach aller
meiner nottorft, paß dann ir mit eterm fasten peten vnd feyern ge-
20 pieten tun kündet, mir von keynem feiern nicht sagt als ir stācz thet
In disem hauß weyß man von keinerley sōlichem zū sagen, sunder stācz
tage vnd nacht arbet vnd die wolle mir gar wol schlecht, vnd in diser
vergangen nacht nach dem metten geleūt waz; weiß ich ich gar wol
wie es ging mer denn einmal gen acker fure, darumb ich pey im be-
25 leiben wil vnd mit im arbeten die weil ich mag vnd iunck pin; Dfe-
[87^d]ner fasten vnd peten piß in daz alter sten lassen so wir nimer als ir
arbeten mügen, vnd ir im namen gotz zu hause wider fart so ir peldest
müget Do der gūte man seines weybes wort vername betrūbt in den
tod zū ir sprach; Ach mein liebes weyb, nun was herter wort sein daz
30 die du sagest; bedenck dich recht sich an dein vnd deiner freūde ere?
wiltu ee hie sten als ein pūbin des da pei du pist vnd in tōlichen sūn-
den leben; dann zū Pisa in ern mein weibe ze sein werlich es wirt dich
gereuen volgestu nicht meinem rate; dann wenn er dein ein genügen
hat so wirt er dich mit grossen deinen schanden von im iagen vnd ein
35 andere neme, so pistu pey mir ewig wert vnd liebe gehalten vnd macht
pey mir tun was dir liebe ist wiltu umb sōliches pōsen vnōrnlichen vn-
keuschenn lusteswillen dein ere vnd lob so schentlich hin werffen vnd
mich der dich ob allen frawen der welte liebe hat lassen, Nun lasse

abe von deinen sölchen gedanken du mein allerliebstes weib des pit
ich dich durch got nicht rede also! kom mit mir zů deinen freunden
vater vnd müter erfreue, dann in vmb dich von herczen leytt ist; so
uersprich ich dir hinfür alwege zethon alles daz dein hercz [88^a] begert
5 darumb volge mir thu das ich dir sage! ich sol mich dir zů liebe nöten
des ich nye ze willen ze tun hette, do mit ich dir vnd deinem willen
ein genügen thue, nicht weyter weder feyer noch faste dann dein
wille ist, dann mir nye wol gewesen ist sider du mir genomen warest;
Die frawe dem arczte do er geswigen waz antwort vnd sprach; meiner
10 ern halben nach dem ir sprechet wille das im nyemant vmb mich lasse
leider sein dann mir selbes; Dann do meinen freunden vmb mich nicht
leytt was do sie mich euch gaben, so wil ich iczund mir vmb mich nit
leytt sein lassen, desselben gleichen sy tun süllen, Sten ich dann
iczund in peccato mortali so sage ich euch, mitte nacht sol nicht vergen
15 ich sol in peccato sein von einem guten bistello, daz last euch nit mere
dann mich bekümern, Mer sag ich euch hie bedüncket mich Ich Pa-
ganino weybe sey, so daucht mich zů Pisa wie ich euer pūbin were
seitmal wir vnß durch pūnte des mon vnd dez gestirn zů pette zů ein-
ander fügen müsten vnser felder zů pauen wo mich Paganino hie tage
20 vnd nacht in seinen armen beschlossen helt, mich lieplich halset vnd
küsset des [88^b] ich im ewigen dancke sage. Mer spricht ir euch ze
nöten mir ein genügen ze tun, ir armer eyfeltiger man nun seyt ir mer
dann halber tode, syder ich von euch kam, Darvmb geht hin nót euch
ein gůt leben ze geben vnd eüern verdorben leybe wider zů im selbes
25 zepringen der mich gancz entbicht düncket Noch mer sült ir wissen
wenn mich der lasset als mich düncket er das ze thun nit geschicket
sey wo ich anders pey im sein will, So ist doch ye mein syn nymer
mer zů euch zekomen, dann vmb meinen willen in eüerm hause nicht
ein kleines schüsselein salsen dester mere gemacht würde, so ist hie
30 weder feyer fasten noch vigili darumb ich pey Paganino beleiben wille,
vnd ir so ir peldest müget eüern wege hin den ir her komen seyt fart
anders ich über euch waffen schreien würde vnd sprechen ir mich nöten
wölte Wer vnmütiger dann der gůt meister Riciardo erste sein grosse
torrheit ein iunges weybe ze nemen bedencken warde, traurig vnd übel
35 ze müte mit genug vil worten, Die alle nitt eines helbling wert waren
on icht anders gesprochen von dann schiede das weybe liesse wider
heym gen Pisa fure [88^c] grosses leyden vnd vnmütes halben in also
grosse torheit fiele wo er auf der gassen ginge, wer im zů sprach dem

er kein ander antwort er gabe, dann alleine sprache übel thun will
kein feyertag haben Nach dem nicht lange verginge das der gûte
man starbe Do das Paganino vername vmb des willen das im die
frawe grosse liebe truge do pey von erbern geschlechte was er sie
5 zû der götlichen ee nam vnd on alle feyer fest fasten vnd vigili pey
tage vnd nacht was ire hende vnd fûsse ertragen mochten ire fel-
der pauten vnd gen acker furen wenn in liebet Also in ein gût leben
pis in ir ende mit einander schuffen vmb dez willen ir mein aller
liebsten frawen ich mich bedüncken lasse. Do Barnaba mit Ambro-
10 *giolo* disputiret er die geysse aufwerckz rite.

Dise histori vnd netie fabel der züchtigen gesellschaft so vil zû lachen
gabe das der frawenn keine was oder ir kinpacken des enpfunden, Alle
mit ein einer stimme sprachen Dioneo die warheit gesaget het, wie Bar-
naba ein bestie gewesen was. Do nun die frawen ires lächen geschwigen
15 warenn, [88^d] Die künigin vernam das es spate waz vnd yederman sein
sagen verpracht het, vnd daz ende ires regiment komen waz vnd nach
der angefangen ordnung, daz krenzlein ab irem haupt nam das Ney-
phile aufsezet frölich zû ir sprach fraw Neyphile das regiment des
kleynen volckes sey eter, Neyphile der enpfangen ere in irem ange-
20 sichte röte enpfinge in masen als die schönen rosen in dem külen meyen
mit sampt dem aufgange der sonne thun; Doch do sich das züchtig
romore der erbern gesellschaft gestillet hette, vnd sy alle die netie kün-
gin geerte vnd irer herschaft begrüset hetten Des sie auch mer dann ir
gewonheit was frölich vnd wol ze müte warde; darumb ein grosses hercz
25 fienge, also siczent an hube vnd zû der gesellschaft sprach. Ir lieben
frawen vnd auch ir iunge man seytmal ich eter künigin von Philo-
mena erwelt pin, so ist mein meinung mich nicht von dem wege der
angefangenn materi ferre ze legen, vnd dem nach zekomen; Die vor
mein vnser herschaft geregirt haben der regiment mit gehorsam vnd
30 vntertenikeit wir gelobt haben vnd daz für hin will es got [89^a] thun
süllen, Dar vmbe mein sin vnd meinung ist mit wenig worten, auch euch
mein meinung zû wissen thûn. darnach wo ein sölches ewer rate vnd
wol gefallen ist, so mügen wir dem mit freuden nach komen Nun nach
dem als euch wo wissend ist, wie piß morgen der heylige freitag ist, vnd
35 zû hant dar nach der samstage volget, dise tag wir eren vnd loben sül-
len sunder den heiligen freitage; An dem vmb vnsers heiles willen got
vnser herre vnd schöpfer marter vnd tode an dem heiligen kreütze
enpfinge; Darvmb söllicher tage got zû eren vnd lobe aller eren wirdig

ist, vnd ich das wol gethun vnd erber schäcz Das wir vns auf den tage
 ee zů gůten gepeten got ze lobe vnd eren schicken stůllenn dann neűe
 fabeln ze sagen So ist an dem samstag gern der frawen gewonheit ire
 heűbter ze waschen gen pade zů gen sich sauber vnd reyne auf den hei-
 5 ligen sonntag ze machen von den puluer das sie die ganczen wochen zů
 in genomen haben Auch vil person sein die an dem heiligen samstage
 vnser lieben frawen zů lobe vnd eren fasten Dar nach den heiligen son-
 tage mit grossen eren vnd [89^b] reuerencz freyern alle tage in dem
 gocz dienste andechtig sein von allen iren pōsen wercken lassen vnd sich
 10 zů den gůten keren, dann derselbig tag got dem herren allein erdacht
 ist Darumb man in pillich eren vnd loben soll, Also auch denselben
 tage wer mein sin vnd meinung wir erten vnd deűcht mich vnser fabel
 sagenn wir feyroten vnd rűten; Mere deűchte mich vnd wer mein ge-
 fallen wer es anders das eűer dann in keinen wege ich von eűrem rate
 15 keren wille, sunder alzeit thun waz euch liebe ist, wir sein hie nun wol
 pey vier tagen gewesen vnd do mit wir nicht mit fremden gesten őrber-
 laden vnd bekűmert wűrden Dann yederman vnser hie sein, Nun kunt
 ist wir weren ein klein fűrpas gezogen, vnd wo hin daz han ich schön
 besunnen do wir den heiligen tage on műe vnd yemand anders irren
 20 vertreiben műgen; Darnach den montage mit lust vnd freűden sagen
 wűllen von dem gelűcke oder gelűckselikeyt, Als von den person die
 von ganzem herczen etwas begert habenn vnd ein sűlches durch ire
 subtile liste vnd grosse gescheidikeit zu wegen pracht haben oder
 [89^c] das verlorn wider funden haben, auf sűlche materi euch gar eben
 25 bedencket, Do mit vns freűde vnd do pei nucz bekome Doch alwegen
 die gepot vnd gesece Philostrato vor augen gehalten. Der kűnigin rate
 von der wűrdigen gesellschaft gelobt vnd also bestet warde dem also nach
 ze komen Darnach die kűnigin fűr sich schuffe komen iren hausmeister
 vnd őrderung gabe wo man daz nachtmal zů bereyten solt Zů hant auf
 30 stunde yederman ir vrlaub gabe ze thon yedes nach seinem gefallen
 Doch alle in den schönen garten spacziren gingen. Darnach zů hant
 das nachtmale enpfiegen als der kűnigin gefallen waz nach dem an-
 huben frűlichen zů tanczen vnd singen auch palde darnach der kűnigin
 vrlab vernomen zů pette schlaffen gingen mit dem des heiligen sontags
 35 warten waren.

Hie hat die ander tagreyse ein ende vnd

HEBT SICH AN DIE DRITTE

vnter dem gewalt vnd regiment der künigin Neyphile Do die edel
gesellschaft sagen wirt, von den die mit grosser begire vnd willen
was begert haben, vnnd ein sölches durch ire subtile liste gehabt
haben, oder das verlorn wi[89^d]der gewonnen vnd zu wegen
pracht haben.

Nv der morgenstern ist auf gedrunge die kleinen waltfögelein
mit frawen nachtigal frölich in der grünen awe sungen, Der sunnen-
schein vns den liechten tage pracht het, Des die künigin auf gestanden
was, vnd iren hausmeister gesant het zu zerichten do sie denselben
tage vertreiben wolten, wes in nottorft waz die künigin sich mit ir ge-
sellschaft auff hube zů gleicher weyse als do sich ein felt auff hebt vnd
mit senften driten mit iren frawen vnd hern, den wege gegen dem
nidergange der sunnen nam beleytet von dem süssen gesange der nach-
tigall, Durch ein enges grünes vngewonecz weglein, vol mit wolschme-
ckenden kreütern vnd mancherlei plümlein mit züchtigem schimpffen
lachen vnd scherzen ir zeit vertriben, Vnd nicht gar czwey tausent
schritte gegangen waren, vnd terczeit noch nicht vergangen waz. Do
sie kamen zů einem reichen schönen palast; auf einem kleinen püche-
lein gelegenn, Do die erwirdig gesellschaft ein ginge; [90^a] Do die
schönen säle vnd kamern köstlich gecziert waren; mit allem luste als
sölche gesellschaft wirdig was, vnd auch die zeit daz gabe daz sie mit
freüden lobten ein schönenn weyten gepflasterten hofe, In der mitte
ein kühlen frischen fliesseden prunnen vmb streüet mit wolschmeckenden
plümen. Desselben gleichen aller hofe der sale vnd alle kamern Do
sich die künigin nider seczet der schaffer des palast mit edelm wein vnd
confectione kam die wirdigen gesellschaft ze laben vnd ze frischen. Dar-
nach in einen schönen garten solacziren gingen, Des lüst vnd schöne
man nit durch loben mochte. Do die frawen vnd manne ir wunder
sachen von edelen fruchten. Als malarenczen malagran lymoni Cedroni
von pirn feygen vnd öppfel desselben auch von weinpern muscatello

galleti Cibibo von allem edelen vnd köstlichen geschmack der garten was. Nit anders dauchte dann als ein irdische paradise vol mit aller speczerey Auf allen seiten die mauren verdackte mit roten vnd weysen rosen vnd giosomino hütten darvnter die edelen frauen an dem schatten sassenn.

5 [90^b] Mitten in dem garten ein schöne grüne wisen mit kurzem grase. mitten in der wisen ein fliessendes küles prünlein mit etlichen fischen. darvmb etlichen iungen malarenczen paum winter vnd sumer grüne darauf die alten vnd neuen fruchte mit der plüde. Der fliessende prunne vmb gebenn mit einem schneweissen merbelsteinen meüerlein mit köst-

10 lichem pildewercke durchgraben, Vnd mitten in dem prunne ein köstlich figur auf einer merbelsteinen seülen gepildet von grossen künsten gemacht Die das wasser auf in die lüfte warffen; nicht mit kleinen freuden der zuseher wider abe in den prunnen fiele, Darnach auß dem prunne allen garten durchginge, vnd auß dem garten ab steyge in die

15 eben do czwu müle mit grossem nucze des hern des palast treyb zu sechen söliche schöne ordnung des garten, die edeln frawen vnd die iungen manne das nicht verloben mochten, vnd für ware sprachen vnd formiten; Wann man auf erdrich ein paradeyß machen solt, sie nicht erkennen möchten daz man wirdigers gemachen künde noch edelern

20 form gegeben möcht dann den dises garten [90^c] noch eins sy von erste nit war genomen hetten, in dem garten waren mer dann hundert wilder tiere von külen hasen vnd iunge rechlein in dem garten hin vnd here luffen ir speise ze suchen auch vil ander vnschedlicher tiere. Do von die wirdig gesellschaft besunder freude het vnd das über alle ge-

25 schene dinge lobten vnd preisten, vnd nach allen gesechen dingen anhuben frölich ze singen piß man die tische zü essen zü bereytet. Darnach zü hant als der kunigin gefallen waz zü tische gingen von ersten daz wasser zü den henden nomen Darnach die köstlichen speyse empfangen hetten, die seytenspile komen waren, von neuem anhuben ze

30 tanczenn singen vnd frölich ze sein. Nun die zeit komen was rüen zü gen. Die künigin yederman ein klein schlefflein ze tun vrlaub gabe, doch yederman daz sein gefallen thäte, also etliche rüen gingen Etliche in dem prete vnd schafczagel spilten Etliche pücher lasen, Etliche ander kurzweile pflagen. Darnach zü vntern auf gestanden ir gesichte vnd hende

35 mit dem külen wasser erfrischet, vnd nach ir gewonheit vnd der künigin gefallen in eine schöne grüne wisen nachet pey dem [90^d] palast an die küle zü einem frischen prünlein spacziren gingen. Do sich die künigin niderseczt vnd ir gesellschaft radescheybe vmb sich vnd auf die vor be-

dachten materi der künigin neüe fabeln vnd histori ze sagen, Vnd Philostrato vor lange das gepote der künigin empfangen het, sich nicht saumet also anhuben vnd sprache

Wie Masetto von Lampolechio sich zu einem stummen machet vnd in einem nunnenkloster zu einem gartner warde Dieselben nunn mit sampt der ebtissin er beschlieffe alle mit im die süßikeit der welte versuchten.

Ir allerliebsten frawen es sein vil manne vnd auch frawen die also törllich tun vnd in zů zů versten geben vnd velauben wenn einer iunck-
 10 frawen oder iunger frawen ein schwarcz tuch daz ir den weyl nent. auf das haubt gelegt werde vnd den schapler an den halse gehencket, das sie nicht mer frawen sein, noch fürpaß mere freiliches lustes darzů oder willen empfinden stülen. Zů [91^a] gleicher wise als ob sie von steine zu nunn gmacht weren wo dieselben person anders vernamen
 15 dann des sie glauben; zů hant in zorn fallen Als were wider die nature was gar grosses geschehen, vnd pey in selbes nicht bedencken wölen ein sölches ze tun sy gancz vrlaub vnd iren pauch des vol haben vnd thon mügen waz in liebet, vnd sich auch sölches nymer erfüllen mügen, noch mere sein die für ware glauben. Das, daz hauen arbeten vnd zů
 20 acker gen. Dem pauern oder arbeter sein begire der vnkeusche wege neme, got verliche in vernunft vnd sinne die sölches glauben Darum seytmal es vnser künigin gefallen ist vnd ich in irem gepote vernomen han der fürgelegten materi halben Ich willen han euch ein kleine histori zu sagen.

25 In vnser gegent was vnnd noch ist ein nunn oder frawen kloster gehalten von grossen wiriden vnd heilikeit des wir nit nennen, damit ir wirdikeit vnd güter leydet nitt mindert noch geswecht werde. Es ist nicht lange das nicht mere dann acht nunn mit sampt der abtessin darinn waren, Alle iunck vnd frische, Die hetten einen güten alten [91^b]
 30 man der in iren garten in dem kloster arbetet vnd pauet, Aber der güte man ires kleinen soldes nicht zükumen mochte mit des klostere schaffer sein rechnung machet sich bezalet vrlaub name vnd heym gen Lampolechio zoche von dann er was. Do er vor allen andern gar frentlichen von einem iungen pauern genant Masetto enpfanhen ward Der ein
 35 gerade iunge nach peürischer gewonheit schön von leybe vnd ein frisch knecht was. der in fraget wo er doch so lange gewesen were, Der alte

güte man der Nuto genant waz im antwort vnd saget wie er pey den
nunnan gedienet het vnd so lang pei in gewesen were Masetto in fürpaß
fraget mit we er den nunnen gedienet hette, Dem er antwort vnd sprach
Ich han in iren garten gearbet vnd zû zeiten mit czweyen eseln pin gen
5 holcz gefaren, vnd wasser zû irer nottorft in die kuchen geczogen auch
etlich ander dienste als in den klöstern gewonheit ist Aber sie gaben
mir als einen schnöden solde das ich mich nicht damit weder gehösen
noch beschûhen mocht. Vber das so sein sie alle iunck vnd haben den
teuffel in dem pauche. dann man mage in nicht [91^e] thon das in ge-
10 falle, wann ich in dem garten was vnd arbet sogen sie dar mit schelten
vnd fluchen meiner arbet Die ein sprach leg here die ander hin die
dritte nam mir die schaufel auß der hant vnd sprach, das stet nicht
wol, vnd also sie mich versäkten den ganz tage In sölcher masse daz
ich es nicht lenger vetragen möchte also von in geczogen pin mich pat
15 wol ir schaffer kem mir yemant ze handen der in füglich were, das
ich im den zû schicket Das versprache ich im; aber als war helff im
got als ich im ein andern schicke oder suche, Mansetto des alten Nuto
rede gar eben ware genomen het, vnd die czen zû den nunnen im ylgern
wurden In seinem gemüte gedachte sich zû versuchen ob er zû den
20 iungen nunnen komen möchte, vnd als er durch Nutu rede vername im
villeicht des sein wille vnd begire waz werden möcht; Aber wol ge-
dacht thät er Nutu sein meinung zu wissen er in villeicht irren möhte
vnd im sein sin nicht für sich ginge, vnd zu Nutu sprach wie wol hastu
gethon daz du wider her zû vns komen pist, dann einem manne mitt
25 frawen ze sten er sölt lieber pey teuffel sein, dann zu siben ma[91^d]len
wissen sie die sechsse nicht was sie selbes wöllen. In dem von iren
reden liessen vnd von einander schieden. Masetto nicht schlieffe anhub
ze bedencken wes sie sich halten solt, damit er zu den iungen nunnen
in das kloster keme wol bedacht er alle arbet wol künde die dann Nutu
30 gethon hett, Nur sorg hat er nicht auf genomen würde vmb seiner iugent
willen. Doch sich neiter liste bedachte vnd zu allen sachen sin ze finden
mit im selbes bedencken warde, wie daz kloster ferre von dann were;
vnd nyemant wer der in dem kloster noch in derselben gegent sein
kuntschafft hette, Darumb sein selbes rate folget vnd sich zû einem
35 stumen machet vnd wol gedacht thet er das on czweyfel im sein sin als
dann geschahe fürsich ginge, vnd von den nunnen würde aufgenommen,
Söllich fürnemung mit im elbes bestätt vnnd nyemant icht gesaget wo hin
in armes mannes form sich auf den wege zû dem nunnenkloster so er

erste mochte füget vnd darein ginge vnd zů seinem gelücke der nunnan
schaffer in dem hofe fand an den er durch deütung daz almusen begeret,
vnd ob er wölte daz er im das holcz spielt [92^a] vnd zu hacket. Der
schaffer gabe im zů essen, darnach etlich grosse plöcher ze spalten, die
5 Nuto nicht mocht ze hauben, Also Masetto der ein iung starck man waz
in wenig streichen die plöcher zů spalten het Nun dem schaffer dem not
tet zu holze zegen Maset mit im furte vnd machte holcz hauen Darnach
mit deüten in schuffe die esel mit holcz ze laden vnd zů hause zefarn;
daz Masetto als der sölches meister was palde thet vnd außricht Der
10 schaffer het grossez gefallen an dem stummen, In also etlichen tage pey
im hielte mancherley arbet im fůrgabe die er alle ornlich außricht. Eines
tages sich füget daz in die ebtisin des klostere gesehen het, den schaffer
fraget wer er were, Er sprach frawe er ist ein arm man kan nicht reden
vnd ein stumme vnd vngehörent der in disen tagen her ein vmb das al-
15 musen kam, den han ich sider her zů holze vnd in andern vnsern ge-
scheften geprauchet? künde er den garten arbeiten vnd wölt pey vns be-
leiben ich hoffet von im vil guter dienst ze haben, dann er ist iunck vnd
starcke vnd wer vns gar fůglich man möcht in prauchen zů aller not-
torfft So wer man auch on sorge [92^b] der iungen eüern frawen schimpfes
20 vnd scherzens halben dann er kan nicht reden noch gehört Die abtesin
sprach für ware du sagest wol frage in ob er wölt den garten arbeiten
vnd pey vns beleyben, vnd tů fleiß ob du in pey vns möchtest behalten
gib im ein pare schuhe vnd. ein alt par hosen thue im gütlich damit er
dester lieber pey vns beleybe. der schaffer sprach er mit im sein ver-
25 mügen tun wölt. Masetto nicht ferre davon was do der schaffer mit der
abtesin sein gesprech het peyder rede vnd meinung gar wol vernomen
hett dez gleichen tet den hofe zekeren vnd sich endlich machet, froe
vnd wol ze müte was im wol gedacht on czweifel im würde gelingen;
frölichen in seinem herzen sprach; nempt ir mich zů euch hinein ich
30 sol euch den garten also arbeiten, daz er villeicht alle seine tage in söl-
cher masse nye gearbet warde. Der schaffer wol sache das er aller pauern
arbet wol fertig was, Durch deüten so er peste mocht in fraget ob er pey
in sten vnd beleiben wölte. Masetto der vmb anders nicht dar komen
waz mit deüten im antwort er sein gefallen gern thon wölle. Zů hant der
35 schaffer in füret den [92^c] garten ze sechen vnd im weyset was sein
arbet sein sölte. vnd in andern geschefte dez klostere auß ginge in alleine
liesse. Masetto den garten sauber arbet vnd örnlich nach aller nottorfft
züricht paß dann kein gartner nye gethon hett Die iungen nunnan ze

- zeiten zu im in den garten kamen mit im begunden ze scherczen vnd ir
abeise mit im ze treiben als man dann gern mit den stummen thut,
sunder gar mit schampfern vnzüchtigen worten in vmbtriben nicht mein-
ten das sie von im vernomen wern, vnnd auch die abtesin meinet gleich
5 als er on red were er auch on ein schwancze vnd czagel were, darvmb
ir nicht acht waz, waz sy mit im redet. Nun eines tages er gar sere
gearbet hette vnd sich darnach ze rüen gelegett hett Zwu von den iungen
nunen in den garten kamen nahent da pey do er lage vnd rüet, er die
nunen auch ersehen het, vnd des gleichen thet als ob er schlieffe;
10 Die czwu nunen in gar eben beschauten Doch ir eine frecher vnd be-
herczenter was dann die ander. Dieselbig anhub zu der andern sprache;
Wenn ich gelaubet daz du verschwigen werest so wölt ich dir was sagen
vnd dir [92^d] mein meinung ze wissen tun Ich han zu mermalen sin gehabt
das dir villeicht nit minder lieben würde dann mir Die ander ir ant-
15 wurt; sage frölich piß on alle sorg ich sol es nyemant sagen. Zu hant
die erste wider sprach ich weiß nicht ob du als ich gemerckt hast wie
wir so strenge vnd herte gehalten sein, vnd zu vns herein kein man mag
dann alleine vnser schaffer der ein alte man ist vnd diser stumme Nun
han ich ofte vernomen von den weltlichen frawenn; die zů vns herein
20 komen daz alle süssikeit der welt nicht ze scheczen sey gegen der süssen
freude die der mane vnd die frawe zů pette mit einander begen. Darumb
ich mir zů mermalen han fürgenomen seyt mal ich anders mans nit ge-
haben mage mich mit disem stummen ze versuchen ob im also sey als
ich vernomen han dann er mich darzů genuge gůt düncket, vnd ob er
25 es yemant sagen wölte so kan er es nicht getun, du sichest wol er ist
ein iunger aufgeschoßner lappe gewachsen vor den iaren vnnd sinnen;
darumb ich dein meinung auch gern vernemen wölte wez dich gedeucht;
Awe sprach die ander? was sagestu weist du nicht daz wir [93^a] got
vnser reine keuscheit versprochen haben O sprach die erste wie vil man
30 im teglich verspricht vnd im der keines helt Hab wir im vil versprochen
so such er die im halten. die ander wider sprache, vnd ob wir schwanger
würden wie würde es vns ergen. Die erste sprach du hast Sorge e sich
der schade begibt vnd komen ist, wann sich ein sölches füget. Darnach
man bedencken sol wes sich ze halten vnd zů thun sey Ich sage dir es
35 sein hundert gute wege vnd syn damit man bedecken mage, nur selbes
das nyemant sagen Do die ander die da grosser begire sölche süssikeit
zu versuchen dann die erste gewan was tieres doch der man gesein
möchte; Nun wol an in dem namen gotz sprache sie? wes peginne wir

wie tû wir im. Die erste sprache, du sichest wol es ist iczund nonezeit vnd vnser schwester stillen alle schleffen sein. doch sechen wir ob yemant in dem garten sey; ist dann nyemant hyn; waz habe wir anders zû thon dann Masetto pey der hant ze nemen vnd in in die hütten fûrn
5 darein er den regen fleucht, do thue die eine mit im iren willen vnd die hute thue. Er ist also eyfeltig daz er sich schick[93^b]en wirt nach vnserm gefallen Masetto der do wachet vnd des geleichenn thet als-ob er schlieffe alle ire rede vnd gesprech vernomen het sich schicket pey der willen ze thon; In hundert iar dauchte nicht anders warten waz dann
10 wann er in die hütten gefûrt wurde aller ding bereit was, die frawen sich vmb sachen, wol vernamen nyemant in dem garten was der sie gesehen mocht dann sie alleine mit Masetto. Zû hant die da der materi vrsache vnd anfangе gewesen was zu Masetto ginge in aufwecket. Der sich nicht saumet auf seine fûsse sprange, die iunge mit einem lieplichen
15 deûten oder wincken in pey der hende nam vnd er mit einem stillen eyfeltigem lachenn in die hütten gefûrt warde. Do sich Masetto nicht sere piten noch nôten liesse, der nunnen willen mit irem grossen gefallen verpracht, vnd sie als ein getrewe die irem willen zû diser stunde hat ein gut genügen gethon. Der andern iren schwester auch iren teyle
20 wider farn liesse. Masetto erczeit sich gen in gar eyfeltige, Doch zû einer stunde peyder willen ein genügen thet, vnd wol ze müte von im schieden doch mer dann einfart versuch[93^c]te hetten wie wol Masetto reiten kûnde. Darnach gar oft zû einander sprachen, es sicher war were In der welt nit süssers were vnd daz vil mere dann sie von den weltlichen frawen
25 verstanden hetten. darnach in fûglich zeit namen mit dem stummen ze schimpfen, Doch nicht lange verginge sie mit dem stummen in freuden waren. Sie von einer irer schwester von einem fenster gesehen warn, dieselbig es andern czweyen weiset, vnd mit einander eins wurden peide sûnderin gen der abtesin zû verklagen. Doch sich palde anders berieten
30 vnd sich mit den ersten czweyen eintenn, vnd sie Masetto süssikeit auch theilhaftig machten. Also die drey nunnen in kleiner zeit mit den czweyen gesellschaft machten, vnd zû letste die abtesin die eins sôlchen nitt war genomen het. Eines tags spacziren in den gartenn alleine gangen was, vnd daz zû der czeit so die hicze an dem grôsten ist, vnd
35 Masetto der von kleiner arbet vnd dem vil reiten das er die vergangen nacht getun het also lang er waz gestracket vnter einem mandelpaum an den schatten vnd rûcke ligen fande vnd schlaffen vnd der wintte hette im das [93^d] hemde vorn über sich auf den pauch geworffen; vnd

daz dinge das die züchtigen frawen die schame nennen vnbedackt be-
 liben was; Das die abtesin ersehen het vnd sein gar eben war name
 sich alleine sache, Auch sie in sölchen lüste vnd begire als ire nunnen
 gethon hetten fiele, vnd Masetto auf wackte, vnd in mit ir in ir kamern
 5 füret. Do sy in etlichen tage mit grossem murmeln der andern nunnen
 hielte; darumb das der gartner den gartenn so lang öde liesse vnd nitt
 arbet. aber die abtesin in so lang hielte das sie gar eben versucht vnd
 wider versuchet das das sie dann vor alwege gescholten hette; Doch
 nach etlichem tage in wider in sein gemach schicket, vnd in hin für
 10 mere dann die andern prauchet, vnd sich der welt süssikeit teilhaftig
 machet; Dez der gute Masetto nit mere zûkomen mochte. Zu den min-
 sten zû neûn malen die nacht außgenommen den tage über lant reiten
 müste, dez der gute knecht ze thion vngewont was. Darumb im ge-
 dencken warde; stünd er lenger ein stumme im do von schaden zû sten
 15 möcht, vnd eines er pey der abtesin was im selbes die zungen löset vnd
 sein rede wider an [94^a] sich name vnd sprach frawe ich han oft ver-
 nomenn wie ein hanne neun henne ein genügen sey vnd zechen manne
 einer frawen nicht mügen ein genügen thon, vnd ich ir neune versehen
 vnd dienen muß Sölches ich nitmer vermag vnd das ich piß her getun
 20 hab hat mich zû söllichem pracht, daz ich weder vil noch wenig mer
 mage. Darvmb ir mich nudalest wert.gen lassen oder ander sin finden
 domit ich leben müge. Do frawe abtesin Masetto reden höret, den sie
 für einen stummen hielte alle erschracke vnd sprach; Awe was ist daz;
 nun gelaubet ich du merest ein stumme. Frawe sprach Masetto Ich pin
 25 gar wol ein stumme gewesen aber nicht von natur, sunder mir ein
 grosse kranchheit die rede nam, die mir in diser vergangen nacht got
 sey lobe ist wider komen Das die frawe alles gelaubet, vnd in fürpas
 fraget? was das bedeutet das er neûnen gedienet hette. Masetto ir alle
 sache ze wissen tet was ir nunnen teglich mit im begunnen hetten do
 30 pey sy wol vernam sie keine nunne nicht het das die nicht weißlicher
 gethon het dann sie, doch Masetto von ir nicht lassen wolt also lange
 piß das sie mit iren [94^b] frawen rate het; domit ir kloster vnd ir guter
 ley met nitt geschwecht würde vnd etlichen tage darvor in ir alter schaf-
 fer tode was vnd sich alle der verlossen sache Masetto vnd ir aller hal-
 35 ben mit einander vereinten, vnd mit Masetto grosse freude hetten, vnd
 dem volcke der gegent zu versten gaben wie durch ir diemütig gepete
 zu got vnd zû dem heiligen in des ern das kloster geweicht was. Ma-
 setto der lange zeyt ein stumme gewesen was sein rede im wer wider

komen; Zu hant in zû irem schaffer bestäten vnd in sölcher masse sein müe vnd reiten vnder sich teylten, daz er sein hinfüre zû guter masse wol zû kame, vnd wie wol er vil iunger nünnelein machet; doch iren handel in solcher maß fürten, das sie nye in keinerley argem verdacht
 5 würden Also verschwigen beleybe die weyle dieselbig abtesin pey leben was, Doch nicht lang darnach mit tode ab ginge vnd starbe vnd Masetto nun dalest abgerittenn het, reiche widerumb heym kam ein alter reicher vater seiner kinde im on alle müe erzogen, der sein müe vnd arbet wol ane gelegt het, mit einer ackse über die ackseln als er in daz klo-
 10 [94^d]ster komen was widerumb heyme zoche vnd sprach, got allen den sölchen lon gebe die im also dienen vnd die hörner auf seczen.

Wie dem künige Gulfrede von einem seinem diener Die künigin beschlaffenn ward Die do meinete es der künige were, vnd der künige durch der frawen rede ein sölches sölches vernam, doch
 5 sich von ir nicht merken liesse, vnd damit er denselben erkennen möchte, im ein teyle des hares abschneide vnd der knechte allen andern knechten daz ir abschneide also allem seinem bereitem vnglücke entginge

Philostrato sein neüe histori zu ende pracht hat; Darinne etliche
 20 von den frawen in iren angesichten röte empfangen hetten; Etliche sein mit freuden gar wol gelacht hettenn In dem der künigin gefallen was daz frawe Pampine mit einer neüen histori der fürgelegten materi nachuolget. die mit frölichem amplicke, lachedem munde anhub vnd sprach. Es sein etlich mit in selbes also vnuernünfftig vnd wenig discret suchenn
 25 gen zu [94^d] wissen das, das für sie nicht ist zewissen. Dann zû zeiten on geferde ding begeben; die ze suchen dem mann ee schand vnd schaden zû fügen, dann ere oder fromen wo sy durch ander leüte ir schande meinen ze mindern, sie die meren; vnd daz ein sölches ware sey ist mein sin euch ze sagen von einem der nicht von minderm gemüte vnd
 30 herczen gewesen ist als Masetto von Lampolechio waz Es was ein künige in Lamparten genant Gulfrede des fordern iren stant vnnd regiment in der stat Pauia gefürt hetten; Der het eines andern küniges tochter zû einem weybe, ein schönē wolgeczirte frawe züchtig vnd vol aller tugent Aber in liebhabern vnglückselig. Nun durch synne vnd
 35 weistum der künige sein reiche in gutem stant vnd fride hielte; Sich begabe das des küniges fußknecht einer gar von schlechter gepurt vnd nidern

stam geporn, doch nur zů redlich vnd zů beherczent zu dem das sein
 geschefte was als wo die künigin hin reite mit ir ze fusse zů lauffen; Er
 was von leybe vnd gestalt ein auß der massen hübscher gerader iunger
 dem künige geleiche on masse in aller gera[95^a]dikeit. Der in die
 5 frawen die künigin von herczen die fackeln der liebe enpfinge; Doch
 nicht so vnweyse was das er nicht erkannte wiewol er vnedel geporen
 was, Daz sein liebhaben zů einer edeln künigin vmzimlich vnd wider
 alle recht was, Doch als ein weyser sein grosse lieb nyemant offnet noch
 sich gen der künigin mercken liesse; vnd wie wol er seines liebe haben
 10 on alle hoffnung was fruchte ze enpfahen, doch sölcher hoher liebe er
 sich mit im selbes freuet vnd glorirte, daz er seine sinne vnd gemüte zu
 so hoher edeln wirdigen frawen gekert hat wiewol er ires willen on
 hoffnung waz, doch stäcz in sölchem fetter vnd liebe prante, Darumb er
 der frawen mit grossem fleisse stäcz mere dann die andern sein gesellen
 15 verpunden was ze dienen, vnd in allem dem daz in dauchte der künigin
 gefallen were er schneller vnd behender was das ze thon dann kein an-
 der Darumb im die künigin auch etwas geneygter waz dann den andern.
 Eins tages die künigin spacziren reyten wolt nach irem fußknechte der
 nit gegenwütig waz in irem auff siczen mere vmb sache vnd fra[95^b]get
 20 dann nach yemant anders. vnd das vmb seiner behenden dienste willen
 in lieber mit ir sache dann keinen von den andern fusseknechten der sy
 vil manchen hette; Das im der gute geselle in besunder genade name
 vnd nymmer von der frauen stegraffe kame, vnd sich des über alle andre
 gemeyt daucht wann er nur der künigin gewant an rüren möchte. Aber
 25 als wir stäcz sechen vnd vernemen ye kleiner die hoffnung sölches liebe-
 habenn ist ye grösser die liebe wirt, also geschahe auch dem guten ge-
 sellen vnd zů sölchem kam Das es im ze vertragen gar ze schwere
 warde vnd seiner überflüssigen liebe nicht pusse thon mochte. Darumb
 im für name er seinem willen ein genügen thon wölt, oder vmb der kü-
 30 nigin willen sterben wölte, die im über alle frawen der welte liebet, vnd
 seines gelückes ein teyle oder gar versuchen wölte; vnd der künigin
 weder durch prieffe noch selbes sein liebe ir offen wolte Dann er wol
 weste daz sein schreiben oder mit ir ze reden vmbsunst vnd verlorn
 were; Neues rates mit im selbes pflage im gedacht vnd für name sein
 35 sinne vnd liste zeprauchten wöl[95^c]te mit der künigin seinen willen ze
 verpringen; Doch ander sinn noch wege nicht gehaben möchte das ze
 thon; dann des nachtes vnerkante in dez küniges form zů ir zegen, Im
 kunt was das der künig nicht stäcz pey ir lage. Sich eines nachtes in

einen grossen sale verparge der czwischen des küniges vnd der künigin kamern was; zů erlernen wie vnd wenne im in welichem form. Der künig zů der künigin ginge vnd vnter andern nachten er eins nachtes den künige sache auß seiner kamern in einem langen mantel gen; in der
 5 einen hant ein prinent kerczen vnd in der andern ein steblein truge, Also zů der künigin kamern ginge vnd ein fart oder czwir mit dem steblein an die türe klopfet. Die im zů hant geoffent warde, vnnnd die kerczen aus der hant genomen; Des der gůte geselle alles war nam; dez selben gleichen nit lange verginge er in widerumb sache komen; Zů hart ge-
 10 dachte er auch also thon wólte, vnd vmb ein mantel gedachte des küniges mantel geleiche vnd ein kerczen vnd steblein vnd vor gepade ginge sich reine vnd sauber machet da mit kein pö[95^d]ser geschmack von im, der künigin zů ginge; Da durch er vnd seine liebste von ir möchten erkant werden Darnach eines nachtes do er bereit waz Sich aber in dem
 5 sale verparge, vnd do in zeit daucht seiner begire ein genügen ze tun oder sterben, seinen stahel vnd czunter zů handen nam, das fetter schluge sein kerczen anzündet, das steblein in sein hante nam vnd sich in den langen mantel wickelt nach dez küniges gewonheit an die türe der künigin kamern zů czweyen malen mit dem steblein anklopfet, die im schnel von einer kamrerin alle voller schlaffes auf gethon warde, vnd im die kerczen aus der hant genomen vnd verporgen vnd er on alle gespreche den mantel hinder dem fůrhangen dez pettes von im leget vnd sich in stille der künigin an ir seyten leget. Die schlaffen fande mit grosser begire in sein arm schlosse; Zů gleicher weiß als ob er betrübet
 15 were vngerett nach des küniges gewonheit wann er betrübet oder in czorn was; Er weder reden hören noch yemant antwort geben wolt. Also zu mer malen die künigin leyplichen erkant. vnd wie wol im das abscheyden [96^a] schwere was; doch sein must forcht vnd sorge halben; Do mit im nicht sein grosse enpfangne freůde in trůbsal vnd traurikeit
 20 gekert wůrde, aufstunde vnd sich wider in seinen langen mantel wickelt Die kerczen in sein hant nam vngeret wege ginge vnd so er erste mocht sich zů pette fűget, do er noch villeichte hin kaum komen was, das der künige auf gestandenn was vnd an der künigin kamern anklopfet, das die künigin sere fremde nam zů ir ze pette ginge sie freunt-
 25 lichen grűsset, Die frawe vmb seiner freuntlickeit willen hercze enpfinge vnd sprach? Awe mein lieber herre was pedeůt daz in diser nacht, nun seyt ir erste von mir wege gegangen vnd mer dann eűer gewonheit ist freůde von mir genomen habt, vnd so palde wider komet; secht was ir

thut schonet eüers leibes. Do der künig der frawen wort vernam zû
hant im gedachte die künigin durch gleichnuß vnd gewonheit seiner
person were betrogen worden, doch als ein weyße man gedachte; Seyt-
mal die künigin in sölcher meinung was dann er wers gewesen, Er ir
5 [96^b] auch nicht betrüben wolte daz ers nicht gewesen were; Nit thet
als mancher gethon het; der gesprochen het ich pin nicht mer hie ge-
wesen? wer ist der gewesen der da gewesen ist wie das köme was daz be-
deüte das ander manne zû ir kömen; do von sich vil arges het fügen mügen
vnd besunder die frawen on schulde der bekümern mügen; Darumb von
10 sölcher materi ze reden er manch male vernomen het, das von dem
schweigen im kein schande bekommen möchte; aber wol von dem reden
sölcher materi halben nicht gucz komen mage. Zu der frawenn sprach?
frawe dünck ich euch nicht ein man sein der ein mal pey euch hab
mügen gewesen sein vnd zû euch widerumbe komen müge als oft es
15 mein gefallen ist. Ja ir lieber herre sprach die frawe, doch alwegen ich
euch gedencke euers leibes ze schonen. Der künig sprach frawe ich wil
folgenn eüerm rate vnd euch nit mere müen. Mit schwerem gemüte von
der frawen auf stunde vmb des willen daz im geschehen was sein mantel
name vnnd auch nicht in kleinem czorn auß der kamern ginge [96^c] vnd
20 im gedacht er den finden wölte der im den schaden getun vnd die
schmacheit peweyset het; wol vernam es seiner diener einer vonn dem
hause welichers were muste gewesen sein, vnd auß dem hause nicht
möchte, vnd ein kleins liechtlein mit der latern nam vnd ginge in ein
grosse kamern die ob dem stalle waz; darinne der merteyle seiner die-
25 ner lagen in vil manchen petten Er meint vnd im gedachte das dem
der den schaden gethon vnd die frawen beschlaffen vnd betrogen het
sein pulse vnd schlagen des herczenn vmb der begangen arbeit vnd müe
willen im noch nicht gelegen were, die im on czweifel czeychen geben
würden des das da suchen ging, vnd in stille von einem ende der
30 kamern piß zû dem andern ginge, iglichem besunder sein hant auf das
hercze leget ob er geprüffen möchte welichem sein hercz klopfet oder
schlüge. Die er alle schlaffent fandte außgenommen den der die künigin be-
schlaffen het vnd den künig komen sache wol gedachte waz er suchen
ginge; In grosse sorge vnd erschrecken fiele vnd im gedachte ist sache das
35 im das, das ich begangenn han [96^d] wissent ist er mich on vnterlaß töten
wirt vil mancherlei gedancken im einfielen; doch eines sich tröstet er
pey dem künige kein waffen sach vnd des gleichen thet er auch als
die andern schlieffe vnd mercken wolte was doch der künig thon wölte.

Nun der künig vil manchen besucht hett, do pey er icht geurteylen mochte seiner sache halben vnd do er zů dem rechtschuldigen kam dem nitt alleine sein hercze schluge, sunder aller mit einander czittert. Der künig in im selbes sprache du pist der rechte vnd der den ich
5 suche Aber was sein meinung zů thon was er nicht wolt das es yemant west vnd im nit anders thet dann mit einer schäre die er mit im getragen het im ein kleines seines bars abschneid do pey er in des morgens kennen möchte; das gethon von dan schiede wider in sein gemache schlaffen ginge. Der gůte geselle der nicht vngescheide vnd listig was palde des
10 küniges sin vernomen het das er in alleine gezeichnet het. palde auf stund eine schäre zehanden nam vnd allen den die in der kamern lagen Er thet als der künige im vor auch gethon hette, [97^a] Sie alle ob dem einen oren beschare, vnd wider in sein pette schlaffen ginge; Des morgens der künige auf stunde vnd ee die porten geöffent worden
15 er allem seinem haußgesinde für sich ruffet; Die alle mit vnbedacktem haubte für in kamen, er begonde ze suchen vnd schauen den beschoren zu erkennen Do waren seine diener alle als er dem einen gethon het beschoren vnd daz hare allen auf einen sin abe geschnitten; des er sich wunder name vnd zů im selbes sprach Den ich suchen ge von nider
20 gepurt ist. Aber on czweyfel sich erzeiget von hohen sinnen vnd wol erkante. Das er da suchet on grosses romore vnd gescherey nicht gehabt möchte, sich schicket vnd bereitet nicht vmb kleiner ruchung willen im grosse schande zůziehen wölte, sunder mit einem czüchtigen wort in straffet vnd zů versten gabe wie er ein sölche sache gemercket
25 het vnd sich zů allen seinen dienern keret vnd sprach sey wer er wölle der es gewesen ist; der thue es nymmer das rate ich im in treten, nun get mit got man het manchen vnweisen man funden er seine knecht vnglücke an geleget het piß er den [97^b] rechtschuldigen funden hett Wo der künig ein sölches gethon het er das verporgen zu licht pracht het
30 vnd geoffen hette das, daz ein iglicher weyser suchen sol zů verpergen. Wo er sich dann gerochen het so het sich doch sein schande ee gemeret dann gemindert vnd die frawen an irer eren geschwecht. Do die diener ein sölches von dem künige vernamen sy gar fremde daucht mit einander grosse rede vnd gespreche hetten was der künig mit sölher rede
35 meint sie nicht vernemen mochten dann der alleine den es antraffe. Der als ein weyser thet vnd sich hinfür die weyle er lebet weder für sich noch yemant anders sölcher sache halben dem glücke mere vntertenig machet noch also mere verseczen wolte.

[97^c] Vnter geleichnûß einer lautern peichte vnd reinen gewissen Ein hochgelerter weiser man von einer frawen die einen iungen man liebe het betrogen warde. doch on sein wissen demselben iungenn man durch in der frawenn liebe zu wissen gethon
 5 warde vnd sy mit im iren willen verpracht.

Frawe Pampinea ir histori vnd nette fabel gendet het vnd gewisen was vnd die frawen das edel vnd hohes gemüte des guten gesellen der künigin fußknecht sere gelobet hetten; Desselben gleichen des küniges weißheit gepreist hetten. In dem sich die künigin gen
 10 frawen Philomena keret Ir gepote der angefangen materi sie nachvolget Die mit zuchte anhuben also sprach Lieben frawen mein sin ist euch zu sagen vnd für ware also geschehen vnd ergangen hat; Wie ein schöne fraw ein weisen hochgelerter meister der heiligen geschrift ein münche parfüßer orden mit listikeit überwant vnd betroge. An dem ein igli-
 15 cher leye sol gefallen haben; dann sie alweg mere meynen ze wissen vnd pesser sein dann ander lette; in zu versten geben mer ze künen, vnd ferrer do von sein dann [97^d] die leyen. Zû gleicher weyse als die verzagten thon vonn kleinem gemüte in keinerley sich behelffen mügen als ander manne. Darumb sie fichen an die hende do sie zu
 20 essen finden als mit vrlaube der schwein wonheit ist. Darumb ir lieben frawen mercket was ich euch sage, nicht alleine vnser ordnung nach ze volgen, sunder euch lere vnd wiczung seye. Den die geistlichen den wir gar ze vil glauben vnd getrauen. auch zu zeiten nicht alleine von den mannen, sunder von vns frawen mügen geleicht vnd betrogen werden,
 25 dann vnser gemüte stäte voller ist betrugung dann liebe oder treue Es ist nicht lange zeit vergangen das ein gentile frawe geczirt mit schöne vnd zucht von hohem gemüte mit subtiler fürsichtikeit als ein frawe von natur ye begabet warde; der namen wir ze nennen sten lassen dann sie noch pey leben ist vnd ir villeicht schwerung precht wie wol es nitt
 30 anders dann ze lachen were. Die selbig fraw was von gûtem edeln geschlechte geporen, vnd einem schlechten hantwerckman vnd tucher zû einem weibe gebenn warde. das ir so sere verschmahet, daz sy ein sölches auß irem herczen [98^a] nye geschlahen möchte vnd iren sinne meint kein mann von sölcher nider gepurt wie reiche er were weder ir noch
 35 ander edeln frawenn wirdig were also sie auch sy iren man achtet vnd sy zû keinerley gût daucht, dann die wolle ze scheiden vnd den zedel ze weben an ze richten vnd mit den spinnerin der gespunst halben zû

disputiren; Darumb ir für naz in keinen wege von im wolle gehalset
 sein, Dann alleine wann sie im des nicht verlaugen möchte, sunder sy
 ir einen suchen wölte der ir gefiele vnd zů sölchem handel ir wirdiger
 dann ir tucher were vnd liebe gewan zů einem erbern iungen man doch
 5 pey seinem pesten alter, vnd an welichen tage sie in nicht sache die
 zükünftigen nacht sy weder geruen noch geschlaffen mocht Aber dem
 erben man der frawen liebe zů im, Im vnwissent was darvmb er ir kein
 acht het; Aber die frawe die weise vnd klug was in iren sachen nye-
 mant wolt getrauen noch sich merken lassenn weder durch prieffe noch
 10 ander potschaft, Im nicht verkünden wolte alwegen sorge hette des, daz
 sich gern in sölchen sachen begibt; Nun hat sy wargenomen das er gar
 [98^b] vil sein gespreche het mit einem münch in sant Francischen kirchen
 vnd wie wol der münch ein grober schlechter man dauchte, doch ein
 heiliges gütcs leben füret von yederman ein künstreich man gehalten
 15 was, darumb ir die frawe gedachte; er ein güt mittel czwischen ir vnd
 dem erbern manne irem püelen sein sölt, sich eben pedacht wez sy sich
 in allen disen sachen halten wölt, vnd ir czil vnd zeit nam in die kirchen
 kam do der güte münch sein wonung het vnd ir schaffte zů ir ze rüffen
 zu im sprache? Wer es sein gefallen sie im gern wölt peichten. Do sie
 20 der münch sache nicht anders gelaubet dann sie ein grosse edele frawe
 wer vnd sie williglichen verhöret vnd nach aller irer peichte sy zů im
 sprach Vater ich kom zů euch vmb hilf vnd rate nicht alleine der sele,
 sunder auch des leybes. Ich weiß wol das euch mein geschlechte vnd
 auch mein elich man kunt ist der mich liebet als sein leben noch ich
 25 keinerley an in begeren möcht das er mir das als ein reiche mann nicht
 widerfarn liesse vnd meinem willen zů hant nicht bereyt were, Darvmb
 ich in liebe habe über alle dinge der welt Nun wie möchte ich ymmer
 [98^c] vertragen in keinerlei vnern wider in ze thon; ich will gesweigen
 nur zů gedencken. wo ich aber ein sölches thet, frawen pilde nye feuers
 30 wirdiger warde dann ich were. Nun ist einer sicher ich weyß nicht wer
 er ist wol mich erber düncket pin ich anders nicht betrogenn so wonet er
 vil mit etlich ein hübsch man gerade von leibe, der villeicht nicht ge-
 dencket daz ich in sölcher meinung sey als ich pin vnd ir vernomen habt.
 Ich mag weder on fenster vnder tůra noch über gassen gen, daz er sich
 35 mir zů hant nicht vnder augen stelle vnd mir den wege verdrätte vnd mich
 nimpt gar fremde das er iczund nit hie ist das ist mein leyt vnd klage,
 Dann in sölchen sachen erber frawen offte vnd dicke in übel verdacht
 werden, vnd vil dicke mir fürgenomen het im ein sölches durch meine

prüder wölt ze wissen tun vnd sagen lassen das er mich sölches über-
hübe; so han ich widervmb pedacht wie die manne gächzornig sein,
sunder in sölcher potschaft werben, vnd sorge hat pöse wort vnd ant-
wort peydenhalben wachsen würden, vnd von sölchen Worten man zû
5 pösen werckenn komen möcht, vnd damit mi[98^d]nder sorge vnd angste
sich begeben pin ich zû euch komen. vnd euch vor andern han mein not
vnd betrübung ze wissen thon wöllen. Dann mich ye düncket er euer
vnnd ir sein grosser freunt vnd günner seit Auch mich gedüncken lasse
ein sölches es eüch zû ste ze thon nicht alleine den gûten freunden ein
10 sölches vndersagen, sunder auch die fremden zû rede seczen vnd sulcher
sache halben straffen. Darumb ich euch vmb gotz willen pite ir mich
euch lasset befolhen sein vnd im vntersaget vnd pit daz er mich vnuer-
worren lasse Dann frawen on mich genug sein, die villeicht mer dann
ich zû sölchem luste geschicket sein zû puelen vnd an gesechen sein von
15 im; das mir ein schwere müe vnd verdrissung ist; als die do in irem
gemüte in keinen wege zû sölchen sachen geschicket ist, vnd also geret
ir haubt neyget ze weynen. Der gute vnnd heilige man durch ir rede
vernarn das sy den meinnet der sein gröster freunt was. Anhube die frawen
zû trösten lobet vnd stercket ir gûte meinung vnd fürsaczung vnd für
20 ware alles gelaubet daz sy im gesaget het; Ir versprache vnd verbiess
er wölte sich ir zû liebe in disen sachen müen; daz sy [99^a] von dem
der ir sölche vnvue auf thet hin für solt vertragen sein Nun er die fra-
wen reiche erkant ir sere lobet das almusen vnd das werck der parm-
herczikeit auch in seiner armüt sich ir befalhe. Zû dem die frawe sprach,
25 Herre vnd vater ich pit euch durch gotz willen ob sach were daz er euch
eins sölchen laugent so saget im frölich das ich die sey die euch daz ge-
saget vnd geklaget habe, Also die gût liebhaberin ire peicht volpracht
vnd puse enpfinge, do pey auch wol pedacht was sie der münch des al-
musen halben getröst het heimlich im die hant vol pfenning stiesse, vnd
30 in pate das er ir etliche seele messe spreche, von seinen fussen auf
stunde zû hause gienge. Nicht lang darnach verginge, Der erber man
nach seiner gewonheit zû seinem heiligen münch kam, vnd nach man-
cherley rede vnd gesprache mit genug züchtigen Worten der münch den
erbern man seinen günner straffet als er in schuldig gelaubet, vnd die
35 frawe im het zû versten geben vnd zû rede seczet Der erber man dem
sölche sache fremde was, sich des wunder nam; als der die frawen nye
gesechen noch ir nye wargenomen het, auch gar selten [99^b] sein weg
für der frawen haus ginge anhube ze laugen vnd sölcher sach er vnschul-

dig were aber der münch liesse in nit zû rede komen vnd sprache, nicht
 wunder dich noch thue als wistu nicht dovon ze sagen noch mer verleuse
 deine wort mit laugen dann du macht mit der warheit nit gelaugen ich
 hab es nicht von den nachpern, sunder sie selbes mir es gesagt vnd über
 5 dich weynent geklaget hat, sölche din gegehözent dir nicht ze thon so
 sag ich dir so vil von warde ye fraw die sölche sache schühet vnd ir
 wider was, so ist sie der eine. Darumb pit ich dich dir zû nucz vnd ern vnd
 ir zû troste vnd mir zû dienst Du die erbern gûten frumen frawen mit
 10 fride lassest. Der erber man der materi vnd sache mer verneme dann
 der heilig münch thet zû hant der frawen meinung vnd ir listickeit ver-
 nomen het, vnd sich gen dem münch ein klein in schame peweiset vnd
 sprach er wölte sie hinfüre eins söllichen erlassen, vnd von dem münche
 schiede vnd für der frawenn hause mit fleisse heym ginge Die an einem
 kleynen fensterlein lage vnd wartet in ze sehen. Do sy in nun komen
 15 sache die on masse grosse freude [99^c] enpfinge sich sechen liesse vnd
 freuntlich gen im erczeyget, da pey er wol vernam wez er im durch dez
 münches wort gedacht hette war were, vnd hin für mit grossem seinem
 gefallen teglichen der frawen zû liebe in geleichnuß ander vrsache hal-
 ben do für ginge vnd nach etlichen tagen die frawe wol vernam das sy
 20 im nicht minder liebet vnd gefiele als er ir thet, vnd begiriger mer dan
 ye in grösser liebe entczündet vnd ir zeit name sich wider zû irem heiligen
 münche vnd peichtiger füget, vn sich im zû seinen fussen weynent
 nider seczet. Der gûte man sie diemütiglichen fraget was neüer mere
 sie het das sie also traurig were. die frawe im antwort vnd sprach; Mein
 25 lieber vater die neüen mere die ich habe ist nicht anders dann der ver-
 maledeyt von got eüer freünt über den ich euch egestern klaget. Ich
 gelaub fürware er mir zû leyde vnd pein geporen sey, vnd sorge han er
 vrsache sein werde da zich nymer frölich werde vnd auch nymer mere zû
 euch ze komen Wie sprach der münch hatt er dich noch nicht seiner wider-
 30 drisse erlassen. Vater für ware neyn er sprach die fraw Sunder mere dann
 ye mir zû [99^d] leyde thut villecht vmb des willenn das ich euch über in
 geklaget han wol vernyme das er es in übel aufgenommen hat. Dann wo
 er vor einmal für mein türe ginge; nun mer dann zû syben malen für
 get. Nun wölte got daz er sich mich ze sechen genügen liesse so ist er
 35 also beherczent vnd vnsälig daz er mir gester ein alt weybe zû hause
 schicket mitt seiner gabe vnd neüen meren; Zû geleichner weise als were
 ich nottorftig gürtel vnd peutel, daz hat mir so se verschmachtet vnd im
 des keinen dancke sage; vnd het ich nicht sünden sorge gehabt ich het

den teuffel getun; Doch ich mich messiget vmb eürn willenn vnd han on
 ettern rate vnd wissen nicht thon wöllen, Vnd do ich dem alten weybe
 den peütel vnd seckel het wider geben die sie mir geben hat im wider
 ze pringen vnd sie übel mit Worten außgericht het an den galgen zû dem
 5 hause auß geweist het. Ich mir gedachte vnd sorge het, sie würde alle
 ding für sich behalten vnd zû im sprechen ich het es von ire empfangen
 als ich dann vernyme sölche weybe zû zeiten thon, darumb ich ir wider
 zû mir rüffet vnd ir daz mit zorn auß den henden nam vnd han [100^a]
 es euch her prachte, daz ir im selbes das wider gebet vnd dopey im
 10 saget ich sey seiner gürtel vnd peüttell nicht nottorftig; got sey lob vnd
 meinem manne Ich han so vil gürtell vnd peüttell ich wölte in darinne er-
 trencken vnd mich gen euch als meinen geistlichen vater entschuldig wo
 er mich eins sölchen nicht erlasset. das ich es meinem manne vnd prü-
 dern klagen wille geschehe im wie im wöll mir ist vil liber im ste vn-
 15 glücke zû soll es im anders wern; dann daz ich vmb sein willen schande
 enpfinge; Das alles sie dem münch mit weinenden augen saget nach dem
 ir hant herfürzoche mit einem reichen köstlichen peüttel vnd silbern gür-
 tell das dem münch in sein schose warffe. Der alles das für ware ge-
 laubet das sy im hat zû versten gaben sich sere vmb der frawen willen
 20 betrübet. Die kleynet zû im name vnd sprach? tochter ob du dich diser
 sache erczürnest nimet mich nicht wunder ich kan dir des kein vnrecht
 geben; doch ich lob vnd noch meinem rate volgest Ich straffet in egesten
 aller sache; aber er hat mir übel gehalten als er mir versprach, dar-
 umb das vergangen das sich siderher begeben hat [100^b] vmb eins
 25 vnnd anders. Ich meine ich wölle im sein oren mit Worten also erber-
 men daz du hinfür von im solt rue vnd fride haben, vnd gee daz dich
 got beleyte vnd lasse dich zorne nicht überwinden daz es yemant von
 den deinen freunden inne werde; dann es möcht sich ärgers begeben
 darumb habe gedult vnd piß on czweyfel dir sol kein schande zû sten
 30 Dann ich mit meinem gepete stäcz für dich vor got pin vnd vor allen
 menschen der welte ein warer zeüge deiner eren. Die frawe des gelei-
 chen thet als ob sie gar grossen troste empfangen het vnd pey den an-
 dern sein geytikeit auch wol erkante. Zû im sprach, herre vnd vater
 in disen vergangen nachten sein mir etliche meine freunde für komen
 35 vnd lasse mich gedüncken wie sy in grosser pein sein vnd nitt anders
 begern dann das almusen Sunder mein müter die mich so iemerlichen
 düncket daz es wol ze parmen ist also ze sechen ich für ware gelaube sy
 grosse pein trage mich also ze sechen in diser trübsale vrsache des vn-

säligen pösen feinde gotz. Darumb wölt ich gern daz ir mir vmb ir sele willen hette virczig messe gesprochen von sant Gregori vnd ewer gepet [100^e] dar zû daz sy got auß der pein vnd dem feuer neme vnd also gesprochen im ein gulden in die hant gabe den der mûnch gern name, vnnd sie mit gûten Worten vnd peyspilen tröstet ir gûten andechtheit Damit sie sich im befalche vnd er ir sein segen gabe vn gen liesse, vnd noch nicht vername das er gefogelt was. Zû hant nach seinem freunde schicket, der sich nit saumet schnelle kam, aber den gûten mûnche betrübet vnd czornig sache Im wol gedacht er von der frawen nette mere
10 haben würde vnd wartet was der mûnch doch sprechen wölt der in vormals gestraffet het, von neuem im dieselben wort vorhielte, vnd mit grossem czorn heftiglich ze rede seczet, vnd straffet in übel außricht als er von der frawen vernomen het vnd daz er ir sölte gethon haben. Der erber man der noch nicht vernemen mocht zû was ende der mûnch
15 men wolte doch ein klein laugent des in der mûnche zehe vnd im stâcz saget des schönen peütels vnnd gürtell halben, das der erber man alles thet domit er dem mûnche nicht den gelauben neme. Darvmb der mûnche in grössern czorn fiele vnd sprach: wie magstu mir gelaugen du zenuichter man des daz mir [100^d] wissent vnd ware ist, sich da das hat
20 sy mir weynent vnd klagent prachte? Nun sich ob du sy kennest Der erber man zû gleicher weise als ob er sich sere schamet; sprach: ia ich kenne sy wol vnnd gib mich schuldig ich han vnrecht gethon, vnd euch verspriche seitmal ich sy zû eren vnd frömkeit also stet geschicket siche. Das ir hin für von ir über mich nicht mere klage vernemen
25 sül. Also czwischen peydenn sich mancherley wort verluffen. doch ze leste der mûnche der ein holczpock waz im die gürtell vnd den köstlichen peütell gabe. Darnach in meistert vnd pate das er hin für ander sachen auswartet; das er im ze thon versprache vnnd von im schied; Wer frölicher dann der erber man, denn nun durch die köstlichen gabe daucht er der schönen frawen liebe vnd hulde gewise were
30 vnd also palde er von dem mûnch kame sich zû der frawen hause füget vnd die frawen sechen liesse das er ir gabe empfangen het, Des die frawe besunder freude vnd wolgefallen hett Wol vername ir sache meinung vnd hoffnung von tage ze tagen meret vnd pesseret, vnd nicht
35 anders warten waz dann alleine wan ir man [101^a] aus über felt rite damit sie daz angefangen wercke ze ende pringen möchte. Docht nitt lange verginge, das ir man gescheftes halben gen Genoua reyten muste; vnd do er des morges aufgesessen vnd weggeritten waz. Zû hant sich

die gute frawe zů irem heiligen münche füget; Von neuem im anhub
über den erben maz ze klagen, vnd nach mancherley rede zů im weynent
sprache. Mein herre vnd vater nun spriche ich wol das ich es nit lenger
leyden noch vertragen mage, vnd als ich euch den vordern tage ver-
5 sprach on eüer vrlaub nicht ze thon; Darvmb ich iczunde komen pin
mich gen euch entschuldige vnd entreden domit ir gelauben müget das
ich recht hab ze weinen vnd mich ze klagen Ir sult wissen was mir eüer
güter freunt; ich spriche der teüffel auß der helle hēut vor tag vmb
metten zeit gethon hat Ich weiß nicht welichs vngelücke im so pald hat ze
10 wissen gethon das mein man gen Genoua geritten ist, Dann heut vor
tage als ir vernomen habt Er in meinen garten gestigen was, vnd an
einem paume auf zů dem fenster meiner kamern die ob dem garten ist
gestigen kam, vnd das fenster [101^b] meiner kamern schöne auf gethon
het in die kamern zu mir ze komen; indem ich waz vername vnd auß
15 dem schlaffe erwachte auf fure anhub ze schreien, vnd er noch nitt
hinein was; do er mein schreien vername er sere erschrack nach mei-
nem geduncken vnd an mich vmb gotz vnd eüer willen genade begeret
vnd saget mir er wers. Do ich in vername vnd eüern willen ich schweig
vnd nacket als ich geporn warde lieffe vnd im das fenster, vnter augen
20 zů schluge, vnd er als ich gelaube an den gälgen ginge. Dann hin füre
ich sein nicht mere vername. Düncken das euch dinge sein zevertragen,
ich meinenthalben sol es nicht mer leiden, Dann was ich pißher gethon
habe ist vmb ewern willen geschehen. Do der münch der frawen rede
vernam betrübter vnd übler zemüte dann man ye ward weste nicht waz
25 er ir antworten solte; dann daz er sy fraget ob sy in eygentlichen er-
kant het ob er ein ander gewesen were. Die fraw sprach ey des sey got
gelobet das ich in nit für einen andern kenne. Ich sag euch das ers was,
vnd ob er euch des laugent so gelaubet im nicht. Do sprache der münche,
Das ist ein grosse [101^c] püberey vnd widerdrisse vnd zu male übel ge-
30 thon vnd du thetest gar recht daz du in also von dir iagest als du getun
hast. Aber ich will dich piten seytmal dich got vor schanden vnd laster
behüt hat. Als du czwir meinem rat gefolget hast das du mir daz dritte
nicht versagst vnd mir noch folgest ee du es yemant von deinen freun-
den ze wissen tuest, vnd mich versuchen lassest ob ich disen teüfel zamen
35 möcht, den ich ein heiligen meinet er were. Mag ich in dann von disen
pösen sachen kern wol vnd güt mag ich dann nit so gib ich dir mit mei-
nem seggen vrlaub das du in disen sachen thuest dein gefallen vnd daz
dich düncket wol gethon sey Nun wol an sprach die frawe so wille ich

mich nit mer betrüben vnd euch noch gehorsam sein, wo ir praucht das
 ich mit rüe vnd fride sey, vnd mich nit mer bekümer, so versprich ich
 euch vmb diser sache willen nit mer zů euch ze komen; In dem stunde
 sy von im auf geleiche als sie gar seré betrübet were vnd von dann
 5 schiede vnd kaum auß der kirchen. komen waz das der erber man zů
 der kirchtür einginge. vnd von dem münch gerüffet warde vnd auf
 ein ort genomen vnd in mit heftigen scheltworten gar vnsauber aus-
 ri[101^d]cht; in sölcher maß sölche wort im zů redet, daz ein weltliche
 manne von einem geistlichen also übel nye mere außgerichtt warde. Er
 10 hiesse in ein falschen eyde schwerer vnd verräter Der erber man der
 nun zu czweyen malen wol vernomen hette waz des münches wort be-
 deütten gar eben seiner red war nam vnd im seine wort wider redet; in
 sölcher masse das er in mere reden machet vnd von ersten sprache; war-
 umb seit ir so czornig han ich darumb Christum gekreucziget. der münche
 15 im wider antwort vnd sprach; Nun secht was der vnschamig mensch
 spricht, wie ist es im so frömde zů gleicher weiße als wer es ein iare,
 das es geschahe vnd im sein vnzüchtig poßheit vergessen were? ist es
 dir dann seyt heut morgen von metten zeyt piß her vergessen daz dir
 nit ingedencke ist was du begangen hast? wo hastu heut vor tage vmb
 20 metten zeit. Der erber man sprach ich weiß nit wo ich waz wie ist nur
 der pote so schnelle komen, du hast ware gesagt sprach der münch der
 pot ist pey mir gewesen ich gib mir zeversten du gelaubest darumb das
 der gūten frawen man gen Genoua geriten sey, das sie dich zů hant in
 ir arme enpfahen stülle; secht nur an den erbern [102^a] man Ich will
 25 sprechen als die gūt frawe sprach, Ein teüffel vnd nit ein erber man.
 der ein nachtgener worden ist vnd ein aufthöne: der garten, vnd ein
 aufsteiger an den paumen zů den kamer fenstern; meinstu mit deiner
 poßheit der frawen heilikeit überwinden, das du so beherezent pist ir
 dez nachtes ire kamern vnd fenster auf an den paumen zů ersteigen
 30 kein ding diser welt nit ist dovon sie grösser vngefallen gehaben möchte
 als sie von dir hat, vnd du gest sy stäcz ze betrüben vnd wol weist das
 sy dein kein genade haben will als sie dann dir in mer stücken pewest
 hat, vnd du dich nudalest söltest genügen lassen vnd daz alleine vmb
 meiner straffe willen; Doch sag ich dir das die gūt fraw dein piß her
 35 nit geschonet hat vmb der liebe willen die sy zů dir habe; sunder vmb
 meiner pete willen geschwigen hat; der widerdrisse die du ir stäcz pe-
 weist hast, Aber hin für wirt sie nit mer schweigen, dann ich hab ir
 daz vrlab gegeben wo du sy mer bekümerst, vnd ir ire freude nymest

daz sie es iren prüdern sagen sülle. Der erber man het alle seine not-
 torft durch des münches rede vnd der frawen meinung wol vernomen;
 Der wege vnd stege die er halten [102^b] sölte zů der frawen ze komen
 erlernet hette, vnd so er pest mocht mit sweren vnd verheissen den
 5 münch seines schreyens stillet vnd von im schiede vnd mit freuden der
 zůkünftigen nacht warten was. Do die selbig nacht vnd metten zeit komen
 waz, sich in der frawen garten füget, vnnnd mit kleiner müe auf an einem
 paume in daz fenster der kamern steige daz er offen fand, des sie mit
 freuden wartet vnd so er peldest mocht sich in ir arme verschlosse die
 10 in lieplichen enpfing vnd zů im sprach. Nun habe imer danck vnser
 münch der dich die weg sowol gelert vnd vnterricht hat here ze mir ze
 komen. Darnach die freude die dann sölche lieb geyt eines von dem
 andern enpfinge mit peyder grossem luste vnd gefallen Der eyfeltikeit
 dez münchs lachten vnd des besunder freude hette. Also die gut frawe
 15 die wolle die kemme den czeddel vnd weben ires mannes verflüchet vnd
 vermaledeyet in abgrunt der helle vnd die czwey liebe mit einander kürz-
 weylten vnd peyder willenn verpracht warde. Darnach züchtig ordnung
 gaben domit sie mit dem münche nitt mer bedorften zů genaden gen vnd
 vil manche andre nacht mit gleicher freude sich pey ein[102^c]funden.
 20 Darumb ir lieben frawen wir auch got vnd sein parmherczikeit piten stülen
 daz er vns verliche das wir komen mügen dohin wir begeren sein etc.

Münch Felix einen genant pruder Pucczo lernet wie er durch
 ein puse in kurzzer zeit on grosse müe sich möcht selig vnd heilig
 machen vnd in daz paradeisse komen, daz pruder Pucczo thet, vnd
 25 die weyle er in sölcher puse stund münch Felix im ein güten müte
 mit seinem weybe schafte desselbenn sie mit dem münche thut.

Do Philomena ir neüe histori verprachte het stille sweige vnd der
 iunge Dioneo der frawen subtilikeit mit lobe gepreist hette. Die künigin
 sich mit einem züchtigen lachen gegen Pamphilio keret vnd zů im sprache;
 30 Nun wol an iunger man Pamphilio es trifft euch an; Der anhub vnd
 sprach genädige frawe gern ich vmb anders nicht hie pin dann zethon
 eter wolgefallen; darumb ich spriche; Es sein ir vil die sich sere müen
 in daz heilig paradeiß vnd ewig leben ze komen vnd nicht sechen noch
 erkennen, daz sie ander leüte darein thon vnd prengen vnd sy [102^d] her
 35 aussen beliben; alsdann nit lang vergangen ist, vnser nachperin eine
 als ir vernemen wert, ir wider füre zů stünde vnd geschahe nach dem

als ich für ware vernomen han. Nit ferre von sant Patraten kirchen vnd kloster waz mit hauß gesessen ein güt reiche man genant Pucczo der hett sich aller dinge zů gotz dienst geben vnd ein leben füret als der stůlpruder gewonheit ist nach des heiligen Francischen orden, vnd sich nente pruder Pucczo gancz geistlichen was; er het weder kint noch kegel, dann allein seine haußwirtin mit einer meyde Darvmb er wenig sorge het vnd stăcz sein wonung zů kirchen in dem gotzdienst was sich gancz heilig vnd götlich daucht. Doch sein paternoster waren von grober speyse, ginge vil gen predig, stunde pey allen messen Auch vnser frawen lobe in irer capellen hören ze singen er nimer manglet; grosses fasten vnd peten thet, geißlet vnd schlugte sich Er meinete mit gewalt in daz paradeisse ze komen, vnd sein gůte haußfrawe die Lisabetta genant waz noch iunck vnd schön frisch vnd fröliche waz; köglet als ein beiches kăßöpflein; in dem alter von achtvndzwainczig iaren, vnd vmb [103^a] ires mannes heilikeit willenn zů zeiten fasten muste so sy lieber gessen het; Auch zů zeiten wann sie lieber geschlafen oder mit im in dem pette geschipfet hette so muste sie im seiner predig vnd der passione zu hören, vnd was pruder Nythart von der marter Kristi gesaget het vnd von sant Magdalena klage ir vil saget; Das was alles der frawen dinge nicht sie het zů sölcher zeit lieber wůrst gessen dann seinem predigen zů ze hören; Doch sich pald begabe als gotz gefallen waz daz sie irem fasten güt puse thet, Auß der hohen schuele von Parisy ein iunger münch vnd studirer genant münch Felix In Branchaczen kloster vnd convent kame; iunck schöne gerade von leybe Da pey ein wol gelert man der mit pruder Puczen grosse kuntschaft name, vnd im alle seine czweifol wol außleget vnd ze versten gabe; wes er in seinem gemüte betrübte was vnd sich gen pruder Puczen gar diemütig vnd heilig peweiset; Vmb des willenn pruder Puczo zů zeiten in zů hause lude; mitt im vnd seiner haußfrawenn ze essen, vnd die frawe vmb des mannes willen im ere vnd zucht erpöete, vnd sein in güt kuntschaft vnd gewonheit kö[103^b]me sein grosse freudin mere dann der man warde. Also der gůte münch täglichlichen zů pruder Puczen kame. Die frawen frische schön vnd iunck sache vnd bedencken ward wes sy am meisten mangel haben möcht, vnnnd im gedachte ob er pruder Puczen sein müte vnd arbeit mindern möchte es nicht übel gethon were, vnd sein augen vnnnd gesichte auff die frawen warffe zů einem vnd anderm male so vil thet das er sie in irem gemüte enczündet. Derselben begire willen vnd gedanke die er het, vnd nun das wol gemercket hett So er erst mocht sich mit ir ze

rede seczet, vnd ir sein liebe die er zů ir het ee wissen thet Vnd wie-
 wol er sie zů seinem willen bereyt vnd geschicket fande; dem wercke das
 ende ze geben; Doch zů diser zeit nicht hetten wo das gesein mochte.
 Dann die frawe in keinen weg auß irem hause ir nyndert hin getrawen
 5 wolt, vnd in dem hause es auch gar vnmüglich was; Dann pruder Puczo
 ginge nymer auß der stat. Des der münch gar bekümert was; Doch nit
 lang verginge er syn vnd weg fande, do mit er pey der frawenn sein
 mochte in irem hauß on alle sorge pruder Puczen. vnd [103^c] eins
 tags zů pruder Puczen heim kam zů im sprach? pruder Pucz gůter
 10 freunt ich vernyme wol das du alle deine begire vnd willen nicht anders
 sein dann heilig vund selig zů wern, vund ich lasse mich bedüncken wie
 du das gar durch lange weg suchest; wo es gar ein kurczer ist; Als vns
 dann vnser heiliger vater der pabst mit seinen öbristen prelaten In einem
 neuen decrett gemacht vnd geschriben hat vnd in alleine daz wissen
 15 vnd kunt ist, vnd wöllen nicht daz man ein sölches yemant sage vnd
 das darumb dann alle örden der geistligkeit der mern teyle des almusen
 leben; Die alle verdorben wern vnd nit mere leben möchten noch mit
 dem almusen begabet würden Aber-seytmal du mein gůter freunt pist
 vnd mich so dicke in deinem hause geert hast, wo ich glauben möchte
 20 das ein sölches pey dir in geheym beleybe vnd keinem menschen do von
 sagen wöltest; so wölt ich dich das lern vnd dich dez vnterweysen. Zu
 hant pruder Pucze des begirig was ze wissen vnd in freuntlichen pat mit
 grossem swern vnd verheissen Er das keinem menschen weder sagen
 noch ze wissen tun wölt; dann als weyt sein gefal[103^d]len were Nun
 25 seytmal du mir das versprichest; sprach münch Felix, so wille ich dich
 es leren. Darumb wisse daz die heiligen lerer vnd doctori halten wer
 do heilig wölle wern der müsse dise pusse thon vnd die verpringen als
 du in meinen worten vernemen wirst, vnd mercke gar eben; Ich spriche
 nicht das du nach der verprachten puse nicht ein sündler seiest als du
 30 iczund pist Aber daz begibt sich das alle die sünde die du piß auf die-
 selben zeit der puse begangen hast die gereiniget vnd dir vergeben werden,
 vnd alle die du hernach verpringest die wern dir zů keiner verdampnůß zů
 geschriben Sunder dir mit dem weichwasser ab gewaschen werden Dar-
 vmb wiltu sölcher heilikeit teylhaftig sein so mustu dich von erste mit
 35 ganzem fleiße peichten vnd aller deiner vergangen sünde erklagenn
 Darnach anheben zefastenn vnd sich vor aller vnreinikeit hüten, sunder
 der vnkeusche vnd nicht alleine mit fremden frawen zů acker gen, sun-
 der auch dein eygen weyb nicht anrüren. Darnach in deinem eygen

hause must du ein ende haben do du des nachtes den himel gesehen
 mügest, vnd ze complet zeit an daz selbig [104^a] ende gen, vnd do ein
 preit tafeln haben aufgericht in maß das du dich mit dem rücken daran
 leinen mügest vnd die füß auf der erden halten, vnd dein arme offen in
 5 kreuczes weiß Vnd ob du die wöltest aufflegen so magstu vnter iglichen
 arme ein nagel in daz prete oder tafel machen vnd also sten den himel
 ansehen vnuerrürt piß auf metten zeit, vnd werst du ein gelerter so
 müstu in der zeit etliche gepete sprechen die ich dir dann geben wölte.
 aber seytmal es dir nit zû gepüret so möchstu an derselben stat spre-
 10 chen .ccc. pater noster vnd .ccc. aue Maria ze lobe der heiligen driual-
 tikeit vnd also gestanden alwegen den himel an gesehen vnd got den
 almechtigen in deiner gedechtnuß haben der ein schöpfer des himels
 vnd erdrichs ist vnd das leiden Christi in deinem also sten als er an dem
 heiligen kreucze stunde stäcz vor deinen augen haben, vnd wenn man
 15 zû der metten leut so machtu ob du wilt weg gen vnd also angelegter
 dich auf dein pett legen vnd schlaffen darnach gen kirchen gen vnd zû
 den minsten drey messe hörn vnd füneczig pater noster vnd aue Maria
 sprechen; Darnach mit güte dein geschefte außrichten, das. essen en-
 pfahen gen kirchen vnd [104^b] vesper gen vnd do auch etlich gepete
 20 sprechen die ich dir beschriben gib; on die man nicht geton mag vnd
 vmb complet zeit wider heim komen vnd tun als du vor vernomen hast.
 tustu daz als ich dann getun hab Ich hoffe ee das ende deiner pusse
 kom du wunderzeichen vernemen solt von der ewigen seligkeit hastu
 anders dein pusse mit andacht deines herzen verpracht. Vber alle dise
 25 rede pruder Puczo sprach; das ist kein swere puß noch ze lang man
 sol sie wol mügen thon Darumb ich in dem namen gottes piß son tag will
 anheben; vnd mit disen worten von dem münch schiede zû hause ging
 seiner frawen alle sache vnd was sein meinung waz ze wissen tet. Die
 fraw gar wol vernam vmb seines stille sten willen piß auf metten zeit
 30 vnd sich nit verrüren? waz der münch darmit meinete, vnnd sie ein güt
 syn daucht; den man tröstet seines wol tun vnd sprach was er vmb
 seiner sele heyle willen thet er wol thete vnd ir wol gefallen were, vnd
 do mit im got in seiner puß dester genediger were; sy mit im fasten wölt;
 aber sie ye nicht anders ze tun vermöchte. Nun aller sache eins warn
 35 vnd der son tag komen waz pruder Puczo sein puß anfinde, vnd mein
 herre [104^c] der münch vnd die frawe so sie heimlichst mochten sich
 zû einander fügten daz nachtmal mit einander ze essen vnd der münch
 von dem pesten ze essen vnd trincken im mit pracht het. do sy nun daz

empfangen hetten mit einander ze pett gingen piß auff metten zeit mit
 einander der liebe spilten vnd wenn die komen waz so hube sich der
 münch daruon vnd frater Putzo zů pett kam. Nun was das ende da
 pruder Puczo sein püße thet nachent pey der kamern darinn die frawe
 5 mit dem münch lag vnd czwischen sein vnd der kamern gar ein dünne
 want waz vnd mein herr der münch vnd die frawe so vnzüchtiglichen
 mit einander plinten meuse spilten daz pruder Pucze dauchte sich die
 kamer mit sampt dem palcken erschütet vnd nu pei hundert seiner
 pater noster gesprochen het er sich also vnnerrurter der frawen be-
 10 gonde ze rüffen vnd fragen waz sie beginge do von sich das hause also
 erschüt het. Nu die fraw die gar schimpflich was vnd villeicht zů der
 selben stunde sant Benedicte esel reyte. im antwort vnd sprach; traun
 lieber man ich rüre mich so ich peste mag; do sprach Puczo waz rürstu.
 die fraw frölich vnd wol ze mute nit on vrsache im seiner frag lachent
 15 antwort vnd [104^d] sprach? wie bekümet daz; daz ir nit wist was das
 bedeut, so will ich es euch sagen. nu han ich mer dan zů tausent malen
 vernomen che chi, Des gelaubet der gůt pruder Puczo vnd wol ge-
 dachte ir fasten dez rüren vrsache were vnd darumb sy nit geschlafen
 möcht; vnd in dem pette also hin vnd her sich welgen müst er in gan-
 20 czem gůten glauben zů ir sprach Ich hab dir das vor gesaget nicht
 fast; doch seytmal es geschehen ist so lasse es gůt sein vnd hinfür wisse
 das du zů schaffen habest dann du rürest dich ze stunden in sölcher
 maß daz sich daz gancz hauß erschüt Acht sein nür nit sprache die fraw
 wart deinem gepete aus, ich weiß wol waz ich tů; thut nur ir wol; des-
 25 selben wo ich mag auch tun sol; also frater Puczo still sweyge vnd
 seine pater noster wider anfang vnd die frawe mit irem münch daz pete
 in ein ander end des hauses seczten, Vnd als lange pruder Puczen
 pusse wert; also lange sy peyde mit einander auch in freüden lebten,
 vnd alweg wann metten zeit komen waz so ging der münch gen metten,
 30 vnd die fraw in ir erste kamer schalaffen; also frater Puczo seiner
 puse mit grosser andacht nach kam, vnd die frawen mit dem iungen
 mü[105^a]nche ir vil gůter nacht name vnd in kürzweile zů dem münche
 sprach; du machest pruder Puczen meinen man grosse puß vnd pein
 thon; vmb des willen wir das paradeiße gewonnen han, vnd sich zů
 35 gůter masse nun daucht wol sten; dez münches speyse sich ze begen,
 vnd hinfür lange zeit in geheym mit einander ir freüde hetten wann
 frater Puczo ginge gen metten; Also mein aller liebsten frawen da mit
 sich die lesten wort mit den ersten geleichen; wo pruder Puczo gelaubet

sich in den himel vnd paradeiß mit seiner puse ze pringen; Er den gûten münche vnd sein haußfrawen darein pracht, der in den wege dar ze komen so palde gelert hett vnnd des die gûte frawe pey irem manne in mangel lebet, Sich der münche über sie erparmet ir dez zû willen ward vnd ein genügen gabe.

Ein iunge man liebe het vnd puelet eins ritters weybe dem er schencket vnd gabe ein köstlich roß do mit er im mit seinem vrlaub vergünnet mit der frawen zereden; des im der ritter vmb der gabe willenn vergonde, vnd er mit ir sein not redt; aber von ir nye antwort het, vnd er im selbes an der frawen stat antwort gabe [105^b] vnd zû hant nach sölcher seiner antwort mit freuden die werck folgten.

Nv hat Pamphilio nicht mit kleinem gelechter der frawen pruder Puczen nûe histori verpracht; Das sich die künigin mit lieplicher zucht gegen der iungen frawen Elisa keret ir gepote der angefangen materi sie nach kâme Die anhub vnd sprach, vil sein die do gelauben sy mere wissenn vnd können dann yemant anders; denselben gern zû stet, wo sie ander leûte vogeln vnd effen meinen nach iren wortten vnd wercken sich selbes betrogen finden; darvmb ich das gar für ein grosse torheit halt dem der on alle note ander leût stercke vnd liste versuchen get; doch villeicht ein iglicher nit der meinung ist; darumb vernemet waz sich eins edeln rittes halben erginge nach der angefangen materi vnd ordnung mein syn ist euch das zesagen. In der edelen stat Pistoia in dem geschlecht genant Vergalesy waz ein ritter genant herr Francz ein reiche vnd weiß man gehalten; aber on masse geyttig zû diser zeit zu einem hauptman oder richter gen Meylant erwelt was, vnd aller dinge ze reiten fertig waz; dann alleine eines schönen roß für sein [105^c] person man gel het; auch man keines finden mochte daz im füglich were. Nun was ein iunger purger in der stat genant Rischardo; doch nicht von der edelsten geporn; aber on masse reiche hübsch vnd gerade von leybe vnd aller gestat. darumb er genenet ward; Cyma zû geleycher weiß als wer er der hübschest aller iuger der stat; nun derselbig Cyma lange zeit dez ritters frawen doch on alle seine hoffnung gepuelet vnd het liebe gehabt die on masse ein züchtig frawe vnd schön waz derselbig Cyma het daz schönest roß das in allem lande waz; vmb des willen er es gar liebe het vnnd im wert was. Nu waz eines iglichen wissen daz er des ritters weybe

pulet Nun warn etlich des ritters gñner die zû im sprachen begeret er
des roß an Cyma; er im das vmb der liebe willen die er der frawen trug
on czweyfel im das widerfarn liesse. der ritter von der geytigkeit be-
czwungen den Cima schaffte zû komen, vnd seines roß in kaufes form
5 begeret; doch das thet ob er sich des im erpüte ze geben Do Cyma den
ritter vernam wol ze müte sprache herre wenn ir mir gebet alles eüer
gût so möcht ir meines roß in kaufswiese nit gehalten. wol in gabe vnd
schanck[105^d]ung ir es haben müget; ist es anders eüer gefallen; In
söllichem form ee ir mein roß enfahet vor ich mit eüerm vrlaub etliche
10 mort mit eüer frawen reden müge gegenwürtig eüer; doch das ich von
nyemant gehört sey dann alleine von ir. Die groß geytikeit den ritter
zoche vnd den Cyma meint ze vogeln vnd effen. Im antwort er willig
vnd sein gût gefallen were, vnd in alleine in dem sale liesse vnd zû der
frawen in die kamern ginge ir ze wissen tet wie er Cyma roß so gerinck-
15 lich gehalten möcht Zû ir sprach das sie keme den Cyma ze hören; doch
sich hütet im seines reden kein antwort gebe weder wenig noch vil. Die
fraw ein sölches widerredt doch dem ritter folgen must vnd seinen wil-
len tun vnd im in den sale Cima ze hörn nach volget Cima der nun mit
dem ritter sein pet gemacht hette an einem ort in dem sale von yeder-
20 man sich mit der der erbern frawen nider seczet anhub also sprache.
Edele vnd erenwirdige frawe ich lasse mich fürwar gedüncken ir weiß
seit Das ir wol lange zeit ist het vernemen mügen wie mich grosse liebe
vnd freuntschafft dar zû pracht hat euch vnd eüer lieplichen schöne liebe
ze tragen; die nach meinem gedünk[106^a]en über alle andre ist, die ich
25 mit augen ye übersehen han ich lasse sten eüer gütt syten löbliche
tugent züchtig geperde die in euch regirn; der kraft stercke vnd macht
so grosse sein, daz sy eines iglichen hohen mannes gemüte geweltig
sein; darumb nit thut euch daz durch wort ze peweisen; gott wisse mein
hercz, vnd für ware mir gelaubet daz nye man frawen liebe gehabt hat
30 als ich euch habe vnd haben wille dieweil ich lebe vnd meinem gemüte
vnd allen gelidern daz leben verlichen ist, vnd noch so vil mere; ist
sache das man in der andern welt sol liebe haben als man in diser welt
thut so seyt gewiß ich euch ewig liebe habe, vnd ir kein dinge in diser
welt liebe oder vnliebe wert oder vnwert habt. Daz ir euch das so
35 gancz eygen sprechen mügt als ich mit allem dem meinen pin vnd daz
euer sey sprechen müget. Mer ich sprich grösser genade mir nit ge-
schehen möcht dann zû thon eüern willen vnd gefallen, dann euch ze
liebe vnd euer gepote ze verpringen kein dinge diser welt euch ze liebe

mich swere deucht nür ich tun möcht daz euch liebet; darumb mein allerliebste fraw. Nun seytmal ich als ir vernomen habt ewer [106^b] pin, vnd ich alle meine begire vnd pete zů euch diemütig ker dann ir alleine seyt mein trost vnd hoffnung do von mir allein mein heyle komen mag, vnd euch mein allerliebste frawe lasset meinen willen dienst gefallen dann ir mir liebet ob allen frawen; sunder wan ich euer liepliche schön zucht vnd tugent bedencke; darumb mein hercz in prinender liebe stäcz hoffet euer vergangne hertikeit gen mir beweist die zů erweichen; nun pin ich ye gancz euer eygen, vnd mit troste vnd hoffnung euer diemütikeit sprechen mag ich euch liebe habe. vnd wo euer hohes gemüte sich gen mir nit diemütiget; so seyt on czweifel daz ich sein sterben muß; wann dan ein sölches geschehe man sprechen möcht ir an mir schuldig weret vnd meines todes klein ere het, vnd fürware gelaube wenn ir ein sölches bedecht euer gewissen vnd gemüte sich ze zeiten betrüben würde das ir ye ein sölches gethon hette vnd mit euch selbes sprechen würt Awe awe was grossen Übels ich begangen han; das ich mich nicht über meinen Cyma erparmet han! Sölch gedanken werden alle verlorn vnd wern vrsache ewer vnruhe ze mern vnd da mit es nit [106^c] zů sölchem kome, so last euch leyt sein ee dann ich den tode anfahe vnd seyt mir genedig vnd lasset mich euch erparmen! Dann ir müget mich den frölichsten vnd traurigsten man machen der auf erden ist Doch ye hoffe in ewer milte diemütikeit ir mich nit in widerkerung vnd lone sölcher liebe tode enpfahen lasset; sunder mit genaden vnd frölicher lieblicher antwürt meine erschrockne geiste vonn etlich getröst werden; Also Cyma mit etlichen czähern seiner augen vnd schweren seuffzen seines herzen seiner rede ende gabe, vnd der edeln frawen antwort wartent was. Die güte frawe Cyma lange liebe vnd hoffirn pey tage vnd nacht ir gar wol kunt warn vnd vil ander ding die er vmb iren willen gethon het; Ir hertikeit gen im nye hette erweichen mügen Vnd nun erste durch seine süsse liepliche wort an hub ze enpfinden des daz sie vor nye mer vernomen het; als waz liebe haben gesein mocht, vnd wiewol sie ires manes gepote ze schweigen muste Doch etlichen seuffzen nicht verpergen mochte; des daz sy dem Cyma mit antwort nitt geoffen mochte. Nun warde Cyma kein antwort von der [106^d] frawen das in gar fremd dauchte vnd bedencken warde des ritters listikeit; Doch sy stäcz ansache vnd durch ir gesicht der augen das sie zů zeiten auf in thet, vnd durch die schweren seuffzenn die aus grunt vnd tieff ires herzen kamen Im hoffnung troste vnd hilfe prachten. Zů hant mit im

selbes neues rates pflege, vnd an der frawen stat im selbes antwort gabe
vnd also sprach; Mein lieber Cyma es ist lang zeit das ich dein stäte
liebe zů mir ganz gerecht vnd warhaftig verneme, Das ich nun durch
deine wort paß vnd mere vernomen han; des ich wol ze müte pin vnd
5 des von dir ein grosses gefallen habe; wo ich dir herte vnd vnerparm-
lich gewesen pin; Will ich nicht das du darumb gelaubest das ich in
meinem gemüte vnd herczen also gewesen sey als dir mein angesicht
pewiset hat; sunder ich hab dich alwege von herczen liebe gehabt vnd
vor allen mannen gern gesehen; waz ich gethon habe ist mir not ge-
10 wesen forcht vnd czorn halben meines mannes, Vnd zů behalten den
güten leymet meiner ern. Aber iczund kompt zeit daz ich dir klärlich
pebeisen mag ob ich dich liebe vnd dich aller der liebe vnd freu[107^a]nt-
schafft die du mir so lange zeit getragen hast vnd noch tregest frölichen
mag ergezen; darumb gehabe dich wol vnd piß gütz mütes! dann her
15 Francze mein man in kürcze sol gen Meylant reyten, als dir wol wissent
ist, Dem du vmb meinen willen hast dein schön roß geben wenn der
wege gerittenn ist ich dir pey meiner trette verspriche vnd pey der
freuntlichen liebe willen die ich zů dir han, daz du dich solt nit lange
verget pey mir finden darumb gehabe dich wol vnd wir vnser liebe mit
20 lust vnd freuden ein ganz genüge tun stülen, vnd do mit ich dir diser
sache halben nicht mere bedürffe zů sprechen so nym war an welchem
tag du an dem fenster meiner kamern das ob dem garten ist ein schne-
weisse hantweheln auf gepreytet siehest; die selbigen nacht ich dein
innerhalbe der türe des garten warten wille, sich nür daz du von nye-
25 mant gesehen werest, vnd wir dieselbigen nacht mit einander vnseren
lust vnd freude haben wollen Do nun Cyma im selbes an der frawen stat
geantwort hette Er ir wider für sich selbes antwort vnd sprache. Mein
allerliebste frawe es bekomet vnd füget sich vmb der überflüssigen
[107^b] freude willen ewer gütē vnd züchtigen antwürte die mir mein ge-
30 müte also geschicket haben das ich euch nicht also volkomenlichen, als
ir wol würdig weret dancke sagen noch mein antwort formiren mage,
Vnd ob ich nun wol möchte als dann mein wille vnd begire were; keit
zeit noch czile wer mir ein genügen euch ze dancken als euch gepüret
vnd ich gern thet. Darvmb in ewerm edelen gemüte vnd herczen ste vnd
35 sey zů erkennen das des ich an euch begere, vnd mit worten nicht ver-
pringen mage. Doch als ir mir zůgesaget vnd gepoten habt; Ich ge-
dencken wille dem also nach ze komen, seytmal ir mich mit sölcher gabe
auff dise stunde begabet hat, des ich euch zu tausent malen dacke sage.

vnd euch das nach allem meinem vermügen widerkern sol Hie ist nicht anders mere ze sagen mein allerliebste fraw; dann daz euch got geb dez ir zû im begern seit gewere Da mit seyt got befolhen aller sölcher rede vnd wider rede die frawe kein wort nye sprach; also Cyma von ir auf
5 stunde zû dem ritter ginge; do daz der ritter ersechen het, im entgegen kame lachent zû im sprach? Wie düncket dich, hab [107^c] ich dir gehalten Als ich dir versprache; traun neyn ir sprach Cyma ir verspracht mir, mich mit etler frawen ze reden lassen, so habt ir mich mit einer steinen seüle reden machen Das was alles des ritters groß gefallen von
10 seiner frawen ires steten gemüte; Zû Cyma sprach nudalest ist wol mein daz roß das do was dein. Der Cyma dem ritter antwort vnd sprach Ja herre aber het ich sölche genade von euch gehoffet zû haben der fruchte die ich dann empfangen han ich solt euch mein roß lange zeit ist vnbegert geschicket vnd geben haben, vnd wölt got daz ich es
15 gethon het, dann ir habt mein roß kauft vnd ich han sein mitt verkauft des der ritter lachet das roß enpfing vnd darnach nicht lange verginge auf saß gen Meylant werz reite, vnd die frewe fraye vnd allein in irem hause beleybe. Gar offte mit ir selbes Cyma wort bedencken warde; der grossen liebe halben die er ir so dicke beweiset het, vnd wie er ir zû
20 liebe irem man so ein köstlich roß geben het vnd vmb iren willen täglich für ir hause gen sache Zû ir selbes sprach; was thue ich wes beginne ich daz ich meine schöne iugent vnd iunge tage on fruchte also verczere [107^d] Der ritter ist gen Meylant geritten; komt in sechs mont mit wider; wenn würde mir von im ein sölches imer wider kert wenn ich alt würde, vnd
25 über alles das wenn köme mir immer mere ein sölcher liebehaver ze handen als Cyma ist. Ich pin alleine bedarffe mich mitt besorgen vor nyemant; ich weiß nicht warumb ich mir nit dise güte zeit nyeme die weyle ich mage; Es möcht sich fügen, wenn ich es gern nem es möcht mir nicht wern als iezund des wirt nymer nyemant inne vnd ob es sich
30 begeben daz man sein inne würde, so ist ye pesser man würcke etwaz vnd hab des darnach reue, dann gar feyern nichtz tun vnd dez reue haben; also mit ir selbes beriete vnd ir selbs rate pflage vnd eines tages die weissen hantweheln an daz fenster leget als Cyma gesprochen het; der er pald war genomen het mit grossen freuden derselben nacht warten
35 waz in der er sich do in zeit dauchte in den garten füget vnd zû der türe dez hauß die er offen fandte ein ginge, Des die schöne frawe ware genomen het vnd sein mit fleiß wartet komen sache, im entgegen ginge mit freuden enpfing; er sy in seinen arm schloß ze tausent malen küsset

die stiegen auff ir nachfolget schnell zû pette gi[108^a]ngen vnd die leste
 rure peyder liebe durch sy erkante warde vnd wie wol daz die erste
 was doch darumb auch nit die letste warde, dann die weyle der ritter zû
 Meylant was vnd auch do er wider kam, die czwei liebe mit grossem
 5 luste vnd freudenn zû manch malen mit einander ir freude hetten.

Wie einer genant Riczardus einen andern genant Filipello vmb
 sein weyb puelet, die da sere eyferet vnd sie ires mannes Filipello
 vor andern frawen grosse sorge het; Riczardo ir zû versten gabe
 wie Filipello im vmb sein weybe puelet, vnd des nachten tages dar-
 10 nach peyde mit einander freude ze haben sich in einer padstuben
 pey ein finden sölten ir so vil vor saget daz sie in daz pade kam vnd
 wo sie pey Filipello irem man meinete gewesen sein, sie pey Ric-
 zardo gewesen was.

Frawe Elisa ir neue histori zu gûtem end pracht hat do pei Cyma
 15 grosse gescheydikeit gelobet hat; in dem die künigin frawe Fiametta ge-
 pote sy der materi auch nachfolget Die sich nicht saumet anhuben also
 sprach. In der alten wirdigen stat Napels zû disen zeiten waz ein iunge
 reiche edelman genant Riczardo Minuto vnd wie wol er ein schön vnd
 [108^b] iunge edel weybe het, doch dopey ein andre huldete vnd liebe het,
 20 die selbig gemeiniglich von yederman die schönste in Napels gehalten
 waz genant frawe Catellina vnd waz eins edeln wirdigen mans weyb ge-
 nant Filipello der sie in zucht vnd ern liebe het ob allen dingen der
 welt. Nun Riczarde Minute die selbigen schönen frawen puelet vnd vmb
 iren willen alles das thet vnd prauchet damit man einer schönen frawen
 25 hulde gewinnen möchte; Aber in keinen weg seinem willen irenthalben
 mocht ein genügen thon Als ir freuntschaft ze haben, vmb des willen
 schier verczaget hette; Noch sich sölcher liebe weder weste noch mochte
 ledig machen; er mocht ir weder sterben noch genesen betrübter dann
 mans pilde ye warde. Nun in sölcher trübsal also gestanden sich begab,
 30 daz in etliche frawen von seinem geslecht strafen vnd trösten er sich
 sölcher vnmessiger liebe überhub vnd dovon liess, sein müe vmb sunst
 wer dann Cathellina kein dinge auf erden lieber hat dann Filipello iren
 man vnd groß eyfern seinthalben thet In sölcher maß wann nur ein
 vögelein über flüge sie sorge het Filipello zû verliesen. Do Riczardo
 35 vernam das Catellina also sere eyfert, [108^c] Zû hant im anders rates
 gedacht seinen willen ze haben vnd des gleichen thet als ob er an Ca-

tellina hulde verczwyfelt vnd sich ir gancz verwegen hette, vnd sein liebe zů einer andern edeln frawen gekert het, vnd vmb derselben willen auch anhub ir zů hoffirn zů stechen vnd prechen vnd alles das thet daz er vmb frawen Catella getun het vnd yederman sprechen warde er het Catellina gelassen, vnd hat im ein andere außewelt die im liebet über alle frawen. daz treybe er also lange das sich sein yederman wunder nam Daz er, die da die schönest in Napels gehalten was, vnd die er lieb het als sich selbes vmb einer andern willen, also gächling het lassen mügen, vnd nach dem als ein ander ir nachper, wo er ir begegnet schlechtlich grüßet als er dann andern frawen thet. In sölcher zeit sich begabe als dann zů Napels gemeinnigichen gewonheit ist; In dem sumer an den abent das edel volcke gern zů dem mere spaciren get vmb der küle willen das nachtmal zů essen. Nun eins abencz Riczardo vernomen het wie frawe Catellina mit irem haußgesind zů dem mere das nachtmale zů essen an der küle gangen waz [108^d] Des selben gleichen mit seinem gesinde thet, vnd in der frawen Catellina gesellschaft genomen warde; wie wol er sich sölches laden ein klein von ir weret, zu gleicher weiß als ob es im wider were, doch sich nicht lange piten liesse es auff name, vnd frawen Catellina mit seiner frawen; in an huben vmb ze treiben vnd mit im nun ze mahn ze schimpffen seiner neuen liebe vnd pulerey haben; Des er in zů versten gabe, wie er von ganzem herczen in liebe prant; damit er in ursache gebe mit im von sölcher materi ze reden, vnd als sich gern begibt an söllichem ende nach dem nachtmal man gern hin vnd her eins mit dem andern spaczirn get, sich on geferde begabe, das frawe Catellina alleine mit Riczardo beliben was, vnd Riczardo ir etliche sache der liebe ires mannes Filipello fürwarffe vnd zů versten gabe. do von sy zů hant warde eyfern vnd von ganzem herczen des begert ze wissen wie Riczardo daz meinert oder waz er doch sprechen wölt vnd ein sölches ze wissen sy nit mer uerhalden mocht; In anhub ze piten die der schönen frawen willenn die er an dem liebsten het, daz er ir das ze liebe saget vnd sie klare machet ires mannes fre[109^a]mden liebe vnd was er geret het vonn Filipello. Riczardo ir antwort vnd sprach; Ir habt mich beschworen pey der person daz ich euch des ir begert nicht gelaugen noch versagen mag, Darvmb ich willig pin euch alle sache ze wissen thon Doch so weyt das ir weder im noch yemant davon icht sagen wölt, dann wann ir daz selbes an der warheit secht vnd findet, vnd wo ir das selbes wissen vnd sechen wölt so wil ich euch dez vnterweisen daz ir es mit eüern henden greiffen vnd augen sechen sölt, daz alles der frawen

wol gefallen was, beginger mer dann kein dinge, das selbs ze sechen vnd das fürware gelaubet das er ir saget, vnd im zû got vnd allen heiligen schwure das nyemant ze sagen. Do Riczardo der frawen wort vnd ir grosse begire vernomen het, sy auf ein ort name, Damit er von nyemant
5 seines redent möcht gehört werden anhube zû ir also sprach; Fraw wann ich euch noch also liebe hette als zeit gewesen ist, so wer ich nit so beherczent das ich euch saget ding dovon euch trûbsal vnd czorn het bekommen mûgen; Aber seytmal sich sôliche liebe geendet hat so mag ich euch nun wol die warheit sa[109^b]gen Ich weiß nicht ob Filipello êter
10 man mir in übel auffgenommen hat, daz ich euch also gehoffret habe oder ob er im hat zû versten geben das ich von ench sey liebe gehabt gewesen. Doch wie dem sey ich mich gedünckenn lasse er mir daz thon wolle des ich Sorge han er meine vnd gelaub ich im das gethôn habe; Das ist das, das er meiner frawen begert in vnern zû seinem willen vnd
15 ich finde in kûrczer zeit here er ir vil manche potschaft zû gesant hat, Das ich alweg von ir vernomen han. vnd alweg im die antwûrt wider geben hat nach meinem gefallen, vnd heut an disem tage ein klein vor euch herkeme; Ich ein alt weibe pei meiner frawen fande, in grossem rate, in geheyme sie ir gespreche mit einander hetten. Zû hant ich mir
20 wol gedacht daz es das sein sôlt, des ich mir dann gedacht; Ich meiner fraen zu mir rûffet vnd fraget? wes das alte weyb an sie begeren were; sy mir antwûrt vnd sprach sy wer in Filipello potschaft zû dem du mich getröst hast vnd mir dise vnrûe zû gesant hast mit deinem antwort geben in mit troste vnd hoffnung ze halten der iczund genczlichen mein
25 sin haben vnd [109^c] wissen wille, vnd wo es mein wille vnd gefallen were er schaffen wôlte das wir heimlich vns peide in einer padstuben zû sammen fûgten. des begert er an mich, vnd wer es nitt daz du mich es heste thon machen vnd weiß nicht warvmb du mir die vnrûe gibest Ich sôlt mir in gar palde ab dem halse richten daz er mich hin für nimmer
30 an geseche, ich will geschweigen mir potschaft ze schicken. Do ich daz von meinem weybe vername mich daucht er wôlt mir zenachent kômen, vnd das mir ein sôliches nicht weyter ze leiden were mir fûrnam vmb minder schand willen die sich villeicht begeben het euch zesagen vnd zû wissen thon; domit ir erkennen mûget den lon êters mans Filipello den
35 er ewer trewe liebe gibt vmb der willen als euch wissent ist; zeyt waz ich dem tode nahent waz vnd damit ir nicht gelaubet daz ich euch mâre sage Ir wol mûget ob ir wôlte euch des klare machen vnd selbs sechen, dann ich schafte mit meiner frawen das sy im pey dem alten weybe

wider enpüte wie sie willig vnd bereyt were morgen vmb none zeit so yederman gern schlefte in dem pade pey im ze sein, des daz alte [109^d] weybe wol ze müte vnd froe was von ir schiede. Nun gelaubet ich nicht, das ir daz gelaubet das ich im sie schicke, Aber wer ich als ir
 5 so wölte ich daz er mich an irer stat fünde, der dasigen die er meinte ze finden, vnd wenn ich dann also pey im gewesen wer vnd mich zeit deucht; ich im wölt zů versten geben pey wem er vnd wo er gewesen were vnd im die ere thon der er wirdig were, für ware wo ir daz thet ich gelaube er söliche schame haben sölte, daz er zů einer stunde die
 10 eüern vnd meinen widerdriesse der er sich zů thon vermessen het gepüset worden. Do die gůte frawe das vernomen het, sich nicht weiter pedacht wer der gesein möchte der ir söliche märe saget. Sunder als der eyfern gewonheit ist; im aller rede gelaubet vnd zů hant in czorn enzündet zů im sprache; sie es für ware thon wölte vnd ir das kein müe
 15 sein sölt, vnd were sache das er köme sy wölt in In sölcher masse außrichten das er sich hin für vor andern frawen gesegent sölte. daran Riczarde groß gefallen het. der frawen sin wol ze müte was in wol dauchte sein rate wer gůt gewesen, vnd mit vil andern worten, Die frawen ir [110^a] meinung tröstet vnd in irem gelaubenn stäcz stercket,
 20 vnd sie freüntlichen patē daz sy ein sölches daz er ir in gůten treüen gesaget het pey ir beleyben liesse vnd das nyemant offent was sy von im vernomen hett Ein sölches sie pey irer treue versprache. Des morgens früe Riczardo zů einer alten frawen ging die die padstuben hielt vnd ir sein meinung saget wes er willen het ze thon vnd sie pat daz sie im ge-
 25 hilfflich wer in disen sachen als er ir dann het zů versten geben. Die gůt paderin die im etwas pflichtig ze thon was zů im sprach Sie im gern dienen wölte, vnd mit einander wes man sich halten solt eins wurden Nun was in dem padhause gar ein finster kamern die gar kein fenster het da durch sie liecht het mügen haben; Die Riczardo schaffte zůbe-
 30 reiten mit pette vnd aller nottorft Vnd do Riczardo das male gessen het vnd in zeit daucht sich darein füget vnd der schönen frawen Catellina wartet. Nun die frawe Riczardo wort vernomen het den mere gelaubet dann note was vol mit czorn des abencz heym kam, vnd auch Filipello villeicht mit frönden gedancken zů derselben stund zů hause kam vnd ir
 35 villeicht [110^b] nicht so freüntlich zů sprache als er ze thon gewonet was vmb des willen aber in grösser vnmüte vnd eyfern fiele; dann sie vor was zů ir selbes sprach für war der ist mit allen seinen gedancken vnd gemüt pey der frawen do pey er pis morgen meint sein lust vnd

willen ze haben. Aber sicher für ware es gelinge mir dann nicht, so sol sie im nymmer ze liebe wern vnd anhuben sich ze bedencken wann sie ein genügen pey im gewesen were waz sy zü im sprechen wölte In sölichen gedanken dieselben nacht lage. Nun der morgen vnd none zeit komen
5 was frawe Catellina on yemant rate ir geselschafft die ir füglich was zü ir nam, sich in das pade füget als sie dann Riczardo vnterricht vnd gewest het, vnd die paderin fraget ob Filipello da were, vnd als die gute fraw von Riczardo gemeistert was sie fraget ob sie die fraw wer die
v komen were mit im ze reden Catellina ir antwort vnd sprach Ja ich pin
10 es; So get hin zü im sprach die paderin, vnd sy zü der kamern füret do Riczarde allein ine was. Also frawe Catellina suchen ginge das sie nicht het finden wöllen vnd sich zü im in die kamern versperte. vnd do sie Riczardo ko[110^c]men sache wer fröer dann er auf auß dem pette auf sein füsse stunde sie lieplichen in sein arme enpfing mit senfter nyder
15 stimme zü ir sprach Nun piß mir gotwillkomen du mein allerliebste liebe. Fraw Catellina sich auch peweisen wolt, als wer sie ein andre die sy nicht was; vngeret in halset vnd küsset vnd grüsset fest peweiset, Auch sorge het redet sie, das sie von im erkant würde Die kamer was stickfinster darumb peydenthalben pereyt warn, die leste fretide der
20 liebe vnd mynne ze suchen. Riczardo sie auf das pette pracht; do sie peyde in stille vngeret mit grossem luste vnd freuden besunder Riczardo vor iren willenn mit einander verprachten; so lange mit einander also in der finster der liebe spilten das sy zeit dauchte auf ein stunde sy iren sachen ein genügen gethon hetten, vund auch Catellina irem empfangen
25 zorn vnd widerdriss nudalest wol auß gen lassen möcht, vnd mit ernstlichem zorn anhuben vnd sprach; Ey wie gar arme vnd vngelückselig ist das gelücke der frawen. O ich vnseeliges weybe Es ist mer dann acht ganzte iare daz ich dich lieber gehabt han dann mein leben vnd du als ich gehört vnd vernomen [110^d] han verprinnest vnd verwisest in liebe
30 einer fremden frawen Du pöser zenichter man der du pist. Nu pey welcher meinstu das du seyest gewesen Du bist pey der die du so oft mit deinem falschen liebhaben betrogen hast; der du dich außeralben so lieplich erczeyget hast, vnd doch mit deiner liebe vnd falschen herzen pey frömden frawen gewesen pist; darumb du pöser man vernym mich
35 gar eben. Ich Cathellina dein Eweybe vnd nicht Riczardo weybe pin du gotz verreter vnd eprecher mir ein vngetreuer man! Nym war meiner rede vnd styme ob ich die rechte sey! czweifel nicht ich pins wol. vnd mich duncket hundert iare das wir an daz liechte kamen do mit ich dich

nach deinem verdienen schenden müge des du wirdig pist du schnöder
hunt scham dich in dein hercze. O ich armes weybe wem hab ich so
lange iare freüntliche ware liebe getragen nun er meint ein frömde in
seinen armen ze haben so hat er sein selbes weybe gehabt vnd mir mere
5 liebe in diser kleinen stunde peweyst hat dann er mir alle seine tage ye
gethon hat, o du verczagter hunt wie pistu heutso freydig gewesen vnd
da heym al[111^a]wegen so plöd gewesen pist vnd dich stäcz on mügen
gen mir erczeyget hast. Nun sey got dancke das du doch deinen acker
vnd nicht eins andern geackert vnd gesert hast als du dann gelaubest.
10 Nun nympt mich nit frömde das du mir die vergangen nacht so ferre
lagent du wartest den somen anderswo abzelenen domit du ritter dester
frischer vnd gerubter möchtest an den streyt komen. got vnd meiner
fürsehung sey danck! es ist doch abwerckz gangen das dir aufwerckz
sölt gangen sein vnd gangen ist als es gen sölte. Nun warumb antwor-
15 test du mir nicht du pöser man? pist du zů einem stummen worden;
werlichen werlichen ich weyß nit was mich helt das ich dir nicht mit
meinen henden in dein angesicht falle vnd dir dein augen zů reisse; Du
meinst wol dein puberey, vnd verräterschaft söltest dir fürsich gangen
sein du gabest dir zů versten nyemant künde nitt dann du alleine; aber
20 ich hab einen pessern grisse zu dem end oder czagel gehabt dann du
zů dem anfang oder haupt gehabt hast. Riczardo von allen disen
worten grosse freud het vnd on alle rede vnd gespreche sie stäcz halset
vnd küs[111^b]set mer dann er vor ye gethon het vnd sie stäcz irem
czorn mit worten nachfolget vnd sprach du meinest mich iczunde mit
25 deinem falchen küssen erweichen du verfluchter vonn got vnd mich mit
dir in fride seczen; Sicher es wirt mir feln Ich wir mich diser sache
halben mit dir nymer erfreuen, piß so lange das ich dich gegenwürtig
vnsrer freünde zů schanden mache. Pin ich nit du fayger man so schöne
vnd edel als Riczardo weib ist; pin ich nicht als von edelm plüt geporn
30 als du vnd sie ist Nun antwort mir du esel was ist sie mer oder pessere
dann ich rücke von mir nicht rüre mich an du hast genug gefochten auf
disen tage Ich weiß wol was du nudalest thetest das du dich darzů nöten
müßtest; seitmal du mich erkant hast vnd dir nit von herczen käme; dar-
vmb laß mich nür vnuerworren. Aber verleicht mir got die genade du solt
35 sein vonn mir noch mangel haben. Ich weiß nicht was mich helt daz ich
nicht nach Riczardo schicke Der mich über alle frawen het liebe gehabt,
vnder möchte sich des nye gerümen daz ich in ye nür ein fart an gesehen
het; vnd ich weiß nicht was üfels ich begangen het wann [111^c] ich in gar

lieplichen an gesehen het, vnd du meinst sein weib hie zů haben; aber es ist nit minders als best du sie gehabt, es ist an dir nit mangel gewesen vnd wenn ich iczund Riczardo auch hie pey mir hett wer ich von dir straffe wirdig, sicher neyn ich, Also die wort vnd grosse klage der
5 frawen gar mancherley warn Doch nach aller irer klage Riczardo im gedacht liesse er sie also von im scheiden in der meinung darinne sy waz daz sich do von vil üfels begeben möcht, vnd vmb des pesten willen im fürnam sich gen ir eygen vnd sich ir zu erkennen geben, vnd sie in seine arme nam davon sy nit weichen möchte vnd zu ir sprach; mein auß-
10 erweltes weib nit betrübet euch! dann das daz mir durch freuntlich liebe haben nit hat werden mügen; pin ich von der liebe vnterweyst, vnd gelert worden ein söliches ze nemen wie es mir werden müge; ich pin eüer Riczardo. Do das die gůt fraw vername vnd in an der rede erkant het; sich von im aus dem pette werffen wolte; aber nitt mochte
15 dann sie was in seine arm geschlossen anhuben ze schreyen vnd Riczardo ir mit der einen hant den munt verhielt zů ir sprache; fraw es mag ye [111^d] nit anders gesein waz geschehen ist daz es nit geschehen sey vnd das ir schriet eüer lebtage so vermügt ir nit anders mit eüerm schreien dann euch alleine schande pringen, vnd wo ir schreit oder so-
20 vil thut das man diser sache inne wirt; czweierley sich zu eüerm schaden begeben müssen. Das erste ist das ir eüer ere swecht vnd eüern gůten leynt entwicht; Dann wenn ir sprechet das ich euch in das pade ze komen betrogen hab, so würd ich neyn sprechen es sey nit ware, sunder ich hab euch durch gelte vnd gabe her komen machen vnd das
25 selbig hab ich euch nach dem ir von mir hoffet nitt geben vmb des willen ir seyt gen mir in zorn gefallen vnd sölich romor gemacht, so wist ir wol daz volcke ist ee geschicket übel ze gelauben dann gůt Darvmb wirt mir nit minder gelaubet dann euch; Darnach czwischen euerm man vnd meinem tötliche feintschaft wachsen wird vnd möcht sich auch
30 wol begeben ich neme in als palde als er mir das leben dez ir hin für nymer frölich würdet; darumb mein allerliebste frawe nicht wölt euch selbes zů einer stunde aller eüer ern entpfremden mich vnd eüern man in sorge vnd angst seczen [112^a] Ir seyt nit die erste noch die leste sein wert; die betrogenn worden ist, So han ich euch nit betrogen das
35 eüer ze nemen, sunder das meine ze geben vnd von überflüssiger liebe die ich euch alweg getragen han pin peczungen gewesen zů thon das ich gethön habe vnd geschicket pin stäcz eüer williger diener ze sein; Wiewol lange zeit ist ich vnd daz mein eüer diener gewesen sein. also

stülen sie hin für ymmer vnd ewig sein; frawe ir seyt weiß in andern sachen
 darumb ich hoffe ir in diser sach auch sein wert. Diweyl Riczardo also mit
 ir redet sie stäcz weinet, vnnnd ir leyt klaget betrübter dann sie frawe ye
 warde; doch Riczardo wort mit ir selbs bedachte wol erkante das Riczardo
 5 gesprochen het müglichen vnd war were; Zû im sprache Riczarde ich weiß
 nicht wie mir got des vergüten mage das ich dir ymmer vergessenn müge
 daz du mir getun hast, Doch ich wil nicht schreyen an disem ende do mich
 mein getrewe eyfeltigkeit vnd nitt vnkettscheit hin getragen hat Aber des
 piß on czweyfel daz ich nymer frölich würde! ich seche mich dann durch
 10 einen oder andern wege an dir gerochen Darumb lasse mich gen nicht halt
 mich mer! du hast geha[112^b]bt deinen willen vnd hast mich gelestert
 nach deinem gefallen lasse mich dez pit ich dich Riczardo der frawen
 zorn vnd betrübt gemüte wol erkante im für name ir nicht ze lassen er
 het dann iren fride, vnd sie mit diemütigen senften Worten anhuben ir
 15 hertigkeit zu erweichen vnd ir so vil saget vnd pate daz er sie über-
 wante vnd sich mit im in fride seczte, vnd also mit peyder willen nach
 dem als sich verlossen het etliche stunde mit einander in grossem lust
 vnd freuden lagen. Do vernam erste die fraw daz das halsen vnd küssen
 der fremden liebhaber süsser vnd lieplicher was dann das der emenner;
 20 Also iren herten willen gen Riczardo keret in süsse liebe in hinfür von
 ganzem herczen liebe het; Darnach lange zeit mit einander in ver-
 porgner liebe lebten; got wölle daz wir die vnsern auch also in liebe
 zucht vnd freuden vertreiben mügen.

Ein iunge man genant Thedaldo mit einer frawen die er von
 25 ganzem herczen liebe het sere betrübet was vnd grosses vnmütes
 vnd traurikeit halben von Florenz seiner stat wege zoche vnd nach
 etlicher vergangen zeit in pilgrems form wider kam mit der frawen
 redet ir [112^c] zû versten gabe das groß übel das sy wider in be-
 gangen het Das sy ir von herczen leyt sein ließ vnd er ir zeliiebe ir
 30 man auß gefencknüss vnd von dem tode lediget der in sölt getöt
 haben Darnach lange zeit mit weißheit vnd freuden der frawen willen
 mit dem sein vermischt.

Frawe Fiametta irer rede vnd netten fabel geschwigen waz; das
 mit lobe der andern vnd domit die künigin nicht zeit verlore palde Emilia
 35 gepote etwas nettes zû sagen Die anhuben vnd sprach; Mein gefallen ist
 wider in vnser stat ze komen vnd nicht thon als die czwu vor gethon

haben die Napels vnd ander stet gesucht mit iren nuen histori haben
 Vnd das wie ein iunger vnser purger sein verloren liebe vnd schöne
 frawen wider gewan als ich euch sagen will Es was in vnser stat ein
 iunger purger genant Thedaldo von dem geschlecht Elisey der ein iunge
 5 purgerin huldet vnd liebe het genant fraw Ermelina vnd erbern manes
 weybe genant Aldobrandin die Thedaldo vmb ir löblichen zucht vnd grossen
 schöne willen von ganzem seinen herczen ob allen andern frawen liebe
 hat. vnd auch der würdig vnd ge[112^d]weltig was zů allem seinen willen.
 Aber in sölichem luste vnd freuden mit ir lange zů sten im daz gelück
 10 sere wider waz die vrsache ir wol vernemen wert. Die schöne frawe
 lang zeitt sich mit irem leibe zů Thedaldo willen geschicket het; vnd
 nun gechling sich sein ganz entschlagen het vnd im in keinen wege mer
 wolte ze willen wern als sie vor getun het nicht alleine mer deinen,
 sunder seiner potschaft keine mer vernemen noch sechen noch hören
 15 wolte; dovon Thedaldo in grosse bertrübung vnd traurikeit fiele; Aber
 sein liebe also verporgen was das nyemant die vrsache seines vnmütes
 gewissen mocht. Er sich mangerley versucht ob er die vnerschulten
 verloren liebe wider gehaben möcht; Aber alle seine müe verloren sache
 Darumb mer dann halber verczaget im gedacht auß der welte zů zichen,
 20 do mit er ir nicht fretde gebe; in also betrübten ze sechen, der die
 seiner trübsal vrsache was, sich schicket vnd bereytet das gelt name
 das er gehaben mocht, vnd heimlich an yemant vrlab außgenommen einen
 seinen getrüen der alle seine geheyme west wege auß der stat reyte vnd
 gen Anthona kam vnd sich hin für nennet Filipp? Do er sich zů
 25 [113^a] einem reichen kaufman verdinget mit dem er auf einem seinen
 schiffe in Cipri fure, vnd dem kaufman sein weys zucht vnd geperde
 also gefiele vnd in sölicher masse liebet; das er im nicht alleine ein
 güten sold schuffe; sunder in eins teyles seines gewins tälhaftig machet;
 im den mern teyle seines geschefftes vnder handen gabe; do mit er
 30 sölichen fleysse het das er in kurzzen iaren ein reich kaufman warde;
 Doch noch pey allen seinen gescheften offte vnd dicke die grossen herti-
 keit seiner lieben frawen pedachte mit der liebe im noch stäcz sein hercz
 prant vnd durch gangen was, vnd grossen willen hette sie ein fart zů
 sechen doch als von grosser stetickeit was das er syben ganz iare den
 35 streyt sölicher liebe überwante. Nun eines tages sich begabe das er in
 Cipri singen höret ein liet oder gesange das er selbes von seiner liebe
 frawen gedicht vnd gemacht het. Darinne alle liebe die er ir vnd sie
 im truge vnd peyder freude die sie mit einander zů manchenmalen enpfan-

gen hetten alle in sölchem gesange begriffen waren; darumb im gedachte nicht müglich were daz sie sein zů grunt vergessen het, vnd in grosse begir enczündet sie ze sechen, vnd sölchen willen nitt [113^b] lenger vertragen mocht; sich schicket vnd pereytet wider heyme in sein stat zů
 5 zichen Des sein ordnung gab vnd mit einem seinen knecht wider in Anchona kame do er sein güte fande dās er in Cipri geladen het, vnd gen Florencz schicket einem Anchonitaner der sein gůt freunt vnd gűnner was vnd er verporgen in pilgrims forme als er von dem heiligen grabe kōme; sich mit seinem knecht gen Florencz füget; Do er in czweyer
 10 prűder herber lag die da nahent pey seiner lieben frawen hause waz ein zoche, vnd so palde nicht komen was e er icht anders thet für der frawen hause ginge ob er sy gesechen möchte, Aber alle tůre vnd fenster verspert sache im gedacht sie villeicht tod wer oder anderswo hin geczogen vnd vor irer tůre sten sach vir seiner eygen prűder alle in swarz gekleydet; Das in fremde nam; im gedacht nun were mag nůr von den
 15 vnsern tod sein; er wolt sich gen in noch nit eygen, vnd sich verkert het das er wol on sorge was daz er von nyemant erkant wůrde, vnd zů nachst do pey an einen laden ginge vnd fraget warumb die vier man also in swarcz gekleydt wern; im zů antwort warde; wie pey czehen
 20 tagen were daz ir prűder einer [113^c] genant Thedaldo zů diser zeyt auß fremden landen komen was hette tode empfangen an dem ende do seine prűder sten Darumb sie alle in swarz gekleidet Nun saget man sy haben vor einen rechten vnd dem richter beweist wie daz einer genant Aldobrandino den sie in gefencknůß pracht haben in sol getöt haben; dann er
 25 huldet im sein frawen vnd het sy liebe der vnerkante waz herwider komen pey ir ze sein; Daz nam Thedaldo gar ein fremde sache das im ein ander also enliche were daz man meynet er wers vnd im vmb Aldobrandino gar sere leyt was; wol vernomen het wie die frawe pey lebenn frische vnd gesunt were. Nun es sich gen der nacht nahent er wol mit mancherley
 30 gedancke wider in sein herber ginge, vnd nach dem nachtmale ze öbrist in das hause geleget warde; Do er in sweren gedancken lag vnnd auch nye kein schlaffe im in sein augen komen mochte; das villeicht von dem herten pette oder übeln essen bekommen möcht; vnd nun mitte nacht vergangen was In dem in daucht wie leute ob dem tache des hauß ab in
 35 daz hause stigen. Er mit [113^d] halber forchte aufstunde an die kamer-tůre ginge durch ein klunssen hinauß sache do er ein liecht erscheinen sache, daz ein schöne frawe in der hant truge, vnd gegen ir komenn drey iunge manne die ab dem tache gestigen waren vnd nach etlichem

schimpfe vnd ir kürzweyle mit der frawenn einer zu dem andern sprache
Nu sey got lob, wir nun wol frey vnd sicher leben Thedaldo todes
halben! Dann seine pröder vor dem richter seinen tode auf Aldobrandino
peweist haben, vnd er hat aller sache bekent vnd verähen vnd die
5 vrteyle gefallen ist vnd beschriben daz er auch sterben sol; doch auß
sölcher sache sol nyemant reden; Dann wo ein sölches zû liecht kôme
daz wir an sölchem tode schuldig weren So wer wir des todes als Aldobrandin
ist eygen; daz geredt mit der frawen ir freude besten vnd mit
ir schlaffen gingen. Do nun Thedaldo dise abentetter vnd mort gar
10 abend vernomen het; Anhube ze bedencken das grosse übel vnd vnrecht
darinne die gemüte vnd gedancke der menschen gefallen waren Thedaldo
tod halben der noch pey leben was. [114^a] Von erste er seine
pröder bedachte das die einen freunden für iren pruder geklaget
pewinet vnd begraben hetten; darnach wie Aldobrandin so vnschuldigli-
15 chen zû sölchem tode kôme der verklagt vnd verurteylt was ze sterben.
darnach fürpaß weyter pedacht die grossen vnrecht vnd falchen vrteyle
der richter mit iren plinden rechten die zû manchem male mere fleyß
haben dann note ist die übel vnd vnrecht zû suchen darinne offt in her-
teikeit fallenn vnd das falsch für die warheit peweisen machen vnd spre-
20 chen gerechtikeit zû thon sey götlich, wo sie des teuffels mit leyb vnd
sele vnd aller poßheit vol sein. Darnach seine gedancken zû Aldobrandin
heyle keret, vnd was in sölchen sachen ze tun wer mit im selbes bestât
Do er nun dez morgens auf gestanden waz vnd in zeyt daucht er seinen
knecht liesse vnd allein zû seiner lieben hause ginge daz er zû seinem
25 geltücke offen fand vnd dareine ging do er sein liebe elende frawen
Ermelina klagent in grossem leyt an dem tenne siczent fande; Das im
sein hercz erweichte vnd mit ir weinen vnd klagen muste [114^b] Sich
zû ir nahent vnd sprache Fraw nicht petrübet euch so sere! dann euer
fride sich etich nahent. Do in die frawe vername ir angesicht aufrichtet
30 zû im weinent sprach. Güter man du mich dünkest ein fremde pilgrem?
waz ist dir von meinem fride oder vnfride kunt. Der pilgrem ir ant-
würt vnd sprach; fraw ich pin ein pilgrem vnd von Constantinopel her
komen von got zû euch gesant; euer grosses leyt klagen vnd weinen in
fride seczen vnd freude kern, vnd euch euern man von dem tode zû dem
35 leben pringen; Wie sprach die frawe pistu du von Constantinopel
vnd komest erst iczunde here wie mage dir mein man vnd sein trübsal
wissent sein oder wer pin ich. Der pilgrem anhube von anfang zû
ende ir die ganczen histori irer vnd ires mans Aldobrandin trübsal halben

vnd waz sich allenthalben verlossen hat ir saget vnd zů wissenn thet; Mer ir saget wer sie vnd ir geschlecht waz; vnd wie lange sie pey irem manne gewesen was; Vnd mer vil ander sache die im wissent waren; Des sich die fraw in allen disen sachen auch sy [114^c] sere wonder name in für

5 einen heiligen profeten hielte. Für in nyder knyet durch got pate wer er vmb Aldobrandin heyle darkomen das er sich dann nit saumet dann die zeit kurz ist vnd die vrteile seines todes gefallen ist. Der pilgrem sich gen der frawen sere heilig peweyset vnd zů ir sprach frawe stet auf nit weinet mere nemet ware meiner rede vnd euch das yemant zů sagen; das

10 ich euch verkünd vnd sage. Eüer grosser vnmüte vnd trübsal sich begebenn vmb einer grossen sünde willen die ir begangen vnd verpracht habt; derselben sünde ein teyle hat got durch dise gegenwürtige trübsal püssen wöllen vnd sein wille nemlich ist; das ir euch sölcher sünde genczlich reiniget vnd wider keret Anders euch würd noch vil grösser vngemach zů

15 sten dann der vergangen gewesen ist. Die fraw dem pilgrem antwort vnd sprach. Herre ich han vil grosser sünde mein tage begangen; Aber ich kan nit vernemen welicher sünd halben got mir dise trübsal zů gesant hat; oder in welcher sünde ich widerkerung thon solt. Darumb ist euch dieselbige mein sünde wissent so pit ich euch durch got das ir sie mir saget;

20 so sol ich all mein ver[114^d]mügen tun die wider za keren Frawe ia ich weiß wol weliche die sünde ist sprach der pilgrem; aber ich muß euch pas fragen vnd fürpaß vernemen; Damit ir selbes pekennen weret vnd darüber des grösser reüe habt. Nun saget mir frawe ist euch ingedencke ob ir ye keinen liebhaber oder hulder gehabt hat. Do daz die fraw vername Ein

25 groß seüffcen ir von herzen ginge, vnd sich der frage frömde nam; Dann nit gelauben mochte das yemant were der icht von ir ze sagen weste, wie wole in den vergangen tagen der dasig der da was getöt worden vnd für Thedaldo waz pegraben worden Do man wol durch etlich vnweise wort ein klein von ir gemurmelt hette; Dez Thedaldo getreuer geselle vrsache

30 gewesen was, dem alle sein geheym wissent waz Nun sich ich wol das euch von got alle heimlichkeit der menschen kunt sein Darumb ich euch die meinen nicht verpergen wille. Es ist ware das ich in meinen iungen tagen ob allen mannen liebe het den elenden iungen genant Thedaldo des tode meinem manne zů geschriben ist, vnd des tode ich teglich pe-

35 weinet habe wie wol ich mich wider in herte vnd wilde peweyßet. Doch in sölcher liebe gen [115^a] im enczündet waz daz weder sein ferre von dann zichen noch sein kleglicher tod mit in nye haben auß meinem herzen pringen mügen. Der pilgrem zů ir sprach Fraw den elenden der

do tod ist habt ir nye lieb gehabt; Aber Thedaldo Elisey wol euch geliebet vnd den ir beschlaffen habt. Nun saget mir frawe die vrsache das ir euch so gar hertiglich wider in seczet het er in keinerley wider euch gethon Die fraw sprach für ware neyn er, er hat mir nye leyt pe-
 5 weist; aber die vrsache meines czorns; daz waren eines verfluchten vnd maledeyten münches wort dem ich einest peichtet; do ich im sagt von der liebe vnd freuntschaft die er zů einem andern manne het; Er über mich ein sölches romor vnd geschrey machte das ich die erschrecken noch nit überwunden han, vnd zů mir sprache er liesse ich mich sölcher
 10 sache nit; ich zů dem teüfel in abgrunt der helle füre Da würde ich in das feüer der verdampften gesezet, vnd mir sölche forcht auf thet; daz ich mir genczlich für nam Thedaldo liebe vnd freuntschaft nitt mer wöllen; noch seiner prieffe keinen mere hören wölte Do er daz vernam als ich mir zů versten gibe er leydes vnd vnmüteshalben weg in frö[115^b]mde
 15 lant zoche. Ich sache in abnemen vnd als den schne zergen do ich sein kein genad mer haben wolt; noch mocht er mein hert gemüte nicht erweichen. Do sprach der pilgrem frawe das ist alleine die sünde die da aller eüer trübsal vrsache ist, so weis ich wol das euch Thedaldo in liebe ze haben nit genöt het; sunder eür eygner wille dar zů geladen
 20 vnd pracht hat in liebe ze haben vnd euch dar zů gefallen het; doch sölche merckliche widerdrisse die ir im pweist habt die nit angesehen hat, sunder wo er euch vor liebe het; nun wol zů tausent mal lieber dann ye hette, Was im nun also welche vrsache solt euch ymer darzů pracht haben in euch ze nemen vnd in so herte ze sein; ir sölt euch
 25 paß pedacht haben vnd nit dinge gethon habenn darnach rewe vnd leyt gefolget het; Dann in gleicher masse als er eür warde, wurt ir sein wer er nit euer gewesen wie het ir mit im euer gefallenn thon mügen als mit euch selbes, vnd euch in on schulde also ze nemen das ein grosse rauberey vnd übel gethon waz Sunder wo das on seinen willen geschahe.
 30 ir sült wissen daz ich ein münch pin vnd der münch sytten weiß, vnd ob ich etwaz von in minder dann wol in [115^c] eüerm dienst vnd frumen redet ist mir nit in übel noch in argem von nyemant auf ze nemen als einen ändern; Dann mein syn ist ye von in euch etliche artickel zů sagen; damit ir sy hinfür erkennen müget, vnd euch vor in paß dann ir piß her
 35 gethon habt wisset zů hüten Es ist wol zeit gewesen das die münche selig vnd heilige leüte waren aber die heütigen ze tage münch heissen vnd wöllen gehalten sein. nit anders das dem münche zů gehört tun noch haben dann allein die kapen; anders nit münchisch an in haben darumb

nit münche sein, sunder alle tetffel sein; dann wo ire kappen von irem
 öbristen enge schmale grobe geordinirt waren, vnd alle weltliche ere
 verschmechten; so machen sie iczund ire röcke weyt schöne czwifach
 von dem feinsten tuch so mans gehalten mage nach dem reichsten vnd
 5 wirdigsten vnd in der kirchen sich beschawen vnd sich in selbes wol ge-
 fallen lassen zů gleicher weiß on alle schame, als die leyen auf den
 plätzen mit irem geprenge tun; geleihe als der fischer mit dem necze
 in dem wasser die fische fecht Also auch die münche mit iren schönen
 weiten kuttenn; Die eyfeltigen nunnen wittib frawen vnd manne sich
 10 fleissen [115^d] dar ein ze hüllen vnd fachen Das ist ir gröster fleyße den
 sie thon vnd do mit ich pas die warheit sage wo vor zeytenn die münche
 der menschen heyle begerten; nun sie der schönen frawen vnd grossen
 reichthums begern, vnd mit grossem irem studirn geschrey vnd romore
 sich fleissen die gemüte der eyfeltigen zů erschrecken vnd in zů versten
 15 geben; wie durch almusen vnd messe sprechen die sünde vergeben vnd
 gereyniget werden, Sie thon als die do durch verczagnuß vnd nit durch
 andacht willen sich in den orden geben haben, sunder als die verczag-
 tenn die sich nit zu nern trauen an söliche ende geflochen sein vund sich
 zů münchen gemacht haben arbet vnd vnruhe ze flichen Do schicket in
 20 einer wein der ander kās vnd prot vmb der vergangen sele willen; on
 czweifel es ist ware das, das almusen vnd gepete die sünde abnemen;
 aber wenn die erkenten die söliche almusen geben wem sie das geben sy
 sölten daz zů hundert malen ee vnter die schwein werffen; dann ye
 ermer sie sein ye minder sorge vnd mere rwe haben, sie schreyen
 25 über das volck vmb das dez sy selbs stäcz begern sein vnd vngetun nit
 lassen sy schreien vnd predigen wider die vnkeuschen man [116^a] Da-
 mit sich die beschrien bekern vnd den schreieten die frawen wern, vnd
 das man die pösen gewin vnd wucher wider kere, vnd vmb gotz willen
 gebe; do mit sy ir kuttenn dester weyter vnd reicher machen mügen;
 30 sie suchen pistum vnd abtey reiche prelatur vnd wenn man sie darumb
 straffet vnd ze rede seczet so ist ir antwort; thut daz wir euch sagen vnd
 predigen vnd nit daz wir tun O wie ist ir so vil den sy söliche antwort
 geben vnd in zů versten geben wie daz wider geben dez pösen gütz ein
 würdige abladung sey iglicher grossen swerung der sünd! aber vil sein
 35 die irer meinung nit versten; sie wöllen daz ir tun sölt was sie euch
 sagen; daz ist das ir in ire seckell mit pfening fület vnd in eüer heym-
 lickeit offent keuscheit pflēget gedultig vnd mitleydig seit alle wider-
 drisse vergebenn euch hütet vor übel reden; daz sein alles gūte zūch-

tige heilige werck? Aber warumb sprechen sie das; darumb daz sie auch irem willen mügen ein genügen tun als die leyen tun? wer ist der der do nit wisse daz ir faulkeit on gelt nit gewern mag Aber gibstu auß das dein in lust vnd freuden, so muß der münch sölcher freude enpern

5 [116^b] gestu vmb die schönen frawen so mag der münch nit hin zů kome; pistu dann vngedultig oder vnleydig so enthar der münch nit in dem hause komen dein gesinde ze bekütern Nun seytmal sie sich so gütt vnd heilig düncken? warumb volgen sie nit dem als Kristus in dem euangeli sprach; Kristus leret als er thet; darumb tun sie vor wol dar-

10 nach vns dasselbig lern; Ich hab ir meine tag pey tausent gesechen grosse pueler hoffirer der schönen frawen, nicht allein den weltlichen sunder auch den in den klöstern hoffirten; Auch die dasigen die das romore auff dem predigstul an den grösten machen dieselben an den meisten sölchen geschefften nach gen. Nun ich euch zů gibe daz euch

15 der münch mit seinem geschrey straffet vnd euch erschrecken pracht wie das ee prechen grosse sünde sey doch nit mynder sünde ist ein man rauben oder den töten oder in das elende schicken. Dez geyt mir ein iglicher recht vnd ist das pillich. Die fraw die des mannes freuntschaft in iren willen begert daz ist ein natürliche sünde. Aber ein man rauben

20 töten vnd in das elende iagen das von pöser vntugent des gemüte bekomet; Als ich vor [116^c] gesprochen han ir beraubt Thedaldo. Ir durch ewern eygen willen sein worden wart; darnach an euch nit geprache daz ir im nit den tode thet oder er vmb ewern willen mit seinen eygen henden im selbes das leben name. Nun wille das recht; das ein

25 iglich persone die do üfels vrsache ist der pein vnd puß als wol verfallen ist als der übel theter; dann ir vrsache seyt das Thedaldo syben gancze iare daz elende gepauet hat des ir mir nitt laugen müget In dem ir grösser sünde begangen habt dann ir mit der sünde darvmb euch der münch beschrien hat gethon habt. Nun seche wir ob Thedaldo vmb euch ein sölches

30 verschuldet habe; für war neyn er als ir dann selbes bekant habt, vnd ich nemlich weyß das er euch lieber hette dann sich selbes; kein frawe warde nye geeret gelobet, noch gepreyset als ir im wart wo er on sorge von euch reden mochte alle seine freude lust vnd ere in euern hendenn stunde. was er nit von geschlecht ein edel iunger was er nit vnter den

35 andern iungen purgern ein gerade iüngling? was er nicht redlich in allen sachenn als iungen purgern zů gepürt Er was von yedermann liebe [116^d] vnd wert gehalten; Des ir nit neyn sprechen müget; darvmb wie mocht ir euch durch eines vnnützen vnd neydigen münches wort so gar

hertiglich wider in sezenn. Ich weiß nicht was Torheit daz der frawen
 gesein mage, die die manne fleuchet vnd klein von in halten vnd nit
 an sich selbes gedennen; wer sie seyen vnd wie groß der adel von got
 über alle andre tiere der welt dem man gegeben ist Sy sölten sich des
 glorirn wo sy von in wern liebe gehalten vnd daz in besunder genade
 haben vnd liebe haben wo sie in möchten zů liebe wern damit ir freunt-
 schaft ewig were, vnd nit thon als ir von eines münches wort thet; Der
 fürwar ein rechter suppen sauffer sein mochte als ir wol wist, vnd villeicht
 selbes begeret an dez stat ze komen den er vertriben hette; das ist die
 10 sünde die das götlich gericht mit der wage der gerechtikeit richt, vnd
 zů ende gefüget hat; auch dise sünde nit wöllen vngerochen lassen, vnd
 gleich als ir euch on alle vrsach Thealdo namet also auch ewer man
 on alle schulde vmb Thealdo willen in gefencknůß angst vnd note ko-
 men ist, vnd ir in betrübunge seyt? Wölt ir nun [117^a] sölcher sache
 15 erlediget weren so müst ir mir versprechen vnd das versprochen hal-
 ten. Daz ist das, ob sich immer begeben daz Thedaldo auß dem elende
 wider zů lande keme; das ir im euer hulde liebe vnd genade der in-
 sten freuntschaft ewers herzen wider gebet vnd mitteylen wöllet, vnd
 in wider in den ersten stant ewer liebe sezet; O ir törhetes weybe
 20 das ir dem falschen neydigen münche ye so vil gelaubet Do mit er sein
 rede vnd wort endet Die frawe die dem pilgrem fleiß zů gehört vnd
 vernomen het, vnd nach allem iren geduncken ir die warheit gesaget
 het, vnd on czweyfel gelaubt als er gesprochen het daz alleine die sünde
 aller irer trübsal vrsache were; Zů dem pilgrem sprach freunt gotz ich
 25 bekenn die warheit aller sache nach dem mir durch eüere wort ist pe-
 weist worden. Nun ich erste erkenn wer die münch sein die mich piß
 her alle heilig dauchten vnd on czweyfel wol erkenne das ich in Thedaldo
 schwerlich gesündet vnd wider in gethon han. Fürware wo ich daz in der
 masse als ir gesprochenn habt widerkern möchte, ich im dar zů willig
 30 vnd bereyt were. Aber wie mag das ge[117^b]sein dann er meg ye
 nicht mer herwider komen; dann er tod ist. Darumb was man nitt
 das sol man ze thon nicht verpunden sein; Darumb nicht not ist das
 ich euch icht verspriche. Der pilgrem sprache frawe Thedaldo ist nicht
 tode als mir durch den götlichen gewalt ist beweist wordenn Sunder er
 35 ist frische gesunt vnd in gůtem stant; nür er in euer genade were;
 secht was ir redet sprach die frawe; Ich sache in tode vor meinem
 hause vnd het in in meinen armen vnd mit meinen czähern im sein an-
 gesicht neczet, die villeicht vrsache gaben daz man etliche vnczüchtige

wort von mir geret hat. Do sprach der pilgrem? frawe was ist das, daz ir da sprecht Ich sag euch fürware das Thedaldo pey leben ist, vnd wo ir mir verspricht vnd mir das halt so hoff ich ir sült in palde sechen. Die fraw sprach; Herr wes ir begert das wil ich tun vnd
 5 grösser freude mir nicht zů steen möcht; Dann meines mannes tode frey zů sechen vnd Thedaldo an sachen lebendig were. Nun Thedaldo wol zeit dauchte das er sich offnet vnd der frawenn möcht zů erkennen geben vnd sy eygentlicher trösten ires mannes heyle vnd freyung [117^c] sicherlicher machen möchte; er anhub vnd sprach? Fraw do
 10 mit ich euch etters mans palde erfreue Ich euch ein große heimliche sache weisen müsse Aber euch hüten wert als liebe euch daz leben etters mans ist das yemant ze wissen tun Nun waren sie genug ferre von dem andern haußgesind vnd alleine; vnd nun der heilikeit des pilgrem als sy dauchte die pey im were der zů güter masse ein ge-
 15 nügen empfangen het Thedaldo einen gülden ring her für zoche den er lang zeit mit grossem fleiß bewart het den im die fraw geben het do er die lesten nacht pey ir gelegen was den er ir czeyget vnd sprach? Frawe kent ir daz gülden fingerlein; Also palde sie das sache erkante vnd sprach Herre ia ich kenne den ring Ich gab in Thedaldo. Der
 20 pilgrem sich aufricht vnd sein pilgrems koczen vnd hüte von im warffe vnd in Tuschaner sprach mit der frawe anhuben ze reden vnd sprach? fraw kent ir mich dann nicht; die fraw in an sache vnd erkante das er Thedaldo was vnd von im schrecken enpfinge; forcht het er wer ein geist In Thedaldo form vnd nicht von Constantinopel also herkommen;
 25 sunder auß dem grabe also erstander [117^d] anhub ze fliehen dennoch nit anders gelaubet dann Thedaldo tode wer. Do Thedaldo sache das die frawe forcht het zů ir sprach; frawe seyt on sorge, nicht czweyfelt ich pin ewer Thedaldo frisch vnd gesunt nye starbe noch getöt warde als dann ir vnd mein pröder gelaubet. Von disen wortenn die frawe
 30 wider ein hercze finge in paß vername vnd ansechen warde mit ir selbes nemlich vnd für ware bestät er Thedaldo wer vnd mit weinenden augen sich im an sein haß warffe in lieplichen halset vnd küsset. Zů im sprach. Nun piß mir got wilkomen du mein außerwelter herre vnd freunt Thedaldo; Er sie in sein arme finge wol ze tausentmalen küsset
 35 zů ir sprach Frawe iczund nicht zeit anders ze thon; Ich wil gen vnd sechen daz euch Aldobrandin frisch vnd gesunt widerwerde vnd hoffe e der morig abend kome ir güte mere haben sölt han ich sy anders als ich hoffe zů seinem heyle Doch wie dem sey so wille ich heint wider mügen

zû euch komen vnd euch paß sagen das sich iczunde zû lange zûge sein
koczen wider name vnd pilgrams hute wider auffseczte; Die frawen
noch ein fart freüntlich küst vnd tröstet [118^a] von ir schiede vnd zû
Aldobrandin in die gefencknûß ginge Der mer mit forchte des todes
5 warten waz dann mit hoffnung seines lebens zû dem Thedaldo kam als
einer der in trösten wölt mit vrlaub des hütters zû im in die gefencknûß
ginge sich zû im nyder seczet vnd also sprache Aldobrandin Ich pin
einer dein groß freünt von got zû dir gesant vmb deines heyles willenn
das mir vmb deiner vnschulde erparmet hette wo du mich im zû ern
10 einer kleinen gabe gewern wilt; on czweyfel ee der morgig tag verget
wo du der vrteile des todes warten pist, Du freyhet deines lebens ge-
weise sein solt; Zû dem Aldobrandin sprache frommer piderman seyt-
mal du daz heyle meines lebens suchen gest vnd du mir vnerkant pist
noch nit gedенcke das ich dich ye gesechen habe für ware ich gelaube
15 du mein grosser freünt sein solte als du sprichest. werlichen der sünde
halben darumb ich des todes sol wirdig sein nâch der verklager fürle-
gung vnd des richters falches richtenn; der ich mich vor got vnschul-
dige spriche vnd sölchenn tode nye verdient hab; wol in andern sachen
vil gesündet vnd wider got gethon habe, die mich vil [118^b] leicht iczund
20 an das ende pracht haben; Aber das sage ich dir; Ist es müglich daz
mir genade vnd parmherczigkeit durch got geschicht; nicht allein ein
klein gabe als du begerest Sunder ein iglichen grossen gabe verpunden
pin dich zû gewern; Darumb begere waz dir liebet vnd dein gefallen
ist vnd piß des on czweyfel wo ich mit dem leben darvon kôme das ich
25 dir halten wille was ich dir verspriche. Der pilgrem zû im sprach Al-
dobrandin des ich begere vnd haben wil ist nicht anders dann das du
Thedaldo prûder vergebest die dich dann pracht haben do du pist,
vnd fürware meinten du an irem pruder schuldig werest, vnd das du sie
hin fûre haltest als deine leypliche prûder vnd gûte freûnde; wo sie
30 des an dich begern; Zû dem Aldobrandin sprach; wie süsse vns dün-
cket, vnd wie mit so grosser inprünstiger begirde wir begern vnser en-
pfangne widerrisse zû rechnen. Aber ein sölches ich in mir nicht ge-
statten noch mein gemût nymer bedencken sol; Seytmal mir got wille
genade thon vnnd mich meines lebens erfretien Darumb ich williglich
35 vnd gern bereyt pin zû vergebenn vnd iczund zû diser stund in
[118^c] lauter vergibe vnd ist sach daz ich auß diser trûbsal kom; ich
verspriche alles das ze tun daz dir liebet vnd dein gefallenn ist. Alle
dise wort dem pilgrem wolgefielen Im für pas nicht mere sagen wolt;

Dann alleine zů im sprache vund in pate das er gůtz můtz were, vnd sich wol gehůbe; dann on czweyfell ee der nachste tage verginge er gůte mer seines heyles haben sůlt; Mit dem von im schiede vnd fůr die herschafft ginge, vnd in geheyme zů einem ritter der zů der zeit her-
5 schafft in hielte ginge; Zů dem er sprache nach seinem grůsse. Herre ein iglich edel vnd wirdig person sich gern můen sol; damit ein igliche verporgne warheit zů lichte kům erkante vnd funden werde, Sunder die, die sich finden an sůlichem ende darinne ir seyt do mit nitt gepeyniget werden die nit gesůndet haben, vnd daz die gepůbt wern die der
10 sůnde vrsach sein vnd die verpracht haben; Dovon euch ere vnd lobe von got vnd der welt wechste, vnd domit sůliche ůbelthůter die verschult gaben gepeyniget vnd gepůbt werden pin ich her zů euch komen als euch wol wissent ist wie ir so gar heftiglichen wider den gůten man [118^d] Aldobrandin Palernmini gericht vnd procedirt habt vnd lasset
15 euch fůrware gedůnckenn er sey der gewesen der Thedaldo Elisey das leben genomen hab; Darumb ir im meinet den tode zeben; Das fůrwar falsche vnd nicht recht getun ist; Als ich dann hoffe ee mitte nacht vergee ich euch dieselben můrder die dem iungen den tode gethon haben in euer hende geben. Der edele ritter der vmb Aldobrandin be-
20 sunder leytt het, dem pilgrem seine oren in ze hůrn williglich verleche, vnd diser sache halben gar mancherley mit einander retten vnd des eins wurden; das in dem ersten schlafe derselben nacht die czwen průder oder wirte mit sampt ir meyde gefangen vnd fůr den richter gefůrt wurden; vor dem iglichs besunder der missetat bekanten. Darnach
25 alle mit einander veriachen vnd Thedaldo tode vnd mord bekanten, vnd sich des alle schuldig gaben aber sein nicht kuntschaft gehabt hetten, vnd die vrsach warumb sie das gethon hetten were Sy sprachen do sie nitt ze hause marn er ir einer frawen het gewalte thon zů seinem willen. Nun der pilgrem der dreyer gefangenn person vernomen het; mit vr-
30 laube [119^a] des ritters von dann schiede vnd verporgen so er erst mochte sich zů seiner lieben frawen heyme fůget; die er sein alleine wartend fand, vnd alles ir gesinde ze pette gangen was; Die mit grosser begide gůter mere ires mans halben von im warten was, vnd sich mit iren Thedaldo trůsten můchte. Er mit frůlichem angesichte zů
35 ir sprach; Mein allerliebste frau gehabt euch wol vnd freůt euch fůrware piů morgen sůlt ir hie pey euch eůern Aldobrandin frich vnd gesunt haben, vnd do mit sie des on czweyfel were. Er ir allez das sich verlossen vnd gethon het sagen vnd ze wissen thet. Die frawe vmb der

czweyer gächlinger sache willen iren Thedaldo lebendig ze sechen den sie für tode beweynet het, vnd iren man auß angsten vnd nöten vnd seins lebens frey zü sechen den sie inderhalbe wenig tagen töten meinete zeklagen So frölich ward daz sie den mern teyle ires leibes vergasse vnd mit grossen freüden Thedaldo mit aufgethon armen in vmbfinge zü tausent malen halset vnd küsset. Zü hant darnach peyde mit einander ze pette gingen vnd peyde mit einem willen einickeit vnd fride machten; was freüde vnd lust [119^b] eines von dem andern enpfing das ließ ich euch vrteylen; darnach der neüe tag came vnd Thedaldo aufgestanden was vnd was ze thon sein meinung was er der frawen het zü versten geben vnd sy pate daz sy noch nyemant nit saget noch sich in keinerley mercken liesse, vnd in pilgrems form wider von ir ginge vnd der zeit wartet Aldobrandin sache zü ende pringen. Die herschaft die nun Aldobrandin vnschuldig westen in zü hant freye liessen, vnd nit vil stunde darnach vergingen die mörder an nem ende do sie das mort gethon hetten gericht worden Do nun Aldobrandin frey vnd ledig was mit grossen freüden sein vnd seiner hausfrawen, vnd aller seiner freude vnd günner alle got dem almechtigen danckten vnd lobten; do pey dez pilgrem nit vergassen wol erkanten das es alles durch des pilgrems wercke geschehen was; in zü hause füret zü im sprach; Die weyle es sein gefallen were in der stat ze sten pey nyemant sein sölte dann pey im; Im grosse ere von yederman beweist warde nyemant sich sein genuck gesechen mochte, sunder die fraw die wol weste wer er waz. Doch nach etlichen vergangen tagen [119^c] Thedaldo zeit dauchte; Seine prüder mit Aldobrandin in fride vnd son ze seczen; die sich sere beschamet hielten das sy Aldobrandin also grosses vnrecht zü gezogen hetten; sich ver im besorgten vnd alle gewapent gingen vnd Thedaldo zü Aldobrandin begeret dez er im in gefencknuß versprochen het. Dem Aldobrandin freyes mütes antwort er alweg bereyt were ze thon sein gefallen Thedaldo in pate daz er im ein köstlich male machet vnd im das lieche daz darzu gehört so wölt er die vier Thedaldo prüder zü seinem fride vnd male selbes von seinen wegen laden Des Aldobrandin wol ze müet vnd willig waz. Zü hant der pilgrem zü den vier prüdern ginge vnd als sölcher materi zü gepürt mancherley sein gespreche het vnd mit seinen züchtigen Worten Do wider sie nit reden mockten genuck rinck elich sy dar zü pracht. Dar si sich willigten Aldobrandin freuntschaft zü haben vnd daz die in kein wege außslagen sey vnd on in alle genade vnd vergebung begeren wölten, vnd do das gethon was.

Er sy vnd ir haußfrawen von Aldobrandin wegen auf den nachsten morgen zů hause mit im ze essen vnd seinem fride [119^a] lude; das sy auf sein trůe auff namen, nun dez morgens do des essen zeit komen waz Thedaldo der vier průder mit etlichen iren freunden in swarcz gekleydet in Aldobrandin hause wartet. Die do mit iren hausfrawen vnd andern freunden alle kamen, vnd gegenwůrtig yderman ire waffen von in worffen vnd sich ganzlich in Aldobrandin henden ergaben in paten daz er in vergebe das sie wider in verpracht vnd gethon hetten. Ein sůlches Aldobrandin mit grosser diemůtikeit von in aufnam in willighen vergabe vnd sie alle mit weinenden augen an ire můnde kůset vnd mit wenig worten in alle enpfangne widerdrisse vergabe. Darnach alle ire frawen kamen alle in swarcz gekleydet, vnd on rawen Ermelina hulde vnd genade begerten. Die von ir vnd auch eren freunden lieplich aufgenommen vnd enpfangen worden; darnach alle frawen vnd man mit grossem fleiß ze tische gedienet warn, vnd alle dinge lůblich vnd wirdig waren; dann alleine daz klagen vnd leyt tragenn der die in swarcz gekleydet warn, vmb des toden mannes willen. dar vmb des pilgrem herlich essen von in in dem nit gelobet was. [120^a] Das er gar palde vernomen het, vnd mit im selbes nun wol bedacht het, wie es zeit were alle traurikeit weg zenemen von dem tische auf stunde vnder dem die weyle die andern die frůchte enpfingen; Anhub ze reden vnd also sprach Mein aller liebste freůde průder vnd hern kein dinge an disem tische gemangelt hat ganz freůde ze haben dann alleine Thedaldo den ir stůcz secht vnd pey euch gewesen ist vnd ir sein nye erkant habt daz ein grosses wunder ist vnd da mit sich vnder freůde mere ich peczwungen pin in euch ze weisen vnd sechen lassen vnd zů erkennen geben. In dem den rauhen koczen von im warff; in einem seyden grůnen wammes vor in sten beleybe, vnd nit mit kleinem wunder von yderman angesechen vnd erkant warde; doch gůt zeit verginge ee yemant mit ganczer warheit gelauben mocht daz ers were; Doch do Thedaldo des geporen freunt alle gegenwůrtig waren er mit namen alle nennet vnd sich in gar wol zů erkennen gabe; Do pey was sich seythalben in siben iaren verloffet het in daz saget vnd ze wissen thet. Darumb alle seine průder vnd andre freunde von grossen ůbrigen freůden mit weynenden augen halsen vnd kůssen alle [120^b] zů im luffen in lieplichen enpfingen; desselben geleychen die frawen nach den mannen theten; Dann alleine ȳngenomen Ermelina; Des Aldobrandin war genomen het vnd zů ir sprach fraw warvmb thust du nit als die andern vnd ma-

chest fest vnd freude Thedaldo vnserm grösten freunde Do die frawe das vernam zû im sprach. Hie ist keine die im lieber vnd pillicher freude machte als ich thet vnd als die immer dann ander frawe ze thon pflichtig pin wann ich bedenk was ich durch in empfangen hab. Aber
5 die vrsache das ich das nicht enthue; daz sein die vnzüchtigen wort in disen tagen verlossen do ich klaget vnd weinet den, den wir für Thedaldo hielten; die mich machten sten vnd daz vnterwegen lassen. Zû der Aldobrandin sprach; gen hin mein liebes weib thue das ich dir sag laß mich dich gen den klaffern verantworten palde ste auf gee hin küsse
10 in vnd halse in vnd sage im dancke vnser peyder heile Die frawe die von irem herczen nit andern begeren was sich nit saumet ires mans gepott ze verpringen vnd als die andern getun hetten sie auch thet in lieplich enpfiehg freuntlichen halset vnd küsset. Aldobrandin seiner milten gütig[120^c]keit in disen sachen von Thedaldo prüdern vnd allen andern
15 sere gelobet ward. do von grosses gefallen hetten vnd alle vorige swere gedancke vnd pöse wort zerücke geleget vnd abgeleschet worden, vnd alle geleihe Thedaldo grosse freude machten vnd er selbes daz swarcz gewant seinen prüdern vnd swestern außzoche nach andern kleidern schicken musten; Darnach do sy von neuem gekleidt warn auch neue
20 freude sich anfinde mit singen danczen vnd springen; Also das köstlich male vnd essen einen verporgen anfang hette vnd einen frölichen außgange gewan öffentlich von yederman; Darnach mit grossen freuden alle in einer gesellschaft in Thedaldo hauß gingenn das nachtmale ze essen Also vil manchen tag vertriben vnd Thedaldo lange von allem
25 volcke der für ein wunder angesehen ward; Zû gleicher weise als ob er von dem tode erstanden were; Auch sein eygne prüder dez im onczweifel hetten ob ers were oder nicht, ganczlich gelaubten daz er pey leben were; noch ymmer gelaubt hetten het sich nit noch ein sache begeben do von sy klare worden daz ers was vnd daz ist Das sich eins
30 tages ongeferde füget das für ir hause etli[120^d]che fußknechte für gingen; die waren von Lunisana vnd Thedaldo sachen vnter seiner tür sten Im entgegen gingen vnd grüsten vnd zû im sprachen. wolste vnser Faczibolo den Thedaldo gegenwürtig seiner prüder antwort vnd sprach; Ir habt mich für einen andern ersehen; Do sie in reden hörten
35 erschrocken vnd sich schampten in paten daz er in verzeihe vnd werlich ir eynlicher seyt dann kein man ye warde einem vnsern gesellen genant Faczibolo von Ponte moliche Der da here kame des pey xii tagen ist oder wenig mere syder wir nye haben vernemen mügen wo er hin komen

sey wol vns frömden nam in in sölichez form gekleydet als ir seyt ze se-
 chen dann er was ein müller als wir sein. Do daz der elter Thedaldo
 pruder vernam nächner zû in drat vnd sy fraget wie ir geselle Faczibolo
 gekleidet were daz sie in sagten vnd geleich als sie sagten gefunden
 5 warde das es der wer der tode von den czweyen wirten enpfangen het
 Faczibolo vnd nicht Thedaldo gewesen was Also Thedaldo pruder vnd
 auch ander hinfür nit mer Thedaldo halben czweyfelten vnd Thedaldo
 reiche vnd mechtig wider heym kam, vnd in stäter liebe lang zeit mit
 seiner frawen in [121^a] zucht vnd freuden lebet; also auch vns got die
 10 vnsern mit liebe vnd freuden schaffte tun.

Wie ein able einem genant Ferondo ein puluer ze essen gab
 von dem er entschliefte vnd für toten begraben ward; darnach auß
 dem grab genomen in ein finster prisau geleyet vnd do er ent-
 bachte im ward zû versten geben wie er tode were vnd im dem pur-
 15 gator were in diser zeit der abt im mit seiner frawen gûte tage gabe,
 vnd nach etlicher vergangen zeit als des abt gefalen waz er wider
 erstunde, vnnd zoche für sein eyn kint das sein weybe durch den
 abt enpfangen het.

Die lang histori frawen Emilia ist zû ende komen Doch ir nyemant
 20 verdrossen hat, vnd daz vmb der so mancherley materi die sich in ir
 verlossen haben darumb yederman kurz gedacht hat, vnd die künigin
 mit einem kleinen wincken der edeln frawen Lauretta iren willen vnd
 meinung pewart vnd vrsach gab die iren ze sagen; Die sich nit irren
 liesse sunder schnelle anhub vnd sprach; Mein aller liebsten frawen
 25 mir ist in gedanck komen euch ein warheit ze sagen Doch mer geleich-
 nûß hat zû einer histori dann zû einer war[121^b]heit. Nach dem als
 ich in der vergangen histori vernomen hab wie einer für ein andern ge-
 klaget pewart vnd für tode begraben ward so sprich ich vnd will euch
 sagen; wie ein lebendiger vnd nit toter für tode begraben warde, dar-
 30 nach wider erstunde, vnd weder von im selbs noch yemant anders für
 lebendig gehalten waz wol gelaubten daz er auß dem grabe were; vmb
 des willen in vil für heilig anpetten der als ein ander sündler pillicher
 were gepeinigt vnd gepüst worden Darumb ir lieben frawen vernemer
 mein rede vnd merckt mein wort. Es waz in vnser gegent Tuschana
 35 vnd noch ist ein abteye gelegen als gern gewonheit ist an einem eyningen
 ende gar selten von yemant gefisitirt; darinne wonet ein abt mit etli-

chen seinen münchen der in allen sachen sich heilig daucht; dann alleine in den wercken der schönen frawen; Dasselbig er in sölchen züchtenn wücket vnd handelt daz ein sölches am im nye geprüft noch von yemant gemerckt warde, sunder für einen heiligen vnd gerechten man gehalten

5 waz Nun sich begabe daz sich ein reicher pauer der nit ferre von dem kloster sasse zû im grosse kuntschaft nam vnd sich zû im geselle mit namen genant Feron[121^c]do gar ein schlecht grob man mit weise vnd geperde, vnd der abt seiner gesellschaft kein freude het; dann allein seiner grossen eynfeltikeit domit er mit im zû zeiten sein freude het in

10 sölcher gesellschaft dem abt ze wissen kame wie Ferondo sogar ein auß dermassen schön weybe hette, vnd do er die gesehen het zû ir so grosse liebe gewan daz er weder tag noch nacht an keinerlei anders gedennen mocht vnd wie wol Ferondo in seinen sachen schlecht vnd eyfeltig waz doch sein haußfrawen in hute ze haben weiße vnd klug was;

15 des der abte schier verczaget het, Doch so vil tet vnd Ferondo darzû prachte daz er zû zeyten mit seine weybe kürzweyle ze nemen zû im in seinen garten spaziren kam; Do sie mit dem abt von der seligkeit des ewigen leben vnd andern heiligen wercken von man vnd frawen auß diser welt verschieden warn gar züchtiglich do von mit einander

20 retten in sölcher masse die gût frawe des abt heiligkeit empfangen het daz ir grosse begire kam sich im ze peichten vnd eins tags von Ferondo irem manne das vrlaub nam sich ze peichten des er ir wol vnd gern vergonde. Nun die fraw zû dem abt kam sich ze peichten mit seinen grossen fre[121^d]uden sich im zû seinen füßen nider seczet ee sy icht

25 anders redet anhub vnd sprach; herr wenn mir got keinen man geben hette mir gar ein klein müe wer durch euer lere vnnnd anweißung auf den wege ze komen als ich wol von euch vernomen hab der vns zû der ewigen freude vnd selikeit fûrt Aber wenn ich bedenck meines mannes weyse vnd geperde seiner grossen eyfeltikeit, vnd wer ist er

30 ist ich wol sprechen mag on einen man vnd ein witbe sey; wie wol ich verheiret pin vnd die weyl er lebet ich keinen andern nemen thar dann wie also törhet er ist on alle vrsach er so sere eyfert vnd mein vor andern mannen sorg hat das ich mit im nicht anders dann in vnrûe leben mag darumb mein lieber vater e ich fürpaß ze peichten kom ich euch

35 pit vnd begere ir mir auff sölche materi rattet vnd helffet dann ich nit alleine vmb der peycht willen zû euch komen pin sunder euer hilffe begere; dann ich weiß wol mein peichten oder wol thon mir kleinen fromen pringen mage, Sölche wort vnd rede des abte groß gefallen was

im sein gemüt gancz berüret wol daucht daz gelück mit im sein wölt;
Zü der frawen sprache Mein liebe tochter ich wil wol gelauben [122^a] das
es dir ein grosse vnrwe vnd müe sey ein sölchen man ze haben, sunder
sölche schöne frawe als ir seyt einen holzpocke zü einem man ze haben
15 als Ferondo ist; doch noch vil mere ich gelaube das ir einen eyferer
habt; darumb ich euch eines vnd anders eüer trübsal gar wol gelaube
aber kürzlich geret weder rat noch hilf ich nicht siche. Domit Ferondo
seines eyfern abgee vnd gesunt werde; dann aine erczney alleine der
ich meister pin in gesunt ze machen; Nur ir so beherczent seyt vnd ver-
10 hengen wölt das in geheyme ze halten als ich euch dann sagen würde.
Die frawe sprach; vater des seit on cyweyfel ich mich ee töten lasse
dann ich yemant icht saget das ir mir het geget Sunder was in geheyme
were; Aber saget mir vater wie möcht man das gethon Der abt zü ir
sprach; Frawe wölt ir daz er seines eyfern abgee so ist not das er in
15 daz purgatori fare; wie sprach die frawe mag er lebendig darein komen;
Der abt sprach neyn er Er muß sterben, vnd also do hin farn vnd wenn
er so vil pusse gethon hat als sein eyfern grosse gewesen ist so wölle
wir in mit etlichem gepete das wir zü got getun der vns in zü hant her
wider schicket [122^b] So müst ich sprach die fraw ein wittib beleiben;
20 Ja sprach der abte für ein kleine zeyt die ir euch hüten müsset yemant
zü verheyern dann got würde es euch sere in übel aufnehmen; Dann
wann Ferondo herwider kem so müsset ir denselben genomen man lassen
vnd wider zü im komen so würd er mer eyfern dan er nye gethon het;
die frawe sprach nür das er von disem pösen vngelücke liesse vnd mich
25 nit mere also gefangen hielte so wölte ich gern thon vnd verhängen das
eüer meinung vnd syn zethon ist; frawe seyt on czweyfell sprach der
abte. Nun saget mir frawe vnd ob ich in seines eyfern gesunt mache;
was lones pin ich von euch warten vmb meines dienstes willen lieber
vater was euch lieb ist vnd ich vermäge, Aber was vermag ein armes
30 weyb als ich pin einem sölchen man als ir seyt thon daz im füglich sey
Der abte zü ir sprache, frawe ir müget nit minder für mich thon daz es
nicht ein genügen sey für das; daz ich mich schick für euch ze tun dann
ich pereit pin ze thon vnser peyder nucze euch besunder freude pringen
sol; Also auch ir nit minder dann ich thun müget; das mir heyle vnd
35 fristung lange zeit meines lebens sein wirt [122^c] Do sprach die frawe;
Ist im dann also als ir gesprochen het so pin ich pereyt ze thon euer ge-
fallen so wert ir mir geben sprach der abt euer liebe vnd hulde vnd
eüern leybe schicken zü meinem willen; vmb des willen ich stäcz in liebe

prinne Do das die frawe vername, gar erschrockenlich antwort vnd sprach Awe mir mein vater was ist das des ir begert Ich meinete ir wert ein heilig gehört es dann heiligen leuten zů sölcher sache ze begerende an die frawen die zů in vmb hilffe vnd rate komen; der abte zů ir sprache;
5 Mein aller liebste frawe last euch nicht wundern! Dann die heilikeit sölcher sache ir wonung in der sele het, vnd des ich begere ein natürlich sünde des leybes ist, Doch wie dem sey euër liebe vnd schöne mich dar- zů pracht hat also ze thon; Des ir euch glorirn vnd freßen mügt mer dann ander fray ye thet; wann ich bedencke das ir den heiligen gefalt
10 vnd liebt; Die gewonet sein alleine die himelischen schöne ze sechen, über daz ob ich ein abt pin doch ein mensche als ir wol secht als die andern pin; Do pey iuncke vnd nicht alt, vnd lasset euch das ze thon nicht schwere sein, sunder ir eins sölchen von euch selbes begern sölt; Dann die [122^d] weyle Ferondo in dem purgatori ist ich euch an seiner
15 stat dez nachtes mag gesellschaft tun vnd die freude geben die euch von im trüer gewesen ist; dez kein mensch sich nymer gen vns verdrecken sol; dann yederman von mir gelaubet Dez nicht lange ist ir auch in söllichem glauben waret darumb nit slacht auß die genade die euch von got zů gesant ist es sein vil die des begern daz etlich on müe werden
20 mag; seyt ir weise so gelaubet ir meinen worten vnd güten rate. Auch sült ir wissen das ich vil schöner kleynet hab die alle eüer eygen sein sullen; Darvmb allerliebste frawe mein trost vnd hoffnung tut mir ze liebe Des ich euch gern ze lieb vnd willen würde! Die frawe ir gesichte zů der erden hielt, weder ze laugen noch ia zů sprechen sy geschicket was,
25 vnd im zů willen wern des er begeret sie nicht wol gethon dauchte; Doch im kein antwort gabe. Do das der abt sach das ir antwort langsam waz In daucht er sie sere zů seinem willen gekert hette, vnd mit mancherley lieplichen worten seiner ersten meinunge stäcz nachfolget, vnd ee sein rede ein ende het ir sovil vorgesaget vnd gepredigt het daz sy nemlich
30 gelaubet waz er ir ge[123^a]saget het ze tun das ein sölches wol gethon were, im vnd mit einer wenige scham antwort vnd sprach; sie zů allem seinen willen bereyt wer; doch nitt ee möcht piß Ferondo in das purgatori gefarn wer Des der heilig abt frölich vnd wol ze müte was; Zů der frawen sprache so wölle wir gedencken daz wir in palde dohin ferti-
35 gen. Nür er morgen her zů mir kome vnd das gerett er ir ein gulden fingerlein verporgen in die hant stiesse vnd ir seinen segen mit dem vrlab gab die schön frawe der köstlichen schanckung froe waz dopey auch mere der andern hoffet von im aufstunde zů irer gesellschaft ginge sich zů hause

füget; Nicht lange darnach verginge Ferondo nach seiner gewonheit zů dem abte in das kloster kam; der zů hant gedachte in in daz purgatori zeschicken, vnd sein puluer das von grosser tugent was zůbereyt; das er mit im aus dem aufgange der sunnen pracht het; Daz im von
5 dem grossen fürsten genant Veglio von dem perge gegeben waz; der sölches puluer prauchet wann er die menschen petriegen vnd in sein paradeiße pringen wolt; des krafft vnd macht on allen schaden was des essers oder trinckers; dann alleine den men[123^b]schen schlaffent hielte piß sich sein tugent endet; Aber die weyl sein tugent weret nyemant
10 het sprechen mügen der es empfangen het daz der selbig mensche pey im leben gehabt hette; desselben puluers der abt in einem glase mit wein zů einer collatione in seiner zellen Ferondo zů trincken gab so vil das er drey tage schlaffen muste darnach vnd er daz enpfangen het; Der abt mit im spacziren in dem kreützgange vmb gienge mit seinen
15 münchen von Ferondo eynfeltigkeit freude namen Doch sich nicht lange verzohe das puluer anlube zů arbeiten vnd im sölcher schlaffe in daz haubt kam das er stend entschliefte vnd zů der erden fiel, vmb des willen der abte sich vnmütig vnd traurig peweyset; In palde schuffe aufgürten frisch wasser pringen ze laben vnd zů erfrischen ob die ver-
20 schwunden geyste vnd leben im wider komen wölten zů gleicher weiß als ob im von dem magen auf in daz haubt schwere reüche stigen die im seine syne also betrübten; dovon er in amacht het fallen müssen; mancherley versuchten in wider ze pringen aber vun keim waz Do der abt vnd die münche [123^c] vernamen daz sie nicht wider zů im selbes
25 kame in angriffen den pulß suchten aber nit funden; Darum für ware gelaubten er tode were; Zů hant daz seinem weybe vnd freunden ze wissen theten die alle kamen weinten vnd klagten; vnd der abt schuffe in also an gelegten in ein steine grab legen vnd sein weyb mit iren freunden wider ze hause ginge zů einem kleinen kinde daz sy mit im hatte
30 vnd sprach; Sie von dem nit komen wölte; also in dem hause beleyb daz kint vnd güt zeregirn. Der abt het einen münch dem er aller seiner geheime vertrauet der desselben tages von Boloni komen was. der des nachtes verporgen auffstunde, mit stille Ferondo auß dem grab nam vnd den in ein finster gewelbe daz man für der münch gefencktnuß hielte
35 truge, vnd im sein gewant auß zoche vnd als ein münche anleget, vnd in auf ein pürde stroes leget also liegen liessen vnd also lang lag piß er sein selbes empfinden warde. In diser zeit der abte seinen münchen vnterrichtt hette wes er sich Ferondo halben sölt vnd sich nyemant

mercken lassen; der nit anders thet dann warten wenn Ferondo sein selbes empfinden würde; den andern tage darnach der abt [123^a] mit etlichem seinen münche in geleichnuß die frawen zů trösten vnd ir helffen klagen vnd leytt tragen zů ir in das hause kam; die er traurige
 5 in schwarcz gekleydet fande; so er pest mocht mit worten stercket vnd tröstet. Darnach verporgen begert das sy im versprochen het; Die fraw sich alleine vnd frey sache on alle vnrue ires mannes Ferondo, vnd dem abte einen andern köstlichen ringe an seiner hant sache zů im sprach; sy bereit wer ze thon sein gefallen vnd aller sache eins worden
 10 auf dieselben nacht sich pey einander ze finden. Nun die nacht vnd ir zeit komen was der abte verkleydet in Ferondo kleyder bekleyt von seinem münche; des nachtes zů der frawen kame vnd piß auf metten zeit peyde mit einander ir freude hetten; darnach er auff stunde, wider in sein kloster zů metten ginge vnd in sölichem ab vnd zů gen zů manch
 15 malen waz gesehen worden vnd im vil manche des nachtes also begegnet waren für were gelaubten daz er Ferondo wer; der auf dem weg hin vnd here ging sein sünde ze püssen, vnd das grobe dorff volcke seiner frawen gar mancherlei von im sagten die da mer west dann sy sagen mochten wer auf der gassen dez [124^a] nachtes ging; Nun sich
 20 begab Des der münche der Ferondo war nemen solt wann er von schlaffe entbacht in auß dem schlaffe vernomen het; der sich in der finster fande nit weste wo er waz noch wie doch an das finster ende mocht komen sein, vnd der münche mit einer grausamen stymme im zů schrye vnd in seiner hant ein weiche ruten het Ferondo pey dem halse nam vnd im
 25 sein haut gar wol erperte vnd Ferondo mit grossem schreyen vnd kläglichem weinen nicht anders begern was dann ze wissen wo er were. Der münche im antwort vnd sprach; Du pist in der pein vnd purgatore Wie sprach Ferondo; pin ich dann tode vnd nit mer in leben Ja traun du pist tode sprache der münch. Erst hub Ferondo an sich selbes vnd sein
 30 weybe vnd kinde ze weinen vnd klagen manche wunderliche dinge mit im selbes ze bedencken; Darnach der münch im prachte zů essen vnd trincken, Do das Ferondo vername zů dem münche sprach? Wie bekümet das oder wie ist dem nun meinet ich die toten essen nit Der münche sprach traun ia sie essen gar wol, vnd waz ich dir zů essen
 35 pringe daz hat dein haußfrawe heut gen kirchen zů deiner selmesse gesant die [124^b] man spricht vmb deiner sele willen, vnd got der almechtig will das sölich almusen dir gepracht werden. Ferondo sprach; got gebe ir ein selig güt iare, werlich ich hute ir sere wol do ich pey

- leben was vnd ee ich stirbe ich sich des nachtes enge hielte in meinen armen vnd nit anders tet dann lieplichen küssen; Auch zů zeiten anders thet wann es mir in den syn kam. * Nun als der do lange gefast het anhub zů essen vnd trincken; Aber der wein in nit übriges gůt daucht;
- 15 Darumb er sprach. Ey daz sy got schente sie hat den pfaffen nicht von dem guten faß gesant das in dem kaler der mauern lange leyt; Do er nun gessen het der münche in aber nam vnd mit gůten růten im ein fele zoche, vnd do Ferondo genucke geschrien vnd geweinet het er zů dem münche sprach? Nun warumb schlechst du mich so iemerlichen.
- 10 Do sprach der münche got der herr hat es also geschaffen daz dir alle tage also gesche. Nun warumb das sprach Ferondo der münch sprach darumb daz du ein grosser eyferer gewesen pist vnnd deiner frumen frawen on alle sorge vnd nott vor andern manen besorgt hast Die die aller frömost deiner gegent gewesen ist; Awe mir [124^c] du sagest die
- 15 gancze warheit Sy waz mir die liebe vnd süsse als das zucker; aber ich weste nicht daz got daz eyfern in übel het werlich ich het es nicht gethon, Das soltest du bedacht haben in gener welt, vnd ob sich ymmer begeben das du wider in die welt kämest so habe in gedancke waz ich dir iczund thue vnd lasse dein eyfern deiner frommen frawen vnder
- 20 wegen; Do sprach Ferondo komet aber ymer yemant widerumb ze leben auf erden; traun ia sprach der münche wann es gotz hern gefallen vnd sein wille ist O sprach Ferondo begibt es sich ymmer daz ich wider in dy alten welt kome ich will der frömost haußwirt sein der ye werde Ich sol mich werlich nymer mere mit meinem lieben weybe ze tragen
- 25 noch ir in übel zů reden; dann allein vmb den argen sauern wein den sie vns heut gesant hat, auch kein kerczenlicht vns geschicket hat ich hab in der finster essen müssen, ia sie traun sprach der münch; aber sy sein pey der messe verprant O sprach Ferondo du sagest ware, fürware kom ich wider zů ir ich sol sie iren willen haben lassen Nun sag
- 30 mir sprach Ferondo wer pistu der mich also mit slegen martert; der münch sprach Ich pin auch ein toter auß dem [124^d] lande Sardingna vnd darumb daz ich einen meinen hern lobet vmb seiner grossen fraßheit willen pin ich von got verdampft das ze thon; dir essen vnd trincken vnd schleg geben vnd das also lange tun musse piß got der herre anders mit
- 35 vns peyden begint? Ist nyemant mer hinnen dann wir czwen alleine ia sprach der münch manch tausent; Aber du magst ir weder sehen noch hören; Desselben gleichen sy dich thun mügen; Do sprach Ferondo o wie ferre mügen wir von vnser gegent sein, vnd ich sprach der münch

noch vil meile mer dann du pist; werlich sprach Ferondo ich mich geduncken laß wir auß der welt sein also lange pin ich mit schlegen übel essen vnd trincken hie gewesen; des nun wol pey zechen moneten vergangen waren In sölcher vergangner zeyte der abte Ferondo weybe gar getretlich

5 Ferondo ze dienst lieplichen do heyme gesucht hette vnd im mit ir vil güter seliger tag vnd nacht geben hat; doch wie sy sich pey in einander verwickelten do was ich nit pey; aber wol vername das ir der pauch geswal vnd swanger ward vnd das dem abt ze wissen tet vnd peyder meinung waz das man Ferondo wider ze leben auß dem purgator berüffet

10 [125^a] vnd daz er wider zû ir kôme domit sie sprechen möcht von im vnd nit von dem abt swanger were. also zû hant die nechsten nacht darnacht der abt seinen münche schaffte Ferondo mit einer grausamen styme rüffen in der finstern prisau vnd zû im sprechen Ferondo gehabe dich wol vnd tröste dich Dann des almechtigen gotz gefallen ist

15 das du wider an die welt komest vnd wenn du dar komen pist so sol von dir in dein weybe empfangen werden ein sun den soltu nennen Benedetto; dann durch pete deines heiligen abte deiner haußwirtin vnd sant Benedetten willen geschicht dir von got die genade. Do das Ferondo vernam; wer fröer dann er vnd sprach; Des sey lobe, got geb

20 vnserm hern dem abte vnd sant Benedetten vnd meiner lieben süsser haußwirtin ein güt seliges iare! Darnach der abte aber im in dem wein des puluers gabe ze trincken; Daz er pey vier stunden sloffen must vnd im sein gewant wider anlegten vnd in wider in daz grab trugen darauß sie in genomen hetten. Nun des morgens gen tage die kraft des puluers

25 verrochen was vnd Ferondo sein selbes empfinden ward vnd zû einer klunsen dez grabes auß in die kirchen sach lie[125^b]chte prinnen. die in ganczen zehen monet nye gesechen het do in erste dauchte wie er lebendig vnd nicht tode were, anhube ze schreien; thut mir auf thut mir auf, vnd sich selbes mit der achseln vnd haubte so starcke an die decke

30 des grabes seczet daz er die mit gewalt verrüret vnd ab dem grabe warff; Zû sölchem geschrey vnd romore die münche die da metten sungem alle luffen vnd Ferondo stymme erkanten vnd in auß dem grabe steigen sachen alle erschracken vnd die flucht gaben zû dem abte kamen im das groß wunder zû wissen theten der sich sölcher sache gar frömde macht;

35 desgeleichen tet als ob er durch sein gepete zû got erstanden were, vnd zû den münchen sprache; Erschreckent nit nempt das kreucze vnd den weichprun vnd komet mit mir ze sechen waz vns got durch sein genade vnd grossen gewalt beweissen wille! also die münche teten vnd mit

dem abte zů Ferondo kam, vnd also palde Ferondo den abt ersache aller
 pleich vnd vngestalt; als der do zehen monet in gefencknuß gelegen waz
 zů im lieff vnd im zů seinen füßen flele vnd sprach O mein aller lieb-
 ster vater nach dem mir in genen welt warde kunt gethon eüer vnd
 5 [125^c] des lieben heiligen sant Benedikten gepete vnd meiner hauß-
 frawen vrsach gewesen sein das mich got der herre wider auß dem pur-
 gator vnd grossen pein gesant hat vnd mir das leben wider geben hat;
 darumb ich got stäcz pite das er euch gebe wes ir begert vnd der heylig
 sant Benedett sterecke euch in eüer heilickeit vnd verleiche euch vnd mir
 10 ein ander fart das ewig leben. Der abt sprach gelobet sey der grosse ge-
 walt gotz. Nun gange hin mein sun das dich got gesegen vnd tröste
 dein liebe haußwirtin! die syder du auß diser welte schiedest in leyt vnd
 klagen gestanden ist vnd piß hin für ein diener gotz. Do sprach Fe-
 rondo; Herre es ist mir wol gesaget vnd befolhen worden darumb lasset
 15 nür mich schaffen Als palde ich zů ir kame ich will ir noch so vil wol
 daz ich nit gelassen möcht ich müsset ir ein lieplich küblein geben; Also
 Ferondo von dan schiede vnd der abte seinen münchen zů versten gabe
 wie er diser sache grosses wunder het vnd mit grosser andacht schuffe
 den miserere singen, vnd Feronde zů hause kam alle dy in sachen in als
 20 den tode fluhen zů dem er sprach nit förcht euch ich pin von dem tod
 erstanden vnd lebendig als ir seyt [125^d] des selben gleichen auch sein
 weybe thet; doch nach etlicher vergangen zeit daz volck sein gewonet
 vnd wol sachen das er ein lebendig mensche was vnd in mancherley
 fragten der andern welt er gar weißlich antwort gabe vnd in von iren
 25 toten freünden netie mere vnd grosses wunder saget von dem purgatore
 vnd in zů versten gabe wie im der engel Brachael sein wider ersten
 verkündet het; Also in alle seine güter wider ein gesezt vnd von
 seiner haußwirtin gar schöne empfangen warde, die er nacht seiner
 meinung in der ersten nacht schwängeret vnd zů seinem gelücke zů
 30 rechter zeit eines sunes genase; den er nach dem im von dem engel
 waz befolhen worn Benedetto nante; Also Feronde von dem tode er-
 stande vnd yederman gelaubet im wer also, vnd sölches sich von tage
 ze tagen meret; des der abt mit seiner heilickeit alles vrsache waz,
 vnd Ferondo seines eyfern gesuntheit vnd grosse schleg vnd pein
 35 enpfinge, Vnd als der abte der frawen versprochen het hin für nit
 mer eyferet Des die güt fraw wol zemüte was, so sie pest mocht
 mit irem manne lebet vnd auch wann sy mochte mit dem abte ir
 ein güten mute schuffe vnd im mit iren leybe zů liebe wa[126^a]rde;

Dann er auch ir in iren grossen nöten mit fleysse gedienet vnd geholfen het.

Wie ein iunckfrawe genant Giletta den künig von Franckreiche einer krancheit gesunt machet; die für iren lone an den künig begeret zû einem emanne den iungen graffen Beltramo von Ronsiglione den er ir wider seinen willen vnd dancke zû der ee gabe; Des er in zorn von ir reyte in Tuschana vnd stat Florencz kam; Do er vmb ein iunckfrawen huldet vnd an der selben stat sein weyb Gilette pey im schlieffe vnd von im in czwey kinde peyde knaben swanger warde; darnach nicht lange verginge er sy zû genaden name vnd von herczen liebe het.

Die edel vnd züchtig erentreiche frawe Lauretta ir histori vnd neue fabel zû ende pracht het. die künigin nit die loste ze sagen sein woltt, sich nicht saumet gar frölichen anhub vnd sprach? wer wirt hin für icht mer schönes neues sagen mügen do von vns freude bekome als Lauretta gethon hat fürware es was wol gethon; das sie nicht die erste ze sagen gewest ist; dann on czweyfel die hernach gesagten neue fabeln niemant ge[126^b]fallen hetten des ich sorg hab die auf disen tage noch ze sagen sein. Doch wie dem sey der fürgelegten materi nach zefolgen ist mir zû gefallen ze sagen das euch villeicht nit vnlieben würt; Darumb vernempt In Franckreiche waz ein edelmant genant Snardo graffe von Ronsiglione nicht gar ein gesunt man stäcz einen arczte pey im hielte der was genant meister Gerhart Nerbonese; nun het der kranck graffe einen sun pey acht iaren alt genant Beltramo ein hübscher züchtiger iunger; Auch mer ander kinder von seinem alter dem knaben ze liebe pei im hielte; vnder den gar ein schöne iunckfraw waz genant Giletta; Die als grosse liebe vnd die on masse in irem weichen alter zû dem iungen Beltramo gewan daz ich es euch nit gesagen mocht. Nit lange verginge der grafe mit tode abginge vnd starbe, vnd der iung Beltramo in dez küniges hende gelassen vnd geben ward zû hant gen Parisy gesant ward vmb dez willen iunckfraw Giletta in grosser pein vnd betrübung waz; Auch nit lange verging ir vater auch starbe ein einige tochter on vater vnd müter beleybe, vnd het sy erlich vrsach finden mügen sie gern gen Parysi Beltramo zese[126^c]chen geritten were; Aber grosser hute halben das mit iren eren in keinen wege gethon mochte; dann sie was reich vnd alleine; Nun sich also etliche iare verlieffen vnd

sie mannes zeytig was, vnd iren Beltramo lange zeit was nicht gesehen het;
doch sein nicht vergessen mochten vnd ire freude sy gern verheyret hetten;
Aber sie alle heyret on vrsache außschlugen. vnd also in der liebe Beltramo
mer dann ye enczündt dann gar offte vernomen het wie er also gar ein
5 schöner iüngling were; in dem sich begabe; das sie vernam wie der künige
mit so grosser kranckheit beschwert were, vnd wie solche kranckheit von
allen ärzten verlassen were an des küniges gesunde verzweyfelt hetten.
vnd dem künige auf seiner prüste ein ewiger wetung beliben was genant
fistola; Der im grosse pein vnd angste, vnd keinen arczte man nye fin-
10 den mocht; der man als manchen versucht het als vil man ir het finden
mögen der im het seinen gesuntheit wider geben mögen Sunder im alle
sein kranckheit ee merten dann minderten; vmb des willen der künige
schire verzaget hette; im fürname keinerley arczney noch ärzte mere
pflegen noch vernemen [126^d] wölte. Do iunckfrawe Giletta das vernam
15 sein wol ze müß vnd ir grosses gefallen was. ir gedacht sie nit alleine
des küniges kranckheit halben güt vrsache het gen Parisy ze komen,
sunder die kranckheit in sölicher masse sein möcht als sy dann gelaubet
were; das ir nit alleine von dem künge ein grosser solde zü stünde,
sunder vnter sölichen sachen ir möcht Beltramo zü einem eman wern.
20 Sie waz ein grosse meisterin etlicher heymlichen stücke der erezneye die
sie von irem vater erlernet het anhuben ir puluer auß den edeln kreut-
tern ze machen die sich dann zü sölicher kranckheit gepürten; darnach
zü hant auf sasse gen Parisy reyte, vnd vor allen sachen iren Beltramo
begeret ze sechen Dar nach für den künig kam vnd in besunderheit an dem
25 künige begeret sein kranckheit ze sechen Do der künig die schönen iunck-
frawen sache ir des sie begeret nit versagen mocht ir sein prechen zey-
get; Do sie den gesehen hette on allenn czweifel hoffet im sein gesunt
wider ze geben zü dem künig sprach; genediger künig ich hoff in got
vnd mein kunst so ferre es eter gefallen ist on alle vnruhe e acht tag
30 vergen ich euch risch vnd gesunt machen wöl[127^a]le. Der künig pey
im der iunckfrawen wort für ein gespöte het, vnd zü ir sprach das alle
grosse meister der welt nicht haben wissen noch vernemen mögen wie
möcht daz ein iunges freülein wissen oder vernemen, vnd ires güten
willen freuntlichen danck saget vnd sprach er im fürgenomen het nit
35 mere weder hilffe noch rate zepflegen. Die iunckfrawe zü im sprach.
Herr ir schetthet mein kunst vmb meiner weichen iugent willen vnd
darumb das ich ein fräulein pin; So soll eter genad wissen daz ich nit
erezney mit meiner kunst, sunder allein mit ner hilffe gotz vnd meister

Gehardo Nerbonese kunst der mein vater was vnd ein fürnemer man in seinem leben was Der künge sich mit im selbes bedachte vnd sprach vil leicht hat mir sie got zů gesant vmb meinez heyles willen Ich wille sie auch versuchen was sie künne; dann sie spricht sy wölle mich in kleiner
 5 zeit vnd on alle mein vnrue gesunt machen; also sich mit im selbes beriete ir kunste ze versuchen vnd zů ir sprach iunckfrawe, vnd ob ir vns nit gesunt machet vnd vns vnser meinung vnd fürsaczung hat prechen machen waz soll euch darumb folg[127^b]en Edeler künig sprach die iunckfraw lasset mein warten vnd wol hüten ist sache das ich euch
 10 in acht tagen ettern gesunt nicht wider gibe so lasset mich verprennen Nun saget mir widerumb genediger künige wann ich euch etter gesuntheit wider pracht hab waz soll darvmb mein lone sein. Der künig ir antwort vnd sprach. Iunckfrawe ir seyt iuncke schöne vnd on ein man thut ir als ir sprecht; Ich soll euch hoch vnd wirdig verheyern. Die
 15 iunckfrawe sprach herre des pin ich willig vnd wol zů müte; Doch so ferre daz ir mir den gebet den ich an euch begern würde außgenomen etter geschlechte daz ir der künig volkomenlich versprache, vnd die iunckfrawe an hube zů erczen, vnd in inderhalb acht tagen zů aller seiner gesuntheit pracht, vnnd der künige sich frisch vnd gesunt enpfande nach
 20 dem er zů der iunckfrawen sprach. Edele schöne iunckfraw ir habt den man wol verdienet vnd gewonnen. Die iunckfrawe zů im sprach. Genediger herre so hab ich den graffen Beltramo von Ronsiglione verdienet vnd auch zů meinem eemane gewonen Den ich von meiner kintheit piß auf disen tage ob allenn [127^c] mannen hab lieb gehabt; Daz den künig
 25 etwaz schwer dauchte ir den iungen graffen zů geben; doch seine wort halten vnd nicht prechen wolt; Den graffen schafte für sich rüffen zů im sprach Beltram ir seyt nudalest ein verpracht man vnser meinung ist daz ir ze hause zichet vnd etter grafschafte selber reygiret, vnd mit euch fůrt ein schöne iunckfrawen die wir euch zů einem weybe geben haben.
 30 Do sprach Beltram? herre wer ist die iunckfrawe; Der künig sprach; es ist die, die vns mit ir grossen tugent vnsern gesunt wider geben hat. Der iung graffe der sie wol kante vnd gesechen hett auch in on masse schön dauchte vnd wol weste were sie was vnd das sie nit von edelem staine als im zů gepůret het was zů dem künig sprach Herre so wölt ir mir
 35 ein ärcztin zů einem weybe geben; des wölle got nicht das ich das thue. der künige sprach so wölt ir das wir vnser trewe prechen, vnd das wir versprochen haben die wir vmb vnser gesuntz willen der iunckfrawen versprohen vnd gesech haben als sie an vns begert hat. Genediger

künig sprach der iung Beltramo ir müget mit mir thon eüer gefallen
geben vnd [127^d] nemen nach eüern willen aber des seyt on czweyfel
das ich sölches weybes nimmer wol ze müte würde Ir antwort der künig
sprach; Dann die iunckfrawe ist schön weyse züchtig vnd aller tugent
5 vol vnd hat euch in besunderheit liebe darumb ich hoffe ir mit einander
ein frölich leben füren sült vnd das mer mit ir dann mit einer gar hoch-
geporn; Beltramo sweyge als der da wol sache daz es nit anders gesein
mochte Der künige schuffe ze richten schönen hoffe vnd hochzeit vnd an
einem benanten tag wie wol es Beltramo alles wider waz gegenwürtig
10 aller hern. Die iunckfrawen zü der e name; die in lieber hette dann sich
selbes Nicht lang verginge das zü thon als er im dann für genomen het;
zü dem künig sprache er auf sein grafschaft gen Ronsiglione reyten
wölte do er peyligen vnd hochzeit machen wölte vrlaub von dem künige
name auf sasse vnd weg reynt Aber nicht in sein gegent oder grafschaft
15 sunder ferre von dann in die gegent Tuschana reyte Do er vername daz
die hern von Florenz kriege hettenn; der soldner vnd haubtman er ward
über etlich ir volck vnd im grosse ere peweisten vnd güte prouision
gaben also mit in lange [128^a] zeit wonet; Wer übler ze müte sölcher
irer vnselickheit, als iunckfrawe Giletta was, die ein praut sein hoffet zü
20 der zeyt sölcher freüde enpern muste, Doch sich versuchte ob sy in
wider heym pringen möchte auf die grafschaft gen Ronsiglione reyte
mit wirdiger gesellschaft vnd von yederman als ein frawe mit grossen
ern empfangen warde. do sie die geherschaft in pösen orden fande Als
do lange zeit kein herre noch graffe gewesen waz alle dinge in wildnuß
25 komen vnd verdorben waren anhuben zü pauen vnnd alle paufellige
schlösser vnd güter wider in orden richtet; do von alle ire vntertan
groß gefallen hettenn, vnd sie von herczen liebe hetten gleich edel vnd
vnedel dem graffen alle übel redten vnd sprachen er sölcher frawen nitt
wirdig were; das er ir in genade nicht haben wolt. do die frawe nun ir
30 herschaffte alle wider ein gericht het; vnd sy dem graffen daz durch
czwen ritter ze wissen thet vnd in piten liesse wer sache daz er sein
herschaft von iren willen meidet; das er ir das ze wissen tet so wölt sy
im ze liebe die gern raumen vnd von dann ziehen, Der graffe den selben
rittern heftiglich antwort gabe; Dez [128^b] thue sie ir gefallen, ich
35 kame als wenig ymer pey ir ze sein als wenig mir daz fingerlein nymmer
ab meiner hant komet noch sie von mir enpfanget kint in ir arme
nymet; Das waz ein gulden fingerlein daz der graffe on masse liebe vnd
wert hette vnd das nymer von seiner hant kam vmb seiner edeln tugent

willen, die im zû versten geben die der ring haben sölte. Do die edeln ritter des graffen herte meinung vernomen hetten, vnd in in keinen wege seiner hertikeit erweichen mochten wider ze rücke zugen vnd zû irer frauen kamen ir des graffen syn vnd meinung ze wissen theten Do die
5 frawe ires herren syn vername sich sere betrübet vnd nach langem bedencken ir für name ze versuchen auf czweierley form ob ir durch die zû lieb möcht wern do mit sy den graffen iren man gehalten möcht, sich palde mit ir selbes beriete was ir ze thon were, vnd zû ir rüfte die pesten vnd weisten von dem land; den sy mit diemütigen Worten ir meinung
10 ze wissen thet waz sy vmb des graffen willen getun het, vnd was sich allenthalben piß auf die selben zeit verlossen vnd ergangen het; An dem lesten zû in sprach wie ir meinung [128^e] nit were das ir herr der graff vmb iren willen sölt ewig aus seinem lande sein; sunder ir syn were die übrigen zeit ires leben hin für in pilgram weyse vertreiben
15 wölte in dem dienst gotz vmb ir sele heyle willen vnd sie freüntlich pat daz sy sich der herschaft vnd regiment vnder wänden vnd ein sölches dem graffen ze wissen teten; wie sie die grafschafft vnd alle güter gelassen het vnd von dann gezogen were in meinung nymer gen Ronsiglione ze komen; Die weyl die tugenthaftig frawe also redet vil manche
20 zäher der edeln hern augen verrert warde, vnd sy alle mit grossem fleyß paten das sy iren willen vnd rate abschlug vnd pey in beliebe; Des die fraw in keinen weg thon wolt vnd sie alle got befalhe vund mit einen iren vetern vnd einer irer kamrerin in pilgrams forme mit gelt vnd reichen kleineten wol versechen on yemant wissen wo hin ir syn stunde,
25 sich auf den wege machte nicht rast piß daz sie sich in der stat Florenz fand; do sy zû irem gelücke in einer frumen wittib herber kam do sie züchtiglich mit irer gesellschaft in pilgrams form stunde mit grosser begire iren hern Beltramo ze sechen; den sie den nechsten [128^d] tage dar nach do sy darkomen was mit aller seiner gesellschaft sache für ir
30 herber reten vnd wie wol sie in kante; doch ir wirtin fraget wer der herr wer zû der die wirtin sprach frawe das ist ein fremder edelman genant graffe Beltramo von Ronsiglione ein züchtig vnd milte man ist sere liebe vnd wert in diser stat gehalten; Er huldet vnd hat liebe vnser nachperin eine, das ist ein edele frawe aber zû male arme frum vnd züchtig, hatt
35 nicht do mit man ir möcht einen man geben vnd also mit einer iren güten muter stet, vnd villeicht lang ist were ir frume muter nit gewesen des graffen willen getun het Do die greffin dise wort vnd sölche rede vernam pald mir ir selbes rates pflege vnd von grunt ze poden ir

sache bedencken warde, vnd das hause der gûten frawen vnd irer tochter die der graff huldet gar eben erlernet vnd eines tags in pilgram weyse in geheym zû ir ginge; Die sie genug arme fande vnd züchtiglich grisset vnd zû der alten frawen sprach? wer es ir gefallen sie ein klein
5 mit ir ze reden hette Die gûte alte fraw aufstunde vnd bereyt waz sie gern zû hörn also peyde mit einander [129^a] in ein kamer gingen sich zû einander seczten. Die greffin anhub vnd sprach fraw ich laß mich gedüncken euch als wol als mir glückselikeit fremde sey vnd vnfreundlichen mit fare; Doch wo ir wöltet vnd eûer gefallen were villeicht ir
10 euch vnd auch mir ze einer stunde helfen vnd trösten möcht; Die alt frawe sprach wo ein sölches mit zucht vnd eren geschehen möcht sy alle zeit in irem dienst sein wölte Die greffin fürpaß sprach frawe des wert ir mir eûer trewe geben; dann ich mich gancz in eûer hende ergeben würde. Dann wie mir anders erginge dann ich von euch hoffet
15 so wer eûer sache mit sampte der mein verdorben. Die arme edel frawe zû der greffin sprach; Fraw des seyt on sorge vnd on czweyfel saget mir was euch von mir liebe were von mir stult ir euch vnpetrogen findenn. Die greffin anhub vnd ir von irer ersten liebe die sie zû dem graffen gehabt het vnd wie ir der künig von Franckreiche den graffen
20 zû ir het em man geben, vnd waz sich peydenhalben piß auf die selben zeit verlossen het der gûten frawen alles ze wissen tet, vnd die alte frawe alles daz sie ge[129^b]saget het gelaubet; Als die do ein sölches von mer person vernomen het; Darvmb ir vmb die greffin sere leyt was. Do nun die greffin der edeln frawen allen iren vnmüte vnd trübsal geklaget vnd
25 zû versten geben hat; fürpaß sprach liebe fraw als ir vernomen habet, so ist mir nottorft meinen man ze haben czweyerley vnd nicht. siche das mir nyemant müge dez gehilfflich sein dann ir allein; Ist anders daz war als ich vernym wie mein man der graffe eûer tochter besunder liebe trage vnd sie von ganczem herczen liebe habe. Zû der die edel frawe
30 sprach frawe ob der graffe mein tochter liebe hat ist mir nit wissent ye wol des gleichen thut; doch wie dem sey was vermag ich in dem das ir suchen get frawe sprach die greffin das stult ir wissen; Doch von erste ir wissen stult was gûtz euch dovon bekommen sol wo ir mir zû dienst vnd willen wert. ich sich ewer tochter ein schöne iunckfrawe vnd mans zey-
35 tig vnd als ich vernyme ir nicht wolmügent seyt sy zû verheyern vnd ir also hûten müste in dem hause ist mein syn in widerkerung der dienste die ir mir tun wert; Ir mir meines geltes zû hant so vil geb[129^c]en; Darnach euch selbes düncket vnd ir sie erberlichen verheyern müget.

Der edeln frawen als die da nottorftig waz der greffin verheissen wol
 gefiele; doch mit edelm gemüte zů der greffin sprach. Nun saget mir
 frawe was ich in eüerm dienst würcken oder tun sol ist es mit meinen
 5 eren so sol ich es gern tun, vnd ir darnach von eüer miltikeit thut was
 die greffin frawe mein nottorft ist daz ir durch ein treüe person dem
 graffen meinem man ze wissen thut wie eüer tockter seinen willen ze
 thon bereyt sey wo sie eygentlich vernemen möchte daz er sy also lieb
 10 het als er sich gen ir peweyset, vnd sölcher liebe sie nicht gelaube er
 schicke ir dann das gulden fingerlein das er stäcz an seiner hende trage
 daz er so lieb hab Ist dann sache das er euch daz schicket so wert ir
 mir daz selbig gen vnd im zů hant wider enpieten eüer tochter zů sei-
 nem willenn bereyt sey ze thon sein gefallen, vnd schaffte in heymlich
 vnd verporgen herein in eüer hause komen vnd mich an eüer tochter
 15 stat dez nachtes zů im schlaffen leget, villeicht thut mir got die gena-
 [129^d]de das ich von im frucht entpfahe vnd swanger würd vnd wenn
 ich dann seinen ringe an meiner hende hab, vnd die kinde von im en-
 pfangen in meinen armen hab; ich villeichte sein hulde vnd genade er-
 berben möcht vnd pey im als sein elich weybe ewig beleiben; sölcher
 20 gütlicher wercke ir vrsache wert, vnd euch got darumb besunder lons
 geben würde Die edeln frawen waz die greffin begert sie schwere ze
 thon daucht vnd sorge het der tochter darauß nicht schand zů stünde;
 doch wol bedauchte daz es nicht vnerlich sunder erlich zethon was, vnd
 sich mit allem fleyß schicket vnd bereytet der greffin iren man wider zů
 25 pringen, nicht vmb der greffin groß verheissen willen, sunder sy dauchte
 daz götlich vnd wol gethon were, vnd in kurczen tagen mit grosser stille
 vnnnd geheyme das gulden fingerlein nach der greffin ordnung von dem
 graffen pracht wie wol er im etwas schwer waz Doch des von liebe be-
 czwungen was vnd die greffin an der tochter stat den graffen an sein
 30 seyten leget, Die in seinem ersten zů ir fügen gar freüntlichen von im
 vmbfangen ward vnd als gotz gefallen waz in czwey kind peyde süne
 swan[130^a]ger warde; Als dann do ir zeit kam durch ir gepurt beweist
 warde. Nun die greffin zů einem male von der edelen armen frawen vnd
 des lieplichen halsen vnd küssen ires manes wol ze müte vnd content
 35 was, vnd das in sölcher geheyme verprachten das nye mensche wort do
 von vernam; vnd der graffe nicht meint das er pey seiner haußfrawen
 were, sunder pey der die er von ganzem herczen liebe het gewesen
 were, vnd allwegenn wann er des morgens von der frawen ginge er ir

alwege ein schön kleynet zů lecze gab dieselben alle die greffin besunder
verwaret, vnd do sie sich swanger empfande; die armen edelen frawenn
nicht mer müen noch peschweren wolt sölches dienstes zů ir sprach;
fraw got vnd euch sey lobe vnd dancke! ich hab empfangen das des ich
5 stäcz begert hab; darumb zeit ist das ich auch thue das euch liebe vnd
dienst ist Damit ich fürpaß zichen müge. Die edel fraw zů der greffin
sprach frawe hab ich gethon eüer gefallen ist mir von herzen liebe vnd
daz nicht getun habe das ich von euch darumb icht hoffe, sunder ich
mich gedüncken liesse ich wol tet; Die greffin wider zů ir sprach fra-
10 [130^b]we eüer rede gefelt mir wol Des selben gleichenn mein meinunge
auch ist euch nicht zegeben des ir an mich begeren seyt, sunder was ich
tun wille vmb wol thon willen daz thue. Nun die edel frawe von note
pezwungen mit grosser scham hundert pfunt zů steüer der tochter zů
einem man begeret; Die greffin ir scham sache vnd erkante vnd ir züch-
15 tig begern vername gab ir fünffhundert pfunt vnd so vil schöner kleynet
die auch wol so vil wert waren; des die edel frawe froe vnd wol ze müte
was; der greffin nach allem iren vermügen danck saget. Die von ir
schiede vnd wider an ir herberg ginge, vnd damit die güt edel fraw vr-
sach gebe daz der graffe ir nit mer zů hause keine noch schicket sy mit
20 der tochter auß der stat zů iren freüden zoche. Nit lange darnach der
graffe von seiner herschaft zů hause gefordert warde vnd vernomen het
wie sein greffin von dann gezogen was auf sasse weg von Florenz reyte
vnd zů hauß kame. Do daz die greffin vernam daz er zů hause waz des
besunder freüde het; doch so lange zů Florenz wonet piß ir zeyt zů ge-
25 ligen kame; gelage vnd gepar czwey kind peyde kna[130^c]ben ganz
enlich vnd gleich irem vater; der sie mit ganzem fleiß warten thet,
vnd do sie zeit daucht. sich auf den wege gen Monpólierewercz vner-
kante machet; Do etlichen tage gerüet vnd wo ir man der graffe was
daz gar eben erlernet het vnd do pey ir warde zů wissen wie der graffe
30 auff aller heiligen tage zů Ronsiglione allen seinen herren rittern frawen
vnd man grossen hoffe vnd freüde machet. Do sie in pilgrams form als
sy außgangen was auch hinfüget, vnd do sie vername daz der graffe mit
allen herren vnd frawen das male ze enfahen in den grossen sale des
palast komen waren; Sie vnerkante mitt iren peyden kinden an iglichem
35 arme eins auff in den sale do der graffe mit aller herschaft was ginge,
vnd do sie den ansichtig warde im für sein füsse nider kniet mit diemü-
tigen züchtigen Worten vnd kläglichem weynen zů im sprach mein auß-
erwelter herre ich pin dein elende vnd vnselige haußwirtin die dich hat

wöllen wider lassen zů hause komen, vnd in dem ellende lange zeit dir
 zů liebe vmb gangen ist; ich pite dich durch got vnd ern willen was du
 den czweyen rittern die ich zů dir sante mein[130^d]enthalben ver-
 sprochen hast daz du mir von in ein sölches wöllest halten; Nun siche
 5 in meine arme nit alleine einen sun von dir empfangen sunder czwen;
 vnd nym ware deines gulden fingerlein den du so lieb vnd wert gehalten
 hast! darvmb nun wol zeit ist das ich von dir als dein haußwirtin auf-
 genommen werd; nach dem du dich den czweyen rittern von mir zů dir
 gesant verpunden hast Do der graff ein sölches höret vnd vernam aller
 10 von im selbes kam, do er den ring erkante; do pey die czwey kinde
 nach dem yderman sprach Im gancz geleichten vnd enlich weren, vnd
 nach langem bedencken er zů der frawen sprach. Nun wie hat sich ein
 sölches ye fügen mügen Die greffin gegenwürtig aller hern vnd frawen
 mit grossem wunder aller zůhörer von anfang zů ende was sich ir vnd
 15 des graffen halben zů Florencz verlossen vnd sich ergangen het örnlich
 saget vnd der graffen ze wissen tet, vnd alles das sy im saget der graffe
 wol erkante daz es alles war was Ir grosse sinne vnd stetigkeit do pey
 czwey schöne kind, vnd ze halten als er gen den rittern geret het vnd
 allen seinen edel leütten zů liebe; die alle für [131^a] sie paten; des er
 20 sich williget seinen hasse zů ir von im leget vnd mit grossen freuden
 für sein eliche haußwirtin aufname sie freüntlichen in sein arme en-
 pfinge lieplichen halset vnd küsset, sie für sein elich weybe erkante vnd
 die czwey kinde für seine süne vnd sie zů hant köstlich kleyden schuffe
 vnd nicht alleine den selben tage sunder vil manchen in grossen freuden
 25 stunden, sie hinfür als sein elich weybe vonn ganczem ob allen dingen
 lieb het.

Wie ein heydenin genant Alibech von Rusticho dem eynsyde zů
 kristenlichem gelauben vnd gotzdienst gemeistert ward vnd wie man
 den teüffell in die helle tet; darnach von dann genomen vnd einen
 30 genant Lerbole zů einem weybe geben warde.

Dioneo der künigin neüe histori mit grossem fleyse zů end ver-
 nommen hat, vnd er alleine auf disen tage ze sagen vorhanden was; an-
 hub vnd sprach; Mein allerliebsten frawen Ir habt villeicht nye mer
 gehört wie man den teüfel in die helle thut; Darumb ich mich nit lenger
 35 wille von der angefangen materi als ir dann allen disen tage gesaget
 hab. Euch sagen wille vil[131^b]leicht auch ir ewer sele heyle wo ir

das lernet predigen möcht vnd auch do pey erkennen müget das nit alleine die liebe in den grossen reichen pallast vnd schönen wol geczier-
ten kamern ir wonung hett; sunder auch in den armen scheitern vnd
hütten wonet; auch in den finstern dicken welden hohen gepirgen; In
5 wilden wüstung ir kraft vnd macht beweist die vernemen macht do pey
man mercken mag irem gewalt alle dinge vntertan, vnd verpunden sein.
Darumb nemet ware In der stat Capsa die in der Barbarey oder heyden-
schaft gelegen ist dorinne ein reiche man wonet; der vnter andern sei-
nen kinden ein tochter het gar schöne genant Alibech; die waz vnge-
10 laubig vnd kein Kristin, vnd von den Kristen die in der stat wonten gar
offte vnd vernomen hette kristenlichen gelauben über alle andrè loben
vnd got zů dienen kein wirdiger wer; iunckfraue Alibech etlichen Kri-
sten fraget wie man got mit dem pesten vnd minder müe oder vnrüe
gedienen möchte; die ir zů antwort gaben; daz die got am meisten
15 dienten; die da am meisten die welt vnd ire dinge flühen. Als die
thun die in der wüste Thebayda alleine ir leben füren Die gůt iunck-
fraw Alibech die [131^c] zů male eynfeltig waz; In dem alter pey vier-
czechen iaren vnd nicht von einer örnlichen begire got ze dienen be-
gern waz sunder von einem iungen eynfeltigen willen on anders zethon
20 noch yemant ze sagen; sich auf machte ze gen gegen der wüestung von
Thebayda verporgen vnd alleine mit grosser müe iren eynfeltigen willen
ze verpringen nach etlichen vergangen tage in die wüste kam; vnd von
ferre ein heußlein gesehen het zů dem sich füget. do sie einen heiligen
einsidel vnter der türe sten fandte der sich wunder name frawen pilde
25 do zů sechen; doch sie fraget wes sie an dem ende irre ginge zů dem
sie sprach; sy suchen ginge got ze dienen vnd zů lern wie man got die-
nen sölt. Der erber man sy iunck vnd schöne sache vnd sorge het be-
hielt er sy er von dem teuffel betrogen wūr Sie ir gůten meinung ster-
cket vnd tröstet vnd ein wenig zů essen vnd trincken gabe, vnd zů ir
30 sprach; mein liebe tochter nit ferre von hinne do stet ein heiliger man
der ist ein pesser meister des daz du suchen gest dann ich pin zů dem ge,
vnd sie auf den weg weyset zů dem sy palde kam; aber er als der
erste tet sie auch fürpaß weiset; do sy palde kam zů eines iungen eyn-
sidels zellen ein genug an[131^d]dechtig person genant Rusticho an den
35 sie begeret als sie an die andern getun het; der sich selbes versuchen
vnd seiner bestendigkeit ein groß probe tun wolt; Nit als die andern
sie fürpaß schicket, sunder sie pey im in seiner zellen behielt vnd des
nachtes an einem orte von laube vnd slaten ir ein petlein machet zů ir

sprach do sie rüen vnd schlaffen solt; darnach nit lange verging im sein gemüte vnd stercke von pöser begire bestriten waz, vnd wol enpfande er überwunden waz den rücke keret vnd für überwunden sich ergabe sein heilige gedanke gepete vnd pusse auf ein ort legt vnd in sein gedanke die iugent vnd schöne der iunckfrawen Alibech name Anhube vnd bedencken wie er syn vnd wege finden möcht seinen pösen willen ze verpringen vnd von ir in argem oder übel tun nicht verdaht würd Sunder was sein wille waz sie ir zû versten gabe es in gotz dienst were vnd von erste sy durch etliche frag vernam daz sie von keinem manne noch nye waz erkant worden; wol ir grosse eyfeltikeit vernam; Zû hant im fürnam vnd gedacht wie er sie vnter einer geleichnûß gotz dienste zû seinem vnketischen willen pringen wölt vnd von erste ir ze versten gab wie [132^a] der teuffel gotz hern also gar ein grosser feint wer, vnd wie das kein dienst got genemer wer dann den teuffel in die helle zû tun do in got eingepant vnd verdampft hat Die iunckfraw in fraget wie man daz tet vnd getun möcht Rusticho sprach das soltu palde wissen ist es anders gotz gefallen thu nûr als du mich tun siehest, vnd sich nacket auß zoche daz wenig gewant daz er an het dez nit vil was aller plosse beleib, Also auch iunckfrawe Alibech tet vnd Rusticho nyder kniet als ob er sein gepete sprechen wölt vnd Alibech also nacket für in sten schuffe, vnd also ein klein weyl gestanden Rusticho mer dann ye in vnketisch enczündet vor sein Alibech also schöne ze sechen sten; darumb sich begab die vrstende des fleisches; daz Alibech palde ersehen het mit grossem wunder zû Rusticho sprach? waz ist das Rusticho daz ich dir siche auß dem pauch slieffen vnd ich des nit enhabe. O mein liebe tockter sprache Rusticho das ist der teuffel do von ich dir vor gesaget hab; Nym war yczund geyt er mir grosse pein vnd marter daz ich das kaum erleyden mag. Nun gelobet sey got sprach Alibech daz ich sölches teufels nit hab vnd wol vernym das ich paß stee dann du. do sprach Rusticho to[132^b]chter du sagest war aber du hast waz anders an des teufels stat das ich nit hab, waz hab ich vater sprach Alibech; du hast die hell sprach pruder Rusticho. So sprich ich vnd glaub für war daz dich got in besunderheit mir ze lieb her gesant hat vmb meines heyls willen; dann ob sache wer daz mich mein teuffel zû sere peiniget vnd ich daz nit vertragen möcht; wann es dann dein gefallen wer vnd du dich über nicht erparmen vnd leyden woltest daz ich in in dein helle tet so gebstu mir vnd dir grosse freude vnd were gott ein gefallen; Ist das war als du sprichest daz du got ze dienen her komen seyest; die

iückfraw frölich vnd wol ze müt sprach O vater seytmal ich die helle
hab so tut mit ir waz euch lieb ist! O tochter geseget seystu von got
sprach Rusticho so ge wir vnd tun daz er mich hinfür in fride sten lasse!
Also gesprochen die iunckfraw mit im auf sein petlein füret sie vnter-
5 weyset wie sy sich zû dem gotzdienste schicken solt den teuffel vnd den
vermaledeyten in die helle ze thon vnd in gefencknuß legen. Die iunck-
frawe die nye kein teuffel in die helle getun het; ir zû dem erstenmale
ein klein sauer ward vmb daz willen zû Rustico sprach [132^c] fürwar
vater der teuffel sol ein groß gotz feint vnd pöses vngeheüer sein; auch
10 der helle ich gesweige ander leütten er smerczen vnd pein geyt wann er
darinne ist; tochter nit betrübe dich des es bekümet dir nitt mere also,
vnnnd do mit es ir nicht geschehe ee sie peyde ab dem petlein komen
wol zû sechßmalen den teuffel in die helle teten, vnd im in sölcher maß
sein hoffart auß dem haubte zügen das er hin für ger geren in fride
15 stunde; doch der iungen zû mer malen gehorsam was Dann die vner-
kante speyß vnd pile wol schmecken warde. anhuben vnd zû Rusticho
sprach Nun ich erste wol vernyme als ich von den erbern manne von
Capsa vername ware ist; wie der gotz dienst so süsse vnd lieplich were
dann ich mir nit gedencken mag daz ich ye süsser müe vnd arbet ver-
20 suchet, noch gethon hab als dann ist den teuffel vnd feint gotz in die
helle ze thon; Darumb ich spriche vnd vrteyl ein igliche person die
anders dann got ze dienen begern dem viech geleich ist; vmb sölches
gotz dinst willen; daz gû meidlein gar dick zû Rusticho kam got ze
dienen vnd nit müssig sten wolte gar ofte zû im sprach; Rusticho lieber
25 vater ge wir got dienen vnd tun den teuffel in die helle [132^d] vnd die
weyle sy also got dienten nach der iungen meinung Alibech zû mer
malen zû Rustico sprach; ich weiß nit warumb der teuffel auß der helle
fleucht, vnd daz er also gern dar inn wer als gern im die hell herber
gebe; er kôm nymer darauß Also das iunge meidlein pruder Rusticho
30 gar ofte zû dem gotz dienst lude in in sölcher maß tröstet vnd die paum-
woll aus der iopen zoche; daz er zû etlicher zeit frost gewan so ein
ander geswiczet het, vmb des willen er zû der iungen sprach; Der teuffel
were nit ze straffenn, noch in die helle ze tun; dann alleine zû der zeit
wann er sein haubt auf in hoffart erhöhe. Doch got sey lob wir haben
35 in also zû gericht das er got pit mit frid ze sein also er die iungen für
etlichen tage in fride seczet vnd stillet; darnach do sie sache das ir
Rusticho zû dem gotz dienst nit mere begeret den teuffel in die hell ze
tun. Eins tages zû im sprach Rusticho haben wir den teuffel gestillet

das er dich nun zů mal in fride lasse; so wil mich mein helle nicht ruen
vnd mit fride lassen; Darumb du wol gethon hettest mit deinem teuffel
mir mein helle auch wider in fride seczest als ich dann mit meiner helle
dir geholffen hab·deinem teuffel sein hoffart aus [133^a] seinem haubte
5 ze nemen. Der arme einsidel der von kraute vnd wurczeln vnd wasser
trincken lebet; dem iungen meidlein nicht antworten mocht Doch sprach
tochter es müsten gar vil teuffel sein die ein helle alleine erfüllen vnd
ein genügen thon mochten; doch er sein vermügen tun wölte, vnnd
also zů etlicher zeit sein vermügen tet; Aber dem meidlein nicht anders
10 was dann als ein pon dem leben in sein munt ze werffen, mit dem Ali-
bech dauchte sie got ze dienen mit irem willen nicht ein genügen thet
nach dem sie gewölt het ee anhube zů murmeln dann nichte vnd in söl-
chem peyder kriege Rusticho teuffel vnd Alibech helle irer grossen über-
flüssigen begire willenn, vnd Rusticho nymmer vermügen; in dem sich
5 begabe in der stat Capsa ein mort fetter aufstunde, vnd Alibech vater
mit allem haußgesinde verprant; vnd Alibech alleine aller gütter erbe
beleybe, vnd einer genante Lerbole sich aller irer gütter vnterfinge; do
er vernam das Alibech noch pey leben waz sich auf machte sy zů suchen,
sie palde fande, vnnd ee sich die herschaft der güter on erben Lerbole
10 mit grossen freuden Rusticho wider allen danck [133^b] vnd willen Ali-
bech sie wider heyme gen Capsa füret vnd sie zů seinem eweybe name
aller gütter rechter erbe warde, vnd wann Alibech von den frawen ge-
fraget warde mit we vnd wie sie in der wüestung got gedienet hette vnd
Neherbole ir noch nicht beslaffen het; sie den frawen antwort vnd sprach
5 Ich dienet got dem hern den teuffel in die helle ze tun vnd sprach Neher-
bole hat grosse sünde vnd übel begangen, daz er sie von sölchem iren
gotes dienst genomen het; Die frawen sy fürpaß fragten wie man doch
den teuffel in die helle thet; das eynfeltig gut iunge meydlein Alibech
mit worten weiß vnd geperde in saget vnd zů versten gabe waz ir gotz
10 dienst gewesen was, vnd wie sie den teufel in die getun het Des in die
erbern frawen genug lachten vnd sein noch lachen Zů der iungen spra-
chen tochter nit betrübe dich gehab dich wol man tut es auch wol hie.
Nerbole wirt mit dir wol auch gotdienen ein sölches die frawen in der
stat einander saget so ferre außpreiten vnd sagten das es zů einem
15 sprichewort kame; Das kein dienst got genemer vnd lieber were, dann
den teuffel in die hell zetun ein sölches wort ist über mer [133^c] her zů
vns komen; Darumb ir lieben iungen frawen; die der genaden gotz
auch nottorftig sein lernet den teuffell in die helle thon! Dann es ist

got dem herren geneme grosse freude vnd lust allenthalben vnd vil gůtz sich do von begen vnd fügen mage.

Wol zů tausent malen vnd mere Dioneo mit seiner neuen histori die edeln. frawen alle het lachen machen In dem die künigin zeit dauchte;
 5 das ende irer herschaft komen wer Auf stunde das grüne krenzlein ab irem haubte name, vnd das mit einem züchtigem geperde dem diemütigen iungen Philostrato auf sein haubt seczet vnd sprach; Wir pald sechen weren ob der wolffe die schefflein paß furen würt dann das schaffe die wolfe gethon hat. Zů der Philistrato lachent sprach; Wann
 10 man mir gelaubet het so hetten die wolf geleihe so wol die schefflein gelert den teuffel in die helle ze tun als Rusticho Alibech tet Darumb nicht wolffe wo ir schaffe seyt! doch alwege nach dem vnd mir von euch verlichen wirt sol ich das künigreich erberlich regirn; dez [133^d] Neyfile antwort vnd sprach O Philistrato ir sůlt vns synne vnd weistum
 15 lern; als Masetto von Lampolechio den iungen nunen thet; Die im seiner verloren rede wider hulfen, Nun Philistrato der frawen kürzweylige wort ein genügen daucht an hub ze regirn irem haußmeister für sich rűfet sein ordnung gab zů leben, die weyle sein herschaft weret; Damit der würdigen gesellschaft ein genügen geschehe Nach dem sich
 20 gen den schönen frawen keret zů inen also sprach O ir aller liebsten frawen zů meinem vnglück syder ich gůt von pöse erkante Ich alweg vmb der tugent vnd schöne willen etlicher vnter euch besunder liebe vnd hulde getragen hab; Ir in allen sachen vntertenig ze sein mich geflissen hab, vnd mich diemütiglichen in allem dem daz ir geliebet habt
 25 nach meinem vermügen mich dez in iren dienst gewilliget hab nach irem gefallen; Des ich stacz von übel in erger gangen pin, vnd als ich gelaube piß in den tode thon wůrd; Darumb piß morgen mein syn meinung vnd gefallen ist von keiner ander materi zesagen dann daz sich am meisten meiner sache vnd meinunge auch gleichenn [134^a] mag,
 30 Als von den der grosse überflüssige liebe ein vnselig pösse ende auch genomen hat Desselben ich auch nitt mit langem verzihen wart. pin Also seine wort auf dise stund endet yederman vrlaub gab piß auf das nachmale; Der garten darinne die wirdig gesellschaft was so lustig vnd schöne waz daz nyemant darauß ze gen begeret, sunder mit freuden den fußtapffen der wilden tierlein als hasen recher vnd külen den
 35 nachfolgten die in dem garten auch iren lust suchten mit hin vnd herspringen Etliche von den wirdigen person sich nider seczten ze spilen. in dem prete vnd schaff czagel ze zichen, Etliche mit einander sunge

in sölchem luste die zeit floche vnd wege ginge, vnd das nachtmal ein ze nemen komen was, die tafeln vnd tische geringe scheybe vmb den külen prunne gericht worden vnd mit grossem luste daz nachtmale empfangen, vnd Philistrato auch dem nachfolgen wolte als alle künig vor im gethon hetten; vnd als palde die tische wege genomen waren; Er frawen Lauretta gepote ze danczen vnd singen; die an hube vnd sprach genädiger künig ander leüte gesang kan ich nicht vnd der meinen hab [134^b] ich nicht in gedancke. der dann sölche gesellschaft wirdig were, wölt ir aber der eine die mir iczund in gedancke komen ist so pin ich bereyt die euch ze singen. Der künig ir antwort vnd sprach; kein dein dinge nicht anders den lieplich gesein mag; Darumb als du sie hast also sie vns gibe! Lauretta mit senfter stymme vnd züchtigem gerperde die andern ir antworten sie an hube also.

Betrübter fraw nye ward; die sich ze klagen habe als ich mit verloren seüfczenn, ich mein liebe trage, vnd der der den heimel peweget vnd sein gestirn der mich beschaffen hat nach seiner begire, adelich hübsche tugentreiche mit schöne gecziret, Das zü einem peyspile allen edeln vnd hohen gemüte her nider auff erden zü einem zeichen der wir eigen schöne die allzeit vor im in seinem trone erscheint leucht vnd stet, vnd den tötlichen vnerkant ist, die mich nicht wirdigen sündler verschlagen haben. Es ist wol gewesenn der mich liebe het, vnd iuncke in seine arme name, vnd mich stäcz in seinen gedancken^c [134^c] sich in meinen augen in lieb enczündet alle seine zeit mich ze puelen ver-treybe, vnd ich die ir selbes leybe milte was. In mein wirdig machet; dez ich nun leyt trage vnd traurig pin; das ich in verloren habe vnd er mir onpfremdet ist, Er kam mir für als ein edeler stolczer iüngeling nach meinem gedüncken redelich vnd aller tugent vol. nun mich mit falscher meinung vnd gedencken helt vnd ein eyferer worden ist des ich verczagen muß mein groß leyt vnglück vermaledeye, vnd sprach O du traurige freude daz ich nit ee tod pin ee ich dich ye versucht oder in sölchen sachenn ye erkante, O du aller liebstes lieb mein des ich von erste mer dann ye frawe wol ze müte vnd content was. Nun du wol in dem himel pist vor dem stest vnd der dich beschaffen hat. Nun piß mir genedig, vnd thue das ich verneme daz die flamme die dich durch mich enczündet nicht erlesche vnd mir dar oben du pist, dein herwiderkomen erwerbest.

Nun hat fraw Lauretta ir gesange verpracht das von den zühörern auf mancherley syn [134^d] verstanden warde, Etliche waren die

es nach Meylander sitten vernomen hetten wie pesser wer ein feist swein
dann ein schöne rosen Etlich ander von subtiler verstentnuß waren daz
iczund nicht not thut ze sagen. Zũ hant den künig zeit daucht schlaffen
zũ gen, yederman gepoete zũ pette ze gen.

HIE HEBT SICH AN DIE VIERDE TAGREYSE.

In diser vierden tagreyse vnder dem gewalte vnd regiment
des küniges Philostrato die wirdig gesellschaft sagen würt von den
der graffe überflüssige liebe vnd freüntschafft sich alle ze klaglichem
5 vnd pösen ende gefüget hat

[135^a] Mein aller liebsten frawen ir geleiche als wol als ich durch
der weisen man wort mütget vernomen haben vnd ich vil dicke das ge-
lesen vnd gesehen hab, vmb des willen ich mir gedacht vnd on czweyfel
gemeinet het, daz der vngehetter prinnent wint der vntugent dez neydes
10 nyemant bekümmern noch berüren möchte; dann alleine die hohen türne
vnd spitzen der gepeüme. Nun ich mich meiner meinung gancz betro-
gen finde; Darumb ich fletche, vnd mich fliehens stäcz geflissen habe
die vngestüme sölches vntugenthafthigen geistes vnd das nit alleine über-
weite eben, sunder hoche gepirg vnd tieffe tale daz getun hab Daz ewer
15 iglichem wol mag kunt wern vnd erscheinen würt in disen gegenwür-
tigen neuen historien vnd fabeln Die nicht alleine in vnser sprache oder
czungen durch mich sein geschriben worden euch ze liebe vmb der hi-
stori willen, sunder auch in züchtigem diemütigem stil vnd model nach
meinem pesten vermügen sein geordnirt vnnnd gesezset worden, Darumb
20 ich von dem [135^b] vorgenanten neydigen wint nicht alleine gar wol er-
schüt sunder schir auf dem grunte pin geworffen vnd mit seinen grossen
peyssen schir were zürissen worden; Doch darumb ich nicht nachge-
lassen habe vnd nun erste pas vernyme Das es ware ist als die weysen
gesprachen haben; Daz alleine die armüt on neyde ist, in gegenwür-
25 tigen dingenn. Nun sein etliche gewesen die dise neue histori gelesen
haben vnd gesprochen haben Ich euch mir lasse ze sere gefallen vnd
mir nicht zů ste so vil freüde ye nemen von euch; Etliche ander haben
erger geret das ir gelobt seyt als ich euch thué Ander sich noch vil
herter in irem reden gen mir peweyst haßen, vnd gesprochen haben
30 meinem alter nicht zů ste sölchen sachen mer nach ze gen als von schön-
nen iungen frawen ze reden vnd in ze lieb werden. Noch mer vil ander

sein die mich klagen vnd sprachen ich paß vnd weißlicher thete zû stû-
 dirn vnd mit den Muse in Parnoso ze sten; dan mich mit disem werck
 vnter euch ze mischen. Noch mer sein die mir zû leyte noch übler vnd
 erger geret haben; Die selben sprechen ich züchtiglicher vnd pas tet
 5 ze bedencke wo ich daz [135^c] prot ze essen nemen möchte; Dann
 disen neüen historien nach ze gen des wintes ze leben Auch ander als
 die vorigen mir vnd meinem wercke mit ir falschen vnd pösen czungen
 geflucht vnd entwicht haben; das sein die falschen neydigen vor ge-
 nanten wint. Darumb ir edelen wirdigen frawen die weyle ich in etterm
 10 dienst pin Ich von grosser liebe meines gemüte des beczwungen pin
 das weiß got wol; Dar vmb ir mir beschüzung pillich schuldig weret;
 Aber mein syn ye nit ist mein stercke ze sparen, vnd mit einer geringen
 vnd züchtigen füglichhen antwort als mir pillich ist, vnd sölche klaffer nit
 wirdig sein mir sie von meinen augen nemen vnd sie mir vnter mein
 15 füsse werffen, vnd das nicht lenger verziehen wille; Dann ich noch nit
 zû dem dritten teyle meiner müe komen pin, dann ir sein vil vnd in vil
 pöses gedencken; darumb ich besorge Ee ich zû meinem ende kome sy
 sich in sölcher masse möchten gemert haben wo sy von mir nicht straffe
 empfangenn hetten, das sy mich villeicht gar mit kleinter irer müe In den
 20 grunt wurffen; Darumb ir aller liebsten frawen wie wol euer stercke
 vnd macht [135^d] grosse sein doch ich besorge ir in nicht widersten
 möchtet, vnd ee ich zû keiner antwortt kome vor mein syn ist vmb der
 klaffer willen; in meinem dienst euch ein histori oder peyspile ze sagen
 vmb der egenantenn klaffer willen; Doch sölches peyspil nicht mischen
 25 wil mit sölcher lößlicher geselschafft als ich dann durch mein schrey-
 ben beweist hab, Sunder ein stücke von einer neuen histori sein wirt;
 alsdann durch sich selbes sol beweist weren. Darumb ich spriche daz
 in vnser stat, als nicht lange vergangen ist; was ein purger genant Phi-
 lippo Balduczo ein man von geringem gemüte, vnd on masse an gût
 30 reiche, wol gerüst nach seinem stantt Der het ein eynigen sun von
 seiner haußwirtin die er von herczen lieb hette; des selbenn sie in ein
 züchtig lebenn mit einander fürten. Nun sich begabe als einem iglichen
 geschicht das die gût fraw mit tode ab ginge, vnd nit anders Philippo
 irem manne liesse; dann das eynig kint das pey zweyen iaren alt
 35 sein mochte; der man groß leyde het vmb seiner verloren frawen
 willen mere dann ye man hette; vmb des willen im gänzlich fürnam
 nicht mer an der welt ze sein [137^a] Sunder sich in den gotz dinst
 ezegeben desselben gleichen seinen sun tûn wölt. vnd alles sein gûte

vnd reichthum vmb gotz willen gab, vnd on alles verziehen sich auf den perg genannt Monte Asynaio in daz kloster füget. do er mit seinem kleinen kind gar ärmklichen in eyner armen zellen ir wonung hetten, des almüsen fasten vnd beten lebten. Der gûte man sich stätz hütet
 5 von keynerlei weltlichen sachen mit dem sun czereden noch in die lassen vernâmen, domit sy in nicht von solchem gotz dienst pringen möchten, im stätz von got vnd dem ewigen leben saget, in nit anders vorsaget vnd leret dann heyliche göttliche gebete, in vil manche iar also hielt, vnd in gar selten oder nimmer auß der zellen geen ließ niemant anders dann
 10 sich alleyn in sehen ließ. Nun was des gûten mans gewonheit sein narung zesûchen zû zeitten in die stat kam vnd von den gûten menschen vnd seinen gûten freûnden mit dem almüsen gesteuert ward, darnach wider auf den perg in sein zellen ging. Nun der iung mit seinem alter zû den vierczehen iaren komen war, vnd sein vatter eyn alt man
 15 worden waz do bei kranck vnd blöd, eynest der iung den [137^b] vatter fraget wo er daz almüsen nâme, des in der vatter bald vnderriecht. der iung sprach Vatter ir seit eyn alt vnmügent man, ir seit nit mer gût den hohen perg auf vnd ab ze geen, darumb fûrt mich eyn fart mit euch in die stat ewer freund vnd diener gotz kuntschaft zenâmen vnd
 20 die erleren dann ich bin iunck vnd mag bas geen dann ir, so gieng ich zû zeiten vmb vnser notturft vnd ir wo es ewer gefallen wære belibet doheym. Der gût man des iungen gûte vernunft vnd alter bedencken ward vnd in dem gotzdienst also gewachsen sahe vnd gedacht die weltlichen ding im nun dolest nit mer geschaden möchten, mit im selbs
 25 gedacht, der iung hat wol geret, vnd in mit im in die stat fûret. Do der iunge mit dem vatter in die stat kam die grossen palast kirchen vnd geheus sahe der die statt alle vol was. Er als der sölchs wunders nicht mer gesehen hete, sich anhûb wunder zenemen den vatter mancherlei fraget wie solche gesechne ding hiessen, das im der vatter alles
 30 saget vnd zeerkennen gab, vnd alsbald er den vatter vernomen het sich genügen ließ, vnd fürpas fraget also der sun fragt vnd der vatter im antwurte [137^c] gab, in solchem fragen vnnnd antwurten sich füget das in etliche schön wolgezierte iunge frawen begegeten die von einer hochzeit kamen. alsbald sy der iung ersehen hete bald den vater fraget was
 35 daz wâr zû dem der vater sprach. Sun halt vndersich dein gesicht nit sich sy an es sein böse ding, der sun sprach. Vatter wie heyssen sy. der vatter sprach. Vnd domit er den iungen nicht zû vnkeüsch reyczet er im bei irem rechten namen nicht nennen wolt als weiber oder frawen

vnd sprach. Sun das heyssen genß. Nun vernämt wunder Der iung
der nie mer keyne gesehen het. alle andre gesehne ding vergaß vnd
steen ließ vnd zû dem vatter sprach. ach lieber vatter schaff das mir
der iungen genß eyne werd. awe sun sprach der vatter schweig was ist
5 das des du begerest, es sein böse süntliche ding. der iung fragend
sprach. sein dann die bösen ding also geschaffen Ia sprach der vatter.
der sun sprach. Ich vernim nit was ir sagt oder warumb daz sölle
böse ding sein, vnnnd fürwar nach meinem geduncken ich nicht schöners
noch das mir bas gefalle noch lieber gesehen hab als sy thûn. sy seind
10 schöner dann die gemalten engel, [137^d] die ir mir so oft geweist habt
Ach lieber vatter tût so wol vnd füret mir der genß eyne mit vns
heym ich sol sy wärlich schon ätzen Das will ich nicht thûn sprach der
vatter, dann du weist nicht wo man in die speis ein gibt, vnnnd ze hand
vernarn das die natur mer stercke vnnnd macht het dann er, vnnnd in
15 übel gethan daucht das er den iungen in die stat geführt het. Nun was
ich bisher gesaget habe will ich das es mir eyn gentügen sei, vnd mich
wider die kere durch der willen ich eyn sölliches gesagt hab daz mein
straffer gewesen sein, dann ir etlich gesprochen haben. ich vnrecht vnd
übel thû, o ir iungen frawen daz ich mich fleiß etern willen zethûn,
20 vnnnd ich mir euch czewol gefallen laß, des ich nicht laugen, sunder des
bekenn das ir mir liebet vnd gefalt, vnd mich fleissen sol damit ich auch
euch gefallen müge. Nun frag ich vnnnd beger von in zewissen ob sy
sich eins solchen lassen fremd düncken das ich schönen frawen liebe
trage, die ich als wol als sy durch lieplich halsen vnd küssen vnd manch
25 ander freude die man von in nympt erkant hab laß wir steen das ich nit
alleyn euch durch freüntlich [138^a] lieb erkant hab. Sunder auch euer
züchtige schöne geperde täglich vor meinen augen gesehen hab, vnd nit
als der da alleyn erzogen vnd auf einem wilden perg gewachsen was in
einem engen zellein on alle gesellschaft sein vatter außgenommen, vnd ir
30 von im begert wurt, der euer kuntschaft keyne het ich geschweig mein
als ir vernomen habt dem ir kunt ward. Darumb was wölle nun
meine falsche straffer vnd neidige klaffer sprechen, werden sy mich er-
peyssen vnd mir den leib czerreissen. Des das der hymel vnnnd das ge-
stirn gibt euch lieb zehaben, des ich mich von iugent auf in meinem ge-
35 müt geschicket hab zethûn euch lieb zetragen, vnnnd das alsbald ich die
tugent ewer lieplichen süssen wort vnd wercke vnd die brinnent flam-
men der diemütigen seufzen vernam, darumb ir mir lieben vnd gefallen
müsset, vnnnd ob ich mich fleiß do mit ich euch gefalle des sol sich nie-

mant wunder nâmen, dann wann ich bedencke das ir eynem armen
iungen eynsidel an synn vnd vernunft eym andern tier geleich ir dem
vor allen andern gesehen dingem liebet, warumb solt ich euch dann nit
liebhaben. dann fürwar wer euch nit [138^b] lieb hat der begeret auch
5 von euch nit lieb gehabt sein, vnd weder freud noch tugent der natür-
lichen geschäfte weder verstet noch vernimt. Darumb ich gar klein acht
hab ires falschen klaffen der die mir übel sprechen vnd wider mein alter
reden, sy in irem reden gar wenig synn beweisen, vnnnd warumb der
porro daz haubt weiß hab vnnnd im der zagel grün sei. Ich will nun
10 dolest ablassen von solicher aweiß, doch spriche ich das ich mich sein
nit schamen will bis in mein end des leben den edelen frawen freüntlich
lieb zetragen, als der alte Dante Miser Cyno von Pistoia Franciscus
Petrarcha getan haben, die in alle frawen ze hulden vnd lieb czehaben
für grosse ere schätzten vnd douon besunder freud heten. Wenn es
15 mir nicht ze lang würd ich euch durch die alten histori gar wol bewei-
sen möcht wie es alles vol der alten weisen hochgelerten manne die in
irem höchsten alter gestudiret haben wie sy den edlen züchtigen vnd
lieplichen fräwlein möchten zeliieb vnd willen werden. Vermügen nun
mein straffer ein solchs nit zethûn, so gee es zelernen Was sol ich nun
20 sagen der die meinthalben sorge hetten, ich [138^c] hungers stürb vnd
mir rieten ich mir vmb das prote sähe, Fürwar ich enweiß nit dann
alleyn mit mir selbs bedenck was ir antwurte sein würd, wann ich das
prot an sy begeret, ich gedenck sy zû mir sprechen würden. Gee hin
vnnnd sûch das brote vnder deinen neten mären. Auch ir vil gewesen
25 sein die es vnter iren neten mären gefunden haben als die poeten vnd
ander hochlerer mer dann etliche reich vnder irem grossen schacz vnnnd
reichtumb getan haben. Es sein ir vil gewesen die mit irem nachgeen
den neten mären vnd historien ir ere vnd leben haben blüen machenn.
Vil ander wider synns getan haben. mer brot sûchten vnd begerten
30 dann in notturft waz. dieselbigen alle vnzeitig vergangen sein, gott sei
danck ich sein noch nicht notturftig zebegeren gewesen bin. Doch wo
sich ein solchs begäb das ich sein notturftig wurd, ich thûn wurd als
der czwelfpot leret vnnnd spricht. Mein not mit gedult überwinden,
darumb keynem laß leyder vmb mich sein dann mir selbs ist. mir wär
35 von herzen lieb das die do solche vnergangne ding reden mir ein solchs
geschriben prächten wo sy daz gelesen [138^d] hetten vnd mich auch
das sehen vnd lesen liessen, wär dann sach daz sich solch materi nach-
dem ich geschriben hab mit denselben nicht concordiret oder geleichet,

so spräche ich wol ir straffen zů mir wol getan vnd gerecht wär, vnd
 eyn solches vnrecht mit fleiß widerkeren wölt. Aber die weil von in nit
 anders erscheint dann alleyn wort, laß ich sy bei irer meinung beleyben,
 vnd nun von in sagen wurd als sy von mir gesaget haben. vnd auch ires
 5 übel reden von mir nach meinem geduncken ein volkomne antwort süllen
 gehabt haben. nun mit der hilff gottes vnd eüer ir edeln frawen ich hoffe
 mit gewapenter hant vnd gedult vnser angefangne materi wider nachzufol-
 gen, vnnd dem blasenden wind der klaffer den ruck keren vnd blasen las-
 sen Dann ich nicht vernym das mir anders geschehen müge dann als dem
 10 kleynen puluer das czü zeiten von dem wind betrübt ist vnd auf erhebt von
 der erdenn, vnnd in die höhe tregt auf die häupter der mann. vnnd kro-
 nen der künigschönen palast, vnnd auf den hohen getürne es lasset, vnnd
 wenn es von demselben felt nit nider gefallen mage dann do es erhaben
 worden ist. darumb [139^a] mein aller liebsten frauen hab ich mich ye
 15 geschicket von aller meiner macht euch liebze haben. Nun mer dann
 ye in eüerm dienst bereyt vnd geschickt bin, vnnd die klaffer nicht an-
 ders gesprechen mügen dann daz ich euch lieb hab. vnd daz wir natür-
 liche werck würcken, vnd wo sy sich wider solche natürliche recht se-
 czen wölten. Sie gar grosser stercke notturftig wären die ich bei in
 20 gar kleyn vernyme oft vnd dick nicht alleyn vmbsunst sunder mit irem
 grossen schaden ir müe vnnd arbeyt verlorn haben. Auch solcher
 stercke ich bekenne ich ir nit enhabe noch der czehaben begere in disen
 sachen, vnd wo ich sy hette ich sy vil e eynem andern geben vnd ver-
 leichen wölte dann für mich zebrauchen. Darumb die falschen klaffer
 25 schweigen süllen, die sich in irem froste vnd kelten nit erwärmen mügen
 also in ire bösen meynung sten müssen bas täten mich in frid liessen
 domit ich zů euch schönen frawen vnd do ich abgescheiden bin keren
 möchte, vnd der angefangen materi vnd ordnung wider nachfolgen möcht

Die sunne mit irem schein dem hymel sein gestiren ver[139^b]drun-
 30 gen hat vnd der newe tag komen ist. Do Philostrato aufgestanden was
 vnnd sein geselschafte gemündert het, vnnd in den schönen garten spa-
 cziren gangen waren. vnnd nun die zeit das mal ze essen komen was
 vnnd do sy an dem vergangen abent das nachtmal empfangen heten, do sy
 auch auff disen morgen die speiß enpfingen. vnd nach irer alten gewon-
 35 heyt eyn klein schläfflein gethan, darnach ze hant sich zů dem külen brün-
 lein fügten sich in circckels weise nyder seczten. Do der künig frawen
 Fiametta gepot das sy der fürgelegten materi vnd neuen märe auff disen
 tag den anefang gäb, die vngepiten frölich mit zucht anhub also sprach.

Wie Tancrede fürst vnd princeps von Salerno seiner tochter iren bülen vnd liebhaber tötet vnd ir sein hercz in eynem gulden kopf schicket darein sy vergift wasser goß daz tranck also ir selbes das leben nam vnd den tod thet.

5 Fvrrwar es ist gar eyn kläglich vnnnd erbarmklich sache daz mir vnser künig [139^c] auf disen tag gepoten hat wenn ich eyn solichs bedenck vnnnd ich meynte wir alleyn her komen wären vns freud ze geben. So laß ich mich bedencken wir her komen sein ander leut pein schmerzen vnd trübsal ze bedencken vnnnd douon sagen, die man nicht wol
 10 gesagen mag on pein des sagers vnd leyd der czühörer, vnnnd das sich douon nicht traurigkeyt begäbe. Aber ich mir gedencck vnser künig vmb temperirung willen der vergangen freud das gethan habe. Doch wie dem sei seitmal es an mir ist so sol ich der fürgelegten materi vnd seinem willen nachkomen. vnd euch von einer gar kläglichen vnd vn-
 15 glücksäligen materi sagen die sich zweyer lieb halben ergab wol wirdig der czäher vnser augen, darumb vernämt vnd mercket was ich euch sage. In der fürstlichen stat Salerno wonet eyn fürst vnnnd herre genannt Tancrede eyn genüge diemütig man vnd herr, wo er in seinen alten tagen in seinem eygen blüt sein hend nit verunreynet het, dem
 20 got in allen seinen tagen von kinden nye mer dann eyn einigē tochter geben het. aber vil säliger gewesen wär er ir nye gehabt [139^d] hete. dieselbig sein tochter so inniglichen lieb von im gehabet was als tochter von vatter ye lieb gehabt ward, vnd vmb solicher weycher liebe willen vil iar übergangen het eyn elichen man zenämen das er sy nit von im
 25 geben noch lassen wolt Doch am letsten sy des herczogen von Capoa sun czu einem weyb gabe, der in wenig iaren mit tod abging vnd starb vnd sy eyn witwe belib vnd wider zu irem vatter heym kam, sy waz on maß czüchtig schön von gesicht vnd anplick gerad von leib als eyne gesein mocht, grosser synn. das vileicht mer dann frawen zu gepürt hette.
 30 Also mit dem vatter wonet als eyn fürstin vnd grosse fraw, wol vernam vrsache der grossen liebe die der vatter zu ir hette er ir keynen man gäbe vnd sy nit erlich daucht an in ein solichs ze begern, vmb des willen ir gedacht vnd fürnam wie sy in stille geheym möcht einen bülen vnd liebhaber gehalten vnnnd vil manchen mane von edel vnd vnedel an irs
 35 vaters hof als dann an aller fürsten hofe gewonheyt ist sahe. Als sy nun vermercket het ir aller wesen syten vnnnd gestalt, ir lieben vnd gefallen ward eyn [140^a] hübscher iüngling von nider gepurt aber von hochem

vnd edlem züchtigen gemüte genant Gwischardo ires vatters kamerer, wie wol er von geschlechte vnedele was, doch von tugent nit edeler gesein mocht, darumb er ir ob allen mannen gefiele vnd sy in gar oft lieblichen ansehen warde vnnnd von tage zů tag ye mer bewären vnd in
5 liebe in in enczünden vnd seine gůte syten stätz loben vnd breisen ward Nun der iüngling der iungen frawen meynung ir liebe czů im vnnnd gůten willen vername, widervmb zů ir in liebe enczündet tag vnd nacht gedachte wie er ir in liebe vnnnd freundschaft möcht zewillen werden vnd ir wol gefallen. sy in solicher maß in sein hercze enpfiehg das er alle
10 andere sach liebhalben ließ, vnnnd zů ir alle seine synn hercz vnd gemüte keret, beidenthalben eynander dise verborgne lieb trügen, vnnnd die iungfraw nit anders begeren was dann sich allein bei im zefinden, doch niemant solicher irer liebe vertrauen wolt der im ir meynung het czewissen getan, mit ir selbs gedacht neü synn zefinden, vnnnd im eyn
15 brieflin schreyb alle ire meynung vnd [140^b] zů ir zekomen in vnder-richte vnd lernet, vnnnd denselben brief in eyn hol ror stieß zů dem iüngling in schympfes form sprach. Gwischardo disen ror gib deyner meyd daz sy domit daz feur auffblase. Gwischarde das ror zů im nam wol gedacht sy im daz on vrsache nit geben het von ir schied zů haus
20 gieng das rore öffnet das er czerkloben sahe darinn er den brief fand den las vnnnd bald vernam was er thůn solt frölicher ward dann man ye ward sich zůricht vnnnd bereyt zů ir zekomen nach dem sy in durch ir schreiben vnderricht hette. Nun was czenächste bey des fürsten palast eyn gruft oder hōle in den perge vor langen zeitten gemacht worden
25 dieselbig hōle hette ir liecht von oben abe durch ettliche löcher die mit gewalt durch den felsen waren gehawen worden. aber yeder man vnwissent vnd vergessen vnd mit gedorn verwachsen waren, in dieselben hōle auß dem palast auß der frawen gemache durch eyn verborgen porten vnd stiegen auß eyner kamern die vnden in der frawen geczimmer
30 was darzů die fraw alleyn die schlüssel hete man auß vnnnd ein geen mocht, soliche porten der [140^c] hōle auß vnnnd ingancke als dann der liebe gewonheyt ist. der keyn ding zethūn czeschwäre ist, der iungen frawen in gedanck kam domit ir grosse liebe lange zeit verborgen belib vil manchen tag sich alleyne müet e sy die porten geöffnen mochte, vnnnd
35 do sy die aufgeschlossen het alleyn darein gieng vnd den außgang der hōle erlernet vnd gesehen hette, solichen weg sy Gwischardo zewissen tet, wie er sich in die hōle abelassen sölt zů ir czekomen, vnnnd im die hōhe von obenabe alle beczeychent gabe. Do nun der iüngeling der

frawen synne vernomen hette seine stricke mit gûten knoten zûbereyt
 hette daran er auf vnd absteigen mocht sein leib mit leder vmbgabe vmb
 der gedôrn willen, vnd im vor tage fûglich zeit name sich czû dem
 fenster der hôle fûget do er seinen stricke gar wol an eynen stock der
 5 in dem loch was anband sich hinabe in die hôle ließ vnd der edeln seiner
 lieben frawen wartet, die desselben tags des gleichen thete als ob sy
 schlaffen rûen wôlte, ire iunckfrawen vnd meyd von ir sante sich alleyne
 in ir kamern versperte vnnnd die porten der hôle ôff[140^d]net darein
 gieng do sy iren aller liebsten iüngling fand nit mit kleyner beyder
 10 freude in die kamern giengen do sy in grossen freuden vnd lust den
 merern teyl desselben tages in liebe vertriben, darnach ein czüchtig
 verborgen ordnung gaben domit ir liebe lang weren wâr, vnd Gwischardo
 wider in die hôle gienge, vnnnd die fraw dieselben porten der hôle wider
 verschlosse herfür czû iren iunckfrawen gienge, vnd do die nacht vnd
 15 dunckel komen was Gwischardo wider auß der hôle steyge heym zû
 hauß ging. also vil manchen thet. Nun in solichem ab vnd zûgeen
 sich begab als der neid des vngelückes der solicher grosser freude vnnnd
 lust der zweyer lieb in die lenge nicht vertragen mocht fûget vnd zûgab
 das sich solch freud in pitter weynen vnnnd traurigkeyt bekert. Nun waz
 20 des fürsten Tancredi gewonheyt zû zeitten alleyne in der tochter kamern
 zegeen mit ir zereden, darnach also alleyne wider in seinen gemach
 ging. vnd vnder andern tagen eynes tages nach essen er nach seiner
 gewonheit in der tochter kamern kam vnnnd sy die Gismonda mit namen
 genant [141^a] was bey iren iunckfrawen in dem garten was darein man
 25 auß irer kamern geen mocht vnnnd er ir von solicher kurzweil vnd freud
 nicht nâmen wolt alle fenster der kamern zû getan fand nyemant darein
 zegeen, sein war genomen het sich auf eyn fürpanck neben dem pete
 hinder den vmhang seczet sein haubt an daz pete neyget also entschieffe;
 czû gleicherweise als ob ere sich mit vleiß verborgen hete doch on alles
 30 gefâr geschahe. In dem Gismonda iren aller liebsten Gwischardo het
 komen machen alle ire gesellschaft in dem garten ließ mit stille vnnnd
 geheym beyde in ir kamern kamen die wol versperten des fürsten schla-
 fent hinder dem pete nit warnamen mit einander zû pete giengen vnd
 nach ir gewonheyt mit einander der freuntlichen lieb spilten nach irem
 35 luste vnnnd gefallen. In solichem schimpfen der fürst erwacht sahe horet
 vnnnd vernam alles das die tochter vnnnd Gwischardo mit cynandere be-
 giengen on maß vnmütig vnnnd traurig vnd in willen was sich zeöffnen
 vnnnd sy ze beschreien, doch im bessers gedacht vnnnd schwyge als eyn

weis man do [141^b] mit er solche sünd vnnnd übel in geheym mit rat vnd mynder seiner schand bas gestraffen möcht als im dann willen zettün was. Do nun die zwei lieb güt zeit nach irer gewonheyt die letsten freud der lieb empfangen hetten vnnnd zeit daucht ab dem pete giengen.

5 vnnnd Gwischardo sich wider in die höle füget vnd die iung fraw wider in den sal zů iren iunckfrawen gieng, vnd der fürste wie wol er eyn betaget man was, doch sich czů eynem fenster auß der kamern ab in den garten ließ, des auch niemant war genomen hete, betrübt in den tod in seinen gemach vnd kamern ging sein heymlich ordenung gegeben vnnnd an dem

10 aussteigen der höle in der ersten dunckel der nacht Gwischardo in seinem lideren kleyd von czweyen gefangen vnnnd für den fürsten in stille gefüret warde. Also balde in der fürste ansichtig ward weynent zů im sprach. Gwischardo ich meynet vnd mir gedacht ich vmb dich nit verdienet het solicher schmahe vnd schand die du mir in mein fleysch vnd

15 blüt beweiset hast als ich heut mit meinen augen gesehen hab. Dem der iungling kein ander antwurt [141^c] gab dann alleyn sprach. Herr die liebe das vnd grössers vermag ir stercke, mächtiger ist, dann weder ich noch ir seit. Nach disen worten der fürst in schüff gar wol behüten. nun dieselbig nacht vergangen, vnd der neü tag komen was vnd frawen

20 Gismonda solche sach vnwissent was. vnd der fürst diser sachhalben sich gar mancherley bedacht, vnd nach seiner gewonheyt aber in der tochter kamern kam ir zů im rüffet sich bei ir alleyn verschloß mit kläglichlicher stimm vnd weynenden augen zů ir sprach. Gismonda tochter ich gab mir czů versten wie ich erkant dein zucht tugent vnnnd güt syten

25 so bin ich solicher meiner meinung betrogen gewesen, vnd mir in mein gemüte nyemant hat bringen mügen; noch solichs hat gelauben machen het ich es mit mein selbs augen nicht gesehen, das du dich keynem mann hetest zů vnern vndertänig gemacht vnnnd deinen leib czů seinem willen geschicket er wär dann dein elich man gewesen. Ich het nyemant

30 gelaubet mügen du eynes solichen gedacht hetest ich geschweig das zettün Darumb das wenig das ich [141^d] noch leben sol in meinem alter wo ich deine grosse sünde bedenck in trübsal vnd traurigkeyt mein leben führen müsse. Nun wölt gotte seytmal du dich ye zů solchen vnerlichen sachen schicken vnd geben woltest das du dir doch eynen dir geleich in

35 adel außerwelet hettest der so vil an vnserm hofe ist, so hast du dir Gwischardo den schnedesten an vnserem hof zů eynem liebhaber erwelet den wir als vmb gotz willen von iugent auf erzogen haben, darumb du mir mein hereze vnd gemüt beschwärt vnd in vnrrue geseczet

hast, vnnd nicht enweyß grosser lieb halben wes ich mit dir beginnen
sol Gwischardo halben den ich in diser nacht do er auß der höl steyg
fahen thet mit mir beraten bin was ich mit im thun sol. Aber mit dir
gott weyßt mein hercz mir vnwissent ist was ich thûn sol. Auf eyner
5 seiten bezwungen bin liebehalben dir zû vergeben vnnd auf dem andern
teyl von gerechtem vnnd pillichem zoren bewaget bin dich deiner grossen
sünd vnnd torheyt czebüssen Also auf einem teyle ich dir vergeben solt
vnd auf dem andern teyl ich wider dich vnd [142^a] mein natur in her-
tikeyt fallen solt. Doch e ich icht enthû vor dein meinung hab ver-
nâmen wöllen. Also gespröchen sein haubt gen der erden neyget kläg-
liche anhûbe czeweynen mit mynder dann als eyn wol geschlagen kind.
Do Gismonda iren vatter vernomen het. vnnd durch seine wort wol
vernam nit alleyn ir verborgne lieb geöffnet was, sunder iren aller-
liebsten freund troste vnd hoffnung in gefäncknuß vernam douon sy be-
15 sunder pein herczeleyd vnnd schmerzen empfieng, vnd das mit romor
geschrey vnd weynen zû beweisen als geren der frawen gewonheyt ist
czû meremalen zetûn des bewaget waz doch ir hohes gemût die weibli-
chen schwacheyt überwand ir angesichte manlich stercke beweiset sich
in iren gedanken schicket e sy an den vatter genad oder vergebung
20 begeren wâr e sterben vnnd nicht mer in leben sein wölt ir wol gedacht
Gwischardo nit mer solt bei leben sein, vnnd nicht thet als eyn übel-
thäterin die vmb ir sünd gestraffet wære, sunder als eyn redliche be-
herczende frawe on alles achten [142^b] mit frölichem anplick on alle
betrübung zû irem vatter sprach. Vatter weder zelaugen noch an dich
25 gnad zebegern in keynen weg geschickt bin dann das erst brächt mir
keyn hilff, des anderen begere ich nichte das es mir gehilffliche sey,
vnd meyn syn ist in keynen weg mich dir noch deiner hulde czebefelhen.
Doch von erst meine wort vnd die warheyt vernyme wie ich mit natür-
lichen gûten vrsachen mein ere retten will, vnnd mit festem starken
30 gemût darnach meinem willen nachkomen will, darumb wiß. Es ist
war ich hab Gwischardo lieb gehabet vnd noch habe, vnnd die weil ich
lebe das gar wenig sein wirt lieb haben will, vnd ist sache das man nach
dem tode auch lieb hat so sol ich in ewig lieb haben. Auch wisse das
mich nicht zû solicher seiner liebe weibliche begire bracht oder gerey-
35 czet hat, sunder dein kleyne fürsehung vnd versaumnuß meinthalben
das du mich nicht mit eynem elichen man versehen hast do bei Gwi-
schardo grosse tugent des vrsache gewesen sein, es [142^c] solte dir
vatter Tancredi wol wissent gewesen sein als du von fleysch vnd blût

geboren warest, das auch dein tochter von fleysch vnd nicht steyn solte
geboren sein, vnnnd wie wol du eyn betaget man bist doch der iugent
stercke vnd natürlichen begire soltest bedacht haben, do bei was müssig
geen vnnnd wolust in den alten mannen vnd auch frawen thûn, ich ge-
5 schweige in den iungen thûn, ich von dir in fleysch geboren nicht lang
auf erden gewesen noch iunck bin, von eynem vnd anderm vol mit
fleyschlicher vnnnd natürlicher begire grosse kraffte vnd macht bei mir
haben, als dann die do vor eynen mane gehabt vnd erkant hat was lust
vnnnd freud soliche begire geben mag, solcher begir stercke vnnnd macht
10 ich nicht lenger widersteen noch vertragen mocht nachfolgen müßt do
mich solche begire vnd willen hin czugen. Darumb ich mich als eyn
iunge frawe bereit vnd schicket liebzehaben vnnnd dar zû allen vleiß
thet domite weder dir noch mir, des do zû mich natürlich sünde zoch
vnnnd reyczet vns douon schande bekäme, zû dem ich durch genade
15 des gelück[142^d]es vnd diemütigkeyt der edlen liebe mir eyn genûg
züchtigen vnnnd verborgen wege gefunden hette, domit ich on yemant
wissen wol meinem willen on alle laster ein genügen tûn mocht, wie dir
das ist zewissen komen nymmet mich freinde, ich laugen dir sein nicht
ich erwelet mir Gwischardo czû eynem liebhaber vnd das nicht als
20 manche thûte, sunder von ganczen eygen willen vnd rat auß allen dei-
nen herren vnnnd edeln leütten ob allen andern mannen mit fürsichtigkeyt
meiner gedanke mir in für meinen aller liebsten erwelet, vnnnd mit
lieblicher stäter freundschaft beydenthalben ich lange zeit meiner liebe
vnnnd willen eyn genügen getan hab. Mer mich vernym als du sprichest
25 wie ich in liebhaben gesündet hab dunckt mich wie du mer nachfolgen
wöllest das der gemeyne meynung ist dann der warheyt vnd mich dar-
umb hertiklicher straffen, vnnnd zû gleicher weise redest als ob du dich
darumb nicht betrübet hetttest wo ich mir eynen edelen mir gleich ge-
borenn czû meinem liebhaber erwelt hete, vnnnd mich nicht zû eynem
30 also von nyderer gepurte [143^a] gelegt het, in dez du mich nit ver-
dencken solt, sunder dem gelücke die schulde zûziehen, das do oft die
nidern erhöhet vnd die hohen ernidert, doch laß wir das faren vnnnd be-
sehen den anefang diser sache, Nun nim war vnd gar eben merck, so
spriche ich das wir alle von fleysch vnd blût von eynem schöpfer be-
35 schaffen sein mit sel in gleicher sterck macht vnnnd tugent on alle vnder-
scheyde von eynem mane vnd frawen komen vnnnd geboren sein,
vnnnd die an dem meysten tugentlichen wûrcken vnd der tugent mer
dann die andern gewaltig sein dieselbigen edel geheysen seien. vnnnd

die anderen vnedel gehalten werden, wie wol daz ist daz widerwärtige
 böse gewonheyte dise statut vnd recht verborgen haben, doch darumb
 nicht von natürlichen rechten noch güter gewonheyte weggenommen noch
 verdorben ist. Darumb alle die tugentlich würcken bei in adel beweisen
 5 vnd wer anders sprichet den man frölich on adel vnnnd tugent sprechen
 mag. Nun nim war aller deiner edel leüte bedenck ir leben vnnnd wesen
 ir zucht weise vnd gepärd. darnach Guischardo tugent zuch[143^b]te
 vnd vernunft bedenck, vnd wilt du recht vrteylen vnnnd die warheyte
 richten so wirstu sprechen er ob allen deinen herren der edeleste sei,
 10 vnnnd alle deine edelleute pauren seien von seiner zucht vnd redlichheyte
 ich niemant gelaubt hab dann dir alleyn vnd meinen augen, wer hat in
 nye gelobet vnd gebreiset als du getan hast in allen loblichen sachen
 darinn eynem iegklichen man zügeführt gelobet cze sein, fürwar du im
 recht vnnnd nicht vnrecht als du im ieczund getan hast thetest, vnd wo
 15 mich meine augen synn vnnnd vernunft nicht betriegen so lasse ich mich
 geduncken keyn lob im von dir nie gegeben ward das ich in nit ein sol-
 ches mer brauchen sähe dann durch deine wort ie mocht beweist wer-
 den wo ich seinthalben betrogen wär solches von dir bekommen wär, vnd
 als du sprichest ich mich zü eynem schlechten man von nyder gepurt
 20 gelegt hab, so sprich ich du sagst nit war wol zü einem armen ich mit
 deiner schand dir vergeben möcht das du als ein redlichen man deinen
 diener also versehen vnd zü gütem stände bracht hast. Doch darumb
 die armüt nyemant den adel [143^c] nymt, wir haben gelesen vnd auch
 gesehen vil grosser herren fürsten künig vnd keyser die arm gewesen
 25 sein daz feld gebawet haben des fides gehüt haben reich gewesen sein,
 vnnnd noch seien, den letsten punt den du mir fürgeworffen hast als du
 sprichst du nit enwissest wes du mit mir begünnen oder tün söllest, leg
 von dir soliche gedanck tū in deinen alten letsten tagen daz du in dei-
 ner iugent nicht getan hast, erherte dein gemüt wider mich, dann in
 30 keynen weg ich deiner genade noch vergebung an dich beger noch ge-
 schicket bin die zebegeren, darumb thū vnnnd verbringe wider mich dein
 herten willen als die von erst aller diser sache ursach gewesen ist sol es
 anders übel getan vnd sünd sein, darumb wisse vnnnd bis des on czweifel
 was du mit Gwischardo thüest oder hast gethan, thüst du dasselbig nicht
 35 auch mit mir, mein eigne hend das thūn sölle. Nun gee hin mit den
 weiben zeweynen vnd mit in vergeuß die zäher deiner augen, vnd vns
 beyde mit einem schlage in deiner hertikeyte ob dich duncket wir ver-
 schult haben den tode gib. Der fürste der tocht[143^d]ter grosses gemüte

wol vername doch nit glauben mocht das sy so gänzlich geschicket
wâr nach dem ire wort erklingen vnd lauten. in dem von ir schied sich
mit im selbs beriet der tochter an dem leibe nicht zestraffen vnnd sein
hertikeyt vnd czorn gen ir fallen lassen, vnnd mit eynes anderen scha-
5 den der tochter grosse liebe zäumen vnd brechen meynet, vnd den die
Gwischardo in hûte heten gepot das sy in mit still on alles romor wûrg-
ten vnd töten das hercze im auß dem leibe nämen vnd im brächten. Die
hüter des herren gepot verbrachten. in des nachtes töten. Do nun der
morgen komen was der fürst im schüff bringen einen gülden kopfe dar-
10 eine er des iungen hercz leget vnnd das bei eynem seinen getretwēn
der tochter schickt mit disen worten zesprechen. Dein vatter schicket
dir das dich zetrösten mit dem das dir am liebsten ist als du in getrö-
stet hast des das im am liebsten was. Die iung frawe ab irer herten für-
saczung nicht abetrat, sunder anhub vergift wasser zestilliren die cze-
15 brauchen ob sich begab des sy dann sorge hette. Nicht lang verging
[144^a] des fürsten diener mit der gab vnd gulden kopfe vnnd den vor-
gesprochen worten czû ir kam vnnd sy mit auffgerichtetem anplick den
gulden kopf mit den worten enpfing den bald endecket darinn sy das
hercz sahe, vnd bei den worten wol vername on czweifel es Gwischardo
20 hercz wære, ir angesicht gen dem diener keret zû im sprach. Sage mei-
nem vatter deinem herrn grossen danck seiner gab, in dem hat mein
vatter wol getan, dann solche gab nicht minder dann von golde eyner
begrebnusse wirdig ist, vnnd also gesprochen das hercze vnnd kopf zû
irem mund nächnet lieplichen küsset vnnd sprach. Ich hab allwegen
25 gen mir mein vatter milt vnnd diemütig funden Nun an meinem letsten
end meines lebens mer dann ye, darumb sage im mein letsten danck sei-
ner wirdigenn gab. in dem sich gen dem gulden kopf keret das hercz
lieplichen ansahe vnnd sprach. O du aller liebste vnnd süssiste herberg
aller meiner begir vnd freude verflucht sey die hertikeyt des der do
30 vrsache ist mich diche mit den augen meiner stirn also iämerlichen ze-
sehen Du hast verbracht den laufe [144^b] deines lebens als dir von dem
vnglück ist beschert gewesen. du bist czû dem ende komen dar zû eyn
yeglich hercze komen muß. Du hast gelassen alle trübsale diser welt,
doch von deinem todfeind eyn guldene begrebnusse empfangen hast als
35 du wol wirdig bist. Nit anders dir mangelt vnd gebricht domit alle
dinge verbracht werden dann alleyne die zähler der augen die du bei
leben am liebsten hettest, vnd domit dir die zähler solcher augen zû teyl
wurden gab gott meinem vnbarmherczigen vatter in sein gemüt dich mir

zeshicken, darumbe ich dir sy freuntlich geben vnd mittheylen will, wie wol mein synn was mit trucken augen mein leben zeenden vnd mit vnerschrockem anpicke mein sele vnnnd geyst zů deinem fügen die du auf erden ob allen dingen liebe hetttest, in welicher gesellschaft mocht ich
5 sicher in vnerkant gegent faren. Als mit dir vnd deiner sele die on zweifel noch hier in disem gulden kopf ist vnnnd mich noch von herczen lieb hat, vnd der meinen wartendt ist von der sy auch lieb gehabt ist. Nach disen wortten nichte anders dann als eyn fließender brunn [144^c] ir auß irem haubt gieng on alle weibliche romor ir haubte auf
10 den gulden kopf vnnnd tote hercze neyget, weynent kläglichen anhubē zů vergiessen die zähre irer augen, in solicher maß das es nicht zezagen noch czeschreiben ist alle zeit das tot hercz küsset, in solichem kläglichen weynen der frawen meyd vnd iunckfrawen vmb sy ständen. warumb die fraw so klägliche tet oder was hercze in dem gulden kopfe
15 was, oder was ir klagen vnd herttes weynen bedeuten wölt in vnwissend was dann die ire wort nicht vernamen, doch mit ir all klagen vnd weynen müsten diemütigklichen hatten sy in die vrsache ires leydes vnd iammers wissen ließ aber alles vmbsunst was, vnd so sy best mochten sy trösten. Do sy nun etliche stund mit solichem kläglichen weynen ver-
20 triben hete ir haubt auf richt ir augen trucket anhub vnd sprach. O du mein aller liebstes hercz nun ist verbracht das ampt meiner zäher, vnnnd ist mit anders vorhanden zethūn dann mit meiner sele zekomen der deinen gesellschaft zethūn. Also gesprochen sy ir schüff das geschirre zezeben darin das ver[144^d]gift wasser was daz sy den vorigen tag ir den
25 tod czegeben gemacht hette dasselbig vergift wasser in den gulden kopf goß auf daz tote ires allerliebsten lieb hercze daz sy mit iren ellenden zähern gewaschen het on alle forcht vnd erschrecken iren mund daran sezet, vnd das vergift wasser ab dem herczen alles trancke. Darnach zehand mit dem guldin kopf auf ir pete gieng, vnnnd so sy züchtigest
30 mochte ir brust vnd hercze dem gulden kopf vnd toten hercze nächnet, vnd on icht gesprochen des leydigen todes warten was ire iunckfrawen die alle sach irenthalben gesehen heten, doch mit weßten was wassers sy getruncken vnd genomen het wol sahen das der tod mit ir begund zezingen schnell lüffen dem fürsten irem vatter was sich ergangen hete zez
35 wissen theten der sich nicht saumet wol im gedacht vnnnd sorg hette des das do geschehen was balde zů der tochter kam aber zespat kam, die er auf dez pete noch mit kleinem leben doch mere tod dann lebendig fand, sere erschrack, doch mit süssen vnd hübschen diemütigen wortten sy an-

hüb czetrüsten, vnnd do er sy also in des todes nöten [145^a] ligen sahe
kläglichen anhöbe zeweynen schreien vnnd sein leyd zeklagen. Die
fraw mit nyder tötlicher stim zů im sprach. Tancredi vatter behalte
dein sacher czů sachen die on deinen willen geschehen, Ich begere weder
5 dein noch deiner sacher. wer sahe yemant weinen des das er gewölt
hate. Doch ist indert liebe bei dir lebendig beliben die du mir etwann
trügest, so begere ich von dir für mein letste gabe. Seytmale dein ge-
fallen nicht was das ich in still vnnd geheym mit Gwischardo leben
möcht das du mich czů im wo du in hin getan hast offenbarlich legest
10 oder werffest vnd mich tod also bei im lassest. Das grosse leyd pein
vnd schmerczen dem herren der tochter keyn antwurt geben liessen, in
dem die iung frawe sich zů irem ende komen sahe, das tod hercz an ir
brust drucket vnnd czů den die vmb sy stůnden mit senfter stimm ir
letstes wort sprach, stet mit got ich far dohin ire augen sich czů thetten
15 alle synn vnd vernunft bei ir verschwunden also auß disem elenden
leben schied. eyn iämerlich kläglich end namen beyde Gwischardo vnd
Gismonda vrsache grosser lieb als ir vernomen habt. die der fürst nach
[145^b] langem klagen vnd zespater reüe seiner hertikeyt mit grossem
leyd aller von Salerno mit grossen eren vnd wurden beyd leib in eyn
20 begrebnuß beschliessen thet.

Münch Alberto von Imola einer iungen frawen zů versten gab
wie der engel Gabriel vmb sy būlet vnd in sy in liebe enczündet
wār, vnd an des engels stat er die frawen zů mermalen beschlieffe
vnnd bei ir lage. Darnach grosser forcht halben irer freünde in
25 eyner nacht nackent zů eynem fenster auß der frawen kamern
sprang in cyns armen manns hauß floche, der in des tages darnach
in eyns wilden mannes form auf sant Marx placz fůrt do er von aller
menge vnd seinen münchen erkant vnd in gefäncknuß gefůrt ward.

Der frawen Fiameta gesagte histori vnd neüe mār zemanichmalen
30 die weychen czāher ir gesellschaft in für ire augen bracht het, das nun
zů ende komen was, vnnd der künig mit ernstlichem angesicht sprach.
Ich achtet mein leben gar klein wo ich mir nun den halben teil solcher
freūd solt geben haben als mit Guischardo [145^c] Gismonda thet, des
laßt euch nit fremd duncken wie wol ich in leben bin, doch alle stund
35 wol zetausentmalen des tode enpfınd, vnd keynerlei freūd mir darumb
werden mag, doch laß wir yeczund sten die meinem geschäft vnd frawe

Pampinea nachfolge der fürgelegten materi, die villeicht auch ey n teyl meiner trübsal gleichen wirt nach dem als Fiameta den anefang geben hat ob ich villeicht auch ey n wenig eyns külen taue meiner trübsal in meinem brinnenden herczen vernämen vnnnd enpfinden möchte. Pampinea des künigs gepot vnd sein meynung vernomen het, doch ir syn was e ir gesellschaft willen ze tûn dann des künigs mer geschickt was ir gesellschaft ein klein zeerfretten, dann durch des künigs gepote im alleyn zewillen werden, darumb ir meynung was, doch nit auß der fürgelegten materi zekomen vnd ey n histori zesagen des man lachen vnd freud haben möchte anhub vnd sprach Vnder den vngelernten ey n gemeyn sprichwort ist. das der do bös vnd listig ist vnd für gû t gehalten ist, der wirt in übelthû n nimmer verdacht, douon mir vil zereden wâr wenn mir gott so vil synn verlihen [145^d] het das ich beweisen möchte wie groß die vntugent der ipocrasia vnd dunckel gû t bei den mû nchen vnd geystlichen ist die mit iren weitten herlichen kutten vnd pleychen antlû tze oder angesicht das mit fleiß vnnnd kû nsten gemachet mit diemû tigen senften Worten, ander leû t gû t zebegeren, vnd mit grossem geschrey in ander leû t ir eygen sû nd vnd vntugent peissen mit beweisen in zegeben vnd durch solch gab zû dem ewigen leben zekomen, vnd zeleicher weis als ob sy des paradeses nit notturftig wâ ren, sunder als ob sy des herren wâ ren, vnd es zegeben heten vnd das selbs besâ ssen, darumb sy das einem yeglichen toten menschen zegeben gewaltig wâ ren, doch nach dem er in vil geltes gelassen het im wirdigern stande zegeben. Mit solchem von erst sy sich selbs betrû gen wo sy das glauben, darnach die die in gelaubt haben sich fleissen die auch zebetrû gen. darumb wann es mir fû glich wâ re, ich geren den ey nfâ ltigen die in gelauben wô lt czû versten geben was sy vnder iren weitten schô nen kutten verborgen tragen got wô lt das in allen ires lû gen wurde geschehen als eynem parfû sser [146^a] mû nche, der sich nit vnder in der minste meynte, vnnnd auf dem predigstû le für groß gehalten waz zû Venedig geschahe. Nun domit ich eû er beschwâr te gemû t vnd hercze der vergangen histori Gismonda halben, ey n klein wider in frid vnd freuden secze vnnnd frô lichen lachen mû get. Ich euch sagen will, darumb mein allerliebsten frawen, in der wirdigen stat Imola waz ey n man gar von bö sem vnzû chtigem leben mit namen genant Berto della Massa, des vntugent vnd vnzû chtige werck allen Imolesern kunt vnd wissent waren. Er kam czû solichem nit alleyn lû gen auch die warheit zereden im nit gelaubet was Da bei er wol vernam seines wesen in Imola nicht mer gesein mocht,

vnd als eyn verczagter gen Venedig alle vnreyne bosheyt zeempfahen do er sich hinfügt. doch sich seiner bosheyt vnd bösen wercke anders bedencken ward dann er czû Imola gethan het, vnd sein gewissen in grimmen vnd peissen ward der bösen seiner vergangen werck, vnd sich
 5 ganz diemütiget, vnd ob allen mannen sich geystlich daucht, vnd czû eynem münch warde parfusser orden, vnd nannt sich münch Albert von [146^b] Imola, vnd vnder solcher seiner kutten anfieng vnd zû ver-
 sten gab wie er ein hert streng vnd götlich leben füret. er ser lobt die penitenz vnd gehorsam vmb gots willen zethûn. Er asse keyn fleysch
 10 noch trancke keyn wein wann er sein nicht het das im gefiel es nam sein nyemant ye ware das er als von eynem grossen dieb rüffianer falsche spiler vnd todschläger zû als eynem grossen vnd heyligen pre-
 digter worden waz, doch do bei seiner vntugent nit abegangen was wo er die in geheym vnd verborgen prauchen mochte, über das er sich auch
 15 czû priester machte stätz ob dem altar stünd meß zelesen, vnd wo er in seiner meß vil zûseher het er stätz weynet das leiden gots als den seine zäher der augen kleyn kosten wann er sy haben wolt, in kurzzer zeite mit seinem weynen vnd predigen in solicher maß sein handel füret das in Venedig wienig grosser heytrat testament vnd heymlicher rate verpracht
 20 werden das er nit darzû als ein getreter diener gots begert würd. ein grosser depositari vnd hüter der verborgen schätz. eyn groß ratgeber vnd peichtuatter der mann vnd frawen, in solchem leben er von dem wolf zû dem hirtten [146^c] warde, vnd für heyliger vnd besser gehalten waz dann sant Francischo czû Assesy ye ward in seinem solchen heyligen leben sich begab das eyn iunge eynfältige fraw genant Liseta von Kacherino eynes reichen kaufmans weib, der zû der zeit mit den galle in Flandern gefaren was mit andern frawen gen beicht zû dem heyligen münch Alberto gieng, vnd do sy im bei seinen füssen knyet als die eyn Venedigerin was die da alle hochtragent sein. vnd nun wol sich den hal-
 25 ben teyle irer sünd erklaget het. Sy von dem beychtiger gefraget ward ob sy eynen bûlen oder liebhaber hete, dem sy mit scharpfem angesicht antwurt vnd sprache her münch habt ir nit augen in eüerm haubt dun-
 cken euch mein schöne den andern geleiche sein, ich hette ir genûg wann ich ir begeret, aber mein schöne ist nicht eynem yegklichen ze-
 30 geben noch von eynem yegklichem lassen liebhaben, wie vil secht ir der, der schöne geschaffen sei als die meine ist, dann fürwar ich mich in dem paradeise vergienge, so vil von irer schöne saget das es czehören verdrossenlichen was. Mönch Albrecht bald vernam das sy übel ge-

salezen was im wol gedacht sy sein[146^d]es fügs wär zehand on maß in liebe in sy enczündet, doch das auf dise stunde bei im beleiben ließ czû ander fûglicher zeit, vnd sich gen ir gar heylig beweiset vnd sy straffet czû ir sprach, solche ire wort nit anders dann hoffart übermût vnd eitel
 5 ere wâren. Vber soliche straffe die iung frawe czû im sprach, er wâr eyn bestia vnd erkennet nicht eyn schöne von der andern. Münch Albrechte ir zû der stund nit mer betrûben wolt ir die bûß sprache sein segen gab vnnd geen ließ czû irer gesellschaft, vnd nach etlichen vergangen tagen er eyn getrewen seinen gesellen czû im nam vnd czû
 10 frawen Liseta gieng die er in eynem iren sale fand, vnnd auf eyn ort nam do er von nyemant mocht gesehen sein nider auf sein knie ir für die fuß fiel vnnd sprach Fraw ich bit euch durch gottes willen ir mir verzeihet vnd vergebt des ich euch an dem vergangen sonntag eûer schöne halben straffet, dann die nächsten nacht darnach mir soliche bûß
 15 pein darumb geschahe das ich mich seider der selben zeit her nye hab mûgen in dem pet aufrichten dann erst heut auf disen tag. Do sprach Nespola? wer hat euch darumb also gethan. Do sprach brûder [147^a] Albrecht Fraw das solt ir wissen, do ich als mein gewonheyt ist an meinem gebete in meiner zellen was gächling mir eyn grosser schein kame,
 20 vnnd ich mich so balde nicht vmbkeren mocht zesehen waz doch solicher schein bedeyteten môcht, ich eyn schönen iüngling sahe mit eynem grossen stecken in seiner hande der mich bei dem goller meiner kutten nam vnd czû dem ertrich für seine fuß warff mich also außricht das ich sein nit vergiße die weil ich leb, den ich fragt warumb mir das geschâhe, oder
 25 wie ich das vmb in verschult het. Er mir antwurtet vnd sprach. Darumb das du heût so beherczendt gewesen bist dich widerseczen vnd zestraffen die hymelischen schöne meiner lieben frawen Liseta die ich lieb hab got außgenommen ob allen creaturen der welt Ich in fragt wer er doch wâr Er mir antwurt vnd sprach Ich bin der engel Gabrielo, o herr sprach ich
 30 czû im ich bitte euch ir mir verzeihet vnd vergebet es ist nit mit gefäre geschehen. er zû mir sprach. so sei dir vergeben doch das du czû meiner allerliebsten frawen so du erst macht geest vnd sy bittest das sy dir vergeb, vnnd wo sy dir nit vergibt so kom [147^b] ich wider zû dir vnnd würd dich in solcher maß zûrichten das du eyn zenichter man sein solt
 35 all dein tag. Was er mir mer saget mag ich euch nicht sagen ir habt mir dann vergeben. fraw mecze e vol mit kleien dann salcze sich alle freûen warde do sy den mûnch vername, das sy fürwar alles also gelaubet als er ir het zû versten geben czû im sprach. Ich saget euch wol

brüder Albrecht mein schöne hymelische schöne wär. aber wärlich vnd als mir got helff so ist es mir von herzen leyd vmb euch, vnnnd domit euch hinfür nicht mer eyn solchs züstee ich euch lauter vergib, doch das ir mir saget was der engel nach solichem eüern schaden czü euch sprach.

5 Brüder Albrecht sprach. Fraw seitmal ir mir vergeben habt, so will ich es euch gern sagen doch was ich euch sag das ir das bei euch beleiben lasset vnnnd das keynem menschen diser welt saget wölt ir anders eüer sach nit entwichen, dann ir seit die säligeste fraw auf erden. Mir saget der engel das ich euch sagen solt wie ir im liebet vnnnd gefallet ob allen

10 frawen auff erden in solicher maß das er zü euch ze mer malen des nachtes komen wär wann er nit besorget [147^c] het euch schrecken zü bringen vnd yeczund euch bei mir enbeut vnd wissen laßt er wöll eynes nachtes komen euch freüd zegeben wo es auch eüer gefallen wär bei euch zeschlafen vnd euch der hymelischen freüd teylhaftig machen, vnd

15 darumb das er eyn engel ist käm er in geystes form so möcht ir in nicht angreifen, dar umb euch zeliieb er in menschen vnnnd mans form zü euch komen wirt vnd begert von euch zewissen wann es euch an dem füglichsten sein möcht daz ir in eyn solches durch mich wissen laßt, vnd in weliches mannes form euch liebe vnnnd gefall in des er zü euch komen

20 wölle, des ir euch ob allen frawen diser welt sälig sprechen mügt wer fröer dann fraw Gretell bald zü dem münch sprach Ir mir grosse freüde bracht habt das ich von dem engel Gabrielo so lieb gehabt bin des selben gleichen er von ir lieb gehabt wär, vnnnd wo sy in gemalet fund do sy im alweg ein liecht aufzündet, darumb von mir nit mynder ist

25 liebgelhalten als ich von im bin vnnnd zü welcher stund er zü ir komen wölt es ir gefallen wär. vnd sy allezeit in irer kamern czü seinem willen bereyt funde. Doch das er sy vor der [147^d] iunckfrawen Maria nicht lassen solt, dann ir gesaget wär vnd sy auch wol gesehen het das er ir on maße huld vnnnd liebe trüge, dann sy in alweg vor ir knyen fund

30 vnnnd zü ir zekomen in welchem forme im das czethün liebet auch ir gefallen wär, nun ir nicht erschrecken brächt. Zü der Brüder Albrecht sprach. Fraw ir redt wol vnd weislich. ich sol wol nach dem ir gesprochen habt eyn soliches mit im ordnung geben. Aber fraw ir möchtet mir on alle eüere müe vnnnd kosten eyn grosse genad tün die selbig genad

35 der ich begeren bin das ist die, das euch liebe vnnnd gefalle das der engel mit meinem vnd in meinem form zü euch kome. Nun mercket was grosser genade ir mir thüt. Er wirt mein sel auß meinem leib nämen vnd in das paradeise thün vnnnd meinen leibe an sich nämen, vnnnd die

weile er bei euch ist mein sel also lang in dem paradeise sein wirt. Do
 sprach frawe Bertta das ist mir lieb, vnd ich wil euch des an der
 grossen marter stat die ir von dem engel empfangen habt gern ver-
 gönnen solicher freud Nun wol an sprach brüder Albrecht so schafft das
 5 die porten euers hauses auf dise nachte [148^a] geöffent seye in masse das
 er einkomen müg, dann in menschen form er czü euch nit komen möcht
 wo edere tür nit offen wären. Fraw nese sprach. Herre das sol ge-
 schehen nun das er kom, wann es im fügliche ist. In dem münch Al-
 brecht wol zemüt von ir schied. Die fraw ganz mit freuden beleybe mit
 10 ir selbes sich gloriret in solicher masse das ir das hemde den hinder nit
 berüret vnd hundert iar daucht das der engel Gabriel czü ir käm vnd
 brüder Albrecht nun wol daucht er ein reütter vnd stecher vnd nicht ey-
 engel sein müßt, vnd sich nit güten confection anhub zelaben vnd ster-
 cken domit er nit gerincklich von rosse abgestochen würde, von seinem
 15 breiel vrlaub nam vnd mit eynem seinen gesellen des abentz in eyner
 seinere freündin hause ging do er auch vormals mit stützen gen acker ge-
 fahren waz do er der zeit wartet verkleydet vnd aller verkert, do sein zeit
 kam sich in frawen Liseta haub füget, do er sich mit mancherley seiner
 frasserey in engels weise formirt liet also in der frawen kamern er-
 20 scheine Do die fraw in also schön vnd weis in purper farbe sahe für in
 auff ire knye nyder knyet. [148^b] Der engel ir den segen gabe auff von
 der erden hüß vnd ir den weg zü pete weißt des sy bald gehorsam vnd
 willig was, der engel sich bald zü ir füget. Brüder Albrecht was von
 leib gar ein schön gerade man vnd stünden im die beyn weydelichen
 25 vnder dem leib. sich also bei frawen Liseta fandte die do frisch vnd
 weyche was, sy anders speyset dann ir man thet czü manchen malen on
 flügel die selben nacht flogte, douon das Venediger fräwlein frölich vnd
 wol ze müt ward, über das er ir vil saget von den hymelschen freuden
 vnd grossen eren in dem sich der tage nahende warde beyde ir ordnung
 30 gaben dem widerkomen, vnd der engel in seinem harnesch von ir schiede
 vnd zü seiner gesellschaft gieng, vnd domit sein geselle die selbigen nacht
 nit forchte het noch alleyn in verdriessen liesse, die frawe von dem hause
 im zü pete freüntlich gesellschaft gethan het, vnd vnser schöne frawe
 Lisetta als balde sy das mal geessen hete ir gesellschaft name czü münch
 35 Albrecht in das kloster kam im grosse wunder von dem engel Gabriel
 saget, vnd alles das sy der hymelischen freud von im vernomen het
 vnd alles [148^c] sein wesen gestalte vnd gepärde do bei vil andere
 neßer märe. Zü der brüder Albrecht sprach. Fraw ich weyß nicht wie

ir mit im gestanden seit. Aber das weyß ich wol das er in diser vergangen nachte zů mir kame, vnnd do ich im eßer potschaft geworben het. das er mein sele nam vnd sy trüge in so vil blůmen vnnd rosen das ich ir so vil hie auf erden nye gesehen hab, do ich also stůnd in
 5 eynem schönen lustigen end bis auf disen vergangen morgen czů metten czeit. So sage ich euch sprach das vngesalczen frāwlein das eßer leib dise vergangne nacht mit dem engel Gabriel ist in meinen armen gelegen, vnd ob ir mir des nicht gelauben wölt so sůcht vnder eßer lincken bruste do ich eyn grossen kuß hin getan hab als ir bei dem czeychen
 10 wol mercken wert. do sprach brůder Albrecht ich sol heut auf disen tag thůn daz ich lange czeit ist nicht getan hab. ich sol mich nackent außziehen czesehen ob ir mir die warheyt gesaget habt. Also nach mancherlei ōden tādigen das toret frāwlein wider zů hauß gieng, vnnd můnch Albrecht zů manch malen in engels form von der schönen frawen ab vnd
 15 zů gieng on alle [148^d] irrung. Doch eyns tags sich begab das fraw Lisetta mit eyner irer gefätterin was beyde miteynander ir schöne halben striten, vnnd fraw Lisetta die die iren ūber alle andere schöne der frawen schāczet als die do wenig salcz in der zucken het sprach. Vnd das ir weßt wem mein schöne ob allenn schönen liebt vnnd gefelt gefätterin ir wůrt euch wunderen vnd geschwiget des das ir do saget. Die
 20 gefätterin zů ir sprach als die sy wol einfältig erkannt. Frawe ir mōcht die warheit sagen, vnnd wo ich des eyn eygenschaft hete mich wider euch nicht so hāftigklich seczet. Zů der das vngesalczen frāwlein sprach, als der synne nicht czů hauße waren. Gefätterin man soll es nyemant
 25 sagen der engel Gabriel hate mich im erwelet auß allen frawen auf erdenn für die schönsten vnnd nachdem er mir zů versten gibt er mich lieb hate als sich selbes. Sōlicher wort die gefätterin willen het zelachen, doch sich des enthielt domit sy fürpas was nettes von den gůten frāwlein vernāmen mōcht vnd czů ir sprach. Fürwar frawe ist der engel Gabriel
 30 eßer bůl vnd liebhaber vnd sagt euch solche ding, es sol sicher war [149^a] sein, aber ich hete wārllich nit gelaubt das die engel solchs thāten. Die frawe zů der gefätterin sprach. Awe ir habt durchgangen die wunder gottes, er thūt es sicher bas dann mein elich man. Er saget mir man thů es auch dar oben in dem paradeiß, aber ich in schöner dunck
 35 dann keyn fraw in dem hymel, darumb er in mich in liebe enczündet seye, vnnd komet czů czeitten bey mir zesein. In solcher red die gefätterin von frawen Lisetta schied vnd hundert iar daucht das sie kām do sy eyn soliches gesagen mōcht, vnd auf eynen kirchtage sich zů vil man-

chen frawen gesellet den sy alle sach der frawen Lisetta vnd des engels Gabriel halben saget als sy von frawen Lisetta vernomen het, dieselben frauen eyn soliches iren mannen sagten vnd auch andern frawen. Also e czwen tage vergangen waren die gancz stat Venedig diser abenteüre
5 vole was, vnd vnder andern mannen den es zewissen vnd gehöre kame das waren ire schwäger, die in fürnamen in geheym vnd stille den engel czefinden vnd wer er gesein möcht vund ob er fliegen oder springen künde. Sich etliche nächst an die hüt vund wart [149^b] stelten. Auch solche mār brüder Albrechten waren czü gehöre komen, sich eyns nach-
10 tes zü der frawen füget die er vmb ein solches meynet zestraffen vnd do er bey ir in der kamern was vnd sich nicht gar noch außgezogen het, das der frawen schwäger in heten in daz hauß sehen geen vund an der tür der kamern anstüssen, daz der münch bald vernam waz das gesein möcht keyn ander flucht nicht sahe dann ein fenster der kamern auf
15 thet das ob dem grossen kanal was von dem er sich ab on flügel in daz wasser warf er kund wol schwimmen vnd on allen schaden über den kanal schwamm do er eynes armen mannes hauß offen fand den er durch got bate das er im sein leben hulf retten manch lügen vnd neüe mār im vorsaget wie vnd warumb er also nacktet doher komen wär. Der
20 güt arm man sich im in erbarmen ließ, in in sein eygen pet leget zü im sprach das er also stille läge bis er widerkäm in gar wol versperte, darnach gieng sein geschäfte außzerichten. Nun der frawen schwäger in die kamern kamen, do sy funden das der engel Gabriel on flügel wär weg zü dem fenster außgeflogen was eyn klein beschämt [149^c] beliben
25 do sy sein nicht funden, die frawen schulten vund ir übel czü retten gancz betrübet liessen mit des engels kleyd vnd gezeüg zü hauß giengen das er alles do gelassen hette. In dem der tag kam der güt man in des hauß der münch geflohen was auf sant Marx placz auch vernomen het, wie das der engel Gabriel desselben nachtes mit frawe Liseta zeschlaffen
30 komen was, vnd wie in ire schwäger wolten gefangen haben, vnd wie er sorg vnd forcht halben czü eynem fenster auß ab in den kanale sprang vnd nyemant wissent wär wo er hinkomen wäre Zehande im gedacht, es der sein solt den er in seinem hauß het, vnd sich bald zü hauß füget vnd in erkant zü im sprach. Wölt er nicht in frawen Lisette schwäger
35 hend komen das er im dann gäb vnd schafte komen fünffhundert gulden das er balde thete. Nach dem münch Albrecht auß dem hauß vund heym begeret. Zü dem der güt man sprach. ich weyß keyn synne euch darvon zebringen dann eyn syn alleyn ist domit ir der frawen schwäger die auff

allen eggen lüte haben nicht in die lend kämt darumb deücht mich wo
es eüer gefallen wär. man macht [149^d] heute gar eyn schön spile auff
sant Marx placz do komen gar vil mit wilden tieren hin, etliche komen mit
wilden bern etlich mit wilden mannen ie eyn gesellschaft anders dann die
5 ander, darnach macht man eyn gegeyde, wann das volbracht ist yeder
man seinen weg geen mage wo sein belangen hin ist, darumb wölt
ir e ir hie bei mir erspehet wert so wille ich euch anlegen vnd in wildes
mannes form von hie auß fören, darnach wo euch hine liebet ich euch
fören mag kein andern weg ich nicht sich domit ir vnerkant von hier komen
10 müget, dann der frawen schwäger nicht anders meynen dann ir seit hie
ymb, vnd wie wol brüder Albrecht schwäre daucht in wilden tirs form
gefürt sein, doch grosser forcht halben es zügab vnnnd sich williget. Zü
dem güten man sprach, wo er hin wölte gefürt sein vnd wie er in föret
nun er dar von käme er des willig wär. Der güt man anhüb in mit
15 honig gar wol ze bestreichen vnnnd salben, darnach in mit federn an-
füllet, vnnnd in die eynen hande im eyn grosse trämel gab, in die andern
czwen groß rüden oder hund die er in der fleyschpanck aufgefangen het
vnd in selbs [150^a] an eyner grossen keten die er im an den halß ge-
leget het föret vnnnd im eyn schön parte für sein gesicht gethan hette,
20 vnnnd vorhine eynen auf sant Marx placz gesant hete, das er ausschrye
wer den engel Gabriel sehen wölt das er auf den Realto käm, das was
gar ein erber Venediger düklin, darnach zehand in auß föret vnd vor im
geen thet vnd im nach volget mit der ketten in der hand, nicht mit
kleynem romor vnd geschrey der zülauffer die alle schryen was das was
25 das also in auff den placz bracht, vnnnd die im nach gelauffen waren,
vnnnd den die das rüffen gehört heten so vil warden das sy on zal waren
Do der güt man mit seinem wilden man kam do der place am höhesten
was er sein wilden man mit der ketten gar wol an eyn saul band des
geleichen thet als ob er iagenn wölte, vnd die muggen vnd taffani ymb
30 des honigs willen domit er geschmirt was im grosse peine vnnnd marter
theten, vnnnd do der getrewe man den placz mit volck am föllestes sahe
des geleichen thet als ob er in ab der keten nämen wölt vnd im den
schönpart von dem gesicht reyß [150^b] anhüb mit hoher stimm vnd
sprach. Lieben herrn seitmal das wild schweine an vnser gegeyde nicht
35 komen ist darumb man nit hat iagen mügen, vnd darumb ir her zekomen
euer zeit nicht verloren habt. Ich euch an desselben stat den engel Ga-
briel will sehen lassen der von hymel abe auf erden des nachtes komt
die iungen schönen Venediger fräwlein zetrösten. Vnd als bald münch

Albrecht der schönpart ab dem gesicht kame er von yederman erkant was Eyn solch romor vnd geschrey von dem volcke wider in ward das wider einen bösen man ye gehört ward im sein anplick mit aller vnreynikeyt ward beworffen mit bösen vnzüchtigen worten übel außgericht. also
 5 etlich stund gehalten bis das geschreye in das kloster seinen münchen kam der sich sechß auf machten in ab der keten namen vnd eyn kutten anwurffen nicht mit kleynem geschrey der nachfolger in zû hauß fürten vnd in gefäncknuß verschlussen vnd in solicher gefäncknuß vnnd armen herten leben man für war gelaubet erstürb vnd sein leben endet. Also
 10 geschache dem der do gûtt gehalten was [150^c] vnnd alle übele würcket des sich nyemant zû im vertraut het, so beherczent was das er sich zû dem engel Gabriel machet, darnach sich in eyn wilden man verkert, darumb er beschent vnd beschamt ward mit seinem grossen schaden, sein verbracht sünd beweynt got wöll allen solchen also geschehe als im
 15 geschache.

Wie drei iunge gesellen lieb heten drei schwester mit den sy wege in die insel Creti fluchen. die elter schwester vrsach grosses eifern irem bûlen vergab vnd tödet, vnnd die ander schwester domit die erste nicht ir leben verlûre dem herczoge zû seinem willen ver-
 20 lichen ward darumb sy der ander ir bûle tödet vnd mit der eltesten wege flohe, beleyb der drit mit der dritten schwester gefangen beide marter halben veriahen sy des todes vrsach wâren, vnd die hûter der gefäncknuß mit gelt brachen vnd übergaben wegefluchen beide arm vnd ellendiklichen sturben, vnnd ir leben in Candia endeten.

25 Philostrato wol vernomen het wie frawen Pampinea neüe märe sich geendet hette, eyn kleyn auf im selbs [150^d] stünd als der sich was bedächte. darnach zû ir sprach. eyn wenig in der letste euer histori mir gefallen hat das in dem anefang alles ist zelachen gewesen des ich nicht gewölt hette. Sich zû Lauretta keret vnnd sprache. Frawe volget nach
 30 der angefangen materi vnnd saget vns eyn bessers, mag es gesein dann die vergangen gewesen ist. Lauretta lachent sprach. Herr ir seit den liebhabern all zehertte, ir seit nicht anders begern dann ires schadens vnd böse ende ir liebe, vnnd domit ich euch gehorsame thû ich euch eyne sagen will nicht von eynem alleyn sunder von dreyen der liebe
 35 aller dreyer von erst mit grossen freuden waz, darnach sich aller gleich czû schântlichem bösen ende füget. Also geret von neuem anhûb

vnd sprach. Ir edeln iungen frawen als ir wol secht vnd euch kunt ist wie eyn yegliche vntugent der sy braucht vnd ir nachfolget dem braucher alle czeite e mag schaden bringen dann frummen. sunder den die sich in ir selbs sachen nit zäumen noch müssigen können vnd sich zorn
5 in iren geschäften meystern lassen, der nicht anders ist dann eyn gächlin[151^a]ger vnerkannter böser wille auß trauriger begir von dem herzen außgetriben der alle gerechtikeyte entwicht, vnd die augen des gemüts erplent. vnnd vns also vnser gemüt in zorn vnd vneyngkeyt enzündet, eyn solchs sich geren bei den mannen begibt, doch mer bei
10 eynem dann bei dem andern. Auch eyn solchs bei den frawen mit grossem iren schaden ist gesehen worden, die sich leichtfertiglicher in zoren enzündeten vnd mit klarer flammen brinnen dann die mann thün, vnnd das vmb irer mynder maß vnnd czäumung willen des sol wir vns nit fremde namen, dann wenn wir recht des feurs natur bedencken
15 wöllen, das sich e in den ringen weychen dingen enczündet dann in den herten vnd schwärn thût, darumb der zoren gar besorglich ist, vnd damit wir vns mit mer stercke wider in seczen mügen vnd vns nicht geschehe als dreien iungen mannen mit als vile iungen schönen frawen geschahe als oben gesprochene ist, vmb ir eyns grossen überflüssigen
20 zorns willen sy vom gûten stand vnd sâligem leben alle übel vnnd vn-sâligklichen fûren als ich euch durch mein [151^b] histori vnnd neue mâr beweisen wille vnnd ir vernâmen wert. Als euch wol wissent ist wie Marsilia die stat gelegen ist in dem lante vnd gegent genant Pro-
25 uincza ob dem mere eyn alte edle stat vor zeiten vol mit grossem reich-tumb vnd kaufmanschacz mer dann yeczund in der eyn reich man wonet mit namen genant Naldo von schlechter gepurte aber von grossem glauben redlich in kaufmanschacz reich in gelt vnd gûtern, der von eyner seiner frawen vil manche kind het vnd vnder den drey schön iunckfrawen warn die erst vnd eltest über die zweynczig iar was, die andern zwo
30 von eynem leib geborn warn vnder den czweynczig iaren, vnd ob den vierzehen iaren warn, vnd vnder iren freûnden man stâtz sûchet in manner zegeben auf ires vaters zûkunfft der mit kaufeschacz in Hispania gefarn was die erst was genant Nyuetta die ander Madalena die dritte Bertelda, in die ersten genant Nyuetta eyn iunger edelman wie wol er
35 arm was genant Ristagnone in liebe enzündet desselben Nyueta zû im thet, vnd ir geschäft in solcher maß on yemant vermercken oder wissen anrichten [151^c] vnnd handelten das sy lang zeit ir liebe miteynander freûd heten, in dem sich begab das zwen iung reich gesellen der vâtter

tod waren der eyn genant Folcko der ander Vgetto beyde on maß reich.
 Der eyn zü iunckfrawen Madalena liebe gewan. der ander zu Bertelde
 des der iunge edelman warname vnnnd wol vermercket het nach dem im
 von Nyueta seinem bülen was gesagt worden im gedencken warde vrsach
 5 der zweyer iungen gesellen liebe, im die seinen liebe meren vnnnd mit
 mynder seiner müe zu seinem willen schicken solt, vnd mit in beyden
 grosse fretütschaft begunt zenämen in oft gesellschaft thet ir bülen cze-
 sehen vnnnd auch dobei die seinen. Do er nun nach seinem geduncken
 beyder iunger kuntschaft vnd freundschaft eyn güt teyle het. Er sy eynes
 10 tages zü hauß lüde vnnnd nach mancher red zü in sprach. Lieben freünd
 vnd günner ir müget nun wol mein güten willen vnd freundschaft zü euch
 vernomen haben vnnnd gern euch zeliieb tün wölt das ich für mich selbs
 thet, darumb was mir mein synn vnd gedanck in mein gemüte geben
 haben, ist mein meynung das [151^d] euch yeczund zewissen thun, Dar-
 15 nach mit vnser aller rate vnnnd euch das beste duncket dem also nach-
 zefolgen, dann ich mich ie geduncken laß es sey dann sach das ich von
 euch betrogenn seye nach dem ich durch euer weis vnd gepärd vernom-
 men vnd bei tag vnnnd nacht vermercket hab. so seit ir in liebe enczündet
 vnd brinnet in liebe beyder iunckfrawen Nyuetta meiner aller liebsten
 20 frawen schwester, die die dritte ist in der liebe ich verbunden bin, soli-
 cher brinnenden liebe wo es euer gefallen wär ich mich vermügen sprich
 wo ir mit mir eyns sein wölt, so bin ich on zweifel in meinung weg cze-
 finden domit eüerem willen solicher eüer liebe sole eyn genügen ge-
 schehen vnd die letsten rüre solicher liebe in kürcze empfinden sölt,
 25 darumb vernämt mich ir seit reiche vnd wolmügent an güt des bin ich
 nicht, wo ir mich den dritten teyle eüers reichtums wölt teyllhafftig
 machen. darnach vns bedencken wo wir hin cziehen wöllenn vnnnd weliche
 gegent wir besiczen wöllenn do wir eyn frölich leben füren mügen. So
 weiß ich vnd on czweifel vnd vermag das die drei swester [152^a] mit
 30 dem mereren teyle ires vatters reichtumb mit vns wo wir hin begeren
 komen stülen, do wir yegklicher mit der seinen in brüderlichem stand
 vnnnd wesen eyn frölich leben füren mügen bas zemüt sein werden dann
 mann auff erden nye warden, nun an euch steet czenämen oder czelassen
 euch eüer brinnende liebe zeerfreüen oder vnder wegen zelassen. Die
 35 zwen iungen gesellen on maß in liebe branten wol vernamen wie in
 beyde iunckfrawen zü irem willen werden möchten, mit kurzem be-
 dencken sprachen Wo vnß eyn solches ergeen vnnnd volgen solt wir bereyt
 wären zethün als du gesprochen hast. Do Ristangnone soliche antwurt

von den zweyen iungen gesellen vername im wol gedacht seinen synn
czû gûtem end zebringen wol czemût sich czû seiner frawen Nyuetta
füget, doch das nicht mit kleyner seiner müe thûn mocht, vnd nach
etlicher vergangen stund ir czû versten gab was er mit den czweyen
5 gesellen geret vnd außgericht het, vnd wes er mit in eyns worden was
ir alle sach vnnnd beyder meynung zewissen thet, vnd wie er mochte ir
aller meynung gefallen macht domit sy [152^b] auch iren willen darzû
gäbe, das im kleyne müe was nit darzû bitten dorfft sunder ir wille mer
vnnnd grösser was dann der sein, im kurze antwurt gab sy aller sach
10 bereyt vnd willig wâr vnd ir beyder schwester diser sach halben sy ge-
waltig wære nicht anders thäten dann ir gefallen wâr vnd czû Ristag-
none sprach, so er erst möcht daz zû end brächte vnd die ordnung
gäbe. Ze hand Ristagnone zû den iungen gesellen gieng sy der dreier
iungen frawen meynung vnderriecht vnd zewissen thet wie sy zû irem
15 willen geschicket vnd bereyt wâren nach dem ir anschlag wâr die werck
czû ende czebringen. Die drei iung gesellen vnder in eyns wurden mit
den iungen frawen auß dem lande vnnnd in die insel Creti zefaren, vnd
anhûben etliche ire gûter zû verkaufen in gleicher meinung als ob sy
mit solchem gelt wölten kaufmanschacz handeln, vnd so sy meist moch-
20 ten auß allen dingen gelte machten, vnnnd eyn kleynes schifflein kauften
in still wol zûgerüst nach aller notturfft vnd der bescheiden zeit vnd
gûten wetters warten. Auf dem andern teyl Nyuetta die irer swester
willen vnd begir wol west mit [152^c] genûg lieplichen worten diser sach
halben in iren willen meret vnd grösser machet in solicher maû das sy
25 alle tag ein iar daucht daz die sach zû ende kâm, solicher zeit nicht
meynten czeerleben in das schiff zekomen. Do nun die bescheyden zeit
komen was, die drei schwester ires vatter kasten vnd schrein auffbra-
chen vnd alle öffneten daraûf namen was in füglich was von gelt vnnnd
kleyneten mit dem bei nacht alle drei czû dem hauß außgiengenn nach
30 gegebener ordnung sich bei den dreien iungen gesellen funden, nicht
mit kleynen freuden oder lange saumung sich in das schiff fûgten, die
rûmen des schiffs in das wasser geschlagen von dann fûren nicht rasten
bis sy gen Genoua kamen. Do die iungen neuen liebhaber mit iren
lieben frawen die ersten blûmen irer liebe brachen von eynander die
35 letzten rûre der liebe namen, sich gar wol aller notturfft erfrischen
vnnnd von dann schieden auß einer porten in die andern, vnnnd e der
achtend tage vergangen was on alle widerwärtikeit sich in der insel
Creti funden, do sich nyder liessen czû hauß seczten schöne reiche ge-

legne güter kauften nicht ferr von [152^d] der stat Candia köstliche
 palast bauten, domit grossen hof von meyden vnnnd kneckten von iagen
 von fogelen falcken habich vnd sperbern iren lust vnd freüd heten alles
 das triben das edel leüten züstet, also in grossem lust vnd kurzweile
 5 mit iren frawen lebten bas czemüt dann mann auff erden nye theten.
 Nun in solichem vollen leben als wir sehen sich oft begibt vnd täglich
 füget das vil ding dem menschen lieben güt duncken vnd gefallen wo
 man der zü vil vnd übrig hat man ir geren vrdrucz wirt. Also auch
 geschach dem iungen Ristagnone der sein frawen Nyuetta on maß het
 10 lieb gehabt, nun ir eyn genügen vnd verdriessen het vnd sein liebe zü
 ir nachgelassen hete, die vrsach solicher sach Eyns tags sich begab er
 auf eynen kirchtag kam do er eyn schöne iunckfrawen sahe die im in
 solcher maß lieben vnd gefallen ward das er seiner alten liebe zü seiner
 frawen Nyueta aller vergaß, vnd mit grossem vleiß solcher seiner neuen
 15 liebe mit schencken geben stechen, vnd brechen der iunckfrawen zü
 lieb er groß wunder treyb Sölcher fremder liebe frawe Nyuetta ver-
 standen hete vnd war nam, in grosse eiferung [153^a] fiel in solicher
 maß das ir man eyn trit nicht gethün mocht das es ir nit zewissen käme,
 darumb er von ir grosse übele rede haben vnd leiden müßt. Aber als
 20 oben gesprochen ist des czü vil ist man balde vrdrucz würd vnd des man
 begern ist vnd nicht haben mage die begire das zehaben sich meret
 vnnnd wechßt das versaget zehaben. Also auch Nyuetta zoren vnd Ri-
 stagnone brinnende neüe lieb stätz wüchsen vnd sich merten, doch wie
 dem was ob Ristagnone mit der frawen die er lieb hete seinen willen
 25 verbracht oder nicht oder ob sy zü seinem willen geschicket was oder
 nicht wer das frawen Nyueta gesaget oder zü versten geben hete ye
 das fürwar gelaubet vmb des willen zü solichem zorn kam, das sich all ir
 liebe vnd freundschaft gen Ristagnone in hertten pittern neid vnd haß be-
 keret ganz erblindet in irem czoren. Zehand ir übel gedacht vnd fürnam
 30 solchen widerdriß mit Ristagnone tod zerechen, vnd mit eyns alten weibs
 rat die ein Kriechin was ein grosse meysterin gift zemachen vnd die zege-
 ben, dieselben frawen Nyuetta mit gelt übergab die ir eyn tötliches vergifts
 wasser [153^b] gab, vnd sy als eyn verzweifelte on yemant rat vnd wissen
 eynes nachtes do Ristagnone sich erwermet vnd geschwiczet hete, vnd
 35 im der do durstig was des on alle sorg zetrincken gab, die stercke des
 wassers so groß was e der morgen kam in getödet het, des tod Folcko
 vnnnd Vgetto mit iren frawen vernamen, die vrsach solches tods nit be-
 dencken noch wissen mochten wol daucht er vergift wäre, doch wie er

die empfangen het nit bedencken kunden, vnd mit samt Nyueta kläglichen weyneten, vnd nach langem klagen vnnnd weynen in erberlichen zů der begrebnuß bestäten. nit lang vergieng das alte weib das Nyuetta das vergift wasser geben het vmb ander übelthůn gefangen warde vnnnd
5 nach mancherlei marter vnd vergehen bekant wie sy frawen Nyueta das vergift wasser geben hete douon ir man tod wär, vnd warumb sy das getan het alles bekant. Der herczog vnnnd herre von der stat eynes nachtes in stille Folcko hauß vmbgabe vnd on alles romor geschrey vnnnd wider reden die frawen Nyuetta gefangen wege füret, die on alle pein
10 vnd marter ires mannes tode bekennet Folcko vnd [153^c] Vgetto mit iren frawen von dem herczogen vernamen, warumb er Nyuetta gefangen het grosses leyd irenthalben heten allen iren vleiß theten domit Nyuetta dem verschultten tode entgeen möcht, wol gedachten der herczog sy zů dem tod verurteylet het, doch der herzog in ganczer meynung was ir
15 das leben zenämen. Fraw Madalena die Nyuetta schwester vnd on masse eyn schön fraw was lang zeit von dem herczogen was gebůlete gewesen, aber seinen willen nie thůn wolt ir gedacht würde sy dem herczogen zewillen er vileicht der schwester den tode vergüb, vnd durch eynen getreuen dem herczogen das zewissen thet sy zů seinem willen
20 vnd dienst geschicket vnd bereit wär, das sy vmb zweyer sach willen thet. Die erste das sy die schwester bei leben behielte, das andere das eyn sölliche sünd von der schwester verborgen vnd verschwigen belib vnnnd sich on schande erging. Do der herczog die potschaft vernam douon groß gefallen het, doch auf im selbes stůnd ob im eyn solchs zettůn wäre oder nicht, der frawen meynung wol vernam, doch bald seinen willen darzů gab zů dem poten sprach. Er bereyt [153^d] wär zethůn ir gefallen, vnnnd mit der frawen willen czegeleicher wise tet als ob er sich der verlauffen sach bas erfahren wölt, nach Folcko vnd Vgetto schicket vnd sy dieselben nacht verhielt in dem palast in zů versteen geben thet
30 wie er desselben nachts die frawen wölte tůten vnnnd ertrencken, vnnnd sy verborgen nam heym czů irer schwester Madalena mit im füret, vnd er sy vmb derselben nacht willen die er bei ir schief zů lone gab vnnnd do er von ir schied an sy begeret vnd bat die ersten nacht die er mit ir verpracht het das ir liebet die nichte die letsten sein ließ, mer zů ir sprach das sy die schuldigen ire schwester ab dem weg schicket. domit im nicht dovon schande von der gemeyne czůstůnde, vnd von neuem wider seinen willen richten müßt. Do nun der morgen komen was Folcko vnd Vgetto nicht anders meynten dann Nyuetta tode wäre, der

herczoge in vrlaub gab vnd czü hauß gingen ire frawen der schwester tode ze trösten vnd auch helffen klagen, vnd wie wol Madalena grossen vleiß het die swester zü verbergen, doch Folcke nach etlicher vergangen zeit des ware nam das sy bei leben vnnd [154^a] in dem hause was in
 5 gar ein fremde sach daucht vnnd im e arges dann gütēs gedencken warde. Auch wol vernomen het wie der herczog seiner frawen Madalena huld trüg vnnd verborgen lieb hete, sy fragen ward wie das gesein möcht das ir schwester bei leben wär die er vnd auch yeder man tod meynet. Die frawe im mancherley vrsach zü versten gab vnnd außzüg
 10 süchet die do wenig von im als der do lüstig was gelaubet warn vnd die frawen mit gewalte nötet vnd zwang vnd darzü bracht das sy im die warheyt vergehen vnd bekennen müßt vnd sich ir vnd des herczogen halben verlauffen het vnd do er vernam daz sy mit irem leib dem herczogen was zewillen worden von grossem zorn überwunden eyn schwert
 15 außzoch vnd ir genad zü im zebegeren vmb sunste was vnnd ir an der stat das leben nam vnd tödet. do er das verbracht hette des herczogen gerechtigkeit vnd zoren besorget, die toten frawen in der kamern ligen ließ vnnd gienge do er frawe Nyuetta verborgen fand mit frölichem angesicht zü ir sprach Wolauff bald ziehe wir dar von do deine schwester auch weg ist domit wir dez herczo[154^b]gen nicht mer zü handen
 20 komen, daz Nyuetta gelaubet als eyne erschrockne mit grosser eile vnd begire begert zeffliehen vnd zü ir schwester zekomen also mit dem wenigen das in werden mocht on yemant vrlaub mit Folcko bei der nacht sich czü dem mere fügten, do auf eyn klein schifflein sassen weg füren
 25 nymant wissent ist wo sy ye hin bekommen. an dem nächsten morgen darnach fraw Madalena in der kameran tod funden warde, vnnd etlich die Vgetto neyd trügen solchen tod dem herczogen ze wissen theten, vnd er als der die frawen lieb hete mit grossem zorn in Vgetto hauß kame in vnd seine haußfrawen in gefäncknuß füret, die von solchen
 30 sachen nicht weßten noch wo Folcko vnd Nyuette wären, doch so vil marter heten das sy bezwungen warn czesprechen vnd bekennen das sy mit Folcko Madalena tode vrsache wären, vmb soliches willen sy dem tode verfallen waren, vnd die hüter der gefäncknuß mit gelt übergaben vnnd brachten die sy auß der gefäncknuß namen zü hause fürten das
 35 namen daz in werden mocht, vnnd mit sampt den hüttern des nachtes auff ein schifflein sassen vnnd gen [154^c] Rodi fluhen vnnd füren, do sy in grosser trübsal vnd armüt nicht lange zeit lebten. Also die torhaftig lieb Ristagnone vnd der überflüssig groß zorn frawen Nyuetta

sich selbs vnd ir schwester dar zů bracht als ir oben vernomen vnd gehört habt.

Gerbino eines küniges von Cicilia diechter wider seines anherren geleyte vnd gepote eyn schiff des künigs von Tunici bestreyt dem eyn tochter die er bület vnd darauf was zenämen die selbigen iunckfrawen die von irem eygen schiffe theten vnnnd in das mere wurffen, vmb des willen Gerbino die auf dem schiff warn alle tödet vnd verbrant, vnd sein anherr künig Wilhalm gerechtikeyt zethün in Cicilia im darumb das haubt abschlüge vnd tödet.

- 10 Frawe Lauretta ir neüe mär czü ende bracht hat vnd geschwigen ist. etlich in der edelen gesellschaft soliches grossen vngelücks leyd trügen. etlich frawen Nyueta zoren in übel heten vnd schulten. Nun dem künig sein hercze mit schwären gedancken durchgangen was sein angesicht erhöhet vnd frawen Elisa das czeychen gab was neües [154^d] ze-
- 15 sagen, die diemütiglichen anhüb vnd sprach. Mein aller liebsten frawen es sein vil die do gelauben vnd sprechen, daz alleyn die brinnende stral der liebe sich von dem gesicht der augen begeben, vnd nit meynen noch sprechen wöllen das etlich durch hören sagen grosse liebe empfangen haben, die dasigen die solches gelauben alle irren vnd irer meynung
- 20 betrogen sein als dann offentlich in eynem meinen neüen mär erscheinen wirt als mein syn vnd meynung ist euch zesagen, vnd die do nicht alleyn von hören sagen vnd vngesehen gesehene werck gewürcket haben, sunder eynes dem andern zů lieb zů erbarmklichen vnd kläglichem tod komen ist als ir wils got vernämen wert. Wilhalm der ander künig in
- 25 Cicilia nach dem die Cicilianer sprechen wöllen wie er zwey kinde von seiner künigin hete eyn sun genant Rugiere vnd eyn tochter mit namen Constanza, do der selbig Rugiere mit tod abgieng er eyn sun ließ genant Gerbino der von seinem anherrn künig Wilhalm mit grossem vleiß erzogen warde. Auß dem eyn schön gerad züchtig vnnnd tugentreicher
- 30 iüngling warde, vnd nicht alleyn sein tugent [155^a] vnd redlicheyt in Cicilia erkant waren, sunder ferr in fremde land in die heydenschaft über mere vnd in alle barbarey erklungen vnd geflogen waren die zů diser zeit dem kung von Cicilia tribut gab, vnd besunder dem solches grosses lob vnd breiß Gerbino zucht vnd tugent zewissen vnd gehör
- 35 kam das was eyn iunckfraw des künigs von Tunici tochter, die selbig nach dem alle die sy gesehen heten sprachen auf erden schönere iunck-

fraw nit wäre wol geziert mit zucht von hohem loblichem edeln gemüte
 alweg geren von hochwirdigen geschäften saget vnnd sagen hört als von
 redlichen wirdigen mannen die grosse redliche ding in tugent ires leibs
 gewürcket vnd verpracht hetten. eyn solchs alles von mer person von
 5 Gerbin vernam vnd sagen höret vnd douon besunder gefallen hete, mit ir
 selbs bedencken ward wie er doch möcht geschaffen sein als die in sich-
 perlich gern gesehen het vnnd auß grund ires herczen gen im in liebe
 enzündet vnd mer dann yemant von im stätz reden vnd sagen ward
 vnnd sein lob ob allen mannen breisen, vnd wo yemant anders dann sy
 10 von im redet dem sy mit vleiß czühöret, vnnd auf [155^b] dem andern
 teyle geleich als von Gerbino daz lob über mere geflogen was also auch
 anderschwo hin Der iunckfrawen grosse überflüssige schöne zuchte tu-
 gent lobe vnd gepärd in Cicilia komen was vnd daz nicht mit kleynen
 freüden dem fürsten Gerbino im zû gehör kame. Nicht mynder als die
 15 iunckfrawe in liebe czû im enzündet, also auch er in sy thet gancze in
 liebe gen ir brinnen warde, vnd stätz von seinem anherren dem künig
 warten was ob sich indert erlich vrsach begab domit er mit willen vnd
 vrlaub gen Tunici die iunckfrawen zesehen faren möchte allen seinen
 gûten freüden vnd gûnnern die gen Tunici fûren in geheym in sein
 20 groß liebe befalhe die er zû der iunckfrawen het, vnd wo sy durch
 züchtig wege möchten ir sein grosse liebe zû ir zewissen thäten vnd im
 des von ir eyn antwurte brächten. Nun waren etlich die im zû lieb
 vnd willen werden wolten ir list vnd gescheidikeite brauchten, die vil
 mancherley schöne köstliche frawen kleynet kauften vnd als kaufleut
 25 tûn die feyl trügen vnnd durch solich ire kaufeschacz für die iunckfrawen
 kamen, vnnd ir also in geheym des iungen edeln fürsten [155^c] Gerbino
 liebe vnd freündschaft zewissen theten, vnd in ir aller seiner dienst vnd
 vermügen zû irem willen vnnd gefallen erputen. Die iunckfraw solch
 poten vnd potschaft mit grossen freüden ires herczen vnnd allen gemüte
 30 empfang zû den sprach wir beyde in geleichem liebe brinnen vnnd en-
 zündet sein, vnd des zû eynem czeichen im eyn köstlich der iren kleynet
 eyns sant, daz er mit als grossen freüden empfang als man dann eyn
 yegklich lieb dinge empfahe mage. Also durch dieselben potschaft ir
 ze mer malen schreyb vnd sy mit seiner lieb vnd reichen kleynet auch
 35 begabt mit einander solch ordnung gaben wo in das gelück wölt gehilff-
 lich vnd nit wider sein, sy in kürze eynander sehen anrûren vnd sich
 ir brinnende liebe trösten wöltten. Eyn solchs sich lenger verzohe
 dann beyder will vnd meynung was vnnd in solichem vercziehen sich

füget das der künig der iunckfrawen vatter sy dem künig von Granata
 verheiret vnd zů eyne[m] weib gab wer vnmütiger vnd übler zemüt dann
 sy, ir wol gedacht sy sich nicht alleyn[e] von irem lieben herrn vnd
 bñlen lenget sunder ir empfreundet würd nymer mer zesehen, vnnd het
 5 [155^d] sy synn oder weg finden mügen domit eyn soliches nicht geschehen
 wär sy heimlich von irem vatter vnd in Cicilia czů Gerbino geflohen wär.
 auch der iung fürst solch heiret vernomen hete on maß traurig mit im
 selbs bedencken ward wie er soliche sach gehindern vnd sy mit gewalt
 nāmen möchte wo sy über mere zů dem mann in Granata farn würd. Nun
 10 der künig von Tunici etlich sach der tochter vnd Gerbino halben vernomen
 hette sein groß hercz vnd redlicheit erkant, darumb er der tochter vor
 im besorgt, vnd do die zeit kam die tochter zů dem mann zeschieden. Er
 czů künig Wilhalm von Cicilia vmb eyn frei geleyt schickt im zewissen
 tet wie er sein tochter dem künig von Granata zů eyner hāußfrawen über
 15 mere schicket, darumb er von im sicherung der tochter von Gerbino be-
 geret, domit im keynerley schaden zůstünd seinthalben vnd aller Cicilianer.
 Der künig Wilhalm der ein alt betaget man was vnnd im Gerbino seines
 tiechters vnmässig lieb zů des künigs tochter vnwissent waz, keynerley
 douon vernomen het, vnd im nicht gedacht daz der heydenisch künig
 20 von Tunici solcher sach halben von im [156^a] eyn geleyt begeret, vnnd
 im ein frei sicher geleyt gab vnd versprach vnd zů eyne[m] zeychen mer
 sicherung im eyne[n] hendschűch schicket Do der künig das geleyt em-
 pfangen het ein reich köstlich schiff zů bereyt, vnd daz in der porten
 Kartago aller noturft wol formirt vnd zůrűstet dem künig von Granata
 25 die tochter zeschieden aller sach fertig alleyn der zeite wartet. die edel
 iunckfraw ir wegfart wol vernomen het daz heymlich bei eyne[m] iren
 getreűen in Cicilia zů Gerbino schicket im alle sache irer wegefart ze-
 wissen tet, von erst im iren fretűntlichen grűß enpot, darnach wie sy in
 kurzen tagen wegfertig wär czů irem mann zefaren, darumb yeczund
 30 zeit wär zebeweisen sein grosse tugent macht vnnd redlicheyt zebewären
 die liebe die er ir bis her alle zeit hab zů versten geben, vnd der dem
 von der iunckfrawen soliche potschaft was befolhen worden erlich auß-
 gericht wider gen Tunici keret. Do das der iunge fürst vernam der
 iunckfrawen liebe zů im wol erkant das sy e sein dann eyne[n] heydeni-
 35 schen künigs sein wolt im sein hercze beschwāret vnd in noch grösser
 liebe enzündet. Auch im wol kunt was daz künig Wil[156^b]halm sein
 anherr dem künig von Tunici het eyn frei geleyte geben, doch domit er
 von der edeln iunckfrawen nicht als eyn verzagter verdacfft würde vnd

auch von grosser liebe beczwungen sich gen Missina füget do er bald
 czwü galle zürüstet vnd wapent mit redlichen mannen, vnnd über die
 insel Sardingna für do der iunckfrawen schiff zükern vnd für faren
 müßt, nicht vil tag vergangen warn das reich schif mit eynem senften
 5 wind erscheyn, do Gerbino das schiff ersehen hete etwas zweifeln ward
 wes er sich halten solt Doch von grossem gemüt liebes herczen vnd der
 iunckfrawen wort genöt vnd gezwungen dem nachzekomen in des meyn-
 ung er außgefarn was sich zü seiner gesellschaft kert vnd sprach. Lie-
 ben herrn freünde vnnd gñner seit ir so beherczent als ich meyne
 10 vnnd hoff so sol eüer keyner sein er wiß vnd im kunt sey was liebe
 sei vnd nach meinem geduncken mein meinung ist wie kein tötlicher
 mensche keyn tugent brauchen noch gehaben müg er hab dann lieb vnd
 in liebe enczündet sey, darumb mein liebe bei der eüern ir vernämen
 mügt. Ich hab lieb vnd liebe mich darzü bracht hat euch [156^c] dise
 15 gegenwirtige liebe zü versten geben. Nun solt ir wissen das das ich
 do liebhab ist auf disem schiff das ir gegen vns sehen komet, darinn
 über das das ich do liebhab ist grosser schacz vnd reichtumb, das wir
 als ich hoff wo ir frei männer sein wölt mit kleyner vnser müe zü vn-
 serm willen schicken mügen, douon ich nicht anders beger dann alleyn
 20 eyn iunckfrawen die darauff ist, vmb der willen ich czü dem waffen
 vnnd schwertt greiff alle andre ding sollen eüer sein Nun wol an lieben
 herrn got mit vns greiff wir an daz heydenisch schiff dann es on wind
 beliben ist. Dem iungen fürsten solicher wort nicht not warn dann die
 Missiner die in seiner gesellschaft warn des reichthum begerten vnnd das
 25 schiff zeberauben vmb des willen dem fürsten on bete bereyt waren ze-
 tün seinen willen des er sy vor getröst hete, vnd an dem end seiner
 wort mit eynem frölichen geschrey die trometen mit grossem schal alle
 erklungen mit dem sy zü dem waffen griffen, die büchsen abe giengen
 die rümen in das wasser geschlagen daz heydenisch schiff über eilten
 30 doch sich das schiff zü seiner were stellte aber den zweyen galle ze-
 krancck waz [156^d] Do nun die galle zü dem schiff komen waren der
 fürste den patron des schiffes schüff für sich zekomen wölten sy nicht
 bestritten sein. Der patron vnd die herren von dem schif dem fürsten
 zewissen teten wie sy ein frei sicher geleyt von küng Wilhalm heten
 35 des zü eynem zeychen des künigs hendschü zeygten vnnd sich in keynen
 weg ergeben wolten dann alleyn durch gewalt vnd streitt Gerbino der
 auff der poppen des schifs die iunckfrawen gesehen het in zü tausent
 malen schöner daucht dann er vor gelaubet het, die fackeln der liebe

im sein hercze durchwunten vnd mer dann ye in liebe enzündet. Zû dem
 zeychen des hendschuhes er den beyden antwurtet vnd sprach. Hie sein
 weder falcken noch sperber, darzû vns der hendschûhe füglich sey, ich
 alleyn der iunckfrawen beger wo mir die nit wirt so seit des sturms vnd
 5 streitt von mir warten, mit dem anhuben zeschiessen vnd werffen eyner czû
 dem andern eyn kläglich streitt sich anfienge mit beyder teyle grossen scha-
 den stritten vnd nach langem solichem streitt der fürst wol sahe das er
 das schiff on grosses blût vergüssen nicht gehaben mocht vnd eyn kleyn
 [157^a] schifflein oder barecken komen schüffe vol mit stipa reisache dar-
 10 ein er fetre stieß vnd das mit gewalt vnder das groß schif schuben. Do
 die heyden auf dem schiff vernamen sich ergeben oder sterben müßten sy
 die iunckfrawen die vnden in dem schiffe was machten daroben komen
 betrübter dann fraw ye ward vnd dem iungen fürsten Gerbino zû in
 rüften vnd gegenwirtig seines gesichtes der edeln iunckfrawen ir kele
 15 abschnitten töten, vnd also tod ab dem schiff in das mere wurffen vnd zû
 dem fürsten sprachen. Nun nyme hyn wir dir sy geben als wir mügen
 vnnd dein glauben wirdig ist. Do der iung fürst das erbärmklich
 mort seiner allerliebsten frawen vnd der mörder sahe seines eygen todes
 begeren was weder waffen geschoß noch werffen ansahe den schiffeuten
 20 czû leyde sich mit beyden galle zû dem schiff nächnet allen czû leyde
 die darauf warn mit gewalt darauf steyg vnd czegeleicher maß als der
 hungerig vnnd wild leo vnder dem fihe thût nicht alleyn mit dem schwert
 in seiner hand seinem willen eyn genügen tet, sunder mit seinen zänen
 vnd negeln der finger sein zoren büsset alles [157^b] das im zû henden
 25 kam iunck oder alt hertes todes sterben müßt, in dem das feür in dem
 angezündten schiff wüchß, die merleut von den galle außtrügen auß dem
 schiff für iren lon als in der iung fürst versprochen hette so sy best
 mochten. Also der fürste mit kleinem sig vnd freüden seiner feinde ab
 dem schiff gieng vnd den leib der schönen toten iunckfrawen schüff für
 30 sich bringen mit langem kläglichem weynen sein allerliebsten frawen
 klaget, wider in Cicilia für vnd in der kleynen insel genannt Vsticha der
 iunckfrawen leib czû erlicher wirdiger begrebnuß beståtet, betrübter vnnd
 trauriger dann man ye ward heym gen Missina füre. Nun nach etlicher
 vergangen zeite solche mår dem künig von Tunici der iunckfrawen vatter
 35 ze wissen kam, sein potschafte alle in schwarcz gekleydet zû künig Wil-
 halm in Cicilia schicket im zewissen tet was im vnder seinem geleyt
 seiner tochter halben zû gestanden wår im das klaget vnd im sein ver-
 sprochen treu nicht gehalten hete, darumb er des rechten vnnd was

recht wär begeret Do künig Wilhalm solche potschaft vernam on maß
 betrübet nit weg sahe in der gerechtikeit [157^c] ze verlaugen dann
 nicht anders begerten, vnnnd zehand den iungen fürsten Gerbino seinen
 tiechter fahen thet, vnd er selbes dann keyner seiner landherren ge-
 5 genwirtig waz die für Gerbino gebeten vnd genad begert heten in zû
 dem schwert vnd tod verurteylte vnd gegenwirtig sein vnnnd des heyde-
 nischen künigs potschaft im das haubt abschüf schlachen e an seinen
 tiechter wolt thûn dann on gerechtikeyte vnnnd treuen glauben gehalten
 sein. Also erbärmklichen in wienige tagen die zwey lieb on alle em-
 10 pfundne frucht ir grossen liebe kläglichen todes vergiengen vnnnd beyde
 als ir vernomen habte schaden empfiengen.

Wie frawen Lisabetta brüder ir iren liebhaber vnnnd bûlen töten
 vnd er ir eyns nachtes in dem schlaf fürkam vnd ir ze versten gab
 wie vnnnd wo sy in getötet vnd begraben heten, die sich des tages
 15 darnache dohin füget do er tod lage in auß der erde nam vnd im
 das haubt ab dem leib schneid vnnnd das in eynen schönen scherben
 leget darein sy basicho vnd masaron säet all tag eyn stund darob
 weynet vnd ir leyd klaget vnnnd mit iren [157^d] herten zähern ne-
 czet vnnnd begoß, des iren brüder warnamen vnd ir den scherben
 20 stalen des sy von leyd auch starb

Frawen Elisa nette mâr zû gûtem end komen was vnnnd von dem
 künig sere gelobet gewesen ist, in dem fraw Philomena des künigs gepot
 empfangen het alle vol mit kläglicher erbarmung des ellenden edeln iungen
 fürsten Gerbino vnd seiner allerliebsten iunckfrawen, die nach etlichem
 25 seufzen anhub vnnnd sprach. Mein histori vnd neû mâr mein allerlieb-
 sten frawen vnd herren wirt nicht als von hohen edeln wirdigen person
 sein als die vergangen vnd gesagten histori gewesen ist, doch villeichte
 nicht minder diemütig vnd erbärmkliche sein wirt, nach dem mir von
 Missina in gedanck komen ist do sich eyn solchs begabe als ir ver-
 30 nâmen wert. Es waren in der stat Missina drei brüder iung gesellen
 kaufmänner ze gûter maß reich die heten ein eynige schwester mit na-
 men genant Lisabetta iung schöne vnd züchtig von loblichen syten vnd
 gûter gewonheyte vol. Dieselben ir schwester, was die vrsach sein
 mocht noch nit [158^a] verheyret hetten, dieselben drei brüder in iren
 35 laden oder krame eynen iungen hielten ein Pisaner genant Lorenzo
 der in alle ire geschäfte ired handels außricht vnd verrechnet gar eyn

hübsch züchtig iunger gerad von leib vnd person Derselbig iüngling der iunckfrawen Lisabetta von ganczem irem herczen lieben vnnnd gefallen warde stätz ire augen gen im leuchten. solcher irer liebe Lorenzo war name alle seine ausserhalbe liebe ließ vnd sein gemüt gancz zû ir keret
5 also mit gleicher liebe eyns czû dem andern nit lang vergienge sich zesamen fügeten vnd verbrachten das beyder begire vnnnd willen gewesen was, solche liebe vnnnd kurz weile gûte zeit miteinander triben vnnnd in ir liebe freude gaben, doch das also vnuerborgenlichen handelten daz ir lieb zû liecht kame vnnnd iren brüdern wissent ward, dann
10 eynes nachtes Lisabetta czû irem lieben Lorenczen schlafen gieng vnd ires eltsten brüder nicht wargenomen hette, der alle sach der zweyer lieb warnam vnd sahe, doch als eyn weis mane thet wie wol im solche sach schand vnnnd schmacheit vnleidenlich was, doch erlich rates pflag vnd zû diser stund [158^b] schweyge vnnnd nicht sprach wol im man-
15 cherley gedacht vnd mit im selbs bedencken warde. Do nun der morgen komen was vnd als er in der vergangen nacht von der schwester vnd Lorenczen gesehen hette alles seinen prüdern czewissen thet, vnd nach langem beraten mit in selbs eyns warden, domit weder in noch der schwester schand zûstünd vnd also schweigend gedult heten keynes
20 gleichen theten als ob sy icht gemercket heten also lang das in zeit kame füglich domit sy solche sach möchten rechen vnd on ir schande von iren augen nämen. Also gût zeit gestanden keynerley sich mercken liessen vnd mit Lorenczen mer daun ie frölich waren. Nun eynes tages ir füglich zeit nach irem geduncken komen waz vnd in gleichnuß als ob sy
25 alle drey wölten für die stat spacziren geen vnd den iungen irer schwester bülen mit in fürten vnd an eyn gar eynig verborgen end ferr von allen wegen vnnnd menschen komen waren sy zeit dauchte iren bösen willen ze verbringen vnd an solchem ende den ellenden iungen der sich keyns argen zû in versahe do würgten mörten vnd tötten begrüben
30 vnd sich bald wider [158^c] gen Missina in die stat fügten vnnnd wer nach dem iungen fraget dem sy zû antwurt gaben, sy heten in in iren geschäften außgesant vnnnd käme in gût zeit nicht wider das in allezeit gelaubet was dann ir gewonheyt was in vil hin vnd herzeschicken, also etlich zeit vergieng Lorencz nicht wider kame. Lisabetta gar dicke ire
35 brüder nach Lorenczen fraget als des lang auß sein ir hercz beschwäret vnnnd in trübsale seczet. Eyns tages sy ire brüder gar ernstlich nach im fraget der ir eyner von den brüdern antwurt vnd zû ir sprach was bedeut dein stät fragen nach Lorenczen was hast du mit im zeschaffen

das du sein so dick begerst zewissen, wärlich fragstu mer nach im wir
 werden dir antwurte geben die du verdienet hast vnd wirdig bist. So-
 liche herte worte die iungen frawen sere betrüben warden groß schrecken
 enpfienge das sy keinerley ires lieben Lorenczen vernämen mochte ir
 5 wol gedachte die sach nicht recht züging, doch mit gedult ir leyd ver-
 trüg vnnnd still schweyg, vnd czü manchen malen des nachtes in irem pet
 im mit diemütiger senfter stimme vnnnd betrübtem herzen rüffet vnnnd
 bat das er balde [158^d] wider käme, mit schwärem seüfzen vnnnd herten
 zäher ir augen sein langes von ir sein beweynet vnd klaget on alle freud
 10 sein stätz wartet, in sollichem irem traurigen leben eynes nachts nach
 vil langem weynen vnnnd klagen iren Lorenczen der nicht widerkam in
 solchen ellenden gedanken sy entschlieffe vnd in demselben schlafe Lo-
 rencezo ir allerliebster ir für vnd nach irem geduncken czü ir kame aller
 bleych vnd vngestalt vnd zü ir sprach. O Lisabetta mein allerliebste frawe
 15 du thüst mir stätz rüffen das ich so lang von dir bin dich selbs betrübst vnd
 mit deinem hertten weynen mich gen deinen brüdern verklagest vnnnd
 schuldig gibst, laß abe von deinem weynen. vnnnd wiß das ich nicht mer
 zü dir kom vnd mit tod von deinen brüdern auß diser welt gescheyden
 bin, dann an dem letsten tag do du mich sahest mir deine brüder das
 20 leben namen vnd mich mörtilchs todes töten, do bei er ir das end vnnnd
 die stat do er den tode von iren brüdern empfangen het weiset vnd leret
 vnnnd zü ir sprach das sy im nicht mer rüffet dann ir rüffen im sein pein
 meret, in dem von ir schied vnd verschwand, in sollichem [159^a] schlaf
 vnnnd traume Lisabetta erwacht gänzlich gelaubet das sy in dem schlaf
 25 gesehen vnd von irem Lorenczen vernomen het, von neuem kläglichen
 anhüb zeweynen vnd des tags schein warten was do der komen was auf-
 stünd doch so beherczent nicht was den brüdern ichte zesagen, ir für-
 name an das beczechent end zegeen zesehen ob im also wär als sy in
 dem schlaf ires Lorenczen halben vernomen hete, das vrlaub von den
 30 brüdern nam spacziren ein klein für die stat-czegeen mit eyner güten
 frawen die vil irer geheyne weßt so sy beldest mochte sich an das end
 füget do der ellende iunge ir Lorencze begraben vnnnd tod lag, do sy die
 pleter der bäume ab dem ertrich nam vnnnd das frische neu ertrich fand,
 do bei ir des iungen grebnuß kunt wart nicht lang grüb sy den toten
 35 leichnam ires allerliebsten fandte in keynerley nicht verkert do bei sy
 wol ires traumes gesicht klärlich vernam sahe vnd erkant, trauriger
 dann fraw ye warde, doch do nicht lang czeklagen was wär es müglich
 gewesen sy gern den ganczen leib mit ir getragen het, im füglich be-

grebnuß zegeben aber nicht müglich was dar[159^b]umb im alleyn mit
eynem messer das haubt ab dem leibe name in eyn schneweiß tuch
wickelt vnd irer meyd zetragen gab vnd den leib so sy best mochten
wider mit der erden bedeckten vnd in die stat heim czû hauß keret, do
5 sy sich mit dem toten haubt in ir kamer verschloß vnd von neuem an-
hûbe kläglich zeweynen mit iren herten zähern das haubt ze waschen
das ze tausent malen kisset, darnach eynen grossen schönen scherben
von magiolita name darein man nägelein masaron oder basilicho seczet,
darein sy daz tod haubt in eynem seiden tuch verwicklet leget vnd mit
10 ertrich vmbgeben vnd verdecket, darauff sy säet vnd seczet etliche
schöne zweige von basilicho salaritano, vund den von keynem anderm
wasser begoße noch neczet dann mit rosen wasser vund den czähern
irer augen für eyn gewonliche gewonheyt het stätz bei dem scherben
czesiczen in mit grosser begire bûlet vnd stätz ansahe als der der iren
15 allerliebsten bülenn verborgen hielte, vund nach langem ansehen dar-
über ging in kläglichen anhûb zebeweynen das also lang thet bis sy in
allen gar wol geneczet het, der basilicho von iren stätenn [159^c] zähern
vnd der geyle des ertrichs vnd toten haubtes on maß schön vnd wol-
schmeckend ward. Die iung fraw solches weynen vnd klagen ob dem
20 basilicho so oft treyb daz sy zû mer malen von etlichen iren nachbäurin
gesehen waz die das mit grossem wunder ire verdorben schöne iren brü-
dern sageten was sy tägliche von Lisabetta gesehen heten do daz ire
brüder vernamen sy strafen vund darumb zû red seczten, aber alles
vmb sunst vnd vngeloffen was, die sich mit einander berieten vnd ir
25 den scherben heymlich namen vnd stalen, den sy czû mermalen mit
grossem zoren vnd ernst an ir brüder fodert vund des begeret, aber ir
darumb nicht wider ward, des sy ires weinen nicht nachließ sunder sich
meret, vmb des willen in schwäre kranckheyt fiele nit anders begeren
was dann allein ires scherben, des die iungen ire brüder gar fremd nam
30 daz sy in solicher grossen kranckheyt ir zehilff nicht anders begeret
dann des scherben mit eynander eyns wurden zebesehen was doch an-
ders dann basilicho in dem scherben sein möcht vund den ausschütten
darinn sy das tote haubt vnuerwesen in dem seiden tuch [159^d] funden
vnd bei dem schönen hare wol erkanten das es Lorenczen haubt was
35 sere erschracken vund sich groß wunder namen sy besorgten ir mort zû
liecht komen wär, doch daz bald begrüben vund so sy beldest vnd ver-
borgenst mochten auß Messina gen Napelswercz fliehen. Die iung fraw
ir schwester ires iämerlichen klagen nicht nachließ nichte anders dann

des scherben begeret, vnd also weynend iren geyst aufgab vnd ir leben auf erden grosser überflüssiger liebe halben eyn erbärmklich end nam. Doch nach etlicher vergangner zeit eyn solchs mer person czewissen kam, douon einer das lied tichtet daz man heut bei tage singet. Chi gua-
 5 sta laltrui cose fa villania.

Wie fraw Andreola einen genant Gabrioto lieb het dem sy eynen iren traume der ir des nachtes in dem schlaf erschinen was saget, vnd er ir auch einen saget, in dem also in iren armen starb, vnd sy mit eyner irer meyd in zů seinem hauß trügen in dem von
 10 den statt knechten gefangen vnnnd für den richter gefüret worden, dem sy alles saget waz sich irent halben verlauffen het, vnnnd der richter sy zů seinem willen [160^a] nöten wolte des sy im nicht gestat, das irem vatter zewissen kam sy des todes vnschuldig funden vnd frei gelassen ward.

Frawen Philomena nette mār den züchtigen frawen ser geliebet vnd gefallen het die das liede gar oft heten singen hören, aber der vrsache warumb das nit vernamen. Do der künig des end vernomen hette Pamphilo dem iungen gepot er der angefangen materi nachfolget, der sich auch nicht saumpt anhüb vnd sprach. Der traume in der gesageten
 20 histori mir vrsach gibt euch auch von eynem zesagen in dem zweyer person gedacht wirt, dieselbigen träume die do geschehen solten warn als es geschechne ding wārn vnd zesagen kaum verbracht waren das von den zühörern gesehen ward nachfolgen allenthalben das daz do geschehen solt. Darumb ir lieben frawen wissen solt das eyn gemeyne
 25 pein vnnnd schmercen eynes yegklichen der do lebt ist gar mancherley in dem schlafe ze sehen, die den schlafenden on zweifel war duncken vnnnd darnach in seinem entwachen ir etliche war fint ettliche der warheyt gleich auch etliche [160^b] on alle warheyt sein, doch nit mynder man fint ir auch vil die also geschehen sein. Auch vil person sein die dem
 30 traume gleich so vil glauben als sy das glauben das sy wachend sehen, vnd sich ir eygen träum sere betrüben vnd traurig werden, auch douon freud enfahen vnd das nach dem sy forcht oder ir hoffnung haben. ander sein die träumen gancz wider sein ir kein glauben dann wann sy sich in die vorbenanten trübsal gefallen sehen des ich weder eyns noch anders lobe
 35 dann die träum nicht allwegen war noch auch falsch sein, das sy nicht alweg war sein vnser yeglichem wissent ist, vnd auch nicht alweg er-

logen sein ist oben in Philomena histori vnnnd neüe mâr beweist worden,
 vnd das in der meinen als ich vor gesprochen hab auch beweisen will,
 darumb ich sprich vnd vrteyle tugentlich zeleben das wol getan ist, doch
 alweg do bei forcht haben, aber keyn güte meynung vnd fürsatzung
 5 vnder wegen oder zeruck lassen, in widerwärtigen sachen wie wol sy zû
 czeiten nützper duncken vnd sich dem seher güt beweisen vnd trost
 geben, man sol in darumb nit alweg gelauben, noch irer widerwärtikeyt
 [160^c] volkomenlichen gelauben geben. Kere wir nun dolest czû vnser
 histori, so spriche ich daz in der edeln stat Brescia was eyn edelman
 10 gesessen genant Miser Negro von Ponte Carraro der vnder ettlichen
 seinen kinden eyn tochter het genant Andreola iunck schön vnd on eyne
 mane, die sich czû irem vngelück in eynen iren nachbauren genante Ga-
 briotto in groß liebe enzündet wie wol er von nyderer gepurt was, doch
 von löblichen tugenten vnd züchten georniret schön von leib vnd gestalt,
 15 vnd mit hilff vnd rate der meyde des hauses Andreola so vil thet daz
 Gabriotto nit allein der iunckfrawen liebe zû im vernam sunder zû
 manchmalen in eynen iren garten mit beyder grosse freud vnd lust ge-
 führt ward, vnnnd domit ir liebe vnd freud ewig wâr sich beyde eynander
 der götlichen e verbunden. also verborgen lange zeit ir freud mit eyn-
 20 ander heten. Nun sich begabe das der iungen frawen eyns nachtes in
 dem schlafe fürkam vnd daucht wie sy in dem garten bei irem Gabriotten
 wâr vnnnd in mit beyder freud in iren armen beschlossen het. in solchem
 sten sy daucht wie sie sähe auß Gabriotten leib geen eyn grausam vnge-
 stalt [160^d] vngeheür in schwarczes geystes form von ir vnerkant vnd
 25 daucht sy wie das selbig vngeheur oder geyste ir mit gewalt Gabriotten
 auß iren armen nâm vnd vnder das ertrich füret in nymer czesehen, mit
 grosser pein beydenthallen in dem entwachte on maß fro was das im nit
 was als sy gedaucht het, doch in dem groß erschrecken empfangen het.
 vnd do Gabriotto die nacht darnach begert bei ir zekomen ir wider was
 30 allen fleiß kert domit er noch so bald nicht zû ir kâm, doch seinen vñ-
 mässigen willen so groß sahe vnnnd domit er sy nit in argem verdächt im
 zekomen vergunnet vnd in desselben nachtes in iren garten empfienge,
 do sy vil schöner roter vnd weisser rosen die solche zeit gab abgebro-
 chen hetten, vnd bei eyne frischen külen brünlein der mitten in dem
 35 garten was bei eynander siczen giengen. vnd nach etlicher enpfangner
 freud Gabriotto sy fraget was die vrsache wâr das sy im sein gesterig zû
 ir komen versaget hete Zehande im saget was ir in irem schlafe erschienen
 vnnnd fürkomen was, darumb ir grosse forcht seinthalben zûgestanden

wär das wär alleyn die vrsach das sy im das zû ir [161^a] komen ver-
 saget het. Do das Gabriotto vernam sein lachte vund sprach. Es wär
 eyn torheyt den träumen zegelauben dann der merteyl solcher von übriger
 oder zewenig enpfangner speiß kämen als man täglich sähe, vnd solt
 5 ich den träumen nachgangen sein die mir dick fürkomen sein ich wäre
 nymer mer zû dir komen nit alleyn vmb des deinen willen sunder vmb
 eyns willen der mir in disen vergangen nächten zûstände. Das was das
 mich daucht wie ich in eynem schönen grünen lustigen walde wär iagen
 gieng vnd eyn schöns wilds rech gefangen het so schön vnd lieblichen
 10 als ye mer eynes gesehen warde weisser dann der schne, vnd in kurczer
 stund mit mir ganz e heymlich ward, in solcher maß das dieselbig reche
 von mir nicht mer komen wolte vund daucht mich wie sy an irem halß
 hete eyn gulden goller mit eyner gulden ketten, do beie ich sy füret.
 Darnach mich mer daucht wie die selbig rechin mit irem haubt mir in
 15 meiner schoß läg vnd rüet In dem mich aber daucht wie eyn kolschwarecz
 grausam windspil ich weiß nicht woher daz kam sich gen mir füget vund
 mir mit seinem maul in mein [161^b] brust fiele, dem ich nach meinem
 geduncken nicht widersteen mocht mir mit seinen scharpfen zänen in
 meiner lincken seiten lag nit nachliesse bis auff mein hercz mich ver-
 20 wundet. vnd mit gewalt mir die schönen rechin auß meinen armen nam
 vnd weg trüg vmb des willen ich so grosses leyd enpfinge das sich mein
 schlafe brach vnd ich entwachte bald mit meiner hand czû meiner seiten
 lief zesûchen ob ich mich wund fund, vnd do ich nicht fand mein selbs
 spotet meines besûchen ich weyß nit waz das bedeut, mir sein ir vil also
 25 fürkomen vnd mich zû zeiten betrübet haben, doch mir darumb weder
 mynder noch mer geschehen ist, darumb laß wir solche ding steen vnd
 schaffen vns eyn gûten mût zegeben. Die iung fraw ab Gabriotten traum
 sere erschracke, aber do mit sy Gabriotten nit bekümeret ir traurig er-
 schrecken so sy best mocht verbarg, beyde also bei eynander mit lieb-
 30 lichem halsen vund küssen ir zeit vertriben, doch das mit kleyner freud
 der iungen frawen die stätz üfels sorg hette gar dick vmbsahe ob sy
 indert durch den garten waz vngeheürs komen sähe, also etlich stund
 gesessen in dem Gabriotten von seinem [161^c] herzen eyn schwärer
 seufze gieng, vnd zû der frawen mit vmbfangen armen sprach. Awe
 35 mir awe mir mein außerweltes lieb nun hilf mir dann ich stirb. Also ge-
 sprochen nyder zû der erden auf das grün gras sanck, do das die iunge
 vernam in auf ir schoß hûb zû im sprach. o du allerliebster herr vnd
 freund mein wes enbrichet dir oder was enpfindst du, er gab ir keyn

antwortte mit grossem schweyße vnnnd ächezen sein geyst aufgab vnd sein leben der iungen frawen die in ob allen mannen liebe hete in iren armen endet. O wie eyn grosse pein vnnnd schmercen es der iungen frawen sein mocht, die in lieber hette dann sich selbs das eyn yeglich person
15 bei im selbs bedenck sy in weynendt erbärmkliche klaget vnd gar oft rüffet aber ir rüffen vmb sunst was, sy in an allem seinen leib durch sücht ob sy indert keyn leben fund, aber tode vnnnd allen erkalt fand, douon sy mer dann halb auch des tods empfand nicht weßt wie sy iren sachen tün solt, mit weynenden augen zů irer meyd gienge der solche
10 beyder lieb kunt was der sy iren iamer vnd leyde was sich ergangen hete klaget, vnd do sy in ob dem toten leib beyd [161^d] eyn gůt genügen geweynet heten, die iung frawe czů der meyde sprach. Seitmal nır got das ich auf erden am liebsten hete hat genomen, so will ich auch nicht lenger bei leben sein. Doch e ich mir den tod tů vor ich
15 mein ere gern wölt bewaren vnnnd synn finden domit der leib der on sel ist würd begraben. zů der die meyd sprach. Tochter nit spriche dich zetöten, dann hastu in hie auf erden verloren wo du dir dem tode thättest du in auch in gener welt verlärest vnd darumb in die helle zů dem teüfel fürest do fürwar sein sele nit ist dann er was eyn züchtig edler
20 iunger, darumb tröste dich vnd gedenc in mit deinem gebet vnd anderm wolthůn vmb seiner sele willen zehelffen des er vmb etlicher seiner verbrachten sünd willen villeicht notturftig ist. Zů der begrebnů zeschicken ist das der syn, tragen wir in hinauf für den garten vnnnd lassen in ligen so ist er bis morgen gefunden vnd wirt in sein hauß heym
25 getragen vnd also von seinen freunden zů erlicher begrebnů beståtet. Wie wol die iungfrawe mit pitter betrůbung vmbgeben was, doch der meyd mere rede zůhöret, aber sich ires ersten rates nicht eynet, czů [162^a] dem andern sy sprach. Des wöll gott nicht das ich eyne solichen den ich von ganzem meinem herzen liebhab, vnd der mein elich
30 man ist ich imer verhenge das er auf die strassen den hunden gleich begraben werd. ich hab in mit meinen zähern beweynet vnd nach meinem vermügen noch tün sol, vnd domit in die seiner freunde auch zeteyle werden was czethůn ist ich nun wol bedacht hab, vnnnd bald über ein iren schrein lieff darauf ein seiden tůch name das vnder den toten
35 leib leget vnnnd im eyn schůns krānczlein von rosen auf sein haubt seczet, den leib allen mit rosen vmblegt zů der meyd sprach Es ist nit ferr zů der tür seines hauß do wir in also er ist hintragen wöllen vnd für sein tür legen dann der tag nahent ist, so wirt er bis morgen von den seinen

funden wie wol es in kleyn freude sein wirt, so wirt es doch mir in der
 arme er tode ist besunder genade sein. Also gesprochen von neuem an-
 hube kläglich zeweynen sich im auf sein gesicht warff lange zeite ir
 czäher der augen vergosse, darnach aufstünde dann der tag sich nahend
 5 ward, vnnnd den gulden ring mit dem sy Gabriotto geelichet vnd gemä-
 [162^b]helt het den von irer hend nam vnd im den an seinen finger stieß
 zû im weynend sprach. Mein allerliebster herre sicht dein sel yeczund
 meine zäher oder ist indert keyn vernunfte oder leben nach der abge-
 scheyden sele noch bey disem toten leibe beliben die nâmen hin die let-
 10 sten gab der die du bei leben also lieb hetest, vnd also gesprochen mit
 verschwunden geysten amâchtig auf im beleyb ligen, doch nach et-
 licher zeit die verschwunden geiste widerkamen sy auffstünd vnd mit
 der meyd den toten leichnam mit dem seiden tûch namen zû dem
 garten auß gegen Gabriotten hauß wercze giengen, in solchem geen
 15 on alles gefâr sich begabe das sy den statknechten mit dem toten cör-
 per bekamen, vnd von den mit sampt dem toten gefangen worden. Die
 gût iung fraw mer des todes dann leben begeren was. die statknecht
 bald erkannte beherczend zû in sprach. Ich kenne euch alle wol dar-
 umb ich euch nit fleûhe vnd geschreckt bin mit euch für den richter
 20 czegeen, vnd wo euch hin liebet. aber euer keyner so beherczend sey
 mich anzerûren wo ich mich willig mit euch zegeen, noch mir ichte
 von disem totten [162^c] leib zenâmen als lieb im des richters huld sey
 also vnberûret mit dem totten leichnam für den richter giengen. Do der
 richter dise sach vernam von seinem pete aufstünd vnd die frawen in
 25 seine kameren fûret vnd was sich allenthalben Andreola vnnnd Gabriotten
 in dem garten verlauffen vnd sich seines todes ergangen hette das eygent-
 lichen zû vernâmen bald nach etlichen ârczten schickt den toten leich-
 nam gar eben beschawen tet. ob er vergift oder anders tode gestorben
 wâr, die alle der gift halben neyn sprachen sunder eyn postema bei dem
 30 herczen im gebrochen wâr die im den atem genomen vnd also gächling
 erstecket het. Do daz der richter vername das die iung frawe solches
 todes on schuld was wol zemût czû der frawen sprache, doch vor sich
 fleisset das ir zeweisen des er ir nicht verkaufen mocht vnd an sy be-
 gert, wûrd sy im mit irem leibe czewillen er sy frey vnd ledig lassen
 35 wölt vnd do solche seine wort in gen ir nit hulfen, er seinen gewalt wolt
 brauchen, vmb des willen die frawe in grössen zoren enzündet vnd
 manliche stercke gen im beweiset vnd in mit herten Worten strafft, in
 dem der lie[162^d]cht tag komen waz vnd Miser Negro der frawen vatter

all sach der tochter halben vernomen het on maß traurig vnd mit etlichen sein freunden zů dem richter kam, do er sich aller sach bas informiret, die tochter an den richter begert vnd ernstlich foderet, der richter sy von erst gen dem vatter verklagen wolt e er von ir des gewaltes halben den er ir wolt getan haben verklaget wůrd vnd von erst sy anhůb zeloben vnnd ir grosse beständigkeyt lobet vnd breiset vnd die zebewären vnd was das bedeut het vnd sprechen wůlt des er sich gen ir erzeyget hete, vnd vmb solcher stäter beständigkeyte willen ir besunder liebe trůg, vnnd wo es sy deucht vnnd des der ir vatter was
10 gefallen wäre, wie wol sy ir eynen schlechten man von nyder gepurt erwelt hete, er sy gern für sein elich haußfrawen mähelin vnnd haben wůlt, vnder dem die weil der richter vnd ir vatter ir gespräche miteynander heten, die iung fraw für den richter vnd vatter kame weynend für iren vatter nyder fiel zů im sprach Lieber vatter ich gelaub es nit not
15 sey euch mein trůbsal vnd histori czesagen mir zweifelt nicht ir solte sy cze gůter maß [163^a] wol vernomen haben. Darumb ich nach allem meinem vermügen diemütiglichen euch bit vnd genad beger meiner grossen sůnde die ich in euch begangen hab das ich on euer wort vrlaub den der mir geliebet vnd gefallen hat für meinen elichen man genomen
20 hab, in dem ich schwärlich wider euch geirret hab, solicher genad ich nicht beger mein leben czefristen, sunder als euer tochter vnd nicht euer feindin ze sterben, weynend im also vor seinen fűssen lage. Misser Negro der eyn betaget alte wirdig man was czűchtiger vnd freűndlicher nature do er der tochter klágliche weynen vnd dieműtíge wort vername nit ge
25 lassen mocht mit der tochter zähern műßt vnnd sy von der erden aufhűb zů ir sprach Mein liebe tochter mir wäre wol lieb vnd mein grosses gefallen gewesen das du eynen man genomen hetest der dein vnd deines adels wirdig gewesen wäre, doch seitmal du in genomen hetest als er was vnnd dir gefiel so solt er mir auch also gefallen sein. Aber dein
30 kleyn getrawen czű mir vnnd eyn solchs vor mir verborgen hast das ist das das mir do we tůt, vnd so vil mer das ich in verloren hab e ich [163^b] in erkant hab. aber solt er bey leben sein dir zů lieb er von mir solt geert gewesen sein, doch was bey leben nicht geschehen ist das geschehe in dem tode. vnd sich zů seinen sűnen vnd freűnden keret czű
35 in sprach, vnd schűff das man Gabriotten seiner tochter man erlichen zů begrebnű bestátet alle seine freűnd vnd freűndin zesamen fűgten die in der stat waren vnnd den toten leichnam auf dem seiden tűch mitten in den hofe legeten, do er nicht alleyn von seiner edeln schönen frawen vnnd

eygen freünd beweynet vnd geklaget warde, sunder offenbarlichen von der ganczen gemein von frawen vnd mannen geklaget vnd beweynet warde vñnd nicht als eyn schlechte man von nyderm stand geborn sunder als eyn grosser fürste von etlichen mächtigen burgern zů der begrebnuß getragen ward, vnd nach etlichem vergangen tag der richter Miser Negro besant vnd an in die tochter zů der e begeret das sy in keynen weg thůn noch verhängen wolt irem vatter vnd Gabriotton zů liebe in eyn heyliges frawenkloster mit irer meyd kam sich beyde in den gotz dienst ergaben lange zeit darinn nunnen lebten.

10 [163^c] Fraw Symona eyn iungen lieb het genant Pasquino mit dem sy in eynem iren garten was mit im freůde czehaben, vñnd Pasquino sein zāne mit eynem salueplat reyß vnd bestrich gächling nyder fiel vnd starb, vñb des willen die fraw gefangen vñnd für den richter gefůrt ward vñnd dem richter wolt zů versten geben vñnd
15 weisen wie Pasquino getan het vñnd denselben salue auch nam mit einem plat ir zān reyß als Pasquino thet, das getan nit anders dann als Pasquino gächling oder vrbering zů der erden sank vñnd starb.

Pamphilo sein histori verbracht hat vñnd der kűng der frawen Andreola halben des keinen schmerzen als die andern theten in im be-
20 weiset zehand frawen Emilia daz wort gab, wāre es ir gefallen sy der gesagten materi nachfolget, die on alle widerrede anhůb vñnd sprach Mein allerliebsten gespilen Pamphilo netze māre mich auch zűtcht euch eyne csesagen in allen sachen der gesagten geleich, vñnd wie Andreola iren allerliebsten freůnde in dem garten verlose also auch die von der
25 ich sagen will [163^d] gefangen vñnd für den richter gefůrt ward vñnd sich weder durch ir stercke noch tugent sunder mit ir selbs tod sich von dem richter erlediget, vñnd als von vns in vnsern histori czű mermalen ist vernomen worden wie die liebe die geheůbe der edeln gern besicze vñnd ir wonunge hab, doch darumb der armen regiment nit außschlecht, vñnd
30 auch zű zeiten ir stercke bei in beweiset. Als in eynem meinen neuen mār ob es nit gar doch der grőste teyle des erscheinen wirt, dobei mein gefallen ist wider in vnser stat zekern mit meiner rede, darumb vernetmet. Es ist nicht lang zeit vergangen das ein schöne iunckfraw genůg zűchtig nach irem stand was eyns armen vatter tochter vñnd was genant Simona
35 vñnd wie wol sy mit iren eygnen henden ir narung vñnd das brot das sy essen wolt gewan vñnd also mit spinnen ir armes leben auffhalten kund,

doch darumb nicht als von kleinem vnd armen gemüt was das sy nicht
 hercz het liebe zeenpfahen dem reichen geleihe, die zů eynem iungen
 von grösser macht dann sy was durch sein liebliche wort vnd züchtig
 gepärd zů im liebe gewan vnd czů im in liebe enczündet, der [164^a] selbig
 5 iung für seinen meyster die wolte zespinnen vmb lone den frawen gab,
 der im güte zeit was fürgenomen het die iunckfrawen Symona zebülen vnd
 liebzehaben, dann ir lieblich angesicht weis vnnnd gepärd im sere lieben
 vnd gefallen ward, des namen waz Pasquino vnd von ganczem herczen
 ir in seinem gemüt begeren was, doch das etlich zeit hangen ließ nit
 10 fürpas süchet also das .güt iung meydlein fürpas span vnd als manchen
 faden es span vnnnd auff die spinnel wande als manchen mer brinnenden
 dann das feür grossen seufftzen ir von irem herczen außgiengen wenn sy
 den bedacht der ir czespinnen gab Auch er gar dick kame seines meys-
 ters vnd der iunckfrawen gespunst zebesehen zů geleichier weis als ob
 15 alleyn ir gespunst die wäre die das tüch vnnnd den zettel zů ende brächt,
 darumb sy mer fuderet mit wolte dann keyn andere spinnerin. auch eyn
 solichs ir liebet vnd besunder freud brachte das der den sy lieber sahe
 dann yemant anders mer zů ir kam dann zů andern spinnerin. In sol-
 chem ab vnd zů geen sich begab ir eynes mer hercz finge dann sein ge-
 20 wonheytt was all forcht vnd scham [164^b] auf eyn ort geleget vnnnd sich
 eynander mit iren freuden gemeyn machten, in solcher maß auf eynem
 vnnnd andern teyl in die sach liebet, daz eyns des andern nicht wartet
 noch biten thet, sunder yeglichs dem andern zů solchem schimpffe cze-
 laden entgegen kam. Also ir liebliche freundschaftt lust vnd freud von
 25 tag zů tag sich stätz vnnnd alweg meret. In solchem lust eynest Pas-
 quino czů Symona sprach. Er in alle wege von ir wölt gehabt haben
 das sy synn funde domit sy mit im in einen seinen garten käm, do sy
 mit beyder mer freude vnnnd on sorg iren lust haben möchten, des Sy-
 mona wol zemüte vnnnd ir gefallen was, vnd an einem sonntag irem vatter
 30 zů versteen gabe wie sy wölte kirchferten czů sant Gallen geen, vnnnd
 ir ein gesellschaft nam genant Lagina, sich so sy erst mocht in den garten
 nach dem sy von Pasquino was vnderriecht worden füget, do er ir mit
 eynem seinen gesellen genant Pucio wartet. do sich netze liebe vnd hoch-
 zeit zwischen Puccio vnd Lagina czů bereyt vnd machet die sich allein
 35 auf einen ort in dem garten zehauften fügten, vnd der blinden meuß
 spiltten beider begir vnd freud eine ward [164^c] Pasquino vnd Symona
 spacziren zů einem grossen schönen saluestock gangen warn vnder den
 sich zů eynander nider seczten do ir verborgne freud heten in solchem

lust von eyner marend zû red kamen die sy in dem garten vnnd grünen
 grab zetûn meynten, in dem sich Pasquino zû dem saluestok keret eyn
 grün plate dar abe brach vnnd das an seyn zâne reyb vnd sprach der
 salue wâr gesund vnnd machet die zân vnd das zanfleysche gar reyn
 5 vnd sauber von allem daz man ässe, vnnd do er nun die czân gar wol
 mit dem salueplate geriben het, wider auf die vorigen wort der marend
 halben kam nit vil wort gesprochen hete sich aller in dem angesicht ver-
 keret vnd nach solchem zehand die rede vnd das gesicht der augen ver-
 lose gächlinge starb vnd seinen geyst auffgab. do das Symona sahe vnd
 10 das er tod was vernam wêr trauriger dann sy kläglich anhüb zeweyen
 vnnd ir leyd zeklagen, Puccio vnd Lagina zû ir ruffet die bald gelauffen
 kamen Pasquino nit alleyne tode funden, sunder eißkalte groß geschwol-
 len vnd vol schwarzer flecken funden. Zehand Pucio vnd Lagina zû
 Symona sprachen. Ey du böses [164^d] weib du hast in vergifft vnd im
 15 den tod gethan. Zû solchem romor vnd geschrey die nachbauren die
 bei dem garten woneten alle zûluffen Pasquino toten vnnd geschwollen
 funden, Pucio Symona beklagen warde wie sy Pasquino solte vergift
 haben, die do grosses leydes ires vngelückes halben vnd verloren liebes
 schir von syn vnnd ir selbs komen wâr, vnd des man sy zihe vnd be-
 20 schuldiget sich nicht entreden mochte darumb ir alle schuld czûgezogen
 ward, vnnd on alle zweifel das gelaubten als Pucio gesprochen het, vnd
 namen also weynend gefangen für den richter fürten do Pucio beweiset,
 wie Symone Pasquino tod vnd nyemant anders schuldig wære. Der rich-
 ter sich nit saumet balde die warheytt begunt zesûchen dann ye nicht
 25 vernâmen mocht das die iung fraw solchs übel het wûrcken mügen vnd
 an des iungen tode schuldig sein möcht, vnd sy in geheym schûf fûren
 in den garten vnd er sich auch darein füget gegenwûrtig sein vnd vil
 ander herrn sehen wolt von der iungen frawen wie doch Pasquino ge-
 than hete douon im der tod zûgestanden wâr. Do der richter in den
 30 garten kame, [165^a] Pasquino als eyn krotten geschwollen fand das in
 gar ein fremde sach daucht vnd Symona fraget wie er doch gethan het
 vnd was sich seinthalben ergangen het, vnd do sy dem richter alle sach
 erzelet vnnd gesaget het waz ir handel mit eynander gewesen wære, vnd
 domit er bas vernâm sich zû dem salue nahet vnd als Pasquino gethan
 35 het sy auch tet vnnd eyn salue plat abbrach vnd das an ire zân reyb,
 zehand gegenwûrtig des richters Pucio vnd vil manch Pasquino gesellen
 die der iungen frawen spoteten vnnd sprachen ir falscheytt mit keyner
 andern pein solt gebûßt werden dann alleyn mit dem feûr. Die arm

ellende iung frawe vmb ires allerliebsten bülen willen mit grosser pein vnd schmerzen beladen von Pucio vnnnd den andern on schuld sich zů dem tod verurtheilt sahe erschrockenlich eynem steyne gleich stünd vnnnd der vergift salue domit sy ir zān geriben hete ir auch zestund als Pasquino zůgestanden was nyder zů der erden sanck gächlinge ir alle ire geyste verschwunden nit mit kleynem wunder der zůseher ir leben endet iren geyst auffgab vnd starb. O ir aller sālīgisten selen die auf eynem tage [165^b] ir grosse überflüssige liebe mit so klāglichem tod ir liebe vnd leben geendet haben, doch noch vil sāliger wāret wo ir euch in gener welt lieb hetet vnnnd uch czeű eyn fűgtet als ir hin getan habt. Aber vil sāliger wāre der iungen frawen sele gewesen nach vnser vrteyle, wann sy vor dem iungen vnd nit nach im den tod empfangen hete. Also vrsach der falschen gezeugen vnd des vngelückes daz do nit verhängen noch eiden mocht mit seiner vntugent die gůten ellenden iungen frawen darzů bracht daz sy mit tod nachfolget des sel den sy ob allen mannen lieb het. Der richter sahe vnd vername aller erschrocken mit sampt den zůsehern nit weűt was er zů diser sach sprechen solt, also eyn kleyn auf im selbes stünd darnach sprach hie sich on czweifel beweűt diser saluestock eitel gift sey vnnnd doch des salue gewonheyt nit ist vnnnd do mit nyemant mer geschehe als den zweyen personen geschehen ist man in mit der wurzeln auß dem grund reuten vnnnd verbrennen sol. Zehand der gartner mit hauen schaufeln kame gegenwűrtig yederman den saluestock abschlűge vnnnd auß der erden hűb das so bald nit thet noch [165^c] geschehen was das alle vrsach beyde toter personen nicht eygentliche gesehen vnd erkant wűrd, dann vnder dem saluestock eyn grosse grausamme krot gefunden ward die mit irem vergiften atem nach dem die meyster vnnnd ārczte sprachen den saluestock allen vergift hete, die krot was so vnmāssig groű das nyemant so beherczent was sich zů ir zůnāheten, darumb vil dűrres holcz vnd reisach legten vnnnd darein feur stiessen vnd die kroten mit sampt dem saluestock verbrannten. Also dez richters proceű der iungen frawen halben vnd Pasquino ires allerliebsten bülen tode eyn ende nam, vnd beyde mit eyn von Pucio vnnnd seinen gesellen in sant Procolo kirchen auß pfarre sy waren getragen vnd begraben warden.

35 Geronimo het lieb eyn iunckfrawen genant Siluestra, vnd domit er sy nicht czű der e nām vnd ir vergāű sein műtter in gen Parisii sant nach ettlicher verganguer zeite wider kam do er fand

das man der iunckfrawen eyne man geben het. er sich eynes nachtes verstolen in ir kamern verbarg vnd sich czû ir leget vnd ir an der seiten starb.

[165^d] Frawen Emilia neu märe zû end komen ist, vnd durch des
 5 künigs gepot Neyphile anhebt vnd spricht. Etliche weiber nach meiner
 vrteyle ir allerliebsten frawen sein die mer dann yemant anders meynen
 czewissen vnd in mynder raten noch helffen können dann ander leute
 vnd sich nicht alleyn der mann rat widerseczen, sunder den natürlichen
 sachen mit iren vnuernünftigen synnen wider sein wöllen, douon sich
 10 dicke grosse übel begeben haben vnd keyn güte nye douon bekam dann
 vnder allen natürlichen sachen keyn ding mynder rat begeren ist dann
 die liebe oder empfangen vnd aufnemen das ir wider ist, dann ir natur
 ist also ein ir selbs verwiset dann durch yemant rate oder hilff von iren
 fürgenomen sachen vnd willen abzestecken, darumb mir yeczund in ge-
 15 danck fürkomen vnd czügestanden ist euch eyne histori czesagen von einer
 frawen die weil sy süchet vnd meinet weiser ze sein dann ir zûstünd
 vnd doch des nit enwas, vnd in den sachen darinne sy studiret vnd vleiß
 het soliche materi nit wirdig waz in ir grosse synne zebeweisen Dann sy
 meynet auß eynem [166^a] lieb habenden herczen die lieb weg zenemen
 20 vnd zeentwichten das das der planet vnnd gestirn von oben ab geben
 hat darumb vnmüglich was die brinnenden liebe mit irem vnweisen stu-
 diren czeerleschen, vnd zû eyner stund nicht alleyn die brinnenden liebe
 außtreyb, sunder auch domit die sele vnd das leben irem eygen blût vnd
 leiblichem kind vnd sun name. Darumb mein allerliebsten frawen merckt
 25 vnd nämt war, in vnser stat nach dem die altten sagen wonet eyne reich
 kaufman genant Leonardo Sigheri der mit eyner seiner haußfrawen eyne
 eynigen sun het genant Geronimo, der selbig gût man alters halben mit
 tod abgieng vnd starb, doch vor seinem tod demselben seinem sun sein
 vormünd mit sampt der müter beschied vnd geben het die getreuliche
 30 sein sache handeln sölten, der iung knab mit andern kinden der nach-
 burschaft erwachsen was, doch mer mit einem iungen meidlin die eines
 schneiders tochter was sein kuntschaft het dann mit andern, Soliche
 kuntschaft vnd aufwachßen beydenthallen sich in brinnende liebe keret,
 in solicher maß das der iung kein güte stund on das iung meid[166^b]lein
 35 gehabt mocht wo er ir nicht sahe, desselben gleichen sy in nicht
 minder lieb hete dann er sy. Solcher liebe des iungen müter war ge-
 nommen hette in vil dick darumb strafet vnd zû red seczet. auch daz seinen

vormund zewissen tet als die do meynet vnnd ir ze versten gab vmb des iungen grossen reichthumb willen auß dem schlehendorn eynen apfelbaum zemachen, vnnd czû den vormund sprach. Diser vnser sun der noch nicht gar czû den vierczehen iaren komen ist zû eynes schneiders tochter
5 die Siluestra mit namen genant ist solche grosse liebe hat das ich besorge, fürsehen wir nicht vnd schicken in von hinn er sy eyns tages on yemant wissen zû der e nâme des ich nymer frölich wûrd, vnd wo sy eynem andern gegeben wûrde er sich in den tod frâß, darumb eyn solches zefliehen vnd vndersten deucht mich ir het in von hier genomen vnd
10 in fremde land gesant do ir eûer handel habt also im villeicht solche liebe vergessen wûrde, vnnd im auß seinem gemût kâm, darnach wir im eynes erbern mannes tochter im geleich geben mûgen, den formund der frawen red wol gefiel vnnd sprachen, allen iren [166^e] vleiß thûn wölten dem iungen czû in rûften vnnd genûg czûchtigklich mit im begunten zereden
15 vnd sprachen. Lieber sun du bist nun dolest zû deinen iaren vnd vernunft komen wâr vnser meynung vnd synn du sâhest selbs czû deinen geschâften vnd wâr vnser synn vnd will du rittest gen Parisi do der mer teyle deines handels vnd reichthumb ist vnnd besâhest wie dein vnnd auch vnser sache stûnden, auch dobei etwas zucht vnnd tugent gelernet hetest
20 des mir nicht czweifelt, dann do ist grosser adel von fürsten vnnd herren vnnd hochgelerten mannen, die dir on czweifel gefallen werden darnach wider her zû vns komen wârest. Do der iung seiner formund red vernomen het mit kûrzen worten in antwurt gab wie er des nicht en thûn wôlt dann in deucht er als wol als eynander zû Florencz steen möchte.
25 Sy des iungen mûter sein antwurte zewissen theten, die vmb solicher seiner antwurt willen in grossen vnmût vnd zorn fiel nicht darumb das er nit gen Parisii wolt, sunder seiner grossen liebe halben die er czû der iunckfrawen hete im ûbel czûredet, doch darnach mit diemûtigen senften wortenn in [166^d] freuntlich bate das er seiner formund willen
30 thâte, vnnd im so vil vorprediget vnd versprach das er ir seinen willen gabe vnnd sich schicket nach irem gefallen eyn iar zû Parisii vnd nicht mer zesten. auffsaß vnd gen Parisii rey, aber sein grosse liebe e sich meret vnnd wûchß dann mynderet, doch wider allen seinen willen zwey iar zû Parisii verhalten was vnd mer dann ye in seiner ersten liebe brann
35 vnd in seinem widerkomen er fand das sein allerliebste iunckfraw Siluestra verheyret vnd zû dem mann gangen was douon im groû leyd vnnd vnmût czûstûnd, doch wol vernam waz geschehen was nicht wider zeruck geen mocht, darumb sich fleisset im des frid zegeben, doch sein liebe

darumb nicht nachließ vnd ir hauß erlernet, vnd als der liebhaber gewonheyt ist vor dem hauß oft auf vnd abging vnd meynet gleich als er ir nicht vergessen hete, auch sy sein nicht solt vergessen haben, aber es het sich alles vmb sy verkeret, er was ir nit mynder dann als het sy
 5 sein nie gesehen, vnd ob ir noch was ingedenck waz des sy sich gen im nicht mercken ließ, solchs der iung wol vername nicht mit kleynen seinen schmerczen [167^a] pein trüg, vnd alles das thet das solcher liebe halben zetûn was ob er ir wider in ir hercz vnnnd gemût komen möcht. Aber im nit anders erscheyn seiner liebe, darumb er sich ze sterben schicket
 10 oder er wölt mit ir reden, vnd durch etliche nachpaurin vnderricht ward die gelegenheyt ires hauses vnd kamern, vnd eynes nachtes sy vnd ir man in die nachpaurschaft essen gangen waren, in dem er das hauß ersteyge vnd in die kamern hinder den fürhange des petes sich verbarg, do also lang verborgen was das sy czû hauß kamen vnd zû pete giengen,
 15 vnd do er den man entschlafen vername sich an das pete zû der iungen frawen leget sein hand auf ir brüst leget mit nyderer senfter stimm zû ir sprach. O mein außerwelte fraw vnd liebe nicht erschricke ich bin dein Jeronimo. Die fraw die do nit schlieff willen het zeschreien, doch von alter freundschaft bezwungen do sy vername daz ers was nicht
 20 schrey, sunder in vmb gotes willen bate er wege von ir gieng e der man erwachte dann die zeit ir bey der kintlicher liebe vergangen wär, zû der zeit wir in liebhaben nicht verdacht waren ich bin als du wol sihest verhey[167^b]ret zû der götlichen e, darumb mir nicht mer zûstet fremder liebe zepflegen vnd ander manne liebhaben, darumb durch got gee
 25 deinen weg e du von meinem mann vernomen seyest, wiewol dir villeichte nit anders czüstünd so wäre ich doch des gewis mit im nymmer mer in fride czeleben wo ich yeczund von im lieb vnnnd werde gehalten bin. Do der iung der frawen häftige wort vernam alle seine hoffnunge verlор vnd in grossen vnmüte fiele die grossen liebe der vergangen zeit beydenthalben
 30 mit im selbs bedencken ward vnd das sich soliche sein liebe wie ferre er von ir gewesen was nicht gemyndert sunder e gemeret het, vnd die ire gen im sogar erloschen sahe, grosses bitten vnd verheyssen durch eynander gemüschet er ir tet aber von ir keyner bete geweret was. darumb ganz verzaget vnnnd des todes begeret. Zû dem letzten sy bat in wider
 35 kerung seiner liebe die er ir so lang zeit getragen het das sy im vergünnet eyn kleyn sich bei ir zewermen dann er von frost tod vnd aller erkalt wär vnd ir versprach in keynerlei vneren wider iren willen zethûn, alsbald er sein wirme empfangen hette von ir geen [167^c] wölt. Die

iung sich in erbarmen ließ die villeicht an seinem anrüren seines frosts
 empfunden hete vnnnd in des er begeret geweret. Also der ellende iunge
 sich seiner lieben frawen an ir seiten schmuckt anrüret vnd nicht sprach
 wol mit im selbes ir grosse hertigkeyt wider in bedacht, dobey sein ver-
 5 lorne hoffnunge sahe, darumb im fürname nymer mer zů ir zekomen.
 in solchen gedencken on keynerley gesprochen noch icht geredt im alle
 seine geyste seines leben verschwunden vnd der frawen an irer seiten
 tod beleybe, Also etliche stund lage e die fraw seines todes warnam
 wol sy fremde daucht seiner grossen czucht halben das er also sy vnan-
 10 gerüret geligen mocht, auch sorg hete der man erwachte vnnnd des iungen
 warnam vmb des willen mit grosser still in anhüb zewecken vnnnd czů
 im sprach. Jeronimo stee auf vnd gee wege e mein man erwache, das
 also czů mer malen thete, aber keyn antwurte von im hete, darumb ir
 gedacht er entschlafen wär ir hand czů im strecket in czewecken, sy in
 15 allen eißkalt fand das sy gar fremde nam in bas rürt, aber nit vernam
 vnnnd sy on czweifel [167^d] daucht er tod wär. Do ward betrübter
 frawe nye mer gesehen nicht weißt was sy tůn solt. Doch bald mit ir
 selbs rat nam vnnnd durch eyn ander person iren man versůchen wolte
 was er doch zů solcher sach sprechen wölt, vnd in auß dem schlaf
 20 wackt, vnnnd was sich ir vnnnd auch des iungen halben gegenwirtig sein
 ergangen het im ze versteen gab wie eyn solches eynem andern zůge-
 standen wär vnnnd sprach. Mein lieber man ob mir ein solches geschähe
 was deucht dich czethůn, der gůt man ir antwurt vnnnd sprach. Mich
 deuchte den der do tod wäre denselben man mit stille czů seinem hauß
 25 trůge vnd do ligen ließ vnnnd die frawen der das also ergangen wäre die
 in keynem argen oder übel verdacht wäre die weder schuld noch gesündet
 hete. Die iung fraw wider zů im sprach. Mein lieber man wir also
 thůn müssen vnnnd im sein hand nam vnnnd die auf den toten der ir an
 der andern seiten lag leget dobei er vernam als die fraw gesprochen
 30 het war was aller erschrockenlichen auffstůnde das liecht zůndet das
 wunder zesehen, vnd e er mit der frawen zů ander red kam den toten
 iungen in sein gewande [168^a] wider kleydet vnnnd auf sein achßeln nam
 vnd für die tür seines hauß trůge do in ligen ließ, der des morgens mit
 grossem weynen vnd klagen von seinen freunden funden ward. sunder
 35 von seiner mütter die in mit grossem romore vnnnd geschrey mer dann
 yemant anders klaget vnd weynet, do er von seinen freunden besůchet
 ward ob er indert wund wär oder was doch die vrsach seines todes ge-
 wesen wäre, aber nicht funden dann durch die weisen arczte gesehen

vnd gesprochen ward, er von grossem überflüssigem leyde tod wäre als
 dann die warheyte was. Also den leib in die kirchen trügen, dem sein
 traurige mütter mit iren freunden frawen vnnnd mannen gesellschaft thet,
 vnd nach dem gewonheyte was den toten klageten. In dem der güt man
 5 in des hauß der iung tod was zů Siluestra seiner frawen sprach. Gee
 hin nym ein mantel auff dein haupt vnnnd gee in die kirchen do man
 Ieronimo hin getragen hat vnnnd secze dich vnder die frawen vnnnd ver-
 nyme was man doch von disen sachen sagen mage, ob wir in keynerley
 gedacht oder verdacht seyen des selben ge[168^b]leichen will ich vnder
 10 den mannen tůn. Das der iungen frawen die sich zespat gediemütiget
 het gefallen was als die auch des toten begeren was czesehen den sy
 bei leben nicht mit eynem kleynen küßlein wolt zů lieb werden, sich
 czů der kirchen füget. Es ist ein grosses wunder zebedencken vnd
 wollen durch grůnden die grossen stercke der liebe, dann das hercz das
 5 do daz vnsällig gelfücke vnnnd Ieronimo nicht geoffen noch erweychen
 mochten das die ellend iung fraw selbs aufftbet vnnnd öffnet, vnnnd die
 alten erloschen flammen der liebe sich in ir wider enczůnden vnnnd sich
 alle gächlinge verkeret do sy den iungen also toten ansichtige ward, in
 solche klägliche diemütigkeyte fiele das es nicht zesagen ist, vnnnd ze-
 10 hand auß den frawen zů dem toten iungen trang vnd über in erbärm-
 klichen anhub kläglichen czeweynen schreyen vnd ir leyde czeklagen,
 vnd sich mit irem angesicht auf das sein warff aber nit mit vil zāher
 irer augen, dann in sobald nicht angerűret het, zů gleicher weis als
 das grob leyde pein vnd schmerzen dem iungen sein leben genomen
 5 het, also auch [168^c] ir das leben nam. Die zůsehenden frawen die ir
 keyn kuntschaft heten nach langem trůsten zů ir sprachen das sy auff
 von dem toten stůnd vnd sich trůstet dann das gots gefallen wār den
 iungen zů im zenāmen, vnd sy als die do auch tode was in keyn ant-
 warte gab noch sich verrűrt, die frawen sy angriffen auf ab dem toten
 10 zehoben, die sy zů eyner stund Siluestra erkanten vnd tod funden Vmb
 des willen alle frawen die gegenwirtig waren mit zwifachem trauren
 vnd diemütigem klagen őrberwunden alle kläglichen anhuben zeweynen.
 Solche māre für die kirchen vnder die mann kamen vnd Siluestra man
 der vnder in was zewissen warde, der on yemant trost auch anhub ze-
 5 klagen weynen vnd vmb seiner frawen willen leyde zetragen, vnnnd et-
 liche die bei im stůnden die vrsach seines leyds fragten den er was
 sich in seinem hauße Ieronimo halben ergangen het alles saget vnnnd ze-
 wissen thet, dobei yederman kunt ward die vrsach beyder tod yederman

irenthalben groß leyd het vnd die iungen frawen neben dem iungen knaben in die bar legten do sy beyde von neuem bewey[168^d]net worden, darnach beide in eyn begrebnuß beschlossen. also die die grosse liebe in leben nit mocht czû eyn fügen, die mit tode vnnd ewiger gesel-

5 schafte czû eynander gefüget vnd beschlossen worden.

Herr Wilhalm ritter von Ronsiglione gab seinem weyb cze essen eines andern ritter herze den sy ob allen mannen lieb het genant herr Wilhalm Guarda Stagno dem er das leben nam, vnnd do die frawe solichen tod vernam sich zû eynem fenster ires palast

10 außwarffe ir selbs den tod thet.

Frawen Neyphile neue histori eyn ende hat nit mit kleynem leyd vnd trauren der ganczen gesellschaft, vnd der künig Dioneo sein vorig gesetzte nit brechen wolt dann nyemandt anders auff disen tage mer czesagen was dann sy zwen, darumb er sel[169^a]bes anhub vnnd sprach.

15 Mir ist für vnd yeczund in meine gedanke komen mein allerliebsten frawen euch ein neü märe zesagen seitmal wir von vnglücksäligen sachen vnnd trübsal der liebe halben sein zerede komen, douon ir nichte minder leyde vnd traurung empfahe solte als ir von den gesagten gethan habt, doch mein histori etwas kläglicher sein wirt vmb des willen

20 daz die von den douon ich sagen will wirdiger vnd edeler personen sein werden dann die von den gesaget ist gewesen sein, vnnd den grausamer tod zû gestanden ist. Darumb wissent nach dem vns die Prouinczaler ze versten geben wie in dem land Prouincza warn zwen edel ritter gesessen beyde stett vnnd schlösser vnder irem gewalt hetten, der

25 eyne was genant herr Wilhalm von Ronsiglione, der ander herr Wilhalm Guarda Stagno beyde fürsichtig männer in streitten vnnd kriegten, redlich in allen stechen vnd turniren bereyt warn alweg in eyner gesellschaft auf solich hōf ritten ir gesellschafte beydenthallen groß was bei zweyen meilen von eynander mit hauß gesessen waren. Nun het herr

30 Wil[169^b]halm Ronsiglion auß der massen eyn schöne frawen, zû der selben schönen frawen herr Wilhalm Gwarda Stagno grosse freundschaft gewan vnnd in sy in vnmässige liebe enczündet so vil thet das die frawe solcher liebe warnam vnd in für eynen redlichen mane erkant, vnd ir sein weis vnnd czüchtige gepärde lieben vnd gefallen ward. in

35 solcher maß das sy nichte anders von im begeren vnnd warten was, dann alleyne das er ir zû seinem willen begert, doch nicht lang vergieng sich

bei eynander funden vnd in der letsten rüre der liebe sich mit eynander
 verschlussen, Aber soliche ire liebe mit kleyner fürsichtigkeyt brauch-
 ten dann in kurzzer zeit der frawen man solicher sach war nam vnnd
 mercket, vnd wider herr Wilhalm Gwarda Stagno in töttlichen zoren
 5 vnd haß fiele, aber sein zorn bas temperiren vnd verbergen kund dann
 die frawe mit sampt dem ritter gethan hete, im gänzlich fürnam dem
 Guarda Stagno dem er soliches nicht vertrauet hete sein leben ze-
 nâmen vnnd in czetöten, vnnd die weile er in solicher meynunge was in
 dem sich begab eyn torniament in [169^c] Franckreich außgeschrien
 10 wurde das Ronsiglion Guarda Stagno bald zewissen thet, do bei im en-
 pote wär es sein gefallen er genötig solcher sach halben mit im czereden
 het, darumb wo er mücht das er czû im kâm damit sy der sach möchten
 eyns werden ob in in den turner zereitten wär oder nicht. Guarda Stagno
 dem poten eyn frölich antwurt gab vnd sprach on zweifel bis morgen cze
 15 abendt er mit im das nachtmal essen kâm. Do Ronsiglione solche pot-
 schafte widerumb vernam im gedacht füglich vnd ebne zeit komen wäre sich
 zerechen vnd Guarda Stagno czetöten, vnd do in zeit daucht das der ritter
 komen solt sich mit etlichen seinen gesellen wapent aufsaß zû roß weg
 dem Guarda Stagno engegen reyt, vnd sich vnderwegen in einem wald
 20 vnnd gestreich verbarg do des ritters wege fürgieng, do er also eyn
 kleyne czeite gewartet het in mit czweyen knechten vngewapent komen
 sahe als der sich vor nyemant besorget noch zehüten weßt, vnnd do er
 an das ende kam do er im am füglichsten vnnd on alle warnung was in
 mit eynem spieß durchreyt zû im sprach. [169^d] Ey du böswicht du
 25 bist des todes gib her mir dein leben, das geredt vnnd durch sein brust
 gerant eyn dinge was. Also Gwardastagno der ritter on alle were
 vnnd widerred von dem grossen stoß fiel vnd sein leben vngeret en-
 det, sein zwen knecht die Ronsiglione so gächling nicht erkant hetten
 ire roß zeruck kerten vnd die flucht gaben gen ires herren kastell
 30 wercz, vnd Ronsiglione absasse den toten ritter nam vnd im mit eynem
 scharpffen messer sein bruste öffnet vnd das hercz darauß nam vnd in
 eyn fâlein wickelt vnd eynem knecht czefüren gabe, vnd in allen verpot
 ir keyner bei leib vnd leben so beherczent wäre mit yemant diser sache
 halben icht zereden noch keynerley romor douon machet, vnd wider auf
 35 zû roß saß vnd zû hauß reyt Nun die edel sein fraw wol vernomen het
 wie Guarda Stagno des selben abents komen solt mit in das nachtmal
 zeessen sein mit grosser begire vnnd verlangen wartet sy gar fremde
 daucht sein langes verziehen zû irem mann sprach. Herre wie bekomet

das das Guarda Stagno nicht komet nach dem er euch doch empoten hat. Der [170^a] ritter ir antwurt vnd sprach. Ich hab von im das er nicht e dann bis morgen komenn mag vmb des willen die frawe sich eyn kleyn betrübet. Do nun Ronsiglione zü hauß komen vnd abge-
5 sessen was seinem koch zü im rüffet vnd sprach. Nym hin das hercze von dem wilden schwein vnd mache mir darauß das beste richtlein so du kanst. vnd wenn ich zü tisch gangen bin so schick mir das in eynem silbrin schüssel. Der koch das hercze zü im nam alle sein kunst darczü kert ein güte edle speiß vnd richt zemachen vnd das mit güter
10 edeler spezerey füllet vnd eyn edele richt zeessen darauß machete. Do nun die zeit czeessen komen was, der ritter sich mit der frawen czü tisch seczet vnnd die richte ze essen alle komen waren, aber er als der übel begangen vnd verbracht het seine gedanke betrübten vnnd zeessen vnlustig was, doch dem koch empote im sein neue speiß zeschi-
15 cken, das im palde gebracht ward, aber er sich geen der frawen auf disen abent nicht lustig czeessen beweiset, doch ir sein neüe speiß on maß lobet. Die güte edel frawe die do lustig zeessen was vnd die neü speise güte dauchte sy alle aß, [170^b] vnd douon nicht über beleyb. Des der ritter gar eben warnam das ir die speise geliebet vnnd ge-
20 schmecket hete zü ir sprach. Fraw wie hat euch daz speißlin gefallen, die frawe zü im sprach. Wärlich herre die speise ist güte gewesen vnnd hat mir sere wol gefallen. Also helff mir got sprach der ritter als ware ich on czweifel gelaube das es euch gefallen habe, vnd nympt mich nicht wunder ob euch das tode gefallen hate das euch bei leben
25 ob allen andern dingen gefiele vnnd liebet. Do die frawe dise wort vernam eyn kleine auf ir selbs stünd, doch zü dem herren sprach. Wie meiner ir daz herre ich verstee euer wort nicht. was habt ir mich essen machen. der ritter zü ir sprach Fraw das ir geessen habt für war das ist gewesen herr Wilhalm Guarda Stagno hercze den ir als eyn vnge-
30 treuwe efraw so lieb gehabt habt. darumb mir fürwar gelaubet daz es sein hercz ist das ich im mit meiner hand auß seinem leib reyße. Do die frawe das vernam von dem den sy ob allen mannen lieb het, ob sy leyde peine vnnd schmerzen empfinde ist nicht czesagen noch darnach czefragen das bedencke eyn yegkliche liebhabend [170^c] hercz bei ir
35 selbs vnd mit etlichem schwären seufzen zü irem mann dem ritter sprach. Ir habt nicht gethan als eynem edelen ritter czüsteet czethün sunder als eyn böser verzagter vnnützer ritter thün sol, dann ob ich in vngenöt meines leibs vnnd liebe hab teylhaftig vnd eyn herren gemacht

nicht er sunder ich darumb die pein vnd büß tragen solt, darumb got
 wölle nicht das als auf edele speiß als das hercze des edeln ritters ge-
 wesen ist das ich yeczund empfangen vnnnd genossen hab keyn andere
 speiß hinfür mere von meinem munde empfangen werd, in dem auf von
 5 dem tische stünd vnnnd eyn fenster das hinder ir was on icht anders ge-
 sprochen rückling sich über auß warffe, das fenster was hoch von der
 erden darumb die frawe nicht alleyne starb, sunder alle czestucken
 gieng. Do das der ritter sahe aller erschrack wol daucht er übel ge-
 than het vnnnd sich vor dem landvolck ward besorgen den grafen der
 10 gegent ward fürchten wo im soliche beyde mort czewissen kämen balde
 seine roß schüff sateln bey tag vnnnd nacht auß dem land reyt. Des morgens
 früe alle sache was sich allenthalben ergan[170^d]gen hete yederman ze-
 wissen kam des toten ritters vnnnd der frawen halben, vnnnd das volck von
 herr Wilhalm Guarda Stagno kastell vnd die von der toten frawen kastell
 15 mit grossem leyd weynen vnnnd klagen die zwen tote leib in der kirchen
 der frawen kastel beyde begraben vnd erberlichen als ritterlichen edelen
 personen zů gebürt zů der begrebnuß bestat worden, vnd auff das grab
 in versen geschriben domit eynem yeglichen kunt würde wer darinn be-
 graben wäre, dobei alle vrsach beyder tode bezeychent was.

20 Wie eynes arczte weib eynen iren bûlen vnd liebhaber der do
 twalm getruncken het für tote in eynen kasten auff die gassen leget
 vnd czwen iung wüchrer den kasten mit dem der darinn was stalen
 vnnnd in ir hauß trügen, vnnnd der in dem kasten was nach etlicher
 stund sein selbs empfinden ward vnd von den wüchrern für einen
 25 dieb gefangen vnnnd für den richter gefüret ward, vnnnd des arczte
 meyd für den richter gieng im sagt wie sy den gefangen iungen für
 toten in den kasten gelegt het den die wüchrer dem schreiner
 [171^a] gestolen hetten, also den gefangen von dem tode vnd galgen
 erlediget.

30 Der kûng sein histori zů end bracht hat vnd alleyn Dioneo noch
 zûsagen was der sich nicht saumt bald anhüb vnnnd sprach. Die kläg-
 lichen vnd erbärmklichen trübsal der gesagten histori der liebe halben
 nicht alleyn euch frauen auch mir mein augen vnd gemüt betrübet haben,
 vnnnd mir besunder gefallen gewesen ist das sy zů ende komen sein,
 35 dann fürwar eyn betrübten tage wir vertriben haben Darumb mich got
 bewar solicher kläglichen materi mer nach zegeen vnnnd mir fürgenomen

hab eyn fröliche histori czesagen, die villeicht güte vrsach geben wirt
 den die bis morgen sollen gesaget werden Darumb mein allerliebsten
 frawen ir wissen solt das nit lang vergangen ist in der stat Salerno gar
 eyn weiser köstlicher doctor der ercznei was mit namen genante mey-
 5 ster Mazeo eyn man in seinen letsten tagen vnnd alter der zů eynem
 weib genomen hette eyn schöne iunge edele frawen von seiner stat die
 er mit schönem gewand vnd köstlichen [171^b] kleynet bas dann keyn
 ander fraw der stat gezirt vund formirt hielt. aber die gůt iung fraw
 den merern teyl irer czeit den hůsten het kalt vund erfroren stůnd, als
 10 die do in dez pete des nachtes von meyster Mazeo gar ũbel bedeckt ge-
 halten was, czů gleicher weise als her Riciardo von Pisa der die seinen die
 heyligen tag vnnd ire gepot leret, also auch meister Mazeo thet vnnd ir ze-
 versten gab nun eynmal mit der frawen der letsten liebe zē spilen eyn so-
 lichts der leib in vil manchen tagen nicht ũberwinden mōcht solche lere vnd
 15 tādīng er ir vorprediget darumb die gůt schön fraw bei im ũbel czemūt
 stůnde. Doch als die weis vnd von edelm gemūt was, vnd domit sy ires
 meysters mūe sparen mōchte, ir fůrname sich auff die strassen zewerffen
 vnd ir vmb eynen der ir gefiel sehen wōlt. vnnd do sy vil manchen ge-
 sehen het eyner ir lieben vnnd gefallen ward czů dem sy alle ire hoff-
 20 nunge keret. Des der iunge war name dōuon grosses gefallen hete, vnd
 gleich als sy auch er alle seine synn liebe vnd gedanck zů ir keret, der
 was mit namen genannt Rugiere da Ieroli von gůtem vund edlem ge-
 schlechte geboren, aber [171^c] von bösem vnzűchtigem leben stand
 vnnd wesen, in solcher maße das er nyemant hulde het, noch freund der
 25 in sehen wōlt, alle bűbrei die in der stat Salerno verbracht ward er al-
 weg der erst darinn verdachte ward, do fraget die gůt fraw nit nach,
 dann sy in'ander sach halben huldet vnnd lieb hette vnd mit eyner irer
 meyde soliche ordnung gabe das sy den iungen zů ir bracht, vnd mit
 beyder lust vnd freuden eynander beschlieffen vnnd nach solchem lust
 30 die fraw in anhűb czűchtiglichen seines bösen leben zestrafen vnd das
 schelten vnnd in freuntlichen bat vmb iren willen er sich hinfűr solicher
 schántlicher sach ũberheben solt so wōlt sy im in allen sachen nach irem
 verműgen gehilfflich sein, vnnd do mit er materi het wol zethűn sy in
 zů zeiten mit gelt begabt vnd auch anderm gehilfflich was, also lang zeit
 35 miteynander in verborgner freud lebten Nun sich begab das dem arczte
 vnder henden geben ward ein krancker mit eynem verdorben beyn des
 gebrechen der meyster bald vernomen hete, czů des krancken freund
 sprach. Wo man dem krancken nicht ein faul beyn außnām das im in

dem tiech verwachsen ware [171^d] so würde er das ganz beyne verlieren vnnnd darzû seines leben in zweifel stünd, vnnnd wo man im das faul beyn auß dem tiech nâm er on zweifel genâß vnd seiner kranckheyt ledig würd, doch in nicht anders dann für ein toten menschen zeheylen
 5 nâm. Solches des krancken freünde eyns wurden vnd im den krancken als eyn toten menschen in die hend gaben Zehand im gedacht der kranck solcher pein vnd marter in dem schneiden nicht erleiden möcht darumb er sich nicht erczneyen ließ es wär dann sach daz er im twalm wasser zetrincken gäbe domit er entschlief vnd in solichem schlaf er in ercz-
 10 neyen möchte vnd das faul beyn außnâmen. zehauß gieng sein getrancke vnnnd wasser czû bereyt vnnnd sein composicion machte vnd vmb vesper zeit den krancken meynet zeerczneyen vnd schlafen machen also lang bis er mit im sein arbeyte verbracht hette. Do nun seine erczneye vnnnd wasser bereyt was, er das in sein kamern in ein fenster an die
 15 küle seczet niemant douon saget was wasser daz wære. In dem vesper czeit kame vnd er czû dem krancken czegeen meynet, In dem sich begabe das im potschaft kam [172^a] von etlichen seinen freunden von Malfi die in baten das er sich nicht hindern ließ vnd in irem dienst zû in kâm, dann es wære vnder in eyn grosse vneyngkeyt gewesen douon
 20 ir vil gewundt vnd auf den tod geschlagen wärn. Do daz der arczte vernam seinen gûten freunden zû dinst seinen krancken mit dem beyn auff disen abent steen ließ auf eyn schifflein saß gen Malfi für daz dez arczte fraw wol vernam das er auf dieselben nacht nit wider zû hauß komen möcht vnnnd ir heymlich schuff den iungen Rugiere zû ir komen, vnd in
 25 in ir kamern verspert bis etliche person in dem hauß wären schlafen gangen, vnd die weile Rugiere in der kamern was der frawen wartet, ob er sich des tages den pallen zeschlagen czesere erwermet hete, oder ob er ze versalczen geessen hette im eyn grosser vnmässiger durst kam vnnnd in dem fenster des arczte wasser ersehen het vnnnd meynet das
 30 brunnen wasser wär, vnd das an seinen mund seczet alles außtranck, nicht lang darnach vergieng im eyn groß schlaf czûgieng in dem er schwärlich entschlief, vnnnd die fraw so sy beldest mochte czû im in die kamern kam den sy [172^b] schlafend als ir vernomen habend fand, dem sy mit senfter stimm ruffet vnnnd czûsprach das er aufstünd vnd czû pete
 35 gieng, aber ir keyn antwurte gabe noch icht verrüret, des sich die fraw eyn kleyn betrûben ward mit mer stercke in stossen vnnnd rûren thet in zorn zû im sprach. Ste auf du fauler schlafer do du ye schlaffen woltest wär nicht not gewesen her czû mir czekomen mir wär lieber gewesen du

wärest heyne in dein hauße schlafen gangen, die fraw in in solchem irem vnmüt vnd zorn so züchtigklich stieße das er ab dem kasten darauf er entschlafen was zü der erden fiel eynem andern toten menschen gleiche on alle synn vnd vernunft vnnnd do er in solchem herten fallen
 5 nicht entwachte sy erschrack in wolt aufheben vnd auf das pete legen. aber ir mü vmbunst was dann alle sein geyst im verloren vnnnd verschwunden warn vnd keyn lebendigen geyste bei im vername, dann der esel gar wol an den rigel gebunden was, darumb sy in on czweifel tod meynet, grosse forcht vnd angst ir zü sten ward, doch noch durch man-
 10 cherley wege versucht ob sy in erwecken möcht aber ir nicht anders erscheyn [172^c] dann wie er tod wäre des sy on zweifel gelaubet, vnd wie wol ir man ein arczt was doch darumb sich solicher sach nit verstünd vnd sich sere betrüben ward dann sy den iungen von ganczem herczen lieb hete darumb ob sy betrübete oder bekümert was do ist nit nach ze-
 15 fragen, dann in stille in kläglichen beweynet vnd ir vnsäliges leben got vnd allen heyligen klaget. vnd nach solchem weynen vnd klagen sy zü irem schaden nicht zeschand würd ir gedacht synn czefinden domit sy den toten leibe möcht auß dem hauß bringen, eynes solichen sich in ge-
 20 was sich ergangen hete alles zü versten gab. das die meyd gar eyn fremde sach dauchte den iungen auch anrüren vnd stossen war den sy geleich als ir fraw toten meynet, zü der frawen sprache on czweifel er tod wär. Zehand der frawen riete das man in so man beldest möcht auß dem hauß trüge. Die fraw sprach nun wo möchte wir ir hin tragen
 25 domit wir nicht in seinem tode verdacht würden wann er bis morgen funden wirt das er hie inn bei vns tod seye oder von hie auß sey tod getragen [172^d] worden. Die meyde sprache fraw ich sahe gester abent vor eynes schreiners hauß einen schrein steen das nit ferr von hie ist hat in der schreiner nit weg genomen wär mein syn in dohin zetragen
 30 vnd darein legen, vnd im vor etlich wunden mit eynem messer schlagen vnnnd also in dem schrein ligen lassen, wann er dann darinne funden wirdt man sprechen vnnnd glauben wirt er was üfels begangen hab vnd von etlichem seinem feind sei erstochen vnd in den schrein gelegt worden. der frawen der meyd rat wol gefiel außgenomen im die wunden
 35 zeschlagen, vnnnd sprach das sy in keynen wege weder thûn noch ver-
 hengen möchte vnd die meyd schicket czesehen ob der schrein noch wär do sy in gesehen hete. die meyd gieng vnnnd bald wider kam vnnnd sprach er noch do wär, vnnnd sy die eyn starcke diern was mit der

frawen hilff in auf ir achsseln nam vnnnd die fraw ir vorgieng ob sy
 yemant sähe der sy irren möcht also czû dem schrein kamen vnd den
 iungen der do schlieff den sy tod meynten darein legten vnnnd steen
 liessen wider zû hauß gingen Nun sich begeben hete das in denselben
 5 tagen in eyn hauß [173^a] gegen den schreiner über czwen iung gesellen
 gezogen warn die do gelt vmb wücher liben wer des an sy begert sol-
 chem bösem gewine nachgiengen geitig auf güt vnnnd karg in außgeben.
 Die nun in daz neu hauß mancherley haußgerät notturftig waren vnd
 des tages darvor den schrein vor des schreiners hauß gesehen hetten
 10 miteynander eyns warden belib er des nachtes darvor sy den heyme in
 ir hauß tragen wölten, vnd auff mittenacht darnach kamen vnd on auff-
 getan den schreine namen zû hauß trügen wie wol er sy etwas schwär-
 daucht, doch daz nicht ansahen in baldē wege trügen, vnd im hauß
 nahent czû eyner kamern seczten dar inn ire weiber vnnnd haußgesind
 15 lage vnnnd schlieff, nachdem sy auch czû pete giengen den schreine also
 steen liessen. Nun der iung der in dem schrein lage nach etlicher
 stunde das twalm getranck verdeüt het wider czû im selbs kame vnd
 vmb metten zeit entwachet vnnnd im der schlaf brach die vernunft vnnnd
 synne ire tugent wider empfangen heten, doch das hauß im erschrocken
 20 beleyb nicht alleyn dieselben nachte sunder vil manchen tage im nicht
 richtig waz [173^b] In solchem entwachen seine augen auf thet aber nicht
 sahe als der do in dem finstern schrein versperret lage vmb sich greiffen
 ward, vnd do er nicht fand wol vername in seinem greiffen er in einem
 schreine wär das in eyn fremde sach daucht zû im selbs sprach; waz ist
 25 das wo mage ich nun sein schlaf ich oder wach ich, nun ist mir ye wol
 in gedanck daz ich in meiner lieben frawen kamern komen bin so dun-
 cket mich ich in eynem kasten lig was mag das bedeuten oder was wille
 das sprechen, der arczt ist villeicht nächten wider komen oder meiner
 frawen ist was forecht zûgestanden vnd mich also schlafend hier in den
 30 kasten vor dem arczte verborgen hat, fürwar ich gelaub im sey als ich
 mir gedencke, also er in seinem gedencken vnuerrürt still lag. nun was
 der schrein kleyne vnnnd des ligen also enge in verdriessen vnd wee tûn
 ward vnd sich auf die andern seiten keren wolte das so vnzüchtig thet
 das er mit dem ruck den kasten der vngeleiche stünde an die seiten fiele
 35 das er vnd der kast beyde mit grossem gerümpel zû der erden fielen ein
 solich romore machet das die frawen die do in derselbigen [173^c] ka-
 mern lagen alle entwacheten sere erschracken, doch czû der stund still
 schwigen. In solichem fallen Rugiere auch forcht vnnnd angstē czüstünd

vnnnd des kasten offen empfand, vnd e sich ichte anders begäb er lieber
wolt auß dem kasten sein dann darinn, doch nicht vername wo er ge-
sein mocht, vnd mit still gemächlich in dem hauß hin vnd hersûchen
gienge ob er tür oder stiegen finden möchte domit er auß dem hauß
5 möchte komen. Soliches hin vnnnd her geen die frawen alles vernamen
anhûben zeschreyen wer ist do, Rugiere der frawen stimme nicht er-
kante darumb in nicht antwurt, vmb des willen die frawen den mannen
rûften, aber als die auch spat zû pete gangen waren in starckem schlafe
lagen keynerley vernamen, des die frawen grosse forcht enpfingen vnd
10 anhûben mit hoher stimm czeschreyen, dieb io dieb io dieb io. In soli-
cher maß schryen das nicht alleyn ire mann in dem hauß erwachten,
sunder die gancz nachpaurerschaft zû irem geschrey auffstünd vnnnd czû
lieff, etlich über tür vnnnd tor einstigen, ettlich czû den fenstern ein-
kamen. In solichem romor geschrey vnnnd numer[173^d]dumb der
15 ellende Rugiere on alle schuld schier von synnen komen wäre nicht
weßte wo hin czefliehen, auch des richters knecht zû solchem geschrey
alle gelauffen kamen. Also der arm iunge mit grossem romore gefangen
vnnnd dem richter für eynen offentlichen dieb in die hend gegeben warde,
der in bald an die marter stellet dann er von yederman bös gehalten
20 was. Do er veriahe vnd bekant wie er in der zweyer wûchrer hauß ze-
stelen komen wäre, vmb des willen der richter in on czweifel meynet an
den galgen zehencken. Diser märe des morgens die stat alle vol was
wie Rugiere in der wûchrer hauß für einen dieb wâr gefunden vnd ge-
fangen worden. Ein soliches des arczte frawe mit samt der meyd auch
25 vernam was sich Rugiere ires bûlen halben verlauffen hete den sy on
zweifel tod meynet in dem kasten gelassen heten sich nit verwundern
mocht beyde in czweifel stûnden ob das war wäre oder in getraumet
hete das sy des nachtes getan heten vnd Rugiere vmb das leben in ge-
fäncknuß vernamen, das der frawen neüe pein vnd schmerczen bracht,
30 nit vernâmen mocht wie sy iren dingen [174^a] thûn solt. In dem der
arczte von Malfi zû hauß kam zehand nach seinem wasser fraget vnd
schuff das man im das brächte dann er seinen krancken mit dem bösen
beyne meynet zearczneyen, do warde der angster darinne das wasser
was lâr gefunden, darumb der arczte gar zornig vnnnd langes romore
35 machet czû der frawen sprach, keyn dinge in seinem hauß mit fride
steen noch weren möcht. die fraw die auch iren besondern vnmûte hete
dem arczte in zorns form antwurtet vnnnd czû im sprache. Meister was
würdt ir sprechen wenn was grosses geschehen wâr wenn ir vmb einen

verschütten angster mit wasser so grosses wunder treibt findet man sein
 nicht mer in der welt. Der meyster zů der frawen sprach du meinest
 vnd villeicht gelaubest es sey lauter brunnen wasser gewesen traun neyn
 es was eyn besunder gemacht wasser von grossen künsten czemachen
 5 schlafen, vnnd saget ir alle vrsach warumb er dás wasser gemachet het.
 Do die fraw den meyster vernomen het, ir zehand gedachte Rugiere das
 wasser solte getruncken haben, darumb er sy tode gedēficht hete
 [174^b] vnnd sprach meyster wir wissen nicht von eüerem wasser ze-
 sagen, darumb lasset eüern czoren vnnd macht euch eyn anders. Do
 10 der meyster sahe das es nichte anders gesein mochte im eyn ander
 wasser zů bereyt, vnder solichem die frawe ir meyde gesant hete ze ver-
 nāmen wie es vmb Rugiere stünd was man von im saget, die bald gieng
 vnnd widerumb kam czů der frawen sprach von Rugiere yederman übel
 redt vnnd nach dem ich vernym keiner seiner freünd sich sein vnder-
 15 winden wille im zehelffen vnnd yederman fürware gelaubet der richter
 werde in bis morgen an den galgen hencken, noch mer ich euch sage
 nach dem ich gehöret hab, wie er in der zweyer wüchrer hauß in der
 vergangen nacht sey funden vnd gefangen worden. Nun vernāmet mich
 vnnd mercket gar eben was ich euch sagen will als euch wol wissent ist
 20 wie der schreyner der gegen der wüchrer hauß über steet des der
 schreine ist darein wir Rugiere legten den selben schreiner ich yeczunde
 mit eynem andern reden fand miteynander in grossem krieg waren, von
 eynes schreines wegen, [174^c] vnnd nach dem ich versteen mocht so ist
 der schrein darein wir Rugiere legten des selben vnd nicht des schrei-
 25 ners, vnd das gelt vmb den schrein an den schreiner vordert vnd czů im
 sprach er hette den schrein verkauft. Des antwurt im der schreiner
 vnnd sprach es wär nicht war er het sein nit verkaufft vnnd er wär im
 in der vergangen nacht vor dem hauß gestolen worden. Der ander wider
 sprach, du sagst nit war du hast in den zweyen wüchrern verkauft die
 30 gegen dir mit hauß über siczen als sy mir selbs in der vergangen nacht
 gesaget haben do Rugiere gefangen ward do ich meinen schrein in irem
 hauß sahe Sy liegen in ire hālß sprach der schreiner ich hab in nicht
 verkauft, aber sy sollen die selben sein die mir in genomen vnd gestolen
 haben, gee wir miteynander zů in vnd sehen wo in der schrein kome.
 35 Also beyd miteynander in der wüchrer hauße gangen sein, vnnd ich her
 heym euch das czesagen komen bin, Nun ir wol mercken müget das
 Rugiere in der wüchrer hauß mit dem schrein ist getragen worden do
 man in funden vnnd gefangen hat. aber wie er dar [174^d] nach von

dem tod erstanden ist des bin ich nit weis. Die fraw die do weis vnd fürsichtig was balde vernam wie sich die sach ergangen het. vnd was sy des wassers halbenn von irem meyster vernomen het das der meyd alles zewissen thete, darnach sy freüntlich bat das sy ir wölt gehilfflich
 5 sein ir ere zebalhen vnd Rugiere helffen sein leben retten, als die auf eyn fart beyde thûn mocht Rugiere bei leben vnd die frawen bei ere behalten, die meyd zû der frawen sprache. Fraw ir werdt mich solcher sach vnderrichten vnd mir lere geben was ich dann darnach thûn sol das sol ich willigklichen vnd geren tûn Die frawe thet als die do mit
 10 grosser liebe gebunden was, vund was diser sache halben zethûn was sich schnelle des beraten vnd bedacht het vnd eynes solichen die meyde ordenlich vnderricht vnd weiset, vund do die meyd der frawen lere empfangen het czû irem herrn dem arczte mit weynenden augen gieng czû im sprach. Meyster ich begere an euch genad vnd vergebung eines
 15 übels das ich in eüerm hauß begangen hab. Der meyster sprach, meyd was ist das [175^a]daz du begangen hast. Die meyde mit grösserm weynen sprach. Meyster als euch wol wissend ist wie der iung Rugiere Daerli auff den tod gefangen ist dem ich liebet vnd gefiele, vnd grosser forcht halben sein lieber büle werden müßt, vnd do er nächten vernam
 20 das ir nicht zû hauß wart mir so vil angste thet das ich in herein in mein kamern füret mit mir zeschlafen in dem im eyn grosser durst kam vnd ich weßt nicht zû der zeit wo hin vmb wasser zegeen dann ich mich vor den die in dem sal waren besorget vnd eüer angster in dem fenster mit dem wasser mir in gedanck kam, den ich nicht lang was dar vor gesehen het vmb den ich bald lieff, vund im das zetrincken gab vnd den
 25 angster wider seczet do ich in genomen het, darumb als ich vernym ir in dem hauß eyn groß romor gemacht habet, vund fürware sprich ich groß übel vnd vnrecht getan hab; aber wer ist der mensch der zû zeiten nit übel vnd vnrecht thû, doch ist es mir von herczen leyd das ich es
 30 getan hab nicht alleyne vmb eüers wassers willen, sunder das übel das sich noch begeben mage, als vrsach mein Rugiere vmb [175^b] sein leben kome, darumb ich euch freüntlich bitt ir mir verzeihet vnd dise sünd vergebet do bei mir eüer vrlaub vergünnet das ich geen müge Rugiere czehelffen vnd ob ich in bei leben behalten möcht. Do der arczte die
 35 meyd vernam wie wol er in grossem zoren was doch ir schimpfflich antwort vnd sprach. Du hast dir selber deiner sünde büß geben dann wo du auff dise nacht meynst eynen frischenn knaben in deinen armen zehaben der dir den pelcz solt gesträlet haben so hast du einen schlaftruncken

esel geritten, darumb gee nun hin vnnd sůch sein heyle nach deinem vermügen vnd hinfür wiß dich zehüten füre mir nicht mer truncken leut in mein hauß anders ich würde mit dir gen holcze reitten, Die meyd daucht die ersten sach sy genůge wol außgericht het vnnd so sy beldest mocht sich zů der prisaun do Rugiere gefangen lage füget, vnd dem hütter der prisaun so gůte wort geben kund das er ir vergűnnet mit Rugiere czereden, den sy aller verlauffenn sach vnderichtet vnnd im zeversteen gab was er dem richter solt zeantwurte geben, wólte er sich der gefäncknuß [175^c] vnd des todes frey machen, vnd wie sy mocht so vil thet das sy auch für den richter kame, aber e er sy verhören wolte dann eyn frische iunge Grete was vor er ir den pelcz erziehen wolt, vnnd domit sy bas verhoret würd dar ab kein scheue het. vnd do sy von der stampfmülen aufstünd zů dem richter sprach. Herre ir habt hie Rugiere für einen bösen man vnd dieb in euer gefäncknuß ir solt wissen das im vor gott vnd der welt von den zweien wůchrern die in euch für eynen dieb geben haben vnrecht geschicht, vnnd ist alles erlogen was sy euch gesaget haben, vnd anhůb von anfang zů ende dem richter alle sach zewissen thet waz sich irenthalben vnnd Rugiere in der vergangen nacht verlauffen het. zů gleicher weis als sy dem arczte irem herrn gesaget het sy im auch saget, vnd wie sy Rugiere iren lieben bůlen in des arczte hauß mit ir zeschlafen gefürt het, vnd wie sy im on ir wissen an brunnen wasser stat het twalm wasser zetrincken geben, vnnd wie sy in für toten in den schrein getragen hete, auch do bei was sich czwischenn dem schreiner vnd des des der schrein was [175^d] mit worten beydenthalben verlauffen het durch solche wort vnnd gůte zeychen dem richter kunt warde wie Rugiere in der wůchrer hauß mochte komen sein. Do er nun der gůten méyd wort vernomen het im wol gedacht die warheyt diser sach zefinden, vnnd von erst den arczte besant des wassers halben ob das war wär als im die meyd het gesaget vnd ze versteen geben das er bei dem arczte alles an der warheyt fand. Darnach die zwen wůchrer für sich rűffet vnnd den des der schrein was vnd den der den schreine verloren hette. Also nach mancherley red frag vnd außzüge erfand das die zwen wůchrer in der vergangen nacht den schrein gestolen vnd darinn Rugiere in ir hauß getragen heten, zehanden nach Rugiere schicket, den er fraget wo er die vergangen nacht gestolen het. Er dem richter antwurt vnnd sprach Herre wo ich geherbert hab ist mir wärliche vnwissendt, wol mir in gedancke ist das ich in des arczte hauß bei seiner meyde czeschlafen gangen was, do er vrsach grosses turstes wasser

getruncken hete. in dem ich entschlief was sich darnach meinthalben ergangen [176^a] hat do weyß ich euch nit von czesagen, dann do ich auß dem schlaf erwachte mich in eynem schreine in der wüchrer hauß fand. Do der richter die abenttürlichen sach vernam, douon besunder freude
 5 het vnnd die meyd Rugiere vnd den schreiner mit sampt den wüchrern im zů mermalen dise materi sagen machet vnd wol erkant das Rugiere on sein wissen in der wüchrer hauß komen was vnder des in die wüchrer zigen vnschuldig wär vnd die czwen wüchrer vmb des gestolen schrein willen peiniget vnnd büsset in zehen vncz silbers Rugiere freie vnnd
 10 ledig ließ ob der freude het do frage nyemant nach, des selben sein allerliebste fraw die darnach mit im vnd irer getreuen meyde die im het mit dem messer wöllen die wunden schlagen solicher ergangner materi in genüg lachten vnd in ir liebe freud namen vnd von tag zů tagen ir lust sich meret. Also ich auch wölte mir geschähe got geb das es also ge-
 15 schehe Aber nicht in den schrein gelegt werden noch mir wunden geschlagen würden.

Wo die ersten neuen histori die auf disen tag gesaget worden sein, die gemüt vnd hercz [176^b] der edeln frawen betrübet heten so hat doch Dioneo mit seiner letsten histori vnd neuen märe sy alle frölich
 20 lachen machen, sunder do er kam das der richter mit des arczte meyde den stampffczwercke holcz zestossen angericht het, des die frawen sere lachten daß sy irer trübsal aller vergassen. In dem der künig vername sein herrschafte sich enden wolt vnnd die sunn sich gen dem nydergang richtet. Er sich gen den edelen frawen keret sich gen in seines regiment
 25 wo das nit nach allem irem willen geschehen wäre des sich mit diemütigen czüchtigen Worten entschuldiget vnd entredet sunder vmb des willen daz er von also betrübter materi der liebe het sagen machen, darnach auf stünd das kränzlin ab seinem haubt nam vnd das der schönen züchtigen frawen Fiametta auff ir goldfarbes schönes hare seczet zů ir
 30 sprach. Fraw ich secze euch dise kronen auf als die do bas dann iemandt anders den traurigen vergangen heutigen tage mit dem morigen tage vnser traurige vnnd betrübte gemüt kan in fride trost vnnd freud seczen. Die edel iunge fraw der har schön lang vnd von goldfarb [176^c] was, ir angesicht den weissen liligen vnnd roten rosen gelei-
 35 che mit zweyen scharpfen äuglin dem pilegrin falcken geleich in irem haubt erleuchten wol gezirt mit eynem rosenfarben mündlein, die lepsen dem rubein geleich mit lachendem mund sprach. Philostrato dein gab sey mir got willkomen, vnnd domit du bas vernämeest daz es mir liebe vnd

mein gefallen sey so will ich, schaff vnd gebeüt do wiß sich eüer yegk-
lichs nachzerichten auf den morigen tag ze sagen von den der grosse
liebe nach etlicher vergangen trübsale vnd traurigkeyt sich alle zû gûtem
säligem end füget, das der edeln gesellschaft wol gefallen was, darnach
5 irem kuchenmeyster für sich schûf vnnd als die andern czeleben gethan
heten ir^e ordnung gab Darnach alle bis auf das nachtmale in der lustigen
grüne mit spacziren geen die zeit vertriben, nach dem sy daz nachtmal
empfangen heten alle zû pete rûen giengen.

[176^d] Hie hat die viert tagreyß cyn end,

HEBT SICH AN DIE FÜNFTE

vnder dem gewalte vnnnd regiment der künigin Fiameta, do die wirt-
 dig geselschafte sagen wirt von etlichen liebhabern, der liebe nach
 etlicher grossen trübsal vnd traurung sich zû gûtem sâligen end
 5 füget.

[177^a] Nvn die morgenröte vns den newen tage mit der sunnen-
 schein auf erden bracht hat, die kleynen waldvögelein frölich anhuben
 zesingen. In dem die künigin mit irer geselschaft aufgestanden was, den
 dreien iungen mannen zû ir rufft vnd mit senften trittten spacziren den
 10 külen tawe in der grünen eben vnnnd awe überschritte mit mancherley
 schönen sprüchen ir zeit vertriben. In dem die sunne in die höhe ge-
 stigen was, vnnnd ir hiez ward angeen sich alle wider zû hauß fügten, do
 sy von irem sinischalcko mit edelem külem wein vnd confeccion gelabet
 vnd erfrischet worden vnd nach etlichem gesungen liede das male em-
 15 pfingen, nach dem czû tanczen ir ordnung gaben. In dem vndern
 czeite komen was sich in den schönen lustigen garten fügten vnnnd
 nach irer alten gewonheyt als der künigin gefallen was sich radescheib
 vmb den külen brunnen neu histori ze sagen nyder seczten, Die sich gen
 Pamphilo keret mit lachendem mund czû im sprach, vnd im gepot das
 20 er den sâligen neuen historien auff disen heutigen tag den anfang gâb
 [177^b] der sich nicht saumet sunder mit ganzem willen sich darzû
 schicket vnd sprach also.

Wie eyn iung edelman von wenig synnen genant Cymone von
 liebhaben weis vnnnd gûter synne ward, vnnnd die iunckfrawen die er
 25 huldet eynem andern czû eynem weib geben ward die er im auf dem
 mere mit gewalt nam die im zû Rodi wider genomen vnd er ge-
 fangen ward, vnnnd eyn iunger Rodianer genant Lismacho in auß
 dem gefäncknuß nam beyd die hochzeit überfielen do ir lieb frawen
 breüt waren. Lismacho die seinen nam genant Cassandra, vnd Cy-
 30 mon die seinen genant Efigenia mit gewalt wider nam vnd mit bey-
 den frawen in die inseln Creti fluchen vnd für ire eweiber namen,

vnd nach etlicher vergangen zeit beyd mit grossen freüden czü
 hauß von iren freüden gerüffet warden.

[177^c] Mein allerliebste frawen seitmal ich der sein soll der
 diser heutigen glücksäligen tagreyß sol den anfang geben so ist mir in
 5 gedanch vnd mein gemüte eyn neü mär oder histori komen die mir
 liebet cze sagen vund on czweifel auch euch gefallen sol, do durch ir
 nicht alleyne das sälig end der liebe douon wir auf disen tag sagen
 werden versteen solt, sunder ir heylig kraft machte vund schwörung
 vernämen werdt, dann vil manche sein von der liebe zereden nicht
 10 wissen was sy sagen sollen vnd die wider alle natürliche recht schän-
 den vund in selbs schaden thün. Aber nach meinem geduncken vnd
 ich on zweifel gelaub das euer keyne nit sey oder sy trag liebe,
 darumb mein hystori euch gefallen vnd lieben sole, Nach dem wir
 in den alten ciprianischen historiën lesen vnd geschriben finden wie
 15 in der insel Cipri eyn reich edelmane gesessen was mit namen ge-
 nant Aristippo über alle ander herrn des landes in weltlichen sachen
 in eren vnd reichthumb der reichest gewesen wäre, vnd sich der säligest
 hete sprechen mü[177^d]gen wo im das gelücke in eyner eynigen sach
 nicht betrübet het gehalten. Das was daz er vnder etlichen seinen
 20 kinden eynen sun het der von leib vnd anpicke der schönest iunger
 was der in der inseln Cipri zü der zeit was, aber on alle synn vund
 menschlicher vernunft vnd für eynen offen toren gehalten was, das sei-
 nem vater grosse pein vnd betrübung bracht, er was mit seinem taut-
 namen genant Galese, man mochte im weder durch liebe noch vnliebe
 25 mit meysteren, oder on meystren in keynen wege keynerley weder zucht
 noch tugent in sein haubte bringen, als gern der geborenen narren ge-
 wonheyt ist, er het eyn grobe petriscche stimm alles sein gebärt vichisch
 was yedermans gespöt was. vnd vmb mer gespötes willen in Cymon
 nanten das ist als vil gesprochen als eyn vich oder bestia, des verlorne
 30 czeite sein vatter mit grossem leyd trüg vund nun seiner synn halben alle
 seine hoffnungen verloren het das er ymmer mer wider zü synnen käm,
 vmb des willen in auff das dorffe auß der stat czü seinen andern pauren
 schicket bei in zeleben, das Cy[178^a]mone lieb was vund im der pauren
 weis vund gebärde mer liebet dann der herren in der stat, also er in
 35 dem dorffe sich des vihes zehüten als die andern pauren thün sich
 schicket. Nun eyns tages nach mittem tag sich begab das Cymon von
 eynem felde zü dem andern mit eynem grossen trümel über sein ackßeln

gienge in eyn kleynes wäldlin bekame das alles von grünem laub bedeckt was, dann in des meien zeite was do in sein gelück e dann synn hingefüret het, do er in ein grüne wisen bekame die alle mit hohen grünen felbern vmbgeben was, vnd in der an eynem ort eyn schöner frischer
 5 brunn was, bei dem er ein schöne iunckfrawen in dem grünen gras ligen vnd schlafen fand, der schneweisses kleyd also sottile was daz der weiß leibe dar vnder nit daucht bedeckt wäre, vund von der gürttel hinab von eynem weissen decklach verborgen, vnd zû iren füssen ir zwû meyd lagen die zû der iunckfrawen dienste bereyt waren vnd do Cymon diser
 10 schönen iunckfrawen war genomen het, nicht anders dann als er frawen bild nye mer gesehen [178^b] het sich an seinen trämel leynet mit nicht geret noch icht gesprochen mit grossem wunder vnd vleiß die schönen iunckfrawen ansahe, Vnd das grob vnuernünftig hercz darein weder durch lere noch keinerley anweisung noch adeliche tugent komen vund be-
 15 greiffen mocht, auf dise stund in im eyn süß gedanck erwachet der im zewissen thiet wie das die schönest iunckfrawe wäre die lebendiger mensche nie gesehen hete, vnd anhub mit im selbes die schöne ires leibs czebedencken vund auß czeteylen, von erst ir schönes hare lobet vund zû dem golt geleichet, ir stirn nasen vund rosenfarben mund, vnd be-
 20 sunder ire wolgeschickete brüstlein breiset. Nun nämet war wie also gächlinge der vnuernünftig der von der pauren arbeyt aufgestanden ist vnd also der liebe vund schöne eyn gerechter richter vund vrteyler worden ist, vund im besunder wille komen ire schöne augen czesehen die vrsach ires schwären schlaffes noch nicht geöffnet waren, domit er sy hete
 25 sehen mügen, vmb der willen zû mermalen willen hete sy auß irem süssen schlaf [178^c] czewecken, doch besorget vnd czweifel het, darumb das er sy schöner sahe dann er nye mer frawen gesehen het das sy nit eyn göttin wär, vnd zû diser stund so vil synn empfangen hete das er götliche geschäfte vrteylen ward, das die mer eren wirdig wären
 30 dann die weltlichen, das in verhalten machet bis sy selbs auß irem schlaf erwachet vnd wie wol in des zewarten lang daucht doch von vnwissenden empfangen freüden von dann nichte komen mocht. Nach dem nit lang verging, die iunckfraw die mit namen genant was Efigenia e dann keyne ir meyd erwachet das haubt auffhub vnd ir augen sich
 35 öffneten, vund Cymon vor ir an seinem stecken leynen sahe das sy fremde daucht, doch zû im sprach. Cymon gütter knecht wes geest du irre oder was geest du süchen zû derzeit in disem wald. Nun was er vmb seiner torheyte willen von yederman erkannt, vnd der iunckfrawen

irer frag kein antwurt gabe, sunder do er ire augen offen sahe die er
 mit scherpfen der seinen durchsahe, darauß in geen dauchte eyn liebliche
 süßigkeyt die in aller vnuersüchten freude erfüllet, vnnnd [178^d] do die
 iunckfraw sein also scharpfes ernstliches ansehen sahe zweifeln ward
 5 vnnnd besorget das eyn soliches sein sy also ansehen in nicht zů vner-
 lichen sachen reyczet douon ir schande bekommen möchte, vmb des willen
 iren meiden rüfet vnnnd von dem schlaf wecket von dann giengen vnnnd
 sy vrlaub von dem narren nam zů im sprach. Cymon gesegen dich got.
 Er ir bald antwürt vnd sprach. Iunckfrawe ich will mit dir komen,
 10 vnd wie wol ir sein geselschafft forcht vnd verdrossen was, doch dar-
 umb in von ir nicht bringen mocht bis er sy in ires vatters hauß beleyt
 het von dem er heyne in seines vatters hauß ging zů dem sprach.
 Vatter ich will in keynen wege mer in dem dorffe bei deinen pauren
 wonen. Das dem vatter vnd den andern seines hauß die noch seiner
 15 vernunft nicht vernomen heten schwär was, doch in steen liessen das
 wunnder vnnnd die vrsach ze vernemen des das er sich also gächling be-
 raten hete. Nun het weder kunst lere noch anweisung als ir vernom-
 men habt in Cymon gemüte keyn tugenten nye bringen mügen. nun
 von eygem gemüte hercze vnnnd [179^a] willen die stral der liebe in gancz
 20 verwunt vnnnd im sein hercze besessen haben, vrsach der grossen schöne
 Efigenia die im gächling sein grobes gemüte bekeret, des sich der vatter
 mit sampt allen freunden nicht verwundern mocht, dann von erste Cy-
 mon an den vatter begeret er wölt seinen brüdern gleich gekleydet
 sein. Des der vatter von herzen froe vnnnd content was im besunder
 25 freude bracht, do er vernam das der sun wider was czů synnen komen,
 in köstlich den andern iungen herrn gleich kleydet mit den er spacziren
 gieng vnd sein freude het, sich ordenlich zů allem dem das zů dem adel
 gebürte sich adelich schicket, vnd auch was den liebhabern vnnnd grossen
 bülern mit grossem wunder aller der die sein kuntschaft hetten czůge-
 30 höret zethün sich schicket, vnd mer dann von keynem nye mer gesehen
 ward sich bereydet, vnd nicht allein in kurer zeit die schlechten büch-
 staben erlernet sunder der eyn grosser meyster vnder andern philoso-
 phen was, des alles alleyn die lieb die er iunckfrawen Efigenia trüge
 vrsach was, mit alleyn sein grobe gebärd zů adelichen schicket, sunder
 35 auch eyn gro[179^b]sser meyster aller seyten spile ward, auch nit allein
 mit reiten stechen vnd brechen auf dem lande grosses lob het, sunder
 auch in dem mere eyn fürnāme vnd weis beherczent man warde, dann
 kurez abgeredt. vnd domit ich nicht sein yegklich tugent besunder euch

erzelen bedürffe. dann cyns ich euch sag e vier gancze iar vergangen
 waren seiner ersten empfangen liebe, er der hübschest geredest fürsich-
 tigeste iüngling mit mer zucht vnd besunder tugent ward der in der
 insel Cipri was. Nun wol an ir mein allerliebsten frawen was sollen
 5 wir von Cymon sagen, fürware wir nicht anders von im sprechen mügen.
 dann im von oben ab den hymeln in sein edel gemüt dise hoße tugent
 sey gegossen worden die im der neid der vntugent der vnsäligkeyt ey-
 n teyl seines herczen mit starcken festen bünden gebunden vnd verspert
 het, dieselben herten günde von der edeln liebe alle bebrochen vnd auf-
 10 gelöset war den als die do mer stercke het dann der bös egenant neid
 vnd das edel schlafend gemüt erwecket das vnder eyner grausamen fin-
 sternuß verborgen lag domit ir macht vnnnd stercke [179^c] czü klarem
 liecht käme vnnnd beweisen möchte, wo here sy die geyst näme die ir
 vntertan sein. Vnd wie wol Cymon der iüngling lieb het, vnd in etli-
 15 chen sachen als gern der liebhaber gewonheyt ist etwas solcher liebe
 zevil thet vnd gethan het das mancher vatter dem sun nicht vertragen
 het. Aber Aristoppo sein vatter daz alles czü dem besten schäczet, wol
 bedacht das in solche lieb von eynem tiere zü eynem menschen bracht
 hete, darumb im aller sach verhenget vnnnd zü gab in tröstet vnnnd ster-
 20 cket dem also nachzefolgen, vnd Cymon der mit namen genant was Ga-
 lese des nicht verhängen wolt noch Galese wolte genant sein, vnd das
 darumb das er von der edelen iunckfrawen Efigenia bey dem namen
 Cymon genant vnnnd gerüffet warde, vnnnd domit er seiner grossen liebe
 eyn züchtig güt ende geben möcht, zü mermalen versüchen ließ ob
 25 Zipseo also genant der iunckfrawen vatter sy im zü eynem weib geben
 wölt. Aber Zipseo antwurt was, er het sy geben vnnnd versprochen Pi-
 simundo dem iungen edel man von Rodi dem er seiner gelübnuß nicht
 wolt czeruck geen. Vnnnd do [179^d] nun der hochzeit czeit komen was
 Pismondo nach Efigenia gen Cipri kame. Do das der iüngling Cimon ver-
 30 nam sich etwas betrübet im gedacht, vnd zü im selbs sprach. Nun ist
 komen die czeit der iunckfrawen Efigenia zebeweisen ob ich sy liebhab
 oder nicht, des ich ir schuldig vnd verbunden zethün bin, dann sy mich
 von dem vich genomen vnnnd zü lebendigem menschen gemachet hat, vnd
 wo sy mir werden mage mir zweifelt nicht ich mich säliger sprechen
 35 mage dann etlich göt vnd lebendig mann auf erden, vnd für ware mir
 werden muß oder ich sol vmb iren willen sterben, Also gesprochen in
 stille vnnnd geheym etlicher iunger gesellen zü seiner hilff begeret bald
 eyn galle nach aller notturft zü bereyten vnd wapen thet, vnd sich in

das mere machet des schiffs zewarten darauf Efigenia solt gen Rodi mit irem man Pisimondo farenn. Also nach etlichen empfangen fretidenn von Efigenia vatter Pisimondo sich mit seiner geselschafft vnnnd der neuen breüte auff das mere füget gen Rodi heyme czefaren, die spiczen des schiffes gen dem nydergange der sunnen vnnnd [180^a] Rodi wercz richtet. Cymon der des schiffes stätze wachet an dem anderen tage seiner außfart das schiff übereilet czü dem er schreye chala chale oder ir seit alle tode vnnnd müsset in dem mere ertrinckenn. Das schiffe sich nicht saumet balde zü der were stellet ire waffen zü handen namen vnnnd die galle den hacken in das schif warff das zü ir zoch vnd mit gewalt Cymon auf das schiff steyg mit eynem blossen schwert in seiner hand zergeleicherweise als ein hungriger leo alle die darauf waren für nicht achtet vnd mit grossem blüt vergiessen vnder seinen feinden vmbging, nit mynder dann als der leo vnder den schafen tüt. Do das die Rodianer sahen alle ire waffen czü der erden wurffen alle mit eyner stimm sich in gefäncknuß ergaben. Zü den Cymon sprach Ir iunger Rodianer solt wissen das mich weder neid haß oder euch zeberauben mit gewapenter hand auß Cipri euch ze überfallen hat faren machen. sunder das mich darczü bezwungen hat ist mir ein grosse sacht vnd euch eyn kleyne, des ich von euch begeren bin vnd das nun wol mit dem schwert gewonnen hab, auch das mir zever[180^b]leihen euch keyn müte sein sol Das ist iunckfrawe Efigenia die von mir ob allen frawen der welt ist liebgehabt Die mir von irem vatter als eynem freünd vnd von euch mit frid nicht werden mocht, darum ich von hoher liebe bezwungen bin die czenämen wie sy mir werden mag vnd mit gewapenter hande euch überfallen hab, darumb laßt mir sy mit lieb vnd ir fart in dem namen gotes. Die iungen Rodianer mer von gewalt dann von miltikeyt bezwungen im die iunckfrawen weynend gaben. Zü der Cymon sprach. Edle iunckfraw tröst euch vnd seyt wol zemüt ich bin etter Cymon der euch durch also langs liebhaben mer etter wirdig bin dann Pisimondo alleyne durch versprechen ist Nach disen worten sy mit im in sein galle füret keynerlei ander angerürt vnnnd die Rodianer iren weg faren ließ. Wer fröer vnd bas zemüt dann der edel iung Cymon fröer dann man auf erden nye warde als er seines lieblichen raubes was, vnnnd do er nun die traurigen iunckfrawen ires weynenn vnnnd vnmütes getröstet hete, sich mit seinen gesellen beriete, do erkannt warde das nicht so [180^c] schnell wider in Cipren zefarn wäre gen der inseln Cretikerten do ir yegklicher sunder Cymon eyn grossen teyle seiner geboren

freund het, vnd vmb solcher kuntschaft willen mit Efigenia dar faren
meynten, vmb mer freyung vnd sicherung willen, aber das gelück das
mit genüg frölichem sige Cymon die schönen iunckfrawen verlihen het
im nicht beständig was noch ganz mit treuen meinet in wenig stunden
5 alle freude in traurigkeit vnnnd pitter weynen bekeret vnnnd des edeln
iungen überflüssige liebe in eytel trübsale seczet, dann es waren nicht
vier stund gar vergangen do Cymon die Rodianer gelassen het vnnnd die
finster nacht komen was der er mit grössern freuden wartet dann er
keyner anderen nacht ye gewartet hette, in der eyn grausam vngestüme
10 wetter vnd wind auf stünd das den himel mit trübem gewülcken vnd das
mere mit pestilenczischem winde bis in den grund betrübet. in solcher
maß das keyn mensche weder gesehen noch vernämen mochte was czethün
wäre oder wes man sich halten solt, noch die schiff diener auf iren füßen
steen mochten [180^d] keynerley dienst czethün, ob sich Cymon eines
15 solchen klaget do frag nyemant nach dann do erscheyn nicht anders
dann wie sich alle gottheit die im solcher liebe vnd schöner iunckfrawen
nicht vergünnten vnd domit im der tode schwärer wär des er kleyne acht
hete, sich soliches in solichem form an im wolten rechen, Auch seine
gesellen alle betrübt waren, vnnnd ob allen die do vnmütig vnd traurig
20 was das was die edel iunckfrawe die in irem klagen vnd weynen cze-
tausentmalen Cymon vnmässige liebe verflüchet vnnnd sein grosses be-
herczent gemüte vermaledeyet, fürwar gelaubet vnd meynet dises grau-
sames gegenwirtiges wetters nyemant anders vrsach wär dann alleyn sein
grosser übermüte, vnd die gött im nicht vergünnten er sy wider iren
25 willen besiczen solt vnnnd czü eynem weib zehaben vnd zü seinem hoch-
tragenden willen czebrauchen, vmb des willen er ir des vergünneten, do-
mit auch er schäntliches tods vergienge. In solichem traurigen leben die
armen schiffleut stünden, vnnnd der starcke hertte winde sich stäcze
merete, darumb ir hoffnung kleyn was [181^a] nyemandt gewissen mochte
30 wo sy in dem mere wärn hin vnd her von dem wind in dem mere getragen
warden doch zeletste on ir wissen in die insel Rodi bekamen, aber der
nit erkannten allen vleiß theten ir person vnnnd leben czeretten alle abe
an das lande sassen. In dem in das gelück güten beistand thet sy in
eyn kleyne porten der inselen getragen hete, in dem nicht lange darvor
35 auch die Rodianer den Efigenia genomen was komen waren, dobei sy
erkanten das sy in der inselen Rodi waren, Vnnnd do der tage angienge
vnnnd der hymele sein liechte bracht hete sy sich auf eynen armbrust schuß
bei der Rodianer schif ongefär funden des Cymon mit aller geselschafte

sere erschrack grosse sorg hete des das im nichte lange vergieng zů-
 stünd, balde gepote wie man möcht daz man sich auß der porten züg,
 vnd sich e dem gelücke dann den Rodianer befülhe, dann an keynem
 ende erger steen möchten als do, vnnd alle ire stercke brauchten auß
 5 der porten czefaren aber alle müe verloren vnnd vmbsonst waz, dann der
 starcke winde sy allzeit wider zeruck schlüg, darumb vnmüg[181^b]lich
 was hinauß czekomen, vnd nach langer müe vnd arbeyt mit gewalt der
 wind die gallee an das land schlüge, do sy alle von den Rodianern ge-
 fangen erkant vnnd gen Rodi in gefäncknuß gefürt warden, des die
 10 Rodianer alle fro vnd wol czemüt waren. also dem armen edeln lieb-
 haber Cymon mit seiner liebe ergienge, der seine allerliebste Efigenia
 nit lang darvor genomen het sy wider verlore, von der er nit ander freude
 genomen noch empfangen het dann alleyne etlich süß vnnd liebliches
 küssen. also Efigenia in solchem numerdumb von etlichen edlen frawen
 15 von Rodi mit grossen eren vnd wurden enpfangen ward irer trübsal ge-
 fäncknuß vnd müde des meres getröst warde, bei denselben frawen sy
 bis auf den benanten tage der neuen hochzeite beleyb vnnd dem iungen
 Cipriano Cymon mit samt seinem gesellen vmb der redlichenn freihey-
 willen die er des tages darvor do er die Rodianer bestreytt mit in be-
 20 gangen het vmb der gůten gesellschaft willen die er in beweiset hete im
 vnd allen seinen gesellen daz leben gaben in keynen wege, iren tod
 haben wolten das in [181^c] der neue breutigam Pismondo in alle wege
 sůchet czenämen Vnd do das nicht gesein mocht Cymon in ewige gefänck-
 nuß pannet, darumb wol cze gelauben ist er vnnd seine gesellen in grossen
 25 angsten leyde peine vnd schmerczen sein mochten sich aller hoffnunge
 ewig verwegen heten. Nach dem Pismondo so er beldest mochte sein
 hochzeit machet. In solchem iamer leyd vnnd klagen der armen gefangen
 daz gelück sich wider zů in keret reue vnnd leyde irenthalben enpfienge
 neue vrsach zůgab vnnd verhenget ires heyles. Es het Pasmondo eynen
 30 brůder iunger an dem alter dann er was, aber nicht iunger an vernunfte
 vnnd synnen mit namen genant Hormisda, dem man gůt zeite was eyn
 edele iunckfrawen von der statt genant Cassandra solt zů eynem weib
 geben haben. Dieselbigen iunckfrawen eyn edel man von der stat búlet vnd
 huldet genant Lismacho sy von ganczem herczen lieb het, vnd auch villeicht
 35 iren willen czů dem seinen gehabt hete. Nun Pasmondo sein hochzeit vnd
 freude zů bereyt wol gedacht die czwů freude mit eyner speise man
 außrichten möchte das [181^d] an Hormisda vnnd Cassandra freunde an-
 trůg, darzů sy willig vnd bereyt waren seitmal er Efigenia fůret das

Hormisda Cassandra auch fñret. Do das Lismacho vername betrñbet in den tode grosses leyde vnd ùbelgefallen daran hette, dann er sich aller hoffnunge zñ ir vnd freude enfremdet sahe, dann in aller meynung was Hormisda ir nicht nñmen solt vnd er sy selbs zñ der götlichen e
 5 haben wñlt, doch als ein weiser iunger sein trñbsal mit gedult in seinem herczen verborgen trñg, vnd mit im selbs bedencken ward wie er das vndersteen vnd geirren mñcht domit solche freud zerstñret wñrd, aber keynen wege nicht vernam dann allein gewalt czebrauchen vnd das cze-
 10 thñn im eyn geringe sach was vmb des amptes willen das er zñ der zeit het, dann er was der stñttrichter, dochdas czethñn in mer vnerlich daucht dann erlich vmb des amptes willen, vnd nach langem bedencken vnd fñrnñmen die er der liebe den weg gab, er thñt recht oder vnrecht im gancz fñrname Cassandra mit gewalt czenñmen anhñb czebedencken das zethñn was geselschafft dar czñ im [182^a] fñglich wñr was weg vnd
 15 ordnung er halten solt. In solichem seinem bedencken im Cymon den er mit seiner geselschaft in gefñncknuß het in gedanck kam wie er zñ seinen sachen nicht besser noch getreuer geselschaft gehaben mñcht dann Cymon vnd in desselben nachtes auß der gefñncknuß in sein kamern komen thet zñ im also sprach Cymon zñ geleicher weise als die gött gñt
 20 vnnd milt geber sein den menschen, also sy auch der versñcher sein irer tugent, vnnd dieselben die sy stñt vnnd fest finden in allen iren sachen, dieselben sy redlicher vnnd hñher gab wirdig machen. die haben auch dich vnnd dein tugent mit mere exsperiencz versñchen wñllen das in deines vatters hause den ich eynen reichen herrn erkenne hat nicht gesein mñgen,
 25 vnnd dich nach dem ich vernym vñn erst mit iren brennenden fackeln der liebe von eynem vnuernñnftigen tier czñ eynem fñrsichtigen menschen bracht haben, Darnach mit schwñrem vnglñck yeczund gegenwirtig in gefñncknuß gethan haben, vnnd das alles allein getan haben dich ze versñchen vnd ob dein gemñte in gedult bestñndig sey oder ob es sich nach dem vnd
 30 [182^b] du nicht lange ist frñlich warest deines gewonnen raubes dich betrñbt haben, bistu nun derselbig der du gewesen bist keyn frñlicher ding dir von in nye mer verlihen noch gegeben ward als sy dir yeczund zeschieden vnd bereyt haben, vnnd domit du deinen verloren trost vnnd stercke wider enpfahest vnd von neuem dein hercze in fride seczest, ich dich vnder-
 35 richten wille wie Pasmondo deines schaden so grosses gefallen het vnd eyn fleissiger procurator deines tods gewesen ist, der yeczund mit grosser eile die hochzeit mit deiner Efigenia zñ bereyt vnd mit deinem raub sein freude dir ze leyd haben meynt, den dir eyn frñlich gelñck beschert vnd

geben het vnd den dir so gächling widernam das dir on czweifel sol wee
 thun hast du anders liebe als ich meyn vnd das bei mir selbs bedencke
 vnd erkenn dann mir nit mynder als dir auf eynen tage solches vnrecht
 zugestanden ist, dann der iung Hormisda Pasimundo brüder sich schicket
 5 mit meiner lieben Cassandra czethun die ich ob allenn frawen liebhab
 als Pasimundo dir mit Efigenia gethan hate, vnnnd dem widersteen vnnnd
 in eyn soliche freude in [182^c] betrübung zesecken ich keynen weg sihe
 noch bedencken kan dann alleyn die tugent vnser beyder gemüte vnnnd
 stercke vnser hend vnnnd waffen die on zweifel vns den wege geben wer-
 10 den czu dem andern raub vnser beyder frawen, wie wol ich gelaub du
 verczweifelt habest die deinen ymmer mer czesehen, wol die wider cze-
 haben dir besunder freude brächt, darumb Cymon güter freund domit
 ich meiner angefangen materi nachfolgen müge, die gotheyt mich des
 weges vnderrichte vnd des weis gemacht hat, darumb bedencke dich
 15 gar eben dann gott hat dir dein ~~gott~~ glück auff dise stund zu gesant. Solche
 wort vnd red Cymon sein verlorne hoffnung eyn kleyn wider brachten
 mit kurezen worten zu Lismacho sprach. Edler freund Lismacho zu
 disen sachen du nicht sterckern noch festern getreuern freund vnd ge-
 sellen dann mich gehalten macht seitmal mir volgen sol als du gespro-
 20 chen hast. Darumb was czetun sey das laß mich wissen solt du sehen
 ob ich deinem vnd meinem willen sol eyn genügen thun. Lismacho
 sprach von heut über drei tage beyde neue breüt von erste zu iren
 mannen geen werden, [182^d] do du mit deinen gesellen vnd gewapenter
 hande vnnnd ich mit ettlichen meinen besten freunden so sich tag vnd
 25 nacht scheyden vnnnd ir freud am besten ist vnnnd zu tisch siczen, wir
 sy mit gewapenter hand überfallen wollen vnnnd mit gewalte beyd frawen
 nämen vnd alle die dem widersteen wollen von vnsern henden den tode
 on alle barmherckikeyte enfahrensollen, so hab ich in geheyme mein groß
 schiff zu bereyt sy darinn zefüren vnd nach vnserm willen von dann wo
 30 vnns hin liebet czefüren. Dise ordnung dem edelen gefangen Cymon
 groß gefallen was, vnnnd solcher zeit zewarten wider in gefäncknuß ging
 domit er in keynerlei vermercket würd. Nun der tag solcher zeit komen
 was die hochzeit mit grosser herrlicheyte freude vnnnd schalle zu bereyt
 ward das hauß beyder brüder mit allen iren freunden vol was. Do nun
 35 Lismacho czeite daucht mit Cymon sein ordnung gab vnd ir gesellschafte
 in drey partei teylten, die ersten partei an die porten des meres schickten
 domit in der weg des schiffs nit vertreten würde, doch vor Lismacho die
 ganzen gesellschaft seiner meynung waz zetun war vnderricht [183^a] vnd

mit den czweyen teylen sich in Pasimondo hause auff die hochzeit füget,
 vnd von den czweyen teylen das ein teyle an der porten des hauß liesse
 domit er in dem hause nicht versperte sein möchte, vnnnd mit dem dritten
 teyle vnd Cymon über die stigen des haus auf ginge in den schönen sale,
 5 do die czwu preüte mit vil andern frawen vnd manne zů tische sassen
 do Cymon vnd Lismacho die tische zů der erden wurffen; Iglicher die
 seinen nam vnd iren gesellen gaben In geputen sie palde mit in zů dem
 schiffe eylten; des alle frawe vnd manne erschracken; sunder die czwu
 nette preüt anhuben kleglich ze weynen vnd ir leyt zeklagen Desselben
 10 alle die mit in waren daz gancz hauße vol mit romore vnd geschrey,
 Cymon vnd Lismacho zů iren plossen swerten griffen in den wege über
 die stigen abe weyt machten zů dem hause auß gingen; in dem Pasymondo
 zů einem grossen prügell zů dem rumore in engegen kame; dem Cymon
 an derselben stat daz leben nam im sein haupt enczwey spielt dem Hor-
 15 misda ze hilffe kame vnd als er dem pader Cymon gethan hette im auch
 thet vnd alle die zů sölichem romore ge[183^b]loffen kamen von Lismacho
 vnd Cymon das leben verlurn oder zůrücke geschlagen wurden In dem
 hause vnd vor dem hause alles mit plute verdeckt was; Das mit grossem
 iamer vnd kleglichem weinen liessen Also engē mit irem raupe vnd schō-
 20 nen frawen on alle irrung in das schiffe gingen In dem die porten des
 mers alle vol mit gewapedem volcke geloffen waz den schönen frawen
 meinten ze helfen; aber ir lauffen vnd schreyen vmbüst was. Zů hant
 daz schiffe die segel zoche mit freüden vnd den schönen frawen von
 dann segelten in die insel Creti bekommen do sie von iren gůten freüden
 25 vnd gůnnern lieplichen empfangen worden; do sie peyde Cymon vnd
 Lismacho iglicher die seinen zů der götlichen ee namen grosse freüde
 vnd reiche köstlich hochzeite mit in machten; in Cipri vnd Rodi über
 die czwen manne daz romor grosse waz; Doch nach etlicher vergangen
 zeit die freünde mit einander so vil prauchten das nach etlichem iare
 30 Cymon mit Efigenia in Cipri vnd Lismacho mit Cassandra gen Rodi ge-
 ruffet worden do sie lange zeit in freüden mit einander lebten.

[183^c] Wie iunckfrawe Costanza einen iüngling lieb het genant
 Martho Gomitto, Den sie nach dem ir gesaget ward tode vernam,
 vnd grosses leyden halben in verczagnuß fiele sich alleine in ein
 35 schiffe an rymen vnd segel seczet, vnd von einem gächlingen wint
 in der Morn lant in die stat Susa getragen ward vnd zů Tunici in
 der Banbarey an des küniges hofte in einen grossen hern fande

sich im zû erkennen gab vnd peide mit grossen freüden wider zû hause furn.

Do die künigin Pamphilo nette histori ende vernam; sich gen der iungen frawen Emilia keret ir gepote sie der angefangen materi nach-
 5 folget; Das sie nicht verczoehe schnell anhube vnd sprache. Ein iglich person sol liebe lust vnd freüde haben der dinge do von im troste nuce bekommen mage, sunder in liebe haben; Dann die liebe ee freüde begern ist dann trübsal Darumb nicht mit langem verczichen mit mere meiner freüde von der gegenwürtig materi ze sagen Ich vnser künigin mer ge-
 10 horsam thon wille dann ich dem vergangen künig gethon habe; Darumb ir züchtigen diemütigen edeln frawen [183^d] wissen vnd vernemen sült wie nahent bei Cicilia ein insell gelegen ist die Lipari genant ist In der nicht lang ist Ein schöne iunckfrawe genant Costanza von edelm gûten geslechte geporn; Zû der ein hübscher iüngling mit namen genant
 15 Marcho Gomito in liebe enczündet; des selben gleichen die iunckfrawe zû im grosse liebe gewan, vnd das in masse daz sie deuchte ir nicht wol were wann sie in nicht seche vnd vmb sölcher liebe willen die der iunge zû ir het, sie an iren vater zû einem weybe begeret vnd vmb sie werben liesse Aber der iunckfrawen vater sy im versaget dann er in zû arme
 20 vernam vmb des willen ir im nicht geben wolt. Do daz der iunge edelman vername das im vmb armüt willen sein liebe iunckfrawe versaget waz gegenwürtig aller seiner gûten freünde vnd gûnner; Er zû got vnd allen heiligen schwure nicht mer gen Lipari zû komen er were dann reiche, mit einer wol gewapendenn gallee von dann fure; sich gen der
 25 Barbarei werz hielte zû berauben alle die da minder dann er möchten, In dem im das gelück gût zeit mit vnd gehilfflich waz. hette er sich selbes massen können in seiner [184^a] selickeit vnd sich an dem das er gewonnen hette het benügen lassen dann in kurczter zeit genug reich mit seinen gesellen worden was; Aber mer dann reichthum suchen ging
 30 vnd im geschahe als dem der mer begeret dem im not ist dem selben alweg gern e dann einem andern ze rint vnnd mynder wirt, also auch im zû stunde Dann in sölchem leben sich begabe daz etliche schiffe des heydenischen küniges von Tunici Marcho Gomito rauben auf dem mere vnd den schaden den er in thet vernomen hetten eins tages in über eylten
 35 vnd nach langem streyte mit allen seinen gesellen gefangen beleyb Die morn die gallee beraubten vnd in den grunt des meres senckten. Marcho mit seinen gesellen gen Tunici fürten vnnd in ewige gefencknûß ver-

schlussen, solche märe durch mer person gen Lipari Marcho freunden
ze wissen kam, vnd wie er nicht allein gefangen, sunder mit aller ge-
sellschaft in dem mere ertruncken were; Die iunckfrawe die in on masse
liebe hette vnd die seines von Lipari scheyden traurig vnd betrübet waz
5 dann in mit sampt den andern in dem mere ertruncken verno[184^b]me
in lang zeit heymlich weinet vnd klaget; vnd grosses leydes halben sich
mit ir selbes bedacht vnd ir fürnam nit lenger auf erden wöllen leben
Doch ir selbes den tode nicht thon wölte, vnd ir neüe syn erdachte
damit sie ir leben enden möchte, vnd eines nachtes verporgen auß
10 ires vaters hause an das mere ginge do sie nicht ferre von dann pey
andern schiffen ein klein schifflein daz eines armen fischers was ersehen
hette; das aller segel vnd ruder formirt was palde dar ein ginge, vnd
als aller frawen der insel gewonheit waz also sie auch segel vnd ruder
richten kunde pald den segen auff zoche die ruder in das wasser warffe;
15 sich dem wint der da mechtig was befalche wol gedachte der starcke
wint das vngeladen schifflein zů lande in das köfell tragen vnd prechen
würde, do mit ir des beköme des sie suchen ginge vnd sterben müste,
vnd ob sich begeben daz sie gern dar dar von mit dem leben köme das sy
nicht en möchte, sunder mit sampt dem schiffe sterben vnd verderben
20 müste, vnnd zů hant ir haubt in iren mantel wickelt sich kläglich weinent
mittenn in das schifflein [184^c] nider leget, Aber sich alles anders füget
dann ir anslage was. dann derselbig herte wint in kleiner zeit senfft ward;
daz wütent mere sich stillet; doch das in masse das daz arme schifflein von
dem selben winte also getriben vnd getragenn warde daz es sich an dem
25 tage darnach vmb vesperzeit oberhalb Tunici pey zwainczig meilen pei
der stat Susa an dem lande alleine fande. Die edel elende iunckfraw ob sy
in dem mere oder an dem lande were ir vnwissent was dann ir selbes
nicht enpfande; als die da von dem ligen ir haubt nye erhaben hette
noch das zů erheben meinete. Nun in dem das elende schifflein zů lande
30 stiesse zů seinem gelücke an demselben ende Ein arme frawe die die
necze oder fische garn iren fischern wusche daz schifflein ersache; das
sie gar fremde nam das es mit also vollem segel zů lande gestossen hette
Ir gedacht villeicht ein fischer warcken were, vnd die fischer darinne
entslaffen weren, darzů ginge vnd nyemant anders nach langem rüffen
35 darinne sache dann ein einige person sie sechen dauchte; als die da in
irem herten schlaffe lage, der fischer frawen zů mer malen laut schrey
vnd rüffet vnd [184^d] in güter weyl nicht antwort hette. Doch nach
langem rüffen die iunckfrawe ir enpfinden warde ir schweres haubt auf-

hüb an dem die fischerin wol erkante das es ein kristen mensch was mit
 ir lateinisch oder welsch anhüb ze reden sy fraget wie sich das begeben
 het, daz sie also gar alleine mit dem kleinen schifflein an das end komen
 were. Die edel iunckfrawe die nicht enweste wo sie was; der gūten
 5 frawen rede vernam besorget der wint sie villeicht wider in die insel
 Lipari getragen hette pald auf ire füsse stunde vmb sache aber der gegent
 des landes nicht erkante; die gūten frawen fraget wo sy doch were; Des
 ir arme frawe antwort vnd sprach mein liebe tochter du pist hie nahent
 pei der stat Susa in der Morn landt. Do das die iunckfrawe vernam on
 10 masse betrübet das ir got den tode nicht gesant hette; Dann irer iunck-
 frewlichen ere besorget nicht bedencken mocht wie sie iren dingen thon
 solte betrübet in den tode, sich nider an das lant neben das schifflein
 sezet kleglich ir leyte an hüb zeweinen. Do die gūte alte frawe ir
 grosses hertes weinen sache ir zū herczen ging vnd erparmet Die iunck-
 15 fraw [185^a] pate das sie mit ir in ir heußlein ginge vnd ir so vil vor
 saget daz sie ir alle vrsache ires leydes ze wissen thet vnd ir das saget.
 Die gūt frawe sie fastend vnd vngessen vernam ir ein wenig proet das
 sy het vnd fische zū essen gabe, dar zū ein wasser vnd trincken sie
 freuntlichen pate daz sie ir arme speyse vergūt neme, vnd esse; Die
 20 iunckfrawe die gūten frawen fraget wer sie were; daz sie die welschen
 zungen also gūt redet die sprach; Liebe tochter ich pin von Trapani
 vnd heyse mit namen Carapresa vnd diene hie etlichen fischern die sein
 Kristenn, Do die iunckfrawe den namen Carapressa nennen höret wie
 wol sie traurig vnd betrübet was; auch selbes nicht vername was vrsache
 25 sie darzū züge daz ir sölche gedancken züstünden on czweyfel gedachte
 das ir ein gūt zeichen vnd augurio sein sölte, den namen Carapressa
 nennen hören, grosse hoffnung gewan; doch nicht enweste wes sie hoffet
 vnd ire vorige begire vnd herten willen des todes ze warten von ir leget,
 vnd die gūten frauwen freuntlich pate das sy sich ir vmb gotz willen liesse
 30 befolhen sein, vnd irer ellenden iugent erparmung het [185^b] Ir hülffe
 vnnnd riete wes sie sich halten sölte da mit ir nit schande irer ern halben
 zū stünde Carapresa die armen iunckfrawe in gūtem züchtigenn leben
 vername sie alleine in irem heußlein liesse ire fische necze palde auf-
 hūbe wider zū ir kame sie in iren mantel wickelt vnd in die stat füret
 35 zū ir sprach Gostancze liebe tochter ich will dich gar zū einer gūten
 heidenischen frawen füren der ich zū zeiten etliche dienst thue die ist
 ein parmherczige alte frawe, Der ich dich vmb gotz willen nach allem
 meinem vermügen befelhen will, vnd mir czweyfelt nicht dir sol vil gūtz

von ir geschehen, vnd dich gern mir ze liebe als ir tochter haltenn vnd du dich mit allen deinen kraften solt fleyssen ir zů dienen vnd iren willen ze thon da nit du ir genad vnd hulde erberben mügest; Also lange pis dir got pesser gelücke zůschickte, vnd wie die gůt frawe zů ir
5 sprache also auch tet Do Carapresa mit sampt der iunckfrawen in die stat zů der erbern iren frawen kame die pey iren leczten tagen waz, sie die iunckfrawen ansache vnd die klehlichen weynent sache nich gelassen mocht die mütikeit hálben mit ir wey[185^c]nen muste sie lieplich empfinde vnd an ir pleiches angesichte kúset pey der hende name in das
10 hause fúret do sie mit etlichen andern zúchtigen frawen on alle mannes pilde wonet; Dieselben iren frawenn gar mancherley arbeyt vonn iren henden machten als mit seiden náen, gulden portenn wúrecken des selben geleichén von palm vnd leder gar mancherley abenteúer machen kunden, Des iunckfrawe Costancza in wenig tagen vil begreyfe vnd lernet, mit
15 den sy also stunde vnd mit grossem gefallen aller frawen arbet das sy auch ein gůt teyle der sprach lernet; Also gůt zeit mit disen vngelau-bigen heydenichenn zúchtigen frawe wonet, vnd nun do heym von vater vnd müter verklaget was. Die nicht anders meinten dann sey wer tode. Nun súlt ir wissen das zů disen zeiten ein iunge künge genant Menadab
20 in dem künigreiche Granata regiret; der sprach dem künig von Tunici vmb daz künigreich zů vnd sprach, es gehöret im zů vnd er were der recht erbe der herschaft vnd mit grosser macht vnd gewalt dem künige von Tunici in das lande zoche auß dem künigreiche meinte [185^d] ze treiben. Ein sölches dem iungen edelman Marcho Gomito der in ge-fencknúß lage zů gehöre kam, vnd er als der die heydenischen zungen wol
25 kunde, den künige beschicken thet. Do er vername das er sich wider den künig von Granata zů were seczet, vnd zů einem hüter der gefencknúß sprach? wer es möglich das ich mit vnserm hern dem künig möchte ze reden komen mir czweyfelt nicht mein rate seines krieges halben im
30 nucze vnd frummen pringen sölten. Der hüter dem künig Marwort palde ze wissen thet; do das der künig höret Marcho für sich komen schuffe In fraget was sein rat were, den er im wider seinen feinde geben wölte Dem Marcho antwort vnd sprach; Genediger herre nach dem ich in der zeit do ich eüere lant pauet ich vernam wie ewere kriege vnd streite
35 mer mit dem geschoß der pögen sey dann mit andern waffen; Darumb wo man syn fünde das eüern feinden ir geschoß abe ginge vnd zů rünne vnd die eüern stácz sein genügen hetten, so stünd wol darauf nach meinem geduncken der sige wider eüern fein üer were vnnd sie von euch

[186^a] gesprochen weren. Der kung zů Marcho sprach; On czweyfel wo man sölche weg finden mochte ich mein feinde über winden wölte Marcho dem künig wider antwort vnd sprache genediger künige wo ir wölte so mage es gesein, vnd vernemet wie! Ir wert on alle eüer hantpogen gar vil kleinere sennen oder schnür machen dann gemeiniglich gewonheit ist, vnd die eüern feinde an iren pogen haben; darnach zů sölcher grösse der sennen die pfeyle machen; die selben pfeyle zů keinem andern hantpogen dienen mügen dann zů den eüern, ein sölches muß alles in gehem geschehen, do mit eüere feint auch nicht also teten, vnd auch wege suchten da mit sy eüer geschosse daz in zů geschossen würde mit eüerm schaden prauchen möchten; Darumb alle dinge in stille geschehen müssen, vnd wenne die schützen eüer feinde ir geschosse verschossen haben vnd nach dem das ir in geschossen habt greyffen wern; Das in keinen wege gedienen mag dann ire senne an den pogen zů grosse sein; Darumb in die lenge ir streyten vnd schiessenn nicht geweren mage, daz den eüern schützen nicht geschicht [186^b] dann der feinde geschoß in geleiche als wol diene vnd zů iren pogen füglich ist als ir eygne pfeyle sein; Also die eüern schützen ze schiessen geschosse ein nottorft haben, Wo sein eüer feinde grossen mangel haben. Dem künige der ein weyse man waz also nach kame vnd mit dem den sige behielte vnd seine feind überwant, vmb des willen Marcho pey dem künige in grosse genade vnd reichem stant kam Sölche gescheffte vnd des küniges grosser gewunner sige alle gegen davon wunder sagen worden, Auch der iunckfrawen Gostanza sölche neüe histori zů gehöre kamen vnd wie ir Marcho Gomito noch pey leben were; den sie lange zeyte was verklaget hette, vnd die alte liebe sich verneuet vnd gächling ir das hercze erbeichet, vnd ein prinende flamme in ir von neüem enczündet vnd die tode hoffnung ires herzen in ir wider erquicket, vmb dez willen sie alle sache ires gescheffte der alten iren frawen alles saget vnd ir ze wissenn thet vnd sie freuntlichen pat wo es ir wille vnd rate were vnd ir vrlaub haben möchte so wölte sie gern gen Tunici domit sie auch ire augen dem [186^c] erfüllen möchte das sie mitt den orn gehört hette Eins sölchen sie ir alte erbere frawe tröstet vnd lobet nicht anders dann als sie ir müter gewesen wer; selbes mit ir auf ein schifflein saß gen Tunici fure, do sie mit sampt der iunckfrawen in irer freunde hause mit grossen ern empfangen warde Auch Carapresa mit in gefürt hetten; die selben sie schickten ze vernemen in waz stant Marcho Gomito an des küniges hofte were; den sie lebendig frische vnd gesunt vnd in erber-

lichem stant fande pey dem des die gûten frawen alte vnd iunge besunder freude hettenn, Vnd die alte erber frawe selbes; die sein wolt die Marcho wolte ze wissen thon daz sein liebe Gostanza in Tunici were nicht lange dar nache zû im ginge vnd sprach her Marcho zû mir in mein
5 hauß ist komen ein grosser dein freunt vnd villeicht der gröste den du ye erkantest vund komet von der insel Lipari deiner gegent wo es dein gefallen were gar genötig mit dir ze reden hette, vnd ein sölches dir ze wissen zû thon; ich nyemant hab getrawen wöllen selbes zû dir komen pin her Marx der erbern frawen grossen dancke [186^d] irer müe saget
10 vnd ir sein vrlaub gabe mit dem ir nachuolget vnd in ir hause kam; do inn die edel liebhaberin iunckfraw Gostanza ersache; von überflüssigen freüden schier tod wer sich nicht enthalten mochte mit offen armen in vmfinge lieplich halset vnd küsset vnd vrsache der vergangen trübsal vnd gegenwürtigen freude in gut zeit nicht wort gereden mocht, anhub
15 ze weinen Do Marcho die iunckfrawen sache in ein fremde sache dauchte auf im selbes als ein halbe erschrocken man stund nit weste was er reden sölte; doch nach langem bedencken zû ir sprach O du mein aller liebste Gostanza mage es gesein das ich dich hie sechen sol, pistu noch pey leben Nun ist es lange zeit das ich vonn Lipari märe hette wie du
20 verloreenn vnd tode werest, Also geret mit einem züchtigen halsenn sie weinent lieplich in sein arme schlosse freuntlichen an ir rosenfarbes mündlein küsset Nach dem im die schöne iunckfrawe alles das ir in dem mere zû gestandenn was im saget vnd zû wissen thet, vnd die grosse zucht vnd ere die ir durch die alten erbern frauen vnd durch Carapresa
25 was [187^a] beweist worden; daz im alles saget vnd nach langem reden vnd freüden Marcho von ir ginge zû seinem hern dem künige kam, dem er alle sache; was sein vnd der iunckfrawen halben ergangen hette, daz dem künig für ein groß wunder zeichenn saget. do pey im mer saget wie er sie nach kristenlichem gelauben zû der götlichen ee nemen vnd
30 mit seinem vrlaube als sein elich weibe heym füren wölte, waz Marcho dem künige gesaget hett in ein grosses wunder name vnd ein fremde sache daucht das die iunckfrawe in sölcher form also einen langen wege über mere hette komen mügen in wider alle natürliche recht sein dauchte vnd die iunckfrawen für sich komen schuf von der er ander wunder ver
35 name dann er von Marcho gethon het, zû ir sprach schöne; iunckfrawe ir habt vor gote vnd der welt Marcho Gomito mit recht für eüern mane gewonnen. Nach disen wortenn im palde komen thet schöne reiche köstliche kleyder vund kleydet die iunckfrawen vnd Marcho frölich begabet

peyden ein freuntlich vrlaub gabe zû thon vnd ze lassen waz ir wille were vnd Marcho der erbern [187^b] frawen do pey Gostanza gewonet het grosse zucht vnnnd ere peweyset sie begabet vnd grossen danck saget der liebe vnd freuntschaft die sie iunckfrawen Gostanza gethon hette, sie
 5 got befalche vnd ir sein vrlabe geb; die mit zâchern irer augen von iunckfrawen Gostanza vnd im schiede. Nicht lange darnach mit des kûniges vrlaub Marcho auf ein wol gewapent schiffe sasse vnd mit seiner aller liebsten Gostanza heym gen Lipari fure; die armen fischerin Carapresa mit in fûrten; Da er mit grossen wirdigen eren von den seinen
 10 empfangen warde; Die freude also groß was das ich es nit gesagen möchte, das ein iglich diemütig hercz pey im selbes bedencke; Do nam erste Marcho die edeln schönen iunckfrawen zû der götlichen Ee mit köstlicher reicher hochzeit sein erbe pesaß vnd die iunckfrawen von erste beschlieffe, die ersten plumen der liebe abprache; Darnach lange zeyte
 15 in fride lust vnd freûden irer liebe ein genügen theten ir leben in grossen freûden mit ein ander piß an ir ende fûrten.

[187^c] Wie ein iunger Römer genant Petro Bochamaza mit einer iunckfrawen die er lieb hette, von Rome floche vnd in einem walde von etlichen strassen raubern gefangen warde Die iunckfrawe in den
 20 wald floche auß dem zû einem Castell kame, vnd Petro den raubern auch entginge vnd zû demselben castel do die iunckfraw was beköme do er sie zû einem weybe nam mit grossen freûden wider heym gen Rom kome.

In der wirdigen gesellschaft nyemant was oder er frawen Emilia
 25 histori oder netie fabell nicht lobet, vnd do die kûnigin des ende vernam, sich palde gen frawen Elisa keret ir fürpas ze sagen gepoete; Die mit grosser begirde ir gehorsam was vnd sprach; Ir lieben frawen vnd auch ir iunge manne Mir ist zû gefallenn ein arge nacht czweyer liebe als ir durch mein rede wol vernemen wert; Doch nach solchem vnglückseligem leben nit lange verginge in vil gûter seliger tage iare vnd nacht
 30 zû stunde in der stat Rom die etwan aller stete haubt was; nun der [187^d] zagel ist; Nit lange zeit vergangen ist, Ein iunger Römer was mit namen genant Peter Bochamacz vnder den Römern von genug erbern geslechte; der zû einem schönen iunckfrawen genant Angolella
 35 grosse liebe gewan; die waz eines andern Römer tochter genant Saulo Plebeo sere wert vnd in hohen wurden von alleyn Römern gehalten was.

nun vmb der grossen vnnessigen liebe willen die Peter zů der iunck-
 frawen hette sie an iren vater begeren thet vnd vmb sy werben liesse;
 Des selben gleichen auch die iunckfraw ir nitt minder liebe hette dann
 er sie thete; Darumb von überflüssiger liebe bezwungen was sie ze
 5 puelen vnd zů der ee zů begern; Do das seine freud vernomen; Im des
 das er zetun willen hette in keinen wege gestaten noch im das ze geben
 wolten, vnd der iunckfrawen vater sagen liessen des Peter on ir begert
 hette er in keinen wege das thon solte dann ir wille da pey nicht wer,
 wo er aber das thete so wölten sy in für keinen freunde halten vnd do
 10 Peter vernam daz im der weg seines willen genomen waz des es on czwey-
 fel sterbenn meinte vnd hette im Saul die [188^a] tochter geben er hette
 sie allen seinen freunden zů leyde genomen; Doch im für name, wer es
 der iunckfrawen gefallen er auß seinem willen vnd dem iren einen wil-
 len machen wölte; das er durch ein getrewe person zů wegen pracht Iren
 15 gůten willen dem seinen geleihe vernam peyde mit einander worden
 auß Rome ze fliehen; zů dem pald sein ordnung gabe, vnd an einem
 morgen früe on yemant vrlaub auf ze rosse sassen mit einander darvon
 gen dem castell Alangna wercz riten do Peter etliche seine geporne
 freund het zů den er besundern getrauen het; Also peyde mit einander
 20 in sölcher flucht als ir vernomen habt riten; nicht zeit hetten hochzeit
 ze machen dann besorgten man in nachreyten würde; Darumb mit grosser
 eyle den wege für sich namen vund von irer liebe alleine anhuben ze-
 sagen; auch zů zeyten etlich halsen vnd küssen einander verlichen. Nun
 in sölchem irem reyten sich begab als dann der wege dem itungern nicht
 25 wol kunt was, vnd nun pey acht meylen von Rome waren vnd auff die
 rechten hant den wege nemen sölten, sie in auf die lincken namen vnd
 [188^b] nicht volkomenlichen czwue meyle geriten waren das sy des
 wegcs irre gingen vnd verloren hetten, vnd auß einem castel do von sie
 nicht ferre waren gesechen worden, auß dem pey zechen söldner in en-
 30 gegen geloffen kamen. Des die iunckfrawe ee dann er ware name vnd
 zů Petro sprache wir süllen fliehen vnd abe dem wege reyten ee wir von
 den söldnern die vns nahent sein nicht gefangen vnd beraubet weren
 palde ir rosse gen walde kerten vnd so sie pest mochten die flucht gabe;
 das gůte roß der iunckfrawen sporn vernam sy mit gewalte mer dann
 35 ir liebe was in den walt truge, vnd dem iungen aus den augenn kame;
 sy verlose doch so er pest mochte ir nach volget In sölchem seinen hin
 vnd her reyten sie zů suchenn er von den söldner befangen vnd abe dem
 roß ze fusse gesezt warde, vnd von in gefragt warde wer er were. do

sie das vernomen hetten, sich güt zeit mit in selbes berieten; Etlich sprachen der ist vnser feinde freunt wir stülen mit im nicht anders thon dann nackent gen lassen vnd im daz roß nemen; Etlich ander sprachen man sol in an einen paume [188^c] hencken den Orsinern zů leyd Eins
 5 sölchen alle eins waren zů Peter sprachen das er sich palde außzüge; Der pey seinem außzichen sein vngelücke sahe vnd erkante, vnd in dem außzichen sich begabe das on gefere pey dreissig fußknechten oder söldner Peter vnd die in beraubten ersehen hetten in wol gedachten es ire feinde wern mit freyem müß auff sie sprungenn alle schrien alla morte
 10 alla morte sy stülen alle sterben; Den kaume so vil weyle ward Peter zů lassen vnd sich zů der were ze stellen Doch die czeihen den dreysigen nicht widersten möchten; darumb sich schickten die flucht zegeben vnd die dreyssig mit grossem romore in nach folgten Do das Peter ersache sein abgezogen gewante zů im nam wider auf ze rosse sasse, vnd so
 15 er pest mochte sich auch dar von machet den wege reyte den in dauchte die iunckfrawe geriten were die er in dem walde hin vnd here suchen reyte; aber ir weder finden noch vernemen mochte, doch sich aller sorge freye dauchte das er den die in gefangen vnd auch der die in ledig gemacht hetten; also aus den henden komen waz; Aber seiner lieben
 20 iunckfrawen nicht [188^d] enfand darumb betrübter dann man ye warde, anhub kleglichen ze weynen vnd sein leyt zů klagen, in dem wald hier vnd dort stäcz rüffend der iunckfrawen reyte; aber von nyemant antwort vernam stäcz für sich reyte nicht west wohin er bekommen solte auch vor den wilden tieren sein vnd seiner iunckfrawen besorget das sy nicht von
 25 den wolffen vnd peren in der wiltnuß zů rissen würde. Der vnselige betrübt iunge den ganczen tage seiner lieben rüffet in dem walde auf vnd abe weynent reyte, etwan für sich etwan hinder sich, vnd von seinem weynen schreyen klagen, vnnnd auch forchte halben also müde vnd über wunden was daz er nitt mere mocht, vnd im die nacht auf den halse
 30 sache nicht weste wie er seinen dingenn thon solte, Im selbes weder raten noch helfen kund; doch nach langem seinen bedunken in güt dauchte seytmal er der finster nacht halben nitt fürpaß mochte auf einen paumen ze steigen das bedachte vnd auf den paumen gestigen ein dinge was, Ein grosse eichen gesehen het ab saß sein roß dar vnter pante vnd dar auff
 35 steyge do mit er von den wilden tieren sicher were; In dem des [189^a] mon schein kam liecht vnd klare als pey dem tage was Dem iungen kein schlaffe in sein augen nye kame; stäcz besorget er abe von dem paume fiele wo er entschliffe; vnd ob er sölches nicht besorget

hette So hette er doch leydes vnd traurung halben vmb der verloren
seiner lieben iunckfrawen willen nit geschlaffen mügen Also er stätz mit
kleglichem weinen grossen schweren engsten vnd sorgen seinem vnge-
lücke fluchet vnd das vermaledeyet, Also auch als oben gesprochenn ist
5 die elende iunckfrawe sich in irem fliehen verirret hette in der wiltnuß
her vnd dar reyte nit wo ein oder auß vngessen vnd on truncken iczund
mit gen iczund mit sten weynent klagend vnd schryend in dem walde
ellendighen hin vnd here reyte; ir grosses leyt ir selbes klaget; Doch
nach sölichem irem langen klagen vnd weinen sie auf ein kleines übel
10 gepontes weglein kam dem sy pey czweien meilen nicht gar nach ge-
folget hette; do sy von ferren ein kleines heüßlein ersehen hette vnd so
peldest mochte sich darzû füget, dar inne sie einen alten man mit sampte
seiner frawen fand, vnd do der gûte man vnd frawe [189^b] die schönen
iungen also alleine sachen zû ir sprachen. O liebe tochter nu wie pist
15 du so gar alleine an disem wilden ende zû diser zeit der nacht; die
iunckfrawe weinent zû in sprache sie hette ir gesellschafte in dem walde
verloren vnd fraget wie ferre sie von Alangna were; Der gûte man zû
ir sprach liebe tochter das ist nicht der wege gen Alangna ze reyte; Es
sein von hier pey cwelff meylen gen Alangna; Die iunckfrawe sprache wie
20 hab ich nahent heüßer hie pey do ich herbern möchte. Der gûte man
sprach Es ist weder hause noch hoff so nahent do du pey tage hin
reichen möchtest; Die iunckfrawe sprache Ach gûter fromer man!
seyt mal ich pey tage nicht fürpaß mag; wer es dann eüer gefallen
mich durch gotz willen dise nacht pey euch behalten hettet. Der alte
25 man sprach tochter pey vns zû beleyben ist mir liebe; Doch eines ich
dir zû wissen thue, Das auf disem wege pey tage vnd nacht vil söldner
von feinden vnd freunden auf vnd abe reyten vnd gen Darumb dir
pey vns ze beleyben gar besörglich ist vnd vns zû zeiten grosse wider-
drisse thon vnd schaden beweisen vnd wo es sich zû deinem vngelücke
30 [189^c] begeben das söliche schedliche leüte here kömen, dich also iuncke
vnd schöne sechen als du dann pist Es stet darauff dir ee schande vnd
schaden zû stünde dann icht gûtes, wir möchten nicht darob sein noch
dir hilffe geben; Ein söliches wille ich dir vor gesaget haben damit du
dich wo dir anders dann gût gescheh ab vns nicht klagen mügest wo
35 sich ein söliches begeben. Die iunckfrawe sache das er spat vnd nacht
was, wie wol sie des alten mannes wort beswerten doch zû im sprach
Ist es gotz wille vnd gefallen so stulle wir von im auf dise nacht wol
behütt wern; vnd ob sich ein söliches begeben als ir gesprochen habt, so

ist es ye pesser von den menschen vngelücke ze leyden vnd minder übel
gethon dann von den wilden tieren ze rissen sein. Nach disen worten
ab irem rosse sasß in daz arme heußlein ginge, do sie mit de gûten
leûten die armût die sie hetten asse. Darnach mit sampt in also ange-
5 leget auf ir armes petlein slaffen ging Do sie den mern teyle der nacht
mit weynen vnd sweren seuffcen ires aller liebsten iungen vertreybe;
Dann seyenthalben alle ire hoffnung verlorn hette klagen vnd ermparm-
[189^a]iglichen weinens nye auf horet. Nun gen mitternacht wercz sich
ein grosses romore von söldnern anhube das sy palde horet vername
10 auf stunde in einen weyten hoffe ginge; den das klein heußlein hinter
im hette; In dem sy einen grossen schober heûs sache. darein so sy
pest mochte sich verparge ob die söldner in daz heûslein kômen daz
sie von in nitt so palde funden wûrde, vnd sich so palde nicht verpor-
gen hette das hauß vnd hoffe alles voller söldner waz, der iunckfrawen
15 rosß sachen vnd funden daz noch also gesattelt stunde den alten man
fragten? wer pey im zû herber wer vnd wez das rosß were. Der gût
man sprach do er der iunckfrawen nicht sache; hier ist nyemant dann
ich vnd mein haußfraw vnd wem das rosß engangen ist das weyß ich
nicht; dann nechsten abencz es here geloffen kam vnd domit es von
20 den wolffen nit schaden nem; tet ich es her ein. Do sprach der söldner
öbrister so wûrt es gût für vns seytmal es keinen hern het; Also die
söldner in dem hause vnd hoffe hin vnd her luffen ire waffen von im
legten vnd ir einer ongefere den spiesse in den heûsschober stiesse nit
ferre da von waz er die [190^a] verporgen iunckfrawen mit dem spiesse
25 nit durchstochen hett Dann die spicze des spieß ir der lincken præste
so nahent kam das er ir das kleyde ab der præste verschleysse, do von
sie in willen was zeschreien; dann on czwyfel meinete sie wunt were.
Doch daz ende bedacht dar an sie waz, sich forcht halben alle erschüt-
tet; vnd als ein plat von dem winte czittert stille schweyge. Do nun
30 die söldner wol gessen vnd getruncken hetten von danne schieden das
roß mit in fûrtenn Do sie nun einen gûten weg von dann waren; Der
alte man sein gûte frawen fraget wo die iunckfrawe were die gester
abent dar kômen wer ich habe ir nit gesechen syder wir auff gestanden
sein. Die alte fraw sprach sie hette ir auch nit gesechen vnd weste nit
35 wo sie were peyde auß den heußlein sy suchen giengen, vnd do die
iunckfrawe vernam das die söldner wege waren auß dem hewe ginge; Des
der gûte man froe was daz sie den söldnern nicht was zû henden kômen
In dem der tage an ginge der gûte man zû ir sprach liebe tochter seytmal

es tage ist so wöllen wir ist es anders dein gefallen dich zů einem castell
beleyten das ist von hier [190^b] auff eyn meile do du macht von ye-
derman schier sein aber du must ze fůsse gen dann die söldner haben
dein rosse weg gefůrt des die iunckfraw willig was sie den freuntlichen
5 pate das sie mit ir zů dem castell gingen sie in ein gůt genügen darumb
thon wölte, also sich auf den wege machten vnd vmb tercze zeit in das
castell kamen; das selbig castel was eines Orsiners genant Liello von
Campo de Fiore In dem gar ein gůte heilige frawe wonet Als palde sie
die iunckfrawen ansichtig warde zů der sy der gůte man gefůret hette
10 sy erkante vnd mit grossen freiden enpfinge Zů hant vernemen wolte
was vrsache sie da here also precht Das ir die iunge alles saget was
sich ir vnd des iungen ergangen het. Die erber frau die auch Peter
vnd seines vater grosse kuntschaft het vmb der verloffnen sache willen
sich sere betrűbet vnd das ende bedacht do sich daz ergangen het dar-
15 vmb on czweifel meint er tode wer; doch zů der iunckfrawen sprach,
seytmale wir Peter nit gewissen mügen so wůrstu hie pey mir also lang
sten piß ich dich mit gůtem fride mag wider heym gen Rom schicken
[190^c] Nun kere ich an Peter der auff dem eychenpaum beliben ist;
betrűbet vnd trauriger dann man ye warde, in dem ersten schlafe
20 der nacht er wol pey czweinczig wolffen komen sache, vnd als palde
sie das roß ersmeekten alle darumb waren das roß die halffter vnd zaum
ab reisse, sich mit peissen schlauen vnd fiihen der wolfe lange zeit
weret, aber in die lenge nicht geheffen mocht vnd von den wolffen ze-
rissen warde nach dem alle iren wege gingen, vnd Peter der an dem
25 rosse nach seinem gedůncken ein gesellschaft gehabt het vnd ein auf-
halten seiner můte, auf dem paume leydenhalben schier verzaget hette;
besorget er auß disem walde mit dem leben nymere komen möchte.
Nun sich gen dem tage nächen warde, vnd frostes nahent tode was,
vmb sich in die ferre sache vnd auf vierteyle meil ein grosses feier er-
30 sechen het in dem der liechte tag komen was; nicht mit kleiner forcht
ab dem paume steige sich gegen dem gesechen feier richtet do er palde
zů kame vnd etlichen hirtenn fande die da assen vnd nach irem gedůn-
cken in einen gůten můte schuffen die in als einen erfroren zů in namen,
vnd do er mit in [190^d] gessen vnd sich gar wol gewermet hette sie fra-
35 get ob indert nahent hie pey einem castelle wer do er hin gen möcht;
die hirten in vnterrichten, wie drey meyle von dann ein castel eins
edelmanes were genant Lelio di Campofiore; do wonet iczund sein weibe,
Des der die iunge on masse froe was sie pate das sie in zů dem castell

beleyten er wolte in darumb ein güt genügen tün, des ir czwen willig waren, vnd do sie dahin kamen der iung palde etlichen seinen kenswol fande. Do mit er zů hant ordnung gabe die iunckfrawen in dem walde ze suchen; In sölchem die frawe do pey die iunckfraw was vernam das
 5 sich der iung funden het vnd in dem castell was, im pald zů ir rüffet der sich nicht saumet schnelle zů kam, Do pey er sein liebe Angolella fande, do von kein freüde auf erden seiner freüde gleichen mochte, vnd hette er vor der edeln frawen nit schande besorget er het sie gegenwürtig ir gehalset vnd geküsset; Auch der iunckfrawen freüde nicht
 10 minder dann die seine was, do sie in von erste ansichtig warde; dann sich sein ganzlich verwegenn het, die edel frawe in freüntliche enpfinge vnd von herzen gern [191^a] sache was sich seinthalben verlossen het ir genuge wissent was in mit worten hefftiglich straffet das er also wider
 15 ze thon geschicket sache, vnd der iunckfrawen wille do pey was zů ir selbes sprache? wes müe ich mich umb sünste; die dasigen haben ein ander liebe kennen einander vnd sein einander geleich; do pey peyde meines mannes grosse freüde des sie begern ist erlich vnd götlich vnd on czweyfel es got gefallen ist Seytmal er die einen person von
 20 dem galgen vnd die andern vor den wilden tiern vnd der lanczen erlöst hat; sich zů in peyden keret vnd sprache, Ist euch nun des zewillenn eletüte ze sein, so will ich daz ir etier hochzeit hie pey mir machet auf meines mannes Liello speyse; Darnach ich selbes den fride etier freunde suchen vnd machen wil; Wer paß ze müte dann peyde
 25 iunge. Zů hant darnach die edel frawe sy peyde einander zů der götlichen ee gabe in erliche hochzeit machet; Do die czwey liebe die erstem frucht irer süssen liebe enpfunden, vnd der ir freüd hetten, vnd nach etlichen vergen tage die edel frawe mit [191^b] sampt den czweyen neuen eleüten auf ze rosse saß mit in vnd einer wirdigen gesellschaft zů
 30 Rome ein reyte; do sie des iungen freünde sere vnmütig vnd betrübet fande, die sie alle in güten fride sone mit Petro seczet, widerumb ze hause reyte Peter vnd sein liebe Angolella piß in ir alter mit fride liebe vnd freüden lebten.

Wie her Licio von Balbona ritter einen iungen edelman genant
 35 Riciardo pey seiner tochter schlaffent fande; die er zů der ee name vnd mit dem ritter in gütem stant vnd fride beleyh.

Frawe Elisa ir histori verpracht hett geswigen vnd irer gesellschaft
 lob wartend ist In dem die künigin Philostrato ir gepote thet; Er für-
 paß saget; Der lachent anhöbe vnd sprach. Ich pin zů mer malen
 von eüer etlichen gestochen worden. Das ich euch in meinem regiment
 5 grausamen dinge ze sagenn pin also vngenedig gewesen, vnd vrsache
 euch geben habe zů weinen vnd traurig zů sein; darumb ich euch
 pflichtig pin ein sölches wider kern, vnd euch was neües fröliches sagen
 damit ir ze lachen habet; [191^c] vnd das sein wirt von einer neüen
 liebe; Die von nicht anders dann von etlichen seüfzen vnd einer klei-
 10 nen forchte vnd schame gemenget sein wirt dar nach zů frölichem ende
 komen Als ir durch mein kurcze histori vnd neüe fabel vernemen wert;
 Darumb ir mein aller liebsten frawen wissen stült das nicht lange zeit
 vergangen ist; Daz in der gegent Romagna waz ein ritter gesessen ge-
 nant her Licio von Balbona genug erber reich mechtig; do pey ein
 15 züchtig weyse man dem got vnd das gelück in seinen leczten tagen ein
 einige tochter geben het geporn von seiner frawen genant Iacomina die
 selbig sein tochter ob allen iunckfrawen derselben gegent die schönest
 gehalten waz Do pey diemütig züchtig vnd aller frewlicher tugent vol;
 dovon vater vnd müter besunder freüde vnnd sie on masse liebe hetten,
 20 allenn iren fleiß zů ir theten, mit ir meinten grosse freütschaft ze ma-
 chen. Nun was in der stat gar ein hübsch iunge edelman genant Ri-
 czardo der sein wonung mer mit dem ritter het dann mit yemant an-
 ders, vil pey im auß vnd einginge; Er was von dem edeln geslechte
 Brotinori; vor dem sich der ritter [191^d] vnd sein frawe der tochter
 25 halben minder besorgten dann wer er ir leiplich sun gewesen; darumb
 seins auß vnd ein gen; Sölcher vnerlicher sache halben kein acht het-
 ten. Nun in sölchem ab vnd zů gen der iunge edelman des ritters
 tochter hulden vnd im gefallen ward; angesehen ir grosse schöne
 züchtige geperde grosse tugent, vnd auch do pey mans zeitig was; vmb
 30 des willen genczlich in sy in liebe enczündet. doch sölche liebe lang
 zeit verporgen truge; Auch sölcher seiner hulde vnd liebe nitt verginge
 die iunckfrawe ware nam; der sie nicht außlug sunder in nicht minder
 liebe haben ward als er sie hette; Der der iunge auch wargenomen
 het, froe vnd wol zů müte was, vnd zů mermalen willen hette ir sein
 35 liebe ze öffnen. Doch sorge halben das das mere vertruget dann im
 liebe was darumb er schweyg vnd also nach langem sweygen Eines tags
 im zeit nam mit ir ze reden vnd zů ir sprach Katherina also genant du
 mein allerliebstes lieb ich pite dich du wöllest mich dir lassen befolheu

sein vnd mich in liebe haben nicht töten, Die iunckfraw im palde antwort vnd sprach. Nun wölt got daz mich [192^a] nicht mer dann ich dich peinigest vnd tödest; Diser antwort der iunge groß gefallen hette Ein frölich hercz gewan zü ir sprach; Junckfrawe es sol an mir nit geprechen deinen willen ze thon vnd dein gefallen zü vorpringen, vnd zü ir stet der syne zeit vnd wege ze finden vnser peyder leben ze retten die iunckfrawe zü im sprach Riciardo du sichest wol waz großer hute vnd warte man mein thut; Darumb ich nit wol vernemen mag wie du zü mir komen mügest; aber ist dir kein syn vnd wege kunt on mein schande 10 zü mir ze komen daz lasse mich versten, so wil ich in dem alles mein vermügen thon, da mit wir vns ze samen fügen; über das im Riciardo gar mancherley gedachte zü ir sprach; Katherina mein liebes liebe ich kann keinen weg erdencken; es were dann sach das du auf dem gange der außerhalbe deines vater kamern ob dem garten ist slieffest oder des 15 nachtes komen möchtest so wölt ich on czweyfel, wie müesam es mir were zü dir komen; Die iunckfraw zü im sprach? Ist nun sach daz du auff den gange ze komen meinst; so vermäge ich wol so vil zü thon das ich dar auf sol slaffen komen. Er zü ir sprach, des pis on sorge ich wol dar auff [192^b] komen sol, Also geret mit einem verporgen hal- 20 sen vnd küssen von einander schieden, nun an dem nechsten tage darnach das in dem ende des meyen was die iunckfraw sich sere der vergangen nacht klagen warde vrsache grosser übriger hicze vmb des willen nit het slaffen mügen, Die müter zü ir sprach? Nun was hicze mag das sein tochter, nun habe ich so gar keiner hicze in diser nacht 25 enpfunden, Die tochter sprach traun müter er mage war sein; aber ir sölt gar wol bedencken vnd wissen daz die iungen meidlein hicziger dann die alten sein, du sagest ware sprach die müter zü der tochter Aber ich mag dir weder kalt noch warm machen als du villeicht meinst, wir müssen der zeit die ein solches gibt gedult haben Dann villeicht auch die 30 ander nacht dich wirt frischer düncken vnd paß dann heynet slaffen wirst; Das wölle got sprach Katherina, aber es ist ye nit gewonheit gegen den summer sich die nacht erfrischen stülle. Do sprach die müter tochter was deucht dich zetün wer; daz iung meidlein sprach müter wenn es euer vnd meines vater gefallen wer so hett ich mir außerhalbe der 35 kamern auf dem gange ob dem garten ein kleines petlein gemacht; [192^c] vnd also an der frische vnd küle gelegen die nachtigal vnd die andern vögelein des morgens hören singen do es frische ist; vnd ich on czweifel wol slaffen würde. Die müter zü ir sprach; tochter piß gütz

müts vnd tröste dich ich sol es deinem vater sagen vnd des nach seinem rate dir ein pett ze slaffen machen; Die dem ein sölches palde ze wissen thet, vnd er als dann gern alter leüte gewonheit ist wider die frawenn der tochter halben mürmelte zû ir sprach; waz nachtigal oder nicht
5 nachtigal gesange wil sy singen hörn; ich sol sy wol pey der hanne gesange noch mer dann ir liebe sein wirt slaffen machen. Die iunckfraw Katherina ires vates vnwillen vernam nit alleine dieselben nacht vn-
müte halben slaffen mochte, sunder auch weder vater noch müter slaffen liesse sich mer dan ye klagen. do daz die müter sache zû irem man dem
10 ritter sprach; Herr ir habt gar klein liebe vnser tochter, was mag euch das schaden oder waz irt euch das, das sy außeralbe der kamern auf dem gange sleft; Nun hat sie in diser ganczen nacht nye auge zû getun. noch mich mit sampt ir slaffen lassen, vund ir lasset euch so fremde düncken ob sie der nachtigal gesange begeret [192^d] ze hörn als dann
15 gern iunger person gewonhet ist die vögelein hören singen; Der ritter zû der frawen sprach, so wolan mache ir ein pette wo es euch am füglichen ist, vnd vmbhenget das mit einem fürhang vnd lasse sy an der frische slaffen vnd die nachtigal singen hören Do daz iunckfrawe Katherina vernam daz ir vater seinen willen darzû geben het froe waz ir palde
20 ein pett mit dem fürhange zû bereyt die selben nacht ze slaffen vnd die nachtigal zû hören singen; Auch so vil thet daz sie das dem iungen edelman zû wissen thet im daz zeichen zû ir ze komen gabe. Do pey er wol vernam wes er sich halten sölt. do nun die finster nacht komen vnd die iunckfraw auf dem gange ob dem garten slaffen gangen was vnd der
25 ritter das türlein das auß seiner kamern auf den gang ginge zû gespert het vnd slaffen gangen was vnd Riciardo vernam daz sich alle dinge in dem hause gestillet hetten vnd yeder man ze pette was sich in den garten machet, vnd aus dem garten auff an einer leytern mit grosser seiner müte über czwu mauern auf den gange steyge do sein liebe iunckfrawe
30 die sein mit grossen freüden wartet allein lage; die in mit stille in ir schneweysse arme [193^a] enpfinge, vnd nach etlichem freuntlichen halsen vnd küssen mit einander ze pette gingen Die selben ganczen nacht vnge-
slaffen ir freüde vnd luste von einander namen ze manchemal frawe nachtigal singen machten, Die nacht zû derselben zeit kurz was vnd ir
35 freüde gros dem tage vnge-slaffen nahent komen waren, vnnd nach irem gedüncken sy pey einander noch nicht erbarmet wern vrsache schimpfens vnd ires scherzens, auch der kurzzen nacht ich die schulde gib; dann peyde vngedecket pey einander entslieffen, vnd Katherina mit irem

rechten arme Riciardo halse vmbgeben hette, vnd mit der linckenn hant
 in pey dem dinge des ir frawen euch vnder den mannen am meinsten
 schamet ze nennen begriffen het, vnd in sölchem slaffe Der tage on ir
 wissen komen was vnd der ritter auch auf gestanden was vnd die tocht-
 5 ter auf dem gange im zû gedancke kam, daz türlein des ganges geme-
 lich auf thet zû seiner alten frawen sprach lasechen wie die nachtigalle
 vnser tochter heynt hat wol schlaffen machen, vnd in stille zû dem pette
 ginge den fürhange auff hube vnd peyde liebe nackent vnd vngedeckt in
 dem form [193^b] als oben gesprochen ist ligen sache, vnd Riciardo pald
 10 erkant hette; von dann in sein kamern zû der frawen ginge zû ir sprache
 palde ste auf frawe vnd kome ze sechen wie dein tochter also begirig
 gewesen ist das sy die nachtigal hefangen vnd in irer hant hatte. Die
 frawe sprach herre wie mag das gesein komestu palde sprach der ritter
 du solt wunder sechen Die frawe sich mit grosser eyle an leget vnd daz
 15 wunder ze sechen hern Licio auf den gange nach volget zû dem pette
 gingen; den fürhang auf einen ort stiessen Do frawe Iacomina offenbar
 sache in weltlichem form ir tochter die nachtigal gefangen vnd in irer
 lincken hant hette, die sy mit so grosser begire hören ze singen begeret
 het. Die edel fraw die sich von Riciardo betrogen sache wider in gro-
 20 sen zorn fiell willen het ze schreyen vnd im ze fluchen, Aber der ritter
 ir des nicht verhenget zû ir sprache frawe schweyge als lieb ich dir pin
 Dann seytmal sy in gefangen hat so soll er ir sein Riciardo ist edel
 reich vnd iuncke wir mügen von im nitt anders dann gûte freuntschaft
 haben, wille er mit fride vnd dem leben von mir komenn er muß sie
 25 für ware zû der ee nem[193^c]en seytmal er ir die nachtigal in das vo-
 gelhauß gethon hat Des die frawe auch wol zemûte was do sie den
 ritter diser sache halben nicht anders thon sache, vnd der tochter gûte
 nacht bedacht, wie sy wol sôlt gerûet vnd geslaffen haben, auch do
 pey die nachtigal gefangen het, des sy zû gûtem fride vnd content was;
 30 Darumb schweyge vnd nach sölchen Worten nicht lange verginge Riciardo
 entbachte den liechten tage im auf dem halse sache, sere erschracke
 sich seines leben erwegen hette, er Katherina ruffet zû ir sprache, O
 du mein außeweltes liebe nun wie sülle wir thon, die nacht hat vns
 betrogen vnd der liechte tage ist komen vnd hat mich hie funden. Zû
 35 disen Worten der iungen vater für das pette mit einem plossen schwerte
 in der hant kam, den fürhange forder-warffe vnd sprache du solt wol
 thon; Do in Riciardo ansichtig warde in nicht anders daucht dann wie
 im sein hercze in dem leybe preche; siczent sich in dem pette auf richtet

- zû dem ritter sprach; herre ich begere genade durch got, vnd an euch als ein vngetreuer gethon hab vmb euch den tode verschuldet hab tût mit mir was euch liebet; doch al[193^d]weg euch pite mag es gesein ir wöllet mir meines lebens schonen, damit ich niht von euch tode enfabe.
- 5 Der ritter zû Riciardo sprach? Riciardo der lieb vnd freutschaft die ich dir getragen hab ich dir nitt ein sölches vertraut hette. Doch seytmal es zû sölchem komen ist vnd dich dein iugent übergangen hat, vnnnd damit du dich deines leben erfreien mügest vnd mich der verprachten schande in mein tochter wider ergezen mügest, so würstu Katherina
- 10 mein tochter auff dise stunde elichen vnd zû einem weybe nemen vnd geleich als sie auf dise nacht ist alleine dein gewesen, also sol sie die weyle sie lebet dein sein, mit dem du meinen fride vnd heyle deines leben halben solt vnd wo du des nicht willig pist so befille dich vnnnd dein sele got. In disen worten Katherina die nachtigal hette fligen
- 15 lassen, sich bedeckt kleglichen anhuben ze weinen den vater pate daz er Riciardo vergebe auf der andern seyten Riciardo pate das er ires vaters willen thet damit sy lange zeit sölcher nacht mere mit einander haben möchten; aber in des ze piten nit not thet; dann auf einem teyle vmb schame vnd forcht willen der verprachten [194^a] sünde die wider
- 20 zû keren, vnd Sorge dez leben das ze beschützen, vnd auch vrsache grosser prinender liebe, die ewig zû besiczen des das er ob allen dingen der welt am liebsten hette, von allen disen dingen bezwungen was nicht nein ze sprechen, sunder on alles verzichten in sprechen machten er bereyt vnd geschicket were alles ze thon das hern Licio gefallen
- 25 were; Zû hant der ritter von seiner frawen einen gülden ringe name vnd on alle widerrede gegenwürtig der frawen Riciardo sein liebe Katherina mächlet vnd also in dem pette zû der götlichen ee nam. Do das geschehen waz der ritter zû in sprache. Nun liget vnd ruet nach etterem willen, mit dem von in ginge, Im wol gedacht sy slaffens not-
- 30 torfftig weren dann des auf sten, vnd do die czwey alten von danne kommen waren Die iunge von nettem anhuben ze schimpffen einander ze halsen vnd küssen; darnach von nettem ze rüen; Dann pey sechs meyle die selben nacht geritten waren; doch e sy aufstunden noch pey czweyen meilen ritten; Dar nach der ersten tagreyse ende gaben vnd
- 35 aufstunden Riciardo vnd der ritter mit einander ir ordnung gaben [194^b] vnd nach etlichem vergangen tage als dann gewonheit ist vnd zethon gepürt gegenwürtig irer freund Riciardo Katherina herren Licio von Balbōna tochter für sein eliche haußfrawen nam mit grossen freuden

heym in sein hauß füret do er ein reiche herliche hochzeit machet vnd lange zeit mit einander in fride vnd freüde vogelten pey tage vnd nacht nach irem gefallen nachtigal fingen.

Guidotto von Cremona befilhet ein sein tochter einem seinem
 5 günner genant Kasparolo vnd er mit tod ab get vnd stirbet; die selben iunckfrawen ir czwen der ein genant Gianello der anner Mingino zû Foenza vmb sie pulten peyde, vmb iren willen zû kriege vnd streit kamen; In dem gefunden warde das die selbig iunckfrawe des einen genant Gianello swester was vnd dem andern er sie zû einem
 10 weybe vergünnet.

Die frawen alle der nachtigal neüe histori in gar wol gelachtet hetten, vnd wie wol Philostrato seiner rede geschwigen was; doch darumb die frawen ires lachenn noch nicht gestillet waren, in dem die künigin zû Philostrato[194^e] sprach; gester gabestu vns zorn vnd betrübung
 15 heüt hastu vns mit deiner histori freüde geben vnd lachen machen das vnser keine ist die ab dir mere klagen müge, In dem sich gen Neyphile keret ir gepote sy der angefangen materi nachvolget; Die fröliches mütes anhub vnd sprach. Seytmale Philostrato mit seiner histore in Romongna gewesen ist so ist mein meinung auch in die selben
 20 gegent mit meiner histori ze wandern, Dar vmb ich spriche das in der stat Fano czwen Lombarden ir wonung hetten der ein genant Guidotto von Cremona; Der ander Iacomino von Pauia peyde bedagte alte menner die in iren iungen tagen peyde söldner gewesen waren, In sölcher zeit sich begabe daz Guidotto mit tode abe gieng vnd on erben starbe,
 25 keinen andern getreuen freünt hette dann allein Iacomino dem er sein iunges meidlein mit allem dem seinen befalhe; das pey zechen iaren alt sein mocht. Nicht lange dar vor die stat Foencze grossen kriege vnd vnfrid gehabt het, vnd nun sich etwaz gepessert hette vnd alle die krieges halben von der stat gewichen waren den verlichen waz wider ze
 30 komen; Also auch [194^d] Iacomino thet der ander zeyt do sein wonung gehabt hette, vnd do ze wonen im mere gefiele dann anders wo wider dar mit sampt dem iungen meidlein vnd allem dem seinen kome Daz iunge meidlein er nicht anders hielte dann als es sein leyplich tochter were; die pey im in zucht schöne vnd tugent auf wuchse ein
 35 gerade hübsche schöne iunckfrawe dar aus warde, vnd vmb irer grossen schöne willen von etlichen iungen purgern der stat gepuelet waz, sunder

von czweyen erbern iungen in geleichem form gehuldet was, der iunck-
frawen also grosse liebe trügen daz vnder in peydenn grosser neyde
wuchse, der ein waz mit namen genant Gianello der ander Mingino, die
iunckfrawe waz mannes zeitig vnd iglicher hette sy gern zů einem weybe
5 genomen wer es irer freunde gefallen gewesen; aber daz wort ir keiner
von den seinen gehaben mocht; Dar vmb iglicher besunder sein gelücke
suchet. Nun hette Iacomino ein alte meyt vnd einen bedagten knecht
genant Cribello ein genug kürzweylig person mit dem Gionello grosse
kuntschaft name, vnd do in zeit dauchte im alle seine liebe der iunck-
10 frawen halben öffnet vnd in pate das [195^a] er im in diser sache ge-
hilfflich were, damit er seinem willen möchte ein genüge thon; darvmb
er im grosses versprach vnd verhiesse zů dem Cribello sprach; ich
möchte dir nit ander hilffe geben dann wen Iacomino des nachtes auß
essen get dich zů ir do sie ist einlassenn Dann mit dir von deinen we-
15 gen ze reden sie mir nit gestattet noch orn ze hören verlicht vnd du des
mit ir dein nottorft reden macht, Gianello sprach er begeret nit anders
von im Also des eins wurden. nun auf dem andern teyle Mingino nit
schlieff vnd mit der meyde sein kuntschaft name vnd ir so vil thet daz
sie zů mermalen von seinen wegen mit der iunckfrawen redet vnd sie
20 ein klein gen im in liebe enczündet het über daz auch im versprochen
het zů ir ein ze lassen wenn sich begeben daz Iacomino eins abencz auß
ginge nach dem nit lange verging Iacomino mit einem seinen gůten
freunde das nachtmale essen ginge, Das Crinello Gianello palde ze wis-
senn thet, do pey im ein zeichen gabe wenn er daz verneme daz er
25 dann palde kem dann die haustüre er geöffnet fünd Die alte meyt auf
dem andern teile nicht schlieffe die von diser sache nit weste; Mingino
auch ze wissen tet daz Iacomino [195^b] nicht ze hause was, zů im
sprache das er sich zů dem hause nechnet wann sie im daz zeichen gebe
daz er in das hause köme Nun der abent vnd die nacht komen was vnd
30 die czwen liebhaber von einander nit westen wol auf ein ander sorg
hetten vnd iglicher mit seiner gesellschaft gewapent kame, vnd Mingino
des zeichen vnd der zeit ze warten in eines seinen gůten gesellen hause
der nit ferre von der iunckfrawen gesessen was ginge, vnd Gianello ein
klein ferer von dann auch seines zeichenn von Crinello warten was, Cri-
35 nello vnd die meyt do Iacomino außgangen was igliches fleiß thet daz
an der ab dem wege ze schicken do mit iglichs verpringen möchte vn-
gemercket von dem andern als es dem puler versprochen hette, Crinello
zů mermalen zů der meyde sprach warumb gestu nit schlaffen? wes gestu

auf diese nacht irre in dem hause auf vnd abe, vnd du wes wartest
 warumb gestu nicht nach dem herren, düncket dich es noch nit zeit
 sein seytmal du den pauch gefüllet hast, kan dich nyemant auß dem
 hauß pringen, also ir keines das ander ab dem weg pringen mocht;
 5 Crinello die zeit vernam als er Gianello zû gesaget het zû im selbes
 sprah wez bedarf [195^c] ich mich das ich ze thon habe vor disen
 pösen alten weybe besorgen schweiget sie nitt ir möchte wol ir teyle
 davon weren, vnd zû hant nach söchem bedencken Gianello ze ko-
 men das zeichen gabe, vnd im die haubtüre öffnet; des sich Gia-
 10 nello nit saumet pald mit czweyen gesellen in daz hauß kame, in
 den sale do er die iunckfrawen fandte ginge; die er mit im wege meinete
 ze füren Des im die iunckfrawe nitt verhengenn wolt anhubte zû schreyen,
 des selben gleichen die meyt tet; Ein sölich romore vnd geschrey Min-
 gino hört vnd vernam palde mit seinen gesellen geloffen kame; Die iunck-
 15 frawen mit gewalt vnd wider iren willen für daz hauß geぞogen sache zû
 iren waffen griffen von leder rückten alle schreyen an sy, sie müsen allen
 von vnsern henden sterben es sol sich anders machen, secht nür was
 grosser verrätter daz sein mügen, so beherczent sein die erbern iunck-
 frawen nöten meinen; do sich peydenthalben ein groß slachen machet
 20 zû dem die gancz nachperschaft zû luffen, etlicht mit liechte etlich mit
 waffen die iunckfrawen ze retten vnd nach langem streyte Mingino (Gia-
 nello die iunckfrawen nam vnd wider in Iacomino hauß tet zû sölichem
 [195^d] romore die statknecht geloffen kamen vnd vil manchen fingen,
 vnd den Mingino Gianello vnd auch Crinello alle in gefencknûß geführt
 25 worden, In dem Iacomino ze hause kame alle sache vernam fragen warde?
 was doch sölicher sache vrsache gewesen were, Aber do er vernam daz
 die iunckfraw kein schulde hette on ir wissen vnd wort geschehen was
 er die sache fallen liesse im aller dinge fride gabe vnd fürnam damit sich
 ein söliches nicht mer begeben, so er erste möcht der iunckfrawen einen
 30 man zegeben, des morgens der czweyer iungen gefangen ire freünde alle
 sache vernomen hette; vnd wie sich do von noch groses übel wo Iaco-
 mino wölte begeben möchte; alle zû Iacomino kamen in freuntlich paten
 das er des empfangen widerdrisses der vnweysen iungen vergessen wölte;
 do pey sy sich vnd pey den iungen alzeit in seinem dienst erputen vnd
 35 nach allem seinen willen vnd irem vermügen widerkerung tun wölten
 Iacomino der alle sein tag gar mancherley gesechen vnd vernomen het
 zû den erbern leüten sprach lieben hern wenn ich in meinem heymet
 were als ich in dem eüern pin so thot ich in disen sachen nit anders dann

das eüer gefallen were, vnd [196^a] so vil mer ich mich zû eüern willen
neyge vnd schicke, dann ir euch selbes vnd nit mir schaden getun habt,
dann dise iunckfrawe als dan vil glauben ist nit von Cremona noch von
Pauia sunder Foenczina; aber weder mir noch dem der mir sie gabe vnd
5 befalhe nye vernemen mochten wez tochter sy doch het sein mügen;
Darumb des ir begert sol ich euch gern zû liebe wern Do die erbern
lette vernamen daz die iunckfraw von Foencza was sy ein fremde sache
daucht vnd Iacomino seiner züchtigen antwort danckten; in paten daz er
in saget wie im wer die iunckfrau ze handen komen, vnd wie im wissent
10 wer daz sy ein Foenczerin were zû dem Iacomino sprach, Guidotto von
Cremona der mein güt freunt vnd günner waz do er in gotz gewalt vnd
an dem tode lag zû mir sprach vnd mir saget. Do dise stat von keyser
Friderichen dem ersten gefangen vnd gewonnen dopey alle beraubt ward
wie er in ein hauß kam darinn er grosses güt fand vnd das volcke von
15 dem hauß alles geflohenn was keinen menschen dan allein das meidlein
daz pey czweyen iaren alt sein mocht fand, vnd do er über die stiegen
des hauß auf ginge sy im als irem vater rüffet vmb dez wil[196^b]len das
arm meydlein erparmet vnd es mit im vnd allem dem güt das er in dem
hauß fand nam vnd mit im gen Fano füret. Nit lange dar nach ver-
20 ginge daz er starb vnd alles das er hette mit sampt ir er mir liesse vnd
mir sy als sein leylich tochter befalhe, vnd wen sy zû iren iaren kem
vnd mannes zeytig würde daz ich sy verheyret vnd ir vmb ainen erbern
fromen man seche vnd alles das er mir gelassen het ich ir daz darzû
gebe; Nun ist sy mannes zeitig vnd ist mir noch nye zehanden komen der
25 mir gefallen vnd ir fügliches gewesen sey damit ich sy het versorgen mügen
ee ir anders zû gestanden wer als nechten geschehen ist, Nun was vnder
disen mannen einer genant Wilhalm arczte der mit Guidotto gewesen
was do er daz klein meidlein mit sampt dem güte nam vnd hause be-
raubet dem alle sach was sich zû der selben zeit verlossen het saget im
30 kunt vnd wissent was; do pey auch noch wol weste welches haub Gui-
dotto beraubt vnd daz meydlein genomen het, sich zû einem genant
Barnabuczo keret vnd sprach; hastu vernomen waz Iacomino gespro-
chen het Barnabuczo ia sprach ich hab sein red gar wol vernomen;
[196^c] vnd mir ist auch in gedancke komen wie daz mir zû der selben
35 zeit genomen warde ein mein töchterlein in dem alter als Iacomino ge-
sprochenn hat nye vernemen mocht wo daz selbig mein kint ye hin
komen wer Zû dem Wilhalm sprach, Für war Barnabuczo daz ist die
selbig dein tochter die du verlorest; dann ich mich zû mer malen pey

Guidotto funden hab Das er selbcs sprach er das meidlein in deinem
 hauß genomen hette; darumb bedencke dich gar eben ob du yndert ze-
 chen an deinem kinde gesehen oder gemercket habst, die dich noch
 heüt pey tage der warheit klare machen möchte; do pey du sy eygen-
 5 lichen erkennen möchtest; darumb siche vnd suche dann für war in der
 meinung pin das dein tochter sey, Barnabuczo auf im selbes stund sich
 ze bedencken; in dem im in gedanck kam daz sein tochter auf dem
 lincken ore ein masell hett in kreüczes form die ir von einem geswere
 oder platern beliben was, das man ir geschnitten het, peyde Banabuczo
 10 vnd Wilhelm zû Iacomino sprachen vnd paten des er sowol thet vnd sie
 die iunckfrawen sechen liesse, Des Iacomino willig was der iungen
 zû in rüffet, vnd als pald Barnabuczo sie ansichtig wurde in nit an-
 [196^d]ders dauchte dann wie er sein weybe der iungen mûter die da
 noch pey leben vnd ein schöne frawe was seche; Doch sy sich des nit
 15 bentsen liesse zû Iacomino sprach, Das er im noch so vil ze liebe thet
 als er im gethon het vnd in ließ in der iunge das hare pey den oren
 aufheben, domit er ir linckes ore gesehen möcht; des im Iacomino mit
 sampte der iunckfrawen wol vergund, Barnabuczo sich zû ir die mit
 schame vor im stunde nächent, vnd ir mit seiner rechten hant das hare
 20 ab dem lincken ore nam, daz kreüzlein als er vor gesprochen het sache,
 Do pey er on allen czweyfel erkante das sie sein verlorne tochter waz
 kleglichen anhub zewein, sy mit seinen armen vmb finge in gleichem
 form als ob es ir grosser wille gewesen were, nach dem sich zû Iaco-
 mino keret zû im sprach; Iacomino pruder vnd gûter freünt das ist mein
 25 leylich kint vnd tochter dann mein hauß ward von Guidotto dem söld-
 ner in dem vergangen kriege beraubt, vnd ich vnd ir mûter nicht anders
 meinten dann sy were in einem meinen andern hause daz mir auf den
 selben tag verprant ward tod vnd verprennet Do das die iunckfrawe
 vernam vnd auch den man bedag[197^a]et sache seinen worten gelaubt
 30 vnd von einer verporgen tugent des plütes beczwungen sein halsen vnd
 treüten zû leyden vnd im des nit versagen mügen mit sampt im anhub
 ze weinen, Barnabuczo palde nach seiner frawen der iungen mûter iren
 andern swestern vnd prûdern schicket in alle sache ze wissen tet; vnd
 nach langem enfahen halsenn vnd küssen; die iunckfrewen mit in heyme
 35 in ir hause furten vnd das alles mit grossem gefallen des erbern mannes
 Iacomino Do sich von neuem grosse freude machet, sölche sache dem
 richter der ein weyse man waz ze wissen kam der do Gianello Barna-
 buczo sun in gefencknûs hette vnd vernam wie er der iunckfrawen

darumb sich das romor gemacht het leylich pruder was, sich mit im selbes bedacht peyden party zû liebe die verlossen sache in fride vnd gelimpffe zû zichen Barnabuczo vnd Iacomino besante vnd czwischen Gianello Mingino Iacomino ein ewigen frid beschlosse, vnd dem iungen
 5 Mingino mit grossen freüden allenthalben die iunckfrawen mit namen genant Angnesa zû einem weybe gabe, vnd peyder party zû liebe Crinello aus gefencknûß gen ließ, alle die [197^b] in den vergangen romore verwickelt waren vergabe. Nitt lange verginge Mingino sein hochzeit machet die schönenn neüenn praute heyne in sein hause füret do sy
 10 lange zeit in grossen freüden mit einander lebten.

Wie Giano von Procida ein iunckfrawen huldet vnd von herczen lieb het, die künig Friderich von Cicilia geschenckt wart, vnd er von dem künige pey ir eines nachtes slaffend gefunden ward peyde von im in den tode vnd das feüer verurteylt wurden vnd mitten auf
 15 dem placze zû verprennen peyde an ain seüle gepunden worden In dem er von des küniges boffmeister erkant wurden alle peyde freye vnd ledig mit grossen iren eren gelassen wurden vnd der künig Giano im sie zû einem elichen weybe gabe vnd vergünnet mit grossen eren vnd freüden heym gen Yschia ze füren.

20 Frawe Neyphile neüe histori den edelen frawen in güter masse wol gefallen hat In dem die künigin der iungen frawen Pampinea gepote für paß ze sagen, die ir schönes angesichte in die höche richtet, anhübe vnd sprache; Ir sült ware nemen vnd auch sechet [197^c] ir mein allerliebsten frawen was grosser macht kraft vnd stercke die liebe hat, vnd
 25 die da die vnbedachten liebhaber in also grosse vnrüe vnd betrübung seczet vnd schicket, als ir dann in vil mancher histori die auf disen tage sein gesagt worden vernomen habt; derselben auch mir eine in meine gedancke komen ist die euch ze sagen mein gefallen ist wie ein iunckfrawe von einem iüngling liebe gehabt was; der liebe nach langem wider-
 30 drisse sich ze seligem ende füget. Es ist ein kleine insel nicht ferre von der stat Napels genant Yschia, in der wonet ein schöne iunckfrawe die was mit namen genant Restituta eines edeln mechtigen mannes tochter genant Marin Bolgaro, In dieselben schönen edeln iunckfrawen ein iung edelman von der insel Procida die nahent dapey ist, in liebe enczündet
 35 genant Giano von Procida, des selben die iunckfrawe in nit minder lieb hett als er sie thet; Des iüngling liebe so überflüssige vnd grosse zû

der iunckfrawen waz Das er nicht alleine des tages die iunckfrawen ze
 sechenn gen Yschia fure, sunder alle nacht von Procida gen Yschia auf
 dem mere schwam do mit er seinen allerliebsten puelen ge[197^a]sehen
 möchte, vnd wo er ir zů sölcher zeit nicht gesechen noch vernemen
 5 möchte sich an den gesechen mauern ires haus sich bentügen liesse. Do
 nun sölche prinende liebe peydenthalben gůt zeit geweret hette Eines
 tages sich begabe das die iunckfrawe allein spacziren pey dem mere salat
 ze suchen gängen waz. In sölchem iren gen zů einem kůlen frischenn
 průnlein kam sich an dem schaten ein klein ze rasten niderseczet. In
 10 dem etliche Cicilianer die von Naples furen die iunckfrawen ersehen
 vnd ir pey dem průnlein wargenomen hetten der sie noch nit gesehen
 hett angesechenn ir grosse schöne mit einander eins worden sie wege ze
 fůren vnd die iunckfrawen e sie ir war name sy übereylte hetten fingen
 vnd mit in wege furten wie wol sy grosses romore vnd schreyen tet aber
 15 sy nit gehelffen mochte, dann ze ferre von den leůten was, vnd do sy in
 Kalabria kamen mit einander der iunckfrawen halben ze rede kamen
 wez sie sein sölte; kurz abe geredt iglicher gern ir herre gewesen were;
 des kein cinickeyt sunder ee vneinickheit czwischen in besorgten vnd vn-
 fride vmb iren willen; Darumb vnd domit sy nicht zů kriege komen
 20 vn[198^a]ter in auch des zů rat wurden Die iunckfrawen kůnig Frideri-
 chen von Cecilia ze geben; der in sölcher zeit ein iunger man was die
 iungen schönen frawen sere lieb hette, vnd die iungen gesellen mit der
 iunckfrawen gen Palernia kamen, vnd als ir meinung was sy theten,
 dem kůnig die schönen iunckfrawen antworten. Do sy der kůnig also
 25 schöne sache sere liebe vnd wert hette; Aber zů seinem willen ze prau-
 chen sy in noch zů iunck vnd an den iaren ze weich dauchte; Sy zů
 den andern die er zů seinem leybe verspert hielte thon schuffe, den er
 ein schönen pallast vnd garten hette machen lassenn genant Chuba.
 darinn er allein schöne frawen vnd iunckfrawen hielte die im zů gehör-
 30 ten. Nun in der insel Yschia vmb der verloren iunckfrawen willen sich
 groůs romore vund klagen begabe, dann nyemant vernemen noch ge-
 wissen mocht wer doch die rauber gesein mochten die, die iunckfrawen
 weg gefůrt hetten, sunder der iunge der sie von ganczem herczen liebe
 het mere dann yemant anders pein leyte vnd smerczen truge; Der ze
 35 hant ein brigantin wapen vnd mit etlichen seinen getreůen gesellen dar-
 auf sasse den raubern nach dem er vernome [198^b] het den wege den
 sy gehalten hette nach volget; in die porten Kalabria bekame, do er
 fraget ob yemant mit einer frawen dafůrgefaren were. Do im von ersten

gesagt warde wie etliche Cicilianer mit einer iungen frawen gen Palerma
wercz gefaren weren. Do das der iunge edelman vername so er peldest
mocht sich dohin függet; do er nach langem fragen vnd suchen fande daz die
iunckfrawe künig Friderichen waz gegeben worden der sie in seiner Chuba
5 für in beschlossenn het im grossen vnmüte prachte, sich aller hoffnung erbe-
genn het sie ymer mere ze sechen ich geschweige ymmer ze habenn; Doch
von grosser überflüssiger liebe beczwungen do ze beleyben, vnd sein gesell-
schafft mit dem schiffe wider gen Yschia schicket, vnd er sich zů Palerma
vñ nyemant erkante also alleine beleyb pey dez künigs Chuba auf vnd abe
10 spacziren ginge; In sölchem seinem spacziren gen zů seinem gelücke vnd
vngelücke sich begab daz er sein allerliebste iunckfrawen an einem fenster
ersehen vnd ir ware genomen het; des selben gleichenn sie sein gethon
hette peyde content froe vnd wol ze müt warn Giano sich zů der mauern
nächent do er von [198^c] nyemant mochte gesechen sein mit ir sein not-
15 turfte redet, vnd von ir vnterricht wie vnd wenne er zů ir komen möchte
nach dem von ir schiede, Das ende vnd die stat zů ir ze komen nach
dem sy im wege geben hette gar eben abe maß vnd die bedencken
warde; vnd nach sölchem bedencken der finstern nacht warten waz, vnd
do die kamen vnd ir ein güt teyle vergangen waz sich wider zů der
20 Chuba füget in den garten steyge do er zů seinem gelücke oder vngelück
ein wispaume fande den auf an die mauern der iunckfrawen fenster ley-
net vnd wie er mochte zů dem fenster ein in die kamern zů ir steyge.
Die iunckfraw in mit grossen freüden enpfing vnd nun wol dauchte sie
irer eren enpfremdet were vñnd verlorn het die sy mit als grossem fleyß
25 piß auff die selben stunde bewart vnd behüt het, vnd sich sölcher sache
stätz fremde pweist het. Nun ir gedacht Niemand irer ere wirdiger
were vnd dem sy ir iunckfrauschaft ee vergünnen wölt dann disem iüng-
ling Giano vnd Procida; vnd der villeicht noch vrsache sein möchte sie
wider heym ze hause zů pringen, Ir genczlich fürnam im in allen sachen
30 zů seinem wil[198^d]len wöllen geschicket vnd bereyt sein, vmb des wil-
len im daz fenster der kamern offen gelassen het, Also Giano das selbig
fenster offen fande vnd mit stille durch das in die kamern kame vnd sich
der schönen iunckfrawen die noch nit schlieffe an ir seyten leget, vnd ee
sich keinerley anders begabe im iren syn vnd meinung öffnet in alle
35 wege mit im von dann ze farn des in pate vnd in besonderheit an in be-
geret. der iunge mit züchtiger antwort sprache; Edele iunckfraw kein
dinge diser welt im mer freüden geben möchte noch mere gefallen hette,
dann sie wider heym gen Yschia zů pringen, vnd als palde er von ir

ging er on czweyfel sein sache in sölcher masse anrichten wölte das
 irem willen vnd dem sèinem ein genügen geschhehenn sölte vnd so er
 des ersten wider zû ir köme sy on zweyfel von dan füren wölte. Mit
 disen Worten in grossem luste vnd freuden sich einander in ir arme be-
 5 schlussen mit lieplichem halsen vnd küssen, Die ersten vnd grösten
 freude der liebe peyde von einander namen, vnd eins von dem andern
 enpfing. Do daz zû mer maln geschehen waz, vnanders bedacht peyde
 einander in beslossen [199^a] armen entslieffen. Nun lasse wir die czwey
 liebe slaffen vnd besechen des küniges bedencken; dem die iunckfrau in
 10 seinem ersten sechen sere gefallen vnd on masse geliebet hette ir grosse
 schöne dicke bedacht vnd in söllichen gedancken im lust vnd begire zû
 stunde pey ir ze slaffen, als der sich von leibe wol enpfande, vnd mit
 etlichem seinem diener wie wole es vor tage was in stille vnd geheym sich
 zû dem garten vnd dem palast darinne seine iunckfrawen wonten fûget,
 15 do er der iunckfrawen kamern mit grosser stille ôffnet mit einer grossen
 prinenden fackeln vor im in die kamern ging auf ir schönes pette sache
 do er die iungen peyde liebe in irem schweren slaffe nackent in be-
 schlossen armen pey einander ligen fande, vmb des willen sich sere be-
 trübet vnd in grossen zorn fiele, vnd daz in masse daz es im grosse müe
 20 was sich ze enthalten das er sy nicht peyde an der stat mit seiner eygen
 hant tötet; doch bedacht es ein groß übel getun were ein slaffenden
 mensche ze töten gesweyge czweyer. Darumbe sich in seinen zorn mes-
 siget vnd sy peyde offenlichen hertes todes meinte zû püssen vnd in
 dem feuer verprennen, sich gen einem seinen diener keret zû dem er
 25 sprach, [199^b] der alleine pey im waz. Nun wes düncket dich diser
 pösen falschen frawen zû der ich grossen troste vnd hoffnung hette
 dann zû keiner andern, Nach dem in fraget ob er den iungen kennet
 der also beherczent gewesenn were an das ende ze komen; vnd im söl-
 chen widerdrisse zû peweysen, Der da gefraget was im antwort vnd
 30 sprach er nicht gedechte den iungen ye mere gesechen hette; Der künig
 aller in zorn vnd mit sere betrübtem herczen auß der kamern ginge Zû
 hant gepote vnd schuffe das die czwey liebe also nackent vnd plosse ge-
 fangen vnd in gefencknûß gefürt würden. do er gepote vnd ernstlich
 schuff als pald der tage köm daz man sy peyde gegenwürtig aller menge
 35 auf dem placze an einen pfale also nackent pünde vnd piß auf tercze
 zeit sten liesse do mit sy von yederman gesechen würden, vnd darnach
 zû hant nach dem sy verschult heÿtten verprennet würden, Also geschafen
 wider heym in sein gemache ginge, vnd nach seinem abscheyden die

czwey liebe nicht alleine auß irem süßen slaffe erbeckt worden, sunder
 on alle genade vnd parmherzigkeit gefangen vnd gepunden wurden. do
 die czwey liebe ein sölches sachenn ob sie traurig [199^c] betrübet vnd
 ledig waren, daz ein iglich diemütig liebhabend hercze pey im selbes
 5 bedencke, sich erparmglichenn mit einander klagten vnd ires leben be-
 sorgten, vnd nach des küniges geschefte getun warde palde auf den placz
 gefüret vnd da an ein seüle rückling vnd also plosse gebunden worden,
 vnd für ir augen das holcze vnd fetter sie ze verprenen geleget warde;
 ein sölches e terczeit kam die gancz stat Palerma vol was alle welte
 10 von frawen vnd mannen Iusticia zů sechen auf den placz kamen Der
 czweyer liebe schentlichen tode ze sezhen; die iunckfrawe von allen
 mannen irer grossen schöne vnd wol geschickten leibe gelobet was vnd
 die frawen die den iungen sachen; seiner schönen gestalt vnd wol ge-
 formirten leybes nicht mynder als die mann die iungen getun hette lob-
 15 ten vnd ob allen mannen preisten; Also die elenden armen liebe peyde
 mit grosser schame vnd geneygtem haubte kleglich ir grosses vngelück
 beweinten alle zeit des herten todes vnd fetters warten. nun die weyle
 die czwey liebe also piß zů der benanten stunde zů verprinnen gehalten
 waren, In sölchem verczihen sich begabe als gotz wille vnd der liebe
 20 ordnung was, daz eine sölche [199^d] romore vnd sagen übel thun vnd
 geschrey dem edeln hern Rugiere von Loria ze wissen vnd gehöre kam;
 der zů der zeit dez küniges in allem Cecilia verweser vnd haubtman
 was; auch er das wunder ze sechen auf den place do die czwey liebe
 an den phfale gebunden waren geriten kam, von erst die iungen gar wol
 25 schauet irer grossen schöne lobet; Dar nach auch den iüngling besache,
 den er in seine ersten ansechen eygentliche erkante; sich zů im nechent
 vnd fraget ob er Giani von Procida were; der iung sein pleich angesicht
 auf hüß vnd hern Rugiere palde erkante, Im antwort vnd sprach O ede-
 ler herre mein ich was etwan der nach dem ir fraget, aber ich pin es
 30 für nicht mer ze sein; Rugiere in fürpaß fraget was vrsache in zů dem
 pracht hette, dem der iunge antwort vnd sprach Herr daz mich zů als ir
 nicht sechet pracht hat das ist grosse liebe, vnd des küniges grosser
 zorn. Do Rugiere alle vrsache vernomen het vnd von dann zů dem kü-
 nige reyten meinte, der iunge im wider rüffet zů im sprach vnd freunt-
 35 lichen pat O edeler herr mein, begeret mir ein genade an den der mich
 also sten offenlichen hie machet Rugiere fraget wes pegerst du Gianni
 [200^a] Herre ich sich vnd vernym daz ich palde sterben muß; Darumb
 ich in besonderheit die genade beger, als ich hie mit diser iungen die ich

allegen als mein leben lieb gehabt habe; dez selben sie mich gethon hat
rückling zû ir gepunden pin ir vns schaffet das wir mit dem angesichte
gen einander gekert werden, damit ich iren anpicke mit frölichem ster-
ben sechen müge; Rugiere lachen zû im sprach Giani das sol ich nun
5 gern tun aber ich hoffe pessers vnd piß on czweyfel du solt sy noch mer
sechen dann du ye gethon hast! in dem von dann reyte vnd mit den
richtern schuffe nicht fürpaß täten, also lange piß sy von dem künige
ander pote vernemen, vnd mit grosser eyle zû dem künig reyte, wiewol
er in betrübet vnd in zorn fande; doch darumb nit enliesse im sein mei-
10 nung saget vnd zû im sprach; genediger herr warumb er als grossenn
schantlichen tode vnd rechen an den czweyen iungen die auf dem placze
zû verprinnen gepunden wern begent wölt Der künig im alle sache sagt
wie er dem iungen in der Chuba gefunden het; Rugiere fürpaß sprach,
Herre dise grosse verprachte sünde ist iglicher grossen puß wirdig aber
15 nicht von [200^b] ettern genaden vnd zû geleichem form als übel thon
puse wirdig ist; Also auch enpfangne dienst widerkerung wirdig sein
vnd das on alle genade vnd parmherczikeit geschehen sol habt ir ver-
nomen wer die sein die ir verprennen vnd töten wölt Der künig sprach
nein er het ir kein kuntschaft, So sült ir wissen sprach Rugiere wer sie
20 sein; do pey auch ettern zoren erkennen müget vnd wie ir euch sein
vntugent überwinden lasset. der iung ist Landolff von Procida sun her-
ren Giano von Procida leiplicher prüder durch des synn werck vnd
weistum ir künig in Cicilia seyt vnd die iunge fraw ist des edeln hern
Marin Bolgaro von Ischia tochter des macht vnd gewalt dar ob ist daz
25 etter herschaft von Ischia nit außgetriben ist; über daz so sein daz czwei
iunge person lang zeit ein ander liebe getragen haben. Darumb von
grosser liebe vnd nit eygen willen peczwungen gewesen sein zetun daz
sie wider etter genad getun haben; Dise sünde sol man daz anders ein
sünde heysen daz die iungen durch liebe vnd freuntschaft getun haben
30 wölt ir sie darumb töten lassen; düncket mich ir wider alle natürliche
reckt stündet vnd sprich ir in ere ze thon [200^c] vnd zucht peweisen
pflichtig seyt, vnd nicht wider daz thon sült daz vns natürliche recht
geben vnd verliechen haben. Do der künig des edeln herren Rugiere
wort vernam die im sein hercz erbeychet hetten wol erkante er im die
35 warheit gesaget hette, vnd was er der czweyer liebe halben piß auf dise
stunde begangen hett; alles ze rücke leget, vnd auch grosses leyt dar über
het. Zû hant schicket vnd gepote daz die czwey iungen für in gefüret
würden; das geschefte gepoten vnd verpracht alles ein dinge was. Do

sie nu für in komen waren vnd er peyder syn vernomen vnd iren willen erkant hett; Im gedacht er sie irer empfangen schmachheit mit gabe ere vnd sachankung wider keren vnd in frid seczen wölte, vnd palde komen schuffe köstliche kleyder vnd gewante sy herlich beschneyden tet, vnd mit
5 peyder gleichen willen sie einander zû der götlichen ee gabe sy herlichen begabet mit grossen eren vnd freüden heyme ze hause schicket; do sy mit grossen eren vnd wurden empfangen worden lange zeit irr lust vnd liebe mit einander pis an ir ende in freüden lebten.

[200^d] Wie Theodoro liebe het Violante seines herren tochter
10 die er swängeret; vmb des willen an den galgen geurteylt warde, vnd in dem auß zû dem tod ze füren er von seinem vater erkant warde ledig vnd frey gelassen warde, vnd mit grossen freüden Violante zû der ee nymet.

Die edeln frawenn alle erschrockenlich stunden ze vernemen ob
15 die czwey liebe verprent vnd also erpärmlich getöt wurden. Aber do sie die frey vnd ledig vernamen alle got vnd sein grosse parmherzikeyt lobten wol ze müß vnd frölich wurden; In dem die künigin das ende sölcher histori vernomen hette der edelen züchtigen frawen Lauretta die pürde nach zevolgen auf lude; Die mit kurczer red frölich
20 also sprach. Ir aller liebsten frawen mein zû den zeiten do künig Wilhalm das künereich von Cecilia regiret; In der insel ein edel man gesessen was genant herr Amerigho, abte von Trapani; Der vnter andern seinen reichthum von got mit vil manchem schönem kinde verseeen was, des selben gleichenn mit vil diener vnd dienern In sölcher zeit
25 als sich dicke begibt dez man [201^a] an dem minsten warten ist, Etlicher Genoueser raupschiffe auß Leuant komen vnd in Erminia vil iunger kinder von knaben vnd meyden gefangen hetten, von den der egenant herr Amerigo ir etliche für sein schläfen kauffet, dann er meint es Türcken vnd nicht Kristen weren, vnd wie wol es hirtten vnd von
30 groben geperde dauchten; doch ein knab darvnter was der von gestalt zucht vnd geperde edelicher sein dauchte dann die andern, der was mit namen genant Theodoro vnd wie wol er als die andern verkauft was; Doch in sölcher zucht vnd gûten syten aufwuchse das sein wonung mer mit seines hern Amerigo kinde was dann mit andern, sein
35 natur sich mere zû in neyget dann zû yemant anders, des im der herre vmb seiner tugent willen wol vergunde vnd gern sache; der iung was

von sölcher tugent daz in her Amerigo frey vnd ledig saget der on
czweyfel meinet, er ein Türcke were vnd liesse in tauffen vnd nant in
Peter aller seiner gescheft in ein außrichter machet grosses getrauen
zû im het, Nun geleihe als des hern stüne wuchsenn Also auch eine
5 sein tochter genant Violante thet, die on [201^b] masse vnd ob allen
iunckfrawen der gegent die schönest waz Aber von irem vater ir einen
man ze geben, Nun etwaz verhalten was vmb des willen sie zû dem
iungen ires vaters schaffer in grosse liebe enczündet, vnd in sölchem
liebhaben sie sein zucht tugent vnd gûte syten ob allen iungen manen
10 preysset, vnd seine werck stätz lobet, Doch grosser schame halben sich
gen im ir liebe noch nicht endecket hette; Aber die liebe ir palde söl-
cher schame vnd müe wege gab, dann der iunge sie verporgen nitt
minder liebe hette als sie in het vnd übel ze müte was wann er sy
mit sechen mochte. doch sich sölcher seiner liebe gen ir nicht mercken
15 liesse; dann in wol dauchte er erger dann übel tet anders dann erliche
sach an sy ze begern, Die iunckfrau die in auß der massen gern sache
seiner liebe zû ir etwaz gemercket het, des sie in irem herczen froe
vnd wol ze müt waz vnd da mit er ir liebe vnd hulde auch sicher were
sie sich der gen im beweyset; Also gute zeit gestanden keines so be-
20 herczent was zû dem andern icht zû sprechen, wie wol peyder begire
ein wille was, vnnd die weyle sie peyde in gleicher liebe pranten; das
gelücke in [201^c] wege bereyt het, alle sorg von in ze legen, die sie
piß zû der zeit geirret hette, vnd nit lange verginge, daz her Amerigo
weybe mit sampt der tochter vnd auch andern frawen in einen iren
25 schönen garten den sie vor der stat hette spacziren gangen was, vnd
den iungen der tochter liebhaber mit in genomen hetten; also etliche
stunde in dem schönen garten ir kürzweyle vnd freude genamen In
dem sich begabe als in dem sumer gern geschicht das sich nach langem
schönem wetter der hymel gächlinge oft betrübet; Des die frawen alle
30 war nomen pösen wetters besorgten, palde sich auf den wege gen hause-
wercz machten damit sie dem regen vnd nasse wetter entgen möchten
mit grosser eyle vnd so sy festes mochten gingen Peter vnd die frau
die da peyd frisch vnd iuncke waren paß zû fusse mochten dann die
andern; darumb sy ferre gangen hetten, doch daz mer vmb grosser
35 liebe willen dann forcht halben pöses wetters ze thon getrungen waren;
Die andern also ferre für gangen hetten das sie in auß irem gesichte
komen waren vnd in sölchem irem gen sich begabe daz nach langem
tonern vnd pliczen ein groß regenn [201^d] kam, Den die alte frawe

der iunckfrawen muter in eines pauern hause floche; Peter vnd iunckfrawe
Violante in eine alte scheüern kamen darinn nyemant dann sy alleine
waren do sy sich so sy pest mochtenn enge zů einander hielten vmb der
schmale des taches der scheüern willen, das da alles zůrissen was,
5 vnd in sölchem engen sten vnd anrüren ein ander vrsach wuchse, Das
sich peyder wille zů einem machet vnd sich irer liebe peyde einander
endeckten vnd von erste Peter sprach. Nun wölte got das es nymer
auf höret des regen solt ich anders sten als ich iczund ste. über sölche
rede die iunckfrawe sprach, daz were mir von herczen liebe, Nun nach
10 disen worten ein ander pey den henden namen die ein ander klein
drückten von dem zů einem züchtigen halsen vnd küssen kamen, das
weter schauern vnd hageln liessen vnd damit ich nicht was sich pey-
denthalsen erginge von stück zů stücke erczelen bedürffe dann alleine
das wissen sült ee daz weter nachliesse sy peyde die leczten rure vnd
15 freüde der süssen liebe erkanten. Nach dem ir verporgen ordnung ga-
ben was hin für ze thon were in dem der regen ab liesse, Die [202^a]
sunne iren schein wider gab vnd die czwey liebe zů nechst vor der stat
der alten frawen mit irer gesellschaft warten mit einander alle frölich
ze hauß gingen vnd darnach zů vil manch malen mit genug guter ord-
20 nung sich mit grossen freüden pey einander der liebe zů spilen funden,
vnd das also offte das sich die iunge fraw on ir wissen grosse vnd
swanger fande, dez sie peyde on masse betrübet waren mancherley
theten, ob sy wider die natur entswängern möchte aber in keinen wege
gesein mochte vmb des willen der iunge seines leben besorget sich mit
25 im selbes beriete ein züchtig abdretten thon vnd die flucht zů geben,
sölche seine meinung seiner lieben frawen ze wissen thet. Do sie dy
vernam zu im sprach? Peter ist sache das du mich also lasest so piß
on czweyfel ich sol mir selbes den tod thon. Der edel iung der sy ob
allen frawen der welte lieb het zu ir sprach! mein aller liebstes lieb
30 vnd frawe wie sol ich hie beleyben. Nun nym war wie dein swerer
leybe vnser peyder sünde endecket vnd die öffnet Aber dir würt on
czweyfell vergeben, vnd ich armer elender vnser peyder sünde pusse
vnd pein tragen muß. Zů dem [202^b] die iunge frawe sprach. Du
mein allerliebster iunger! ob mein sünde offen vnd wissent wirt, so
35 lebe on sorge vnd pis on czweyfel daz die deine wo du sy nicht selbes
zů liecht pringest sol von mir keinem menschen auf erden ze wissen
komen. Der iunge sprach Violante liebe mein! seytmal du mich eins
sölchen trötest vnd mir das versprichest ze haltenn so will ich pey dir

beleyben vnd nicht von dir weichen; des sie im ir treue an eydes stat
 gab Nun die güt iunge frawe so sy pest mocht iren wachseden lieybe
 verparge, doch das in die lenge nicht getun mocht als sie wol erkante,
 vnd mit grossem kleglichem weinenn eins tages irer müter alle sache
 5 irer grösse ze wissen thet, vnd vmb genade pat, Die alte erber fraw
 ir müter on masse vnmütig ir sere übel zû sprache lasterlich mit worten
 als sy dann wol wirdig was übel außricht; von ir begeret ze wissen wie
 vnd wenn sich daz ergangen het Die tochter ir antwort vnd do mit
 Peter nicht arges zû stünde ir netze fünd erdacht, vnd der müter ze
 10 versten gab wie es ein ander man vnd nicht Peter gewesen wer Das
 die müter gelaubet nitt fürpas suchet vnd sie ze hant [202^c] von dann
 auf ein dorf do sy. ein gesässe hette schicket. Do sie also lang wonet
 das ir zeyte kam ze geligen; do sie gelage vnd gepare, vnd in söllichem
 geligen als der frawen gewonheit ist pein halben sere ze schreyen vnd
 15 ze klagen, also sie auch thet; In söllichem sich on gefere begabe das
 her Amerigo der jungen vater dar kame der da vogeln vnd iagen ge-
 wesen was; Der tochter schreyen vnd klagen vernam in ein fremde
 sache dauchte, palde in der tochter kamern ee sein yemant ware ge-
 nommen het geflochen kame; Do er fraget was das bedeütet das sein
 20 tochter also schrye. do die alte frawe den man sach sere erschrack,
 vnd was der tochter zû gestanden was im saget vnd alles ze wissen
 thet; aber nicht als palde gelaubet als sein haußfrawe der tochter ge-
 thon het, vnd palde sprache, frawe das sol nicht war sein das ir nicht
 wissent sey wer sy gewängert habe; vmb des willen genczlich wissen
 25 wolt wie alle sache stünd, vnd wer der gewesen were der im sölchen
 widerdrisse gethon hett, wo sie im des die warheit bekennet sy pey
 im genad fünde der begangen sünde; wo sy aber des nicht thon wölte
 sy on [202^d] alle parmherczikeit sterbenn müste; die alte frawe gros-
 sen fleiß thet den hern ze stillenn; vnd das er sich an iren worten be-
 30 nügen liesse; aber vmb keinen was In grössern czoren fiele vnd mit
 plossem schwert über die tochter lieffe; In dem die tochter einen schö-
 nen sun gepare vnd der vater zû ir sprache. Nun sage mir durch wel-
 chen man du das kint empfangen hast oder du solt auf dise stund von
 meiner hant sterben; Die junge frawe daz plosse schwert vnd den tode
 35 vor ir sache forcht vnd erschrecken halben bezwungen ir trewe vnd
 gelumbe an irem lieben Peper ze prechen, vnd was sich ir vnd Peters
 halben verloffenn hette alles dem vater saget, Do das der herre vnd
 ritter vernam schier von synnen komen were, Sich mit marter enthielte

der tochter nit den tode ze thon Doch nach dem das der czorn gibt,
vnd nach etlichem bedenckenn auff zů rosse sasse wider gen Trapani
in die stat reyte, vnd zů einem genant her Conrad der sein richter in
der stat was ginge vnd die enpfangen schmäche von Peter seinem diener
5 in sein tochter im saget vnd schuffe das er in fachen thet vnd was im
ein recht vmb sölcher sünd [203^a] willen gebe das er dann sölchem
nachvolget. Der richter in ze hant finge vnnd an die marter stellet;
do er alles des bekante das er mit des hern tochter begangen hette;
nachdem misser Amerigo dem richter gepote daz er Peter mit ruten auß
10 der stat slachen liesse vnd nach dem an den galgen hinge, vnd damit
peyde liebe mit sampt dem kinde ab dem erdrich verdilget vnd genomen
wurden, vnd er nun Petro in den tode geben het vnd seinem zorn nach
seinem geduncken noch nicht ein genügen gethon het, palde einem
seinen diener zů im rüffet dem er einen gulden koffe mit wein vnnd
15 gift in die einen hant gebe, Vnd in die andern ein plosses schwerte
gabe zů im sprache; ge hin mit disen czweyen dingen zů meiner tochter
Violante, vnd sage ir von meinen wegen das sie palde nem den tode
von disen czweyen waffenn welcher ir am meisten liebet von der gift
auß dem gülden kopffe oder von dem plossen schneydeden schwerte,
20 oder ich sol sie gegenwürtig einer gaanczen gemeine mitten auff dem
placze verprennen lassen, vnd wenn du das verpracht hast so nyme
das kint, daz sie gester gepare [203^b] vnd slache das mit den haubt
vmb die mauern vnd gib es den hunden ze essen! O was strengen her-
ten vrteyls das was das der vater in sejn eygen plüte tochter vnd tiech-
25 ter thet Des hern diener mit sampt des hern potschaft von dann schied
mer geschicket übel ze thon dann güte. Der iunge der in den tode
vnd zů dem galgen geurteylt was; Des richters knechte in zů töten,
durch die stat auß furten, vnd zů seinem gelücke als der knecht die in
fürten gefallen waz vor einer herber für gefürt warde dar ine vil manche
30 frömde hern ze herber waren, die von dem künige von Erminia zů dem
pabst gen Rome in seiner potschaft gesant waren, mit dem heiligen
vater eins zůgeß über mere zů dem heiligen grabe eins ze weren, Die
selben herren die da namhaftig drey waren ze rüen ze Trapani ab ge-
sessen waren; den die herschaft der stat grosse ere beweyset, Sunder
35 her Emerigo sy in grossen ern hielte; Dise hern den iungen zů dem
tod für gen vernamen an ein fenster gingen den ze sechenn. Nun waz
der elende iüngling von der gürtel hin auff aller endecket vnd plosse
nacket, vnd mit den henden auf den [203^c] rücke gepunden als dann

gewonheit ist, der die man mit ruten auß schlecht. Nun was einer von den dreyen fremden herren ein alte erber man von hochem weistum genant Phineo Gliuide; Der des iungen mer dann yemand anders gar eben ware name, vnd im auff seiner nackeden prüste ein rotes zeichen
 5 ersehen het nicht gemalet, sunder im die natur das geben het; Sölche zeichen die frawenn hie mit vns ein rosen nennen; dez der alte herr gar eben war genomen hette vnd im ein sein sun zů gedanke kam der im des pey czwelffe iaren was, von mer raubern pey der stat Iaiacza genomen vnd wege gefürt ward Do von er piß auf disen tage ye icht
 10 vernomen hette, vnd des elenden iungen den man mit ruten schluge alter bedencken warde, vnd gedacht wer mein sun pey leben er in dises iungen alter were, vnd in sölchem sten vnd bedencken des gesechen zeichen czweyfelden ward, ob daz sein sun möcht oder nicht, sich zů im nechnt wer er were vnd seines namen begeret zů wissen fragen
 15 warde von wann er wer, vnd wer sein vater wer; des im zů antwort warde wie er ein ver[203^d]kauffter auß Erminia were, Der alt erber man in fraget, ob er die erminischen sprache künde, Sich des alles e der iunge fürpaß gefürt würde, vnterricht nach dem sich paß zů im füget vnd im pey seinem rechten namen rüffet vnd mit hoher stymme
 20 sprach; O Theodoro pistus oder nicht. Do der iunge die stymme vernam sein haubt erhube; der alte herr zů im ermenisch sprach; sage mir iunger von wannen pistu wer ist in Erminia dein vater Do die statknecht den edelen alten herren mit dem iungen in fremder sprach reden hörten Im zů liebe stille stunden vnd der iunge dem alten herren
 25 in erminischer zungen antwort vnd sprach Ich pin aus dem kunigreiche Erminia vnd pin eines edel mannes sune genant Phinio do ich ein kleiner knabe was ich von etlichen raubern des meres gefangen vnd in dise gegent gefüret vnd verkaufft warde; pey disen wortenn der alte herre sache vnd erkante das der iunge sein sun was den er zů Aiacza
 30 verloren het, vnd mit seinen gesellen zů im drat vnd mit weyenden augen, aufgetonen armen vmbfinge gegenwürtig aller menge in halset [204^a] vnd küsset, vnd pald im ein seyden kleyde an warffe; die statknechte freuntlichen pate die in zů dem tode beleytend Das sie nicht anders thäten also lang piß sie neües gepot von der herschaft vernemen,
 35 Die im antworten des er begert sy willig weren ze thon sein gefallen. Nun hat her Phineo die vrsache des iungen todes wol vernomen dann alle sache offen vnd ydermane wissent was, waz in dazů gepracht het, vnd palde mit seinen gesellenn zů dem richter gingen zů im sprachen;

Herr richter der den ir töten wölt als ein schlafen vnd verkaufften Er ist frey vnd mag mit recht kein verkaffer sein, vnd ist mein plüte vnd leyplich sun von meiner haußfrawen geporen; er sol geschicket vnd bereyt sein nach dem ich vernyme; der er ir iunckfrawschafft genomen vnd
 5 beraubt hat daz widerkern vnd die für sein eliche haußfrawen nemen; dann er ist ir nicht minder wirdig als sie sein wirdig ist; darumb palde schaffte das, daz gericht wider zertücke kere, Damit man verneme ob sy sein, als er ir zů der götlichen ee beger Damit wo sy eins sölchenn willich were ir nicht wider göt[204^b]-liche recht vnd natürlich statut thet, im
 10 den tode ze geben Do das der richter vernam in gar ein fremde sach dauchte; Das der iunge also eins edeln erbern mannes sun sein sölte im leyde was; des der iung an der marter bekante hette; vnd was im der edel herre Phineo gesagt hette alles fürware gelaubet, palde den iungen zertück führen schuffe, vnd hern Amerigo palde besante vnnnd was sich
 15 des iungen halben ergangen hett im ze wissen tet her Amerigo der da nun gelaubet vnd meinete die tochter vnd auch sein tiechter tode empfangen hetten trauriger dann man ye warde des das er getun het wol sache vnd erkant, wo sy nicht tode were man alle sache in gelimpffe vnd zů grossen ern pringen möcht, doch mit grosser eyle palde schicket do die
 20 tochter was wo sein gepote nicht verpracht wer daz es nicht geschehe sunder ze rück geleget würde; Der pote eylent kame do die iung frawe mit sampt irem kinde was, vnd fandte das des hern diener ir die gift vnd das messer für gelegt vnd mit seines hern gepote den tode ze erwelen ir bereyt het, daz sie verzoch so [204^c] sie lengest mocht, vmb des willen
 25 der knecht ir übel redet vnd zů dem tod nöten meinete die gifte ze nemen; In sölchem verczihenn als gotz wille was das nette gepot dez herten ires vaters kome der dem ersten poten gepot er die frawen mit fride liesse nach dem wider zů hern Amerigo keret was sich ergangen het, vnd wie sein tochter noch pey leben were; des der herre on masse
 30 frölich vnd wol ze mūt waz, zů dem erminischen hern kam im der tochter leben verkündet vnd sich gen im vnd seinem sun Theodoro entschuldiget vnnnd verzeichung begeret, sich erpote die tochter mit füglichem heymstetter Theodoro wo sein gefallen were zů einem weyb ze geben, das hern Phineo vnd auch des iungen grosser wille vnd gůt gefallen
 35 waz, Hern Amerigo antworten peyde iuncke vnd alte sprachen, Sy bereyt wern zethon sein gefallen Herr Phineo mer zů hern Amerigo sprache wo sein sun eins stůlchen nicht willich were, so were sein wille vnd meinung daz die gesprochen vrteyle iren gang hette; Also misere Amerige

vnd herr Phineo aller sache eins worden, vnd der iung aller erschrecken noch an dem ende do in sein vater mit den [204^d] schergen vnd dem hencker gelassen hett waz, doch aller wol ze müte das er seinen vater gefunden hette; Do peyde alte zû im ze komen mit grossen freüden vnd
 5 eren ze hause furten vnd do er vernam das Violante sein haußfrawe sein sölte, so grosse freüde do von enpfinge das in nit anders dauchte er auß der helle in den himel geflogen were, vnd sprach daz im besunder genade von got gegeben were; nür es ir gefallen were, Zû hant die iunge besant warde iren willenn ze versten, vnd do sy sölche potschaft vernam
 10 vnd was dem iungen irem aller liebsten zû gestanden was, vnd waz sich nun ergen sölte wo sy vor traurig vnd betrübet waz des todes ze warten; nun wider frölich vnd gütz mütes warde dem poten seiner red vnd potschaft gelaubet; Im antwort vnd sprache wo das geschehe sy sich die seligest frawe spreche aller welte mer freüde ich nicht haben möchte
 15 dann Theodoro weybe ze sein, Doch alweg ires vaters gepote vnd wille wolt bereyt sein; zû hant dar nach die czwey liebe einander zû der götlichen ee gegeben worden, mit grossenn freüden peyder party herlich [205^a] hochzeit machten; Die iunge edel fraw sich ires vnmütes wider trösten vnd sterckenn warde wider zû irer verloren esten schöne kame;
 20 das kind zû der ammen gabe, vnd do sie auß der kindelpette ginge schöner frawe nye mer gesechen warde zû irem swäher Ephineo ginge in mit grosser zucht vnd referencz eret, vnd er sy mit grossen freüden als sein leyplich tochter enphinge irer grossen schöne zuchte vnd tugent besunder freüde vnd wol gefallen hette, do man von neuem anhubte feste
 25 ze machen vnd er sy als seines suns weybe in seinen gewalte entpfinge, vnd nach vil manchen freüden vnd etlichen vergangen tagen mit ir vnd dem sune vnd iungen seinem tiechter auff sein schiffe sasse vnd wider in Erminia fuße do die czwey liebe in stetem fride lange zeit mit einander in freüden lebten.

30 [205^b] Anastasio ein frawen pület vnd von herczen liebe het alles das sein ir zû liebe ausgibet vnd an wirt, vnd von ir vnliebe gehalten ist seinen freüden zû liebe wege in die gegent genant Chiassi zoche, Do er einen ritter mit czweyenn hunden ein iunckfrawen iagen töten vnd zû reysen fand, vnd nach sölchem gesechen
 35 wunder er die iunckfrawen die er liebe hette mit sampt iren freüden zû hause lude auch sie daz wunder gesechen hette, sölches

auch besorget ir zû stünd vmb des willen den iungen Anastasio zû der götlichen ee nam.

Als palde frawe Lauretta irer rede geswigen was Philomena durch der künigin gepote anhuben vnd sprach; Ir lieben frawen! in geleicher
 5 masse als die tugent der diemütikeit pey vns frawen gelobet ist, Also auch die vntugent der hertikeit durch götliche recht pey vns dicke gestraffet würt, vnd do mit ich euch vrsache vnd materi geben müge vnd ir euch söllicher hertikeit entslagen müget. Ich euch ein neüe mere vnd histori sagen musse, nitt minder zû erparmen als dovon fretide ze nemen
 10 Darumb nemet war das ich euch sag [205^c] In der alten wirdigen stat Rafenna die in Romagna gelegen ist; in der vor zeiten vil edel vnd wirdig hern ir wonung hetten; vnder den ein iung edelman erzogen was mit namen genant Anastasy Henosti der nach seines vaters tode on masse grossen reichthum besasse; vnd er als der sich iuncke fröliche vnd
 15 on ein weybe fande als dann gern der iungen gewonheit ist in ein schöne edel iunckfrawen in liebe enczündet die was eines edel mannes tochter; der was genant her Paulus Trauersirer iuncke schön züchtig von wirdigem geperde vnd allen gûten syten edeler dann er waz, die er ye nach seiner hoffnung zû seinem willen meinete ze pringen vmb seiner edeln
 20 werck willen aber wiewol seine wercke vnd zuchte ze loben waren, doch in keinem wege ir weder liebten noch gefielen, sunder sie nit anders dauchte was er ir ze liebe thet ir mer schaden dann frumenn prechte, vmb des sy sich in allen sachen gen im herte vnd wilde beweyset, das mochte sy auch villeicht vmb ires adels willen thon oder sich villeicht ir
 25 schöne über neme vnd dauchte er ir ze pulen nit wirdig were; Das der iunge zû [205^d] gûter masse wol vernam vnd im schwer ze vertragen was im grossen schmerczen vnd pein pracht, dez er sich dicke beklaget vnd im willen waz im selbes das leben ze nemen; auch im ofte in seinem gemût für name ir als neyding ze wern als sy im waz, aber alle sölch
 30 gedanken verlorn warn; dann pey im nicht anders erschein dann ye minder sein hoffnung waz ye grösser sein priende liebe ward, Also gût zeite mitt vmessigem außgeben hoffiren stechen vnd prechen, als dann aller pueler gewonheit ist er sein leben füret, Daz nun nach etlicher vergangen zeyt seine fretünde vermercket hetten, vnd sie daucht er sich
 35 selbes mit sampt seinen in geleichem form enden wölte, vmb des willen in zû mer malenn genug hefftiglich ze rede seczten in paten vnd rieten das er für etliche zeit auß der stat Rafenna züge, wo er das thet on

czweyfel sein grosse vnmesseige speyse vnd liebe nachlassen würde; Aber
 auß söllichem seiner freünde rate er zů mer malen sein gespöte treyb;
 doch sie darumb nicht abe liessen Im stätz seines nucztes nach gedach-
 ten, Vmb des willen nun nicht wol mere möchte [206^a] nein sprechenn
 5 sich williget iren willen ze thon, vnd sich zů bereydet, als er in gar sere
 ferre lante reyten wölte, vnd Auf sasse vnd von vil manchen seinen
 gůten fretunden auß der stat Rafenna auff ein sein gesässe genant Thiasse
 drey meyle von der stat beleyt warde. Do er seine geczelde auflachen
 tet czů seinen gesellen sprach die in dar beleyt hetten Do er sein wo-
 10 nunge haben wölte, vnd das sie in dem namen gotz alle wider heym gen
 Rafenna riten; do er sich nider richtet anhuben im daz herlichest leben
 ze geben das von iungem manne nye mer waz weder gesehen noch ge-
 hört worden; taglich fremde geste zů hause geladen als dann sein alte
 gewonheit was. Nun nach etlicher vergangen zeit In dem eingange des
 15 meyen sich begabe daz gar ein schön lustig tage was vnd im sein gemüte
 sere betrübet was, vnd daz vmb der hertikeit seiner lieben willen, die er
 ob allen frawen der welte liebe het; Zů der stunde er allen seinen dienern
 gepote das sy in elleyne spaczirn gen liessen, damit sy in nicht irten vnd er
 mere mit gedancken seinem willen ein genügen thon möchte, vnnd [206^b]
 20 usse für fusse also allein in seinen schweren gedancken spacziren in einen
 grünen walt genant Pingneto bekame, vnd nun die fünffte stunde dez
 tages vergangen waz essen vnd trincken im vergessen was, auch einen
 gůten wege des waldes durch gangen het vnd in söllichem gen vnd
 gedenken im ein kleglich schreyen klagen vnd weynen frawen pilde
 25 geleihe zů gehöre kame, des willen seine süsse gedancke seiner iunck-
 frawen halben fallen liesse, sein haupt in die höche hube ze sechen
 daz wunder vnd kleglich weinen an disem wilden ende in dem finstern
 walde, vnd von ferre durch daz gedörne vnd wildnůß gen im lauffen
 sache ein schöne iunge frawen alle ploß vnd naked mit zerstreütem
 30 goldfarbem hare aller irer leyb von dörnen zerissen mit grossem kleg-
 lichen schreyen stätz genade zů got begern was aber daz czwen grosse
 hunde ir nach folgten stätz mit iren meütern scharpffen czen ir in irer
 plossen seyten lagen, vnd hinder ir vnd den hunden er einen ritter ze
 rosse komen sache; in seinem angesichte eytel czoren vnd in der rechten
 35 hant ein ploß swert domit er der schönen [206^c] frawen den tode ge-
 ben wolt vnd ir stätz mit grausamenn herten worten ze schreyen an sie
 her an sie sy muß von meiner hant sterben, Sölche dinge im groß
 forchte vnd erschrecken prachten, vnd vmb der vnglückeselikeit willen

grosses leyde hette der elendenn gern geholffen hette aber sich on alle waffen fand; doch ein grosses reyse zů seinen henden name den hunden vnd dem ritter entgegen kam, Das der ritter von ferren ersache; dem iungen Anastasio zů schrey vnd sprache Anastasio iunger man lasset
5 abe nitt bekümert euch der herten pösen frawen lasset die hunde schlaffen vnd ir lonen nāchdem sie verdienet hat! In disen worten die hunde die frawen pey iren diechern namen mit gewalt hielten In dem der ritter kame abe von rosse sasse; Anastasio zů im sprach Ich enweyß nit wer du pist der mich pey meinem namen genennet hat; dann ich dir
10 sage das mich daz ein vnbehercent vnd frōmde sache düncket an einen gewapenden ritter ein nackede frawen ze tōten, vnd von was hunde geiaget Zů gleicher weyse als ob sie ein wild were; ich sol sie fürware beschützen so ich peste mag. Zů dem [206^d] der ritter sprach, Nastasy ich waz mit dir auß einer stat geporn do du noch ein iunges kinde
15 wast zů den selben zeiten, ich her Guido genant, vnd in liebe in dise frawen enczündet was, als du in die von dem geslechte Trauersieri pist vnd vmb'irer pitern hertikeit willen die mir von ir peweist was; Ich als ein verczagter mit disem schwerte mir selbes den tode thet, vnd mir das leben nam; Darumb ich in die ewigen pein verdampt pin, vnd nach
20 sölchem meinem pösen ende nicht lang verging das diß pösse weyb die meines todes freūde hette auch starbe, vnd vmb sölcher sūde irer hertikeit zů mir vnd wol gefallen meines todes willen als die da nicht meinete das sie gesündet hette; sunder lone haben meinete; vmb des willen zů der ewigen pein verdampt ist, vnd als palde sie abe in die helle
25 kam mir vnd ir ze püsse geben warde wie sie mich flihen vnd ich ir als meinem tod feinde nach eylen solte, vnd als offt sy mir ze handen kam ich ir mit dem schwerte do mit ich mir den tode thet durch stechen sölte vnd ir das herte kalte vnliebe habent hercze darein weder lieb noch diemütikeyt nie kam; auß irem leyb nemen vnd [207^a] disen bunden zů
30 essen geben, als du wol sechen solte, vnd als palde das geschehen ist sy zů hant wider auf stet als wer sy nye getöt worden von mir zefflichen vnd ich ir von neuem nach volge als du gesechenn hast, das tue ich alle freytag zů diser stunde an disem end Ich sie also zů richte, als du sechen wirst vnd das als manche iare thon muß als manchen monet sy
35 mich mit irer hertikeit angefeint hat; Darumb ste vnd siche vnnd lasse mich der götlichen vrteyle ein genügen thon, vnd nicht widersecze dich dem der dein beschaffer gewesen ist. Do Nastasy des ritters rede vernam aller erschrockenlich stunde vnd alle seine hare im geperge gingen

sich zů rücke zoche die elenden iunge frawen erparmigliche ansache
vnd wartet was doch der ritter mit ir begen wölte, vnd do der ritter
sein rede geendet het als ein wütender hunt mit plosem swerte sie
durchrant die palde zů der erden sancke mit kleglicher stymme laute
5 schrey vnd genad begeret. Der ritter palde zů einem messer greyffe
ir den leybe öffnet daz hercz mit sampt dem ingeweyd dar aus nam vnd
das den hunden für warff; die als die hungrigen [207^b] leben daz alles
assen. darnach nicht lange verging sie gächling wider auffure als were
ir nye leyt geschehen, wege gen dem mere wercz flochen vnd der ritter
10 als er vormales gethon hette ir mit seinen hunden nachvolget, vnd dem
iungen palde auß seinem gesicht kamen. Dise gesechne dinge Ana-
stasio grosse forcht prachten, doch palde wider zů seinen vorigen ge-
dencken kam seiner lieben frawen halben, vnd im gedachte wie sölche
gesechne dinge im villeicht noch grossen nucze vnd formen pringen
15 möchten, seytmale es alle freytage geschehe; Die stat vnd das end gar
eben mercket vnd nach dem wider gen hauß wercz keret, vnd do es im
füglich was Er nach allen seinen freunden sante zů inen sprache lieben
herren vnd frunde ir habt euch lange in meinem nucze gemüet, das ich
von meinem puelen vnd vnnützen außgeben abe liesse, Des ich euch zů
20 liebe willig pin, wo ich einer kleinen genade von euch gewert pin, Das
ist ye die, das ir auf den nachstenn freytag mit sampt hern Paulus
Trauersirer seinem weyb vnd auch tochter her kumet mit mir ze essen
vnd ein kleine freud ze habenn; Die vrsache [207^c] warumb ich das
will gehabt haben ir sechen vnd vernemen weret. Das seinen freunden
25 kein müe was, wider gen Rauenna riten, vnd do sie die zeit vernamen
alle die luden die in ze laden Nastasy befolhen het; wie wol es in ein
klein müsam waz Die iunckfrawen die Nastasy liebe hette mit in ze
pringenn Doch do ir vater vnd müter geladen warn vnd zů Nastasy
riten sie nicht neine sprechen mochte mit ir reyte. Der iung edel man
30 ein herlich male zů bereyt hette vnd die tische vnd taffeln ze essen an
der stat vnd ende do der ritter die schönen frawen getöt hette vnter
einer grünen tannen zů bereyt het Do er seine freünde vnd geste mit
sampt seiner allerliebsten frawen zů tische seczet damit sie das wunder
sechen das er den nächsten freytag dar vor gesechen hette, sunder sein
35 allerliebste daz seche die im also herte was, vnd in dem kommen der
leczten richte; der ritter mit seinem iagen kam, vnd das grosse kleglich
geschreye der geiagten frawen von allen den die ze tische sassen gehört
warde, des sich nicht verwundern mochten erschrockenlich ein ander

- sachen vnd fragten was doch das gesein möchte Aber keines dem andern nicht [207^d] gesagen kunde alle auff ire füsse stunden das wunderliche geschrey paß ze vernemen. In dem sy die armen elenden iungen schönen frawen gen inwercz flichen vnd lauffen sachen, vnd den
- 5 ritter mit plossem swerte vnd hundenn ir nachvolgen, vnd do sy nachent zû in kame etliche von den edeln person ir entgegen ir ze helfen kommen; Des der ritter palde war nam zû in schrey vnd sprache als er zû Nastasy gesprochen hett, vnd nicht allein sy mit seinem grausamen geschrey ze rücke keret sunder alle erschrecken vnd wundern machet;
- 10 Zû hant anhub vnd thet als er ze vil manch malen gethon het, vnd vil manche fraw do gegenwürtig was die der elenden gemarterten frawen freundin vnd von irem geslechte geporen waren, Sy vnnnd den ritter gar wol kanten vnd in peyder tode vnd des ritters grosse hulde vnd liebe zû ir kunt vnd wissen was, alle die elenden iungen frauen weinten vnd
- 15 klagten in geleichner masse als were in selbes ein sölches zû gestandenn, Also piß in das ende was der ritter mit der frawen thet sechen, Der ritter vnd auch die fraw den erbern person gar mancherley rede vnnnd gespreche zû [208^a] prachten, doch vil mere der iungen die von Nastasy liebe gehalten was dann yemant anders Die alle sache sichperlich
- 20 gesechen vnd auch die ursach sölchen eins vernomen het wol vernam vnd ir gedachte ein sölches sy mere dann yemant anders antreffe der da gegenwürtig was darumb betrübet in den tode; Ir grosse hertigkeit wider Nastasy bedencken was, die sy im so lange zeyte beweist hette, anhub sich bedüncken liesse wie sy vor Nastasy floche vnd wie er ir
- 25 mit czweyen grossen hunden die ir stäcz an ir prüste hingenn nochvolget, vmb des willen ir grosse angste forcht vnd erschrecken ir hercze vnd gemüß durchgingen hundert iar dauchte das die finster nacht köme allen iren neyed vnd hasse den sy so lange zeit dem edelen iungen getragen hette von ir leget allen in grosse liebe vnd hulde keret, vnd des
- 30 selbenn nachtes ein ire getreue zû Nastasy sante in von iren wegen piten liesse, daz er sich nit verdrissen liesse zû ir ze komenn dann sie willig vnd bereyt were zethon sein gefallen, Nastasy der potschaft antwort vnd sprach zû ir ze komen er willig were vnd alzeit ze thon waz ir liebet vnd was mit peyden ern [208^b] vnd fromen gesein möchte, Dann
- 35 sein syn vnd meinunge were von ir nit anders ze begern dann alleine sy zû der götlichen ee ze haben, Die iunckfrawe die da wol weste das ein sölches an yemant anders dann alleine an ir gesprochen het im wider enpote alles daz im liebet ze thon ir gefallen wer Zû hant selbes zû

vater vnd muter ginge in ze wissen thet wie ir wille wer den iungen Nastasio für iren eman ze haben des sy willig vnd wol ze müte warn, vnd an dem nechsten suntag darnach die czwey liebe einander zû der ee gaben mit grossen freuden ir hochzeit machten frölich lebten, vnd
 5 sölche forcht als ir vernomen habt nicht dises sölches gûtz vrsache war, sunder allen rafenischen frawen sorg prachte hin für den mannen williger waren dann sy piß in zû der zeit gewesen was.

Wie Friderich Alberigo ein schöne frawen liebe hette, vnd von ir vnliebe gehabt waz, Ir zû liebe alles daz er het an warde auß-
 10 genommen einen seinen falcken den er ir eines tages an einer hennen stat ze essen gabe vmb den sy zû im komen waz in zû begeren aber im vmb des willen sy dar komen was nicht mer auch wissent was [208^c] vnd do sie vernam daz sy den falcken gessen het; in wider-
 15 kerung sölches ir gemüte sich gen im neyget; in für iren ee man name wider reiche vnd selig machet.

Frawe Philomena irer rede gewigen was vnd frawe künigin vername nyemant anders dann allein Dioneo der alwege der lezte waz zesagen; Darumb vnuerczogen selbes anhub vnd sprach Vnd ich mein allerliebsten frawen etlich ein neüe histori sagen mein, gar sere der ge-
 20 sagten histori geleiche, vmd damit kunt werde waz eüer lieplich schöne in den edeln herczen vermage, vund auch damit ir leret eüer selbes geber; ze sein wo euch hin liebet, vnd nicht das alweg das gelück thon lasset, das on alle masse mer dann ir selbes im geit wer im darzû liebet vnd gefellet, Darumb wisset wie einer in vnser stat was vnd noch vil-
 25 leicht ist; Ein gar erber wirdig man mer edel von kunste tugent vnd lernung dann von plüte geporn ein weyse fürsichtig man wirdig ewig lobes, do pey ein alte betaget man vnd grosse freude im nam mit andern persion von den alten vergangen dinge zesagen daz [208^d] er mer dann kein ander man mit ordnung vnd grosser gedechtnuß hübschem reden
 30 tun kunde, vnd vnder andern seinen historien er gewonet waz vil dise ze sagen, Wie einest ein iunger in vnser stat wonet mit namen genant Friderich Alberigo, ein züchtig weise fürneme man in kriegenn vnd streyten, milte über alle man des landes Tuschana, der selbig als dann gern edler person gewonheit ist zû einer edeln frawent genant frawe
 35 Giouanna in grosse liebe enczündet; die zû der zeit die schönest frawe vnser stat gehalten waz vnd do mit sy im irer liebe vergündet vnd in

der teylhaftige machet er vmb iren willen stache vnd prache grosses
 hoffirn ir ze liebe thet, also daz sein on alle masse außgabe vnnnd an
 warde; Aber die edel frawe nicht minder züchtig vnd ernreiche als
 schöne was, Vnd was der iunge vmb iren willen tet sie kein acht hette
 5 Also er nach allem seinen vermügen ir zû liebe das sein außgabe, vnd
 irer hulde ferrer waz dann do er ir kein kuntschaft hette vnd in sölchem
 seinen vnmessigen außgeben sein gût abename. in grosse not vnd armûte
 kam im nit anders beliben was dann ein hoffe auf einem [209^a] dorffe,
 darauf er genug armglichen sein wesen fûret, doch von adel vnd tugent
 10 beczwungen was stâcz einen falcken ze halten Den er het also gût das
 des gleichen nymer waz gesehen worden, auch seines puelen vnd liebe
 haben noch nicht abgelaßen het auf seinem hoffe so er pest mocht sein
 armût mit gedult leyde, vnd mit seinem edeln falcken mit peysen sein
 zeit vertreyb; In dem sich eines tages begabe das der edeln frawen man
 15 dieFriderich also liebe het starbe, vnd mit tode ab ging, vnd einen eyni-
 gen sun den er het alles daz er hette erben liesse, vnd wo der selbig sein
 sun on erben abe ginge er die frawen dez iungen mûter erbe machet,
 nach sölchem geschefte palde zû der andern welte fure, also die erber
 edel frawe ein witib beleybe, vnd als vnser frawen gern gewonheit ist,
 20 In dem sumer auf ire dörffer zû farn, also auch frawe Giouanna thet,
 vnd mit irem sun aus der stat auf ir dorffe daz nicht ferre von Frideri-
 chen dorffe waz zoche Do der iunge ir sun Friderich grosse kuntschaft
 name, vil mit im fogeln vnd peysen ginge vnd Friderichen falcken offte
 hette fligen sechen den zû haben von ganzem herczenn [209^b] begereu
 25 was, doch so beherczent nicht was in an Friderichen begern; dann wol
 vernam vnd sache das in Friderich ob allen dingen liebe hette In söl-
 chem sich fûget daz der iunge in schwer groß kranckheit fiele, das seiner
 mûter besunder pein leyd vnd schmerzen prachte, als die da nyemant
 anders het dar zû ir hoffnung grösser wer als zû im alzeit im mit trösten
 30 an seinem halse hinge in stâcz fraget ob er zû keinerley lust oder willen
 het, in pate das er sy das wissen liesse; dann kein dinge im zû liebe ir
 ze schwere were, vnd wo sy des, des er begern were nicht hette sy söl-
 chen fleyß thon wölt daz im das on czweyfel wern sölte; Der iunge knob
 der mûter gûten willen wol vernam, zû ir sprach mein aller liebste frawe
 35 vnd mûter schaft ir daz mir Friderichs falcken würt so czweyfelt mir
 nicht mein gesunde mir pald wider kem. Do das die edel fraw vernam
 ein klein auf ir selbes stund bedencken warde wez sie sich halten sölte
 do mit ir der falcke werden möchte Dann ir wol kunt vnd wissent was

das Friderich den falcken on masse liebe het, vnd auch das sy Friderich also lang zeit gepuelet het zů ir selbs sprach [209^c] wie thue ich schicke ich oder gee ich selbes an den falcken an in ze begern dann ich dicke vernomen hab wie es der peste falcke sey der ye walde überfloge, vnd
 5 auch der sey der Friderichen pey leben auf erden halte. Nun besorge ich mir werde übel darvmb gesprochen das ich also armen edeln mane als Friderich ist dem nicht anders dann dise freüde dez falcken beliben ist im die ze nemen. In sölchen gedancken die frawe güt zeit stunde vnd sich betrübet fande nicht wol besynnen kund wes sy sich halten
 10 sölte den falcken ze haben Auch wol bedacht daz sy sich nye gen Friderichen; Nür mit einem lieplichen ansechen oder anpicke erczeyget hette, vmb des willen sie czweyfelt den falcken zů haben, vnd nit weste was sie dem sun sölte zů antwort geben; darumb stille sweyge; Doch nach langem bedencken, vnd von grosser liebe des suns beczwungen sich
 15 schicket dem sune zů liebe zewern vnd selbes den falcken an Friderich begern; Zů dem sun sprach liebes kint gehab dich wol vnd nym dir einen gůten můt gedencke gesunt ze wern Ich versprich dir als palde morgen kompt daz erste das ich tun sol daz sein daz ich [209^d] dir pringenn sol. Do das der iunge vernam grosse freüde enpfinge vnd den
 20 selben tag vnd nacht sich ein klein pessern thet, vnd als palde der ander morgen komen was die edel frawe ir gesellschaft nam als ob sie spacziren gen wölte zů Friderich ginge, der des selben tages noch nicht was vogeln gangen vnd in einen seinen garten was sein arbeit an ze richten den garten ze pauen; In dem er vernam das Giouanna in dem hause was, vnd
 25 nach im fraget. Das in gar ein fremde sache dauchte frölich pald zů hause lieffe do er die frawen siczen vnd ruen fande, die mit einem zůchtigen lieplichen geperde auf stunde; im entgegen kam von im freuntlichen empfangen ward vnd sie zů im sprach wol ste vnser Friderich, vnd wisse daz ich her zů dir komen pin dir wider ze kern dein verlorne zeit
 30 vmb meinen willen. In deinem liebehaben, vnd auf disen morgen mit meiner gesellschaft mit dir das male essen wil, Auff sölche rede ir Friderich diemütiglich antwortet vnd sprach? frawe mir gedencket keines schaden noch verlornen zeit die ich vmb eüern willen empfangen hab, sunder von euch mir ere vnnd zucht [210^a] stäcz zů gestanden ist, vnd
 35 vmb liebe willen die ich euch stäcz getragen hab ich wol vernym etter milte diemütigkeit beweget ist her zů mir in mein armes kleynes heußlein ze komen, vmb des willen grosser freüde zů diser stund mir nit möchten gegeben werden wie wole ich nicht vermügent pin auß ze geben als ich

gewesen pin vnd vormals gethon hab Darumb ir mit mir wert ein klein gedult haben, wo ich aber vermügent were ich nitt minder thät als ich im dem vergangen vmb ettern willen gethon habe noch thäte, wie wol ir zů einem armen wirte auf disen morgen komen seyt doch sein wille
5 gen euch gancz güt ist, also geret vnd züchtiglichen empfangen, sy mit im in seinen garten furte zů ir sprache frawe lasset euch nit verdrliessenn, hie meines gartner weybe sol euch gesellschafte thon, also lange das ich zů essen den tisch gericht hab, wie wol des güten mannes armüt grosse was, vnd mit keynerley zů seiner nottorfft versechen was, dann als ir
10 oben vernomen habt allen seinen reichthum on masse außgeben het vnd auf disen morgen der edeln frawen vmb der willen er vil manchen erbern man vnd frawen geerte hette nicht hette [210^b] domit er sie geern möcht vmb des willen sich sein selbs schamet vnd betrübet sein vngelücke vermaledeyt zů gleicher weyse als wer er von synnen komen, her vnd dar
15 lieffe weder gelte noch pfande fande weder ze kauffen noch ze verseczen hette, vnd nun sere spate was vnd sein wille die frawen zů eren grosse was, nicht alleine seine nachpern sunder auch zů seinen armen arbetern vmb hilffe lieffe anruffet, In sölchem seinen her vnd dare lauffen im sein schöner edeler falcke auf der stangen zů gesichte kam, vnd do er nit
20 anders von hünern oder wilpret gehaben mocht, domit er sein liebe frawen geeren möcht, denselben seinen edeln falcken zů seinen henden name der da wol gespeyset vnd feyste waz wol gedacht er ein wirdige speyse sölcher edeln frawen were, vnd on anders bedenckenn im palde den halse zoche vnd seiner meyde ze raufen vnd praten gabe. In dem
25 er den tische mit schneweissen tüchern decket der im noch etliche beliben waren; nach dem mit frölichem angesicht sich wider in den garten zů der edeln frawen füget zů ir freuntlich sprach daz essen vnd speyse die er ir geben möcht bereyt were die frawe mit irer gesellschaft mit im ze tische [210^c] ginge; Aber waz sie asse ir nit wissent was noch ver-
30 nemen mocht, vnd er ir mit allem fleyß vnd seinem vermügen ze tische dienet; also den edeln falcken assen, nach dem von der tafeln mit züchtigem gespreche aufstunden; In dem die frawe zeit dauchte das an in ze pringen vmb des willen sie dar komen waz, gar züchtiglich wider Friderich anhub vnd sprache? Friderich als dir wol ingedencke ist
35 deines vergangen leben, vnd auch meiner eren halben dar inne du mich villeicht in hertikeit gen dir verdacht hast, Doch hoff ich dein weißheit mir daz in keinen argen aufgenommen hab mir mein ere meinem manne vnd kinde zů beschützen als ich dann der götlichen ee ze thon pin. Auf

sölche hoffnung ich her zû dir komen pin, vnd auch ob sich ymmer begeb
daz dir got kinder bescheret das dir auch kunt würde was stercke die
liebe hett die vater vnd muter zû kinden haben, wo dir ein sölches
wissent were, so czwifelt mir nit dich nicht fremd neme vmb des willen
5 ich her zû dir komen pin, Nune ich als dir wissent ist kinder hab
darumb ich nicht flichen mag die stercke kintlicher liebe ir nach als
ander müter tun fo[210^d]gen musse vnd über allen schaden vnd wider-
drisse der dir vmb meinen willen zû gestanden ist; Ich noch eines an
dich begere des du ob allem das dir am leibsten ist begeren musse
10 als dann wol pillich ist es dir am liebsten sey dann das vnselig gelücke
dir nitt anders gelassen hat, vnd sölche gabe der ich an dich begeren
pin das ist dein edeler gûter falcke, zû dem mein sune so grosse liebe
vnd willen empfangen hat, das ich fürchte vnd besorge wo ich im den
nicht pringe ich in seiner kranchheit die da schwer ist nicht verliesse;
15 Darumb ich dich freüntlich pite vmb der grossen liebe willen die du
mir so lange zeit getragen hast du lassest mich meiner hertigkeit gen
dir nit engelten, vnd wöllest mir mit deinem falcken ze liebe vnd willen
wern, Damit ich vmb sölcher deiner gabe willen sprechen müg ich mei-
nen sun von dem tode zû dem leben erquicket habe; Darumb ich dir
20 ewig in widerkerung sol verpunden sein; do der arm edelman der
frawen begeren vername vnd ir nicht gedienen mocht, betrübter dann
man auf erden, dann sy den falcken peyde gessen hetten, vnd gegen-
würtig ir vnd irer gesel[211^a]schaft on all red vnd antwort kleglichen
als ein wolgeslagen kinde anhub ze weynen Das die frawen fremd nam
25 vnd von erste meinete er darumb im so grossenn vnmüte neme das er
den falcken lassen sölte, vnd in willen was ze sprechen sy des falcken
nit enwölt; doch sich des enthielte vnd schweyge Friderichen antwort
wartet; Der nach langem klagen also sprach; mein aller liebste frawe,
Seytmal es gotz vnd der liebe gefallen was daz ich euch mein hulde vnd
30 liebe geben sölte; in dem mir das gelücke alzeit ist widerwertig ge-
wesen, des ich mich vil dicke beklaget hab, Aber alles nichte gewesen
ist gegen dem das mir auf dise stund zû gestanden ist, Darumb ich mich
on allenn fride vnd vnseliger dann man auff erden sprechen mag wenn
ich bedencke daz euer diemütikeit mich in meiner armüt gewirdiget hat
35 zû mir ze komen, vnd do ich reich vnd mechtig waz ir mich nicht eßer
hulde nitt würdig schätzet, vnd nun also kleiner gabe an mich begern
seyt, vnd es sich vmb mich begeben hat got sey es geklagt das ich
euch sölcher gabe nitt gewern mage, das ist mein leyte vnd klage vnd

das pwei[211^b]nen muß, vnd warumb das nicht gesein mage das vernemet! Doch ich etter zükunft verneme vnd das ir mit mir daz male essen wöltet angesehen etter adel zucht vnd ere; Darumb ich euch des nach meinem vermügen das ich an dem liebsten hette wirdig schäczet
 5 vnd mir mein edel falcke zü gedancke kam den ir an mich begert habt, Des güte euch zü einer speyse vnd essen ich wirdig achtet vnd ir in auf disen morgen gepratten gessen habt den ich nach meinem gedüncken gar wol meinete angelegt hette, Aber seytmal ir sein in ander meynung begeren seyt; vnd ich euch mit dem nit mag ze liebe wern das
 10 ist mir von herzen leyte vnd pringet mir besunder pein vnd smerczen; vnd mir des nymmer fride gibe die weyle ich lebe. vnd damit die edel fraw als er gesprochen het des die warheit verneme, ir des falcken gefider die füsse vnd das haubte für ire füsse zü einer geczeticknüss sein meyte werffen schuffe, do daz die frawe sache sere übel zemüte; in
 15 darumb straffet das er also einen edeln falcken einer frawen ze liebe getöt vnd zü essen geben hette, Doch sein edel hohes gemüte im sein grosse armüt nicht hat min[211^c]dern mügn sy mit ir selbes das sere lobet, Also sy des falcken halben on alle hoffnung beleybte grossen vn-
 20 müte hette vmb des sunes willen, daz vrlaub von Friderich name wider zü hause kam, vnd do der sun des falcken pey der muter nitt sache aller übel ze mute daz er den falcken nicht gehalten mocht vrsache eins vnd anders nit vil tage vergingen er mit grosser pein leyt vnd smerczen seiner muter auß diser welte schiede; Die güte frawe sich noch iuncke dapey reich vnd mechtig vnd vil von iren prüdern vnd freun-
 25 denn getröst warde wider einen man ze nemen das ir stätz wider was Doch do sie sach daz es ire prüder ye wolten gehabt haben sy einen noch ir selbes willen nemen meinete, vnd ires Friderich grosse treüe liebe zucht vnd ere zü ir gar wol bedencken warde vnd wie er vmb iren willen so grosses güte verczert hette vnd zü lezte ir ze liebe also
 30 einen edeln falcken getöt hette; zü iren prüdern sprach Ich wölt gern ein witib sten wo es etter gefallen wer Aber seytmal es euch nit liebet vnd etter gefallen ist das ich zü der götlichen ee greyff so seyt gewise daz mich kein ander man mer beslaffen sol, [211^d] dann alleine Friderich Alberigo Darauß ire prüder ir gespöte machten vnd sprachen
 35 du eynfeltige frawe waz sagestu waz wiltu sein nu hat er doch nit mer in diser welt; denn sy antwort vnd sprach lieben prüder ir saget ware; aber ich will lieber einen man haben der reichthum nottorftig ist Dann reichthum der eines mannes nottorftig sey. Do nun die prüder der fra-

wen gute meinung vernamen vnd Friderichen einen redlichen man erkan-
ten, wol er arm was, vnd als der frawen wille was den irenn auch darzü
gaben, vnd sy Friderich mit allem irem reichthum zü der götlichen ee
gaben vnd er der die frawen also lange zeit gefreyt vnd liebe gehabt
5 hette iczund sein eliche frawe sache fröer vnd paß ze müte dann man
auf erden nye warde, allen iren reichthum besaß lange zeit mit einander
in freüden lebten vnd nach disem leben got wölle sy besessen haben das
ewig leben Amen.

Peter Vinchola mit einem seinen guten freünde vnd gesellen
10 das nachtmal essen get, in dem sein weybe ir einen iungen schönen
knaben zü ir schaffte komen mit dem ir freüde ze haben in dem
Peter vngessen wider ze hause komet [212^a] der frawen saget wie
seines gesellen weib mit dem er essen sölt einen iungen knaben in
dem hause verporgen hette, den ir man fande darauß sich grosse
15 schande begeben hette vmb des willen er wider heym essen komenn
were das sein weybe der andern sere verübel hette ir übel redet
vnd fluchet, In sölchem reden sich füget Ein esell ledig in dem hause
vmb ginge zü einem korb kam darauff grasse lag vnder dem die gut
fraw iren iungen knaben vnd puelen verporgen het dem der esell
20 auf einen finger drate das der gut iunge on schreyen nit verdragen
mocht mit hoher stymme schrey awe mir meiner hant! Do das
Peter höret palde zü dem korbe lieffe der frawen betriegen erkante
die seines gesellen weib so übel vmb der verlossen sach zü geret
hett, Peter sich mit der frawen palde einet vnd frid machet vnd nicht
25 minder dem iungen wol ze müte vnd content als sein weybe was.

Der edeln frawen vnd künigin rede zü ende komen ist vnd von der
schönen gesellschaft on masse gelobet was, das Friderich von der die er
ob allen frawen lieb hette so erberlich seinen lone entp[212^b]fienge; In
dem Dioneo vername fürpaß ze sagen an im was vngepiten anhuben vnd
30 sprach; Ir lieben frawen ich kan nicht bedencken waz vntugent das ge-
sein mage, oder warumb sich ein sölche gewonheit in den tötlichen be-
gibet, oder ob ein sölches natürlicher sünde schulde ist, vil ee vnd mere
pöser vnnützer schamper wercke ze lachen dann der gütten, sunder
wann sie vns nitt zü gehörs; Darumb ich mich als ich dann vormals ge-
35 thon habe mich ze müen allein eüch freüde ze geben do mit ir frölich
lachen vnd eüers vnmütes vergessen müget, wie wol die materi meiner

histori vnd netten mere mein allerliebsten frawen etwas minder dann
züchtig ze sagen ist Doch ich darumb nicht gelassen mage das euch ye
sagen musse, doch dar nach thut waz euch liebet vnd ir ze tun gewonet
seyt wann ir in den schönen lustigen garten komet etwere hend nach den
5 schönen rosen strecket ab prechte vnd die dörne sten lasset, Also auch
ir den pösen man do von ich euch sagen meine mit seiner vnzucht zů
der helle faren lasset, Vnd wie in sein frawe in irer prinenden liebe be-
troge des ir frölich lachen sült, vnd auch do [212^c] pey wo es not thut
euch ander frawen vngelücke lasset leytt sein. Darumb eben mercket
10 vnd nemet war Es ist nit lange vergangen das in der edelen stat Parusa
ein reiche man gesessen was mit namen genant Peter Finckler der vil-
leicht mer ander leütt ze betrie nach dem vil mancher meynung was
dann sein selbes lobe zů mern, Ein schöne iunckfrawen zů einem weybe
nam, doch mere zů einer außrede dann zů dem darzů frawen pilde be-
15 schaffen ist. In dem im daz gelücke eine zů füget genug seines gleichen
vnd seinem pösen willen, Dann die frawe iunck schöne vnd frisch was
wol geschicket rößlicher farbe vil lieber czwen oder drey man zů der ee
gewölt hette dann einen alleine, vnd zů irem gelücke ir einer gegeben
ward des syn vnd gemüt anderswo hin stunde vnd geschickt waz dann
20 zů ir; Daz die fraw nach etlicher zeit mercket vnd wol vername, als die
sich iuncke vnd frölich sache mere mannes dann anders begern was,
vnd do sie ires mannes pöse gewonheit erkante vnd vermercket het sich
mit im betrübet vnd vneins mit einander worden Ein vnfrölich leben
mit ein[212^d]ander fürten, vnd die frawe ir kettsches leben wider iren
25 willen bedencken warde on czweyfel meinete solte sie das lange zeit trey-
ben es ir schaden prechte, Als die da in irer plüenden iugent was, Dann
der man des nachtes ze pette ir in keinen wege wolt genade haben vnd
solte sy in einer kalten winternacht erfroren sein so het er ir doch nicht
gedeket, vmb des willen ir gedachte, syn ze finden damit sy ze zeiten
30 von manne bedeckt würde; zů ir selbes sprache diser pöser mein man
mich vnbedeket sten läste vmb ander seiner vnzüchtigen vnkettschen
püberey willen, vnd auf holczschuhen pey truckem weter get Darumb
ich mich fleißen vnd fürsechen musse das ich pey nassem weter ander
lette mit truckem fusse in ein schiffe secze, Ich name in für meinen ee
35 man vnd gab im grosse heymstetter, vnd gelaubet er were ein man vnd
meynet er were als ander manne sein die ire schöne frawen liebe vnd
wert haben, Solt ich aber gelaubt haben das er gewesen were als er ist
ich hett sein mir zů einem manne nitt gewünscht; Dann im solt wol wis-

sent gewesen sein daz ich [213^a] ein webe vnd nicht ein man waz war-
 umb nam er mich zů einen weyb do im weybs pilde also vnczame vnd
 wider sein natur vnd gemüte waz! werlich werlich ich sol im das nitt
 lenger vertragen; Dann hett ich nicht wöllen an der welte sein ich het
 5 mich zů einer nunnan in ein kloster gemachet, Aber ich hab wöllen sein
 als ich pin; Aber sol ich von dem pösen man natürlicher freüd vnd luste
 warten sein, so besorge ich wölle ich des warten; ich do pey eralte,
 wenn ich dann eraltet pin vnd mein verlorne iugent bedencken würde;
 darinne er mich als er sich an andern enden gethon hat sölt getröst
 10 vnnd mir freüde geben haben; sölicher lust vnd freüde pey vns peyden
 were götlich gůt vnd löblich gewesen wo sich noch darauß grosse
 schande vnd laster begeben möchte wo ich die götlichen gesetze der ee
 über ginge, als besorglich ist ich tun müsse, vnd der vnnütz pöß man
 nicht alleine wider die gesecz sunder alle natürliche recht thut, Also die
 15 gůte frawe ir müt ires pöses mannes vil dicke bedachte, nach dem ir
 fürnam ir gelücke wo sie möcht auch in stille vnd geheym zů suchen
 vnd irem willenn ein genügen thon vnd mit einem [213^b] alten weybe
 die sand Guardiania daucht die wir gemalet sechen den slangen ze essen
 geben stätz mit dem pater noster in der hant die genad in allen kirchen
 20 ze sůchen, vnd von keinerley nymmer anders dann von der heiligen
 leben vnd irer marter saget der heiligen fünf wunden sand Francisco
 nymmer vergasse, Dieselbig von yederman gar für ein heilige frawen
 gehalten was, Der die iunge frawe allen iren geprechen vnd meinung
 genczlichen saget vnd ir zů wissenn thet Zů der das alte weyb sprach
 25 mein liebe tochter allein got dem alle ding kunt sein pey dem ich dir
 swer daz du recht hast vnd ich kan dir dar über kein vnrecht sprehen,
 vnd wenn du ein söliches vmb ander vrsache willen thättest so söltest du
 vnd ein iglich iunge fraw daz thon damit sie nicht die zeyt irer schönen
 iugen on nucze vnd freüde also verlüre, dann kein pein vnd smercen
 30 ist dem geliche wer sein verlorne zeyt recht bedencken wil, dann wel-
 cher teüffel will vnser begeren, oder zů we sey wir nůcze wann wir alte
 sein dann allein; der aschen vnd des herdes zů hüten, vnd ob ye keine
 ward oder ist die des gůte zeugnůß geben müge so pin ich die selbig
 die sich alt vnd vngestalt [213^c] sicht vnd daz nit mit kleiner pein mei-
 35 nes herzen daz ich on alle freüde mein iunge zeit also verlorn vnd vn-
 nůczlich hab gen lassen wie wol ich ir doch so genczlich nicht verlose
 als du villeicht piß her getun habest, doch nit darumb gelaube das ich
 ein pūbin oder pfaffin weybe gewesen sey, wie wol ich het thon mügen

was mir gelibet het, vnd wenn ich bedencke vnd mich sich vnd finde als
 du wol sichest, vnd nicht finde der mir nür ein fetter reichet, darumb
 gedencck waz pein mir das mag sein; Ein solches sich pey den mannen
 nicht begibt dann sie sein zů mancherley ander sachen beschaffenn; dar-
 5 zů wir nicht dügen der frawen willen ze thon, Aber die frawen alleine
 beschaffen sein daz ze tun du vernymest mich wol, vnd kinder ze tragen
 darumb sein sie lieb gehalten vnd ob du ye vernomen hast so soltu es
 da pey mercken daz wir den manne alzeit bereyt sein, das pegibt sich
 pey den manne nicht, über daz ein iglich fraw vil manche manne müde
 10 rite wo vil manne ein frawen alleine nicht müde gereyten möchten zů
 dem wir geporn sein Mere ich dir sag das du deinem manne recht tuste;
 im prote für kuchen wider ze geben [213^d] damit er in deinem alter
 nicht sprechen müg dein verheyter chad, warumb nomest du es nit do es
 dir werden mochte Dann wir frawen vil mer die zeite prauchen müssen
 15 wenn sie vns wern mag dann die manne als du wol sichest wenn wir alte
 sein das vns weder vnser manne noch ander mere weder sechen noch
 hörenn wöllen vns stäcz in die küchen iagen das fetter zů schürn märe
 vnd pater noster mit den kaczen ze sagen die alten heffen vnd schüsseln
 zů zelen, auch noch vil mere vnd erger sy von vns singen sagen vnd spre-
 20 chen den iungen sol man wol thon vnd die alten gen laun Der iungen ein
 güten capaun der alten ein grossenn tremel vnd bastan, Sölche ire abeyß
 vnd gespötte sie mit vns treiben, Mer ich dir ze wissen tů domit ich dich nit
 lenger mit worten aufhalte, daz du dich keiner person in diser welte dein
 nottorft mit mere sicherung deiner eren hettest erklagen vnd sagen mügen
 25 als du mir hast than mügen, vnd die dir pesser zů deiner nottorffte sein
 müge als ich dir sein sol Dann kein iunger man in der stat nicht ist mit
 dem ich nitt frölich mein nottorft sagen düre, auch so grobe vnd herte
 [214^a] ich keinen erkenne das ich in nicht mit meinen worten erbeiche
 vnd zů meinem willen pringe, laß mich nür versten welicher dir am lieb-
 30 sten ist, nach dem lasse mich schaffen Aber eins ich dir gedencke, mein
 liebe tochter lasse mich dir in meiner armüt befolhen sein dann ich hab
 nicht, pin elende arm vnd hab nyemant der für mich sey, so wille ich
 dich aller genaden die ich täglich von allen kirchen hole mit sampt mei-
 nen heiligen pater noster taylhaftig machen, domit dir got dein verlorne
 35 zeit wider kere vnd dir deine vergangne toten mit dem ewigen liecht
 seiner genaden erlütchte; In dem das alte weyb von irer rede abe-
 liesse, vnd die iunge mit ir aller sache eins warde, vnd sy freüntlich pat
 wo ir ein iunger knabe der gar vil do für ginge ze handen köme der ir

ob allen andern iungen gefiele, das sie dem selben zû spreche vnd ir den ze wegenn prechte do pey ir alle zeichenn sein gabe, zû ir sprache das sy allen iren fleiß anleget sy sölte sein nit entgelten, vnd gabe ir ein gût stück fleisch von dem sweinen pachen mit dem sie von ir schiede;

5 Nach dem nitt vil tage verginge daz alte wei[214^b]be den iungen knaben zû der schönen frawen prachte nach dem selben einen andern als vil ir die frawe begeret vnd ir gefallen waz als vil sy ir ze wegen prachte, doch das alles in geheyme vnd verporgen vor dem manne damit sy in keinem argen von im möchte verdacht wern. Nun eines abencz sich be-

10 gabe das der frawen mane mit einem seinem gesellen genant Hercolano daz nachmale essen gangen waz, do die iung fraw vernam das der man anderß wo essen ginge, sy dem alten weyb gepote das sie ir ein iungen knaben komen thete der in der ganczen stat Parusa der schönest iüngling gehalten was, Das die alte palde außricht in zû ir prachte, vnd do

15 sich die schöne frawe mit dem iungen das nachmale ze essen zû tische geseczet het; In dem der man wider zû hause kam an die türe klopffet im schuff auff thon, Des die fraw sere erschracke sich tode hielt den iungen nicht weste wo hine den doch solte zû pringenn, doch nahent do pey do sy gessen hetten an dem tenne ein korb was dar auf graß lage

20 vnder den sie den gûten iungen verparg einen alten sacke darauf warffe das gethon palde lief[214^c]fe dem man auf thet, do er in daz hauß kam die fraw zû im sprach; Nun wie habt ir so palde gessen vnd das nachmale so gächling verslunden, Er ir antwort vnd sprach; werlich weybe wir haben sein nit pissen versucht? wie kömpt daz sprach die frawe;

25 Peter sprache das will ich dir sagen. Do wir aller dinge mit einander zû tische gesessen warn do höret wir nahent pey vns vnter der stiegen husten des wir dez ersten noch andern male nicht acht namen vnd zû dem dritten vierden vnd fünften male er fester hustet vnd nießet das vns alle frömde nam, vnd Hercolano der mit dem weybe ein klein zornig

30 was das sy vns mit dem essen also lange verczogen hette vnd vns auch an der türe ein gûte weyle hette sten lassen mit grossem zoren zû ir sprach? was bedeit das huesten? was wille daz sprehen das ich da höre wer ist vnder der stiegen palde auf von dem tische fure zû der stiegenn lieffe dar vnder ein behalter was von pratern gemacht, als man gemei-

35 niglichen vnter den stiegen thut; die türe des behalter auf thet als palde er daz geöffnet hette ein grosser pöser geschmach von swebel daraus gienge den sy ob dem tisch auch geklaget vnd gerochen hetten [214^d] über daz selbig in die frawe an dem tische zû antwort

geben hette, wie sie ire schleyer mit swebel gewaschen hette, vnd den
selben scherben vnder die stiegen gesezet het, das wer das daz sy da
rüchen. Do nun Hercolano das türlein het auf gethan vnd der rauch
verrochen was er hin ein sache, vnd den der also sere gehust hette vnd
5 noch hustet ersache der von dem starcken rauch des swebels mit gewalt
hat husten müssen; doch sich in sölicher masse fande daz er nit vil mer
gehusten mocht nächner dem tode dann dem leben waz, als enge was
im vmb sein hercze worden das nit lang vergangen wer er wer ersticket
vnd do in Hercolano ersehen hett laut schrey vnd sprach, Nun siche
10 ich erste fraw warum du vns netlich so lange vor der türe sten hieltest;
Nun sol mir got nit helfen ich hab dir dann darumb den lon geben
deiner grossen falscheit, vnd gebe mir nymmer daz mir liebe, ich habe
mich dann an dir gerochen, do die güt fraw daz ir sünde endecket was
auff dem tische stunde wegefloche. Hercolano Zü dem der vnter der
15 stiegen lage sprach daz er her auß schlüffe fraget in? wer pistu? waz
tustu, Da aber kein antwort gehalten mocht sich nyndert [215^a] ver-
rüret als der da mere tod dann lebendig was, do daz Hercolano sache
in pey den füssen nam herauß an den tenne zoche palde vmb ein wesser
liefie vnd in meinete ze töten, vnd ich als der auf vnser herschaft sorge
20 hette im des nicht verhängen noch tun lassen wolt den güten gesellen
beschützet so ich peste mocht zü sölichem romore vnd geschrey die ganz
nachperschaft gelauffenn kam vnd im den iungen auß den henden namen
weg auß dem hause trügen ich enweyß nicht wohin, Also vmb der ver-
loffen sache willen vnser essen vnd nachtmale vns betrübet warde vnd
25 vnter wegen beliben ist, vnd daz nicht als du sprichest verschlunden
haben, sunder des nye pissen versucht haben; Do die fraw des mannes
red vernomen het ir gedacht auch ander frawen als weyßlich thon kün-
den als sy gethon hette, wie wol sich zü zeiten ir etlicher schande be-
köme vnd gern hette sie mit iren eren gemügt Hercolano weybe geholffen
30 vnd recht geben hette; Aber mit züchtiger straffe zü ander leuten sie
irer eygenn sünde meinete freyen wege ze geben; Darumb anhub zü dem
man sprach; ach [215^b] was güter heiligen frawen daz sein sol das sie
got schende, secht nür was getreuer efrawen sy irem fromen manne ge-
wesen ist, sy dauchte mich eytel zucht vnd ere ich het zü got für sie
35 gesworen; auch ist sy alt vnd bedaget vnd solte nun dalest andern iungen
frawen lere vnd peyspil sein verflucht sey sie das sie ye an die welte
kam, daz pöse vnnütze weyb sy solt sich in den tode schamen die schen-
derin aller erbern frawen diser stat Die ir ere also schentlichen hinge-

worffen hat, vnd die verpunden götlichen ee an irem man geprochen hat vnd alle ere diser welte so pöblich zû rücke geleget hat; Der sie in also grossen züchten vnd eren stäcz gehalten hat, vnd sie in mit sampt ir beschamet hette, vnd als mir got helffe sölcher frauen ich kein genade
5 het, man sölte sie töten vnd also lebendig begraben, In sölchen iren reden sy an iren iungen knaben der vnder dem korb verporgen was gedachte, vnnd zû manne sprache das er zû pette schlaffenn ginge, vnd Peter der mer willenn zû essen dann zû schlaffenn hette stäcz fraget ob sie icht ze essen hett Ia sprach die frawe es ist ser [215^c] mein gewon-
10 heit wenn du nit ze hauß pist vil für mich zekochen Ich pin villeicht Hercolano weybe, du thetest paß slaffen ze gen auf dise nacht, Nun waren auf dieselben nacht etliche paueren von Peter dorffe komen die hetten ire esell on essen, vnd in den stal gethon der nicht ferr von dann was, do der iunge knabe der frawen puele verporgen lage derselben esell einer
15 ledig ward vnd auß dem stalle an den tenne ginge vnd in sölchem hin vnd her gen zû dem korb darauf graß lage vnd darvnder der iung verporgen was, der vmb der enge willen des korbes auf allen vieren lage dann der korb gancz nider waz vmb des willen im die ein hante vnder dem korbe auf der erden herauß ginge vnd zû seinem gelücke oder vn-
20 gelücke der esell der vmb den korb naschen ginge im auf die hant drate, daz im grosse pein pracht, vmb wetung halben sich nit enthalten mocht laut schreyen must, daz selbig schreyen Peter höret vnd vernam vnd wol daucht daz schreyen in dem hause were zû der kamer türe auß lieffe, vnd den iungen vnder dem korbe sere klagen vnd weinen hört dann der
25 esell im noch auf den fingern mit dem fusse stund [215^d] Peter sich zû dem korbe nachent vnd fraget wer da were vnd wer sich do also klaget vnd den korb auf hube darvnder er den schönen iungen knaben fand, der da über allen seinen empfangen wetung forcht vnd erschrecken halben aller czittert seines leben von Peter besorget, vnd do Peter den
30 iungen sache vnd erkante als der im ze vil manch malen vmb püberey willen nachgefolget hette, zû im sprach gûter iunger was tûstu da wer hat dich machen her komen, der iunge in durch got pate er sölte im verzeichnen, zû dem Peter sprache nicht hab forchte, piß gûtz mûtz ste auf ich beger dir nicht ze thon sag mir nûr die warheit wer hat dich an
35 das ende pracht, Der iung im alle sache ze wissen thet, vnd Peter nit minder des gefunden iungen wol zû mûte als sein weyb des übel ze mûte was, den iungen pey der hant nam mit im in die kamern füret, do sein die frawe mit grosser forcht wartet zû der sich Peter seczt vnd

zů ir sprach weib wes düncket dich du verfluchest netlichenn Hercolano
 weibe vmb irer grossen sünde willen vnd sprachest man sōlt sy verpren-
 nen dann sy were aller frauen schande vnd laster? waz wil [216^a] tu
 nun von dir selbes sprechen Dann du als sy in derselben sünde pegraben
 5 pist, ir seyt alle über einen leyste gemacht vnd mit ander leüte übel
 thon eüere eygne sünde meint becken vnd verpergen; daz euch alle got
 schende vnd mit dem hymelichen feüer verpenne, do die frawe sache
 das ir in des mannes ersten czorn nicht übel zů stund, dann alleine
 wort vnd in ee frölich daucht dann czornig; dann den iungen stäcz pey
 10 der hant hielte vmb des willen sy ein gůt hercze fieng vnd sprach; Ich
 weyß wol daz es dein groß gefallen were das vns das wilde feüer ver-
 prante als der dem wir also liebe sen, als dem kunt der prügel ist;
 Aber ich versprich dir es sol dir allein nicht also gůte wern als du
 meinst vnd wölte nun dalest gern mit dir rechenschafft machen warumb
 15 du dich doch nūr klagest oder wez dir an mir entpricht; Ich laß mich
 bedünchen du wöllest mich gen Hercolano weybe schaczen, die ein heiligen
 küsserin ist, Doch do pey von Herchlano hat wes ir hercz begeret vnd er
 hat sy liebe als pillich ist vnd manne ire eweyber haben stullen des ich
 von dir nicht pin wie wol ich von dir gekleydt pin so weystu doch [216^b] wol
 20 wie ich von dir zů pette gedienet pin, vnd wie lange es ist das do pey
 mir nitt geschlafen hast! darumb wisse das ich lieber wölte zerissen gen
 dann wol gekleydet sein vnd in dem pette pas von dir gedecket vnd
 gehalten sein dann ich pin; Du solt wissenn das ich ein weybe als die
 andern sein pin hab lust als die andern, Ob ich mich selbes versiche
 25 des daz mir mangelt vnd von dir nicht habe, das sol mir nyemant in
 übel haben; ich pin von fleisch vnd plüte als du pist habe begire vnd
 willen, so thue ich dir doch dez ere das ich mich nicht ze pūben vnd
 schintfesseln lege, Also nach langem peyten Peter wol vername ire wort
 vnd rede auf dise nacht nit enden würden, als der irer red klein acht
 30 auch do bey hunger hette zů dem weybe sprach Nun wol lan frawe hōre
 deines reden auf sein ist nudalest ein genügen, ich solle dir des du
 willen hast vnd begeren pist zeliebe wern gee vnd gedencke das ze essen
 haben Dann für war mich gedüncket wie diser iunger geleiche als wol
 vnd als ich noch faste vnd zů nacht nit gessen hab fürwar nein er sprach
 35 die frawe er hat noch nicht gessen, [216^c] Dann do du an die tür
 klopfest do seczet wir vns ze tische Nun gee hin palde vnd schaff vns
 gar wol ze essen, In dem ich vnser aller sache in sölcher masse sol an
 richten das du nicht mere über mich solt ze klagen haben, Do die frawe

den man so willig vnd gůtz mutes sache palde aufstund den tisch richtet vnd die bereitten speyse komen thet die sie dem iungen ze essen bereyt hett vnnd mit sampt irem pösen man vnd iungen knaben frölich zů tische sasse vnnd gůtz můtz assen, vnd nach dem waz Peter sein̄er frauen wilen ein genügen ze thon an richt, vnd ir aller dreyer halben thet ist mir ze sagen vergessen, dann eines ist mir wol kunt vnd wissend den nachsten morgen darnach do der iunge auf der heren placze kame, im nit wol wissent waz welches von den czweyen die vergangen nacht die fraw oder der man pesser gesellschaft gehabt hette, Also wille ich zů euch sprechen ir mein allerliebsten frawen; wer es euch tůt dem tůt es hin wider vnd wo ir nit můget so vertraget es mit gedult so lang piß ir můgent seyt vnd pey der masse do pey ir entnemet peyder wider gebet.

[216^d] Do Dioneo histori vnd fabel zů irem ende komen waz, des in die edel frawen nicht minder scham halben als freuden genug gelacht hetten Nach dem die künigin vernam wie ir herschaft ein ende hett auf ire füsse stunde, die grünen kronen ab irem haubte nam vnd die der edeln frawen Elisa mit grosser reuerenz auf ir haubt seczet zů ir sprach fraw es ist an euch zů schaffen vnd zů gepieten. Do Elisa die kronen empfangen hette als die andern vor ir gethon hetten thete mit irem haußmeister was ze thon was ir ornunge gabe, Nach dem zů ir gesellschaft also sprach lieben gepilen ir habt oft vernomen wie etliche gewesen sein; die mit hübschen sprichwörtern fürsichtiger schneller antwort, Etlichen seine wort vnd red als pillich vnd recht waz den der sich gar kluge dauchte züchtiglichen mit den iren Worten haben peyssen vnd stechen vnd die auch gächlinger forchte vnd erschrecken von in haben treyben können Darumb mein syn were pis morgen von keiner ander materi ze reden dann von der als ir vernomen habt; dann vil manche mit iren hübschen Worten vnd sneller antwort mancher schande vnglücke engangen sein [217^a] Sölche fürgelegte materi der edeln gesellschaft wol gefallen was, mit dem die künigin aufstunde yederman piß auff das nachtmale spacziren zů gen das vrlaub gabe, Nach dem zů tische gerüfft worden, vnd do sie das nachtmale frölich empfangen hetten, anhuben zů tanczen, Darnach die künigin Dioneo gepote ze singen, Dioneo in schimpffe sprach, hett ich ein fideln, ich sünge euch ein gůtz? fraw gefiele euch daz Mein hanne hat ein roten kamp die schönen freülein fůrn in gern mit in zů dancze, Die künigin sich Dioneo abyess ein klein betrübet zů im sprach; das er von seinem gespöt ließ vnd sich schicket zů singenn; der pald anfienge mit süsser stymme ze singen vnd seine wort also

lauten; Kein mensche nye•bedacht wie kräftig die liebe ist gemacht,
sy czwingt alle herczen peyde tag vnd nacht, in meinem herczen wirt
mir wee wann ich bedenck frawe eüer lieplich gestalt, das sölt ir frawe
wissen für ware; darumb sich mein gemüt gancz zû euch sencket, Ich
5 pit euch durch eüer gûte halt euch zû mit mit stetem müte! des selbenn ich
zû euch thue, Die liebe die ich euch trag in meinem herczen czware waz
hilfft mich vil sagen dann es ist sich[217^b]er ware das mir in meinem her-
czen fraw nye lieber ward darumb muß ich stäcz an euch gedencken on
alles abelonn Do mit Dioneo seinem gesang ende gabe, vnnd die künigin
10 yederman rûen vnnd zû pette gen gepote.

IN DISER SECHSTEN TAGREYSE

vnder dem gewalt vnd regiment der künigin Elisa dise wirdige gesellschaft sagen würt von etlichen die mit hübschen sprichworten fürsichtiger schneller antwort etlichem sein red haben prechen vnd mit den iren Worten haben züchtiglichen stechen vnd peysen können.

Hie hebt sich an die sechst tagreyse.

Der mon mit sampt allem gestirn seinen schein verloren hat vnd der neüe tag alle welt mit seinem liecht durchgangen hat; mit dem die künigin irer gesellschaft gerüfet hette; nach dem den külen taw mit
 10 senften driten spacerenn vmb den pallast von einem end zû dem andern überschritenn; kürzweylen mit mancherlei hübschen sprüchen irer gesagten histori, In dem die sunne in die höche gestigen waz vnd der küle luft sich begond ze hiczen do pey sy alle zeit dauchte essen ze gen also sich senftiglich wider zû hause fügten, do alle ti[217^e]sche vnd
 5 taffeln gericht vnd mit wolschmeckenden plümlein bestreüt funden, Vnd ee die groß hicze an ginge, Die künigin mit irer gesellschaft zû tische essen ginge, Vnd do sy die edeln speyse empfangen hetten etlich liede gesungenn Darnach yederman nach seinem gefallen spilen oder ruen gen mochte; Dioneo vnd Lauretta mit einander von Troyelo vnd Gri-
 10 seyda sungen; In dem die zeit wider neüe mere ze sagen komen was, vnd frawe künigin yederman schuffe rüffen, vnd nach irer alten gewonheit sich radescheybe vmb den prunne seczten, vnd die künigin ze sagen gepieten meinte In dem sich begabe daz nye geschahe, das was daz sy ein grosser romore vnd gescherey hörten vnder iren meyden vnd
 25 knechten in der küchen, Die künigin den haußmeister für sich rüffet die vrsache des grossen romores begeret ze wissen. Der haußmeister sprach fraw das geschrey ist czwischen der künigin Lischa vnd Dintaro vnsers knechtes; Aber der vrsache warumb das sey ist mir nit wissent, dann ich erste darzû kame sy meinete zû stillen, Die künigin peyden
 30 personen für sich rüffet Lischa vnd Dintaro vnd fraget waz ir geschrey bedeutet, der Dintaro antwor[217^d]ten meinte; Aber Lischa der sich elter vnd weyser daucht dann er, vnd in dem romore vnd czorn erbar-

met waz, sich gen im mit pösem czornigem angesicht keret zû im sprach; du esell vnd bestia wie magstu so beherczent sein vor mir vnser frawen antwor ze geben, die mich als dich fragen thut lasse mich reden vnd über vnß sache antwort geben du filcze pauer vnd esell! sich

5 palde gen der künigin keret zû ir sprache frau der götz wille mir Sirofante weybe zû erkennen geben gleich als het ich ir nye mer gesechen vnd nye mit ir gewonet vnd will mir ye zû versten geben; wie die ersten nacht e sie Sirofante beslieffe vnd pey ir lag, Das ir vor missere Maza mit gewalte in den swarczen rosen gaarten gestigen waz vnd das

10 mit seinem sveyß vnd plût vergiessen; So sage ich es sey nit war er köme on alle müe darein, vnd das mit seinem grossen lust vnd freüden peydenthalben; aber Dintaro ist wol als vnuernüftig vnd eynfeltig vnd meinte die iungen manne ir zeit also verliessen wöllen, des selben gleichen die iungen meyd die auch warten müssen wann sy von vater

15 vnd müter verheyret werden vnd offte vnd vil dick sich begibt das sie die siben malen die se[218^a]chs über das zile sten müssen ee man in menner gibt; Darumb dir nudalest wol sölte wissen sein das ich weyß waz ich rede So swere ich pey dem gelauben Kristi das ich kein nachperin nit enpfähe die da iunckfrawe sey noch die zû dem manne iunck-

20 fraw komen sey, vnd die irem manne wider götlich ere vnd recht nit was verporgens gethon habe, vnd dise vnser esell will mich die frauen ze erkennen lern, als wer ich gester an die welt komen Die weyl Lischa in diser rede stund die frawen alle ir genug zû lachen hetten; In dem die künigin sveygen gepote aber vngeswigen waz also lange das Lischa

25 ir red verpracht hette; Nach dem die künigin lachent sich gen Dioneo keret zû im sprache; diser krieg sich von dir begibt; darumb wenn vnser nette fabel zû ende komen sein so piß du diser sach richter vnd vrteyl! Dioneo palde antwort vnd sprach frawe die vrteyl ist gegeben vnd sprich das Lischa recht hat vnd als sie gesprochen hat ich on

30 czweyfel gelaube es war sey; vnd Tindaro sey ein groß bestia. Do das Lischa vername, frölich vnd lachent zû Tindaro sprache; Ich hab dirs vor gesaget du seyest ein bestia vnd esell das du mer dann ich mei[218^b]nest ze wissen, vnd dir die milche noch an den lepsen hanget; Nach dem die künigin peyden in die küchen ze gen gepote dann ir krieg

35 hette sich in dreyen tagen nicht geendet, vnd Philomena gepote sy auff disen tage den neüen historien den anfang gebe, Die frölich vnuerzogen anhub vnd sprach

Wie ein ritter frawe Oretta pitt, vnd sie mit einem übel gesetzten neüer histori sich ze rosse seczte, vne do sy dez ein teyle vernomen hette in pate seines sagen nicht mer ze hören das er sie abe zû fûsse seczen sölte.

Ir lieben iungenn frawen in gleicher weyse als daz gestirne des himels ornament vnd schöne ist, also auch in dem meyen die schönen plûmlein des grünen angers ornament sein, also daz löblich züchtig reden schöne sprüche mit kurczen worten den frauen mer ere dann dem manne zû pringet dann vil reden den frawen vnere vnd schand ist darinn die mann nit als die frawen verdacht wern, wie wir ein sölches verschult haben oder was die vrsach ist mir nicht kunt dann eins ist wissent, das keine auf disen heutigen tage nicht ist, die vns icht sölcher materi halben wisse ze sa[218^c]gen, noch die gesaget weren die verstee als man sie versten sol, das vns allen ein grosse schande ist, als dann
 5 vor von Pampinea ist genug beweist worden; Doch wie ein ritter der sich gar redent dauchte von einer frawen geschweyget vnd gestillet ward-ist mir in willen das euch iczund zesagen Nach dem euch villeicht wol mag wissen sein oder müget gehört haben, des nicht lang zeit vergangen ist, das in vnser stat ein edele züchtig wol redende frawe
 10 gesessen was Der zucht ere vnd gûte syten wol wirdig sein sy mit namen ze nennen, Die waz mit namen genant frawe Oretta eines edelmannes weybe genant Geri Spina, die zû den zeyten als wir iczund sein auf einem iren gesesse oder dorffe was, vnd vil dicke mit andern frawen vnd edeln rittern spacziren ginge oder riten von einer nachperschaft
 15 zû der andern Nun hettenn eins tages vil manche hern vnd ritter mit ir das male gessen, vnd nach dem sich auf wege machten spacziren ze gen, vnd do villeicht ir syn hin ze gen was; sy etwas ze ferre dauchte, vmb des willen einer von den rittern der zû rosse waz zû frawe Horetta sprache? Frawe wer es eüer [218^d] gefallen ich seczet euch hinder
 20 mich ze rosse vnd füret euch des langen weges ein teyle, do dann vnser meinung hin stet zû fusse zegen; Auf sölche red ein ander ritter sprach? frawe Horetta liebet es euch soll euch ich soll euch mit einem schönen neüen märe hinder mich seczen vnd euch also mit dem die zeit ver-treyben piß wir komen do wir hin wöllen; Die frawe im antwort vnd
 25 sprach; herr des seyt gepeten ir möcht mir nit liebers gethon. Der ritter dem villeicht nicht minder übel das schwert an der seyten stund als im füglich vnd er neüe histori zû sagen geschicket was Die frawen

zū rosse seczet palde anhub sein histori oder nette fabeln ze sagen; die in der warheit an ir selbes hübsche vnd güt was, aber im so übel außginge das es ee verdroßlich was dann nicht, Dann kein dinge verpringenn mochte er müßt es zū drey oder vier malen sagen iczund hinder
 5 sich, iczund für sich zū zeiten sprach Ich sage vnrecht keinen namen nymmer recht nennen kund stäcz einen für den andern seczet aller rede das hinder herfür keret on das, daz er weder weyse noch geperd do von er sagen wolt kund kein gestalt geben, als pillich gewesen wer [219^a] Do das die edel fraw vername seines vnerlichenn sagen vdrücke
 10 vnnd sy verdriessen ward, vnd von angst ires herzen sere schwiczen ward seines reden nicht mer gehören mocht, dann den ritter in seinem reden verwickelt sahe, züchtiglich zū im sprach. Herr eßer roß hat ze gar eynen herten trab ich bitt euch ir wölt mich ab ze füß seczen. Der ritter der ein böser vernämer dann eyn netter histori sager was,
 15 der frawen kurcze rede bald vernomen het, die selben wort in schympff zoch vnd von ander abentetir sagen ward, vnd die angefangen histori vnuerbracht nicht mit kleyner schande hangen ließ.

Wie eyn pecke genant Cisti mit eynem eynigen wort eynes ritters eynfältig begerung schänt.

20 Der erbern frawen Horetta züchtig red von frawen vnd mannen ser gelobet waz Indem die künigin Pampinea gepot sy der angefangen materi nachfolgen solt, Die also sprach. Ir schönen frawen ich kan nicht wol von mir selbs bedencken wer in dem gewürckt hab, die natur die eynem edelen gemüte eynen [219^b] groben leib geben hat. oder daz
 25 gelück eynem edeln leibe eyn groben handel bereyt hat als dann in Cisti dem pecken vnd eßer mitpurger vnd auch vil andern als sich dann dick begeben hat, der selbig der von edelm gemüte was vnd das gelück in zū einem pecken gemacht het. Vnd fürwar ich vnrecht thät vnnd nicht wol sprach wo ich wider der natur lauff vnd des gelücks redet die ich
 30 peyde discretissima vnd züchtig erkenne, vnd das gelücke mit tausent augen find wie wol das von den eynfältigen blind gefiguriret wirt. Darvmb wisset vnd merckt das bei pabst Bonifacio zeiten Miser Geri Spina der ritter in grossem stant vnnd eyn fürnäm man was, sich begab daz der selbig pabst zū disen zeiten sein potschaft gen Florenz sant etliches
 35 seins geschäft halben die selbig in herren Geri hauß absassen vnd mit im von des heyligen vatters geschäft retten, was die vrsache was ist mir

vnkunt, dann gar selten keyn morgen vergienge oder herr Geri mit der genanten potschaft spacziren vnd gen kirchen gieng, doch vil mer zů vnser frawen giengen do bei Cisti peck mit hauß saß dann ander enden täglich für des pecken [219^c] hauß gingen do er persönlich seinen handel treyb vnd wie wol im das gelück eyn schlecht hantwerck geben hat, doch im so gnädig gewesen was. das er do bei reich was vnnd eyn gůte narung hete, vnnd auch daz die weil er lebet meynet zehandeln, er lebet in seinem hauß gar reyn vnd sauber vnd vnder andern seinen gůten dingen er sich vleisset stātes die besten wein zehaben von weissen vnnd roten die man in der stat vnd vmb die stat gehaben vnnd finden mocht vnd er als der auch do bei ein kurczweilig man mit schympf worden was wargenomen het das der ritter mit des pabst potschaft täglich vor dem hauß fůrgiengen vnd das alwege wenn die hiez an dem grōsten was, vmb des willen im gedacht er ein grosse fretintschaft thāte sy czeladen vnnd in seines gůten weins ze versůchen zegeben, sunder in solicher grosser hiez doch sich des eyn kleyn schamet vmb seines groben handels willen solich erber leůt zeladen vnd besorget herr Geri sein laden vileicht verschmāchten vnnd in nicht genůg wirdig deticht mit im zetrincken, darumb es auf dise stund fallen ließ vnd im eynen neuen syn erdacht domit sich [219^d] herr Geri selbs laden müßt vnd eynes morgens do in daucht das der ritter vnd die potschaft für geen solten, Er sich in eyner weissen iopen vnd schneweissem fůrtuch vor im eynem müller dann pecken geleich sich vnder sein haußtůr stellet vnd bringen schůff eynen zickel mit frischem wasser vnd eyn kleyn krůglein von seinem gůten weissen wein, domit zwei schöne wol gewaschne glāslin schneweiß dem cristall geleich, darczů er sich vnder der tůr seczet vnd wenn im der ritter mit seiner gesellschaft nahen kam er sich eynmal oder zwir retustret darnach anhůb zetrincken vnd mit solichem lust tranck, er hete die toten zetrincken lustig gemachet, des der ritter czwen oder drei morgen eben ware genomen hete, eynes mals czů im sprach. Wie schmecket er dir Cisti ist er fertig thůt ers. Do das Cisti vernam bald auf fůr vnd sprach. Ia herr on czweifel er ist gancz fertig vnd ich möcht euch seiner gůte vnuersůchet nicht cze versteeen geben, darumb versůcht in selbes, der ritter ob es im hiez halben bekam oder vmb des willen daz er den pecken so lustig trincken sahe oder ob er des nachtes darvor versalzen geessen het [220^a] was die vrsach waz ist mir nit kunt, dann daz im zů der stund wider alle seine gewonheyt vnd natur eyn grosser durst zetrincken czůstůnd, sich gen des pabst potschaft keret czů in lachend

sprach. Ir herren mich deucht wir versuchten des bidermans wein er
möcht vileicht also sein es wäre vns lieb das wir in versucht heten vnd
beyd mit eynander gegen Cisti wercz giengen im eyn gūten morgen
buten, der in freündtlich dancket vund bald eyn banck zesiczen komen
5 schüff vnd bat sy das sy sassen In dem sich ire knecht hinzü gemacht
heten die gleser czewaschen, des in Cisti nicht gestatten wolt hieß sy
czü rucke steen er selbs das thun wölt czü in sprach. Ich kan nit übler
einschencken als das brot in den ofen schieben, auch bedürft ir nicht
gedencken meines weins eyne tropffen ze versuchen, daz geret vier
10 schöne gläselein wüsch vnd seines gūten weissen weins eyn halbes seidlin
komen schüff mit grossem vleis vnd reuerencz dem ritter vund seiner
gesellschaft zetrincken gab, vnd do sy den wein versüchet heten, sy der
beste wein daucht den sy lang zeit ye getruncken heten, vund die weil
die selbig [220^b] potschaft zū Florenz was Cisti alle morgen mit in
15 widerumb trincken muß. Nach dem nit lang vergienge die potschaft
weg zereitten fertig was, vnd vor der ritter in ein köstlich mal zūberey-
ten thet vnd die besten burger der stat darzū geladen het vnd den
pecken Cisti auch laden schüffe, aber in keynen weg komen wolt. Do
der ritter vernam das er Cisti nicht gehaben mocht in bei eynem knecht
20 bitten thet das er im seines gūten weissen weins eyn flaschen schicket
domit er von erst seinen gēsten von demselben wein yeglichem möcht
eyn halbs gläselein czü eynem anfang zetrincken geben, der knecht der
dem pecken vileicht e dann nicht neid trüg, vmb des willen das er im
nye het seines weins wöllen ze versuchen geben vund ein grössere fla-
25 schen name dann gewonheyt was. Do Cisti die flaschen sahe czü dem
knechte sprach. Sun herr Geri schicket dich nicht zū mir vmb wein, ia
er sicher sprach der knecht, aber von Cisti ander antwurt nicht gehaben
mochte. Do das der knecht vernam sich on wein mit der lāren flaschen
wider zū hauß füget czü seinem herren sprach. Der peck will mir keyn
30 wein geben er treibt sein [220^c] gespöt auß mir vund spricht ir schicket
mich nicht czü im. Der herr schicket in hin wider vnd ließ in von nehem
bitten, ia fürwar er selbs nach dem wein schicket. Mer der ritter zū
dem knecht sprach. Vund ob der pecke sprach als er vor gesprochen
hat, ich schick dich nicht czü im vmb wein so frag in wo ich dich hin
35 oder zū wem ich dich schicke. Der knecht wider czü dem pecken kame,
vund czü im sprach. Fürwar gelaub mir Cisti mein herr schicket mich
zū dir vmb wein, Fürwar sun neyn er du solt nicht recht vernomen
haben gee nun wider heym vnd heß dich bas vnderrichten. Nun wo

schicket er mich dann hin sprach der knecht. Dem Cisti bald ant-
 wurt vnd sprach czû dem bach vnd grossen wasser Dise antwort der
 knecht dem ritter widerbracht zû im sprach. Herr der peck spricht ir
 schicket mich vmb czû dem bache. Der ritter der bald Cisti meynung
 5 vernomen het czû dem knechte sprach Laß sehen die flaschen die du im
 bracht hast Vnd do er die gesehen hete zû dem knecht sprach. Cisti
 saget war vnd hat recht das er dich zû dem bach weiset du tetest vnrecht
 mit solicher grosser vnzüchtigen flaschen in eyns [220^d] hantwerckers hauß
 on gelte vmb wein ze geen gee hin vnd nym eyn kleyn fläschlin vnd sag
 10 im das er dir es vol seins güten weissen weines gebe. vnnd do Cisti den
 knecht mit dem züchtigen kleinen fläschlein komen sahe zû im sprach
 Nun sich ich wol daz dich dein herr czû mir schicket im balde das fläsch-
 lein füllet, darnach mit anderm gütem wein das fläschlein wider füllet
 vnd ze hand es dem ritter also vol heyne skicket vnd im nachfolget zû
 15 dem ritter sprach. Herr ich wölt nicht das ir gelaubt das mich die grosse
 flasch auf disen morgen erschrecket het sunder mich beduncken liesse
 wie euch vergessen wär was ich euch mit meinem kleynen krüglein in
 disen vergangen tagen beweiset het, vnd das was daz mich daucht wie
 mein wein nicht wein wär knechten czetrincken czegeben das hab ich
 20 euch sagen wollen, vnd domit ich des eüer hütter nit lenger bedürff sein
 hab ich in euch allen herbringen thûn, thût domit hin für eüer gefallen,
 doch eyns bitt ich euch ir secht nicht an die kleynen gab sunder den
 güten willen eüers Cisti. Der ritter Cisti gabe vnd schanckung nicht
 ausschlüge sunder die wirdigkliche [221^a] enpfing, im den danck saget
 25 als dann soliche gabe wirdig was, vnd in hin für alle czeit für seinen
 grossen freünd hielt.

Wie fraw Nanna mit eyner schneller züchtiger antwort in
 schympfes form eynem bischoff seiner vnzüchtigen red stillet vnd
 schweigen machet.

30 Do fraw Pampinea irer red vnd histori geschwigen was, Die ant-
 wurt rede vnd miltikeyt des pecken Cisti gelobet heten der künigin ge-
 fallen was das Lauretta zesagen fürpas folget, die frölich also sprach. Ir
 züchtigen frauen Pampinea vnd Philomena vor von vnser kleynen tugent
 genüg begriffen vnnd von behender rede vnd antwort gesaget haben,
 35 darumb nit not thût vns mer domit ze müen doch die natur solicher
 worte wie wol sy in schympfes forme geret werden den zühörer beissen

sollen, doch das als daz schäeiuß vnnd nicht als der hünd thüt sölle, dann wann sy als der hund bissen so möchten sy nicht kurzweilig gesein vnd würden in ernst aufgenommen vnd nichte als der erbern frawen Horretta worte [221^b] vnd Cisti antwurt theten. darumb merckent vnd wissent.

5 mit wem wo vnnd wenn ir schympfent. An eyen soliches eyen vnser prelat vnd bischoff gar wenig gedacht, der nicht mynder durch eyner erberen frawen wort gestochen ward als er dann meynet er ir gethan hete, er von ir gestochen beschamet vnd gebissen ward. als ir in meiner kleynen histori in wenig worten vernämen wert. Es was czû disen zeiten eyen

10 bischoff in vnser stat mit namen genant herr Antonio Dorso eyen weis hochgeleret man der heyligen geschrift bei des czeiten sich begab das ein mechtig edelman gen Florenz kam genant herr Diego von dem Rade des künigs Rubert marschalck, der selbig edelman was von leib vnd gestalt on maß ein gerad schön man do bei eyen grosser bûler vnd

15 hofirer schönen frawen, dem vnder allen schönen frawen vnser stat eyne alleyn liebet genûg schön, im gedachte er iren man mit gelt übergeben wölt domit im die frawe czû seinem willen werden möcht. dann vernomen het wie wol sy beyde von erbern geschlecht wären das der man on maß eyen karge vnnd geitig man [221^c] wäre darzû von böser

20 natur, vnd sich zû im gesellet vnnd sein grosse kuntschafte name mit im der sach der frawen halben eyens warde vnnd im fünffczig gulden versprach domit er die frawen eyen nachte beschlafen möcht vnnd balde fünffczig pfenning die zû der zeit popolini genant waren vergûlden ließ vnd den gulden geleich machen thet, vnd do er die frawen beschlafen

25 het wiewol es on iren willen geschahe er ir dieselben gulden pfenning an gûter gulden stat gab, nach dem nit lang vergieng eyen soliches aller mēge zû gehör kam das dem bösen irem man kleine ere was Vnnd der bischoff der der frawen nahender freünd was, als eyen weiser thet, vnd als im solche sach vnwissend wäre, dann er des marschalcke grosser

30 freund vnnd gûnner was. Darnach sich eynest an eynem sant Iohanns tage begab das der bischoff vnd der marschalck miteynander auf der strassen dar durch die roß vmb den scharlach lauffen spacziren ritten, in solichem irem reitten der bischoff sein schöne mûmen vnd des marschalck bûlen ersehen hete, die mit namen als euch allen wol mag

35 [221^d] wissend sein was genant frau Nanna ein frische fröliche wolredende fraw von grossem gemüte vnd herzen die er bald dem marschalck zeyget, vnd do er für sy do sy mit anderen frawen stünd kam kam sein hand aufhüb vnd die dem marschalck auf sein achseln leget

vnd zů der frawen sprach. Nanna wie deücht dich vmb den überwindest du in. Soliche rede der frawen hercze beschwäret vnd ir ere bitten, vnnd vmb der zuhörers willen sy daucht wie dise worte ir ere berürten vnd ir schand brächten, doch sich solicher schande yeczund nicht rechnen
 5 meynet, sunder streyche vmb streyche wider vmb geben dem bischoff bald antwort vnnd sprach. Herr vileicht ich in als bald als er mich überwund. aber ich wölt gůte vnd nicht falsche münz haben. Dise red vnd wort der marschalck vnnd auch der bischoff vernamen sich beyde gleich von der frawen beschamet sahen irer vnzucht, besunder der
 10 bischoff in sein geborne freundin beyde eynander ansahen schweigend nit mit kleyner schand von dann ritten Also die gůt fraw mit worten gestochen ward ob sy das in schympf mit worten widerumb [222^a] thet ist ir in keynem übel auff zenämen.

Wie Chichibio der koch mit eyner schnellenn rede seines herren
 15 zoren erweichet vnnd grossen vngelück das im bereyt was engieng.

Frawe Lauretta ir rede vnd histori zů ende bracht hat, in dem die künigin Neyphile ir gepote thet der angefangen materi nachzekomen die anfieng vnnd also sprach Mein allerliebsten frawen wie wol das behende schnell nützper subtil reden den edeln gemüte vnd fürsichtigen personen
 20 zůgepürt, doch das gelücke zů zeiten den eynfeltigen vnd forchtsamen auch ist gehilfflich gewesen, vnd in auf ir zungen geleget vnd schnell ze reden eingeben hat, das vileicht ettlicher grosser weiser reder so schnell nit het bedencken mügen oder bedacht het als ir in diser kleynen histori von Chichibio koche vernämen wert. Es was eyn edel reich ritter in vnser
 25 stat mit namen genant Conrad Gianfigliaczi, als vileicht euch allenn wol mag wissend sein wie der allwege in vnser stat für eynen [222^b] weisen redlichen man gehalten was do bei milt eynen herlichen hof nach ritterlicher gewonheyt stäts hielt von falcken habich vnd sperbern domit er grosse freude het, andre seine edle wirdige werck wir yeczund sten
 30 lassen. Der eyns tages mit eynem seinem falcken ein kranch gefangen het iung vnd veyßt in bald seinem koch genant Chichibio sante, der eyn Venediger kind was do bei im enpote das er den kranch czů dem nachtmal zeessen gebraten bereytet vnd daran allen vleiß thät. Do nun die zeite kame der koch den kranch czů dem feür tet vnd nun schir ge
 35 kochet was der auß der massen dem ganczen hauß eynen gůten geschmack gab, in dem sich begab das eyn weiblin auß der nachpaurschaft genant

fraw Brunetta der Chichibio alle sein liebe vnnnd huld geben hete in die kuchen kame, des güten geschmacks des kranches enpfinden warde, des veyßten kranches war genomen hete bald Chichibio iren liebhaber bat vnd czû im sprach das er ir eyn tiech von dem kranch gäb. Chichibio
5 ir antwurt vnd sprach. Wärlich des thû ich nicht frawe Brunetta ich thû sein wärlich nichte, das er ir [222^e] singend zû antwurt gab das freulein sich der antwurt betrüben warde czû im sprach. Wärlich vnd bei got gibst du mir nicht du solt meins leibes nymmer mer keyn freud haben. Also mancherley rede sich beydenthallen ergingen doch czeletzte
10 domit Chichibio sein schönes lieb nicht erzürnet ein diech von dem kranch reyß ir die gab. in dem die zeit das nachtmal czeessen komen was, der kranch für den herren vnd seine geste der er vil manchen czû dem kranch geladen het getragen ward, vnd do der ritter den kranch on eyn diech sahe in fremd nam bald den koch Chichibio rüffen schüff
15 vnd in fraget wo das ander diech von dem kranch beliben wär. Dem der lügenhaftig Venediger schnell antwurt vnnnd sprach. Mein herr ich meynet ir weißt es an mich, so solt ir wissen die kränch haben nicht mer dann ein diech vnnnd eyn beyn. Der herr im mit zoren antwurt vnd sprach Wie am teufell, haben sy nit mer dann eyn beyn haben wir nye
20 mer kränch gesehen. der koch wider sprach. Herre im ist als ich euch sage vnd wenn [222^d] ir wölt so will ich euch das sehen lassen vnd mir selbs recht geben sölt. Der herr vmb der gest willen nicht weiter fraget dann alleyn sprach. Seitmale du mich das wilt sehen machen so sol ich es als gern sehen als ich ye ding gesahe, daz sol bis morgen sein
25 do wiß dich nachzerichten, aber ich schwere vnd versprich dir daz bei dem waren got ist im anders dann du sprichest ich sol dich in solichem form czûrichten du solt an kränch vnd meinen namen gedencken die weil du lebest mit dem von irer red liessen vnd des morgens frû mit sampt angeent des tags der herre die roß sateln schüff dem sein zorn
30 noch nicht verrochen was auf zû roß saß vnd den koch hinder der knechte eynen zû roß seczen schüff czû der stat auß abwerch nach dem wasser in die änger ritten do allzeite sunder des morgens die kränch geren ir wonung hetten, vnd in solchem retten zû Chichibio sprach. Wir sollen bald sehen wer nächten gelogen hat ich oder du. Do Chichibio vernam das seins herren zoren nicht nachgelassen het, im gedacht
35 wie er yeczunnd [223^a] mit liegen eyn grosse prob tûn müßt mit grosser sorg nahend bei dem herren reytt vnd hete er gemöcht er gern geflohen wär grosser forcht halben dann sich besorget käme sein lügen zû liecht

der herr in an den nächsten baum hencken würde yeczund für sich neben sich vnd hinder sich sahe alles daz er sahe in kränch dauchten auf zweyen beynen, vnnnd in solichem irem reitten im e dann dem herren oder yemand anders bey zwelff kränchen bei dem wasser czü gesichte

5 kamen die do rüeten vnnnd alle yegklicher auf eynem beyn stünden, als dann ir natur vnd gewonheit ist. wenn sy schlafen oder rüen alle auf eynem beyn steen. die er bald dem herren zeyget vnd sprach. Nämēt war herr ob ir yeczund mit der warheyt vernāmen vnd sichperlich sehen müget, als ich euch nächten saget das es ware vnd nicht erlogen ist das

10 die kränch nit mer dann eyn beyn haben. haben sy dann eyn beyn als wie mügen sy dann zwey diecher haben als ir nächten sprachet wölt ir anders als die dosigen steen ansehen, vnd habt mich nächten darumb beschamet vor [223^b] got vnd der welt vnrecht gethan, über dise wort der herr im antwurt vnd sprach. Nun hab eyn kleyn gedulte ich sol

15 dich bald sehen machen ob sy eyn beyn oder zwey haben nach dem dich mit meiner hand hencken du lecker büb vnnnd schalck ich sol dir lonen nach deinem verdienen, mit disen Worten sich zü den kränchen nächnet anhub zeschreien die arm aufwarff vnd sprach. Hu ha hu, hu ha hu. Die kränch von des herren geschrey das ander beyn herfür ezugen vnd

20 nach etlichem schritt alle iren weg flugen. Der herr aller vol czoren sich gen Chichibio kert zü im sprach. Wie dunckt dich Giottoe haben sy eyn beyn oder zwey. Chichibio aller erschrocken nicht weißt wo er was noch was er im czü antwurt geben solt, doch wie sich das begab ist mir nicht kunt dem herrn schnell antwurt vnd sprach. Ja kerre es ist

25 war als ir redt aber nächten schryt ir nit zü dem kranch hu ha hu hu ha hu, het ir aber zü im geschrien hu ha hu als ir czü den getan habt so het er auch das ander beyn herfür gezogen als die getan haben. Dem herrn des koches eynfältige antwurte [223^c] in solicher maß gefiele das er alles seins zorens vergaß vnd fallen ließ den in großes lachen vnd

30 freud keret, zü Chichibio sprach. Du hast gancz recht vnd ich vnrecht ich solt es getan haben. Also er mit seiner behender kurzweiliger antwurt grossem vngelück engienge seines herren huld behielt.

Wie herr Forese Rabatta vnnnd meyster Giotto der maler beyd miteynander von dem dorff gen der stat wercz ritten vnd yeglicher

35 des andern vngestalte schalte eynander mit Worten stachen vnd bisßen.

Fraw Neiphile irer red geschwigen ist vnd die züchtig wirdig gesellschaft Chichibio schnelle antwurt in genüg wol gelachet heten. Pamphilo der iunge der künigin zeliieb anhüb vnd also sprach Mein allerliebsten frawen, es begibt sich dick das das gelücke bei dem schlechten
5 groben hantwercker vil güter tugent verborgen helt, als dann nicht lang ist durch Pampinea red ist beweist worden, auch noch vil dick geschicht vnder böser gestalt etlichs mannes man vil güter tugent findt die im [223^d] von der natur verlihen vnnnd geben worden sein, als dann czweyen vnsern mitburgern netlich zügestanden ist, vnd ir in meiner hystori
10 bald vernämen wert, der eynd der her Forese Rabatta genant was, ganz von vngestalt geformiret was mit eynem breytenn angesicht alles gerunczen, dobei von kleyner person so vngestalt es wär eynem groben pauren genüg gewesen. aber in synnen vnd weltlichen rechten eynd schrein der kunst von allen weissen gehalten was, Der ander der meyster Giotto genant was, als eyn grosser meyster waz als die natur die
15 eyn würckerin ist aller ding ye beschaffen het, es was kein ding das er nicht pesser dann keyn ander meyster mit dem pensell federn oder stile nicht machet vnd das natürlich entwürff in solcher maß das die lebendigen synn der menschen oft vnd dick meinten vnd fürwar gelaubten
20 das sy von seiner hand gemalet sahen es lebendig wär, er was der der die selben kunst wider czü liecht bracht, darumb er billich eyn meynster ob allen meystern geheysen was, sein leben in zucht vnnnd grosser diemütigkeyt füret, vnd alweg [224^a] wo er seiner meysterschafft gelobet was er das widerret vnd in keynen weg eyn meyster wolt geheysen
25 sein, so vil mer die kunste stätes bei im wuchß vnnnd sich erluchtet, vmb des willenn der die do mynder dann er kunden, in vnnnd auch seinen leriungen der wille zelernen wuchß im nach zefolgen vnd sein kunst zenämen, vnd wie wol er solicher kunst eyn groß meyster was, doch darumb weder von leib noch gestalt dester hübscher was oder gereder
30 dann herr Forese Rabatta was. Nun wir an vnser histori keren wollen. Sy heten beyd herr Forese vnd Giotto ire gelegne güter von der stat auf zwelf wälscher meile in dem tal genant Mugiello, vnd herr Forese seine güter zesehen in das genant tale geritten was vnd czü seinem gelücke gar übel czeroß geritten was, vnd in seinem widerreiten do er seine
35 güter besehen het, er den genannten Giotto fand der die seinen güter auch besehen het, vnd wider zü hauß wercz reytt, der weder zeroß noch zefuß noch in keynerlei bas im harnasch was dann herr Forese was, also beyd den alten geleich fuß für fuß miteynander gen der stat wercz

[224^b] ritten. In solchem irem reitten sich begab als gern in dem sumer
 zů zeiten geschicht daz gar eyn grosser placz regen kam, vnd so sy bel-
 dest mochten vor dem in eynes pauren hauß fluchen der yegliches gůter
 freůnd vnnnd gůnner was, do also bei etlichen stunden wartenn ob der
 5 rēgen nachlassen wůlt daz dann nicht geschahe, vnnnd sy ye desselben
 tages in die stat reitten meynten von dem pauren czwen alt mǎntell ent-
 nomen vnd zwen wol beschaben alte hůte dann der paur in zeleihen
 nicht bessers hete vnnnd von dann ritten vnd do sy nun des weges ein
 gůt teyl geritten heten vnd sich ganz durch regend vnnnd naß sahen
 10 beyd mit kat besprůczet vnnnd bedecket waren in solicher maß daz so-
 liche vnreinikeyt eynen yeglichen erbern man vnerliche gemacht heten,
 In dem sich das weter aufricht lauter vnd schön ward vnd sy beyd lang
 zeit als die stummen miteynander geritten waren anhůben miteynander
 zereden vnd herr Forese also reittend Giotto seiner red zůhōret der gar
 15 ein gůter reder was in vnd sein vngestalt vnnnd sein selbs bedachte be-
 dencken warde, do er in von kote so vnordenlich [224^c] vnd vnge-
 schicket sahe das er nicht gelassen mocht er můste lachen, nach dem zů
 Giotto sprach. Giotto ob vns auff disem wege eyn fremd man bekām ge-
 laubest du das er glauben mōcht das du der beste maaler aller welt
 20 wārest als du dann bist. Dem Giotto bald antwurt vnd sprach. Herr ich
 glaub er gelaubet ir des a b c nichte lūnnet Herr Forese sein selbs
 irren bedencken ward erkant vnnnd sake sich bey der mūnez bezzalet
 nach dem sein kaufeschacz gewesen was.

Hie will Michel Scalze beweisen wie eyn geschlecht von vnge-
 25 schafften leůten genant Baronci die eltsten vnd edelsten aller welt sein.

Die edeln frawen des malers Giotten auch lachten vnnnd herr Fo-
 rese spoten der also eyn weis man gehalten was, in dem die kůnigin fraw
 Fiametta ir gepot thet fůrpas zesagen, die anhůb vnd sprach Ir iungen
 frawen mir ist von Pamphilo sagen des geschlechtes Baronci vnge-
 30 schafften gestalt in gedǎchtnuß komen der ir vileicht nicht erkannt habt,
 vnnnd domit ich der an[224^d]gefangen materi nachfolge, ich euch in
 wenig worten iren adel beweisen will. Es ist nit lang das in vnser stat
 eyn iunger wonet mit namen genennet Michel Scalza der der aller
 kurzweiligest mensche was der ye mer gesehen ward vnd so mancher-
 35 ley neůe mǎr vnd histori vorhanden hete, vmb des willen alle iunge bur-
 ger in alle zeit geren bei in heten, sunder wo ir menge bey eyn waren.

Nun eyns tages sich begeben het das er mit ir etlichen in eynem dorffe was genant Montuio, Nun wie es sich begab ist mir vnwissent, dann das sy zered kamen vnd disputierten welches das edlest vnd eltest geschlecht wär der statt Florencz, etlicher sprach das geschlechte Vbertini, 5 ettlicher Lomberti, alle yegklicher nach seinem willen vrteylet, vnd nach langem streitte vnnd krieg Michel Scalza anhüb zelachen vnd sprach. dret abe ir eynfältigen schaf ir wissent nicht was ir sagent, die eltsten vnnd edelsten geschlechte nicht alleine vnser stat, sunder alle welte das sein die Baronci als dann gemeynklichen yederman kundt ist als wol 10 als mir, vnnd nicht gelaubt das ich spote ich meyn [225^a] das geschlecht Baronci ewer nachpauren vnd mitpurger die zû santa Maria maior mit hauß gesessen sein, do die iungen purger die do ander kurzweil von im warten, sein red vernamen darauß ir gespöte triben zû im sprachen du wilt vns toren vnd zenarren machen zegeleicher weis als wir nicht 15 weßten wer die Baronci wären als dir vileichte ist. Do sprach Scalza vnd schwür bei dem ewangelio, das entû ich sunder ich sag euch die rechten warhey, vnd ist eßer keiner der mit mir wetten wöll vmb eyn gût essen mit gûten gesellen so will ich daz eberlich mit im auffnâmen. Auch sol ich im noch bas tûn ich sol es zû einem yegklichen seczen auß 20 czesprechen sey wer der wöll, vnder den eyner zû im sprach ich bin bereyt mit dir zewetten vmb eyn gesellen essen do aller sache miteynander eyns warden, vnd beyd den wiert in des hauß sy warn zû irem richter machten, zû dem sy beyde giengen yeglicher im sein sach fürleget gegenwirtig der ganczen gesellschaft die nâmlich meynet Scalza solt ver- 25 loren haben anhuben sein zespoten ir kurzweile mit im hetten. Der wiert der eyn czüchtig man was von erst den ey[225^b]nen verhöret darnach den andern vernâmen wolt, doch vor zû im sprach. Scalza wie bist du geschicket zebeweisen vnd war czemachen als du fürgeben hast, do sprach Scalza. Ich sol euch des in solicher masse vnderrichten das 30 ir nicht alleyn sichperlich sehen vnd greiffen solt, sunder die des laugen sprechen sollen ich recht hab vnnd war sag. Nun ist euch ye wol kunt ye elter eyn geschlecht ist ye edler vnd wirdiger es ist als dann neulich vnder euch allen ist erkannt vnd geredt worden, vnd die Baronci sein elter dann keyn ander geschlecht darumb sein sy edler dann alle andere 35 geschlecht, vnd das sy die eltsten sein sol ich euch bald vnderrichten vnd mir zweifelt nicht ich gewonnen habe. Ir solt wissen daz die Baronci von got dem herrn gemacht warden do er von erstmalen leret vnd alle andere menschen warden von im her nach gemachet, do er des

malen nun gütt meyster was, vnnd das eyn soliches war sey so secht das geschlecht Baronci an, vnnd nämet irer gestalt war nach dem die andern menschen auch besehet, wie sy alle so wol geschicket vnnd geformiret sein sunder in iren angesichten do [225^c] bei ir wol mereken müget daz
 5 die Baronci vmb irer bösen gestalt willen als die von got die ersten gemacht warden do er eyn leriunger was vnd vngeschickte ding malet als der leriungen gewonheyt ist vngestalte ding zemachen on allen natürlichen form als dann die Baronci sein, dann ir etlicher hat eyn grosse nasen, der ander eyn breyt angesichte, der dritt ein krumes
 10 maul, etlicher eyn langen halß eyn hohe stiren mit eingefallen packen etlicher hat grosse augen dem esel geleich eyn aug höher in dem haubt dann das ander. Etlicher eyn anpicke als die ersten neten geboren kinder haben do bei wol genüg erscheinet, das sy got machet do er ein ler iunger was das malen zelernen. Hat er nun bei in daß malen ge-
 15 lernet so müssen sy ye die eltsten sein, sein sy nun die eltsten so sein sy auch die edelsten der welt, dann von got dem herren die ersten gemacht sein. Do der wiert mit samt der gesellschaft des Scalza kurzweilige argumente vernomen het, im alle mit eyner stimm frölich vnd lachend gewonnen gaben, vnnd fürwar sprachen die Baronci die eltsten
 20 vnnd edelsten wären nicht alleyn zû Florencz sunder [225^d] in aller welt. Also durch ire böse gestalt beweist ward daz er recht vnnd redlich gewonnen het. Auch Pamphilo in der vergangen histori hern Forese vngestalte beweiset do er spricht sein vngestalt wär eynem von dem geschlechte Baronci genüg gewesen.

25 Wie fraw Philippa von irem man bei irem bülen vnd liebhaber schlafend funden ward von im vmb der sünd willen für recht gefordert ward, die sich mit eyner schnellen antwort frei vnd ledig redet daz recht wider sy erweychet vnd gancz diemütiget.

Fraw Fiametta ir histori zû ende bracht hat. vnd die frawen
 30 Scalzo seltsam argument wol gelachet hetten, die künigin zû Philostrato sprach Er der angefangen materi nachfolgen solt, der anhüb vnd also sprach. Ir edelen frawen wissen solt das es an allen enden wol stet sein notturfte reden können, sunder wo man von note wegen bezwungen ist czereden. Als dann eyner edeln frawen geschahe vnnd thet als ir dann
 35 in meinem reden vernämen werdt, vnnd wie sy mit irer [226^a] züchtigen schnellen antwort nit allein den czühörern freid gab vnd lachen machet

sunder sich selbs auß grossem vngelück bracht vund wider sy eynen
schäntlichen tod der ir bereyt was sich löset. In der edelen stat Prato
vor zeiten ein statut vnd gesece was, das in der warheynt mer vmb sei-
ner hertikeyt willen zeschelten dann zeloben was, daz gesece stünd
5 also das die dasig fraw die in vnkeusch bei anderm manne dann bei
irem eman gefunden würd daz die selbig fraw vmb solicher sünd wil-
len czehand solt verbrannt werden sunder wo sy das vmb lon oder
gelt gethan het. Nun vnder solichem gepot sich begab das ein edle
schöne fraw mit namen genant fraw Philippa von irem manne ge-
10 nant Rinaldo in irer eygen kamern eyns nachtes bei eynem iungen
edelmanne genant Lazarino den sy als sich selbs lieb het gefunden
ward vmb eyns solichen willen Rinaldo ir man sich sere betrübt sich
kaum enthielte das er sy nicht beyde tödet doch sein selbes tod vor
dem iungen auch besorget vmb des willen sein zorn temperiret, doch
15 sich nit so ganz mässigen kund das er nicht wölt das dem vorge-
nanten statut recht vnnd ge[226^b]sece eyn genügen geschähe, des das
im nicht wol füglich czethun was als der frawen den tod zegeben vnd
bald genüg füglich zeügen bestellet, vnd als balde der tag kam er für
recht gieng die frawen vmb irer sünde willen beklaget vnd für recht
20 fodern tet. Die frau die von grossem gemüt vund herczen was als
dann gemeynklichen aller bülerrin gewonheyte ist alle ire güte freünde
zü ir rüffet ires rates begeret wes sy sich in der verlauffenn sach halten
solt, die ir das für zekomen alle widerrieten des sy güte zeit auf ir
selbs stünd doch sich bald beriete vnnd ir fürnam für recht czekomen,
25 vnnd vil e der warheyte mit starckem gemüt bekennen vnd sterben
dann verzagt vnd vnbeherczent mit ewiger flucht fremde vnerkannte
land czebawen vnd den verlieren vnd des verlaugen in des arm sy die
vergangen nachte gerüet vnd geschlafen het. Also die edel fraw von
allen iren freünden vnd ratgebern getröstet was zelaugen vnnd vor dem
30 richter in keynen weg der sach czebekennen. Do sy nun für den rich-
ter kame mit festem frölichem angesicht den richter fraget wes er an
sy begeret, der richter der eyn redlich man waz [226^c] die frawen schön
vnd von loblichem gebärd sahe durch sein red vnd wort ir beweiset wie
er irenthalben grosses leyde trüg grosse sorg het sy würde der sünd
35 bekennen, vnnd er wider seinen willen wo sy bekante richten müßt,
domit der stat statut vnnd rechten eyn genügen geschähe, vnnd wo-sich
das begäb er ir das leben nämen müßt. Nach solichem bedencken
nicht gelassen mochte fragen müßt ob es war wäre des sich Rinaldo ab

ir beklaget het zů ir sprach. Fraw als ir wol secht hie stet Rinaldo
 etter eman klaget über euch vnd spricht er hab euch in vnkeusch bei
 eynem andern mann als eyn ebrecherin funden, vnd begeret nach ge-
 wonheyt der stat des rechten, nun wöllen soliche recht das ir sterbet
 5 vnd das ich euch in den tode büß doch mag ich der keynes tůn ir be-
 kennet mir dann der warheyt vnnd euch solicher sünd schuldig gebet,
 darumb wißt was ir zeschaffen hab vnnd was ir redet vnnd antwurt
 gebet vnnd saget mir ob das war sey als etter man fürgeben hat. Die
 frawe vnerschrocken mit hohem gemüt züchtiger red diemütiger liebli-
 10 cher stimm dem richter antwurt vnd sprach. Herr es ist war [226^d] das
 Rinaldo mein man ist vnd das er mich in diser vergangen nacht in La-
 zarino arme beschlossen fand laugen ich nit. des vrsach ist das ich im
 ganzte rechte ware liebe trag, aber euch sol wol wissent vnd kunte sein
 das alle gesez statut vnd rechte sollen gemeyn sein geleich eynem vnd
 15 andern. aber mit der willén sollen gemacht sein die dann soliche recht
 antreffen vnd durch die sy sollen gebraucht werden. Eyn soliches in
 disem recht oder gesez nicht erscheint, dann alleyne die frawen vnd
 nicht die mann dem geseze sollen verbunden sein, das ist ye wider got
 vnd rechte das wir alleyne sollen etteren rechten vnnd nicht ir verbun-
 20 den sein, vnnd durch die gebüßt werden, vnd kein fraw czů solichem nye
 begeret noch gefordert ward als wol billich gewesen wär, darumb wir
 mit recht wol sprechenn mügen etter statut vnd gesez nicht eyn recht
 sei sunder vnrechte sey, doch wie dem seye wölt ir etter sele vmb mei-
 nes leibs willen verdammen vnd in die helle versencken daz stet zů
 25 euch, doch e ir fürbas wider mich vrteylet vor ich an euch eyner kley-
 nen genade vnnd gab beger, das ist das ir meinen man fragt, ob ich im
 nit [227^a] alle zeit zů seinem willén wo er mein begeret hat sey bereyt
 gewesen vnd im das nye widerret hab allweg zů seinem willén mich ge-
 schicket hab. Auf solche red ir Rinaldo bald antwurt e er von dem rich-
 30 ter gefragt warde vnnd sprach Es on zweifel war wäre als sy gespro-
 chen hete, sy im alle zeit willigklichen czů seinem willén wäre gehorsam
 gewesen. Die fraw bald wider antwortet vnnd zů dem richter sprach.
 Herre hat mein man von mir sein notturft gehabt vnnd im darzů ge-
 fallen hab was sol ich nun mit dem thůn das im über wirdt, sol ich es
 35 vnder die hunde werffen, ist es nicht besser vnd bas getan ich vergünne
 des vnd werde mit eynem solichen eynem edeln iungen mann zůlieb vnd
 willen. sunder eynem der mich lieber hat dann sich selbs, duncket mich
 ye bas gethan sein dann das lassen verderben vnd verloren werden.

Nun waren bei disen sachen vil erber leüt von mannen vnd frawen der frawen antwurt zehören, vnd wie es sich vmb sy ergen würde. Vnd do sy der güten frawen red vnd ir kurzweilig abenteürliche antwurt vernamen alle geleich mit einer stimme zü dem richter schryenn, [227^b] Die
 5 fraw hat recht vnd wol geret vnd Rinaldo ir man hat vnrecht, alle den richter trösten eyn soliches hertts rechte abzenämen vnnnd czestraffen vnd das widerruffen, vnnnd das eyn solich statut vnd gesecz alleyn den frawen gemeinet würde die vmb gelt iren mannen die hörner machten Also Rinaldo seiner angefangen sach zü schand ward vngeret von dem
 10 rechten wege gieng, die schön fraw fro frisch vnd frölich als die von dem tod zü dem leben erstandenn was mit grossen freüden czü hauß gienge.

Wie Frescho czü eyner seiner mümen spricht vnnnd tröst sy das sy sich nicht mer sprigel noch anstreiche.

15 Philostrato neüe histori eyn kleyn die edeln frawen gestochen vnnnd in ire gemüte betrübet het, des sy mit czüchtiger röte ires angesichtes czeychen gaben yegkliche die anderen ansahe mit marter das lachen verbissen nach dem die künigin sich gen frawen Emilia keret mit ir schüffe sy den gesagten historien mit eyner irer histori nachfolget, die in gelei-
 20 chem form als [227^c] sy erst von dem schlafē erwachet wär anhub vnd also sprach. Ir allerliebsten frawen, mein gedanck mich lang vnd ferr von hynn gehalten haben darumb ich noch nit wol czü mir selbs komen bin, doch vnser künigin gepote gehorsam cze sein, ich vileicht euch eyn lengere hystori gesaget het dann ich thûn wird het mich mein ge-
 25 müte nicht so lange anderschwo gehalten. Darumb ich euch von eyner vngeschaffen meyd vnd eynfältigen iungen dieren eyn schlechte histori sagen will, die selbig meyd von eynem irem vettern gestrafft ward, vnnnd vrsach weniger synn sein rede nicht vername Es was eyner in vnser gegent der was mit namen genant Frescho Celaticho der hete eyne sein
 30 iungen mümenn die mit namen genant was Cicsca, vnd wie wol sy schön vnnnd gerades leibs was, doch darumb keynen engelischen anpicke oder angesicht het, die selbig meyd sich so schöne vnd edel daucht von güten syten vnd wol künnend das sy on zweifel meynet ires gleichen nit ge-
 35 sein möcht vnd in gewonheyt het von yederman es waren frawen oder manne übel zereden vnd alles das zeschelten das ir nicht liebet vnd das [227^d] mit krumem maul ansahe, in geleichem forme als ob es ir stüncke.

sich selbs vnd ir vngestalt nicht bedacht noch ansahe, die fürware keyn
 maler vngeschaffner het malen mügen, von ir selbs mer hielt vnd hoch-
 tragend was dann wär sy die künigin von Franckreich gewesen, nye-
 mandt mochte nach irem willen thün, vnd wenn sy über die strassen
 5 ging wo sy nun eyenen alten hader sahe sy das maul verschob vnd neben
 auß krümet die nasen verhielt als ob ir eyn faul ab begegnet het, es
 wär vil von irem vnlust vnd grossem gebräng zesagen, aber ich will es
 fallen lassen. Dann eyns tages sich begab das sy von außwendig czü
 hauß kam do ir vetter Frescho doheym waz sich mit mancherley gespey
 10 vnd vnnützen Worten zü im nyder seczet nit anders thet dann mit ge-
 schwollem angesicht blasen des sy ir vetter fraget zü ir sprach Cicscha
 was bedeut das nun ist doch heut feirtag, wie bist du sobald heut zü
 hauß komen sy im antwurt vnd sprach Vetter es ist war ich bin balde
 wider komen, vnd ist das die vrsache, ich fürwar nicht gemeynet noch ge-
 15 laubet hete das in diser state von frawen vnd mannen also groß vnzucht
 [228^a] het gesein mügen als ich dann stätz sihe vnnd auf disen tag ge-
 sehen hab wo ich nun über die gassen gee vnd die vnnützen weiber
 vnd mann vnnützlich schwätzen hör sunder wo sy das von mir thün,
 das sy gott schände das möcht mir den tod thün, vnnd grössers vnge-
 20 fallen ires klaffen nicht haben möcht, ich glaub in der welt keyne sei
 die solchs mer vngefallen hab als ich tů vnnd das nicht mer czesehen
 noch zehören, bin ich heut sobald zü hauß komen. Frescho der irer
 sytten vnnd gewonheynt mer weist vnd verstünd dann sy selbs thete,
 daran er grosses vngefallen hete czü ir sprach. Tochter hast du dann
 25 solches so grosses vngefallen sunder des daz vngestalt vnrichtig vnd
 schäntlich ist als du sprichst, wilt du dann hin für frölich vnd güts
 müts leben so gedenck dich nicht mer zespiegeln noch mer in keynen
 spiegel sihe. Aber sy als die lärer dann eyn hol ror was vnd die sich
 mit synnen Salomon meynet gleich wär, vnd bei eynem iungen kalb
 30 mer vernunft vnnd synn wären funden worden ires vettern Frescho
 czüchtige straff nicht vernam sunder üppiglich sprach sy wölt sich spie-
 geln als die [228^b] andern täten, also in irer grobheynt sten beleyb
 vnd noch ist.

Gwido Chaulchanti mit eynem züchtigen wort etlich ritter die
 35 in mit Worten vnd wercken gestochen heten schilt vnd straffet.

Do die künigin das ende Emilia histori vernomen het vnd nye-

mand mer zesagen was dann sy, vnd der der durch priuilegium stäts der letst was, darumb sy anhüb vnd sprach. Ir edeln diemütigen frauen wie wol mir mer histori euch czesagen ich mir in mein gedanck vnnnd synn genomen het, doch eyne mer dann andre mir yeczund eingefallen ist die ich euch sagen meyn der syn vnd inhaltung also steet. Von eynem sprich wort alleyn der vileicht keyn mer möcht gesaget werden, darumb solt ir wissen das in den vergangen czeiten in vnser stat warn genüg edel güt loblich syten der ich auf disen heutigen tag keyne mer vernym vnd das vrsache grosser geitigkeyt halben, vn vnder solichen güten syten eyne zermal loblich was als euch allen wol wissendt ist, wie an vil enden in der statt schöne [228^c] gewelm sein, dar vnder sich die erbern vnnnd der adel zesemen fügert ir gespräch zehaben vnd geschäft außzerichten. Auch oft vnnnd dick an solichem end miteynander ir freud heten eynander zû hauß lûden yeglicher seinen tag nam die andern zeeren. Auch vil dick fremd gest durch solche ire ordenung geeret warden auch zû dem mynsten eynest in dem iare sich alle in eyn farb kleydeten, vnd tzu hochzeitlichen tagen miteynander in eyner farb spacziren ritten in der stat vmb. Auch zû zeiten ein kurzweilig schön stechen machten, sunder wenn in neue frölich historien kamen. Vnder disen rittern eyner was mit namen genant herr Berto Brunelichi der mit samt aller gesellschaft eynen andern ritter genannt herr Gwido Chauualchanti in se gesellschafte geren genomen vnd gezogen het vnd das nit on vrsach geren gethan hete, dann er über alle sein tugent der gröste loycus was aller welte, do bei eyn groß natürlich philosophus darauff die gemein kleyn acht het. er waz auch eyn hübsch wol geziret fürnäm weiß wolredend man in allen sachen vnnnd geschäften bas mügend dann keyn ander man yederman erenn [228^d] vnd loben kund vmb solcher seiner tugent willen herr Berto in geren bei im in der gesellschaft gehabt het. aber herr Berto so vermügendt nit was das er in gehalten möcht vnd des seinem studiren vnd grossem speculiren die schulde gaben, darumb er vil alleyne vnnnd von den leütten sein müßte, auch in für eynen Epicurio hielten vnd die gemeyn red was das alleyn sein studiren vnd speculiren nicht anders wäre dann ob er finden vnd durch gründen möchte das got nit wär. Nun eyns tags sich begab das herr Gwido von sant Michel gen sant Iohanns kirchen wercz gieng, vnnnd do er czwischen die porfido seülekn kam die vor der kirchen stünden vnd auch do etlich an der erden lagen, vnd czû solicher zeit die kirchtür gespert was in dem herr

Berto mit seiner gesellschaft auff sant Iohans placz geritten kam. vnd herr Gwido bei den seülen vn toten greberen der auch vil manche do warn erschen heten zů eynder sprachen wir sölle vnder die toten sarch reitten vnd her Gwido eyn kleyn forcht thůn vnd erschrecken, alle ire roß zwischen die sporen namen mit grosser eile in schympfs form herr Gwido überraitten, vnd er [229^a] der ir nit wargenomen hete von in übereilet was vnd zů im sprachen. Herr Gwido vns tůt and auf euch vnser gesellschaft außzeschlahen vnnnd zevershmāhen vnd ir wölt mit der vnsern sein. nun wol hin wenn ir funden vnd speculirt habt das got nicht enist was habt ir dann außgericht vnd getan Zů den herr Gwido als der sich übereilet vnd vnder den grebern verspert sahe schnelle antwurt vnd sprach. Liben herren ir mūgent mir in eüern heüsern sagen was euch liebet, mit diesen worten sein hand auf der toten sarch eine leget die do eyn gůt höhe het. vnd er der do von leib eyn geringfertg man was sich auf die andern seiten des grabes schwang do sy im nicht mer zů mochten also in engieng, Die herren alle als die stummen sten beliben eyner den andern ansahe, doch zcletste czů im sprachen. Er eyn tore wār vnd nicht weislich thāt noch gethan het, dann die antwurt die er in geben het nicht a proposito wār vnnnd nicht geret hieß dann an dem end ir keyner mer zeschaffen het dann er hat, darumb sein red nicht wār den herr Berto ir geselle selbs antwurt vnnnd sprach. Toren vnd vnuerständig leüt ir vnd [229^b] nicht er seit, dann ir seiner red nicht vernomen habt, er hat vns mit wenigen züchtigen worten schändtlicher außgericht dann ir meynet, wolte ir anders sein kurcz antwurt versteen so ist es ware als er gesprochen hat, dann dise toten greber seind der toten geheuß vnd darin sy ir wonung haben als er gesprochen hat sy auch vnser geheuß sein, do bei auch vns beweißt hat daz wir vnd alle vngeleerten erger dann die toten sein, dann die weil wir hie sein wir in vnsern heüsern sein. Also yeglicher herr Gwido reden vnd meynunge vernam vnd was er hat sprechen wölle, also alle bei im zeschanden warden in hin füre mit rüe vnd fride liessen vnd herr Berto in irer gesellschafte hin für allzeit für eyn subtilen fürnāmen verständigen ritter hielten vmb des willen das er herr Gwido antwurt so balde vernomen het.

Mūch Zwifell den von Zertaldo verheyßt sant Gabriel feder eyne zeweisen nd van derselben stat in kolen weißt vnnnd in ze versteen gibt wie es die sei, domit sant Lorencz geröst ward.

[229^c] Do yederman von der edeln gesellschafte sein netze histori verbracht. Dioneo wol vernam es an im wäre diser tagreyß das end czegeben on alle gepote der künig anhübe vnd sprach. Ir züchtigen schönen vnd edeln frawen, wie wol mir in besunderheyt verlihen ist
5 zesagen was mir liebet vnd mein gefallen ist, doch mein wille darumb nicht ist von der angefangenn materi czekeren, sunder den eüeren fußstapfen nachzefolgen, vnd euch czewissen thun wie eyn münch von sant Antoni orden mit eyner schnellen fürsehung flohe eyn grosses vngelücke, vnd schand das im von zweien iungen gesellen bereyt vnd zügericht was. Aber eyns begere ich an euch ir wölt euch nicht verdriesen lassen ob ich mich in meinen reden eyn klein mer lenget dann ir
10 alle auf disen tag gethan habt, dann nämet ware der sunnen scheine noch hoch ist darumb ich hoff güt zeit meiner histori zü end zekomen. Certaldo ist eyn kleyne stat auf eyner kleynen höhe gelegen als eüer yegklichem wol mag wissend sein in vnserm gebiete vnd herrschafte vnnd wie wol sy eyn kleyne stat ist doch von güten edelen [229^d] erbern leüten vor zeiten besetzt was, auch vmb die genenten stat gar vil güter vichweyde was, vmb der willen grosses vich sunder schwein do gehalten waren, vnnd iärlich sant Antoni münch oder brüder dar
20 kamen das almüsen der schwein als dann ir gewonheit ist einzenämen, vnnd vnder andern münchen ir einer gar vil dar kam der was mit namen genant brüder Czwifell, der vileicht nit mynder vmb seines seltsamen namen willen geren do gesehen was als vmb seiner heyligkeit willen dann das ertrich vmb die selben stat machet die schönsten vnd
25 grösten zwifell aller welt auch der stat wapen eyn zwifell ist vnnd die in irem schilt füren. Nun was münch Zwifell von leib gar eyn kleyn man frölichs mütes frisch von angesicht vnnd rotem hare gar eyn gesellig man on alle lere vnd kunst, doch dobei der schnelllest reder vnnd güter schwencke aller welt, vnd vmb soliches seines behenden reden
30 willen wer sein kuntschafft nicht gehabt oder gekant het nit alleyn gelaubet het er eyn grosser lerer vnd retorico wär sunder in Tulio oder Quintiliano selbs gemeynet heten er gewesen wär, vnd sälig sich [230^a] der dauchte sein der in in der stat vnd gegent zu seinem gevatthern haben mocht. nun was münch Zwifell gewonheyt allwegen in dem angsten dar zekomen das almüsen einzenämen, vnd an eynem sonntage frü do yederman bey der meß in dem dom was er auf den predigstül gieng zü dem volck sprach. Lieben herrn vnd auch ir lieben frawen, als euch wol wissend vnd eüer gewonheyt ist alle iar die armen diener

des lieben herren vnd hymelischen fürsten sant Antoni mit eüerm al-
 müsen czestetüren vund in eüer vermügen mitteylen vnd daz mit korn
 wein vnd brot etlich mensch wenig etlich vil yeglich person nach seiner
 andacht vnd vermügen domit der heylich herr sant Antoni euch behüte
 eüer vich kü kelber schwein esel vnnd ochsen vor allem vngelück be-
 ware lange zeit auf erden, vnnd nach disem leben euch erwerbe das
 ewig lebenn, sunder den die in vnser brüderschafte geschriben sein
 die vnns iärliche eyn genantz bezalen, vmb der willen ich von vnserm
 abt daz selbig einzebringen her komen bin, darumb eüer alten gûten
 gewonheit nachzekomen vnd geet mit dem segen gotes zû hauß vnnd
 nach mittemtage [230^b] wenn ir die glocken anschlahen hörent so ko-
 ment her wider, so will ich nach dem allwege mein gewonheyt ist
 euch ein wirdig predig tûn vnd euch das kreucz zeküssen geben vnd
 darumb das ir des gûten herren sant Antoni also andächtigt seit, will
 ich euch vmb seinen willen besunder genad tûn vnd geben vnd will
 euch ein wirdig heyliges heyligtumb weisen vnd sehen lassen, das ich
 selbes über mere von dem heyligen land Iherusalem bracht hab das
 ist eyn feder des heyligen erczengels sant Gabriel die in vnser lieben
 frawen kamern czû Nazaret beleyb do er ir die potschafte von hymel
 bracht, domit brüder Czwifell sein rede auf dise stund endet vnd wider
 an die meß gieng Nun hat sich gefüget das zû solicher rede zwen iung
 gesellen in die kirchen komen waren genûg listig, der eyn was mit
 namen genant Iohann Braganiera, der ander Blasi Piczini, vnd des
 guten brüder Zwifell red in gar wol miteynander gelachet heten dann
 beyd sein groß freünd vnd gûnner waren, doch in fürnamen vnd sich
 des engels federn halben berieten im eyn schalckheit ze thûn, domit
 sy sein noch bas freüde gehalten vnd gelachen [230^c] möchten, dann
 wol vernomen heten das er desselben morgen in dem castell mit eynem
 seinem freünd das mal essen solt, vnd do er zû tisch gangen was sy
 sich beyde in sein herberg fügten, in solicher meynung das der eyne
 des münches knecht in rede vnd worten hielte, und der ander vnder
 des münchs dinglach solt nach der federn sûchen, vnnd die nâmen wie
 die wâr, auff die meynung wenn er sy dem volck weisen meynet vnd
 der federn nit findt was er doch für eyn außred oder außzüg geben
 wôlt. Nun het mûnch Zwifell eyn knecht der von etlichen der gescheid
 Guccio geheysen was etlich in den schweinen Gôczen nanten, der sel-
 big Guco was als ein zenichter esel als Lippo Toppi ye keinen gema-
 chet, er gab zû zeiten brüder Zwifell vnd seinen gesellen mit gûten

schwencken kurzweil, desselben gleichen brüder Zwifell sein besunder freude het vil dick czü seinem gûten gesellen sprach. Mein knecht Gucio hat in im so vil vntugent wo nun derselben eyne bei Salomon oder Aristotile oder Seneca gewesen wär so zweifelt mir nicht sy het
 5 soliche kraft gehabt das sy in alle ire tugent synn vernunfte [230^d] heyligkeyt vnnd weißtumb entwicht het, darumb nāmt war was gûten menschen er sein mag, dann bei im weder zucht tugent noch heyltumb nit enist. Auch zû zeiten von etlichen gefragt warde was doch soliche seine vntugendt wāren, den er als der sy alle weißt vnd in reim gesezt
 10 het antwurt vnnd sprach. Er ist eyn grosser schlafer vnnd spater erwacher faul trāg in allen sachen vnzüchtig in wortenn vnnd wercken, noch eyne er hat der ich vmb des besten willen geschweige des am meysten von im zelāchen ist, daz ist er an allen enden do er mit mir hin komet weib nāmen vnd heûser bawen will, vnd wenn er eyn langen
 15 wol geschmierten parte hat so beduncket er sich am schönesten sein vnnd alle frawen vmb in werben sōllen, vnnd mōcht er er lieff in tag vnnd nacht nach, aber ich mage sein nichte emberen vnd ist mir eyn nticzper vnnd gehilfflich knecht, dann nyemand ist der mit mir so in geheyme nicht reden kōnn das er seinen teyle do von nit vernāmen
 20 wōlle, vnd wo ich etwas gefragt bin er stāts besorget ich nicht antwurt geben wiß, vnnd schnell e dann ich antwurt gibt ia vnd neyn [231^a] nach dem in füglich duncket Disen seinen knecht het mūnch Czwifell an der herberg gelassen vnd befolhen das er gût hût thāt domit im nicht verrûret wûrd, sunder den watsack darinn das heylig-
 25 tumb wāre. Nun der gûte knechte Magucio der mer lust vnd freud het in der kuchen hinder dem herd zesteen dann in der grūnen awe die vōgelein singen hōren, sunder wenn er die kuchenmeyd darinn vername, Nun het derselbig wirt eyn auß der massen vngestalten meyd der selben meyd Maguczo kuntschaft genomen het sy was veyßt als eyn
 30 schwein, dick nyder leibes genûg ūbel geformiret mit zweyen grossen dutten den mistkōrben gleich, czü der er in gleichem form als der geir zû dem faulen aß thāt er zû ir thet, vmb eyns solichen willen er seins herren kamern offen vergessen hete, vnd wie wol es in dem augsten was, doch darumb nicht gelassen mocht sich wermen mûst vnnd
 35 sich zû dem feur seczet zû der meyd sprach die Nuta genant was, wie er eyn edel man vnd sant Antoni procurator wār, vnnd wie er reich wār vnd vil gulden het mer dann milanta noue on die [231^b] er schuldig wārl dere e mer dann minder wāren, mer er sprach wie er als

eyn künstreich man wäre, die kappen an seinem halß so schmalczig was sy het eyn kessel mit rüben gemacht sein iopen alle czerrissen vmb das goller vnnd an der brust gar wol mit schweyß geschmelczet von mer farben geflicket dann tûch auß fremden landen in vnsere lande nye bekame, des geleichen seine schûch vnd hosen waren, vnnd czû der meyde sprach, wie in der herr der stat wölte wider in punt machen vnd auß aller armûte vnnd auß ander leût dienste nâmen, darumb er in kürze grosses gelücks hoffet Das vnd anders er der gûten dieren cze versteen gab, aber alle sein rede sich in wind bekeret als im dann
 10 allweg geren zûstünd. Nun die czwen egenanten vorigen gesellenn den schweinen Gôczen hinder dem herd bei der Nuta in ernstlichem gespräch funden, des beyd gesellen wol zemût waren vnd on alle müe in mûnch Zwifell kamern kamen die sy vngespert vnd offen funden vnnd das erst das in zû handen kame das heyligtumb ze sûchen das was der
 15 watsack darinne die federn was den [231^c] sy offen vnnd die federn die von eynem sittich was in eynem seyden tûch verwickelt funden in einem kleynen kâstlein die sy on zweifel meynten die wâr die er dem volck zeweisen versprochen het, vnd für war er czû der czeit das volck das do grob was mit kleiner müe het glauben machen daz es
 20 sant Gabrielo federn gewesen wâr, dann von sittich nyemer heten hören sagen noch gesehen heten do bei einfältig waren, darumb brüder Zwifell vnder in gût predigen het Do nun die zwen iung gesellen die federn funden hetten all wol zemût waren die mit in weg trûgen, vnnd damit das kâstlein nicht lâr belib sy kolen darein theten
 25 die sy in eynem winckel der kamern ersehen heten wol czûsperten alle ding liessen wie sy es funden heten, vnd von nyemand gesehen waren frölich mit der federn von dann gingen vmb wunders willen sehen wolten was doch brüder Czwifell sprechen wölt wann er an der federn stat kolen fund. Als nun oben gesprochen ist wie das eynfältig volck von
 30 frawen vnd mannen vernomen het das in brüder Zwifell sant Gabriel federn nach non zeite [231^d] weisen wölt, vnd nach seiner gesprochen meß alle zû hauß giengen eyn nachpaur es dem andern saget eyn geuâterin der andern, vnnd do nun yederman das mal eingenomen het, alles volck von frawen so vil in die statt kamen brüder Zwifel heyligtumb zesehen daz sy on zal waren vnnd weder in die kirchen kamen noch auf
 35 den kirchhof gesten mochten alle warten sant Gabriel federn zesehen. Do nun der gût mûnch Zwifell gar wol geessen vnd nach dem ein gûten schlafe gethan het vnd nach der non zeit auffgestanden was, vnnd das

groß volck sein heyligtumb czesehen vernomen het seinen knecht Guczo
 mist nach dem watsacke schicket, dem es grosse müe was auß der kn-
 chenn von seiner lieben Nuta zescheyden in die statt ze gen, doch mit
 grossen seüffzen den wege vnder die füß nam mit dem watsacke in das
 5 castell kame, dann das wasser czetrincken im den bauch geschwellet het
 vnd nach seins herren gepote czü im er in die kirchen kam vnd die
 glocken anhüb zeletten, vnd do brüder Zwifell zeit daucht aufstünde ze-
 predigen, vnd was im füglich was zü seinem proposito [232^a] das er
 saget, vnd do er kam des engels federn czezeygen vor dem volck die
 10 offen beicht vorsprach grosses geleticht von kerczen vnnnd liechten gepot
 anzeczünden, nach dem mit grosser reuerencz vnd andacht sein käst-
 lein aufspert vnd mit grossen wurden daz seiden tüchlein aufband,
 doch vor etliche gebet mit grosser andacht ~~Auf~~ auf seinen knien gespro-
 chen dem engel zelob vnd eren, mit dem das heyligtumb auß dem
 15 kästlein meynet zenämen. vnd do er das vol mit kolen fand vnd sahe
 groß schrecken enpfeng doch des on zweifel was das Guczo sein knecht
 im das nit gethan hete, dann in nicht so listig noch so gescheid erkant
 noch im darumb übel züredt das er so bößlich des watsackes gehüt het,
 wol im selbes übel züsprach das er Guccio daz sein befolhen hete do er
 20 in also zü nichte erkannt, doch vmb eyns solichen willen das sich die
 federn in kolen verkeret het sich nicht betrübet, sunder bald sein hend
 auf gen hymel recket mit heller stimm schreye vnd sprach. Nun sey got
 der almächtig vnd sein grosse machte gelobet, mit dem das kästlein
 schnell wider zü thet, vnd [232^b] sich gen dem volck keret vnd sprach.
 25 Lieben herren vnd frawen ir solt wissen do ich noch gar eyn iunge man
 was ich von meinem abt vnd überisten in der sunnen aufgang gesant
 ward zesüchen die gesece vnd gepot die Porcellano gegeben het die ze-
 bringen, nach solichs meines herrn gepot ich mich auf den wege machet,
 vnnnd von Venegia außfür perlo burgo de Greci das ist die kriechisch
 30 gassen durch das künigreiche Garbo in Baldacko vnd Parione nichte mit
 kleynem durste in Sardingna bekame, also mit lebendigem leibe gar vil
 manche land vnnnd künigreich durchfaren vnnnd sücht hab, Auch sant
 iörgen arne in Roffia vnnnd Buffia überfür darnach in Menczognia kam
 do ich vil vnser brüder fande. die alle ire müe vmb gotz willen gaben
 35 vnd ander leüt müe kleyn achten wo sy iren nucz sähen, nach dem be-
 kam ich in Abrucz do man vnd weib auf stelzen geen vnnnd den wein in
 secken füren vnd das wasser abwerce rint, darnach ich fürpas zoch vnd
 in India Pastinacha kam do die gänß auf holczschüch gen, vnd die änten

auf [232^c] baumen wachsen, do schwer ich bei meiner sele vnd orden
das ich die gefiderten flügen sahe, das den vngesehenden vngeläublich
ist vnd mich des nicht lügen lassen. Aber wärlich ich nye finden mocht
das ich do süchen ging dann fürpas man auff dem wasser fert, darumb
5 ich wider czeruck keret vnd in das heylig land bekame, do fand ich den
heyiligen vatter sant Miblasmete, der selbig wirdige vatter patriarche
von Iherusalem vmb des lieben herren sant Antoni orden willen er wolt
das ich alle seine heiligtumb sähe die er in seiner gewalte hete, der
waren also vil solt ich sy euch die alle nennen ich käme sein in vil man-
10 chen meilen nichte zü ende, doch domit ich euch eyn kleyne erfreue ich
ir euch etlichen nennen will, von erst er mich sehen ließe eyn finger des
heyiligen geysts also gancze vnd gar als er nye was. vnd eyn schopff
hars des Seraphin der sant Francisco erscheyn, vnd eyn rippe des
Verbo Caro Facta la finestra, Eyn kleyd des heyiligen Credo, vnd ettlich
15 flammen des sterens der den heyiligen drei kängen in dem aufgange der
summen erscheyne, mer er mir czeyget [232^d] eyn gläslin des schweyß
sant Michels do er den teüfel bestriten het, vnd eyn kinpack sant La-
zaro tod, mer vil andre heiligtumb der ich aller eyn abgeschrift name,
vnd ich im widerumb eyn abgeschrifte gab der wunden der perges ge-
20 nant monte Morello die er gar lang zeit was süchen gangen, vmb eyns
solichen er mich begabet vnd seines heiligtumb mich teyllhaftih macht
vnd gab mir eyn zan des heiligen kreüczs vnd in eynem angster der
stimn der glocken Salomon tempell, domit eyn federn des engels Ga-
briel als ich euch vormals gesagt hab. vnd eyn holczschüch des heyiligen
25 herrn sant Gerhart den ich nicht lange ist schäncket Gerardo Bonsy czü
Florenz der czü dem gütten heyiligen sein besunder andacht hette. Mer
gab mir der selbig wirdig herr vnd patriarch von den heyiligen kolen
domit der heylige martrer sant Lorencz geröstet ward, die selben kolen
ich euch zeliieb vnd andacht herbracht hab. Es ist wol war das mir
30 vnser abt nie hat verhenggen wollen das ich sy yemand het weisen mün-
gen, also lang bis daz er sich des selbs hat erfarn daz sy die sein die
den heyiligen [233^a] zü Rom brieten vnd das durch brief vnd wunder-
zeychen ist beweist worden, darumb sy on czweifel die warhaftigen sein,
nachdem er mir sein vrlaub geben hat die czeweisen, vnd die stätz bei
35 mir zetragen dann nyemandt darüber getrawet dann mir alleyne, aber
euch die warheytt zesagen ich trag auch des engels Gabriel federn bei
mir in eynem kästlein, dem mit den heylichen kolen gleich vnd vil dick
sich begibt das ich das eyn für daz ander begreiff, als mir dann auf dise

stunde geschehen ist, ich meynet ich hete das kästlein mit der heyiligen
 federn genomen so ist mir das mit den kolen zů handen komen das für-
 ware mit gefär nicht geschehen ist, sunder alleyne der will gottes ge-
 wesen ist, vnd er selbs mir das kästlein mit den kolen in mein hand ge-
 5 geben hat, dann so ich mich recht bedencke so ist bis übermorgen sant
 Lorenczen tage, darumb gott selber gewölt hat mit zeychen der kolen
 das sich eüer andacht zů dem heiligen herren sant Lorencz mere, vnd
 er eüer gemüte zů im in liebe enczünde, darumb mir nicht die federn
 die ich nāmen meinete, sunder die abgeleschten kolen domit der heylig
 10 leichnam [233^b] geröst ward zů handen schüff. Darumb meine liebe
 kind mit dem heyiligen segen gotes ziehet ab dem haubt eüer hüt vnd
 kappen nähete euch zů mir daz wirdig heyligtumb czesehen, auch solt ir
 wissen welich person dise heyiligen kolen vnder dem zeychen des hei-
 ligen kreützes anrüret der selbig mensch das selbig iar sicher ist zeleben
 15 vnd in keynem feür sich ze vergen oder brennen das er des nicht en-
 pfind, mit disen worten frölich anhüb sant Lorenczen lob zesingen vnd
 mit dem das kästlein aufthet die kolen an heyligtumb stat mit grossem
 geletuchte vnd andachte weiset, die daz eynfältig toret volck mit grossem
 andächtigem gebete anbeten geren sahen gott lobten vnd danckten mit
 20 grossem geträng sich czů münch Zwifell näheten ir opfer im willig-
 lichenn gaben, mer vnd besser dann sy vor ye gethan heten, in vlessig
 baten das er sy mit dem heyligtumb bestrich, des er willig waz die kolen
 czů seinen henden nam vnd den frawen auf ire weisse schleyer vnd stau-
 chen, vnnd den mannen auf ire goller grosse mächtige schwarcze krüz
 25 machet so sy am grösten darauf gesteen mochten vnd von sollichem sei-
 nem anstreichen der [233^c] kolen er zů dem volck sprach. wie vil er ir
 kreütze zemachen verstrich oder vermalet doch darumb die in dem käst-
 lein, nicht abnāmen noch mynder würden, sunder sich stätz merten.
 Also der gůt münch nit mit kleinem seinem nucz alle Certalder kreüzi-
 30 get, also er mit eyner schneller behender fürsichtigkeyte die dasigen die
 in meynten czeleychen vnd über den syn thün vnd im sein heilige federn
 genomen hetten, er sy leychet vnd schändet vnd sich selbs eret die sich
 do bey, vnd mit funden seinem neüen fund vnd außred gar eben ver-
 nommen heten, sich nicht verwundern mochten das er sogar durch ferr
 35 wege sein materi mit grossem ernst vnnd rede czů dem ende bracht, do
 er dann hin komen meynet, sich beyd wunder namen der abenteürlichen
 sach vnd schönen lügen nicht genůg lachen mochten, vnnd czehand dar-
 nach do sich das volck verlaufen het, die czwen iungen gesellen zů

münch Czwifell giengen mit grossen freuden vnd gelächter was sy im der federn halben getan heten alles sagten vnd czewissen theten, im sein federn wider gaben, die im das nächste iare darnach nicht mynder nütze was als [233^d] die kolen auf den selben tage gethan heten.

Die letst histori der sechsten tagreyß der wirdigen gesellschaft grosses lachen vnd freud bracht, sunder des münches walfarte do er über mere in India Pastinacha vmb das heyligtumb gefaren was. Nach dem die künigin wol vernam ir herrschaft zů irem ende komen was aufstund die kronen ab irem haubt nam mit frölichem anpicke sy dem iungen Dioneo auf sein
 10 haubt seczet vnnd sprach. Dioneo es ist nun wol czeite das du auch versüchest was sorg es frawen ist künereich zeregiren, vnd sich das du in solicher maß regirest daz wir vns dein loben mügen, Der edel iung die kronen enpfiehg balde antwurt vnnd sprach. Lieben frawen ir mügt vil dick gesehen vnnd vernomen haben das die künig von den eynfältigen
 15 zů manch malen sein lieber vnd werder gehalten gewesen dann ich vileicht von euch sein würd; aber fürwar volget ir mir vnd seit mir vnder-tan als man dann eynem künig gehorsame sein sol so czweifelt mir nicht ich sol euch frölich leben machen. dann on gūten müte den ich hoff euch zegeben keyn frölich freud gesein mag, doch laß ich [234^a] es yeczund
 20 bei disem beleiben vnd s nach irer gewonheyt dem haußmeister für sich rüfet vnd befalch dieweil sein herschaft werend was er tūn, vnd handeln solt, darnach sich zů seiner wirdigen gesellschaft keret vnd sprach. Mein allerliebsten frawen gar auff mancherley syn vnd meynung ist von der welt listigkeyt gesagt worden vnd fraw Liciesea die yeczund als
 25 nicht lang vergangen ist hie bei vns waz die selbig mit irer rede vnd streitte mir hat vrsach geben zefinden von welicherley materi wir bis morgen sagen sollen, des ich mich vileicht lang zeit het bedencken müssen den anfang zegeben als ir dann wol von ir vernament wie sy sprach in irer nachpaurschaft keyn iunckfraw wär, noch keyne die czů irem
 30 mann iunckfraw komen wär. auch mer sprach. Sy weiste eyn eygen-schaft weliche frauen iren mannen die hörner machten, doch laß wir die ersten sach steen dann kindspile ist. Aber von der andern zesagen kurzweilig sein wirt, darumb mein syn vnd gefallen ist auf morgen ze-sagen, seitmal mir Liciescha vrsach geben hat von den frawen die vmb
 35 liebe oder ir eygen ere beschützung willen ire männer züchtiglich be-[234^b]trogen haben vnnd die eyns solichen nicht war genomen haben, aber von solicher materi zesagen etliche von den züchtigen frawen dauchte es nicht zethūn wäre, vnd den künig baten er sich ānder materi

bedächte, auf eyn solchs der künig antwurt vnd sprach. Fraw was ich gepoten hab ist mein syn als ir dann gethan habt. dem also nachz-

7 komen. dann wir yeczund in solicher zeit sein das frawen vnd mann reden vnd sagen mügen was in liebet vnnnd ir gefallen ist, es sey züchtig

5 oder vnzüchtig, nun das recht vnd mit zucht brauchen in verilien ist, wissent ir nicht das dise grausame zeite vrsache ist das die richter alle rechte haben fallen lassen geleich geystliche als weltliche, nun domit wir vnser leben beschützen mügen sy eynem yegklichen zügeben vnd verhängen zethûn sein gefallen, darumb ob ir in eterm reden ein kleyn

10 mynder dann czüchtig seit schat nicht, nun solichem in wercken nicht nachkomet dann wir das thûn vns freud czegeben, darumb kan ich ye nicht vernâmen mit was widerrede oder argument ir von yemand mügt gestraft werden über daz was bis auf disen heutigen tag ist gesaget worden [234^c] Ich nichte vernâmen mage, das wir darumb in keinerlei

15 czestraffen sein, noch das hinfür mit der hilff gotes geschehen sol. Nun wer möcht der gesein der vnser züchtig leben erkante vnd das nicht lobte. Euch die warheyt czesagen, war vernâm das ir von diser angefangen kurczweiligen materi zesagen abliesset, der möcht sich villeichte übels dann gûts versehen vnnnd gedächt vileicht ir wâret selbs in solchen

20 sünden begraben wo ir von solicher materi zereden abstünde, on das das ir mir kleyne ere thât wo ich euch allezeite gehorsam gewesen bin vnnnd ir mir des nicht sein wöltet, wâre ye wider alle recht seitmal ir mich czû eûerm künig erwelet habt vnnnd mir nun yeczund neüe gesezze geben, vnd ir mir vnd ich nicht euch gebieten wölt vnd meine gepote

25 czeruck legen vnd nicht halten wâr ye übel getan, darumb laßt alle forchte vnd sorg fallen dann die mer bösem gemüte czüsteen dann gûtem, vnd eûer yegkliche sich gar eben bedenck vns was gûts czesagen. Do die edeln frawen des künigs ernstlich red vernamen alle sprachen, des künigs gepote vnnnd seinem gefallen man nachkomen solt. [234^d] Nach

30 diser red der künig auf den tag seiner gesellschaft spacziren zegeen vrlaub gab vnd yederman nach seinem lust vnd willen tät. In dem die nacht kame yederman sich czû pete schlafen füget.

Hye hat die sechste tagreyß ein end,

GOT VNS DIE SIBENDEN ZUO GUOTEM END WEND.

Vnder dem gewalte vnd regiment des künigs Dioneo dise wirdig gesellschaft sagen wirt von den frawen die vmb liebe vnd beschützung irer eren willen ire mann betrogen haben, vnnnd die solcher betrügung nit war genomen noch die erkannt haben, vmb des willen die frawen bei iren eren beliben sein.

Alles gestieren des aufganges der sunnen sich verborgen hate, dann alleyn den wir Lucifer nennen noch elüchtedt. In dem der haußmeyster von dem schlafe auffgestanden was, mit grosser salmareye in
 10 der frawen tale gienge, do er nach ordnung des künigs czü bereyten thet den selbigen tag do ze vertreiben, vnnnd do iren luste vnnnd freud zehaben. Nach dem der [235^a] künig auch nit lang verging aufstünd den die für greden karren vnd wägen in seinem schlaf gebrochen heten, vnnnd er auch den iungen frawen vnd mannen den iren brache alle schüff
 15 aufsteen, vnnnd vor der sunnen auffgang bei der küle sich auf den wege durch das grün gestreüch fügten do sy die kleinen wald vögelein mit lust hörten singen, sunder frau Filomena das ist fraw nachtigal nye mer so wol heten singen hören, also die edel gesellschaft von dem schönen vogelgesange durch das grün tale an das end do ir syn hin stünde
 20 beleyt worden, vnd do die zeit kam das essen zeenpfahen die tisch vnder den grünen schönen lynden bey dem schönen weyer bereyt vnd gericht waren, vnnnd do des künigs gefallen was alle zü tisch giengen, vnnnd also essend die schönen fische in dem frischen klaren wasser lyn vnd her springen sahen, vnd do das essen zü seinem end komen was
 25 die tisch vnd alle speiß weg genomen waren anhuben frölich zesingen vnd mit solchem gesang in der grünen awe spacziren giengen. in dem der haußmeyster etliche schöne pete vnder etlich gezeld zü bereyt het darinne sein herrschaft vnnnd die [235^b] wirdig gesellschaft rüen möchten. Do sy nun von dem spacziren wider kamen, der künig in sein
 30 vrlaub gab yederman sein gefallen bis auff vesperzeit czethün, do nun vesperzeit komen was vnnnd alle von dem rüen aufgestanden waren des

künigs gepot vnd sein gefallen was sich an das ende do man geessen het
 . netie historie zesagen fügen do sy das grün gras mit tebichen bedeckt
 fanden nahet bei dem schönen weier sich nyder seczten, vnd der neü kün-
 nig fraw Emilia sein erstes gepot thet sy der bedachten materi den an-
 5 fang gäbe die frölich vnd mit lachendem mund anhüb vnd also sprach

Wie Iohannes Lotringer eynes nachtes an sein haußtür klo-
 pffen höret das in czü der zeit fremd sach nam vnd sein weib als
 die do wol weßt wer es waz im zü versten gibt wie es eyn vngeheür
 fantasma sei beyde außsten zü der haußtür geen den geyste be-
 10 schweren, vnd er zehand seines klopfen aufhöret.

Lieben herrn vnnd auch ir lieben frawen es wär mir ein groß ge-
 fallen gewesen, wo es euch geliebet het, daz ein ander person dann ich.
 solicher [235^c] wirdigen tagreyß het iren anfang geben, besunder soli-
 cher materi douon wir auff disen tag sagen sollen Doch seitmal es eter
 15 will ist das ich die erste sei so bin ich bereyt zethün eter gefallen, vnd
 will mich in besonderheit fleissen zesagen des ich hoff hin für euch sölle
 nucze vnnd frumen bringen, dann sein ander frawen forchtsam als ich
 bin. Der geist vnd fantasma die geren des nachtes geen got sei mein
 zetüg so kan ich ye nit wol vernämen was doch soliche vngeheüere ge-
 20 sein mügen vnd yederman nicht ich alleyn ir sorge vnnd forcht het,
 vnnd domit ir solicher geyst fantasma oder vngeheüer on forcht vnnd
 sorge leben vnnd ferr von euch treiben müget wo sy euch bekümmerten
 so solt ir mercken vnd in meiner neüen historien ein heyliges gepete
 lernen vnnd vernämen das czü solchen sachen on zweifel forder güt ist
 25 Darumb mercket gar ebenn mein allerliebsten frawen vnd nāmet war
 das in vnser stat in sant Branckaczen gassen eyn tücher gesessen was
 mit namen genant Iohanns Lotringer in seinem handel mer gelückhaffig
 dann weis in andern sachen, vnd vmb seiner eynfältigkeyt willen in gar
 vil [235^d] von der brüderschaft vnser frawen zü irem hauptman mach-
 30 ten ir schüle aufzehalten die brüderschaft czü zeiten zü eynander ze-
 treiben stāts solicher ampt pflag des er sich gemeyd daucht vnd dester
 höher hielt gar gern almüsen vmb gotes willen gab, sunder armen mün-
 chen czü zeiten alte hosen schüch vnd kapen gab. die in gar gūte sālige
 gebet lerten sunder das ewangelium pater noster sant Lazaro gesang
 35 sant Bernhards klag vnd frawen Metelda lob do bei mer vil andre gebet
 die im alle vmb seiner sel heyl willen lieb waren. Nun het derselbig

Iohans Lotringer ein auß der massen schöne iunge frawen zů eyne
weib die was mit namen genant fraw Tessa vnd was Manuzo tochter
von Cuculia, sy was weis vnd klüg in allen iren sachen iren schlechten
man in seiner eynfältikeyt gar wol erkant. Die selbig gůt fraw grosse
5 liebe het zů eyne iungen man genant Friderich Pegolott der eyn frisch
frölich herrlich man was, mit irer meyd anleget vnd anrichtet daz sy
mit Friderichen redet vnnnd in auf ir dorff das nicht ferre vor der por-
ten der stat was mit ir zereden komen schüff, dann den merern teyle des
sumers auf [236^a] dem dorff was, vnd zů zeiten der man auch des abent
10 auff das dorff gienge, doch gar selten mit ir kam zeschlafen, vnd stäcz des
morgens wider in die stat gienge. Der iung Friderich der frawen nicht
mynder lieb trüge als sy im thet, nichte grössers begeren was dann sich bei
ir czefinden, im zeit nam nach dem der frawen meyde mit im verlassen
hette vnd des selben abents sich zů der frawen in das dorff füget in wol
15 gedachten der man des nachtes nicht käm beyde mit eynder czů pete
giengen ir freud vnnnd lust die dann soliche liebe gibt heten, vnnnd die
weil sy in solchem in iren armen also beschlossen lagen die fraw Friderich
ires manns gebet bei sechssen die selbigen nacht leret, doch ir
meynung nichte was das sy die letsten sein solten als sy dann die ersten
20 gewesen waren, vnd domit die gůt fraw nicht allwegen die meyd nach
irem lieben Friderich schicken bedörffte sy ir besunder ordnung solicher
liebe eyn genügen zethün gaben, vnd die fraw im eyn soliches
czeychen gab, als oft er auff sein dorff ritt oder gienge das eyn kleyn
oberhalb was das er in dem weingarten bei dem hauß war nām do wurd
25 [236^b] er auf eyne pfal eyne esels schedel sehen, vnd wenn der gen
der statt werce mit dem maul gekeret wär das er dann die selben
nacht on alle sorge zů ir käme, vnnnd fund er die haußtür nit offen das
er dann züchtiglich zů dreien malen anklopffte so wölt sy im bald auff-
thün vnd einlassen, wär aber sach das der esels schedel gen dem perg
30 werce gekeret wär das er nicht käme dann der man komen wär. In
solichem form sich zů manch malen mit grossen freuden bei eynder
funden, vnd vnder andern malen eyne mals sich begab das Friderich
mit frawen Tessa solt zů nacht essen vnd sy zwen gůt veißt kapaun het
bereyten lassen, in dem ir man der des selben nachtes nach irer meyd-
35 nunge nicht komen solt kam vmb des willen die fraw sere betrübet was
mit dem man eyn wenige kalt fleysch aß das ir des morgens was über
belieben, vnd mit der meyd schüff die czwen kapaun also gekocht in
eyne weissen tüch domit vil frischer eyer zwů flaschen mit wein in

den garten vnder eynen pfersigbaum ze tragen, vnder dem sy mit Friderichen vil dick daz nachtmal gessen het geschaffen vnd getan eynding was, die meyd [236^c] alle ding in den garten, vnder den pfersigbaum trüg, vnnnd die fraw mit als grossem vnnüt vmbgeben was das
 5 sy nicht bedacht der meyd zebefelhen das sy als lang gewartet het bis Friderich wäre komen vnd im des manns komen het zewissen gethan, vnd die speiß in dem garten zû im genomen het, also in irem zoren vnnnd vnnüt ir selbs vergaß mit dem mann schlafen gieng des selben gleichen auch die meyd schlafen gieng. nachdem nicht lang verging das
 10 Friderich kam vnnnd gemeynklich an die tür klopfet die do gar nahent bei der kamern waz das Iohanns vnnnd die fraw schliefen das sy bald vernamen, doch sy des gleichen thet als ob sy schlief domit sich der man gen ir nicht arges verdächt beyde lagen vnd horchten, vnd über eyn kleyn weil Friderich zû dem andern mal anklopffet das der frawen man
 15 etwas fremd nam, vnnnd die frawen stieß zû ir sprach Tessa vernymest du als ich an vnser haußtür klopfen. Die gût fraw die vil mer dann er vernomen het sich mündern warde zû dem man sprach. Was sagest du. ich sprich sprach Iohanns man klopfte an vnser tür. Do sprach die fraw. awe [236^d] mir lieber Iohanns weyst du nicht das es die fantasma ist die
 20 mir in disen vergangenn nächten so grosse forcht auff getan hat ich kûnd dir es nit gesagen, vnd als bald ich sy yeczund klopfen köret ich mein haubt vnder die decke zoche, vnd nicht so beherczend was das her für zetûn bis ich dich reden höret Do sprach Iohann Nun wolan frawe hab keyn sorg ist im als du sagest. Ich sprach ist nicht lang Te lucis ante
 25 termino vnnnd den. Magnalia dei vnd vil ander heyliger gebete e wir zû pet giengen, vnd gesegent vns in dem namen des vatters des sunes vnnnd des heyligen geystes, darumb wir vns nit bedürffen besorgen, dann soliche geyst wie vil krafte sy haben so mügen sy vns doch keynen schaden tûn. Die fraw des mannes red wol zemût was aber Friderich halben
 30 sich betrübet. vnnnd domit er sich gen ir nit arges verdächt ir fürnam aufzesteen vnd Friderich vnderrichten wie ir man vnd nyemand anders bei ir wär, zû dem man sprach. Ia du sagest nun dein weiß domit ist nit außgericht So sage ich dir das ich mich in diser nacht nit sicher enpfind wir beschweren dann dise fantasma du hye [237^a] pey mir pist.
 35 do sprach Iohan wie beswert man sy do sprach die frawe; daz kan ich wol Dann an dem andern tage do ich gen Phisola wallen ginge Ein ein-sidelin; O lieber Iohans daz aller heiligste ding got alleine weyß was ich dir sag Die mich also erschrocken sache, die vrsache begert ze wissen,

Do sy die vernomen het mich ein heiliges gepete leret vnd sprach sie hette es zů mermalen versucht vnd probirt ee sie zů einer pett schwester warde vnd wer ir alweg gehilfflich gewesen; aber ich wer so beherczent nye gewesen daz alleine zů versuchen; Aber seytmal du iczund hie pey
 5 mir pist so will ich gen versuchen die fantasma vnd geiste zů beschweren Iohans zů ir sprache frawe ich pin sein willig vnd ist mein wol gefallen, palde aufstunden in grosser stille sich peyde zů der haustür fügten vnd Friderich der auser halbe waz im peitent wol gedachte die sache ginge nicht recht zů. Do nun Iohans mit sampt der frawen an der tür was,
 10 die frawe zů im sprach Iohannes reüster dich würffe auß. Damit das vngeheüer vernam das mans pilde hie sey; wenn ich dich es heysse, wol sprach Iohan gern lasse [237^b] mich schaffen! In dem die frawe ir gepete anfinde vnd sprache O fantasma die des nachtes get mit ragedem zagel ge in den garten vnder den pösen pfersig paume do finstu ein to-
 15 bisunto vnnd hundert charachilli von meinen hünern vnd secze den munt an den storsacke vnd ge deinen weg vnd lasse mich vnd Ganni mit fride leben Do sy also gesprochen het zů dem man aber sprache Iohan rüster dich vnd würffe auß das er palde thet, vnd Friderich außerhalb den porten was alle rede peyder wol vernomen het sein sorge vnd eyfern
 20 fallen liesse, mer willen het ze lachen dann anders zů thon, vnd in dem do er Iohan rüstern vnd außwerffen höret er in stille sprach ein zan hernach; Do im die gůt frawe ir beschwern zů dem dritten mal verpracht het, mit dem man wider ze pette ginge, vnd Friderich der mit der frawen zů nacht meinte essen vnd noch nicht gessen hett, sich in
 25 den garten zů dem phersig paum füget Do er czwen gekochte kapaun die eyer vnd die czwu flaschen fande, Das er alles mit im heym zů hause truge Do er mit gůter musse das nachtmale asse, vnd do er sich des andern nachtes pey der [237^c] frawen fande grosse freüde hetten des gůten gepetes daz vngeheüer zů besweren das dez nachtes get; aber die
 30 warheit zů sagen wol etliche sein sprechen daz die frawe den esel schäd- gen dem perge wercz gekert hette, Vnnd wie der pauer durch den weingarten nun gegangen was der hett mit einem stecken daran geslagen do het er sich vmb gedrät vnd gen der stat gekert Das was die vrsache das Friderich meinte die frawe hett im ze komen das zeichen geben, vnd
 35 in dem als die fraw von der türe ze pette ginge sy zů der fantasma sprach, Nun gee hin das dich got beleyte, Ich hab den eselschädel nitt vmb gekert es hat ein ander geton vnd ist mir werlichen leyt ich pin hie pey meinem Iohansen. Darumb fare in meinem namen do ich dich hin

bescheyden hann! Mir hat woll ein alt weybe gesaget wie eins vnd ander ware sey nach dem sy spricht do sie ein iunge meyt waz vernomen het wie nicht alleine Iohansen Lotringer sölche abeteter zû gestanden were, sunder auch einen andern genant Giano dz Nello der in sand Peter
 5 gassen gesessen was, Der sich nit minder dann Iohans geistlich vnd [237^d] kluge dauchte. Darumb mein allerliebsten frawen die wale zû euch ste, weliches euch vnder den czweyen mere liebet vnd gefelt das lernet dann zû sölchen sachen ir tugentte grosse sein als ir durch experiencze genug wol vernomen habt! darvmb lernet gern so wert ir zû
 10 eren; dan sölche gepete auch euch noch möchten zû gûtem fromen komen.

Wie ein iunge fraw genant Peronella einen iren puelen in ein öllfaß verporgen het daz ir man zû der stunde einem andern verkauft het mit dem er nach dem faß kam; zû dem die frawe sprach sy hette es einem andern vor verkauffet vnnd wer darinne zû sehen
 15 ob es ganz reyne vnd vnzeprochen were.

Mit frölichem gelechter Emilia neue histori von der edelen gesellschaft gehört ward der frawen gepete die fantasma zû beschwern sere lobten vnd für heilig hielten Zû hant nach dem der kñg Philostrato gepote er fürpas volget der also sprach. Mein allerliebsten frawen es
 20 ist der leicherey vnd betrügnuß so vil vnd mancherley die euch gethon wern besunder von ettern ee[238^a]mannen. Darvmb wenn es sich begebe das ein frawe alleine irem eman über den syn thet Ir söltet nit alleine des wol ze müte vnd content sein daz ein sölches geschehen were; vnd nicht alleine das geren hörn vnd nicht sparn sunder selbes yederman
 25 daz zû wissen thon vnd sagen, Damit den manne kunt würde daz nicht alleine sy sunder auch ir was wissent vnd kündet ettern nucze suchen, Dann wenn ein mensche vernymet das ein ander person auch was kan sich nit gerincklich wider in seczet zû betringen als wenn er weiß das die person eynfeltig ist, wem czweyfelt des als wir dann der materi
 30 halben auf disen tage sagen wern, wo ein sölches den manne zû wissenn komet daz es in nicht ein grosse vrsache sein were an sich ze halten die frawen ze betriegen wo sy erkennen daz sy dez als wol als sie meister sein, Darumb mein syn ist euch ein nette fabel ze sagen wie ein iunge frawe wie wol sy von nyder gepurt waz, in einem augenplick iren man
 35 betrog; vnd ir ere pewaret, Es ist nitt lange zeyt vergangen, daz in der stat Napels ein arm man mit hause gesessen was, der [238^b] selbig

güte man gar ein schöne iunge frawen zů einem weibe het die was mit namen genant Peronella vnd ein güte wolle spinnerin, vnd er ein maurer was mit genug subtilem vnd kleinen gewin ir leben fürten so sy pest mochten. Nun eins tages on geferde Peronella von einem iungen gesellen gesechen warde Dem sy on masse lieben vnd gefallen warde, vnd das in sölchem form das er zů ire in vnmessig liebe enczündet vnd durch einen vnd andern wege so vil thet, das er ir vnd sie sein güte freüntlich kuntschafft name vnd damit sy sich dicke zůsamen fügen möchten; Ir ordnung also gaben wenn der frawenn man des morgens auß an die arbeyte ging, Das sich der iunge an sölchem ende fünde daz er ware neme vnd sechen möchte wenn der man auß dem hause were das er dann dar ein ginge. Nun was des güten mannes hause in einer cynigenn gassen die nicht sere wol beseczet was, Also das der edell iung güť vnd verporgen gen zů der frawen hatte. Nun in sölchem ab vnd zů gen eins morges sich begabe, Das der schönen frawen man auß gangen was.[238^e] arbeyt ze suchen, vnd der iunge mit namen genant Gianello zů der schönen frawen in daz hauß kame, sein freude nach peyder gewonheit mit ir zů haben, vnd wo der frawen man vor alweg wann er außginge den selben tag piß auff den abent nicht wider zů hause kam, zů derselben stunde wider heym kame, vnd die haußtüre gar wole verriegelt fande anhub zů klopfen vnd zů im selbes sprache, O herre got dir sey lobe vnd dancke wie wol du mich hast arme beschaffen so hastu doch mich mit einer erbern fromen züchtigen frawen begabet vnd versehen, wie hat sie sich so palde versperret vnd vnser hauß bewart, das mit nyemant fremdes zů ir komen müge sie zů betrüben. Nun hette das güte iunge freülein an dem anklopfen den man wol erkante zů dem iungen knaben sprach, Awe mir wie sol ich meinen dingen thon ich pin des todes, dann mein man daz in got schende ist der der an die türe klopfet, was mage nür das bedeütenn das er so eben iczund zů hauß komen ist, dann es sein gewonheytt nitt ist zů sölcher zů hauß ze komen; Ich besorg er hab [238^d] dich herein zů mir gen sechen Doch wie dem sey mir zů liebe vnd dienst steyge in das öllfaß daz da in dem winckel stet so will ich gen im auf tun vnd sechen was sein iczunde ze hause komen bedeüte vnd sprechen wolle, Gianello palde in daz faß sprang Peronella an die haußtüre ginge dem man auf thet mit czornigem angesicht zů im sprache? was neüer mere sein das, das du mir heüt so pald wider zů hauß komest! Ich lasse mich bedüncken du wöllest heüt ein feyertage machen vnd nicht arbeyten seytmale du den werckzeug her

wider bringest, wiltu also thon wes wölle wir leben wo wölle wir das
prot zů essen nemen, gelaustu ich verhenge dir meinen rock zů ver-
seczen sicher nein ich, Ich spinne peyde tag vnd nachte mir möchte das
fleysch von den neglen fallen damit ich ein wenig öl gehaben müge vnser
5 lucern an zů zünden; es ist keine vnser nachperin oder es neme sy fremde
vnnd spotte mein das ich mich also müte mein narung ze gewinnen vnd
du komest mir mit hengeden vnd müssigen henden zů hauß wan du ar-
beyten söltest, mit disen Worten anhubे kleglich [239^a] zů weynen ir
leyt zů klagen vnd sprach awe mir armenn elenden frawen in waz pöser
10 stunde ward ich geporn, Nun hette ich doch wol einen iungen zů einem
manne haben mügen vnd ich wolt sein nicht zů dem ze kome der nicht
bedenckt was er an mir hatte; Ander frawen geben in gůte tage vnd
schaffen in mit iren liebehubern einen gůten müte vnd ist ir keyne sy
habe ir czwen oder drey mit ir freude zů haben vnd iren mannen den mon
15 für die sunnen weysen, vnnd darumb daz ich gůte schlechte arm vnd eyn-
feltig pin sölchen nich nach gee hab ich leyte klage vnd übel, ich weyß nicht
wie ich mich sein enthalte das ich nit als die andern thue mir auch
ymb einen de mich liebe habe siche. doch vernym mich gar eben gůter
man wölt ich übel vnnd vnerlich thon ich het wol funden mit wem, vnd
20 der mich gesandt hat gelt vnd kleynet mir erpoten hat, Aber ich sölches
meinem gemüte nye verhangen wolte, angesechen daz ich nicht sölcher
frawen tochter pin die sölches wurdig sey anders dann zů ern gehört, vnd
du slauraffe mir zů hause komest wann du arbeyten söltest [239^b] Nach
allen disen Worten der man ir antwort vnd sprache frawe vmb gotz
25 willen nicht czürne vnd bekümer dich! es ist woll ware ich ginge aus in
der meinung zů arbeyten, so bedünckt mich es sey dir als wenig wis-
sent als mir, Das heute des heiligen hern sandt Galeone tage ist daz
ist die vrsache daz ich wider pin zů hause kome; Doch liebes weyb
ich hab vns für heüt wol verseeen das wir mere dann für einen ganczen
30 monet protes ein nottorfft haben. Darumb piß nür gůtz mütes, dann ich
hab disem gůtem man den du hie mit mir siehest vnser ölfaß verkaufft
daz vns als du wol weyßt das gancz hauße in irrung gehalten hat,
vnd er geyt mir fünff gilgliati dafür, Peronella zů im sprache; Das ist
alles mein klag das du ein sölcher man pist vnd also vnnützlich vmb
35 die weg gest vnd also gar keinerley zů deinem nucze verstest, du hast
das faß vmb fünff gilgliaty verkaufft das ich armes freülein die mit
marter den weg gen kirchen weyß. Do ich die irrung des faß in dem
hause sache; Es einem gůten man paß verkauft hab dann du gethon

hast, der geyt mir siben [239^c] gilgliati dafür, vnd ein klein vor dir herkame vnnnd ist darinne ze besechen ob es gancz vnzebrochen vnd rein sey Do daz der man vername, das sein weybe paß vnd höher verkaufft het wol ze müte vnd content was, Zû dem der mitt im komen
 5 was sprach? güter man gee das dich got beleyt du hast wol vernomen wie mein weyb das faß vmb syben gilgliati verkauft hat wo du mir nicht mer dann fünff gebest. Der güte man sprach dez pin ich wol ze fride von dan seinen weg ging; Peronella zû dem man sprach; kom herein in die kamern, seytmale du selbes da bist! zû dem der das faß von mir
 10 kauft hat vnnnd sich selbes zû vnsern sachenn Der iung Gianello der in dem fasse was alle rede der frawen vnd des mans wol vernomen het dar vmb on alle sorge was, vnd sich auß dem fasse swang zû gleicher weiß thet als ob er nicht vernomen hett das der man komen wer zû der frawen sprach? wo pistu güte frawe, Dem der man palde antwort vnd
 15 sprach; Ich pin hie an ir stat pider man, waz gepiet ir? Gianello sprach wer pist du Ich wolt die frawen habenn mit der ich den [239^d] kauffe gemacht hab; Der güte man sprach; Güter freunt macht du nûr mit mir, was euch eben ist! ich pin der frawen man Do sprach Gianello das faß gefelt mir, aber mich bedüncket es darinne vil ölle heffen vnd
 20 vnreyn verdorret das ich es mit den negeln dar von nicht gekraczen müg; darvmb ich neme sein nit es were dann sauber vnd reyne, Peronella schnell antwortet vnd sprach, vmb des willen sol vnser kauffe nicht zerücke gen mein man soll es sauber vnd reyn machen; Der man sprach gern, vnd seinen werckzeüge von im leget sein gewante auß
 25 zoch piß in daz hemde, im ein liechte pringen schüffe vnd mit einer prot schaben in das faß steyge anhübe zû scharren vnd Pironella dez gleichen thet, als ob sie sechen wölte wie er arbetet das haubte mit dem rechten arm zû dem loche des faß hein stisse zû dem mane sprach, scharre auch da vnd dort hast du sein auch gelassen lasse dich nicht
 30 einer kleinen arbeyt verdrissen Seytmale ich es paß dann du verkaufft hab, vnd die weyle daz schön freülein also mit dem haubte vnd arm in dem loche des faß steckt den mann zû [240^a] lern was er thon sölte. Der iunge Gianello der auff denn selben morgen seinem willen noch kein genügen getun het, vmb des willen er dar kommen was dann der
 35 man im daz mit seinem zû hauß komenn entwicht het, vnd nach dem als dann sein gewonheit zetun was nicht enthon mocht vnd das ze verpringen thon müßt wie er mochte vnd sich zû dem schönen freülein füget die mit dem fodern teyle des leybes in dem loch des faß steckt, vmb

des willen der güt iunge der von fleißlicher begir überwunden was, vnd in gleichem form als die vngezaumten roß in den weyten ängern mit den stueten oder roßmütern lauffen, also auch Gianello von after zû, seinen willen verpracht vnd sere peyde zû einer stunde bereyt warn
 5 iglicher sein arbeit verpracht het, das faß sauber warde vnd er sich vonn der frawenn zûrücke zoche, Der man auß dem faß steyge vnd Peronella zû Gianello sprach. Nun nym hin das liechte guter man beschawe dein faß gar ebenn ob es dir gefalle Gianello daz liechte zû henden name in das fasse sache vnd sprache es stünde alles wol vnd
 10 were güt vnd [240^b] er wol content vnd gabe der frawen syben gilgliati vnnnd schüffe daz faß zû hauß tragen.

Wie münche Rinaldo sein gefetterin besleßt vnd pey ir leytt, darzû der man kam dem sie peyde zû versten gebenn wie sy dem iungen kinde die wûrm in dem pauche beschweren.

15 Es mocht Philostrato von den stueten vnd roßmütern so verporren nicht reden, Das sein die züchtigen frawen nicht lachen müsten wol des gleichen theten als ob sy anders lachten; vnd do der künige vernam das Philostrato histori was zû ende komen, Der edeln frawen Elisa sein gepot thet. Die palde bereyt waz dem künige gehorsam zû
 20 sein anhub vnd sprach Lieben züchtigen frawenn ir [240^c] stült wissenn das mir Emilia nette histori von dem besweren der fantasma, auch mir von einer beswerung in mein gedanke geben hat, aber villeicht nit so kürczweilig als die gesagte gewesen ist sein wirt so hab ich doch nicht anders iczund vor handen; Darumb ir mit mir ein klein wert ge-
 25 dult haben; Ir stült wissen das in Siena der alten stat waz ein iunger von genug erbern geschlecht mit namen genant Rinaldo, Derselbig iunge besunder liebe het einer seiner nachperin genug schöne trug, die was eines reichenn mannes weyb; grosse begire vnd willen hette mit ir zû reden, vnd des on sorge vnnnd zweyfel was wo das geschehe er von
 30 ir seinen willen haben wölte; doch das in langer zeit nye gehalten mochte; In sölcher zeit die frawe eines Kindes swanger warde, des er im palde gedacht ir gefatter ze wern, Sich palde zû irem mann gesellet sein grosse kuntschaft name Do in zeit dauchte so er züchtigst mocht an den man begeret sein gefatter ze sein; Des der gûte man willig vnd
 35 wol ze müte was. Do nun Rinaldo fraw Angnesen gefatter worden was, vnd nun gûte vrsach [240^d] hette mit ir ze reden on alles verdencken;

vmb des willen hercze finge ir sein grosse lieb syn vnd meinung en-
 decket vnd zů versten gabe; Das sy auch wol vormalles an seinem ge-
 perde vnd gesichte der augen wargenomen vnd erkant hette, Aber der
 gůten frawen sein pösser wille wenig zů herczen ginge do sie sein pöse
 5 begirde vnd meinung vernomen hette Nach dem nit lang verginge was
 die vrsache was ist mir nit kunt, Rinaldo zů einem geistlichen man
 warde vnd sich zů einem münch machet; alle liebe vnd freuntschaft
 seiner gefatterin halben ze rücke leget, vnd in sölchem seinem geist-
 lichen leben alle pöse gedanke pey im verschwunden warn Doch in
 10 etlicher zeit wider an sich nemen warde, daz er als ir vernomen habt
 gelassen hett, vnd in seiner geistlichkeit an habe sich in köstlich gewant
 ze kleyden seine kutten von dem pesten gewant machet, so ers gehalten
 mocht grosse freůde sein selbes hett mit singen danczen sechenn vnd frö-
 lichen sein, allen lust suchet alle geystlichkeit zů rücke leget, was sol ich
 15 euch vil von münch Rinaldo sagenn, weliche münch vnd pfaffen sein
 die, [241^a] die da nicht das vnd ergers thon, aller püberey der welte
 sy ein anfang vnd vrsach sein sie schamen sich des nit wenn sy feiste
 wolgestalt vnd rößlet sein schmale vnd steiffe in der wueste vnder iren
 schönenn kutten, in allen iren sachenn vnd geperde nicht als die türtel-
 20 taube, sunder als der han sein vnd als er thut stätz mit ragedem kam
 über die gassen gen die schönen freůlein ze sechen Noch vil mer vnd
 erger, doch lasse wir sten daz ire kamern mer vol mit gůtem confecte
 vnd gewürce sein dann mit pettpüchern, sy haben mer schateln vnd
 püchsen vol gůter latwerge dan vol mit predigpüchern, mer angster
 25 glasser vnd flaschen vnd ander trinckgeschirre, gestillirte wolsmeckende
 wasser von feyel rosen vnd andern plumen, dann öle in den lampen; in
 sölcher masse ire zellen formirt halten, daz es ee kreme vnd apoteckenn
 düncken dann pete cellen, sie schamen sich auch nicht mer daz man ire
 faule leben wisse Dann sy geben in selbes ze versten nyemant sey der
 30 icht wisse noch verste dann sy alleine, vnd wenn sy das podagra oder
 czipperlein haben, so geben sy zů versten es seyen ander kran[241^b]ck-
 heit vnd meynen das nyemant wisse das daz lange fasten die grobe vnd
 wenig speise die menschen mager gesunt vnd schmale halte, Wo aber
 sölche speyse yemant kranckheit pringet, so ist es doch ye nicht der
 35 czipperlein, vnd die erczney sölcher kranckheit, das ist kettscheit halten,
 vnd in allen sachen messig sein, als dann allen geistlichen person zů
 stet ze thon sunder münchen Sy meinen auch vnd sein nichtt wissent
 über das subtile leben Das die langen vigili vnd fasten vnd disciplinirn

die menschen pleich vnd vngestalt machen sullen, Sy meynen auch wir wissen nicht daz sant Francische vnd sant Dominico iglicher sich das ganz iar an einer kutten die kelten ze fliehen sich benügen liesse von grober wolle vnd natürlicher farbe, alleine den frost zů fliehen sich also
5 kleyten; Ich mage nich mere von in sagen got füge alle dinge zů dem pesten ich wil wider an vnsern münch Rinaldo keren, Der in sein erste begire vnd pösen willen wider gekert hett, Sich gar offte zů seiner lieben gefätterin fügen warde, vund das vil mer dann er vor gethon het vnd nach sölchem vil komen [241^c] er mit ir anhub zů reden der sache
10 halben der er dann von ir begern was, Die gůte gefetterin auff ir selbes stunde, als die da weder abe noch zů sagen kunde vnd sich von dem münch sollicitirt sache, Auch er sy ein schöne iunge man dauchte, vnd das villeicht mere dann er was. Nun eins tags sich begab daz er ir grosse freůde vnd kürzweyle machet, vnd sie als die andern die da
15 willen haben sich des zů begeben vnd gewern des man an sy begeren ist, sich auch in irem gemüt gen des münches willen erpote, vnd do mit auß czweyen willen ein will würde zů münch Rinaldo sprach gefatter was ist das, daz ir da saget; Nun meinte ich die münch thäten solches nit Der münch antwort vnd sprach frawe wann ich auß meiner kutten
20 pin als ich dann iczund thon wille so sůlt ir sechen das ich ein man vnd nicht ein münche als die andern sein pin; Des die frawe lachet vnd sprach, awe euch, Nu seyt ir doch mein gefatter wie -möcht wir ein sölches on grosse sünde gethon, Dann ich habe vil dicke vernomen wie das die gröste sünde sey auf erden vnd für ware wenn daz nicht
25 [241^d] were ich thete was euch lieb were; Auff dise wort pruder Rinaldo der frawen antwürt vnd sprach; Ir seyt ein eynfeltige frawe lasset ir das vmb eines sölchen willen Ich spriche nit des es nicht sünde sei Aber got vergibt grösser sünde dann dise ist, Wer über dieselben verprachten sünd reue vnd leyt hat, Aber saget mir ein anders
30 frawe gefetterin das euch got bewar, wer ist eüers kindes nachster ich der es zů der tauffe in den armen gehalten hab oder eüer man der es gemacht hat; Die frawe sprach mein man der sein vater ist; Ir saget war sprach der münch slaffet eüer mane stäcz pey euch; Iaer sprach die frawe, Darumb sůlt ir wissen sprach der münche seytmalle ich eüers
35 kindes minster nächstr pin, so sol ich als wole als eüer man der dem kinde nechner dann ich pin ist, pey euch schlaffenn mügen, Die frawe die da vngelert was kein loyca kunde do pey übel gesalczen, vnd auch villeicht des der münche begeret nottorfftig was, dem münch gelaubet,

oder des gleichen thet; Im antwort vnd sprache wer möchte euer red
 vnd weisen worten antwort gebeun [242^a] Do pey ir gedachte vnd ir
 fürname die gefatterschafft auf einen ort zelegen vnd im zů willen wern,
 vnd das nicht alleine für ein fart anhuben Sunder vnder der decke vnd
 5 czwischen czweyen schneweyssen leylachen sich zů manche malen pey
 eynander funden, Der gefatterschafft mit mere rue vnd minder sorgen
 dann vor spilten, vnd das mit grossem luste peydenthalben, vnd vnder
 andern malen eins males sich begab das der güt münche pey der schö-
 nen frawenn was, vnd nyemant anders zů hause was dann ein iunges
 10 meydlein, das er mit einem iungen münch der in seiner gesellschaft was
 oben auff in das hauß den pater noster vnd aue Maria zů lern schicket
 vnd er mit seiner lieben gefätterin die das kint an dem arm het in die
 kamern ginge sich darine gar wol versperten vnnd sich auff daz pettlein
 zů einander seczten; do sie nach irer gewonheit mit einander der lieb
 15 spilten; Do sie nun also gut zeit mit einander ir kürczweile gehabt
 hetten; In dem der frawen man des münchs gefatter zů hause kam, vnd
 ee yemant sein ware nam an der kamertüre was an klopfet [242^b] vnd
 rüffet, Do das fraw Angnese vernam mit grossem erschrecken zů irem
 münch sprache, awe mir wie sol ich meinen dingen thon ich musse on
 20 czweyfel sterben, dann mein man ist an der türe; Nun wirt er erste
 sechen vnd die vrsache vnser peyder grosse kuntschafft erkennen. Nun
 was der münche nacket vnd on kutten do er der frawen wort vernam
 zů ir sprach frawe ir saget ware es ist besörecklich, Wer ich nür in der
 kutten etwe fünden wir syn vnser peyder ere zů retten, Aber thut ir im
 25 auff so fint er mich als ich pin so hab wir kein außred vnd sein bescha-
 met, Die frawe sich gächlings ratz beriete zů dem münche sprach so
 schlieffet palde in euer kutten vnd nemet daz kint eüeren toten in die
 arm Vnd mercket gar eben was ich zů eüerm gefattern spriche da nach
 wisset euch ze richten damit sich eüer wort mit dem meinem gleichen,
 30 vnd lasset nür mich mit den sachen vmb gen. Der güte man vor der
 kamern seines anklopfen nit gar auf gehört hette, die frau im antwort
 vnd sprache man habe mit mir ein kleyne gedulte ich komme iczunde,
 vnd mit frölichem angesicht [242^c] auffstunde zů der türe lieffe; dem
 man auf thet zů im sprach Awe mein lieber mane was sol ich dir sagen!
 35 Es ist vns wol heüt vnser gefatter münch Rinaldo zů vnserm gelück
 her komen; Ich gelaub für ware got selbs hab in her zů vns gesant; dann
 on czweyfel wer er nicht gewesen wir hetten vnser kint auf disen tage
 verlorn; Do das der eyufeltige Seneser vernam aller erschrack vnd

- sprach wie den liebes weibe; O mein lieber man sprach die frawe, Im kam vor netlich des nicht lange ist sölche amacht zů das ich mich seines leben verwegen hette, vnd nicht anders meinte dann es were tode, In dem vnser gefatter pruder Rinaldo kam vnd das kind zů seinen henden
- 5 nam zů mir sprach gefatterin des kinds krancheit sein die wůrme in dem pauch vnd gen im zů dem herczen, vnd wo man nicht für seche so wůrden sie das kint tůten; doch seyt on sorge ich sol sy beschwern vnd ee ich von euch gee alle tůten vnd meinen toten gesuntter machen dann ir in ye gesechen habt, vnd wir hetten dein auch gar wol bedůrfft etliche
- 10 gepete zů sprechen aber wir mochten dein nicht gehalten noch [242^d] dich nyndert finden kůnnen vnd wir an deiner stat haben sy vnser meydlein vnd vnser gefatters gesellen sprechenn machen vnd das an dem hůchsten in dem hauß, Er vnd ich mit dem kind in die kamern gingen, Dann nyemant anders pey sůlchen sachen sein mage dan dez Kindes můter
- 15 allein vnd domit vns nyemant irret ich die kamertůre sperret vnd er hat daz kint noch stůcz in seinen armen; vnd ich gelaube er wart nicht anders dann das sein geselle mit vnserm meydlein sein gepet gesprochen habe, wo daz geschehen were so hett wir mit die hilffe gotz alle sorge őrwunden, Doch vnser kint stet sere wol got sey lobe vnd danck Der
- 20 schlechte eynfeltig gůte man mit namen genant Santuczo; der frawen alle red gelaubet, dann sein liebe zů dem kinde so groß was, das er zů der frawen ligen vnd betriegen kein achte haben mocht vnd mit einem schweren seuffzen zů der frawen sprach; ich muß gen vnser kint sechenn. Die frawe neyn sprach nicht gee du seyst dann gerűffet,
- 25 dann du můchtest villeicht ee schade dann nůcz sein hab ein wenig gedult laß mir vor besechen [243^a] ob du őr schaden hin ein gen můgest so will ich dir rűffen Nun pruder Růdel der der frauen rede gar wol vernommenn het vnd sich in sůlcher zeit gar wol vnd mit gůter musse angeleget hett, das kind in sein arme nam vnd aller ding nach seinem willen
- 30 fertig was Er der gefatterin rűffet vnd sprach gefatterin, hůre ich nit meinen gefattern pey euch dausen redenn, Dem Santuczo ee dann die frau antwort Ja herr ich pin hic. Do sprach der můnch komet her ein zů mir, Santuczo sich nicht saumet palde hin ein ginge, Der můnche im daz kint gab zů im sprach gefatter nemet hin euer kint got sey dancke
- 35 frische vnd gesunde wo ich zeit was, gelaubet hette ir sůltet es nicht mer lebendig gesechen haben! aber ir wert machen lassen ein wechsenn pilde in seiner grůsse got zů lobe vnd dem heiligen hern sant Ambrosio zů erenn, Durch des gepete willen euch got dise genad getun hat Do der

güte man sein kinde ansichtig ward, aller wol zů müte das halset vnd küsset, alsdann gern die fetter den kinden thon, es in seine arm enpfinge von grossen freüden weinet got lobet vnd seinem [243^b] gefattern dancke saget, der im sein kint pey leben behaltenn hette, vund in
 5 sölchen mären pruder Rinaldo geselle das iunge meydlein nicht alleine ein gepete sunder mere dann vier gelert hette; Nach dem er ir schencket ein peütelein von weisem faden gestricket das im nicht lange was ein nunne gegeben hette, mit dem er daz meydlein im geneyget vnd andechtig machet, vnd das puluer ab seiner kutten schütet, dann er auch
 10 den haußwirt vernomen het das er komen was, Auch was der man mit der frawen vnd die frawe mit dem man geret het allez wol vernomen het ydermane in gütem fride sache, auch er in die kamern kaame, zů pruder Rinaldo sprach wie er die vier gepete nach dem er im befolhen hett gesprochen hett dem pruder Rinaldo antwort vnd sprach; Pruder
 15 ir habt einen pessern vnd sterckern atem gehabt dann ich ir habt recht vnd wol gethon got sey dancke, Ich für mich do mein gefatter kam nitt mer dann czwey gepete gesprochen het, Doch got der almechtig vnser peyder müte vnd arbeit an gesechen hat vnd vns sein genad mit geteilet hat das mein tote ist wider [243^c] zů seiner gesuntheit komen, Nach
 20 aller diser verganger red Santuczo got daneket vnd lobet, palde schuffe komenn guten wein vnd confecte seinen gefattern zů eren vnd collacion ze machen, des sy peyde mer dann anders nottorfftig waren; Darnach sie peyde auß dem hauß beleytet got befalhe vnd palde daz wechse pilde als im der münch sein gefatter gepotenn het schuffe machen, vnd das zů
 25 dem andern für sant Ambrosy pild hinge aber es was nicht der von Meylant, sunder ein ander.

Wie Toffano eines nachtes sein weybe außeralbe des hauses verspert vnd sie des gleichen tut als sie sich in den prunne wüffle der an dem hause was; Einen grossen stein darein fallen lest vnd
 30 Toffano palde auß dem hauß lauft ir ze helfen, In dem sy in das hauß get vnd Toffano heraußen versperte.

Do der künig vernam das frawen Elisa nette histori zů end komen was, sich gen frawe Lauretta keret Ir beweiset wie es sein gefallen wer waz [243^d] nettes ze sagen, Das sy pald vernam on alle widerred also
 35 sprach, O liebe wie so grosse sein dein stercke rate vnd fürsechung, Welicher grosser grosser lerer vnd meister mocht ye beweysen noch

durch gründen die krafft deiner tugent als du selber so gächling tust
 Wer nachvolget deinen fußstapffen vnd deinem willen Für ware der
 menschen kunste deiner kunst spat vnd vngeleich ist als einer iglichen
 person in den gesagten history wol mag kunt sein, Zü den auch ich eine
 5 fügen vnd sagen wille, Die von einer eynfeltigen schlechten frawen zü
 irem man verpracht warde, In sölicher masse das ich nicht enweiß wer
 ein söliches on grosse liebe hette thon vnd verpringen mügen, außge-
 nommen alleine die lieb; Darumb mercket vnd nemet ware ir lieben
 frawen meiner wort! Es waz in der edeln stat Reczo gar ein reich man
 10 gesessen der was mit namen genant Toffano dem vmb seines reichthum
 willen gar ein schöne iunckfraw zü einem weybe gegeben waz mit irem
 rechten namen genant Gitta, Zü der Toffano wie wol er nit west war-
 umb on masse vnd gar sere eyfern warde [244^a] vnd wer in der vrsache
 15 gefragt het dem er kein antwort het geben können, vnd vmb söliches
 eyfern willen die frawe ir grossen vnmüte nam sich des sere betrübet,
 vnd Toffano im gancz in seinem gemüte fürgenomen het, wie wol er
 keyn vrsache hette dann allein sorge halben die frawen meint ze töten
 vnd ir das leben nemen; Doch einest er nach seinem gedüncken gesehen
 vnd war genomen het das sy ein iunger purger puelet, mit dem sy sich
 20 in grosser geheyme on yemant wissenn in liebe vermischet liet, vnd söliche
 sache peydenhalben sich so ferr verlossen het, das nicht anders mere ze
 thon was dann allein die lesten rure der liebe ze verpringen, Des die
 güte fraw ir gedachte zü dem auch syn vnd weg ze finden. Nun was
 der frawen zü güter masse ires mannes poßheit vnd pöse gewonheit kunt
 25 vnd wissent vnd do pey wie er in trintken grosse freüde het, das im die
 frawe nicht alleine lobet sunder in des tröstet vnd mit grossem lust offte
 lobet in do mit offte füderet vnd das in söliche gewonheit prachte daz sy
 in truncken machet wann es ir füglich vnd eben waz; wenn sie in dan
 wol vol gemachet [244^b] het so fürt sy in zü pette vnd leget in slaffen
 30 vnd pald sich auß dem hause auch zü zeiten dar für zü irem puelen füget
 also sie alweg thet wenn sy sich pey irem lieben puelen finden wolte,
 Also grossen getrauen in des manes trunckenheyt hette das sie nicht
 allein iren puelen zü ir in das hauß komen thet sunder zü mer malen
 auß irem hauß heym in sein hauß des nachtes mit im slaffen ginge, das
 35 nicht ferre von dem iren was; Also daz güte freülein in disem form
 lange zeit sein freüde vnd lust hette In sölichem sich begabe das der
 pöse eyferer vernemen vnnd mercken warde, wes in die frawe tröstet
 seines trincken vnd doch selbes nicht tranek wol vernam daz sy es mit

gefere vnd nicht von lieb wegen thet, als dann ware was vnd sie die weyle
 er schlieffe irem willen möcht ein gentügenn thon, vnd Toffano zů bese-
 chen vnd zů probirn des in daucht ob das ware wer; Er eines tages nicht
 trancke, vnd des abencz sich in trunckem mannes form zů hause füget,
 5 vnd in seinen reden weyß vnd geperde sich trünckner vnd völler be-
 weiset dann er ye mer gewesen waz, do in nun die fraw also sache ir
 dacht auf disen abent nit [244^c] mere not were im trinckenn ze geben
 in palde zů pette füret vnd nach irer gewonheit palde auß dem hause
 zů irem puelen ginge; Do sy piß auff mittenacht ir freüde het, vnd do
 10 Toffano vernam, das das weybe auß dem hause ginge palde auf stund
 an die haußtüre ginge die gar wol verrigelt vnd oben auf in daz hauß
 an ein fenster ginge ze sechen wenn sy wider keme, vnnd ir kunt würde
 daz er ir püberey gemerckt hett, also lange an dem fenster lage piß sy
 kam, Vnd do sy alle dinge vnd die porten versperrt fande on masse vn-
 15 mütig vnd betrübet waz alle ire stercke anleget die türe auf ze stossen;
 Aber ir müte vmb sunst was. Do nun Toffano das lange zeit vertragen
 hett zů ir sprach; Fraw du müest dich vmbsunst, dann hirein komest
 du nit mere gee nür hin von dan du her komen pist vnd piß des sicher
 an meine arme solt du nicht mer komen, also lange piß ich alle sach
 20 deinen freünden hab ze wissen gethon vnd dir die ere tun der du wirdig
 pist. Die fraw anhub in freuntlich ze piten vmb gotz willen daz er ir
 aufthät, dann sy kem nit do here do er villeicht meinte, sundern sie
 kem von einer irer nachpe[244^d]rin do pey sy zů dem rocken gewesen
 were, dann sie möcht der langen nacht nicht allen geslaffen noch alleine
 25 in irem hause wachen; Aber ir pittenn zů dem manne sie nit helffe, dann
 der eynfeltig man mer geschicket was daz ein gancze stat sein schande
 weste dann er alleine. Do die fraw sach daz ir piten nicht halff, im
 anhub ze fluchen schelten vnd troen zů im sprach; thustu mit nitt auf
 ich mach dich zů dem vnseeligisten man der auf erden nye kam; Toffano
 30 zů ir sprach Nun macht du mir gethon du zů nichter sacke Die fraw die
 von grosser lieb wegen ire synne vnd rate gesticzet hette, dem man
 antwort vnd sprach; Ee ich söliche schande vertragen wölte die du mir
 thon meinst on alle vrsache, ee ich mich in disen prunne der da ist
 werffen vnd ertrencken will; vnd wenn ich darinne tod funden würde,
 35 yederman gelauben vnd sprechen wirt du habest mich in deiner trun-
 ckenheit darein geworffen, Darumb du auß der stat weichen vnd fliehen
 müste wilt du nicht das haubt verliessen als ein mörder vnd todslager
 veracht wirst, aber alle dise wort Toffano seiner eynfeltigenn fürsaczung

nicht [245^a] bekeren möchten, Vmb des willen die frawe zû im sprach
 Nun mag ich es nicht lenger vertragen got geb dir den lone deiner
 grossen hertickeyt, schaffe meinen rocken in daz hause tragen den ich
 dir ze lecze lasse. Also geret sich zû dem prunne nechnet; dann die
 5 nacht zû der stunde also finster waz das eins das ander nicht gesehen
 mocht vnd einen grossen stein der neben dem prunnen lage den aufhube
 vnd in den prunne warff mit hoher stynme schrey herre almechtiger
 got erparm dich über mich Mit disen worten den stein fallen liesse, vnd
 do der steyn das wasser berüret, sölich romore vnd geplümpffe machet
 10 das Toffano für ware gelaubet das weybe hette sich darein geworffen,
 palde von dem fenster sprange das schöpfseile mit dem zügel name, sich
 auß dem hause zû dem prunne der frawen ze helfenn füget In dem
 die frawe die sich nahent pey der haubtür verporgen hette do sy den
 mane pey dem prunne vernam sy pald in das hauß lieffe vnd die türe
 15 gar wol verrigelt oben in dem sale an ein fenster ginge, Zû Toffano
 über abe schrey vnd zû im sprach, O ir trunckner esell, man sol sich nit
 den wein [245^b] also überwinden lassen; man sol in zû zeiten wessern
 sunder gegen der nacht. Do Toffano das weyb in dem hauß vnd an dem
 fenster höret sich aller beschamet daucht wider zû der haußtüre keret,
 20 vnd do er die verspert fand zû der frawen sprache; das sie im auff-
 thet vnd ire öde teyding vnderwegen liesse, Das weybe zû im sprach;
 pey dem kreütze gotz du trunckner öder man Hier ein solt du mir auf
 dise nacht nicht komen, Dann ich wille deiner truncken weyß nicht mere
 leyden; Es sol aller menge kunt weren were du pist, vnd zû welcher
 25 zeyt in der nacht du mir aller vol vnd truncken zû hauß komest Toffano
 der sich von der frawen mit worten überwunden sache anhub die frawen
 ze schelten in sölicher maß außrichtet daz die gancz nachperschaft dar-
 zû geloffen kame; alle fragten was ein söliches geschrey zû der zeyt der
 nacht bedeutet, Den die frawe weinent antwort vnd sprach. Lieben
 30 freunde vnd nachpern es ist mein feyger pöser vnnd zû nichter man, der
 mir als ir wol secht zû diser zeit der nacht vol vnd truncken zû hauß
 komet; daz ich so lange vertragen habe, vnd in darvmb zû vil manch-
 [245^c]malen gestraffet hab; aber alles nicht hilfet noch mich ye helfen
 wollen, vmb des willen hab ich im dise schande auff dise nacht thon wollen,
 35 vnd in außerhalbe des hauß versperren wollen zû versuchenn ob er sich
 eins sölichen wölte abe thon vnd von seiner truncken weyse lassen, Toffano
 auff dem andern teyle der nachperschaft alles was sich verlossen het
 saget vnd dem weyb troet Auf söliche sein rede die fraw zû den nachpern

sprach, lieben freunde nun mügt ir doch wol sechen nür was ze nichte man der ist? was sprecht ir wann ir mich als ir in auf der gassen sechet vnd vol funden het vnd er als ich pin in dem hauß were, für ware ich meine ir gelaubet er saget euch alle warheit, pey dem ir sein synne vnd
 5 vernunft vernemen sült, Er hat euch gesaget was er gethon hat; in gleichem forme als het ich daz gethon; er meinete mich zû erschreckenn mit seinem sich in den prunnen zû werffen; Nun wölt gote das er sich darein geworffen het zû sechen wem wirser geschehen wer, im oder mir, damit er den zû vil getruncken wein gâr wol gewessert het; do die nach-
 10 perschaft der frawen rede vernomen hetten alle gemeyn[245^d]iglichen frawen vnd manne Toffano das vnrecht gaben, In mit worten hertiglich strafften im die schulde gaben, vnd der frawen alle recht gaben, Also söliches geschrey romor vnd vnfüre von einem nachpern zû dem andern ging vnd der frawen freund zû gehöre kam; Die sich nicht saumpten
 15 palde darkamen, vnd do sie vernomen das Toffano yderman das vnrecht gabe sie in namen vnd mit güten trucken streichen sein haut gar woll perten. Nach dem in sein hause gingen die frawen vnd alles ir dinglach namen heyme in ir hauß furten vnd Toffano argers troeten; Nach sölichen verlossen sachen Toffano sein schande vnd schaden bedecken
 20 warde, vnd daz er durch sein groß eyfern waz verfürd worden, als der der die frawen on masse liebe hette, alle seine güte freunde vnd gönner anruffet, durch die er so vil würcket das im das weybe von iren freunden mit gutem frid wider ward, Der er verbiß vnd versprach nymmere zû eyfern, vnd über daz ir ein güt frey vrlaub gab ze thon vnd lassen
 25 was ir liebet, Doch daz mit sölicher fürsichtigkeit daz er sein nicht seche, also er als der eynfeltig pauer tût thete [246^a] der nach dem empfangen schaden den stal zûspert; Darumb lebe lieb lebe vnd sterben alle die nicht mit fride leben wöllen.

Wie ein grosser eyferer in pristers form sein weybe peicht
 30 hört dem sie zû versten geyt wie sy einen pfaffen puele vnd lieb habe; der alle nacht mit ir schlaffen kam, vnd die weil der eyferer hinder der-tür dez hauß in der wart lage ze sechen wenn der frawen puele keme. In dem die frawe iren puelen oben über daz tache ein zû ir komen thet mit im ir freude hette.

35 Der edeln frawenn Lauretta rede vnd histori zû irem end komen ist vnd die frawe von der wirdigen gesellschaft gelobet was, das sie

irem pösen man also het zû bereyt können vnd do mit der künig nit zeit
 verlüre, sich gen frawen Fiametta keret ir die pürde auffludt zesagen;
 Die sich nicht saumen liesse schnelle ankûbe vnd sprach. **I**ß mein aller-
 liebsten frawen wissen sület wie mich die gesagt history zeucht euch auch
 5 von eynem grossen eyferer zesagen, vnd [246^b] gedencke mir was üfels
 söllichen eyferern züstet, sunder wenn sy on vrsache in sölliche eyfern
 fallen in wol an ste vnd in keynen weg zû klagen seyen, vnd das die
 meister der gesece alle gesece halten sölten so spreche ich wol das sie
 den frawen kein ander pen sölten geben haben, dann das sie den geben
 10 haben die wider die gesece thon sich selbes zû beschützen, Dann die
 eyferer der iungen frawen leben zerstörer sein vnd fleißig sucher ires
 todes Sy halten sie die ganczen wochen verspert zû versechen ires ge-
 sindes nottorfft, Des sie willig sein damit sy alleine den feyertage mügen
 ir freüde vnd rue haben, als mit begire ein iglicher arbeter thut, der an
 15 dem suntime meinte sein freüde ze haben vund im etliche kürczweyle ze
 gebenn Auch daz alle regirer vnd ampleüte der stat thon; Auch got
 selbes den sybenden tage seiner geschöpfte vnd arbeit ruet Auch die
 geistlichen gesece ir benante tag habenn got zû eren vnd loben zû nutz
 der sele Ein sölches die eyferer nicht enwollen, sunder den selben tag
 20 mer dann die andern wöllen das man versperte ste, vnd ire frawen inen
 halten, [246^c] Darumb die güten freülein stäcz traurig•sten müssen;
 waz grossen vnnütes daz in pringet ist allein den kunt die es versucht
 haben, Darumb ich spriche vnd vrteyle waz üfels vnd vnrazz dem man
 daraus stet der on vrsache ein eyferer ist. was im sein frawe tut sy
 25 darumb nicht ze peinigen sunder des zû loben sey. Darumb mercket
 waz ich euch sage. Es waz in der stat Rymel ein reich kauffman an
 güt vnd gelte der het auß der massen ein schönes weyb, vnd on masse
 vmb irer grossen schön willen eyfern warde, ir vor andern mannen be-
 sorget; kein ander vrsach nicht enhef, dann das er ir on masse wol
 30 wolte vnd lieb hette; Sy sauber rein vnd mit kleydern vnd kleydet schön
 hielte, Auch sie sich stäcz zû allem feinen willen fleisset, vmb eins
 sölchen willen er meinet ein iglicher ander, sy als er lieb hette, Vnd
 wie sie im zû seinem gefallen zû lieb würde also sy auch einem andern
 thet, Das wern alles zû nichte vnd vnweysen mans gedancke vnd argu-
 35 ment; Sein eyfern was also groß, das er sölche hute thet vnd die güten
 frawen so enge hert hielte; Das villeicht manchem man [246^d] der in
 den tode verurteilt waz ye gethon warde, lassen wir sten das sy het
 mügen gen kirchen oder auff hochzeit gen mügen. Ich sprich sy endörst

den fusse nicht für die tür seczen, noch an kein fenster gen noch
 vmb keiner vrsach willen auß dem hause sechen. Ein sölches pracht
 ir ein strenge hert leben, vnd so vil mer wo sy sich sölches des ir
 man besorget vnschuldig sache; doch nach etlicher vergangen zeyt do
 5 sie sich den man also herte halten sache; ir gedacht vnd fürnam syn
 zů finden ir freude vnd lust ze geben, Damit was ir der man vnd
 eyferer thäte ir recht thete. Nun mochte die gůt frawe in keinen wege
 an kein fenster gen noch wege hett sich in lieb gen yemant zů erzeygen
 der sich irer liebe vnderfangen hette, Nun ir wol wissent was daz in
 10 dem hauß neben irem hauß etlicher hübscher iunger wonet, Ir gedacht
 zu sůchen ob sie indert in der mauern die czwischen irem hauße vnd
 andern was ein loch finden möchte; do durch sie also lang seche piß
 sie der iungen einenn von dem hauß seche vnd der ir gefiele mit dem
 reden vnd im ir liebe hulde vnd gůtenn [247^a] willen geben, vnd in
 15 zů irem willen pringen möcht wo er des willig wer vnd ir hulde nemen
 wölt, Domit sy sich zů zeyten in freütlicher liebe pey im finden möcht,
 vnd einem sölchen iren elenden leben ein klein mochte puß thon, vnd
 als ander frawen ir zeit vertreyben, also lange piß dem man sein ey-
 fern verging vnd ein teyl außschwiczet; Zů hant nach sölchem irem
 20 bedencken wenn der man nicht zů hause waz an der mauern peyder
 heüser suchen ging, do sie palde an genůg verporgenn ende zů irem
 gelücke in der mauern ein klunsen fand die durch die mauern auß in
 daz ander hauß ginge durch die sy wol erkante das an demselben ende
 ein kamern was ir wol gedachte in derselben kamern ein iunger von
 25 dem haus genant Philippo wonen sölte, vnd wo dem also wer alle ire
 sach schlecht vnd richtig wer, vnd durch eine ire meyt der sy getrawen
 mochte die vmb iren willen leyt trug erforschen vnd spehen liesse vnd
 für war fand, das die selbig kamern darein die klunsen ginge des iun-
 genn Philippo kamern was, darinne er aller alleine schlieff, vnd das
 30 loch [247^b] der mauern so dicke besechen ging, das sie dem iungen
 in der kamern ersache vnd zů zeyten wenn sie in in der kamern ver-
 nam kleine steinlein durch daz loch ab in die kamern fallen liesse vnd
 das so vil thet daz einest der iunge zu der mauern ginge vmb wunder
 zů sechen waz doch die steinlein fallen machet; dem die fraw als palde
 35 sy in ersehen hette mit nynder stymme rűffet, vnd er als der sy an
 der stymme vnd rede erkant het, ir antwort vnd sprach; Frawe weß
 begeret ir vnd sie als die zů der stunde gůt weyle vnd zeit het im alle
 ire meinung öffnet alle sach zů wissen thet; Das der edel iunge on

masse vnd woll zů müte vnd froe was zů hant auff seinem teyle das loch der mauern weiter machet, doch in sölcher masse das es von nyemant gemercket würde, Do sy peyde teglich ir gespreche mit einander hetten, ein ander an griffen die hend einander puten, Doch vmb des eyferers grosser hüte willen nicht anders beginnen mochten; In sölcher zeit die heiligen weynachten sich nechten Die iunge frawe zů dem man sprach wo es sein gefallen wer sie gern an dem heiligen morgen [247^c] wölt gen metten gen sich peichten vnd zů gotz tische gen als dann ander kristen menschen thon; Der eyferer zů ir sprach
10 frawe was sünd hast du begangen daz du dich wilt peichten; Nun wie düncket dich sprach die frawe meinst du das ich heilig sey darumb das du mich verspert hetest, Es ist versechlich ich sey ein sünderin als die andern person die auff erden leben sein, Aber ich will dir ir nñcht sagen dann du pist kein priester nicht, Vmb diser wort willen der ey-
15 ferer noch vil mere dann vor eyfern warde, vnd im gedacht wege ze suchenn der frawen sünde zů vernemen vnd palde bedacht hette, wie im ein sölches ander frawen wissen möcht kunt wern Zů der frawen sprach; er ires kirchen gen vnd peichten wol ze fride wer; Nür in dem namen gotz ginge wenn sy wölt Doch in kein ander kirchen ginge dann
20 alleine in ire capellen vnd irem capellan peichtet oder wenn er ir, sie peichte zů hörn gebe, vnd das sy früe zů der peicht ginge vnd zů hant darnach wider ze hause kem Die frawe ließ sich bedüncken sy des mannes syn vnd meinung den merern teyle verno[247^d]men het zů im sprach wie sie das gern thon wölt. Do nun der heilige morgen vnd
25 die zeit zů metten ze gen komen waz, Die frawe früe auf stun sich bereytet vnnd nach des mannes gepote gen kirchen ginge. Der eyferer auff dem andern teyl auch in dir kirchen kam, vnd mit dem cappellan der kirchen verporgen sein ordnung gabe was er der frawen halben thon meinete, vnd palde des pfaffen rock cappen vnd korock an leget
30 die cappen vmb sein halß gewickelt als dann gemeinlichenn der priester gewonheytt ist, Ein wenig die für sein gesicht gezogen vnd sich in dem kore nider in einen stul seczet. Do nun die frawe in die kirchen kam nach irem cappellan fraget; Der palde zů ir kam vnd vernam daz sy sich wolt peichten zů ir sprach er zů der stunde nicht geschicket
35 were peicht ze hören, aber er ir einen andern an seiner stat gebenn wölt palde gieng vnnd ir den eyferer gab, Der sich so wole nicht verpergen mocht daz er von ir nicht erkant were, do das die frawe sach vnnd vernam mit ir selbes gedachte, Des sey got gelobet das der von

einem eyferer so pald ist [248^a] zů einem pfaffen worden, doch lasse
 nůr mich mit schaffenn Ich sol im geben das er suchen get, vnd des
 keinen gleichen thet noch sich merckenn liesse, sunder sich palde zu
 seinen fűssen nider sencket, Anhube in dem namen gotz ir sűnde zů
 5 klagen. Der eyferer het etliche kleine steinlein in den munt genomen
 die in in dem reden irren sűlten do mit er in dem fragen von der fra-
 wen nit erkant wűrde, dann in allen andern sachen sich verendert het;
 Darumb on czweifel meinert er von ir solt erkant sein. Nun die fraw
 vnter andern iren worten im gesaget het wie sy elich were, vnd einen
 10 ee man hette, Vnd do pey wie sy ein pfaffe lieb hett vnd alle nacht
 mit ir schlaffen kem, Do das der eyferer vernam in nicht anders daucht
 dann wie im ein swerte sein hercz durch ging, vnd wer nit gewesen
 daz er fűrpaß begert zů wissen er het das peicht hűren sten lassen vnd
 were darvon gangen; In dem er sich selbes űberwant vnd stille siczen
 15 beleybe, vnd die frawenn fűrpaß fraget zů ir sprach, nun wie bekűmet
 das; leyt nicht eűter ee man pey euch die frawe sprach; ia herre; Der
 eyfe[248^b]rer sprach; Nun wie mag dann der pfaffe pey euch geligenn
 Herre sprach die frawe, Ich weiű nicht mit was kunst er das thut, Es
 ist kein tűre so wol nitt versperrt wenn er darkomet daz er die nit auf
 20 thue vnd wenn er an mein kamertűr komet ee das er die auff thut vor
 etliche wort spricht, In dem mein man alwegen ensleűt, vűnd als palde
 er in enslaffen vernymet die kamer tűre auff thut ein get vnd sich zů
 mir leget, das felt im nymmer. Do sprach der eyferer frawe das ist
 űbel vnd nitt wol gethon, vnd ir wert euch eins sűlchen erlassen.
 25 Die frawe sprach Herre des gelobe ich nicht ze thon dann ich hab
 in zů liebe, so mage ich kein puű sprechen sprach der eyferer
 Die frawe sprach daz ist mir leyt; dann ich pin nitt zů euch komen
 euch lűgenn ze sagen; Dann műcht ich es gethon ich sagt es euch.
 Do sprach der eyferer fűr war frawe mir ist vmb euch von herczen leyt
 30 das ich euch also siche eűter sele von dannen, Aber ich sol mich euch
 zů liebe műenn vnd besunder gepete in eűerm namen zů got thon, die euch
 villeicht wo es gotz gefallen ist helffen műchten vnd wille [248^c] euch
 zů zeiten meinen clerico schicken do pey ir mich wissen lasset ob euch
 mein gepete geholffen habe; Wer dann sach das euch sűlche meine ge-
 35 pete geholffen hetten so wűlte ich fűrpaß stűcz got fűr euch pitten; Zů
 dem die fraw sprach Des sűlt ir nicht thon, ir sűlt mir nyemant zů
 haű schicken, dann wo mein man des war neme, er eyfert also sere
 daz im alle welt nit auű dem haubt prechte oder ir ander sachehalben

zû mir schicket, vnd ich het von im in disem iare kein rue; Der eyferer
 sprach; Fraw des habt kein sorge dan ich sol sölche weg halten das
 ir von im in keinem argen stult vedacht wern; die frawe sprach traut
 ir das zû thon so pin ich sein wol ze fride das ir thût was euch lieb ist,
 5 mit disen worten ir peicht endet die puß enpfinge auff stund vnd messe
 hören ging Der eyferer in seinem vngelücke, geswollenn auff stunde,
 dez pfaffen gewant ging auß zû ziehen vnd sich heym ze hause fügen,
 vnd bedencken ward wie er den pfaffen pey dem weybe begreyffen
 möcht, damitt er einem vnd andern pöß spile zû richten möchte, Die
 10 frawe nach der messe zehauß kam [248^d] in des mannes gestalt wol
 vernam, das sie im ein pöß iare geben hett, vnnnd er so er peste mochte
 was er gethon hette verparge, vnd nam im für die nachsten nacht an
 der haubtüre ze warten ob er den pfaffen wann er die türe auf thet
 möchte begreyffen, vnd im sein haut vol slachenn; Zû der frawen
 15 sprach do der abent komen was er müst die selben nacht anderswo essen
 vnd schlaffen, Darumb sperr wol alle türe sunder die hauß türe vnd
 die mitten ani der stiegen vnd die kamertür nicht offen vergisse, vnd
 wenn dich zeit düncket so gee schlaffen Die frawe sprach das sey im
 namen gotz! Do nun der man weg gangen was vnd sy alle türe gar wol
 20 verrigelt hett vnd zeit dauchte zû dem loche der mauern ginge, dem
 iungen aller liebsten zû ir ze komen das zeichen gabe; der schnelle zû
 dem loche kame, dem sy alles das sich des mals ergangen vnd czwi-
 schen ir vnd des eyferers verlossen het saget, Vnd wie er ir zû versten
 het geben aussen zû essen vnd schlaffen, Aber mir czweyfelt nicht er
 25 sey in dem hauß oder vmb daz hauß ze sechen ob yemant heint zû mir
 kom; Dar [249^a] vmb deucht mich vnd were mein gefallen du kemest
 heint zû mir vnd nemest den wege oben über das tach des hauß do du
 mich zû mer malen gesechen hast das hare an der sonnen pleichen, damit
 wir vns mit freüden heynt pey einander finden mügen. Der iunge zû der
 30 frawen sprache; frawe zû euch ze komen pin ich willig vnd lasset mich
 do für sorgen. Do nun die finster nacht komen was der man wol ge-
 wappent sich in die hüt seczet des pfaffen der zû der frawen komen
 solt ze wartenn vnd sich vnden in dem hauß nahent pey der türe in ein
 öde kamern verporgen het, vnd die frawe alle tore vnd türe weidelich
 35 verspert vnd verrigelt hette, sunder die an mitter stiegen. Do mit der
 eyferer hin auff in das hauß nitt komen möchte, vnd do pey liebe zeit
 daucht sich zû einader fügten zû pette gingen ir freü mit einander bet-
 ten, also die selben nacht mit einander der liebe spilten, do vnd der

netze tag anginge der iunge sich wider zů hause füget. Der eyferer übel
 ze mute vnd traurig als der da die gancze nacht vngessen vnd vnge-
 truncken an der küle gestanden was, [249^b] von frost mer tode dann
 lebendig des güten pfaffen zewarten, Doch do es gegen dem tage ginge
 5 er das wachen nit mere vertragen mocht in ein ander kamer vnden in
 dem hauß schlaffen ginge, Do er piß auf güt tercz zeit lag vnd schlieffe,
 vnd nun alle tür geöffent waren er des gleichen thet als ob er von an-
 derswo her keme, auff über die stiegen ginge sich zů tische seczett vnd
 asse. Nach dem er einen iungen schuller in forme als ob es dez pfaffen
 10 dem die frawe gepeicht het clerico were zů ir schicket vnd die frawen
 fragen liesse, ob der als sy wol weste mer kem, Dem die frawe ant-
 wort als die des mannes poßheit vername vnd den schuler wol kante,
 sprach, er were die vergangen nacht nit komen, vnd wo er also thett
 er ir villeicht auß irer gedechtnuß kem vnd sein vergeß wie wol es
 15 wider iren willen were sein zů vergessen. Nun was mag nun im der
 grosse eyferer nür gedencken, so er der frawen antwort vernimet, Er
 stunde vil manche lange winternacht des pfaffen ze warten, In dem die
 schön frawe vnd der iunge ir freud der liebe eines von dem andern
 [249^c] namen, Doch nach sölichem langem wachen der eyferer sölicher
 20 müe nicht lenger vertragen mocht; Eins tages mit ser betrübtem an-
 plicke die frawen fraget was sy dem pfaffen an dem heiligen morgen
 gepeicht hett, vnd was das bedeußt das sein clerico so dick zů ir köme,
 Die frawe sprach sie wölt im dovon nicht sagen dann es wer nicht cym-
 lichen Der eyferer sprach, du zenichtes pöses weyb! nun weysse ich
 25 doch alle deine gescheffte vnd was du im gesaget hast Nun will ich ye
 von dir wissen wer der pfaffe ist den du so gar liebe hast, vnd der
 durch sein kunst alle nacht durch versperte tore einget vnd pey dir
 leytt, oder du must mir dein leben geben do wiß dich nach zů richten,
 Die frawe im antwort vnd sprache; Es were nicht war sy het keinen
 30 pfaffen liebe; Nun wie ist dem ist es dir so palde vergessen sprachstu
 nicht also, vnnd also zů dem pfaffen der dicht höret, Du sagest gleich
 als werst du selbes da pey gewesen sprach die frawe, vnd nicht als ers
 dir gesaget het, es ist ware ich saget im gar wol was mir eben zů sagen
 waz Der eyferer sprach; Nun wollan sage [249^d] mir wer ist der pfaffe
 35 vnd thů das palde, Die fraw lachent zů dem sprach, Es tut mir in
 meinem herczen wol, daz ein man der sich so weyse vnd kluge düncket
 als du tuest, vnd der sich von einer schlechten frawen anführen lasset, als
 man den oxen pey den hörnern in fleißpanck thůt, wie wol du nye

weyße warest syder her du dir den pösen geist des eyfern in dein ge-
 dancke vnd gemüte on alle vrsache namest vnd ye eynfeltiger vnd
 torheter du pist so vil sich mein ere mindert, gelaubstu mein güter man
 das ich plinte an den augen sey als du pist für ware neyn ich, dann mit
 5 meinem sechen ich den pfaßenn gar wol erkante der mich peicht höret,
 vnd weiß das du der solbig warest, Darumb ich mir fürnam dir zů
 geben das du von mir suchen gingest vnd dir das sagen daz dir nicht
 liebet; Aber werstu ein weyß man als dich düncket du seyest du hettest
 nicht die heylichkeyt deiner erberen frawen durch sölche weg ge-
 10 sucht vnd on alle arge gedanke wol söltest vernomen haben, Das das
 on czweyfel daz ich dir saget nicht war were Ich saget dir wie ich einen
 [250^a] pfaßenn liebe hette, warest du nicht der selbig den ich, nitt vn-
 plich ist liebe habe, Mer saget ich dir wie er alle türe auff thet vnd im
 kein tür meines hauß versperret wer wann er zů mir slaffen köme. Nun
 15 sage mir du güter man welche tür vnsers hauß ist dir ye versperet ge-
 wesen wann du zů mir hast komen wöllen, vnd als offte du deiner
 schuler zů mir schickest entpote ich dir nicht du werest bei mir nicht
 gewesen Nun was ze nichten mannes magst du nür sein daz du dich
 die falschen vntugent dez eyfern hast überwinden vnd so schentlich
 20 plenden lassenn, vnd pist des nachtes in dem hauß verporgen gelegen
 vnd hast wollen zů versten geben anderswo zů schlaffen, Ich sag dir
 das du abe von deiner eynfeltigkeit lassest vnd würde zů einem man
 lasse dein eyfern vnd pöse gedanke, Da mit du nicht yederman gespötte
 seyest, Die dein torheit vernemenn, Ich spriche vnd schwer dir des ze
 25 got vnd allen heiligen köme es mir in meinen syn dir die hörner zů
 machen vnd auf seczen, vnd hettest du hundert augen als du czwey hast
 ich sölte dich pey in allen plendenn [250^b] vnd meinem willenn ein ge-
 nügen thon on dein wissenn Den pösen eyferer wol dauchte die frawe
 im die warheit gesaget het, sich ganz beschamet sache vnd on ander
 30 red vnd antwort; Die frawe weyß frum vnd erber hielt, so im erste
 wer eyfern not gewesen, Er sich des ganz ab thet, als do er sein nicht
 not waz vnd sich on vrsache aller darinne verwickelt hette, Also die
 weiß frawe genug gůt vrlaub het ir freude ze nemen iren puelen vnd
 liebhaber nicht mer über das tach als die kaczenn ein zů ir komen thet,
 35 sunder züchtighen zů der hauß türe auß vnd ein gen schüffe, mit im
 ir freude vnd lust der liebe ze haben.

[250^c] Wie Lisabetta pey Lionetta irem puelen ist, Die von

heren Lamprecht dem ritter auch liebe gehabt was zû der selbenn stunde auch zû der frawen kam mit ir freude ze nemen, vnd die weyle sy peyde in sölchen freüden sten der frawen man zû hauß komet, vnd die frawe denn ritter mit plossem schwert in der hant
 5 über die stiegen abe weist vngeret auff zû roß siczet wege reynt vnd der frawen man Leonetto selbes heym beleyt.

On masse frawenn Fiametta netie fabel den frawen vnd auch den mannen gefallen hat alle vrtheylten wie die frawe dem eyferer recht gethon het In dem der künig frawen Pampinea sein gepote thet, Die an-
 10 hube vnd sprach. Es sein ir vil die sprechen vnd halten [250^d] Die lieb den menschen ir synne vnd vernunft neme¹ vnd mach sie zû torn; Ein sölches mich düncket ein cynfeltige rede vnd meinung sein, sich sere ring an synnen beweysen als ich hoffe ir durch mein rede vernehmen sült; In vnser wirdigen stat die alles güts vol ist, Was ein edele
 15 iunge frawe eins ritters genug reiche redlich vnd in dem regiment ein fürnem man, Vnd als sich oft begibt daz der man nicht alwegen einerley speyse messen mag vnd zû zeiten was neties begern ist, Vmb des willen dise iunge frawe von irem manne zû pette nicht gar wol nach irer nottorffte ein genügen geschahe, vnd sich eines iungen hübschen
 20 knaben vnterwant der ir zû sölchen sachen liebet vnd gefiele, vnd was mit namen genant Leonetto; In den sy auß inprünstigem herzen in liebe enczündet, vnd wie wol er nit als von hochem geslecht waz als sy doch zû ir nit minder liebe hett als sie zû im, Vnd als dann euch wol mage wissent sein wenn die czwu partye eins seyn, das ein sölches gar seltenn
 25 erget on verpringunge der werck wo sie bereyt sein vnd nach ganzem irem willen [251^a] ein genügen zethon, des nitt lange zeit vergen mag; Also die iunge frawe güt zeit mit dem iungen knaben ir freud hett; In sölchem sich begabe, Das ein ritter genant her Lamprecht vmb der frawen grosse schöne willen zû ir in lieb enczündet, Vnd darumb das er als ein
 30 vnrichtig man waz dapey etwas bedacht die frawe die in in keinem wege mocht liebe haben, vnd er sie in keinen weg ruen ließ stäcz sein potschafft mit grossem verheyssen pey ir het, aber sein ye kein genade haben wolt, des er sich betrüben ward vnd gen ir in czoren fiele sich mechtig vernam, Darumb wo sie im nicht zû willenn würde er ir troet
 35 sy zû schanden ze machen, des sich die frawe bekümern warde forcht eupfienge sich gen im ergab vnd seinen willen thet. Nun eines tags die schön frawe die Lisabetta genant was für die stat auff iren hoffe etliche

tag in kürzweyle sten gangen was, vnd an einem morgen ir man etliche
 meyle von dan geritten was, vnd des selben tages nicht meinte zů hauß
 ze komen, In dem die frawe nach irem lieben Lienetto schicket, das er
 keme dan ir man wer [251^b] außgeritten; Der sich nit saumen liesse
 5 frölich vnd wol zů mute palde kame mit einander ir freude hetten; In
 dem der ritter der auch sein heymlich spehe der frawen nach hielte ver-
 nam das der frawen man außgeritten was, allein aufsasse vnd zů der
 frawen reyt vnd do er an der frawen porten kam frölich anklopffet, des
 der frawen meyt wargenomen het palde zů der frawen in die kamern
 10 lieff die pey iren Leonetto zů pette was, Ires herren Lamprecht komuen
 in geheyme ir zů wissen thet wie er alleine an der porten were, Des sich
 die fraw alle betrübet doch den iungen iren lieben Leonetto pate das er
 sich nicht verdrissen liesse ein wenig ze verpergen hinder den fürhange
 des pettes Also lang piß her Lamprecht wider wege ritte; Leonetto der
 15 sein selbes nicht minder als die fraw besorget sich palde verparg, vnd
 die fraw mit der meyt schuffe das sy dem ritter auff thet, Die meyt palde
 lieffe dem ritter das tore öffnet vnd er palde abe von dem rosse, sein
 roß an pantt, auff über die stiegenn ginge, vnd die schönen frawenn im
 entgegen kame vnd gar mit [251^c] frölichem anpicke lieplichen en-
 20 pfinge; in fraget waz er suchen ginge, Der ritter sie freüntlich halset
 vnd küsset zů ir sprach mein aller liebste fraw ich vername das eßer
 mane nicht zů hauß was; Darumb ich komen pin mit euch freud ze
 haben, Mit disen wortenn mit einander in die kamern gingen, die gar
 wol versperten peyde mit einander nach des ritters willen ir freude het-
 25 ten; Doch nit lange erginge in sölchem sten on allen gelauben der
 frawen sich begab daz der frawen man wider zů hauß kam des der fra-
 wenn meyte ee dann yemant anders ee er zů dem hauß kam warge-
 nomen het, palde lieffe vnd daz der frawen zů wissenn thet, wie ir herre
 wider komen wer vnd in dem hofte nun ab gesessen were; Do das die
 30 frawe vernam alle erschrocken als die da czwen ire puelen in dem hause
 hette, vnd den ritter nicht zů verpergen weste vmb seines pferdes wil-
 lenn das in dem hofte an gepunden stunde; Darumb sich tode sache,
 doch sich palde ab dem pette warff vnd schnels ratz beriete Zů dem rit-
 ter sprache Herr wölt ir mir wole als ir dann spricht vnd auß sorgen
 35 [251^d] angst vnd not erledigen, so thut palde als ich euch sage, Nemet
 palde etter ploßes schwert zů eüern henden vnd mit czornigem angesicht
 über die stiegen ab get vnd nicht anders spricht dann allein; ich schwere
 zů got im das nicht zů vertragen er sol mir ze teyl wern, vnd ob euch

mein man was fraget; gebt im weder rede noch antwort! nicht anders
 tut dann als ich euch befolhen hab, siczt auff zů rosse vnd reyt wege.
 Der ritter der frawen rede vernam das zů thon willig was, das plosse
 swert zů seinen henden nam aller von czorn in seinem angesicht fewel
 5 was, doch das mer von der arbeit die er auff dem pette mit der schönen
 frawen begangen het dann von czorn sein mocht; vnd als im die frawe
 gepot er thete, vnd der frawen man in dem hoff nun abgesessen was vnd
 das fremde roß gesechen hette; in wunder nam, mit dem über die stie-
 gen auff in das hause ginge, vnd dem fremden ritter an der stiegen mit
 10 dem plossen swert vnd den wortenn als ir oben vernomen habet bekame,
 Daz den man noch vil fremder nam, dann das rosse in dem hoffe zů
 sechenn [252^a] zů dem ritter sprach? Herr Lamprecht waz bedeut das
 wer hat euch widerdrisse gethon Des im der ritter kein antwort gabe,
 dan allein pey got schwur, er wirt mir anderswo zů teyle mit dem auf
 15 saß vnd weg reyte; Der erber gůt man auf über die stiegen ging die
 frawen alle erschrockenn vor der kamer türe sten fande zů der er
 sprach? Fraw was bedeut das daz ich da siche, daz her Lamprecht mit
 dem plossen waffen also übel ze müte über vnser stiegen abe get waz hat
 er hin zů schaffen gehabt wem troet er so czorniglichen, Die frawe dem
 20 man antwort vnd domit Leonetto der hinder dem pette verporgen waz
 ir reden verneme sich vnder die kamertüre hielte vnd sprach awe lieber
 man Ich hette alle meine tage nye so grosse forecht, als ich auf dise
 stund gehabt hab; Hier ein kam iczund ein iunger geloffen ich enweisse
 nicht wer er ist, Dem her Lamprecht mit grossem troenn vnd plossem
 25 swert nach volget, vnnd zů seinem gelücke vnser kamern offen fand;
 aller czittern zů mir sprach frawe ich befilhe mich euch vmb gotz willen,
 Ich besorge des todes vor einem der mir nach [252^b] volget; In dem ich
 auffstunde in zů fragen wer er were; das im geprech; In dem her Lam-
 precht über die stiegenn auff mit ploser were geloffen kam spricht vnd
 30 fragt wo ist der gotz verretter vnd pösbicht, Do ich daz vernam mich
 vnder die kamertüre stellet Do ich sein meinung vernam im das wider-
 redet noch hinein zů gen verhenget, vnd do er sache das es mir wider
 waz mein schonet vnd nicht hinein, sunder wider über die stigen abe
 mit den Worten als du vernomen hast ging, ach frawe wie wol hast du
 35 thon sprach der man; Es wer vnß ee schande gewesen dann nitt Wer
 yemant in vnserm hause ertöt worden, vnd hern Lamprecht thet übel
 vnd vnrecht in vnser hauß mit plossem waffen ze komen, Darnach er die
 frawen fraget wo der iung were; Die fraw sprach sy weste nicht wohin

er sich verporgen hett, Der frawen man der auch ein ritter was dem iungen rüffet vnd sprach gange herfür wo du pist güter iunger habe kein sorge, Der iunge der peyder red wol vernomen hette aller erschrocken als der in forchte vnd angste was darnach her füre ginge [252^c] Zü dem der frawen man sprach als der in wol kant sage mir Leonetto was hastu mit hern Lamprecht zü schaffenn, Der iunge sprach; herre ich hab nicht mit im zeschaffen, dann allein ich mir gedenck er hab mich für einen andern ersehen, oder er sey nitt pey synnen; Dann als palde er mich von ferre ansichtig warde er nach dem schwert greyffe vnd sprach
 10 Ey du verräter du must von meiner hant sterben; Do ich das vernam Ich stunde nicht ze fragenn was die vrsache wer sunder so ich so ich pest mocht die fluchte gab, vnd zü meinem gelücke eüer tore offen fandte vnd durch genade eüer frawenn ich im entgangen pin, Nun wolan im namen gotz sprach der frawen man du pist grossem vngelücke ent-
 15 gangenn, doch habe kein sorge mere ich sol dich on schaden heym be-
 leiten Darnach wisse ze suchen waz er von dir haben wille, vnnd do sy gessen hetten in zü rosse seczet mit im in die stat reyte heyme in sein hauß beleytet, vnd Leonetto durch anweyßung der frawen desselbenn abentz selbes mit hern Lamprecht redet ir ordnung gaben damit der ein
 20 den andern nitt [252^d] mere irret auch mancherley rede der frawen halben vmb die wege gingen; Doch der frawen man darvmb sich keins argen gen ir verdachte noch das im von ir gethon waz nye mercket noch des war nam.

Wie her Ludwig frawe Beatrice sein grosse liebe öffnet, vnd ir
 25 die zü wissen thut, vnd wie die frawe iren man der Giani genant was in irem forme vnd gestalt in den garten sant; In dem her Ludwig pey ir leyte nach dem vonn ir auff stet in den garten get vnd Giano sein haut mit trucken streichen vol schlecht.

Die schnelle vnd behende fürsechunge frawen Lisabetta von der
 30 ganczen gesellschaft mit grossem wunder gelobet waz Vnd frawen Philomena die des küniges gepote empfangen hett Anhub vnd sprach [253^a] Ir lieben frawen! ich sey sein dann betrogen, So ist mein meinung euch als ein schöne schnelle vnd behende histori zü sagen als die gesagt gewesen ist Darumb stült ir wissen daz zü Parisy ein edel mann wonet
 35 von gepurt auß vnser stat der auß armut zü einem reichen kauffman worden was; der het von seiner haußfrawen einen eynigen sun der waz

mit namen genant Ludewico. Der dem adel vnd nicht kaufmanſchacz nach ginge, Noch ſein vater in zů kauffmanſchacze meinte prauchen, sunder zů allem adel ſchicket vnd darzů hielte an des küniges vom Franckreich hofte ein fürneme iunger was Do er vil adels vnd gůttr

5 sytten gelernnet het In ſölichem ſeinem also ſten ſich begabe das etliche ritter von dem heiligen grabe über mere komen waren mit den her Ludwig von ſchönen frauwen in Franckreiche vnuud in Engellant. zů rede kame, vnd auch von andern, vnd einer von den rittern sprach; lieben hern ir ſagt von ſchönen frawen auß diſen landen ſo ſprich ich als ferre

10 ich über lant vnd über mere gefaren pin vnd als vil manche frawen ich mein tag ye geſache, geſach ich nye kei[253^b]ne die do frawen Beatrice von Boloni mit ſchöne het gleichen mügen; Die ſelbig ſchöne frau wer eines weybe der wer genant Giani Gallucz dem ſich alle ſeine geſellen die ſie mit ſampt im geſehen hetten concorditen vnd ſprachen

15 er ſaget die warheit Diſe wort der iunge her Ludwig gemercket vnd zů im genomen het. der noch keinerley liebe verſucht het In also groſſe begire vnd liebe enzündet die frawen zů ſehen vnd zů erkennen das er an keinerley dann alleine an ſy gedennen mochte, vmb des willen im ganz für nam gen Boloni zů reyten die ſchönen frawen an ſehen vnd

20 da ze wonen wo ſie im gefallen were, vnd palde ſeinem vater zů verſten gabe wie er zů dem heiligen grab vmb die ritterschafft wölt reyten, Des im der vater mit groſſer ſeiner müe vergunde im ſein vrlab gab. Do er nun des vaters vrlaub empfangen hette mit etlichem knechte auf zů roſſe ſaſſe vnd gen Boloni reyt, vnd nach dem im von dem gelücke bereyt

25 was er die frewen an dem erſten tage do er dar kame an einem irenn fenſter ſten ſache; Die im zů tauſent malen ſchöner dauchte dann [253^c] er gelaubet noch gemeynet hette, vmb des willen in vnmessiſſe liebe gen der frawen enzündet wardt, Vnd ſein hercz im ganz in lieb enprant Im für nam von Boloni nitt ze komen also lange piß er ir liebe

30 vnd hulde erworben het mit im ſelbes bedencken ward ir hulde ze gewinnen wes er ſich halten wölt, Dann alle andere ſyn verlorenn weren vnd gedacht wie er ires mannes knecht vnd diener werden möcht on czweyfel im all ſein anſlege für ſich gen ſölten vnd im wern wes er begeret Nach ſölchem bedencken roß vnd harnasche verkauffet ſeine knecht

35 auch zů hern thet, vnd in verpote nyemant zů ſagen wer er were noch keines gleichen theten als ob ſy ſein kuntschafft hetten, vnd den namen Ludwig verkeret vnd ſich Hanichino nante vnd zů dem wirt do pey er zů herber lage sprach wie er geren einem erbern man dienen wölt ob

er yemant weste vnd verhanden hette dem er füglich were vnd dienen
möcht das wölt er freüntlich vmb in verdienen. Der wirt sprache er
wölt es gern tun dann ich sich dich in söllichem form daz dich ein iglich
erber man sol gern [253^a] in seinem hauß haben, besunder einer der ist
5 in diser statt der ist genant Giano der helt stäcz vil manchen seines ge-
leichen, mit dem ich von deinen wegen reden will vnd wie der sprache
also er auch thet, Zû hern Giano ging nitt von im kam piß er den iun-
gen zû im pracht vnd verdinget het vnd so Hanichino peldest mochte in
daz hauß kam die schönen frawen ze sechen, do von er besunder freude
10 het mit ganzem fleiß ir anhub zû dienen, vnd der herr seines dienen ob
allen seinen dienern besunder gefallen hette grosse liebe zû im gewan,
im ein werder knecht was; Er hielte sich in sölcher masse nicht alleine
dem herren vnd der frawen mit fleiß dienet, sunder alle ire geschefte
vnder handen vnd in seiner gewalt hette. Nun eins tages sich begabe
15 daz herr Giano was auß iagen vnd vogelen geriten, vnd Hanichino
alleine pey frawen Beatricze beliben waz, Die seiner liebe zû ir noch
nicht ware genomenn het, wie wol sy seine gûte syten vnd tugent vil
dicke gelobet hett, auff disen tag mit im anhub zû spilen den schaffzagal
mit einander zû ziehen vnd Hanichino der nit anders [254^a] begert dann
20 ze thon ir gefallen Die frawen alle spile gewinn liesse, des die frawe ir
grosse freude nam, vnd in söllichem iren spilen peyde alleine beliben
waren alle andre frawen vnd meyd iglichs in seinem geschefte anderswo
gangen was, vnd do sich Hanichino also alleine pey seiner liebenn frawen
sach ein schwere vnd erparmglich seüfczen im von seinem herzen ginge,
25 dez die edel frawe war name zû im sprach? wes enpricht dir Hanichino
thût dir ant das ich alle spile gewinne fraw sprach Hanichino; ander
vrsache vnd grösser geschefte sein meiner sweren seüfczen vrsache.
Die fraw sprach; nun sag mir Hanichin durch der liebe vnd freunt-
schafft willen die du mir tregest was ist die vrsache. Do sich Ha-
30 nichino also tieffe die schönen frawen monen sach die er dann ob
allen creatures lieb hette zû der stunde noch vil einen grössern seüf-
czen tet dann er vor gethon het, vmb dez willen in frawen von neuem
pate das im liebet ir die vrsache seines seüfczen zû wissen thon, Hani-
chino sprach fraw ich besorge sere sag ich euch die vrsache ir nemet
35 mir das in übel auff, vnd .fürcht ir ein sölches fürpaß precht vnd nitt
[254^b] pey euch alleine beleyben lieste Zû dem die fraw sprache für
ware nyn ich Hanichino ich dir es in keinen argen auffnemen noch dich
keines übels verdencken noch yemant dovon ze sagen so ferre es dein

gefallen ist. Do sprach Hanichino frawe seytmale ir mir verspricht das nit weyter zů pringen so will ich es euch sagen, vnd mit czehernden augen zů ir sprach, Ir saget vnd wer er were ze wissen tet, vnd was er zů Parisy von ir, vnd schöne vernomen het, vnd wie er zů der
 5 selben stund zů ir in liebe enczündet were, vnd wie er sich vmb iren willen zů irem man für einen knecht vnd diener verpunden het. Nach disen Worten die frawen auß grunt seines herczen in diemütigkeit freuntlich pat; wer es müglich vnd möcht gesein daz sie im genedig wer vnd sich in ir liesse erparmen vnd im in sölicher liebe vnd ver-
 10 porgner begire sölte zů willen weren, vnd wo sie eins sölichen nicht zů fride were daz ze tun Das sie in dan in dem stant darinne er iczund were sten liesse, vnd das ir liebet vnd gefiele das er sie liebe hett O du grosse süssigkeit Bologneser plütz dez du alweg daz lob vnnd den preyß gehabt hast, vnd von [254^c] yemant weder seüfzen klagen vnd
 15 weynen ye begert hast sunder stäcz allen liebhabern du pist weich milte vnd in irem dienst diemütig gewesen, vmb des willen ich dich pillich loben mag. Nun in sölichem als ir vernomen habt die edelfrawe den iungen ernstlichen ansache im alles das er ir ye gesagt het gelaubet vnd seiner pete söliche freüde vnd stercke enpfinge; Das sy im ver-
 20 porgen ires herczen ir hulde gab vnd zů der selben stund vmb sölicher empfangner verporgner liebe willen nit gelassenn mocht seüfzen müst, vnd nach etlichem iren seüfzen dem iungen antwort vnd sprach Hanichino liebes lieb, ste mit gütem müte vnd frölichem herczen Ich sage dir in ganczer warheit, das nye weder gab noch schanckung keines
 25 der vmb mich geworben hat es seyen edel oder vnedel gewesen noch kein person die mir ye gütz günt habe mir meine hercz in sölicher liebe erweychen noch mich zů seinem willen hab keren mügen; noch vermüget haben das ich keinem mein hulde hab vergünnen noch geben wöllenn, vnd du mit deinen wenigen züchtigen schönen Worten mich
 30 mer dein dann meine gemacht [254^d] hast, vnd sage dir des zů vnd piß des on czweyfel das du mein hulde vnd liebe gancze erworben hast, Dir sie verspriche vnd gib, vnd ee die zükünfftig nacht verget du deinen lust vnd freüde mit ir haben solt, vnd domit vnser peyder wille einer werde so gedenk daz du auf mittenacht an meiner kamertüre
 35 seyest so will ich dir die türe zů der selbenn stunde öffen, So ist dir wol wissent an welcher seyten dez pettes ich lige do füge dich in stille hin zů mir vnnd ob ich schlieffe so weck mich so will ich dich des erfretten des du an mich begern pist vnd zů einem zeichen freuntlicher

liebe vnd du gelaubest waz ich dir verspriche das daz ware sey, Ich
 dir iczund einen freuntlich kuß an deinen munt der liebe geben will;
 Zü hant sich in an seinen hasse warff den mit iren armen vmbfing liep-
 lich halset vnd küsset; Desselben gleichen er sy thet mit dem von
 5 dem spile liessen aufstunden, Die frawe in ir gemache zü iren iunek-
 frawen ginge, vnd Hanichino an seines hern gescheffte ging, vnd alle
 stunde in tausent iare dauchte der finstern nacht mit grossen freuden
 wartet. In dem der herre von dem iagen kam [255^a] das nachtmale
 empfangenn het vnd ein klein müe empfande mit sampt der frawen zü
 10 pette schlaffen ginge, vnd als die frawe Hanichino versprochen het sy
 thet, vnd in die kamern offen liesse vnd er zü der genauten stunde
 zü ir an daz pette ginge, vnd ir sein hant mit grosser stille auf ir
 schneweisse prüstlein leget vnd nit schlaffent sunder wachent fand vnd
 als palde sie sein empfande in pey seiner hant name, vnd mit iren
 15 peyden henden starck hielte; in dem pett sich also lange hin vnd her
 welget das der herre der da slieffe von dem schlaffe entwachet Zü dem
 die fraw sprach her Giani ich wolt euch nechten was neües gesagt
 haben do daucht ir mich also müde daz ich es vnder wegen liesse, doch
 eins ich von euch beger zü wissen. Nun saget mir das euch got pe-
 20 ware, welichenn vnter allen eüern dienern die ir in dem hauß hab halt
 ir für den eüern getreüsten diener vnd der eüer kuld vnd gunst am
 meisten geweltig sey, Giano zü ir sprach? Was bedeüt das frawe des
 du iczund zü wissen begern pist? ist dir daz nit selbes kunt; ich meint
 es wer dir als wol als mir wissent; Ich spriche das ich nye [255^b] kei-
 25 nen gehabt hab zü dem ich grösser getrawen gehabt hab noch habe
 noch der mir lieber, vnd werder gewesen sey als Hanichino ist, Aber
 sage mir weyb was vrsach czwinget dich das ze wissen dez du mich
 fragest, Do der edel iunge liebhaber seinen herren enbachte vernam
 zü mermalen der frawen sein hant gern genomen het darvon zü flichen
 30 Dann nach der frawen red er nicht anders versten mocht, dann das
 sy in betriegen vnd zü schandenn machen wölte; Aber die fraw in sol-
 chem forme gefast het das er ir on iren willen nicht komen mochte
 Die frawe dem man antwort vnd sprach, Giano daz will ich euch sagen,
 Ich pin wol stäcz in der meinung gewesen dorin seyt vnd gelaubet im
 35 wer als ir mir stäcz habt zü versten geben, Er trüge euch grösser liebe
 dann kein ander eüer diener; Aber ich pin ye meiner meinung betro-
 gen gewesen Dann als ir an dem vergangen tage vogeln geriteen wardt,
 vnd er allein ze hause beleybe vnd do in zeit daucht sich dez nicht

schamet on mich meiner ern zů seinem willen begeret, vnd damit ir ein sölches selbes secht vnd an der warheyt fündet ich im ein stunde be[255^c]schiede zů mitternacht in vnsern garten zů mir zů komen do ich willig wer seinen willen zethon, Do ich weder syn noch willen hab
 5 hin ze komen; Darumb wölt ir die treüe eüers dieners eygentlichen sehen vnd erkennen, vnd were euch mit treüen meint, so leget palde meine frawen kleyder an vnd nempt meinen schleyer auf eüer haubt vnd get in den garten vnd besecht ob er komen sey, Dann mir czweyfelt nicht ist er nicht komen so sol er nit lange aussen sein Do Giano
 10 seiner frawen red vernomen hett zů ir sprache, werlich das will ich gern sehen, palde auff stunde so er peldest mochte der frawen kleider anleget iren schleyer auff sein haubt nam in den garten ginge vnd vnder dem tannenpaum Hanichino wartet, vnd als palde in die frawe ausserhalb der kamern vernam auffstunde die kamertür wol versperte,
 15 vnd Hanichino der die grösten forcht anst vnd sorg gehabt hette die er alle seine tag nye mere gehabt het, dann sich vil dicke versucht het der frawen ze entrinnen wol ze tausent malen ir hulde vnd liebe vermaladeyt hett, zů der stund der frölichest vnd pas zemüt man warde dann er ye mer ge[255^d]wesen was, vnd do die fraw wider zů pette
 20 kam vnd ir gefallen waz Hanichino sich auß seinem gewant zoche, peyde mit einander die freüde nomen die dann sölche liebe gewonet zegeben ist, als dann allen den kunt vnd wissent ist die es versucht haben, Also lange zeit irem willen peydenthalben ein genügen theten vnd do die frawen zeit daucht den iungen schüffe auff sten zů im sprach Hani-
 25 chino mein liebes lieb! Nun thue als ich dir sage! nym zů dir einen gůten stecken gee in den garten do du nach dem du vernomen hast Giano in meinem form finden wirst, vnd des gleichen als hetttest du mein zů vnkeüsche begert mich zů versuchen ob ich meinem man ein getreüs weyb were oder nicht vnd schlach Giano sein haut vol schilt
 30 in vnd fluche im, iage in mit gůten trucken streichen zů hauß mit scheltworten in form als were ichs, do von dir besunder nuceze vnd freüd zu sten süllen, Der iung pald auff stunde vnd als im die frawe gepoete er thet palde mit einem gůten prügel in dem garten ginge, vnd do er nahent kam do Giano sein wartet, vnd do Giano in ersehen
 35 het gen im auffstund vnd en[256^a]gegen kam in forme, als ob er in freüntlichen enpfahenn wölte Zů dem Hanichino sprache, Ach du pöses falsches vntreües weybe, meint ir daz ich meinem hern sölche vntreü beweysen wölle der mich ob allen seinen dienern lieb hat Ir seyt mir

recht komen ich wille euch an seiner stat den lon geben des ir wirdig
seyt vnd den stecken auff hebt den hern über den rücken slechtt das
er schier wer zû der erden gefallen. Do das Giano vernam on icht
geredt so er pest mocht gen der porten des gartenwercz die flucht gab,
5 dem Hanichino mit gûten trucken streychen stâcz piß in den pallast
nachvolget, vnd sprach ey ir zenichtes weybe ich sol es piß morgen
meinem hern ze wissen thon, vnd so Giano peldest mocht in die ka-
mern lieffe, den die frawe pald fraget ob Hanichino wer in den garten
komen Giano sprach, also wölt got das er nye komen were, Dann als
10 palde er mich ersache vnd meinete du werst es er mich mit einem ste-
cken vnd slege also außgericht hat ich über winte sein in czweyen
monet nicht, Er hat mir als übel zû geret als pöser frawen ye gethon
ward werlich es nem mich wol fr[256^b]emde daz im were als du mir
sagest, Dann zû sölche sachenn ich in zû getreüe vnd zû frum schacze,
15 aber er sol dich ze frölich gesehen haben, do er sölliche wort zû dir
sprach dich zû versuchen, Des lobe ich gott sprach die frawe das er
mich mit worten vnd dich mit wercken versucht hat; Seytmal im dann
also ist so sol ich seine wort vertragen vnd mer mit mer gedult leiden
mügen dann du die werck tun magst; aber seytmale er dir als ein
20 getreüer diener ist, so sol man in eren liebe vnd wert halten, alle
zucht vnd freuntschafft peweisen. Der herr sprach frawe du sagst
ware er ist aller ern wirdig, vnd on czweyfel gelaubet er die pesten
vnd getreüsten frawen vnd den getreüsten diener hette aller welt, nach
dem her Giano vnd die frawe mit Hanichino zû manch malen diser ma-
25 teri mit einader ze rede komen, vnd in der verloffenn sache vil dicke
genug lachten, Also hin für Hanichinus, vnd die schön frawe ir liebe
mit minder forchte vnd sorge prauchten vnd irren willen der freunt-
lichenn liebe zû spilen ein genügen teten, die weyle er sein wonung
pey ir hette.

30 [256^c] Wie ein grosser eyferer seins weybes besorget vnd sy
eins nachtes ir selbs ein faden an die zehen des fuß pint, do pey sie
vernemen möcht wan ir puele zû ir komen wolt, des der man ware
nam demselben iren püelen mit plossem swert zû dem hauß auß
nach laufft In dem die frawe ein ander frawen in das pett an ir stat
35 legt; Die der man do er wider ze hauß kam gar wol schlecht, vnd
ir die zöpfle abe schneit; Nach dem zû dez weybs prüder ginge; in
über das weyb klaget vnd was er ir gethon het in saget mit im zû

hause pracht vnd nicht war funden was er ir gesaget het wider in zorn fielen vnd im sein haut vol schlügen.

Die wirdigen gesellschaft gar fremde nam der schönen listigkeit die frawe Beatrix iren man ze betriegen ir erdacht het, Do pey alle on
 5 czweyfel gelaubten das Hanichino forcht on masse grosse sein solt, sunder do in die frawe so feste hielt vnd nit lassen wolt vnd dem man saget wie er zů vnern vnd seines willen begeret het. In dem Philomena sweyge vnd die künigin sich gen Neyphile keret zů [256^d] ir sprach, das sy fürpaß saget Die da frölich lachent anhuben vnd sprach. Mein aller-
 10 liebsten frawen es wirt mir gar ein grosse müe sein sol ich euch als die andern gethon haben mit einer histori vnd schönen neuen fabel ein genügen tun Doch ich hoff solche pürde on yemant hilff wils got ab mir ze laden; Darumb sült ir wissen daz in vuser stat wonet ein reiche kauffman der was mit namen genant Arrigo Berlingere der in seiner eyn-
 15 feltigkeit als dann heüt pey tage etlicher gewonheit ist Zů einem edel manne meinete ze wern, vnd ein schöne iunge edele frawe zů einem weybe name, im ganz vnfüglichen Die waz mit namen genant frawe Symona, die zů einem iungen der was mit namen genant Rubert in vnmessege liebe entzündet, der selbig iung sy lange zeit waz gepuelet het Des kunt-
 20 schafft sy zů güter masse hette, aber solche kuntschafft mer on masse prauchet dann villeicht pillich was Vmb des wilenn der man wie sich das begabe ob er waz gesehen oder vernomen het Der gröste eyferer ward aller welte, sein außziehen in kaufmanschaft vnder wegen liesse allen seinen vleiß leget des [257^a] weybes ze hüten, vnd in dem pette nymmer-
 25 mer entschlaffen wer, er hette im dann vor das weyb zů pett gen sehen, des die frawe ser traurig was ir grosse pein pracht, dann in keinen weg sich pey irem lieben Ruberto finden mochte, doch ir gedacht syn ze finden, dann von im stäcz zů freüntlicher liebe gefordert was, vnnd zů leste bedacht das ir kamern vnd die fenster auff die gemeinen strassen
 30 gingen, nach dem wie der man gar lancksam entslieffe aber wenn er entschlaffen wer das er lang vnd gar herte slieffe, Darumb ir fürnam iren Ruberto nach mitternacht so der man am stercksten schlieff zů ir komen schaffenn mit im die weyle der man slieffe ir freüd ze haben, vnd nach irer alten ordnung, vnd domit sy sein komen verneme vnd von nyemant
 35 mochte gehört sein wenn er an das fenster der kamern keme, sy einen faden zů dem fenster auß warff mit dem selben ort das erdriche rüret vnd das ander ort vnder das pette verparge, vnd wenn sie zů pette ging den selben orte des faden nam vnd den an ir grosse zechen des fuß pant,

vnd wenn Rubert kame vnd den faden außeralben des fensters fande den nam [257^b] vnd züchtiglich zohe, waz dann sache das der frawen man slieffe so liesse sie den fadenn gen vnd stund in stille von dem pette auff vnd zü Ruberto kam vnd het mit ir freüde, Was aber sache das
 5 der man noch nicht slieffe so hielt sy den faden starck vnd zoche den zü ir, Do pey mercket Rubert daz er auff die selben nacht nicht schüffe darumb wol wider möcht heym zü hauß gen, Also lange zeit mit einander ir freüde hetten, vnd das gelücke in sölchen sachen in was sere gchilfflich gewesen, doch nach etlicher vergangen zeit eins nachtes
 10 sich begab daz die güt frawe mit dem faden ander zechen entslaffen was vnd der man seine füsse vnd peine von im strecket vnd sich in den faden verwickelt mit den henden greyff waz der meinete vnd in an des weibes grosse zechen gepunden fande in fremd daucht, im nichtz gütz gedacht zü im selbes sprache do er den faden über das fenster auß gen
 15 vernam, fürwar das sol ein grosse püberey seinn, die mein weybe sol zügericht haben, vnd den faden pald dem weyb ab der zechen nam vnd den im an die seinen pant zü besechen was der faden von der zechen von dem fenster aus [257^c] bedeüten wölt. Do er daz gethon hett nicht lang verging Das der iunge der frawen puele kam den faden nach seiner
 20 gewonheit begonde zü ziehen. Des der frawen man palde enpfande vnd den faden nicht gar wol gepündten het dann in dem do Ruberto zohe der faden Ariguczo von der zechen fure vnd Ruberto in die hende ginge, do pey er nit anders vernemen mocht dann das er der frawen wartenn sölt vnd also thet, Ariguczo schnelle auff stunde ein güt swert zü seinen
 25 henden nam zü der haußtüre auß sprange zü besechenn wer der gesein mochte der im den faden ab der zechen gezogen het. Nun wie wol er ein kauffman was so was er doch dapey ein starcke vnd freydig man Do er an die türe kam die nitt als die frawe gemelich auff thet Sunder mit etlicher romore auff warffe, do pey Rubert vernam das es nicht die
 30 frawe gesein mocht im wol gedacht es Ariguczo were, vnnd so er pest mochte angub ze flichen vnd Arigucz mit plossem waffen im nachvolget, vnd do er sache das Ariguczo seines laufens nicht nachliesse, vnd er der sich auch wol gewapent vernam sich gen Ariguczo ke[257^d]ret vnd auch zü seiner were greyffe vnd nicht minder Arigucz als Ariguczo sein
 35 begert In dem die frau erbachet ir den faden ab der zechen gesnyten fande die kamern vnd daz hauß offen fande, wol vernam ir püberey entdeckt wer vnd wie ir man dem iungen nachgeloffen wer ir wol gedacht palde auf stunde irer meyde rüffet der alle sache der frawen kunt waz,

die sie also sere pat mit grossem verheissen überredet, das sy sich an
 ir stat in das pette leget in forme als ob sy die frawe wer, mer die frawe
 sy pate vmd ir befallhe wenn Ariguczo wider kem daz sy was er mit ir
 beginge gedültiglick vnerkante lide, es wer mit schlachen oder stossen
 5 Darumb wölt sy ir ein genügen tun, Des die güte meyt alles willig was
 sich an der frawen stat in das pet leget, Die frawe das liecht abschlecht
 auß der kamern ging sich in dem hauß verparge ze warten wenn der
 man wider kem wes er doch beginnen wölte Nun was das romore vnd
 geschrey czwischen Rubert vnd Arriguczo also grosse das die gancz nach-
 10 perschaft darzü geloffen kome in peydenn übel retten, vnd domit weder
 einer noch ander erkant würde [258^a] sich zertücke zogen vnd Ariguczo
 mit grossem czorn sich wider zü hauß füget in sein kamern ginge an-
 hube vnd sprache, wo pistu du zenichtes pöses falsches weybe du solt es
 keinem priester peichten ich soll dir selbes die pusse geben, du hast das
 15 liecht geleschet das ich dich nicht seche noch find Es wird sich werlich
 anders machen, vnd palde auff das pette sprange, die meyt nam die er
 meinert es das weybe wer, vnd waz er mit schlachen vnd stossen auß
 den henden vnd füssen pringen mocht er prauchet, Die güten meyt also
 züricht das sie mer einem teüffel dann einem weybe geleich was, vnd zü
 20 dem lesten lone ir das hare ab dem haupt schneyde, die meyt weynent
 ir leyte klaget als die da güte vrsache hette sich ze klagen zü zeiten
 genad begeret durch gotz willenn, Aber ir stymme vnd rede vmb des
 herten weinen willen auch Ariguczo grosser czorn vrsache gab daz er ir
 nye erkant, ob es dez weybes oder der meyte stymme waz Darumb mit
 25 heiligen vrsachen sy gar wol slahen vnd ir daz hare abe sneiden mocht,
 vnd nach sölichem güten schlagen Er zü ir sprach Nun wollan [258^b] du
 ze nichts weyb, nun sol ich deinen leybe nymmer mere beschlaffen vnd
 wil nach deinen prüdern gen in dein tugent zü wissen thon vnd dich mit
 in zü hause schicken, dann für ware in meinem hauß solt du nicht mer
 30 wonenn, Also geret weg auß der kamern ginge, die tür aussen gar wol
 verrigelt vnd zü der frawen prüder ginge, vnd als palde frawe Symona
 vernam das der man auß dem hauß waz, die alle sache gar eben ge-
 sehen vnd vernomen het pald zü der meyt in die kamern kam das licht
 czündet, Die sy alle zepleüte vnd zü slagen fande, Sy so sie pest mocht
 35 tröstet vnd auß der kamern name in die iren füret mit allem vleiß warten
 thet, des die meyt wol zefrid waz; Nach dem die frawe in ir kamern
 wider ginge das pette schöne machet, als ob auf die selben nacht noch
 kein mensche darine gelegen wer sich selbes sauber wider anleget in

geleichem form als ob sy noch nit were zû pett gangen, liechte vnd
 lucern an czündet nach dem sy an die stiegen seczet anhub ze näen vnd
 warten wenn der man wider keme was sich doch begeben würde. Nun
 als ir vernomen [258^c] habt wie Ariguczo so er peldest mocht zû des
 5 weybes pröder ginge also lange an der heüser klopfet das er gehört
 vnd im auf gethon ward Der frawen pröder der do drey waren mit sampt
 ir müter do sy vernamen das Ariguczo da was alle auffstunden zû im
 kamen vnd fragten was vrsache in zû der zeit in der nacht allein vmb
 die wege ze gen machet Ariguczo alle sache was sich verlossen het saget,
 10 vnd wie er den faden an des weybes zechen gepunden funden het vnd
 wie er den selben an seine gepunden het, vnd wie der faden zû dem
 fenster auß ginge alles was sich ergangen hett in ze wissen thet, vnd zû
 mer gezeügnuß des das er getun het, vnd das das ware were in das hare
 zeyget daz er meynet dem weybe ab gesnytten het, das in in ir hende
 15 gabe, Darnach zû in sprach das sy nach ir kemen dann er wolt ir in
 keinen weg mere in dem hause sechen, vnd mit ir theten des sy meinten ere
 ze haben, Der frawenn pröder on masse czornig des das sy von der swester
 vernomen hetten das für ware gelaubten als in Ariguczo gesaget het, in
 grossen czorn vnd vnmute wider [258^d] die swester enzünt in liecht
 20 vnd sackeln komen schuffen mit Ariguczo ze hause gingen In meinung
 der swester einen pösen dienste ze thon, Den ir muter weinent nach-
 volget die süne freuntlich pate das sie sich an der swester nit vergech-
 ten vor sy auch vernemen wolten vnd Ariguczo nicht so palde gelaubten,
 dann er möchte villeicht vmb anders willen mit ir zornig sein, vnd ir
 25 vnzucht beweist haben, vnd sich nun mit disem vnerlichen sachen wölte
 darauß redenn Mer sprach die alte gû müter es nem sy ein fremde
 sache vnd nicht müglich were dann sy ir tochter wol erkennet vnd von
 iugent auf erzogen het; In sölichem reden die pröder in der swester
 hauß kamen über die stiegen auf gingen, Daz frawe Sigismunda palde
 30 vernam vnd fraget wer da were; Der einer von den prödern antwort
 vnd sprach, daz solt du palde sechen du pöses weyb wer da ist; waz
 bedeüt das, so helffe vns got sprach die frawe, palde auff von irem
 näen stunde vnd sprach ir lieben pröder nun seyt mir gott wilkomen?
 was get ir suchen zû diser stunde in der nachtt, [259^a] Do die pröder
 35 sy also näenn vnd in keynerley betrübt funden, sunder in iren ange-
 sicht frische vnd frölich vnuerwunt sachen keinerley slege noch stöß
 an ir geprüffen noch gesechen mochten nach dem in Ariguczo hat ge-
 saget vnd zû versten gebenn wie er sy alle durchslagen vnd pleüt hette

in form das sy in irem angesicht keinem menschen geleichet, des sy sich in dem erstenn zů ir kamen wunder namen vnd sich in irem zorn mesigttten vnd den temperirten, vnd sy mit grossem troen fragten was die vrsach were das ir man so schwer über sy klaget Die frawe in ant-
 5 wort vnd sprach; Lieben pröder das ist mir ein fremde sache, do von weyß ich euch nicht zů sagen noch wes sich Ariguczo gen euch von mir beklagen mage In sölchen iren reden Ariguczo sy ernstlich ansache vnd bedencken ward das er ir in dem pette nicht lange wazpey tausent maulstreichn geben het vnnd das angesicht alles zůkraczt hette. vnd des
 10 kein zeichen an ir iczund seche in gar fremde nam In dem die pröder anhuben vnd ir sagtenn wez sich Ariguczo ob ir gekla[259^b]get het als des faden halben vnnd er dem ~~der~~ an die rüre kame vnd den faden an sich zoche nachgeloffen were, vnd wie er sy darnach in dem pette mit schlahen vnd stossen außgericht het Die frawe sich sölcher sache fremde
 15 beweyset, sich gen dem man keret zů im sprach; Nun awe mein lieber man? was ist das das ich da höre? warymb tust du das, mich zů einem pösen weybe zů machen ich hab es vmb dich nicht verschult, Es wer einem herten man der du nicht enepist genůg ein sölches zů thon, Nun wenn pist du auf dise nacht mer in disem hauß gewesen pey mir; Nun
 20 wenn hast du mich heynt ye geslagen oder nür ein wenig pöser wort gebenn; Zů der Ariguczo sprach Ey du falsches weybe? gingen wir nechten nitt miteinander schlaffen; kame ich nicht wider zů disem hause, do ich deinem lieben puelen der den faden vnter dem fenster zoch, dem ich nach geloffen was; gabe ich dir nicht den lone mit gůten schlegen
 25 Schneyde ich dir nicht das hare vnd deine czöpfle abe, Die frawe sprach, man got geb dir vernunft vnd verstantnůß [259^c] In disem hauß hastu dich in diser nacht zů pette geleet, Doch lasse wir daz alles sten du sprechest allzeit ia vnd ich neyn, so kan ich dir nicht ander gezeugnůß noch die pesser geben dann als du selbes sprichest, seche wir nun ob
 30 das war sey als du für geben hast du habest mich geschlagenn, vnd mir mein hare ab gesnyten, so sprich ich du sagest nit ware vnd hast mich weder geschlagen noch gestossen noch mir mein hare abe gesnyten hast. Nun siche vnd suche ob du indert zeichen an meinem leybe findest deiner schlege, Noch wölt dir raten das du so beherczent werest mich zů schla-
 35 chen noch dein hant an mich zů legen, Dann pey dem waren got ich solt dir selbes den tode thun, Nun laß mich besechen ob ich mein hare noch habe oder ob du mir es abgesnytten habest, den schleyer palde an dem haupt reysse vnd ir schönes hare sechenn liesse, Do das ire pröder

mit sampt ir muter sachenn, mitt grossem czorn sich wider Ariguczo kerten zů im sprachenn Ariguczo wir wern nudalest von dir sagenn als du von ir gesaget hast, Dan im ist nitt als du vns hast zů versteen [259^a] geben; Ariguczo als ein stum stunde nicht west was er reden
5 solt, dann wol sache vnnnd erkante alles das er gesaget het sich nicht also erfand vmb des willen stille sweyg nicht antwort, Die frawe sich gen iren prűdern keret Zů in sprach lieben prűder ich sich woll mein man suchen get daz ich das thue, des ich zethon nye willen hette vnd nicht gelassen mage ich muů euch sein grosse poůheit ze wissen thon
10 vnd fůrwar meine vnd gelaube was er euch von mir gesaget hat im das zůgestanden sey. Nun nemet ware dez pidermannes dem ir mich des teűfels nam zů einem weyb geben habt, der ein kaufman sein will vnd messiger dann ein eynsidel sein sůlte gar wenig nechte vergen daz er mit andern zů nichten weybenn von einer tafern zů der andern gee sich
15 mit in in seiner trunckenheit vermische vnd mich armes elendes weyb piů auf mitte nacht als ir mich dan iczund funden habt siczen lasset, Darumb mir nicht czweyfelt, do er truncken gewesen ist daz er sich zů etlicher seiner pűbin gelegt hat, den er den vorgeanten faden an der zehen gepunden funden hat, vnd do [260^a] er von dem wein vnd
20 schlaffe erbacht ist die freydikeit als er euch gesagt hat getriben hat darnach sy geschlagen vnd ir das hare abgesnythen hatt, vnd pey im selbes nicht wol gewesen ist; Darumb er meinte des mir nicht czweyfelt er hab mir das gethon, das er seiner pűbin gethon hat, vnd nemt ir recht war seines gesichtes so secht ir das er noch mer dann halber
25 truncken ist, Darumb was er euch von mir gesagt hat will ich nicht das ir das anders von im nemet dann als von einem truncken man, vnd als ich im vergibe will ich daz ir im auch vergebet; Do das der frawenn alte muter vernam anhubere romorisch ze sein, vnd sprach pey dem kreucze gotz tochter das sol man nicht thon man sol den půsen truncken
30 hunt tůten, Dann er sůlcher meiner tochter als du pist zů einem weybe zů haben nye wirdig was, Es wer genug das er vns gethon hat, hett er dich in dem kote funden Das in got schende an sele vnd an leybe das er dich also vnseligen sol der vnnůtze esel der von dem dorffe komen ist mit den hosen auf őr das knye gepunden so sy drey schiligen
35 pfennig haben so wůllen sy teűfels [260^b] namen edel sein vnd edel lėtte kinder zů weyben habenn vnd wapen nemen vnd sprechen ich vnd meine freűnde vonn sůlchem wasser sein, Ich hett wol gern gesechen das mein sűne als sy dann wol thon mochten dich grafen Guido mitt

einem stücke prot verheyern mochten aber meinem rate nye folgen wolten dich ee in disen zů nichten esel stecken wolten das sünde vnnd schande ist, dann du die peste vnd paß gepornest tochter pist diser stat vnd er will sich nit schamen dich zů mitternacht in seiner trunckenheit
 5 zu einer huren zů machen, zů gleicher weyß als wir dich nicht kenten; werlich werlich gelaubet man mir man gebe im des kirchtages er gedeht daran die weyle er lebet, sich zů den sünden keret vnd sprach; Saget ich euch nicht das es nicht gesein mochte, vernemt ir mich wie euer swager eier swester mittfert, Der kaufman von dreyen pfenning
 10 für ware were ich nun zemale ein man als ich ein weyb pin, vnd het er zů mir geret, als er zů euch von eier swester gethon hat, ich besorge ich würde in ab der erden richten, Vnd nyemant anders das zů thon das nun vergünnen wölt dann mir allein [260^c] Do die iungen gesellen ir müter also hefftig sachen sich alle wider Ariguczo seczten, im übler
 15 vnd erger zů retten dann pösem man ye gethon ward Doch ze leste zů im sprachen wir wöllen dir das vergeben als einem truncken vnd vnuer-nünftigen man, vnd hinfür wisse dich vor sölchen sachen ze hüten das vns sölches nicht mer für kome weder von dir noch andern anders wir bezalen dich eins vnd anders da wisse dich nach zerichten mit disen
 20 Worten von dannen schieden, Ariguczo als ein narre beleyb selbes nit west was er getun het noch ob es war were oder ob im getraumet hett, on keynerley geret hinfür sein weybe mit fride liesse die da nicht alleine mit irer listickeit floche vnd grossem vnglücke entginge, sunder ir ein freyen wege machet, Damit sy hinfür on minder sorg des mans pas iren
 25 willen vnd gefallen ein genügenn thon mocht.

Fraw Lidia Nicostrato weyb het einen iungen lieb mit namen genant Pietro der an sy dreü dinge begern ist, Die sie im zů liebe alle thut über das gegenwürtig Nicostrato mit Pietro schimpffet vnd scherz [260^d] vnd im zů versten geyt es sey nicht ware das er da
 30 gesehen habe.

Der edeln frawen Neyphile neue fabel die frawenn alle thet lachen machen Dovon ze reden nicht enthalten mochten so grosses gefallen daran hetten, das Sigismunda iren man also zůbereyt het In dem der künig zů sweigen gepot zů Pamphilo sprach er die seinen histori hören
 35 ließ Der also sprach Lieben frawe ich gelaube daz kein ding sey wie wol vil ding sein die da schwere vnd besorglich sein! Daz der der da

recht lieb hat die nicht thue vnd verpring vnd wie wol ein söliches in der gesagten histori vil dicke ist beweist worden, Doch darumb ich nicht gelassen mage, auch der eine sagen musse, Do ir von einer frawen vernemen stült; In der wercke das gelücke ir grossen peystant thet vnd ir
 5 mer gehilfflicher was dann pillich vnd mütlich waz Darumb ich keiner rat daz sy nach volge den fustappen dez von dem ich sagen mein, dann das gelücke nit alweg eins syns oder meinung geschickt ist, dann gemeinlichen in aller diser welt die manne sich zů mer malen des betragen; [261^a] vnd erplent finden, Darumb stült ir wissen das in der stat
 10 Nargho die in krichischen landen gelegen ist, von grössern lobe dann mechtig, in der wonet ein güt edel man der waz mit namen genant Nicostrato, dem in seinem alter daz gelücke ein edeles weyb geben het nicht minder beherczendt vnd von grossem gemüt als schöne, die was mit namen genant Lidia; Nun hielt Nicostrato stäcz als dann
 15 edler hern gewonheit ist vil hunt sperber habich vnd falcken zů iagen vnd peysen, grosse freude seines iagen vnd vogeln im nam; Der het vnder andern seinen dienern gar ein sauber geraden schönen iungen von leyb vnd anplick; der waz genant Petro dem Nicostrato ob allen seinen dienern liebe truge vnd besunder getrauen zů im bett, Zů
 20 dem frawe Lidia grosse liebe gewan vnd on masse zů im in liebe entzündet, weder tag noch nacht an keinerley anders gedencken mocht dann alleine an in, von sölicher liebe Petro nit west noch ir war genommen het oder villeicht nicht wolte ye des gleichen tet als ob er ir nit acht hette; Des sich die frawe on masse betrübet, ir gancz fürnam im
 25 ir liebe die sie im truge zů [261^b] wissen thon, vnd irer kamer meyd eine zů ir rüffet die waz genant Lusqua zů der sy besunder getrauen het, zů ir sprach Lusqua die dienst die du von mir empfangen hast dich mir stülen vntertenig vnd gehorsam machen, Darumb nym war was ich dir sage vnd merck gar eben das do von ich dir sagen will kein menche
 30 der welt als liebe dir das leben ist von dir icht verneme; außgenommen der allein der, zů dem du von meinen wegen gen wirst Lusqua sprach mein liebe dierne als dir wol wissent ist daz ich ein iunges weyb pin vnd zů güter maß hab wes mein hercz begert, auß genomenn eins des ich wider meinen willen vil dicke enpern muß, vnd des weder vmb gelt
 35 noch golde gekauften mage; Des vrsache ist, das alter vnd vil iare meines mannes, das ist das, des die iungen frawen am meisten begern sein, vnd do von ir gröste freude nemen, des selben ich mer dann kein ander iunge frawe mangel hab vnd doch ye als die andern sölicher

fretide vnd lust von herczenn begern pin; Es ist lang zeyt daz ich mir
fürnam, seytmale mir das gelück nicht als ein fretint, Sunder als ein
feint einen alten man beschert hett [261^c] Ich mich selbes meinem
willen ein genügen zethon mit einem iungen versechen wölt; Nun hab
5 ich mir einen erwelte den ich mein wirdiger schacz dann keinen an-
dern, das ist vnser Pietro meines mans diener mit des fretintschafft
ich meinem willen mein ein genügen ze thon zû dem ich so grosse
liebe hab vnd in inprünstiger liebe gen im enczündet pin, in sölcher
masse wo ich mich in kürze nicht pey im finde, Ich besorg vnd ge-
10 laube des sterben müsse; Darumb Lusqua liebe freündin hastu mich
liebe als du dann alweg gesprochen hast, so tue gedenck vnd prauch
durch die weg die dich am pesten düncken im mein liebe ze wissen ze
thon, vnd pit in von meinen wegen, im liebe zû mir ze komen wenn du
im rüffest vnd nach im komest. Die meyt zû der frawen sprach sy wölt
15 gern tun waz ir lieb were, mit disen worten von ir schiede, vnd do sie
zeit daucht 'dem iungen auf ein ort rüffet vnd im so sy pest mocht irer
frawen potschafft warbe Do das der iung vernam in gar fremde daucht,
als der sich von der frawen eins söllichen in keinen weg versechen het
Darumb besorget die frawe wölt in villeicht versuchenn, [261^d] vnd
20 der meyt antwort vnd sprache. Lusqua ich kan nit glauben das die
wort meiner frawen wort wol sein mügen Darumb sich was du sagest,
vnd wenn sy nun ye von ir kemen, so kan ich hoch nicht glauben
das dich daz mein frawe mit stetem gemüt vnd ganzem ernst reden
thon schaffe, vnd wenn nun das mein frawe mit gutem synne vnd ernst-
25 lichem herzen sprech, so pin ich meinem hern vmb der empfangen dinst
willen von im pflichtig vnd verpunden wider sein ere nicht ze thon,
darumb sölcher sache halbenn bedarfft du nit mer zû mir komen, dann
vmb mein leben ich wider meinen hern nicht thete Vmb sölcher seiner
antwort Lusqua nicht erschracke noch nach liesse ires reden zû im
30 sprach Pietro daz vnd anders waz mir mein fraw gepeüt es sey dir liebe
oder leyt dir ze sagen Ich sol es thon vnd das als oft als es ir gefallen
ist, aber du pist ein eynfeltig tier vnd dem schaffe geleich, sich eins mit
dem iungen betrübet seiner antwort, wider zû der frawen ging Do die
fraw dez iungen red vnd meinung vernam von vnmüte vnd leyt schier
35 tod were vnd nach etlichem vergangen tage die meyt wider zû dem
[262^a] iungen sante Zû ir sprach Lusqua du weist wol das der paume
von dem ersten schlage nit felt, Darumb wer mein syn vnd meinung
du gingest wider zû dem der mich bedüncket meines mans zû getreter

- diener sein wölle, darzü nym dir zeyt vnd thue im die inprünstigen
 liebe meines herczen zů wissen, vnd gancz fleyssig dich der wort do
 mit ich zů den wercken kome, vnd meinem willen ein genügen tun
 müge, Dann sölt ich fallen lassen das ich iczund angefangenn hab, mir
 5 czweyfelt nicht ich müst sein sterben vnd er würde meinen vnd glauben
 ich het in versuchen wöllen, wo ich sein hulde vnd liebe suchen gee,
 Darnach im leyt neyde vnd hasse gen mir volgen würde. Die meyt ir
 frawen iren willen tröstet palde den iungen zů dem andern male suchen
 ginge, Den sy an füglichem ende frölich geschicket fande Zů dem sy
 10 sprache Pietro ich thet dir zů wissen des wenig tage vergangen sein in
 was grosser prunst der liebe gen dir vnser frawe ist, vnd nun von
 neuem ich dir des ein eygenschaft pring, wo du dich dez vordern tags
 in hertikeit gen ir beweysest vnd was ich saget mir nicht glauben
 wolt[262^b]est, so sage ich dir iczunde zů hulde vnd liebe gancz auß
 15 grunt ires herczen zů vnnd pis gewiß wüstu ir nit ze willen des sy an
 dich begern ist, daz sie nicht lange lebet; Darumb pit ich dich freünt-
 lich du wöllest sy gewern vnd sy mit deiner hulde trösten vnd ir ze
 liebe wern, wo du aber in deiner hertikeit ste beleybest für ware ich
 dich für den grösten tron halte den ich ye mer gesache, Das dich also
 20 ein grosse edele schöne frawe, da pey reich vnd mechtig ob allenn
 andern mannen lieb hat deiner hulde begeret vnd du ir kein genade
 haben wilt, werlichen es wirt dich gereüen, Aber bedechst du wie dir
 das gelücke so willig ist vnd dir ein sölche edele frawen der du nit
 wirdig pist zů deinem willen in deiner iugent bereyt hat, vnnd die dir
 25 ein ewige hilffe in deiner armüt sein wirt wer wirt der deines gleichen
 sein der paß dann du mit deinen freüden sten wirst wiltu anders weyß
 sein vnd meinem rate folgen. wer wirt seliger sein dann du welcher
 wirt zů rosse in wapen gelt golt vnd güt der sein der paß sten mügen
 dann du sten wirst, wiltu anders dein huld der frauen geben, die dich ir
 30 ob allen mannen [262^c] für iren liebhalter erwelt hat Darumb vernim
 mich gar eben! bedenck dich kome zů dir selbes, vnd wisse das, daz
 gelücke dem menschen nit mer dann ein male mit offem frölichen an-
 plicke entgegen komet, vnd der ist weyße der es zů sölcher zeit nemen
 vnd erkennen kan, Als ich besorge lestu dir daz iczund entgen es wer
 35 dir nymmer mere so güt, Du wirst hin für nicht vrsach haben über das
 gelücke, sunder über dich selbes ze klagen; Darumb ist nicht not noch
 yemant darzü beczwungen; sölche trewe czwischen dienern vnd hern
 zů halten als man vnter andern güten gүнern vnd freunden thon sol,

Sonder alle hern diener in solchen sachen ir vleiß thon zû dem zeko-
 men des dich vnser frawe andich begeren ist, als dann vil dicke die hern
 den dienern thon zûsehen vnd schweigen müssen, gelaubstu hettest du
 ein schön weyb swester oder tochter die deinem hern Nicostrato liebet,
 5 das er solche trewe als du sprichst er gen dir suchen ginge als du tust
 für war neyn er, vnd du werest ein eynfeltig man das zegelauben; Aber
 gelaube mir wo sein frentlich piten nitt hülffe do würd er seinen ge-
 [262^d]walt prauchen; Darumb wir wol mit den iren dingen thon müge
 als sie mit den vnsern thon dann was in möglich zethon ist, auch das
 10 vns möglich sein sol; darumb nym das dir von dem gelücke bereyt ist
 vnd schlache das nicht von dir sunder dem entgegen kom, sein gabe
 empfahe, tust du daz nicht; lasse wir sten daz du nit alleine der edeln
 schönen frawen ir leben on czweyfel nymest, sunder auch dich so dicke
 gerethen wirt das du dir selbes den tode thon wirst; mit dem die meyt
 15 ir rede endet, vnd Petro nach langem zehören der frawen wort be-
 dencken ward nach dem er von der meyt Lusqua vernomen hett, Im
 gancz für nam sich zû der frawen willen schicken, wol erkante das er
 von der frawen nicht versucht waz sunder in mit ganczen teiden meinet,
 Der meyt antwort vnd zû ir sprach Lusqua waz du mir gesaget hast ich
 20 wol erkenne daz es ware ist aber wider meinen hern zethon mir swere
 ist Dann sein kluge weyßheit erkenne, dann alle seine gescheffte vnder
 meinen henden habe Darum mir gar vnfüglichen ist wider zetûn, auch
 do pey besorg daz frau Lidia ein solche mitt mit seinem willen tû mich
 ze versuchen [263^a] doch wo mir vnser fraw dreü ding tûn will der ich
 25 begeren bin, so bin ich willig zetûn ir gefallen, vnd keyn ding sol mir
 zeschwäre sein ir zeliab daz ich das nicht thû, vnd dieselben dreü
 ding der ich begern bin das sein die, von erst will ich das sy Nycostrato
 bestenn sperber nâme vnnd zû gesicht seiner augen den töde. Das an-
 der ist das sy mir eyn gûten lock hares auß Nicostrato part geb. Das
 30 dritt den besten zan auß seinem mund das werden die ding sein die
 mir ein eygenschaft meiner frawen huld beczeychen werden, eyn soliches
 zethûn die meyd schwär vnd vnmüglich daucht vnnd die edeln frawen noch
 schwärer. aber die liebe die do der verirrtten eyn lerer ratgeber vnd tröster
 ist, der edeln frawen balde eingab das zeverbringen des der hert iung
 35 an sy begeren was, im bei der meyd empote alles das er begeret sy on
 allen czweifel vollkommenlichen im zeliab verbringen wölt, mer im empote
 sy mit im gegenwirtig Nicostrato schympfen vnnd der liebe spilen wölt
 vnnd Nycostrato wölt gelauben machen im wäre nicht also. Nach allen

disen verlaufen Worten der iunge warten waz waz doch die schön
 [263^b] fraw thûn wölt. Die nach etlichem vergangen tag etlichen edeln
 leuten ein köstlich mal zû bereyten thet als dann vil ir gewonheyt was
 czethûn, vnd nach dem do man geessen hete vnd die tisch abgedeckt
 5 waren, die fraw in eynen grünen seiden rock gekleidet waz von dem
 tisch aufstünd gen der stangen werz gieng darauf Nicostrato sperber
 stünde, vnd gegenwirtig Nicostrato aller herren vnd Pietro irem lieben
 bûlen den sperber ab der stangen nam vnnd mit dem gefaß vmb die
 mauren schlug vnd tötet. Do das Nicostrato ersahe zû ir lautt schrey.
 10 Awe weib was thûst du wes zeihst du meinen gûten sperber Dem sy
 keyn antwort gab, vnd sich gen den edeln herrn keret die noch an der
 tafel sassen zû in sprach. Lieben herrn wie räche ich mich wider eynen
 künig wenn ich von dem widerdrieff empfangen hete, wenn ich nicht so
 beherczend wäre mich an eynem sperber czerechen. Ir solt wissen das
 15 mir diser vogel all zeit nymet das mir von meinem mann in liebe lust
 vnd freuden solte verlihen gewesen sein daz mir manchmal genomen hat
 vnd mich des enbern machen, dann alsobald der morgen komen [263^c] ist
 Nicostrato von mir aufstet so ich in geren bey mir haben wölt vnd mit
 seinem sperber auß vogeln reytt den zefliegen sehen, vnnd ich die ir do
 20 secht alleyn übel zemût in dem pet beleib, vmb des willen ich zû mer
 malen hab müt gehabt zetûn das ich yetzund getan hab. Aber warumb
 ich das verzogen hab das ist das ich es gegenwirtig erber leut als ir seit
 hab tûn wöllen, domit erkent werde was ich getan hab das mit recht
 vnd nicht vnrecht hab tûn mügen. die edeln herren der frawen rede
 25 vernamen fürwar gelaubten als sy gesprochen hete ir syne vnnd mey-
 nung den Worten geleihe wären alle sprachen, Sy het wol vnd recht
 getan sich an dem sperber zerechen; vnd mit vil andern zornigen Wor-
 ten die fraw in ir kamer gieng. Die herren Nicostrato zoren vmb des
 sperbers willen in freud vnnd lachen kerten. Pieter der do gesehen het
 30 waz die fraw gethan het, zû im selbes sprach. Einen grossen anfang hat
 mein frawe gethan irer sâligen liebe die sy mir geben hat got wöll das
 sy dem andern meinem begern auch also nachkom vnd beständig in irer
 fürsaczung sey. Do nun die fraw Lidia des iungen er[263^d]stes gepot
 verbracht vnd den sperber getödt het, nicht lang nach dem vergieng sy
 35 sich alleyn bei Nicostrato in der kamern fande mit im anhub ze schym-
 pffen vnnd das ander gepote ze verbringen, in solichem schercken Nico-
 strato sy bei dem hare zoch dobei ir die fraw gedacht daz ir eyn vrsach
 sein würde das ander gepot ze verbringen des sy sich eyn klein doch in

schimpfes form betrübet vnnd nach etlichem küssen vnd halsen im in den part fiele vnd im eyn grossen lock hares darauß raufet des sich Nicostrato sere gen ir klaget, sy czû im sprach. Ey wie thûst du so kläglich vmb sex härlin die ich dir auß dem part gezogen hab nun enpfandest du doch yeczund sein nicht do du mich bei meinem hare zohest. Also die fraw was sy gethan het in kurzweile vnnd schympff zoch vnnd den lock hares mit grossem vleiß bewaret vnnd in des selben tages dem iungen irem allerliebsten Pietro schicket. Nun der dritten sach halbenn der frawen mancherley gedanck zûstûnden als dem man den besten zan außzubrechen. Aber sy als die von subteiler meysterschaften von der liebe gemeystert was, sich balde bedachte das [264^a] dritt gepot das der iunge begert auch ze verbringen vnd zû end fügen so sy erst möcht Nun het Nicostrato zwen iung knaben die im von ire vatter waren gegeben worden, domit sy bei im zuchte vnd gûtt sytten lerneten, vnnd wenn Nicostrato czû tisch saß, so schneyd im der eyn für, vnd der ander schencket im den wein vnd gab im trincken. Eyns tages die frawe den zweyen knaben czû ir ruffet vnd in ze verstecken gab, wie Nicostrato sein atem so gar starck schmecket vnnd sein mund stunck vnd meystert sy wenn sy im zû tisch dienten das sy daz haubt vnd ir angesicht von im kerten, aber das keynem menschen sagten noch zewissen thäten Die iungen beyd der frawen gelaubten vnd als sy die fraw gelert het theten, vnnd nach etlichem tage die fraw zû Nicostrato sprach Hast du wargenomen was dein iung diener thûn wenn sy dir dienen Ja weib ich hab wol darauf gemercket vnnd hab oft in willen gehabt des zefragen, warum sy das thûn. Do sprach die frawe des solt du nit tûn ich kan dir daz selbes wol sagen vnd hab dir das lange verschwigen dich nicht zebetrûben. aber seitmal das ander [264^b] personen gemercket haben so will ich dir es nit lenger verschweigen, dir schmecket dein mund in solcher maß das es nicht zesagen ist, vnd nach dem ich gelaube so bekomet es dir von nicht anders dann alleyn von eynem bösen faulen czan den du in dem munde haben solt ander vrsach ich nicht bedencken kan. dann dir ye nit lang also geschmeckt hat vnd ist gar eyn verdrossenlich ding so du mit erbern edeln leuten wonest, darumb bei zeit man das versehen solt e sich ergers begäb. Do sprach Nicostrato, Nun was mag nun solches geschmacks vrsach sein es möcht vileichte gar wol sein als du sprichst eyn böses czan vnd in zû dem fenster fûret vnd den mund auf thûn thet vnnd do sy alle ende gar wol durchsehen het zû im sprach. Awe Nicostrato nun wie hast du daz so lang vertragen vnnd erleiden

mügen nun nymet mich nit wunder ob dir dein mund schmecket, dann du hast eyn zan darinn der mich nit alleyn bös duncket, sunder aller
5 faul vnd verdorben vnd heltest du in lang in dem munde er sol dir alle
ander zän verderben, darumb sprich ich vnd rat dir du lassest in auß-
brechen e eyn solches von dir weitter gesagt [264^c] werd. Nicostrato
sprach. seitmal es dich geduncket so ist es auch mein gefallen schick
nun bald nach eynem meyster der mir den zan außbrech, czû dem die
fraw sprach. Des wöll got nit das eyn meyster vmb des willen hercome,
dann ich sihe in in maß sten das ich in selbs on den wol außbrechen
10 will, auch solich meyster mit irem außbrechen solich dinst zethûn allweg
gern hert vnd häftig sein das ich es in meinem herczen nit erleiden mag
dich in in ir hend zegeben darumb ich es selbs thûn will, vnnnd ob es dir
zewee thât so mag ich allweg ablassen des sein die meyster nicht ge-
wonet zethûn, vnd bald komen schüff eisen vnnnd zeüg zû solicher arbeyt,
15 vnd yederman auß der kamern von ir schicket außgenommen die meyde
Lusqua die bey ir behielt die kameren wol versperrt vnd Nicostrato auf
eynen stûl seczet vnd im eyn zangen in den mund tet. der besten zâne
eynen domit name, vnnnd wie wol er sere schrey im den mit gewalt auß
dem mund reyß bald verbarg vnnnd eynen bösen zan den sy bei ir ver-
20 borgen het den man czeyget vnd in sein hand gab zû im sprach. Nym
war was zan du in deinem mund also [264^d] lang getragen hast des er
alles gelaubet, vnd wie wol es im eyn grosse peine gewesen was, doch
do er in auß dem munde sahe sich gesund sein daucht die fraw in bald
labet vnd tröstet, vnd do die peine eyn kleyn nachgelassen hete, die
25 fraw auß der kamern ging vnd den zan bald dem iungen schicket der ir
liebe vnd huld nun on zweifel erkant sich zû allem irem willen erpot.
aber die fraw im noch mer irer liebe on sorg wolt ein eigenschaft geben,
dann eyn stund sy tausent stund daucht sich bey im zefinden, zesehen
ob er ir halten wölt das er ir versprochen het vnd des gleichen tet als
30 ob sy kranck wär Nycostrato die frawen zusehen Pietro czû im name in
der frawen kamern gienge die frawen czetrösten die sich sere klaget
vnnnd übel sten daucht, vnnnd do sy nyemand anders dann die zwen bei
ir sahe vnd czeit daucht iren willen mit Pietro cze verbringen sy beyde
batt das sy ir in den garten hulfen zebesehen ob sich ir pein vnd
35 schmerzen eyn kleyn ringern wölt, des sy beyde willig warn namen
vnd in den garten fürten vnder eynen bierenbaume auff eynen grünen
wasenn nyder seczten Nicostrato eyn wenig [265^a] in dem garten spaczi-
ren ging in dem die fraw Pietro vnderricht het was er tûn solt, vnd do

Nicostrato widerkam sich zů ir auf das grün gras nyder seczet, die fraw anhub vnd sprach. Pietro ich hab grossen lust vnd begire der bieren auf dem baum thů als wol vnd steig darauf vnd wierff mir ir etliche herab, des sich Pietro nicht saumet balde auff den baum steyge vnd der
 5 bieren herab warff in dem anhub vnd sprach. Awe herr was tůt ir vnd mein frawe schamet ir euch beyde nit gegenwirtige mein zetůn das ir tůt ist euch hauß vnd hof zeeng oder gelaubt ir das ich blind sey, ich red mit euch fraw, nun wart ir yeczund also kranck das ich euch tragen vnd fůren můß wie seit ir nun so bald gesund worden zethůn das ir do
 10 tůt aber seitmal ir ye eyn solichs tůn woltent wāren euch eůer schön kamern zeferre darein zegeen vnd soliche vnzucht nicht mir zů gesicht tůn. Do die fraw Pietro also reden vernam sich gen dem man keret vnd sprach. Was saget Pietro vernymest du sein reden traumet im, oder thut er des gleichen, traun neyn sprach Pietro mir traumet gar nicht,
 15 wie meint ir das ich euch nit [265^b] sehe es griffe eyn blinder bey mitternacht das ich do sage, vnd ir wölt mich zů mittentage blind machen vnd meynet ich sehe eůer vnzucht nit. Sůliche wort Nicostrato sere fremd namen czů dem iungen auf dem baum sprach. Pietro ich laß mich fürwar beduncken dir traume oder du seyest nicht bei synnen, dem
 20 Pietro antwurte vnd sprach. Herr mir traumt gar nicht des selben gleichen euch nicht thůt ir růrt den hindern in solcher maß tāt der bierenbaum also es belib keyn bier darauf. die fraw zů dem man sprach Nun was mag nun das gesein daz in also duncket vnd erscheint das do nicht ist, wārllich vnd wāre ich vermůgent als ich nichte enbin ich solt
 25 auff den baum steigen vnd besehen ob im also wār als er saget. Pietro seines reden nicht abließ der herr zů im sprach. Pietro steige ab dem baume das er bald thet, nun sag mir sprach Nycostrato was hast du auff dem baume gesehen. Pietro sprach. Herr ich vernym wol ir habt mich heůte für eynen narren ersehen so ich euch eůer eygne schande sagen
 30 sol. Ja sprach der herr sage mir was du gesehen hast Do sprach Pietro. Ich sahe euch zeroß auff [265^c] eůer frawen, vnd do ich ab dem baum steyge auch euch ab ir steigen sahe, vnd an das ende siczen sahe do ir yeczund seit. Nun gelaub mir fürwar Pietro dir hat getraumet, sprach der herre, dann seider du auff den baum nach den bieren steygest hat
 35 sich vnser keines von dem siczen verrůret, Pietro sprach was bedůrffen wir des kriegs sahe ich euch so sey also so sahe ich euch auf dem eůern daz Nycostrato noch fremder nam das sich der iung nit ab seiner meynung wolt weisen lassen vnd sprach. Nun můß ich ye besehen ob du

war sagest oder ob im sey als ich sage dir traume vnnnd ob der bieren-
baum bezaubert sey, daz man soliche wunder darauff sehe, bald von dem
siczen auffstünde vnnnd auff den baum steyge, vnnnd do er auff dem baum
was die fraw mit den iungen anhüb czeschympfen irem willen mit im
5 eyn genügen theten vnd den man czû sehen ließ, vnd do er das ersehen
het anhüb laut zeschreien Ey du böses weib was tûst du mir zû gesicht
vnnnd du zenichter bûb zû dem ich stâts alles mein getrauen gehabt hab,
mit disen worten ab dem baum steyge in meynung in bösen schymffe
czebeweisen. [265^d] Die fraw vnd Pietro sprachen Herr wir siczen als
10 ir vns liesset do ir auf den baum stiget vnd die weil er ab dem baum
steyg yeglichs sich seczet als er sy gelassen het, vnnnd do er ab dem
baum czû in kame in aller maÛ als er sy gelassen het fand, doch in mit
bösen worten zû sprach vnnnd sere schalt czû dem Pietro sprach. Herr erst
sihe vnd erkenne das es war ist nach dem mich daucht do ich auf dem baum
15 was ir mir die warheytt saget, mich dēcht oder mir traumet, also mag ich
euch yeczunnd auch sprechen was ir gesehen habt falsch vnd nicht war
sey, vnd euch geleich als mich vorgeduncket hab, vnnnd domit ir des
eyn rechte warheytt vernāmet vnd durch keynen andern weg das euch
bas mag beweißt werden dann durch etter selbs bedencken. Nun saget
20 mir herr zû welicher stund ewere erbere czūchtige weise fraw ob allen
frawen die euch ob allen mannen liebhat möchte euch solichen schānt-
lichen widerdriēß gegenwirtig etter tūn, meins willen ich geschweigen
ich mir e selbs den tode thūn wōlt dann eyns solichen nun gedencken
ich geschweige das czethūn vor ettern augen, darumb ich fürware [266^a]
25 gelaub das das falsche sehen des bierenbaums schuld ist. dann alle
welt het mir nicht mūgen zu versten geben noch mich gelauben ma-
chen, oder ich het euch leiblich mit etter frawen sūnden sehen vernām
ich yeczunnd nicht, das euch dauchte als mich geduncket hat do ir
auf dem baum wart, ich thāte daz des ich mir mein tage nye gedacht
30 ze thūn, die fraw auch des geleichē thet als ob sy wider den man
zoren hette, vnnnd des das er sy czehe betrūbet wāre auf stūnd zû im
sprach. Des walte der teuffell das du mich also vernicht heltest wōlt
ich solicher bûbrei nach geen als du sprichest yeczund ab dem baume
gesehen habest hab sorge das ich das gegenwirtig dein tāt. ich besorge
35 wūrde dich es mit sehen lassen, vnd bis on zweifel wo mir eyn solches
zetūn in meinen syne kāme ich solt es in meiner kamern also verbor-
gen thūn daz es dir wenig solt czû gehōre komen. Also nach langem
disputieren Nicostrato wol war daucht als die fraw vnd Pietro sprachen

Das sy sich beyde gegenwirtig sein in der zeit czû eynder nicht ge-
 leget heten. Also die materi fallen liessen anhuben zesagen von dem
 neuen wun[266^b]der des gesichtes wer auf den baum steyge. Aber die
 frawe die do noch vmb Nicostrato wort zornig was sprach Der bieren-
 5 baume sol weder mir noch keyner andern frawen mer schand thun
 mag ich anders, zu dem iungen sprach. Pietro lauff bald vnd bring
 mir ein peihel vnd zu eynem mal rich dich vnd mich. aber billicher
 war man schlug mein man Nicostrato vmb den grind der sich im on
 ander bedencken die augen seiner vernunft also balde plenden laßt,
 10 das es doch die augen die du in dem haubt hast ware deuchte als du
 sprichst gesehen habst dann in keynen wege dir so balde soltest arges
 gedacht haben, Pietro bald vmb eyn peihell lieff vnd den bierenbaum
 abschlug, vnnd do in die frawe auf der erden ligen sahe zu Nico-
 strato sprach. Seitmal ich den veinde meiner eren überwunden sihe
 15 mein zoren mir aller verschwunden ist. nach dem Nicostrato sy freunt-
 lich batt das sy im verzihe sein gesichte in geplendet hete, vnd ware
 im leyd was ubels er ir zu gezogen het. Die fraw willig was nun hin
 fur sich gen ir solches nicht verdacht, dann sy in ob allen mannen der
 welt lieb het. Also der gut esel oder [266^c] edele man von seiner
 20 frawen angefuert ward mit ir vnnd Pietro auß dem garten in iren palast
 ging, darnach zu manch malen Pietro mit frawe Lidia vnd fraw Lidia
 mit Pietro ir freud in lieber liebe mit eyn ander heten.

Wie czwen Seneser beyd eyn frawen bulen vnd liebhaben. vnd
 sy des eynen geuatterin ist, die selben zwen beyd eyner dem an-
 25 dern verspricht welicher vnder in beyden am ersten stirbet wider-
 umb komen sol vnnd dem andern czewissen tun was man in gener
 welt thut.

Nvn was alleyne der kunig in diser tagreyß sein neue histori cze-
 sagen beliben, vnd do er die frawen des abgehawen bierenbaumes ge-
 30 schwigen vername selbs frolich anhüb vnd sprach. Ir lieben frawen
 kurcz abgeret, es waren in der alten state Sena zwen iunge gesellen,
 der eyn was genannt Tinghozo Mini der ander Meuczo Tura beyde
 gesessen in der gassen genant Salia, dise zwen gesellen statts ir wonung
 miteyander heten als dann geren guter gesellen gewonheit ist, gar
 35 selten eyner on den andern war ge[266^d]sehen worden, grosse freunt-
 schaft czû eynder suchten, auch vil dick miteynander gen kirchen

giengen predigen hören, do sy stäts die grosse freude des ewigen lebens vernamen, auch die grossen pein der sündler die yegklicher armen sele nach irem verdienen von got gegeben was. Diser sach die czwen gesellen geren eyn eygenschaft vernomen heten Aber das ze
5 wissen weder weg noch synn bedencken mochten vmb des willen yeglicher dem anderen versprach, welicher vnder in am ersten stürb, das der selbig wär es anders möglich dem der noch bei leben wär czewissen thät was lebens in gener welt wär, eyn soliches eynander versprochen vnd zetün gelobten. Nach dem nit lang vergieng als gotes gefallen was
10 das Tinghoczo cynes genant Ambrosii Anselini der von seiner frawen eynen sun gehabt het geuatter ward vnd zū zeiten als dann der geuattern gewonheynt ist sein geuatterin zū hauß sehen gieng die do als ein schöne fraw was als man in tausent hete eyne finden mügen, vnd wiewol er ir geuatter was, doch das darumb nicht ansahe alle geuatterschaft czeruck leget vnd von ganzem freyem willen zū [267^a] ir in liebe
15 enczündet des selben gleichen Meuczo sein geselle thet dann Tinghoczo im stäts sein geuatterin, ob allen andern frawen lobet breiset, vmb des willen Meuczo nicht mynder liebe zū ir gewan dann Tinghoczo hete. Soliche bey der liebe yegklicher die seinen dem andern verborgen hielt,
20 besunder Tinghoczo des geuatterin sy was dem es grösser schände was dann Meuczo seinem gesellen wo das zū liecht komen wär, des Meuczo nit bedorfft acht czehaben, alleyn besorget er wider Tinghuczo thäte wo er das vernäme eifern würd vnd in gen der frawen in neid vnd vnwillen bringen würd dann er allzeit vmb der geuatterschaft willen
25 mit ir reden mocht Also beyd die frawen lieb heten, vnd Tinghuczo der geuatter was all zeite mit ir reden mocht so vil brauchet dz er sy zū seinem willen bracht, vnd mit ir thet sein gefallen, des Meuczo bald war name daran grosses vngefallen het doch darumb sein hoffnung nicht verlore stäts hoffet dem seinen willen mit ir auch ein genügen
30 zethün, vnd domit im Tinghuczo nicht arges gedächt gen in thet als ob er sich solicher sach nicht verstünde noch wargenommen het. also [267^b] beyd in irem liebhaben eyner gelücksäliger dann der ander was, in solichem irem liebhaben sich begab das Tinghuczo der geuatterin garten zebawen so weych milt vnd süß fand daz in vmb solicher arbeyt
35 willen grosse kranckheynt anstieß die in so fere beschwäret daz er sein nit vertragen mocht sich nyder leget vnd starb, vnnd an dem dritten tag in der nacht her wider kam ze verbringen als er dann seinem gesellenn versprochen het, der vileichte zū solcher zeit in der nacht

schlieffe im rüffet czû im sprach, Meuczo güter freünde nicht schlaf
mer vernyme was ich dir sage, in solichem Meuczo erwachet vnd
sprach. Wer do wer bist du, dem der geist antwort vnd sprach. Ich
bin Tinghuczo dein geselle vnd kom als ich dir dann versprochen hab
5 meinem gelübd ein genügen zetûn, vnd dir neu historien auß gener welt
bring. Do das Meuczo vernam daz Tinghuczo der do tod was bei im
in der kamern was sere erschrock vnd grosse forcht het doch bald eyn
güt hercz fieng vnd sprach. Nun bis mir got wilkomen Tinghuczo du
mein allerliebster freünd vnd brüder wie stet es vmb dich bist du ver-
10 lorn oder zû genaden komen [267^c] dem Tinghuczo antwort vnd sprach.
Verloren sein die der man nicht findet wie möcht ich hie bei dir sein,
wann ich verloren wäre. Neyn sprach Meuczo ich meyn es nit also,
ich frag ob du bei den andern verdamten selen in der ewigen pein
oder helle seyst. Tinghuczo sprach des bin ich nicht, aber wol vmb
15 meiner sünd willen in grosser pein bin, also Meuczo in mancherley
fraget, besunder yegklicher sünd pein vernâmen wolt die in dieser welt
verbracht wûrd, das im Tinghuczo alles saget vnd zewissen thet, nach
dem in fraget ob er im in keynerley möcht gehelffen damit sein pein
geringert wûrd Tinghuczo sprach Ia du mach mir wol helffen lassen
20 meß sprechen allmûsen vmb seinen willen geben vnd für in bitten las-
sen, alle soliche werck den die in gener welt sein güt vnd gehilfflich
sein. Meuczo sprach daz wolt er geren thûn, mit dem do Tinghuczo
von dann faren wolt. Meuczo an die geuatterin gedacht sein haubt
aufhûb vnd sprach Tinghuczo erste ist mir dein geuatterin bei der du
25 vil dick schliefest mit ir dein freud hetest do du in diser welt wonetest
in mein gedancke komen was pein ist dir vmb solicher [267^d] sünd
willen gegeben worden. Zû dem Tinghuczo sprach. Lieber brüder als
bald ich dort hin kam ich eynen fand als mich daucht er alle mein
sünd mer weist dann ich, der selbig mir gepot das ich an das ende
30 büssen gienge daran ich bin, doselbest ich mit grosser pein vnd schmer-
zen mein wesen für forcht halben aller zitter, do ich grosse gesel-
schaft hab die vmb solicher sünde willen an das end verurteylet sein
do ich bin doch ich noch vil grösser pein besorge dann ich hab vmb
derselben sünd willen wie wol ich in grossen brinnenden feür bin dan-
35 noch stâts grosser pein warten bin. es ist wol war do ich in die selben
peine kam eyner sich neben mein fande der czû mir sprach. Sage mir
gütter freund was hast du mer dann die andern pein die hie bei dir
sein daz du also zitterst. O sprach ich zû im güter freünd ich besorg

die vrteyl gotes, vmb einer meiner verbrachten sünde willen, der mich fraget waz sünd das wär, dem ich saget wie ich eyner meiner geuatterin gen acker gefarn wär des ich mit ir tötlich gestündt het in solcher maß daz ich mich selbs geschunden het, des er auß mir sein gespöt
 5 treyb vnd zů mir sprach gehab dich wol [268^a] du eynfältiger nicht besorg arges, dann hie helt man nicht recht der geuatterschaft, desselben seinen trösten ich grossen trost nam. In dem es sich gen dem tage nächet Tinghuczo zů Meuczo sprach. got sey mit dir brüder ich mag nit lenger bei dir sein bitt got für mich, also sol ich tůn für dich
 10 in dem verschwand, vnd do Meuczo vernam das man der geuatterschaft halben in gener welt kein recht hielt sein selbes spotet dann er ir vil manche gespart het hin für weiser ward, vnd solt münch Albrecht daz gewisset haben im wär nit not gewesen czephilosophiren do er sein geuatterin zů seinem willen bekeret.

15 Die sunn ab gen dem nydergang gestigen ist vnnd Zephir sich erhaben hat In dem der künig sein neüe histori zů end bracht het, vnd nyemand mer auf disen tage zesagen was, er die kronen ab seinem haupt nam vnnd die frawe Lauretta aufseczet zů ir sprach Fraw ich krōn euch zů vnser künigin euch czeeren vnd vns allen
 20 zů freüden, darumb hinfür gepiet vnd thůt eüer gefallen, nach dem sich wider nyderseczet vnd Lauretta die neü künigin irem marschalck für sich rüffet im gepot daz er in dem schönen grünen tale zů [268^b] besser zeit dann er vor gethan het sein ordnung gāb die tisch czerichten, domit man dester frůer möcht wider zů hauß komen.
 25 Nach dem mit im ir ordnung gab die weil ir herschaft werend wār was er tůn solt darnach sich gen irer gesellschaft keret vnnd sprach. Lieben frawen als Dioneo des vergangen künigs heüt gefallen gewesen ist daz man gesaget hat von den frawen die iren man über den syn getan vnd betrogen haben, vnd wār es nit das ich mich nit hundes geschlecht
 30 erzeigen will die sich zehand rechen vnd in irem zorn yederman peissen wōllen ich sprāch vnd schůf daz man am nächsten tag von den man saget die ire weiber lästerlich betrogen haben, doch laß ich daz yeczund fallen vnd sprich daz eüer yeglichs sich gar eben bedenck bis morgen von den zesagen es seien frawen oder mann wie yegliches daz
 35 ander betrogen hat, die fraw den man oder man daz weib oder eyn man den andern oder eyn weib daz ander wie sich daz begāb vnd gefüget hab Mir czweifelt nit die materi sol euch nit mynder freüd bringen dann die gesagt materi getan hat, mit dez aufstünd vnd bis auf

daz nachtmal spacziren zegeen yederman ir vrlaub gab Also alle ge-
 leich frawen vnd [268^c] mann auffstünden ir ettliche parfuß in dem
 frischen wasser hin vnd her spacziren gingen etlich vnder den grünen
 tannen vnd külen schaten in freude vund kurzweile namen, Nach dem
 5 sich bei dem schönen weyer zů tisch seczten vnd sich in dem lieblichen
 vogelgesange erfrischten der süsse stimm in dem wald erhal, mit dem
 sy das essen vund nachtmal enpfingen, nach dem aufstünden nach irer
 gewonheytt durch das schön tal mit mancherlei kurzweiligen sprüchen
 sich wider zů hauß fügten do sich bei dem frischen brünnlein nyder
 10 seczten mit edelm gütem külen wein von neuem erfrischten vnd mit
 edelm confeccion sich ir kleynen müe labeten. Nach dem die künigin
 anhüb vnd sprach. Mein allerliebsten frawen vnd auch ir man als euch
 allen wissent vnd kunt ist, wie der mornig tage dem leiden gotesdienst
 bezeychent ist den wir mit andacht eren vnnnd loben sollen darumb
 15 mich deücht bis morgen vnd übermorgen wir täten als wir vormals ge-
 than haben dise zwen tage vnsers sagen rüeten, vnnnd alleyn in den
 vnser sele heyl bedächten Soliche andächtige rede der ganczen gesel-
 schafft güt gefal[268^d]len was, Nach disen Worten die künigin schlafen
 zegen in ir vrlaub gab.

20 Hie hat die sibent tagreyß ein end

VND HEBT SICH AN DIE ACHT

vnder dem gewalt vnd regiment der künigin Laurretta. do die edeln frawen sagen werden von den mannen die ire weiber vnd weiber die ire mann vnd eyn man den andern betrogen haben.

- 5 Nvn an dem sonntag morgen der sunnenschein vns den neuen tage bracht hat. alle finsternuß waz verschwunden, die künigin von irem schlaf was entstanden ir gesellschaft czü ir name den külen taw vnd grün gras mit senften trittten spacziren überschriten. Do nun tercz zeit kam in eyn capellen die nahend was das heylig ampt zehören gingen,
- 10 nach dem frölich wider zü hauß gingen das essen vnd mal enpfingen, nach dem mit der künigin vrlaub etlichenn tancz gethan vnd rüen giengen, vnd die sunn der circkel des mittentages übergangen hete, vnnnd der künigin gefallen was nach irer gewonheyt wider anzeheben neuen historien zesagen sich in die grünen [269^a] wisen zü dem külen brunn-
- 15 lein fügten do sich radescheib darumb nyder seczten und nach der künigin gepot fraw Neyphile anhub vnd also sprach. Seitmal got gefüget hat daz ich auff disen heitigen tag mit einer meiner neuer histori den eüern sol den anfang geben so ist mein syn als ir in den gesagten vernomen habt wie etlich frawen ire männer betrogen haben, euch eyne
- 20 zesagen die von eynem mann eyner frawen beweist vnd getan ward Nit darumb das ich den man schänden wöll das er der frawen thet oder sprechen wöll er vnrecht getan hab, sunder in darumb loben vnd die frawen schelten will, domit ir sehen müget das auch die mann vnd nicht alleyn die frawen ander leüt betriegen vnnnd in über den syn tün
- 25 können weliche in glauben Aber die warheyt zesagen billicher wär das man sprach zü den die solcher materi nach gen wo es in anders gieng dann ir hoffnung ist in geschähe recht dann zesprechen in geschicht vnrecht dann eyn yegkliche frawe sol irem mann treü lob vnnnd ere sein ir keüscheyte im bewaren als lieb sy ir leben hat, die selben in
- 30 keynen weg durch ander mann entwichten, wie wol [269^b] eyn soliches vmb vnsers fleysches blödikeyt willen der frawen zethün gar schwäre

ist, doch eyns ich sprich vnd vrteyle das die dosig fraw des wilden feurs wirdig ist, die iren leib vnd keuscheyt irem man nympt vnd die vmb gelt andern mannen verkauft. aber weliche durch liebe vnd freundschaft willen der krafte groß sein in solcher stünd begriffen würd der
 5 on zweifel billich ze vergeben ist als dann nit lange ist durch Philostrato histori in frawen Philippa von Prato beweist ward.

Wie Giulfardo von eynem kaufman genant Kasparolo des weib er bület gelt entname, mit dem weib eyns ward vmb gelt bei ir zeschlafen vnd ir daz selbig gelt gab das er von dem man entnommen
 10 het, darnach gegenwirtig Kasparolo er sprach wie er der frawen daz entnommen gelt het wider geben des sy bekenntet also er solches gelts wider zegeben sich ledig machet, vnd vmb das selbig gelt die frawen zů seinem willen gehabt het.

Ir solt wissen das in Meyland eyn iunger teütscher edele man wonet
 15 der waz [269^c] mit namen genant Giulfardo gar eyn redlich man von leib vnd was des herczogen söldner gar für eynen getreuen diener seins herren gehalten waz als sich dann gar selten in den teütschen anders erfint, sunder wo im gelt gelihen ward des er allwege eyn getreuer widergeber was. Es was mancher kaufmann der im eyner yeglichen
 20 grossen summ geltes vmb kleynen sold getraut het. Nun sich begab das er in solichem seinem stand sein hulde vnd liebe eyner schönen iungen frawen gab die was mit namen genant fraw Ambrosia eynes alten erberen kauffmans weib, der was geheysen Kasparolo der was des genanten Giulfardo grosser freunde vnnnd gar güter günnner, in on maß
 25 lieb het, doch weder Kasparolo noch nyemand anders ye gemerckt het daz Guilfardo die frawen bület vnnnd lieb het. In solichem seinem bülen eyns tages er die frawen batt das sy im ir huld verlihe vnd im mit irem leib zů seinem willen gehorsam wäre vnnnd was sy czů im begeret das er ir in irem dinst allzeit willig vnd gehorsam sein wölt, alle ire
 30 gepot ze verbringen. nach disen worten sich beydenthalben mancherley ander red ver[269^d]lieffen, doch zeletst die frau irer red zů solichem end kam wie sy zů seinem willen geschickt vnd bereyt wäre, doch das so ferre das sich czwu sach douon begäben. Das erst das er eyn soliches verborgen hielt, das ander das er ir zweyhundert gulden gäb der
 35 wäre sy yeczund gar nottürftig so wölte sy im allweg zů seinem willen bereyt sein. Do Guilfardo der frawen geitigkeyt vername im gancz auß

dem herczen fiel dann er hielt sy für eyn milte edle frawen vund sein grosse liebe zů ir sich in neide bekeret vnd ezechand im gedacht wie er ir vmb irer geitigkeyt willen möcht über den syn thůn vnd sy betriegen, vund eyns tages er ir enpote wes sy an in begeret das vnnnd anders zetůn in irem dinst er alweg bereyt vnd willig wār zů irem gefallen nun in wissen liesse, was ir liebet das er sich bei ir fund vnd die czweyhundert gulden brächt, mer ir enpote das sy on sorg wāre eyn soliches von im nymer mer solt zů liecht komen, dann alleyn eyn sein getreuer freunde czů dem er sich alles gůtes versāhe vnd alle seine
10 geheyne kunt wāren. Do das bōs weib den edelman vername aller sach willig was. Do sy vername [270^a] das die czweyhundert gulden komen, im wider enpot wie ir mane in wenig tagen wūrde gen Genoua reitten, wenn das geschāhe so wōlte sy es im zewissen tůn, domit er on sorge czů ir komen möchte. Do Gwifardo der frawen meynung vernomen het, nit lang feiret czů Kasparolo der frawen man gienge; der sein grosser freund was zů im sprach. Kasparolo ich hab was geschāfftes vorhanden, darumb ich zweyhundert ducaten bedōrfft wār mir gar eyn grosser dinst gewesen du wārest mir mit den für ettlichen tage cze-
15 lieb worden mit dem lon den du von andern nymest. Kasparolo czů im sprach. das wōlt er geren thůn bald gieng vnd bracht im die czweyhundert ducaten, darnach zehand aufsaß gen Genoua reite, das die frawe balde Gwifardo zewissen thet das er czů ir kāme vnnnd der czweyhundert gulden nichte vergāsse, Gwifardo das gelte vnd seinen gesellen czů im name czů der frawen gienge die er frōlich sein warten
20 fande, vnnnd das erst das er thet das was das er ir die czweyhundert gulden in die hand gab vnd gegenwirtig seines gesellen zů ir sprach. Fraw nāmt hin [270^b] das gelt vnd gebt es eūerm man wenn er widerkompt. Die fraw das gelt nam, aber Gwifardo meinunge nit verstūde ir wol gedacht er eyn solches seinem gesellen zů gehōre redet, domit
25 er nit mercken solt das er ir das zelone gābe bei ir czeschlafen im antwurt vnd sprach. Das wōlt sy geren tůn, aber sy wōlt vor sehen ob es zweyhundert gulden wāren vnnnd sy auff den tisch warff vnnnd czelet vnnnd zweyhundert ducaten fande die in iren schrein trůg vnnnd wider zů dem edel man kam in mit ir in die kamern fūret vnd nicht
30 alleyn auf dise fart sunder zů manch malen e der man von Genoua wider kam im mit irem leyb nach allem seinem lust vnd willen zeliel warde, im des er begeret het eyn genügen thet, vnd do Kasparolo wider von Genoua kame bey der frawen do heyne was, Gwifardo sich

mit seinem gesellen czû im füget vnd gegenwirtig der frawen vnd seines gesellen czû im sprach Kasparolo die zweyhundert ducaten die du mir gelihen hetest nicht lang ist der hab ich nicht bedörfft vrsach mancherley darumb ich sy zû hand nam vund bracht sy deinem weib vnd
5 gab sy ir dir wider zegeben [270^c] darumb wo du mich für deinen schuldiger geschriben hast, so thû mich auß an meiner rechnung Kasparolo sich gen dem weib keret vnd fraget ob sy zwey hundert gulden empfangen het, des sy nicht gelaugen mocht dann der gezeütge gegenwirtig was der sy das gelt het empfaen gesehen, darumb mit
10 keynen eren des gelaugen mocht zû dem man sprach. Ia sy hete es gehabt aber es was mir vergessen das ich dir es nicht gesaget vnd geben hab. Do sprach Kasparolo czû Gwifardo. Ich sol dir an dein rechnung seczen wie du mich der summ bezalet hast, gee das dich got beleyte mit dem Gwifardo von dann ging vnd die schön fraw ires kau-
15 fes bestoben beleyb dem man den bösen vnerbern gewin ir vnzucht gab. Also der listig gescheide liebhaber die bösen geytigen frawen czû seinem willen bracht.

Wie eyn pfaff fraw Belcore beschlafet vmb des willen ir ein korrock czû pfande laßt nach dem von ir eyn mörser entnymet vnd
20 den ir wider heym schicket vund seinen korrock fodern laßt den er ir vmb des morsers willen hab zû pfand vnd gedächtnuß gelassen den [270^d] in die gût frawe in grossem zoren wider gab.

Beyde frawen vnd mann was Gwifardo mit der schönen frawen begangenn het sere lobten, nach dem sich die künigin zû Pamphilo ke-
25 ret lachend im gepot er der angefangen materi nachfolget der also sprach. Ir züchtigen edeln schönen frawen mir auch ist eyn nette histori in gedanke komen von den die vns neiden vnd auff vns frawen das kreütz gebant haben das sein vnser prelaten vnd pfaffen die sich beduncken lassenn wo sy vnser eyne vnder sich bringen mügen sy alle ge-
30 nad vnd ablaß douon haben sollen zegeleicher weis als ob sy künig Soldan von Babiloni gen Auion gefangen bracht heten darumb die armen leyen in auch nyndert zû komen mügen das sy in ire mütter schwester töchter gûte freündin mit nicht mynderm herzen, als sy iren kellerin tûn in ire weiber angeen vnd sich in irem zorn an in also meynen rechen
35 darumb ich euch von eyns pauren weib sagen will mer zelachen dann zeklagen douon ir auch gût frucht nânen sölt dobei wol glauben mügt

daz den [271^a] geystlichen nicht allweg zegelauben noch czegetrawen ist. In dem dorff nicht ferre von hinn genant Auerlingo wonet gar eyn iung gerade pfarrer on maß redlich in der iungen frawen dienste, wiewol er nicht gar eyn köstlicher gelerter leser was doch den sonntage
 5 gar mit vil güten heyligen worten vnder der linden sein pfarleut enpfiehg besunder die frawen wann die manne nicht bei in waren das er bas vnd mer thet dann keyn ander pfarrer vor im gethan het er trüg in zû zeiten den weichbrunn heym domit etliche wächsene kerczlein do bei in seinen heyligen segen mitteylet Nun sich begab das vnder andern et-
 10 lichen seinen pfarschwestern im eyne ob den andern liebet vund wol gefiel die was genant fraw Belcore eyns güten schlechten pauren weib genant Beneuenga Maczo, die in der warheyt ein genüg freüntlich mätz was wol getargirt bas geschicket zweckholcz zemalen vnd bürde zetragen dann anders zetûn, über das bas auff der geigen oder fideln singen kund
 15 vnd den pflüg czû pete füren dann keyne ir nachpaurin thûn kund, vmb des willen mein herr der pfarrer allen seinen vleiß thet ir hulde zeer-[271^b]werben stätz gieng do er sy sehen hoffet, vnd wenn er sy an dem feirtag in der kirchen vernam er ir ein kyrie vund sanctus weydelich quintiret als der do soliches meyster was dem esel gleich zeheülen wo
 20 er ir aber nicht vername sich mynder müet vund sein gesang schlechter fûret, doch den peren in solicher maß treiben kund das weder der frawen man noch die nachpaurschafte sein nye war nam, vnd domit er frawen Belcore mer liebe vnd freündschafft het er ir zû zeiten eyn büschelin grünes knobloch oder zwibelein schencket, die er am schönsten
 25 het in dem dorff, auch zû zeiten eyn hörblein fabebon oder bacielli, vnd wenn in zeit daucht er eyn süssen anpicke gen ir schiessen ließ, vnd sy die sich eyn wenig gen im wild stellet das gleichen thete als ob sy sein nit acht het, das in czû zeiten murret machet, doch eynes tages sich begab das der gûte domine czwischen none vund vesper czeite spaczirenn
 30 gangen was in dem er Beneuenga der frawen man fand mit eynem seinem esell vor im den er fraget wo er mit dem esell hin fûre, zû dem Beneuenga sprache. Herre der pfarrer in gûter warheyt ich fare in die [271^c] stat vmb etliches meines geschäfte willen, vund bring etliche ding her Bonacorri Ginestreto das er mir gehilffliche sey, dann eyner ich weyß
 35 nit wer hat mich für recht geladen So fare hin mein sun sprach her pfarrer se hin mein segen vnd kom bald wider, vnd ob dir zû gesicht kâm Lapuczo oder Noldino sage in vund vergiß sein nicht das sy mir die stifell riemen czû den holczschûchen schicken. Lieber herr gern

sprach Beneuenga, Also gen der stat wercz für vnd der pfaff im gedacht
yeczund zeit wär zů seiner lieben Belcore zegeen mit ir sein gelück ze
versüchen den wege zwischen beyde füß nam nicht rüet bis er czů Bel-
core kame, in dem hauß über die stiegen aufgieng vnd sprach. Got geb
5 vns gelück vnd heyl ist yemand hie. Fraw Belcore die hinder dem herd
saß in an der red bald erkant het auffür vnd sprach. O herr der pfarrer
was wind wät euch do her seit mir got wilkomen got geb mir vil gütēs
sprach der pfarrer Ich mit dir mein liebe Belcore mein czeit ze ver-
treiben her komen bin, dann ich fand deinen menschen nit lang ist gen
10 der stat wercz geen Belcore her für gienge ir gewändlein an den tennen
brey [271^d] vnnnd sich darauf seczet steckrüben samen zeklauben vnnnd
den reyne zemachen den der man nicht lang dar vor gereittert het. Der
pfarrer zů ir sprach. Belcore liebe wiltu mich dann also sterben lassen,
des Belcore lachet vnd sprach. Nun was thů ich euch. Der pfaffe
15 sprach. Du thůst mir nicht aber warumb lassest du mich dir nicht tůn
das ich do will vnd das vns got zethůn gepeut, Do sprach Belcore. Ey
nun get zum hencker thůn die pfaffen auch also. Der pfaffe sprach.
Traun ia wir tůn noch wol bas dann die andern mann tůn das sy selbs
sprechen wir machen besser arbeyt dann sy tůn dann wir malen wenn
20 wir ein legen vnd gelaub mir haltest du mir es wirt für dich sein, lassest
du mich machen dir sol dein hereze lachen. Do sprach Belcore. Nun
waz gůts möcht mir nun von euch geschehen, ir seit alle karg hund. der
pfaff sprach. Ich weyß nicht was du sagest gefelt dir was von mir ze-
haben es sey eyn par schüch oder spiegel oder harpentlin oder gefiel dir
25 eyn gůt stuck pachen fleyschs das sage mir lasse mich dir dienen liebe
die weil ich es gern thů Do sprach Belcore Ei des sei got lob brüder,
ich hab solches eyn gůt [272^a] notturft. Aber seitmal ir mir so vil gůtz
wölt warumb tůt ir mir nicht ein andern dinst so will ich wärlich tůn
was ir wölt. Der domine sprach so sag mir was wilt du ich will dirs
30 dōch geren thůn. Belcor sprach. Herre ich müß in die stat geen die
wolle die ich gespunnen hab dem tůcher bringen, vnd mein spinrad
wider machen lassen das mir zerfallen ist, domit wo ir mir fünff pfund
libet meinen rock auß den Juden zelösen daz wär mir von euch eyn
dienst, darnach mit mir tůt was euch lieb ist dann ir secht wol ich bin
35 nackend vund mag auf keynen kirchtag gen als ander erber frawen tůn.
Der gůt pfarrer sprach wärlich Belcore als ware mir got ein sällig iar
geb so hab ich ir ye nicht bei mir, aber der samstage komet sol ich
schaffen das sy dir werden ia sprach Belcore ir seit alle groß verheysser

vnd kleyn leyster ir halt nyemand nicht, ich sich wol ir meynt mir zethûn als ir Biliucza getan habt die mit dem etcetera liegen lieff bei gott neyn ir solt des nicht enthûn, sy ist zû einer gemeynen bûbin worden, habt ir des gelts bei euch nicht als ir sprecht so get darnach. Do sprach der pfarrer o Belcore liebe mach mich yecz[272^b]vnd nicht darnach geen du sihest wol wie mir geleich yeczund das gelûck komen ist daz wir alleyne bei eynder sein vnd vileicht e ich wider von hauß kâme etwar môcht herkomen sein vns irren ich weyß nit wenn es mer vns so gût wûrde als yeczund, ûber das Belcore sprach. Domine wôlt ir geen so geet wôlt ir dann nit geen so stet. Do der pfarrer sahe das sy ye nicht geschicket was seinen willen zetûn dann alleyn Saluum me fac vnd des iren gewiû sein, der pfarrer zû ir sprach. Seitmal du mir nit gelauben wilt das ich dir die fûnff pfund bringe so nym hin meinen korrocke zepfand. Do das Belcore vernam ir angesicht aufricht vnd sprach. Wes ist der korrocke wert. der pfarrer sprach. Du solt wissen es ist noch nicht czwenzig tage das er mich von dem tûcher bey sibem kost vnd het in zermal wol-fell mer dann bei fûnff schillingen nach dem mir brûder Albrecht saget der sich sein mer dann nyemand verstet. Des het ich nicht gelaubet sprach Belcore, aber ich will in vor haben e ir mirs tût Der pfarrer der das armbrust gespannt het den korrock bald der frawen gab vnd sy in nam vnd in den schrein sperrt zû dem [272^c] pfaffen sprache. Domine gee wir in den stal do nymer nyemand hin get, also beyde darein gingen das theten das der pfarrer von ir begeret het, vnd do er ir das süß ding der welt eingethan het vnd sy gotes freûndin gemacht hete gûte zeit mit ir geschympfet het an den korrock frôlich zegeleicher weis als ob er von einer hochzeit kâme zû hauß gienge, Nath dem sein ûbel getan ding bedencken ward, dann on den korrock nicht wol getûn mocht dann das opffer des ganczen iares im nicht den halben teyle der fûnff pfund gab darumb er seinen korrock nymer mer czelösen meynet, anhûb czebe-dencken wie er den korrock on gelt von dem weib bringen môcht, doch darnach nit mit sere langem bedenckenn sich bedacht als der auch et-tlich list het vnd zû der frawen schicket sy bitten ließ das sy im iren steynen mörser lyhe eyn wenig salsen seinen gesten ze machen, des Bel-core willig waz im den bald schicket, vnd vmb essen zeit do er vernomen het das Beneuenga der frawen man zû hauß was vnd zû tisch gesessen waren den mörser bey seinem schûler frawe Belcore wider heim schicket ir dancket vnd sagen ließ das sy im den [272^d] korrock schicket den er ir zû pfand vnd gedächtnuß ließ vmb des mörser willen, der schûler

den mörser name der frawen heym trüge den man vnd sy zû tisch fand
den mörser von im leget des pfarrers potschafte warb. do Belcore den
korrock fordern vernam willen het czeantworten als dann wol billich ge-
wesen wär, aber der man sy gar saur ansahe vnd zû ir sprach. Vnd du
5 nymest von dem herrn pfand im den mörser czeleihen, ich schwere bei
der marter gottes schonet ich mein selbs nicht ich solte dich zûrichten
man solt wunder an dir sehen du czenichter sack gee hin bald vnd gib
im das sein das ist die ere die du mir thûst das dich der ciperlein töde,
vnd merck gar eben wes er hin für an dich begert das du im nit neyn
10 sprechest ich sprich nit alleyn den mörser sunder den esell ich ge-
schweige anders, im sol nichte in vnserm hauß versagt sein. Fraw Bel-
core murmeln ging den korrock auß dem schrein name vnnd den dem
schüler gab zû im sprach. Sag dem pfarrer von meinen wegen, Belcore
embeut euch ir solte ires mörsters von ir nicht mer haben sy wöll euch
15 sein nicht mer leihen, also schön er hab [273^a] er ir domit gethan das
im es gott vergebe sy wöll sein im nymen vergessen. Der schüler mit
dem korrock zû hauß ging dem pfarrer der frawen potschaft sagt, der
zû dem iungen sprach. so sage ir von meinen wegen wenn du sy mer
sihest leihet sy mir ires mörsters nit so leihe ich ir meines stempfels nicht,
20 also eyns gen dem andern abging Beneuenga meynet, do sy dem pfarrer
soliche wort enpot das sy daz darumb tät das er sy gescholten het nit
fürbas fragt. also Belcore sich ir geitigkeyt betrogen fand, dem pfarrer
bis in den rûben herbst die rede verhielt, nach dem er ir tröuen ward
wolt sy im nit mer halten er wolt sy dem Lucifer in den haß bannen.
25 Also mit gewalt des süßen mostes sich miteynander verrichten, dar-
nach zû manchen malen in dem stal der plinden meuß spilten, vnd ftr
die fünf pfund der pfarrer ir eyns tages des kierchtages kauffet eyn
cymbalo vnd ir das mit pirgamen überziehen ließ vnd eyn schellen
daran hencken tet des was sy sere wol content bas zemüt dann dinges
30 das ir ye mer von yemandt was gegeben worden.

Calandrino Bruno vnd Buffel[273^b]macho die drei nach dem
wasser das neben der mauren vnser stat abe rint genant Mongone
auf wercz gingen czesüchen cynen edeln steyn genant Ritropicho
der nach dem ir etlich sprachen, wer den steyne bei im hat das
35 derselbig solt vnsichtig sein, den der erste genant Calandrino meinet
er den funden het gar wol geladen mit steynen zû hauß ging Auß
dem sein weib ir gespöte treyb darumb er sy hart schlecht vnd sei-

nen gesellen sagt, was sy im thet do er den steyn funden vnnnd vnder den andern bei im het.

Pamphilo der iung sein neue histori verbracht hat, vnd die edeln frawen in des genüge gelachtet heten vnnnd noch lachen, nach dem die
 5 künigin frawe Elisa ir gepot tet fürpas zesagen, die frölich lachend also sprach. Ich enweyß mit mein allerliebsten frauen ob es mir gerat oder nit das ich euch mit meiner neuen histori nicht mynder ware als kurzweilig möcht frölich lachen machen als dann Pamphilo seinem getan hat, doch in dem mein vermugen tûn will, darumb ich sprich in vnser
 10 statt die do stâtes mit gar [273^c] mancherley volcke ist beseczet gewesen, nit lang vergangen ist dariinne eyn maler wonet mit namen genant Calandrino gar eyn schlechter eynfeltiger man von seltsamer gewonheyt, der den meren teyl seiner zeit mit zweyen andern malern vertreyb, der ein was genant Bruno der ander Buffelmacho die warn
 15 beyd gar kurzweilig vnd abenteuerlich männer, do bei aller listigkeyt vol. grosse freud in mit Calandrino namen vmb seiner grossen eynfältigkeyt willen. Auch eyn ander in der statt czû der zeit wonet der nicht mynder in allen sachen als Bruno vnnnd Buffelmacho kurzweilig waz vnd was mit namen genant Maso Sagio der etlich vil von Calandrino
 20 grosse einfältigkeit vernomen hete, im fürname auch im des freud vnd kurzweil ezegeben, vnd Calandrino etliche kurzweilige bübrei in schimpfes form beweisen im etliche netie seltsame ding ze versten geben vnd glauben machen vnd zû seinem gelück in eyns tages alleyne in sant Iohanns kirchen vor dem tabernackel sten fand, do er sere ernstlich das gemäle vnd geschmiczte ansahe das mit lange zeit darvor von
 25 netiem was gemachet worden. Do Maso im ge[273^d]dacht yeczund zeit wâr mit Calandrino was anzefahen vnd sein erste kuntschaft zenâmen vnd das eynem seinem gesellen czewissen thet der mit im was, was er thûn wölt vnd sich beyde zû Calandrino näheten vnd des gleichen
 30 theten als ob sy sein nicht acht heten beyd mit in selbs anhûben ze reden von mancherley abentour vnd den grossen tugenten der edeln gesteyne von den Maso bas vnd mer sagen kund dann keyn man der welt. Solichem irem reden Calandrino zûhöret vnd nach kleynere weil ir red in ganz war vnd geläublich daucht aufstünd vnd sich czû in gesellet
 35 das sich alles wol nach Maso meinung füget, stätz fürpas seiner angefangen materi mit reden nachfolget, vnd nach etlicher rede Calandrino fraget, wo man doch solche edel gesteyn fund dem Maso bald antwurt

vnd sprach Den merern teyl solicher tugenthafftiger steyn man fint in Berlinczona in der gegent Lebwol do die weinreben mit wecken gepfält vnd mit wüsten gebunden sein, do die gans eyn schilling gilt vnd daz gänßlein die zügab ist, do der kās perg ist vnnnd man die gūten
5 veyßten macharoni vnd die käßbrū auß den veyßten rafioli [274^a] kās machet. der yederman so vil nāmen mage als er will, dobei eyn fließend wasser von süßem wein besser dann ye getruncken ward. O sprach Calandrino leichnam lieben freünd was guten landes das mag sein, bist du ye do gewesen sprach Calandrino. Ia sprach Maso ich geleich ein mal als
10 wol als tausent do gewesen bin, wie vil meil ist dar hin. Maso sprach. O mer dann milantache tutta notte tanta. so sel es vil ferrer sein dann Abrucz. ia wol sprach Maso vil mer, der einfältig Calandrino Maso also ernstlich reden sahe das er im on zweifel aller rede gelaubet vnd meynet im wār also. vnd sprach. wärlich es ist mir gar zeferr ich trawt
15 mir es nicht czeerreychen, aber solt es mir eyn kleyn nāchner sein so sag ich dir ich müßt eyn fart mit dir tūn, vnd mir dem bauch der macharoni vol anfüllen, Nun sage mir fürpas daz dich got gesegen fint man nicht in denselben landen den edelen steyn douon du so lang gesagt hast. traun ia man sprach Maso zweyerley edel gesteyn von grossen tugenten man do fint, das eyn sein steyne perg das ander steyn
20 brūch mülsteyne zemachen die das mel malen darumb in denselben landen [274^b] man spricht, wie alle genade von got kom vnd von den pergen die mülsteyn. Aber solicher steyn haben sy also vil daz man ir bei in als wenig achte hat als bei vns des schmaralden sy groß perg
25 haben vil grösser dann vnser monte morello, die zū mitternacht leuchten als der finster steren. Ey das dich got beware sprach Calandrino grösser wunder ich nye vername. Maso zū im sprach Hast du gedulte ich sol dich wol ander abentēur vernāmen machenn, du solt wissen die mülsteyn douon ich dir gesaget hab. wer dieselben fassen ließ vnd
30 durch die mitte eyn loch machet, vnd sy dem soldan von Babiloni brächt der het von im darumb was er begeret, noch eyn andern edeln steyn man in denselben landen fint der ist mit vns genant tropia der ist von solcher tugent welich person in bei im tregt derselbige mensch ist vn-sichtig, vnnnd die weil er bei im ist in nyemant gesehen mag. Nun sag
35 mir bas das dich got gesegen sprach Caladrino zū Maso. Wo fint man doch dieselben steyn die solch tugent haben. Maso sprach ich hab fürwar vernomen man finde ir auch in vnserm wasser Mongone daz ausserhalb der mauren [274^c] abwercz rint. Nun von was farb ist der

edelsteyne Maso sprach sy sein von mancherley grösse eyner grösser der
 ander kleyner von schwarczer farb. Calandrino alle dise ding gar eben
 gemercket vnnnd czü im genomen hete, des gleichen thet als ob er gar
 genötig zeschaffen het von in ging vnd im fürnam in dem pach nach
 5 dem steyn zesüchen, aber das on Bruno vnnnd Buffelmacho wissen nicht
 thûn wolt, dann zü in sein besunder getrawen het bald beyd süchen
 ging die er in dem frawen kloster Foencz fand czü in sprach. Lieben
 gesellen komt vnd laßt alle ding steen e yemand anders e dann wir kom
 wölt ir mir anders glauben wir mügen die reichsten männer werden
 10 die in diser stat ye warn, dann ich hab von erbern personen vernomen.
 wie man in dem wasser Mongon eynen edeln steyn find, der ist von
 solcher tugent wer in bei im tregt der mage von nyemandt gesehen
 sein, darumb mich güt deucht wir all ander handel sten liessen vnd den
 edeln steyn süchen giengen e er von yemand anders funden würde mir
 15 czweifelt nicht wöllen wir wir finden in dann ich kenne in wol, vnd wenn
 wir in funden haben, [274^d] was hab wir anders zethûn gelt vnd güt ze-
 gewinnen dann in zü vns nâmen vnd an die wechsel pânck zegen die stâtes
 mit gold vnnnd silber beladen sein der nâmen sovil wir wöllen, seitmal wir
 von nyemand mügen gesehen sein. also mûg wir vns on müe vnd arbeit bald
 20 reich machen vnd nit ewig die mauren mit vnserm malen bescheissen als
 die schnecken tûn. Do Bruno vnd Buffelmacho Calandrino rede vernomen
 heten mit in selbs anhûben verborgen czelachen eyner den andern an-
 sahe, des gleichen teten als ob sy sich des das er in gesagt het groß
 wunder nâmen Calandrino rat vnd meynung sere lobten. In dem Buf-
 25 felmacho Calandrino fraget wie der steyn hieß Aber Calandrino der
 eyn büffel was des steynes namen vergessen het, bald antwurt was gee
 wir des namen zesüchen seitmal wir sein tugent haben Mich deucht
 güt wir gingen bald zesüchen. Nun wolan du wilt das wir süchen gen,
 sag mir wie hat er doch ein gestalt oder wie ist er geschaffen. Calan-
 30 drino sprach. Du solt wissen das sy mancherley sein, aber der merer
 teyl alle schwarcz, darumb nâm wir alle die die wir schwarcz finden
 also lang [275^a] das wir an den rechten komeh, ach lieben verliesse
 wir nit lenger czeit gee wir bald. Zü dem Bruno sprach. Beyt eyn
 wenig vnd sich gen Buffelmacho keret vnnnd sprach. Wes duncket
 35 dich ich laß mich beduncken Calandrino sag wol Aber nach meiner
 meynung so ist es yeczund zegen wider alle rechte zeit dann die
 sunn ist hoch vnd überscheynet den pach vnd alles gesteyne nun
 getrucket hat, darumb sy vil e weiß dann schwarcz sein. aber des

morgen frů e die sunn daz gesteyn ȳberscheint sy alle schwarcz sein, auch anders ze besorgen ist. es ist yeczunde der pach voller wascherin vnd auch ander leut die in vileicht gedencken mȳchten was wir sůchen giengen vnd auch sůchen mȳchten, vnd vileicht in der edel steyn
5 als balde als vns mȳcht zů handen komen, also wir vnser mȳe vnd arbeyt verloren heten, darumb mein syn wȳre ist es etȳer gefallen das wir auf morgen bitten so man bas zeit hat vnd die schwarczen steyn bas dann yeczund von den weissen erkante, vnd mer es ist morgen feirtag daz nyemand anders dann wir alleyn in dem pach sein werden vnd von
10 nyemand gesehen werden Buffelmacho lobet Bruno rat [275^b] zů dem auch Calandrin seinen willen gab vnd ir ordnung auf den sonntag frů gaben do sy sich alle drei den edeln stein ze sůchen in dem pach funden doch e Calandrin nach solicher irer gegebner ordnung von in ging vor sy fleissig batt das sy mit nyemand diser sach halben icht retten,
15 dann es wȳre im auch verpotten vnd in grosser geheym gesaget worden vnd von neȳem anhȳb in ze sagen was er von dem lande Bengodi vernomen het zů got schwȳr im wȳr als er saget, mit dem von in gieng in dem sy beyde in fȳrnamen was sy Calandrin halben vnd seines edeln gesteyns thȳn wȳlten vnd Calandrin mit grosser begiere vnd freuden des
20 sonntag morgen warten was. Do der kam mit sampt dem tag auf stȳnde seinen gesellen rȳffet alle drei zů der porten der stat aȳßgiengen ab in den steynigen pach stigen den steyn ze sůchen nach dem wasser abe wercz gingen. Calandrin sich ze foderst machet hier vnd dar sprang wo er eyn schwarczen stein ersahe bald auf zwacket in den bȳsen schob
25 sein gesellen nahent bei im im nachfolgeten zů zeiten auch eyn steyn aufhȳben. Nit lang verging Calandrin seinen bȳsen voller [275^c] nasser schwarczer steyne het, nicht aufhȳret bis das er die hosen den geren alles vol gestossen het, nach dem aȳß dem mantel eyn sack machet vnd in voller schwarczer steyn fȳllet. Do nun Bruno vnd Buffelmacho sahen
30 daz sich Calandrin gar wol mit steinen geladen het vnd nun essen czeit komen was vnd nach irer beyder ordnung Bruno czȳ Buffelmacho sprach. Nun wo ist Calandrin Buffelmacho der im nahendt was sich hin vnd her keret als ob er nach im vmbsähe zů Bruno sprach, Ich weyß nit wo er ist so sihe ich sein nicht nun was er yeczund hie nahend bei mir vnd
35 vor vnser beyder ich besorg wȳrlich er sey nun dolest doheym vnd hab geessen vnd vns hie in dem pach gelassen stein czeklauben wie hat er vns nun so recht getan daz wir vns in haben also lassenn zů narren machen vns geschicht geleich recht daz wir vns in haben ȳberreden

lassen vnd im seiner tading gelaubet sag mir wer ist der man also einfältig der gelaubet het des wir im gelaubet haben, das man in disem pach edel gesteyn von solchen tugenten finden solt Do Calandrin der zweyer seiner gesellen red vnd wort vernam. on zweifel im gedacht der
 5 edel [275^d] steyn im zů handenn komen wär, vnd vmb seiner tugent willen ir keyner die zenächst bei im waren in nit sehen möcht des er von herzen fro vnd wol zemüt was das im gott solich gelück zů gesant het, ze hand im gedachte seitmal in sein gesellen nit sehen, vnd er doch vor in stünde er auch nit sprechen noch sich gen in äugen wolt, sunder
 10 so er erst mocht sich zů hauß fügen wölt, in dem sich czeruck keret vnd heym wercz ging. Do daz Buffelmacho sahe zů Bruno sprach. was tů wir on in hie ge wir auch zů hauß. Bruno sprach ge wir dann es ist groß essen zeit. aber ich schwere dir bei got daz mir Calandrino der keyns mer tůn sol vnd solt ich im so nahend sein als ich im disen morgen
 15 gewesen bin ich solt in mit einem stein in sein ruck werffen er gedächt an mich die weile er lebet daz er mich also schäntlich betrogen hat. Das geret vnd eyne steyn geworffen als eyn ding was vnd den gůten Calandrin mit demselben steyn hinden in sein schenckel warffe es möcht got erbarmet haben, der arm Calandrin anhub ze blasen als dem es wee
 20 thet pein vnd schmerzen gab doch es alles verbeyß mit hoch aufgehoben schenckeln [276^a] seinen weg ging nit anders gelaubet dann sy sein nit sähen vnd das im zůgestanden was on gefär geschehen wære. Buffelmacho der im nit ferr was als die im stäts in den fersen lagen eyne steyn in der hant het czů Bruno sprach, sich nun was schönes steyns
 25 daz ist also flůg er auß meiner hand Calandrin in seinen ruck, also gesprochen vnd geworffen eyn ding was im sein ruck erberet es wär mit eynem prigel genug gewesen Also auf nach dem wasser bis an die porten mit werffen im nachfolgten vnd steynten, do sy ire übrige steyn von in wurffen vnd bei den torwartern beliben, die von in beyden der sach
 30 was sy Calandrino tůn wolten vor vndericht waren, die mit grossem gelächter des gleichen theten. Do Calandrin mit den steynen geladen durchgieng als ob sy sein nit gesehen heten der sich mit grosser eile zů hauß füget vnd das gelück in solichem gespöt im also gehilfflich was das er von keynem menschen bis heime in sein hauß nye gefragt ward.
 35 Calandrin von wann komst du. Aber gar wenig person zů der zeit vmb die weg gingen dann yederman essenn was. Also mein gůt Calandrin wol geladen von [276^b] steynen als eyn esell zů hauß kam vnd czů seinem vngelück sein weib genant Tessa schön vnd redlich vmb seines also lang

auß sein eyn kleyn betrübet was an der stiegen saß sein wartet, vnd do sy in komen sahe zorniglichen zů im sprach Der teuffel hat dich doch heut wider zů hauß bracht so yederman das mal gessen hat. Do Calandrin vername das in daz weib gesehen het, nach dem er meynet von
5 niemand solt gesehen sein in grossen vnmüte vnd zorn fiel anhub laut ze schreyen Awe mir hat mich der teufel mit disem bösen weib erschlagen du zenichtes weib du hast mich heut verderbet, Aber ich schwere bei gott dir sein nit ze vertragen auf über die stiegen in den sal ging daz gesteyn von im warff bald über das weib lieff sy bei dem har nam
10 zů der erden zoch in solcher maß mit stossen rauffen vnd schlagen also czüricht, das ir keyn hare in dem haupt beleyb noch bein an irem leib das sy nit klaget weder bet noch genad sy gehelffen mocht, vnd do Buffelmacho vnd Bruno in mit den torwartern Calandrin genůß gelachtet heten füß für füß Calandrin nachfolgten, vnd do sy vnder die tür des
15 hauß kamen das groß geschrey vnd [276^c] schlagen höreten wie er das weib so iämerlich zůbereyt ein gůte weil verzugen nicht sprachen, darnach des gleichen theten als ob sy erst vnder die tür komen wären im zů schryen vnd rüften. Do sy Calandrin vernam aller schwiczend vnd plüt rot an das fenster lieff sy freuntlich batt das sy hin auf kämen vnd
20 sy die sich auch etwas zornig dauchten hin auf zů im gingen den sal voller kisling steyn sahen vnd daz weib in eynem winckel mit zerstreutem har vnd zerrissem haupt kläglich weynend siczen sahen alle kol schwarcz in dem angesichte, vnd Calandrin blasend vnd seufzend ze gleicherweis als er sere müd wär funden, Do die zwen daz also ein
25 kleine weil angesehen heten zů Calandrin sprachen. Was ist daz Calandrin das du so vil stein doligen hast wilt du mauren, nach dem in fragten ob er das weib geschlagen het daz sy also traurig saß was wunders treibest du bist du von synnen komen. Calandrin aller flack vnd müd von der bürden steyn die er also mit grosser eil zů hauß getragen
30 het vnd des leides seines gelückes daz in daucht er des weibes halben verlorn het vmb des willen weder red noch atem czereden haben [276^d] mocht, in irer frage antwurt ze geben als eyn stock saß, in dem Buffelmacho anhub vnd sprach. Calandrino do du zornig vnd vnge-schlacht warest, soltest du vns deines zorens darumb nit haben engelten
35 lassen vnd vns nit also als die narren vmb die weg gefüret haben als du getan hast Es wär wol genůß gewesen do du vns mit deinem edeln gesteyn angefürt hettest in den frösch pächen die ze sůchen vnd von vns also ze lauffen als du getan hast. doch zů vns gesprochen hetest, gesegne

euch got oder der teuffel ich gee dohin vnd vns als zwen ochsen alleyn
 in dem pach liessest, das hab wir dir sere verübel dann wir haben eyne
 soliches vmb dich nit verdienet. aber glaub mir du solt ir vns keyne
 mer tün, über solich red Calandrin mit grosser marter antwurt vnd
 5 sprach. Lieben freund vnd gesellen nit betrübt euch es ist anders gangen
 dann ir meynt Ich vnsäliger armer mensch het den edeln steyn douon
 ich euch gesagt het funden, vnd domit ir daz glaubt was ich euch sage
 die warheyt sey, do ir des ersten eyner den andern nach mir fragt do
 waz ich euch nächner dann auf czeihen elen bei dem selben fragen ver-
 10 nam [277^a] ich wol das ir mich nit sahete vnd doch vor euer was vnd
 stäts bis zū hauß gewesen bin vnd alles das sy seinthalben miteynder
 geret heten er in saget, nach dem in den ruck weiset sehen ließ wie in
 die schwären steyn so sere getruckt heten mer solt ir wissen do ich mit
 der grossen bürden steyn zū der porten der stat einging daz mir von
 15 den hüttern nye wort czū gesprochen ward als die mich nicht gesehen
 mochten als ir wol wißt das sy yederman fragen ob er waz ze verzollen
 hab vnd nyemand vnbesücht durch gen lassen. Auch auf dem weg ich
 etliche meiner gevattein vnd auch ander person fand die mir wo sy
 mich sehen stätz zū sprechen vnd zū hauß laden derselben keyner mir
 20 yeczund nye wort zū gesprochen hat als die mein nit gesehen mochten
 vnd ze letst so ich mit grosser müe zū hauß komen bin mein verflucht
 weib vnd vermaledeiter teuffel mir für kame vnd mich ersehen het, als
 euch dann wol kunt ist wie die bösen falschen weyber allen dingen ire
 tugent entwichten vnd verlieren machen wo mir daz gelück beschert het
 25 das ich mich den säligisten man auf erden sprechen möcht vnd nun der
 vnsäligist aller welt beliben bin got erbarmt daz ich ye geboren ward
 [277^b] alles vrsach meins zenichtes weyb daz sy got schänd an leib vnd
 sele, darumb hab ich sy also außgericht vnd geschlagen als ir wol secht.
 Aber es ist vmb keynen ich muß wider an sie vnd ir bas lonen, ich
 30 weiß nit wie ich mich enthielt daz ich ir nit die kel abschneyd, ver-
 maledeit sey die stund do ich sy von erst ansichtig ward vnd sy mir ye
 in mein hauß kam, in solchen worten wider auffür zū ir lieff von neuem
 ze schlagen Do daz Bruno vnd Buffelmacho vernomen heten des gelei-
 chen theten als ob es sy ein fremde sach nām vnd wunder deucht zū
 35 eynander sprachen. Fürwar als Calandrin gesaget hat war ist, vnd so
 grossen willen ze lachen heten daz sy schir zersprungen wären, do sy in
 mit also grossem romor auffaren sahen das weib noch ein fart ze schlagen
 im engegen kamen vnd wider zůruck zohen zū im sprachen das weib seines

vngelückes keyn schuld het, sunder er selbs des vrsach wär dann do er weßt das die frawen soliche tugent verlieren machten solt er ir daz vor gesagt haben, domit sy sich het wissen ze hüten vnd im des selben tags nit wär vnder augen komen, aber got hat dir solichs gelücks nicht vergünnen
 5 wöllen vnd solt dir [277^c] nit beschert sein, dann du bist in meynunge gewesen dein getretten gesellen ze betriegen dann do du vernamest das der edel steyn bei dir was do soltest du dich deinem gesellen geöffnet haben vnnnd nit getan haben als getan hast dich von uns ze stelen, vnd nach vil manchen andern worten nit mit kleiner müe in vnd das weib
 10 wider in frid seczten, doch do bei aller traurig. Bruno vnd Buffelmacho im das hauß voller kislinge liessen von dann heym zû hauß essen giengen.

Wie ein probst eyn witwe lieb hat vnd von ir vnlieb gehalten ist vnnnd eynest bey ir meynet czeschlafen, do hete sy im eyn ire
 15 vngeschaffe meyd zû geleget, vnd der frawen brüder den bischof zû hauß fürten im seinen probst bei der meyd zeygten den er schwärlich büsset vnd in gefancknuß beschloß.

Fraw Elisa nit mit kleyner freude der ganczen gesellschaft ir histori zû end bracht hat, vnd die künigin Emilia gepot daz sy Elisa mit
 20 eyner andern neuen histori nachfolget die schnell also sprach. Erwidigen frawen wie münch pfaffen vnd clerici grossen fleiß [277^d] anlegen vnser gemüt zû irem willen zebringen als dann in vil manchen vnsern hystorien ist beweist worden, doch von in man nit so vil gesagen möcht das von in nit mer zesagen wäre, vmb des willen mein syn ist von ey-
 25 nem probst zesagen der do aller welt zeleyde ye wolt das in eyn edle frau vnd witwe es wär ir lieb oder leyd in lieb het, die in als eyn weise erbere frau handelt nach dem er wirdig was, nach dem vnd euch allen wissen ist wie wir den perg Phisola den man von hier sihet besiczen, do vor alter eyn mächtig stat was die heüt von tag als ir wol secht alle zer-
 30 stört vnnnd zerfelt ist, doch darumb iren bischoff nie verlorn hat vnd noch heüt bei tag eyn wirdig bistumb ist, vnd in der zeit nahend bei dem tûm vnd grossen kirchen ein edle fraw die was ein witwin mit hauß gesessen was, vnd was mit namen genant frau Picharda die den merern teyl des iares ir wonung do het, vnd mit ir zwen iung ire brüder
 35 ir woneten vnd haußten genüg erber vnd züchtig männer. Nun sich begab als dann güter witwin gewonheynt ist geren vnd vil in den kirchen

ze sein also auch dise erbere frau in dem tumb ging ir gebete [278^a] ze-
 sprechen Nun was sy noch gar eyn schön czüchtig weib wol künnend
 vnd aller tugent vol, vmb solcher irer schöne vnd tugent der probst von
 dem tumb zu ir vnmässig liebe gewan. in solcher brinnenden liebe in sy
 5 enzündet daz er des weder sterben noch genesen mocht vnd nach etli-
 cher vergangen czeit so beherczend was daz er selbs mit der frawen
 redt ir sein grosse liebe pein vnd schmerczen vmb iren willen saget vnd
 ir zewissen thet vnd batt das sy der liebe die er ir trüg von im aufnam
 vnd zefrid wäre vnd in als er sy lieb haben sölt. nun was der selbig
 10 probst eyn alt betaget man wol an synnen zermal hochfertig vnd hoch-
 tragent sich yeglicher grossen ere wirdig schäczet vnd nyemand im ge-
 leich achtet, vnd daz in maß das gar wenig person waren, die im wol
 wolten, vnd ob ye yemand was der sein genad het, so waz dise witwin
 die selbig die in weder sehen noch hören mocht, im neidiger was dann
 15 dem weetün ires haubts im über sein begeren weislich antwurt vnd
 sprach. Herr daz ir mich lieb habt sich ich gern darumb auch ich euch
 sol lieb haben. aber in solchem vnsern liebhaben kein vnzüchtig werck
 eren halben gefallen noch von [278^b] vns eyns zu dem andern sollen
 begert werden dann ir seit mein geystlich vatter vnd seit eyn briester
 20 vnd nächnet euch nun dolest gen dem alter das euch in vnzüchtigen vnd
 vnerbern sachen sol ketisch vnd züchtig halten. über daz bin ich keyn
 kind mer noch so iung das mir mer füglich sei noch mer züste solicher
 vnmässiger liebe zepflegen vnnd bin eyn witwe, so wißt ir wol waz zucht
 den witwin zugehört darumb werdt ir mir verzeihen des ir an mich be-
 25 geret habt, dann ich tät das in keyn weg nit, noch wölt das ir mir vmb
 solicher sachen willen huld trüget, noch ich euch vmb solcher sünd willen
 liebhaben möcht dann in keyn weg geschicket bin in solich sünd mer
 zefallen Do der probst vernam das er auf dise stund nicht anders dann
 wort von ir gehalten mocht nit weiter fraget als der der von dem ersten
 30 schlag erschrocken vnd sich überwunden sahe, doch nicht lang vergeen
 ließ vnnd nach etlichem tag wider anfang mit briefen vnnd potschaft die
 frawen do heym suchen thet vnd auch er selbs wann er sy in die kir-
 chen komen sahe ir den wege vertrat vnd mit ir begeret czereden, eyn
 soliches der frawen [278^c] verschmähnen vnd wee thün ward, doch ir
 35 bald gedacht solichebürde vnd schand ir ab dem halß zenämen, vnd
 das in solichem form als er dann wirdig wäre, seitmal er sy eynes soli-
 chen nit erlassen wölt doch vor eyn soliches iren brüdern wölt zewissen
 tün, vnd alles das der probst an sy begeret in saget vnd wie er ir we-

der in der kirchen noch vor der kirchen keyn rûe ließ vnd weiß sy sich wider in zethûn bedacht het, des selben ir die brüder do sy ir meynung vernamen ein volkomen vrlaub gaben. Nit lang darnach eynest gen kirchenn gieng, vnd als bald sy der probest der ir stätz wartet ersehen
 5 het ir entgegen kam vnd eynen sâligen morgen wünscht vnd in geleichem form als er ir geborner fretünd wâr mit ir anhûb zereden, vnd dô die frau in gen ir komen sahe auch sy im eyn solichen anpicke gab miteynander auf eyn ort gingen vnd der gût tûmprobste von netiem mit ir seiner liebe halben anhûb zereden. die frau nach eynem grossen
 10 seûfzen zû im sprach. Herr ich hab alwege sagen hören das keyn schloß nie so stark ward wo das täglich bestritten wâr es würd gewonnen vnd überwunden, also auch ich mir sprechen [278^d] mag, sich in mir begeben hat ir seit mir mit also süssen Worten vnd anderm vorgegangen das ir mich ganz ab meiner vorigen meynung bracht habt vnd
 15 geschickt bin seitmal ich euch also liebe vnd gefall eüern willen zethûn vnd ganz eüer eygen sein will. Der probest aller frölich vnd wol zemût czû ir sprach. Fraw ich danck euch auß ganzem gemût vnd grund meines herczen vnnd euch die warheit zesagen mich hat ser fremd genommen wie ir mir also lang habt mûgen so hert sein daz mir von keyner
 20 wann ich es bedenck nye mer zûgestanden ist, vmb des willen czû zeiten gesprochen hab Wären die frawen von silber sy wären nit eyns pfennings wert, dann ir keyne den hammerschlag möcht erleiden, doch laß wir das yeczund sten wo vnd wenn wöll wir vns bei eynander finden vnser inbrünstigen liebe eyn genügen czetûn. Dem die fraw antwort
 25 Mein außewelter lieber herr zû welcher stund es euch fûglicher ist, dann ich kan keynen mane dem ich die nacht icht ze verrechen hab, aber ich kan nit bedencken wo wir vns zesamen fûgten do sprach der probest. Fraw daz geschehe in meinem hauß oder in dem eüern die [279^a] frawe sprach. Herr ir wissent wol das ich zwen brüder hab die
 30 bei tag vnd nacht mit iren gesellen zû hauß kômen, so ist mein hauß enge, darumb nit wol fûglich ist vns darinn bey eynander cze sein, es wâr dann sach das ir still vnnd als eyn stumm steen wölt nicht reden noch icht sprechen vnd in der finster als die blinden gedult haben wölt, wo euch das nit mûsam wâr, so möcht wir wol in meinem hauß bei eyn-
 35 ander sein, dann meiner kamern sich nyemand annymet noch darein geet dann ich alleyn, wol meiner brüder kamern an der meinen ist vnd keyn wort in beyden kamern so still nit mag geret werden, das man dasselbig in der andern kamern nicht høre. Der probst sprach Liebe fraw

still zesein vnd nit zereden nun ich bei euch sey sol mich nit irren, für
 eyn nacht nicht zereden also lang daz ich vns anderschwo ze sein ver-
 sehe do wir on alle sorg vnser freude miteynander haben mügen Die
 fraw sprach. herr daz stee czü euch, doch eynes ich euch bitt das eyn
 5 soliches bei euch beleib. Der probst sprach frau des habt keyn czwei-
 fel, vnd wo wir auf dise nacht bei eynander sein möchten wär mir von
 herczen lieb gewesen, die [279^b] fraw sprach. Herr das sol sein im
 stund vnd zil gab czü ir ze komen mit dem von eynander gingen. Nun
 het die erber frau eyn meyd nicht sere iung on maß vngestalt mit dem
 10 vngestaltesten anplick der an frawen ye mer gesehen ward, sy was
 schilhendt mit rinenden augen krummen maul nydere breyte nasen groß
 lepsen den mund vol übler gesezter zän ein gelbe böse farb nit anders
 dann als sy den sumer ze Poczen an der Etsche verbracht het ich möcht
 euch irer vngestalt nit gesagen. sy was an henden vnd füssen krump
 15 vnnd lam vnd was genant Ciuta vnnd vmb irer grausamen gestalte wil-
 len von yederman geheyßen was Ciutacza. Der selben meyd die fraw
 zü ir in geheyme rüffet vnnd czü ir sprach. Ciuta ich wölt von dir ein
 grossen dinst haben thüst du mir den so wille ich dir eyn neüe hemd
 geben. Do sy eyns neüen hemdes gedeencken höret bald sprach. fraw
 20 gebt ir mir eyn neües hemd ich sol mich euch zeliieb in eyn feür werffen
 ich geschweige anders zetün daz sey im namen gots sprach die frawe
 das ich von dir haben will das ist, das ich will das du heint in meinem
 pete vnd kamern bei eynem man [279^c] schlafest vnnd dich so du best
 macht freündlich gen im erzeigest, aber du wirst dich hüten bei deinem
 25 leib mit im icht zereden domit du von meinen brüdern nit gehört wer-
 dest, die neben meiner kamern als du wol weyst schlafen, so will ich
 dir eyn neü schön hemde geben vnd vileicht domit ein par neüer schüch.
 Do sprach Ciutacza. Frawe euch czeliieb ich schlieff bei sechsen wo ich
 weßt eyn neü hemd ze verdienen ich geschweig bei eynem Do nun die
 30 nacht komen was her tumpobst sich bald fügt nach dem die fraw im
 gezilt vnd czü gesaget het, vnnd do die zwen iungen der frawen brüder
 in irer kamern warn sich hören liessenn domit der probst in stille vnd
 in der finster in der frawen kamern komen möcht, vnd als bald er
 darein kam bald zü pet ging nach dem im die frawe befolhen het vnd
 35 auf dem andern teyl wes sich die meyd halten solt domit sy von dem
 probst nicht erkannt würd von der frawen vnderriicht was vnd verbor-
 gen sich an der frawen stat zü dem probst an das pet leget, vnnd er
 nicht anders meynet dann wie er bey der edeln frawen läg do lag er

bei der vngeschaffesten bûbin die [279^d] man in hundert landen hete
 finden mûgen, die er mit grossen seinen freûden in sein arm beschloß
 vnnnd vngeret sy anhûb czehalsen vnd kûssen, desselben gleichen das vn-
 gestalt weib in tet, vnnnd er als der begierig was mit ir anhûb ze scherzen
 5 mit ir sein freûd czehaben vnnnd die bauffälligen gûter czebesiczen der er
 lange zeit begeret hete. Do die edel fraw disen kirchtag zû bereyt het
 zû iren brûdern sprach, daz sy das ûbrig tûten nach dem ir ordnung
 vor gegeben was bald aus dem hauß gen dem placze vnd der grossen
 kirchen wercz giengen, in dem in daz gelûcke williger was dann sy
 10 selbs heten begeren mûgen, vnd den bischoff an der kûle auf dem placz
 spacziiren geen funden, dann czû der zeit die hieze groû was. Der bi-
 schoff zû in sprach er willen het mit in eyn schlaftrunck zetûn e er zû
 hauß gieng, des sy willig waren, dann eyn solichs sich eben zû irer
 meynung geleichet sich mit in auf den weg macheten do sy in in eyn
 15 ires frisches hûfflein fûrten vil liechter auf anzûnten vnd mit grossem
 lust von irem kûlen wein miteynander truncken Do sy nun gar wol ge-
 trunckenn heten die iungen gesellen czû [280^a] dem bischoff sprachen.
 Herre seitmale vns euer genade so vil dinst getan hat vnser kleines
 heûßlin seit komen ze sehen so wûll wir euch bitten euch liebe eyn ander
 20 ding in vnserm hauß ze sehen das wir euch in besunderheyt ze sehen
 behalten haben, der bischoff sprach. Er das geren sehen wûlt, cyner
 von den iungen eyn grosse angezûnte fackeln in sein hand nam dem
 bischoff vorgienge alle ander dem bischoff nachfolgeten gen der kamern
 wercz darinn der bischoff mit dem wilden tier sein freûd het vnd schlieff
 25 gingen der do mit grosser eile e der bischof in die kamern kam bei dreyn
 meilen auff dem kâeltiere geritten was, des er etwas mûed vnd laû
 worden was, doch bei dem allem das vngeschaffen tier in sein arm be-
 schlossen hete mit dem er also rûet. Der iunge mit der fackel do er an
 die kamer tûre kam die bald ôfnet mit dem liecht darein gieng, vnd ze
 30 nâchst nach im der bischoff nach dem alle ander do ward dem bischof
 sein thûmprobst geweiût mit Ciutacza in seinen armen. in dem der probest
 erwachet das groû liecht vnd das volck mit sampt dem bischoff ersahe in
 mit grossem erschrecken sere fremd name [280^b] scham vnd forcht hal-
 ben sein haubt vnder die decke zoch, Der bischoff anhûb im ze flûchen
 35 vnnnd mit scheltworten ûbel auûricht, im das haubt auû der decke ziehen
 schûff ze sehen bei wem er geschlafen het vnd do er das sahe vnnnd sich
 also von der frawen betrogen fand, vmb solicher schand willen der trau-
 rigest vnd betrûbtest man was der ye warde, vnnnd durch des bischoffs

gepot sich bald anleget, vnd vmb solicher begangner sünd willen mit gewalte vnnd gûten trucken streychenn in des bischoffs hof gefürt ward. Do der bischoff alle sach von anefang zû ende vernâmen wolt das im zwen iungen der erbern frawen brüder alles sageten vnnd czewissen the-
 5 ten was sich sein vnd irer schwester halben verlauffen het. Do das der bischoff vernam der erbern frawen grosses lob saget, des selben gleichen den iungen thet das sy so mässig gewesen waren, vnd nicht ir hend in des bösen pfaffen blût heten verunreynen wöllen als er dann wol wirdig gewesen wâr. Dise sünd der bischoff in weynend vnd vierczig tag in
 10 gefäncknuß büssen thet. aber die liebe vnd ir widerwärtigkeyt darauff mer dann neun [280^c] vnd vierczig machten on das das er in langer zeit on geschreye über die weg nicht geen mocht yederman auf in zeyget vnd sprachen. Secht an vnd nâmet war des neüen preütigams der do ist Ciutacza man Solche wort im so grosse pein brachten daz er schier
 15 tod wâr Also die edel weis erber frau ir den pfaffen ab dem halß name, vnnd Ciutacza das neüe hemde gewan.

Wie drei iung gesellen eynem richter do er zû gericht saß sein nyderkleyd on sein wissen ab dem hindern zugen.

Emilia ir histori czû gûtem ende bracht hat, die wirdig gesellschaft
 20 der edeln frauen lob vnd danck sagten daz sy den bropst also zû bereyt het. Nach dem die künigin zû Philostrato sprach. Juncker es ist an euch czesagen, der antwurt vnd sprach. Mein allerliebsten frawen den iungen genant Maso den fraw Elisa nit lang ist genant hat der mich macht sten lassen eyn histori die ich euch czesagen mir für genomen
 25 hete, vnd euch eyn andre von im vnd etlichen seinen gesellen sagen wille, wie wol die selbig mein histori on [280^d] vnzucht ist, doch etliche wort darinn begriffen werden die ir euch czereden geren schamet. Aber also wol ze lachen ist daz ich es nicht gelassen mag ich muß euch daz sagen. Nun als euch allen wol mag wissend sein wie das in vnser stat
 30 stâtes fremd richter komen, vnd den merern teyl allweg Marchesâner sein, die gemeynlichen schlecht grob vnbeherczend männer sein, kârcklichen leben von grober natur alle sein das es eyn schand ze sagen ist vmb solcher irer karge geitigkeyte willen mit in auch gar schlechte doctor vnnd notari füren wo sy hin czû richtern begert werden e duncken
 35 von dem pflüg dann dem studio genomen sein. Nun heten vnser herrn eynest eynen hauptman ze richten erwelet, der vnder andern seinen

doctoren vnd richtern einen mit im gefürt het der was genant doctor
 Nicolo von sant Lepidio der mer eynem koler dann eynem doctor geleich
 was. der selbig was gesezt ze verhören zwitracht krieg vnd wer dem
 andern schuldig was, sein vrteyl darüber ze sprechen, vnd wie wol zů
 5 zeiten etlich vor dem rechten nit ze schaffen haben dannoch gern zů-
 hören wie die fremden richter vrteylen vnd richten. [281^a] In solchem
 sich begab das an eynem morgen der vor genant Maso eynen seinen
 gesellen sůchen ging der im ongefär vor dem richter zů gesicht kame.
 Der selbige richter Maso eyn netter außgeflogner vogel daucht daz was
 10 der e genant doctor Nicolo, des weis gestalt vnd gepärd er bedencken
 ward. dann er an der gürteln eyn pennal vnd kalamal hangen het den
 rock lenger dann den mantell vil ander seltsamer ding an im hiengen
 die weder doctor noch hochgelerten mannen zůgehören, vnd das merck-
 lichest des er an im war nam nach seinem geduncken, daz was eyn weite
 15 grosse nyderwat oder brůch wie er ir das nānnen wölt, die im also siczend
 zů halbem bein über das knye abwercz hing des Maso nit lang zů sahe
 sten ließ das er do sůchen ging vnd sich von nettem vmb thet czesůchen
 das im zů dem des er zetůn willen het fůglich was vnd zwen sein ge-
 sellen fand der eyn genant Ribi der ander Mathes ir yeglicher nit myn-
 20 der kurzweilig als Maso waz, zů den er sprach. Wäre es euch nit eyn
 verdiessen vnd wäret mit mir gangen ich wölt euch wärlich den wun-
 derlichsten quasimodeo weisen den ir alle euer tag ye mer gesehen
 habt [281^b] Also alle drei miteynander in des hauptman palast gingen
 do weiset Maso seinen gesellen dem richter mit der weiten brůch des sy
 25 von ferren ernstlich anhuben ze lachen. Nach dem sich czů der richt-
 panch nähenten do der richter czerichten saß, die von der eben der
 erden etlich staffeln erhöhet was darvnder man on grosse müe schlieffen
 mocht, über das auch daz pret darauf der richten mit den fűssen stůnd
 czerbrochen was, vnd eyn groß loch het in solicher maß das man da
 30 durch mit dem arm on müe greiffen mocht. Do daz Maso gesehen het
 zů seinen gesellen sprach. Ich wille das wir dem richter die brůch gar
 abziehen dann ich hab bedacht wie wir das on sorg vnd müe gar ge-
 rincklich thůn mügen. das ir aller gefallen was vnd des vnder in bald
 ordnung gaben vnd den nächsten tag darnach wider dar kamen, vnd
 35 do am meysten volck in dem hofe was ir einer vnder die panck kroch
 do der richter saß, vnd Maso auf eynem teyl vnd der ander auf dem
 andern teyl durch daz volck zů dem richter trungen, zů dem der eyn
 sprach. Herr der richter ich bitt vnd beger durch got e der dieb der

euch an der seiten stet von dann gee [281^c] ir mit im schaffet, das mir daz mein das er mir gestolen hat wider geb, das was eyn par gûter filzschûch die ich nicht ein monet ist solen ließ. Ribi auf der andern seiten noch leütter schrey. Herr der richter glaubt im nit er ist ein schalck
5 vnd will euch betrügen, vnd weyßt wol das ich herkomen bin über in ze klagen von eyns lideren watsacke den ich im lech, darumb er sich vor mir auf den wege gemachet hat mir ze tûn des er von mir wartet vnd anhebt von alten filczschûchen ze sagen. Maso Ribi nicht mer wolt reden lassen beyde laut vor dem richter schryen, yegklicher wolt recht
10 haben, Der richter aufstünd sy beyd bas ze vernâmen, do das Mathes der vnder der banck verborgen was sahe das der richter aufgestanden was durch daz loch hinauf greyf den richter bei der brûch die im auf halb knye hieng nam vnnd hinab zoch dann er was eyn kleyn schmal man vnd die brûch weit alsdann alle wâlsche brûch sein Do des der
15 richter empfand in fremd nam vnd nit versten mocht wie das zû gieng, das gewand über die scham ziehen vnd nyder siczen wolt die nyderwat wider hinauf ze ziehen die zwen im in den rock fielen [281^d] beyd eyner hin der ander herzugen laut schryen. Herr der richter ir thût vnrecht sprach Maso sol ich das mein also verlieren ich kome von euch nit ich
20 hab dann die vrteyle empfangen, in solchem geschrey vnd hin vnnd her ziehen von den czweyen der richter eyn klein fürpas getrungen ward vnnd mit den füssen auß der brûch kam vnd von yederman gesehen ward daz Mathes mit der brûch weg gieng. Do nun die czwen sahen das sy ir sach zû end bracht heten Ribi sprach, ich schwere zû got ich sol euch
25 diser sache anderschwo czû komen, in beyd liessen vnd so sy beldest mochten sich auß dem richthauß fügeten. Der richter als eyn halber schlafftrunckner nach seiner brûche gegenwirtig yederman vnder dem gewand sûchet die wider hinauf meynet ze ziehen, vnd do er ir nicht fand ze hand gedacht daz die zwen in mit fleiß gehalten heten im das
30 zetûn in balde nach fragen ließ wer sy wâren vnnd sy meynet ze strafen, vnd do er sy nit gehaben mocht bei dem bauch gotes schwûr er muß sy erkennen ze vernâmen ob zû Florenz die gewonheyt wâr wenn die richter czû gericht sâssen das man in die brûch on ir wissen [282^a] abzug. Do das der hauptman vernam auch sein teyl romor darauß machet, nach
35 dem im von eynem seinem gûten gûnner ward cze versteen geben, wie er doctores vnd nicht filczpauren auß dem pflûge mit im solt gen Florenz gefûrt haben, also vmb des besten willen man schweyge vnnd die sach fallen ließ.

Wie Bruno vnnnd Buffelmacho Calandrino eynen schweinen pachen stelen vnd im ze versteen geben den mit wernacza wein vnd galli von grünem ingewer gemachet mit hunczkot vnd aloe gemischet mit czucker überczogen im zeessen gaben, durch dise dinge
 5 in überweisen das er im selbs den schweinen pachen müßt gestolen haben vnnnd eyn andern pachenn kauffen müßt, wolt er nicht das sy es seinem weib sageten vnnnd er von ir nicht geschlagen sein.

[282^b] Philostrato sein red vnd histori so bald nicht verbracht het daz die künigin Philomena ir gepot nicht geben het, die mit
 10 fräwlicher czucht anhüb vnd sprach. Ir wirdigen frawen in geleichem form als Maso der gesagten histori vrsach gewesen ist als ir wol vernomen habt weder minder noch mer ich von Calandrino vnd seinen gesellen gezogen bin euch auch ein netie histori zesagen das euch vileicht nit mynder gefallen sol als die gesagt histori getan hat.
 15 wer Calandrin Bruno vnnnd Buffelmacho waren thût nicht not euch das zesagen. Nun fürpas zereden so sprich ich wie der selbig Calandrin eyn sein kleynes gesäß nicht ferre von vnser stat het daz im zû eyner heymsteuer zû dem weib was gegeben worden, vnd vnder ander gült die er des iares darvon het das was alle iar eyn veyßt
 20 schwein, vnnnd allweg vmb aller heyiligen tage sein gewonheit was mit sampt dem weib auf das selbig sein gesäß zegeen das schwein abzestecken vnd do einzusalzen Nun vnder andern malenn eyusmals sich begab das sein weib nicht wol gesund noch güts müts was vnd Calandrin [282^c] alleyn auff daz dorff müßt das schwein abzeschlahen. Das Bruno
 25 vnd Buffelmacho bald vernomen heten das weibe kranck welsten vnd in alleyn in dem dorffe vernamen sich beyd auf den weg machten, vnd zû eynem pfaffen gingen der ir beyder grosser freünde, vnd Calandrino nächster nachpaur was mit im etlichen tag in kurzweile czesteen. Nun het Calandrin denselben tage do die czwen czû dem pfaffen kamen das
 30 schwein abgestochen, vnd der zweyer die als sein güt gesellen waren bei dem pfaffen wargenomen vnnnd gesehen het, in bald zû im rüffet vnd czû in sprach, ich will das ir komet vnd sehet was güten haußwirt ich bin vnd sy zû hauß füret den schweinen pachen zeyget den sy schön veyßt vnd wol gestalt sahen vnnnd wol vernamen das in Calandrin für sein
 35 haußgesind wolt einsalzen. Zû dem Bruno sprach, du bist eyn grob eynfältig man verkauff den pachen vnnnd laß vns vmb das gelt eyn güten müß schaffen vnd sprich zû dem weib er sei dir gestolen worden. Calan-

drin sprach Awe neyn sy gelaubet mir sein nicht vnd iaget mich zů dem
hauß auß nit rat mir das, dann ich tů sein [282^a] in keynen weg nit.
dise wort gaben Calandrin nit czeschaffen. dann nach seinem geduncken
on gefäre geret warden, vnd sy beyd doch nach irem geduncken nicht
5 mit ganczem ernst czů dem nachtmal lůde, aber des nicht aufnamen,
dann an seinem angesicht sein meynung erkannten von im vrlaub namen
iren weg gingen, Bruno zů Buffelmacho sprach, wölln wir heynt Calan-
drino den schweinen pachen stelen, Buffelmacho sprach nun wie, Bruno
sprach, laßt er in do er yeczund ist so hab ich den syn gesehen so thů
10 wirs sprach Buffelmacho warumb aber nicht vnnd schaffen vns mit dem
domine eynen gůten můt, der pfaffe der do mit in was sprach das wölt
ich wärlich geren sehen Bruno sprach, do můß wir vnsere kůnst brau-
chen, doch wißt ir wol das Calandrino geitig ist vnd geren auf ander
leüt speis essen vnnd trincken get darumb gee wir vnnd fůren in mit
15 vns in die tafern, vnd der domine thů des gleichen als ob er vns wölt
eren vnd laß Calandrino nicht beczalen so wird er gar redlich trincken
wenn er vernimet das er nit bezalen sol vnd wirt e eyn wenige truncken
werden dann nicht vnd wirt vns mit im [283^a] heym fůren, wo er das
tůt so můg wir on zweifel tůn was wir wölln, dann er ist alleyn in dem
20 hauß. Do Calandrino mit den gesellen in das weinhauß kame vnd ver-
nam das der pfaffe czalen wolt redlich anhůb zetrincken wie wol er sein
nit sere notturfťig was do freylich daran gieng, vnd nun gůte czeit der
nacht vergangen was er auß der tafern czů hauß wercz gienge in der
meynung schlafen zegen, vnd auf die nacht nicht anders ze essen, vnd
25 als bald er czů hauß kam als der do wol gepffiffen het zů pet ging vnd
der haußtür offen vergaß vnnd vngesperret ließ, Bruno vnd Buffelmacho
mit dem pfaffenn das nachtmal essen gingen nach dem sich bedachten
wie sy in Calandrino hauß komen möchten den schweinen pachen ze-
nāmen, sich auf den wege machten zů dem hauß kamen, vnd zů irem
30 gelück die haußtür offen funden des sy fro vnd frůlich waren bald darein
in stille gingen den schweinen pachen namen in des pfaffen hauß trůgen
vnd schlafen gingen, vnnd do Calandrino den wein verdeůt hete vnnd
der rauch des haubtes im verrochen was aufstůnde ũber die stiegen ab
in das hauß gieng [283^b] die haußtür offen fand vnnd des pachen nicht
35 sahe sere erschrack bald zů den nachpauern lieffe sy alle fraget ob ye-
mand seinen pachen gesehen het, vnd do er sein nicht fand grosse romor
vnnd geschrey anfieng vnd sprach. Awe mir nun wie sol ich nun meinen
dingen tůn mein weib wirt mich vngelůcke anlegen, in dem Bruno vnd

Buffelmacho Calandrin geschrey vernomen heten im engegen kamen cze
 vernämen was er doch von dem verloren pachen saget, vnd do er sy
 ersahe halber weynend czû in sprach. Awe mir mein allerliebsten
 freünd mir ist mein schöner schweiner pachen gestolen worden Bruno
 5 gemeyniglich im in das ore raumet vnd zû im sprach. Es ist eyne wun-
 dere das ich dich ein fart in allen deinen tagen hab weiß gesehen, wie
 so sprach Calandrino ich spote wärlich nit ich sage euch die ganczen
 warheyte, das weyße ich gar wol sprach Bruno schreye nun laut damit
 yederman gelaub im sey also. Calandrino noch fester schrey vnd schwûr
 10 zû got er saget war der pache wäre im gestolen wordenn, Bruno sprach,
 schrey nun sere mach dich hören, Calandrino sprach, du wirst machen
 das [283^c] ich die sele dem teuffel gib daz du mir nicht gelauben wilt,
 vnnnd solt ich an den galgen gehangen werden so spriche ich vnnnd sag
 die warheyte, er ist mir gestolen worden. Do sprach Bruno, nun wie
 15 mage das gesein dann ich sahe in nächsten vnd du wilt mir ze versten
 geben er sey dir gestolen worden. Calandrin sprach im ist wärlich als
 ich dir sage. do sprach Bruno mag es gesein, wärlich wärlich sprach
 Calandrino ia es ist leyder war got erbarmes ich bin der verdörbest man
 der ye warde vnnnd weyß nicht wie ich mit eren heym vnd von meinem
 20 weib vngeschlagen komen sol, dann sy wirt mir nit gelauben, vnd in di-
 sem iare ich keynen fride von ir haben würd. Do sprach Bruno, nun
 das mich got gesegen so ist es wärlich übel vnd nit wol getan ist im an-
 ders als du sagest, aber du weyst wol das ich dich gester leret das du
 also sprechen soltest, darumb wölt ich nit das du vns mit sampt deinem
 25 weib czû narren machest vnnnd dir veindschaft verdienest. Calandrin von
 neuem anhüb zeschreyen vnnnd sprach. Awe ich möcht deiner rede ver-
 zagen vnnnd vnsynnig werden got vnnnd allen heyligen flüchen. [283^d] Es
 ist war was ich sage das mir in diser vergangen nacht mein schweiner
 pache ist gestolen worden. Do sprach Buffelmacho, seitmal im also ist
 30 so sol man süchen vnd besehen ob man in widerfinden möcht. Nun
 durch waz weg möcht man das tûn sprach Calandrino. do sprach Buf-
 felmacho fürwar er ist nicht auß India herkomen wer daz getan hat. es
 müssen deine nachpauere gewesen sein, darumb möcht man sy czesamen
 bringen, ich hab ein kunst vnd experiencz vorhanden mit geweichtem
 35 kâs vnnnd brot, do bei man zehand sieht wer solliche diebstal gethan hat.
 Ja sprach Bruno du macht wol mit kâs brote tûn als du sprichest. Es
 sein aber etlich die hie vnnb nahend die do edel vnd mächtig sein des
 mir nicht zweifelt das sy das nicht gethan haben, derselben käme keyner

her, nun wie möcht man dann tûn sprach Bufelmacho do sprach Bruno. Man sol das tûn mit gûten gallen vnn̄d grünen ingwer vnd vernacia wein, vnd dieselben edeln darczû laden zeessen vnn̄d trincken so komen sy geren vnd verdencken sich keynes argen, so mag man die gallen vnd
5 ingwer geleich als wol benedeyen als kâs vnd [284^a] brot. Wârlich du sagest war sprach Buffelmacho, vnn̄d du Calandrino was ratest du darczû was deucht dich zethûn. Do sprach Calandrino, lieben freund ich bitt euch vmb gotes willen seit mit gehilffich das ich nun weist wer mir daz getan het ich gâb mir sein halben fride. Nun wolan sprach Bruno
10 ich bin bereyt in die stat in deinem dienst zegeen wo du mir so vil gelts gibst das ich kauffen mag wes wir zû disen sachen notturftig sein. Calandrin an gelt bei vierczig schillingen bei im het alle Bruno gab der sich bald gen Florencz zû eynem seinen gûten freunde fûget der eyn specier was vnd kauffet eyn pfunde gûter eingemachter gallenn von
15 schlehen oder pflaumen, vnd grûn ingwer, do bei ließ er im zwû gallen von aloe vnd hunczkote machen den andern geleich vnd ließ die mit zucker übercziehen das sy den gûten außwendig geleich warn vnd dieselben zwû huncz gallen zeychen ließ domit er sy von den gûten kennen möcht, darnach er eyn gût flaschen von vernacza de cornilia wein kauf-
20 fet mit dem sich wider zû Calandrino vnd seinen gesellen auf das dorff do er sy gelassen het machet vnd zû Calandrin [284^b] sprach. Nun gedencck das du bis morgen alle die darauf du zweifel hast die dir den schaden sôllen getan haben zû hauß ladest mit dir zetrincken dann es ist bis morgen feirtag vnd werden alle geren komen. so will ich vnd Buf-
25 felmacho heint die gallen seggen vnd bis morgen dir sy czû hauß bringen, vnd ich dir zeliieb wenn man colaczen thût selbs mit meiner hand geben will thûn vnd sprechen als darzû gepûrt zetûn. Calandrino thet als Bruno gesprochen het eyn schöne gesellschafte von iungen purgern vnn̄d pauren czesamen bracht die zû der zeit in dem dorff waren. Bruno vnn̄d
30 Buffelmacho des morgens mit der scateln vnd irem confection vnd gûten flaschen wein für die kirchen vnder die linden kamen, vnd yederman in circels form vmb die linden stelten, nach dem Bruno anhûb vnd sprach. Lieben herren ir solt wissenn die vrsach vmb der willen ir hergeladen seit die ist, doch ob sich ander begâb dann eûer gefallen wâr das ir
35 über mich nicht czeklagen habt, do vnserm gûten freunde Calandrino ist gester zenacht sein schöner schweiner pache gestolen worden vnd kan nicht vernâmen wer im [284^c] das getan hat, vnd nyemand anders dann eyner vnder vns allen das muß gethan haben vnd denselben seinen

pachen widerzefinden er eüer yegklichem eyn gallen von zucker vnd
 confect hat machen lassen darzü von einem edeln wein euch will cze-
 trincken geben, darumb eyn yeglich sich gar eben vor bedenck welicher
 im den schaden gethan hat, derselbig mag des confect nicht essen noch
 5 verdeüen es wirt im eitel gift in seinem mund vnnnd müß die außwerffen,
 darumb wär mein rat e er im soliche schande gegenwirtig vnser aller
 züzug, das er eyn solchs in peichts form hie dem domine vnserm gütten
 pfarrer zewissen thät das deucht mich güt so wölt ich diser sache ge-
 schweigen vnnnd nicht fürpas süchen, yegklicher sprach er wölt das con-
 10 fect nämen vnnnd essen vnnnd in disen sachenn vnuerdacht sein. Do nun
 Bruno ir aller meynung vernomen hete sein ordnung gab vnd Calandrino
 auch für eynen name zü in stellet das confect zeessen, nach dem anhübe
 eynen nach dem andern eyn gallenn von confect gab, vnd do er an Ca-
 landrino kam im der gallen eyne gab die von hunczkot vnd aloe gema-
 15 chet [284^d] was. die er bald in den mund warff anhüb czekeßen, vnnnd
 als bald die zung des aloe empfand als der do on maß piter ist. Calan-
 drin derselben piter nicht erleiden mocht sein angesicht ward rümpffen
 vnd wider außwerffen, des sich die vmb in stünden einander ansehen
 wurden sy fremd nam des das Calandrino thet vnd Bruno noch yeg-
 20 lichem die seinen nicht geben het wol vernam das Calandrin saur sahe
 aber nicht des gleichen thet als ob er icht vernäme, doch nicht lang
 vergieng sich gen Calandrino keret der noch stätēs vndeüet vnnnd auß-
 warff zü im sprach. Calandrin was will das bedeütenn vileichte was an-
 ders dich machet vndeüen, nym bald hin eyn andre vnd im die andern
 25 gallen von aloe gemacht gab vnnnd in den mund schob vnnnd fürpas den
 anderen gabe den er noch nicht geben het, vnd het Calandrino die erste
 gallen piter gedaucht so daucht in die zehen malen pitrer, vnd grosser
 scham halben ir nicht außwerffen dorst vnnnd also zerkeüt in dem mund
 hielt mit zäherden augen groß als die hasellnuß die marter des auß-
 30 werffen verbeiß, doch do er daz nicht lenger erleiden mochte [285^a] auß
 warff als er des ersten gethan het, in dem Buffelmacho den die das confect
 gessen heten zetrincken gab, darnach alle gleich mit sampt Bruno spra-
 chen. Calandrin im selbs sol den pachen gestolen haben vnd vil manche
 waren die in sere häftiggliche mit worten straffeten das er sich soliches
 35 gen in verdacht het mit dem alle von dann schieden. Bruno vnnnd Buf-
 felmacho alleyn bei im beliben Buffelmacho zü im sprach. Ich hab sein
 stätēs besorget vnd fürwar gelaubet, du habest es selbs getan vnd wöl-
 lest vns ze versten geben der pache sey dir gestolen worden domit du

vns nit zů den bratwürsten laden bedürffest oder vns den wein zalen von dem gelt das du darauß gelösest hast. Calandrin der die piter des aloe noch nichte verdeüet het anhüb bei gott vnd allen heyligen zeschweren wie er soliches vnschuldig wäre, das sy in zihen. ia gar wol
 5 wer will dir aber das glauben socie sprach Bruno sage nun die warheyt hier ist nyemant der es deinem weib sage wie vil hast du darumb gehabt sechß oder siben. Do das Calandrin vername schier verzaget het. Zů dem Buffelmacho sprach, Nun merck gar eben socie mir [285^b] hat eyner von den die yeczund hie getruncken haben gesagt wie du ein
 10 iungs schöns meydlein hiebei zenächst huldest der du alles das dir werden mage zů tragest, vnd der mir daz saget fürwar gelaubet vnnd sprach du den schweinen pachen do selbest hingetragen hetest, du hast gelert vnd dich gar eyns güten angenommen yederman zebetrügen du fürtest vns auch nicht lang vergangen ist nach dem pach vnd wasser abwercz edel
 15 vnd schwarcz steyne zesüchen, vnnd do du vns an bischot brot ein geschiffet hetest do giengest du verstolen darvon vnd woltest vns glauben machen du hetest den edeln steyn funden also meynest du vns yeczund auch zethün mit deinen seüen pachen den du deiner huren geben oder in vileicht verkauffet hast vns wilt ze versten geben er sey dir gestolen
 20 worden wir haben dich nun dolest wol erkante vnd wissen dein gewonheyte du macht ir vns keyne mer thün, wir habenn vns vmb deinen willen gemüet vnd alle ding versücht ob wir dir hinder deinen schweinen pachen helfen möchten als du dann wol gesehen hast, darumb wir billich vmb dich auch was verdient haben [285^c] vnd ist vnser meynung
 25 von dir in widerkerung vnser mü eyne par veyßter capaun zehaben do wiß dich nach zerichten oder wir sagen alles das du getan hast deinem weib vnd do Calandrino sahe das im nit gelaubet was sere betrübt vnd vnmütig vnd seines weibs in keynen weg erzürnen wolt vnd gab den zweyen eyne gůt par capaun die sy mit sampt dem pachen heym gen Florenz trügen, Calandrino den schaden vnd vngelück liessen.

Wie eyne student eyne iunge witwin bület die eyne andern lieb het den sy eyne lang herte kalte winter nacht in einem iren hof in den schne steen machet ir czewarten, die er darnach zů mittem augsten nackend auf eynem öden turen an der heysen sunnen vnnd
 35 an den fliegen steen machet.

Die edeln frauen des armen Calandrino vngelücke lachten vnd des

noch mer gelacht heten wär in nit leyd [285^d] gewesen das die die im
 den schweinen pachen stalen sich nit benügen liessen, auch darzü im
 die capaun namen. nach dem die künigin Pampinea ir gepot thet für-
 pas zesagen. sich nicht lang saumt anhüb vnd sprach. Mein lieben fra-
 5 wen es begibt sich vil dicke daz die kunst von der kunst betrogen wirt,
 darumb nicht allwege güt ist im freud zenämen ander leüt zebetrügen,
 des wir in etlichen gesagten historien gar wol gelachtet haben, der keyne
 ist gerochen worden, darumb mein syn ist euch derselben auch eyne
 zesagen des ir on zweifel e leyd pein vnd schmercen haben solt dann
 10 des zelachen. Das ist wie sich eyner mit ganczer gerechtikeyt eynes
 seinen empfangen widerdrieß an eyner vnser purgerin rach, vnd das
 sich schir mit dem tod ires leibs ergangen het, vnd hoff solche mein
 histori vns nucz vnd frumen bringen soll vns czebetrügen lassen dester
 bas zehüten wissen. Es sein nicht vil iar vergangen das in vnser stat
 15 gar eyn schön iunge fraw wonet gerad von leib schöne von gestalt vnd
 von gemüt sere hochtragend genüg erber vnd edel von geschlecht genüg
 gelücksälig in iren geschäften, vnd [286^a] was mit namen genant frau
 Helena die ires mannes ein witwin beliben was vnd keyns mannes zü
 götlicher e mer begeret, dann zü eynem schönen iüngling on maß in
 20 liebe enzündt was alle andre ire sach steen ließ dem alleyn außwartet,
 vnd durch werck eyner irer meyd zü der sy ir getrawen het oft vnd
 dicke grosse freud ir mit dem iungen irem bülen gab. in dem sich be-
 gab das eyn edel iunge man von vnser stat lange zeit zü Parisi in der
 hohen schüle gestudiret hete, nicht das er sein kunste nach dem pfen-
 25 ning wert verkauffen wölt als vil manche thün, sunder gerechtikeyt ze
 erkennen vnd die als billich wäre brauchen als dann den edeln zethün
 zügeführt. Nun sich begab das der selbig student vnd edelman von Pa-
 risii wider zü hauß kam do er vmb seiner kunst tugent vnd adels willen
 sere geeret was. vnnd als andere erber purger mit zucht sein leben
 30 füret, aber sich oft begibt in den do bei grosse kunst vnd weißtumb
 ist das dieselben gleich als bald von der liebe gefangen werden als die
 schlechten vnnd vngelerten sein nach dem disem iungen edeln studenten
 züstand mit namen genant Rayniri [286^b] der eynes tages auf eynenn
 kirchtag spacziren gangenn was, do im die vorgenant frau Helena czü
 35 gesicht kam alle in schwarcz gekleydet als vnser witwin gewonheyt ist.
 Dieselbig fraw Helena in nach seinem geduncken die schönest frawe
 sein dauchte die er mit augen ye übersehen het, vnnd denselben ob
 . allen mannen sälig schäczet dem sy got nackend in seine arm gäb, sy

sere lobet vnd in zucht stäts ansahe wol gedacht die grossen ding man on kleyne müe nicht gehaben möcht, vnd im gänzlich fürname allen seinen willen mit ganzem vleiß zů irem dienst zekeren versůchen wůlt ob er ir huld erwerben möcht vnd ir freundschaft zů seinem willen ge-
 5 haben möcht. Die iung frawe nicht als eyn witwin mit den augen gen der erden zesehen ging, sunder mit grosser kunst vnd aufgerichitem angesicht ir augen hin vnnd her warff als dann der grossen bůlerin gewonheyt ist, vnnd bald erkant wer sy mit begir der liebe ansahe vnd des iungen studenten sehen wol wargenomen het zů ir selbs sprach ich
 10 bin heůt nicht vmbusunst herkomen ich sey dann betrogen so habe ich eyn vogel bey der nasen gefangen, vnd im [286^c] czů czeiten mit dem orte des augen oder über die seiten eyn gůtten anpicke beweiset, in maß als sy sein acht hete vnd ir sein ansehen liebet vnd des gefallen het vnd auf dem andern teyle ir gedacht ye mer bůler sy versůchte
 15 vnd zů iren willen brächt so vil mer dester grösser ir schöne erschine, sunder dem dem sy ir liebe geben het. Nun der gůt student alle syn vnd gedancken seines philosophiren auf eyn orte leget vnnd sein edel gemůte zů der schönen frawen keret vnd im nāmliche gedacht er ir auch liebet vnd gefiele do er sich czů zeiten über die achßeln ansehen
 20 sahe, vmb des willen ir bis zů hauß nachfolget, vnd wo sy do heym was das erlernet vnd täglich vor dem hauß auf vnd ab gieng mancherlei vrsach seines do fůrgen ze versteen gab, des sich die schöne fraw sere růmen warde, sich gen im zů zeiten erzeyget als sähe sy in von her-
 25 czen gern, des der student sere wol content was vnd eynest mit der frawen meyd zerede kam vnnd sy bat daz sy im gehilflich wār irer frawen genade zehaben, des wůlt er ir lonen vnd darumb ir eyn genůgen thůn daz im die meyd verhieß vnd on zweifel das zetůn im zůsaget [286^d] der frawen alle sach was des studenten meynung was ir saget vnd czewissen thet, die der meyde rede mit grossem gespůt vnd lachen
 30 zůhůret zů ir sprach. Meyde hast du gemereket vnd wargenomen wo der lerer vnd student hinkomen ist sein synn zeverlieren die er auß der hohen schůle von Parisii bracht hat, nun wol an im namen gotes geb wir im des das er do sůchen geet vnnd sage im wo er mer mit dir zered komt wie ich in vil lieber hab dann er mich hab, aber meiner
 35 eren ich besorgen müß domit ich mit aufgerichitem anpicke mit andern erbern frawen geen müge, ist er dann weis als ich meyne des mir nit czweifelt so sol er mich sovil dester lieber haben O du arms eynfältigs weib vnd witwin. Ir allerliebsten frawen mein die hochtragent witwin

weiß nicht was die studenten können vnd sein Darnach nicht lang ver-
 ging die meyd den studenten fand im der frawen rede vnd potschaft
 sagt vnd zewissen tet des er on maß frölich vnd wol zemüt was der
 meyd eyn güt schencke thet vnd mit mer brinnender liebe seinem lieb-
 5 haben nachfolget mit briefschreiben vnd schanckung die frawen eret.
 [287^a] die sy willigklich vnnnd gern von im auff name, aber keyn ant-
 wurt im von ir nye widervmb ward, dann alleyn gar schlechte wort on
 saft, also lange czeit die fraw in an der vogel weyd hielt vnnnd zeletzte
 die sach irem bülen czewissen thet, der auch eyn kleyn eifern ward vnd
 10 sich czû zeiten des mit der frawen betrübet, dann den studenten gar vil
 vor der frawen hauß auf vnd ab gen sahe, vnnnd domit des er besorget
 er on czweifel wär, vnnnd der student der die meyd nit rûen ließ stâts
 mit potschaft zû der frawen kam, vnnnd do sy czeit daucht irem bülen
 zeliebe dem studentenn bei der meyd enpot wie ir nye fûgkliche zeit
 15 komen wære, domit sy sich bei im hätte finden mûgen sein gefallen ze-
 tûn, dann irer liebe huld vnd freûndschafte er gewis sein solt, vnnnd in
 den zûkûnftigen weihenächten sy hoffet mit im freûde czehaben, vnnnd
 ir mit im eyn freûntliche nacht geben, darumb er solt des in gedancke
 sein wär es anders sein gefallen an dem andern weihenachttag ze-
 20 nacht sich czû ir in iren hof fûgen, do sy so sy beldest möchte sich
 wölt zû im schicken. Der güt student solicher potschafte mer dann man
 [287^b] auff erden fro frölich vnd wolzemüt was, vnd wie im die fraw
 enpot do die zeit kam er thet vnd sich die meyd in dem hofe des hauß
 versperren ließ der schönen frawen wartet, die do mit allem vleiß auf
 25 die selben nacht het iren bülen tûn komen, vnnnd do sy das nachtmal
 empfangen heten was sy des studenten halbenn thûn wolt im sagt, do
 bei er vernâmen solt ir grosse liebe czû im vnd die die ich dem trage
 des du so eynfältigklich in eyferung gefallen bist. Solcher wort ir lieb-
 haber groß gefallen het vnd begirig die werck zesehen die im die frau
 30 durch ire wort het ze versten geben Nun het es den tage darvor gar
 eyn grossen schne gelegt vnd alle ding von schne bedecket waren, vmb
 des willen der student nicht lang in dem hofe gestandenn was das er
 mer kelten vnnnd frostes empfinden ward dann er gewölt het, doch stâts
 hoffet vnd soliche kelten mit gedult vertrûg Die fraw nach etlicher ver-
 35 gangen stund zû irem bülen sprach, ge wir in die kamern an das fenster
 vnd besehen was mein netter büle an der küle in dem hof thû vnd was
 er der meyd die ich im yeczunnd schicken will zeantwurt geb, vnd
 [287^c] die meyd bald czû im fertiget vnnnd sy beyde in die kamern an

eyn fenster gingen do sy von im nit mochten gesehen sein, vnd die
 meyd mit dem studenten reden höreten, die zů im sprach. Iunckherr
 Reiniere mein frawe ist sere bekümert vmb eüeru willen dann es ist
 ir brüder eyner heynt zů ir komen was rechnung mit ir zetün, doch
 5 meyn ich er söll gar balde wege geen das ist die vrsach das mein fraw
 nit ist czů euch komen, darumb laßt sy euch bitten ir habt noch eyn
 kleyn gedult dann ye bald meynet bei euch zesein. Der gůt student
 meynet im wär als im die meyd ze versten gab ir antwurt vnd sprach.
 Sag meiner lieben frawen das sy mein kein sorg hab also lange bis sy gar
 10 wol geschicket sey czů mir zekomen mich sol keynes beyten verdriessen,
 doch so sy erst mage kome. Die meyd wider in daz hauß vnd schlafen
 gieng, die frawe czů irem bůlen sprach, Nun wolan was wilt du nun
 sprechen wes beduncket dich nun trüge ich im grosse liebe als du ge-
 laubest wie möchte ich in meinem herczen das vertragen in also in dem
 15 schnee vnd kelten steen lassen wäre sach das ich in lieb het. Also
 [287^d] geret beyde miteynander czů pet giengen der edeln liebe spilten,
 des armen erfroren studenten in dem hofe lachten, vnnd sein spotten.
 Der gůte student sere hin vnd her ging sich zeerwermen nyndert het do
 er sich het nyder seczen noch vor dem schne sich verbergen nügen den
 20 vermaledeyet der solches seines vngelücks vnd langes beytenn vrsach
 was, vnnd alles das er sich regen oder reüstern höret er gedacht es die
 fraw wäre, aber alle sein hoffnung wind was dann die fraw bis über mit-
 tenacht sich nicht mer vernämen ließ, sunder ir mit dem der ir in irenn
 armen lag ir freüde gab, dar nach zů im sprach. Nun wes bedenckt
 25 dich mein liebes lieb vnsers studenten, nun weliches beduncket dich mer
 sein synn oder mein liebe die ich im trag, wirt dir sein zittern dein ei-
 fern von deinem herczen nämen. Der gůt gesell ir bůl zů ir sprach.
 du außerwelts lieb mein ia ich hab dein freüntliche liebe die du czů mir
 hast gar wol erkant, vnd in gleicher maß als du mein troste vnd hoff-
 30 nung bist, also auch ich mit leib vnd sele dein eygen bin des küß mich
 czů tausent stund domit ich als du sprichst die warheyt vernäm. in dem
 er [288^a] sy in sein arm nam nicht tausent malen kisset sunder mer
 dann zehunderttausentmalen halset vnd kisset, nach dem die frawe czů
 im sprach. Liebe stee wir auf vnnd sehen was vnser schüler do nyden
 35 in dem hof begünne, vnd ob in noch das fetir der liebe brenn nach dem
 alle seine brief zů mir geschriben lauten, beyde auf stunden an das
 fenster giengen den erfroren studentenn mit klaperden zänen in dem
 schnee hin vnd her lauffen sahen aller von frost bidempt in maß es

möcht eyn herten steyn erbarmet haben. Die frawe czû irem bûlen sprach. Schönes lieb wie dunckt dich kan ich im recht thûn vnd die mann mit klaperden zänen tanczen machen. Er lachend zû ir sprach traun ia schönes lieb, die fraw sprach. ich will das wir hinab an die tür
 5 geen so will ich im zûsprechen vnd du czû höre was er doch sprech, mir czweifelt nichte wir werden sein nit minder freud haben. dann wir bisher gehabt haben, vnd-in stille auß der kamern ab an die haußtür giengen vnnd vnauffgethan die fraw durch eyn kleyn löchlin dem studenten czû ir rüffet. Do das der student vernam got vnd allen heyligen
 10 danck [288^b] saget. nichte anders meynet dann er solt eingelassen sein, sich bald zû der haußtür nächnet vnd sprach Fraw ich bin hie was gepiet ir tût mir auf vmb got vnd aller liebe willen dann ich bin schier tod frostes halben. Wie mage das gesein sprach die fraw das du erfroren bist ist dann die kelte hie grösser dann zû Parisii vmb eynes
 15 kleynen sneheleins willen das nächten gefallen ist. ich mag dir wärlich noch nitt auf thûn dann mein vermaledeyeter brüder der nächten mit mir essen kame, ist noch nicht zû hauß gangen, aber er wirt gar balde wegegeen so will ich zehand komen vnnd dir auf tûn. ich hab mich yeczund von im stelen müssen zekomen vnnd dich czetrüsten das dich
 20 eyn klein beyten nit verdrieß. Ach fraw mein sprach der student ich bitt euch durch got mage es gesein so laßt mich ein vnd in dem hauß verborgen sten dann in kürcze eyn groß dick schne gefallen ist vnd noch stâts schneit. die frau sprach. awe mir lieb mein ich entar dir wärlich noch nit auff thûn, dann die türe machet als grosses romor wenn man
 25 sy auf vnd czû thût das man es in dem ganczen hauße höret, vmb des willen er sich [288^c] vileichte arges verdencken würd, aber ich will gen vnd im sagen das er nun dolest zû hauß gee domit ich bald wider czû dir komen mûg dich ein zelassen. so get nun bald sprach der erfroren student das euch got gesegen, mer bitt ich euch ir wölt lassen eyn gût
 30 feür zû bereyten wenn ich hinein kom mich wider zeerwermen dann ich bin also erkaltet, das ich mein selbes nicht empfinde, wie mag daz gesein sprach die frawe ist anders war als du mir zû manch malen geschriben hast wie du vmb meinen willen aller brinnest, aber ich besorge du habest mich betrügen wollen, nun ich gee dohin vnd du frölich beyt.
 35 Der frawen bûl der bei ir innerhalb was des im besunder freude nam beyde miteynander wider czû pet giengen ir aweis auß dem studenten triben. der arm betrogen student mit seinen klapernden zänen mer eynem storch geleihe dann menschen den schne bawet als der paur den

acker tût, vnd nun zegüter maß mercken vnnnd bedencken ward wol
daucht wie er von der frawen betrogen wâr offt an die haußtûr gienge
ob er in dem hauß yemand vernäme, aber in wol daucht wie yederman
in dem [288^d] hauß schlafen wâr, an die hofthûr gieng do sich zû mer-
5 malen versuchet die auf czethûn hin außzegeen, aber nicht mûglich
was, darumb alle end des hofes durchsahe ob er indert hinauß möcht,
aber in solcher maß geschicket was das er do es wære im lieb oder leyd
beleben müßt, vmb des willen er solcher zeit vnd seinem vngelücke
flûchet vnnnd das falsch weib vermaledeyet, in solichen czoren wider sy
10 fiele das sich alle seine brinnende liebe gen der frawen in neide haß
vnnnd grosse hertikeyt bekeret, mit im selbs anhûb ze bedencken wie er
sich an der falschen frawen möchte gerechen, des er yeczund mer vnd
grössern willen zetûn het dann er vor gehabt het sich bei ir in liebe ze-
finden. in dem es sich gen dem tage nâchnet vnnnd der morgen stern mit
15 sampt der sunnen den neuen tag bracht der frawen meyd aufgestanden
was ab über die stiegen gieng den hof aufsperrtet sich gen dem studenten
beweiset als ob'ir vmb in sere leyd wære zû im sprach. daz in alles
vngelück angee das er nâchten ye herkam er hat vns die ganczen nacht
in vnru gehalten, vnd euch gott erbarmen erfrieren machen, doch habet
20 [289^a] gedult was auff dise nachte nicht hat gesein mûgen das geschehe
auf eyn ander nacht ich weyß wol nicht ergers zû diser zeit sich het
begeben mûgen daran mein fraw het grösser vngefallen haben mûgen
dann an dem. Aber der zornig student seinen zoren verbeyß keynes
gleichen thet wol gedacht vil tröen nicht anders wære dann eyn schilt
25 des getröeten, vmb des willen sein willen sperret vnd sein begire mäs-
siget icht übeln ze reden vnd mit diemütiger senfter stimme czû der
meyde sprach. In der warheyt ich hab erger nacht mein tage nye ge-
habt. Aber meiner frawen treu vnnnd ir liebe zû mir wol erkannt hab
wol vernomen hab ir schuld nicht ist, dann sich gediemütiget hat her ab
30 an die tür zû mir zekomen mich czetrösten vnd sich zeentschuldigen
vnd als du gesprochen haste was auf dise nacht nicht hat gesein mûgen
das sey auf ein andre nacht, darumb befelhe mich ir sag ir eyn gûten
morgen von meinen wegen mit dem von dann gieng von schlaf vnnnd
frost mer dann halber tod wie er mocht sich czû hauß fûget, vnnnd also
35 auf sein pet zeschlafen warff, vnd in solchem schlafen beyen vnnnd arm
verlore [289^b] ir nit mer empfand, do er von dem schlaf erwachet bald
nach den besten ärczten schickten, den er sein empfangne kelte zewis-
sen thet domit sy in bald versâhen, die mit behender hilff nach irem

vermügen alle kunst brauchten. Aber wär sein iugent nicht gewesen
 er het sein on zweifel sterben müssen, dann in langer zeit das geäder
 nye zû im selbs mer komen mocht vmb des willen sein kranckheyt schwär
 vnnd groß was doch do es gotes gefallen waz er wider zû im selbs kam,
 5 aber des das im die schön frau gethan het nicht vergessen mocht, ver-
 borgen in sein hercze schloß, vnd mer dann ye sich gen der frawen in
 liebe vnnd freündtschaft beweiset. Nun nach etlicher vergangen czeit
 sich begab das das gelück im vrsach bereytet sich an der schönen frawen
 ze rechen, vnd das was das der iung den die schön witwin lieb het in
 10 eyn andere schöne frawen in liebe enczündet vnnd der witwin in keinen
 weg mer weder sehen noch hören wolt, vmb des willen ir czeit in wey-
 nen klagen vnd traurung vertreyb auch ir meyd vmb iren willen groß
 leyd trüg, alle ire synn vnd vernunft anleget domit sy der frawen ir
 schwär gemüt geringern [289^c] möcht, vmb des verloren ires lieben
 15 bûlen willen, in dem bedacht das der student die frawen noch huldet
 vnd lieb het vil dick do fürgieng, vnnd ir eyn eynfeltig gedanck einfiel
 vnnd das was wie man der frawen verloren bûlen durch die schwarczen
 kunst ir möcht wider bringen sy lieb ze haben des der student nach der
 meid beduncken solt eyn groß meyster sein, soliche ire gedanke vnd
 20 synn irer frawen ze wissen thet, vnnd die vnweiß vnbedacht frawe nit
 bedacht wer der student eyn nigromante gewesen er het die kunst für
 sich selbs gebraucht, nun sy der meyd wort gelaubet zû ir bald sprach.
 Liebe meyd find synn vnd vernym von im ob er mir das ze lieb thûn
 wölt, vnd im on czweifel versprich in widerkerung soliches dinstes ich
 25 sein willen tûn wöll. Nit lang vergieng die meyd dem studenten ir fra-
 wen meinung ze wissen thet. Do das der student vernam aller frölich
 vnnd wol czemüt czû im selbs sprach Nun sey got danck das doch die czeit
 komen ist, das ich mich meiner empfangen widerdrieße an dem falschen
 weib mag rechen, bald der meyd antwurt vnd sprach Sage meiner lieben
 30 frawen [289^d] das sy keyn sorge hab vnnd wär ir bûl in India ich solt in
 wider zû ir bringen vnnd an sy genade begeren muß. Die meyd irer
 frawen des studenten antwurt bald bracht des eyns warden sich bei eyn-
 ander in sant Lucia kirchen ze finden do beyd partey hin kamen do
 alleyn mit eynander ir gespräch heten, die schön fraw nit bedacht das
 35 sy den studenten gar schier von dem leben czû dem tode bracht het im
 allen iren gebrechen ires liebhabers halben saget alle ire geheyme im
 öffnet, vnnd wie ir wille wär iren bûlen wider ze haben des sy den
 studenten freuntlich batt er ir in iren nöten gehilfflich wär das stünd ir

vmb in ze verdienen. Der student czû ir sprach, frawe es ist war ich hab zû Parisii vil in nigromancia gestudiret vnnnd eyn grund weyß was sy kan, aber es ist weder mein noch gots gefallen nicht die ze brauchen vnd ich hab verschworen die weder für mich noch yemand anders ze brauchen, aber euch czelieb vnd vmb der liebe willen die ich euch lang zeit getragen hab bezwungen bin euch des das ich kan vnd vermag nit ze versagen, sunder stäts czû euerm willen bereyt sein, vnd solt ich des czetausent malen [290^a] zû dem teufel faren so bin ich geschicket ze tûn euer gefallen aber ir solt wissen das eyn soliches ze tûn euch gar
10 schwär vnd besorgklich ist des ir vileicht nit meyute, sunder wenn eyn fraw eynen verloren liebhaber wider zû ir bringen will des selben gleichen wenn ein man eyn frawen wider haben will, dann eyn solches durch nyemandt anders geschehen mag dann alleyn durch die person die eyns solichen begeren ist vnd die sach antrift, darumb ich enweyß
15 nicht wie ir beherczend vnd geschicket seit soliche ding czethûn. Zû dem die frawe sprach die do mer mit überflüssiger liebe besessen waz dann mit weißtum mich zwinget not vnd grosse liebe in solicher maß das mir keyn ding ze tûn mich ze schwär duncken wirt, nun ich den der mich wider alle recht gelassen hat wider ze haben, doch bit ich
20 euch freundtlich ir wölt mich eyn klein bescheyden wes ich mich besorgen muß. Der student der ir haß vnd neid trüg vnd im sein herczgen ir schwär was zû ir sprach. Fraw ir müßt ein bild von zinne machen lassen in des namen des ir begern seit den wider ze haben vnd wenn daz gemachet vnd bereyt ist so müßt ir in abnämendem mon
25 [290^b] naked vnd allein in dem ersten schlaf der nacht czesiben malen mit demselben bild in eynem fliessenden wasser baden, darnach also naked mit dem bild auf eynen hohen baum oder waz anders hohes als eyn öder turn wert steigen der gegen mitternacht gekeret sey vnd mit dem bild in der hand ze siben malen sprechen ettliche wort die ich euch geschriben
30 geben würd, vnd als bald ir dieselben wort gesprochen habt so werden zû euch zwen schön iüngling komen die schönsten die ir mit augen ye gesahet die werden euch grüssen vnd fragen wes ir begert den ir alle euer meynung mit zucht sagen wert, vnnnd ir wert euch hüten bey leib nit eynen für den andern nämen, vnd wenn sy euer begeren vernomen
35 haben so faren sy iren weg, in dem ir müget euch wider anlegen vnd zû hauß geen vnd seit gewis wenn ir daz als ich euch gesagt hab verbracht habt e mittennacht vergangen ist das etter bûl vnd liebhaber zû euch komen wirt vnd an euch gnad begeren auch wißt daz er euch bin

für nit mer gelassen mag do die begirig fraw des studenten red vernomen het im gancz gelaubt dobei ser frölich ward vnd zû dem studenten sprach. [290^c] Seit on zweifel alle dise ding sol ich geren tûn vnd ich hab füglich ende das ze verbringen dann ir gewünschten möcht, ich hab
 5 etliche meine gelegne güter oberhalb der stat neben dem wasser vnd nahend dobei in dem feld eynen alten turn darinn nyemand wonet darauf man an eyner leitern steigen mag, darauf czû zeiten die hierten steigen nach irem vich ze sehen ist gar an verborgem end ferr von allen strassen do mag ich nach dem baden aufsteigen vnd thûn was ir mir be-
 10 fellhet, so ist es yeczund in dem augsten vnd ist lustig baden vnd ich mag von nyemand geirret werden darumb was ich tûn sol nach euer anweisung sol mich nit verdriessen. Der student der alle gelegenheyt mer dann sy weißt aller wol ze mût das er der frawen willen vernomen het zû ir sprach. Fraw ich kam nye in dieselben gegent, darumb mir vmb
 15 die gelegenheit des turns nit mag wissend sein, aber ist im als ir saget so möcht es in diser welt nit besser sein, darumb wenn es zeit wirt vnd euch füglich ist vnd das bild bereyt ist so will ich euch das gebete mit samt dem bild schicken, aber eyns ich euch gedenc vnd bitt wenn ir euerm [290^d] willen eyn genügen gethan habt vnd mein getreulich dienen erkant habt das ir mein nit vergesset, vnd mir haltet als mir von
 20 euch versprochen ist. Zû dem die fraw sprach er des das sy im verheyssen het solt gewiß vnd on zweifel sein mit dem von im schied vund czû hauß gieng. Der student aller wol zemût wol gedacht die sach er nach seiner meinung zû gûtem end treiben wölt vnd bald eyn zine bild
 25 mit vil wunder vnd karakter machen thet, vnd czû eynem gebete ir eyne neue histori schreyb vnd das mit samt dem bild schickt do bei ir gepot das sy auff dieselben nacht tât als er ir befolhen het, nach dem er sich mit eynem seinem knecht heymlich vnd verborgen an, daz end fügt do die frau ir werck verbringen vnd tûn solt, do er nahend dobei in eyns
 30 seinen gûten freunde hauß gieng do er verborgen lag bis auf die zeit daz in daucht die fraw komen wâr zetûn als er ir befolhen hete sich mit dem bild ze baden. Do nun die frawen zeit daucht auch sy sich mit irer meyd auf den wege machet ze verbringen nach dem ir von dem studenten ze versten was geben, in eyns iren pauren hauß gieng der
 35 nacht wartet, vund do die komen was [291^a] vnd sy zeit daucht, des gleichen thet als sy schlafen geen wölt die meyde auch zû pete schicket, vund in der stunde des ersten schlafs in stille vnd geheym zû dem hauß auß nahend bei dem vorgeanten irem turn in das fliessend wasser gieng

do nyemand anders dann sy alleyn was sich nackend auß czohe ir gewändlein vnder eyn stauden verbarge vnnnd sich cze siben malen mit dem vorgeantanten bild badet. darnach also nackend mit dem bild in der hand auff den turn steyg. Der student mit seinem knecht zwischen tag vnd
5 nacht sich czenächst bei dem öden turn vnder eynem weidenstock verborgen het do er alles das die fraw thet sahe, vnnnd do sy auß dem wasser zů dem turn ging zenächst an im fůrging doch sein nicht war-
nam dann beyd in schwarcze gekleydet waren vnd die nacht finster was, darumb nit wol můglich was sy czesehen. Aber ir schneweisser nacken-
10 der leib durch die finster nacht erscheyne dem studenten mancherley gedanken bracht, wenn er ire schöne brůstlein vnd andern teyle ires leibs ward bedencken auf eynem teyl in erbarmet das sich solicher schöner leib in so kurzzer zeit solt [291^b] entwichten im etwas schmerzen bracht, auch die blůdikeit des fleyschs begeru was aufczesten sy
15 zenāmen vnd mit ir seinen willen ze tůn. Auf dem andern teyl widerumb bedencken ward wer er wār vnnnd was sy im in dem vergangen kalten winter beweiset hete, vmb solicher enpfangner widerdriēß warumb vnnnd von wem wider sy in hertikeytte vnd zoren fiel alle fleyschliche begire fallen ließ vnd von im schlůg wider zů seiner ersten fůrsaczung
20 kam vnd auf den turn steigen ließ. Also die gůt fraw auf den turn steyg sich gen mitternacht kert anhub ir heyliges gepete czesprechen das ir der student geschriben geben het, in dem der student mit grosser stille in den turn gieng vnd die leytern daran die frawe auf den turn gestigen was wege trůg nach dem sich an eyn verborgen end seczet ze
25 vernāmen was doch die fraw sprechen wůrd wann sy ir werck verbracht het vnd ab dem turn geen wůlt vnd der leytern nicht fund. Do sy nun ze siben malen ir gepet gesprochen hete nach dem ir von dem studenten was befolhen worden anhub der zweyer iůngling czebeyten, aber ir langes beyten on ende was, auch ir [291^c] frischer vnd kůler ward dann
30 sy gewůlt het, vnnnd nun der tag begunt ze komen vnd der morgen steren was aufgangen des sich die frau sere betrůben ward das die zwen iungen nach dem ir der student het cze versten geben nit kamen, mit ir selbs bedencken ward was sy dem studenten getan het vnnnd besorgen ward der student hab ir eyn arge nacht geben wůllen als sy im eyne
35 gab, vnnnd ir gedachte hat er mir dann das vmb des selben willen thān wůllen so hat er sich ye nicht an mir kůnnen rechen dann dise nacht ist nit den dritten teyl so lang gewesen ich geschweig der grossen kelten als die was die ich im gab, vnnnd domit sy der liecht tag nit auf dem

turn begriffe sich zů der leyter füget ab dem turn ze steigen, vnd do sy
der nicht fand in solicher maß erschracke das sy nicht anders dauchte
dann wie ir das ertrich vnder iren füssen verschwunde nyder amächtigt
auff den estrich des turnes sanck alle ire stercke vnnd machte verloren
het. also etlich stund gelegen, nach dem dieselben ire verschwunde geyst
ir wider kamen vnd ir grosses vngelücke bedencken ward anhüb kläglich
vnnd erbärmg[291^d]lich ze weynen got vnnd den heyligen ir leyd ze klagen
wol sahe vnnd erkante das ir vngelücke alles des studenten ordnung was
grosse reiß vnd leyd het des das sy im getan het vnd das sy getrawet
vnd gelaubet hete dem den sy on czweifel iren veinde schätzen mocht.
In solichem kläglichen weynen lange czeit stünd nit bedencken mocht
wie sy doch iren dingen tůn solt hier vnd dort sahe ob indert weg
wäre ab dem turn czekomen, vnd do sy nyndert weder weg noch synn
sahe von neuem anhüb zeweynen, in dem ir eyn herter kläglicher ge-
danck zůfiel zů ir selbs sprach. O du vngelücksälige Helena was wer-
den dein brüder alle deine freünd die gancz gemeyn der stat Florencze
von dir sagen wann sy vernämen das du also nackende hie an disem
öden ende gefunden bist dein ere vnnd zucht falsch gemeynet wirdt
vnd wo du dich des mit gůten vrsachen enreden wöltest die ich mir
wol trawet zefinden so weyßt es der vermaledeyet studente alle deine
geheyme, darumb er dich an keyner lügen besteen laßt. Awe mir nun
wie sol ich meinenn dingen thůn, dann czů eyner stund ich die rosen
meiner eren [292^a] vnnd schönen leib verlierenn müß. nach disen wor-
ten in als groß leyd fiel das sy schir verzaget vnnd sich ab dem turn
zů der erden geworffen hete. in dem die sunn hoch an dem hymel was,
die fraw über den turen auß sahe ob sy yemand sähe den sy nach der
meyd möcht schicken, aber nyemande noch zů feld komen was. In
dem der student der do nahend bei dem turn in eyner stauden geschla-
fen het erwachet, den die fraw ersahe des gleichen er sy sahe zů der
er sprach. fraw got geb euch eyn gůten morgen sein die iungen der
ir wart zů euch komen. Do in die frau sahe vnnd reden vername er-
bärmklich anhüb zeweynen. in freüntlich batt das er zů ir in den turn
käme domit sy mit im on geschrey reden möchte des ir der student
zelieb ward in den turn gienge die frawe sich auf iren bauch neben
das loch nyder auf die erden legt alleyn ir haupt durch daz loch ab
recket vnnd weynend czů im sprach. Wärllich vnnd für war Rayniere
gab ich dir ye ein arge nacht so hast du mir dee eyne geben du bist
an mir gerochen, dann wie wol es in dem augsten ist so meynet ich

doch in diser nacht also nackend erfrieren on das daz ich also sere
[292^b] geweynet hab, daz ich dich ye betroge es möcht eyn herten
steyn erbarmet haben, vnnd wunder ist das ich die augen in dem haubte
hab, darumb ich euch freüntlich bitt nicht vmb mein, sunder vmb euer
5 tugent vnd adels willen laßt euch benügen an dem das ir mir gethan
habt in widerkerung des das ich euch thet lasset mich hinabsteigen
vnd gebt mir mein gewand, vnd nāmet mir nichte das ir mir nit geben
müget das ist euch lob vnnd ere, dann name ich euch das ir die kalten
nachte nicht bei mir gesein mochtest das mag ich euch alle stunde wi-
10 derkeren vnnd mich euch zeezygen geben vnd das nicht alleyn eyn
nachte sunder vil manche sein sol, darumb laßt euch benügen vnd
thût als eynem erberen mann czüstet zethûn der sich hat seiner en-
pfagner widerdriß rechen mügen vnnd die vergeben hat, dann was
ere ist es dem adler wann er die turtelltauben überwunden hat, dar-
15 umb vmb gotes vnnd eüern willen erbarmet euch über mich lasset euch
vmb mich leyd sein. Der hert student mit schwārem gemüte die em-
pfangen widerdriß bedencken ward zû eyner stunde die ellenden fra-
wenn [292^c] weynen vnnd in bitten sahe, des er auf eynem teyl freude
het vnd auf dem andern teyl traurig was, er het freud des das er sich
20 an der frauen nach seinem willen rechen mocht vnd bettrübt das er
die armen frauen also kläglich weynen vnd an in genad begern sahe
doch die grossen hertikeyt seiner natur nicht überwinden mocht, der
frauen antwurt vnnd sprache. Frawe Helena mein begeren vnnd bitten
zû dir, do ich in deinem hof verschlossen was grosser kelten halben
25 ich mit meinen zähern meiner augen meine wange nicht neczen mochte
noch dir als du mir süsse worte geben kund, die mir bei dir genade
heten erworben vnd dein hertikeyt gen mir erweychen mügen, do ich
in dem kalten schnee als dir wol kunt ist stünd mein leben ze ver-
lieren, vnnd daz ich doch von dir vnder eyn tächlein wäre getan wor-
30 den wäre ich alles meines vngelückes gern czefride gewesen vnnd het
mich wol genügen lassen vnd wäre mir yeczund mynder müe dir ze
vergeben vnd dein bete erhörn das ich zetûn übel geschicket bin, aber
seitnale du dich deiner eren halben beschwāret sihest, also nackend
auf dem turn zesten [292^d] so bit den in des arm dir vmb mich nit
35 leyde was mich die kalten langen winternachte mit klaperden zānen in
dem kalten schnee in deinem hofe sten machtest vnd mein keyn barm-
herczigkeyt haben woltest, darumb bitt in vnd nicht mich das er dir
helff vnd dein gewand bring mit sampt der leytern domit du herab

steigen mügest den bitt der dir dein witwin ere genomen hat das er
 dir sy wider geb vnnnd die bewar, warumb rüffest du im nicht das er
 kom vnd dir helff dem du czügehörest vnd des eygen du bist, dann
 wem solt er helfen wenn er dir nit hülff darumb schrey vnnnd rüff du
 5 eynfältiges weib versüch ob er komen wölle vnnnd ob die liebe die du
 im tregst darzu alle deine vnd seine synn so vil vermügen daz sy dich
 von meiner eynfältigkeyt erlösen als du zü im in kurzweil sprachest
 do du in fragtest weliches grösser wär mein eynfältigkeyte oder die
 liebe die du im trügest, derselben deiner lieb ich yeczund nicht begere
 10 vnd du mir yeczund nicht bedarfst milt zesein des des ich an dich nicht
 begere vnd des du mir yeczund nicht versagen darst wo ich sein be-
 geren wär, aber ich wille das du soliche sällige [293^a] nacht deinem
 lieben bülen behaltest, auch mit deinen geschliffen Worten domit du
 mein hulde meynest czehaben vnd mich eynen erbern edeln man nän-
 15 nest das tüst du das ich dir die pein deiner bößheyt ringer aber alles
 verlorn ist, dann deine süsse wort der kraft nit haben sollen mich ze-
 erweychen noch mich ab meiner ersten meynung bringen, vnnnd du
 das gesicht meiner vernunft nicht mer betrügen solt, mer sprich ich
 das ich zü Parisii in der hohen schüle nichte so vil gestudiret hat als
 20 ich in eyner eynigen nacht durch dein falscheyt erkant hab; du spra-
 chest auch du wärest von edlem vnd grossem herzen das gehöret dir
 yeczund zü das ze sein in dem ende deiner pein vnnnd wie wol ich nicht
 eyn adler bin noch du eyn turteltaub, sunder dich eyn vergifte schlang
 erkant hab die vnseren eltern wider gott den herren in neid vnnnd haß
 25 seczet, doch nyemand sprechen mag was ich dir thû das ich mich rech
 sunder eyn kleyn straffe, dann rechen ferre über straffen ist, aber
 wenn ich mich an dir rechen wölt vnd bedencken wölt wo du mich
 vnd mein leben hin bracht hetest, dein leib vnnnd leben mir nicht eyn
 genügen [293^b] wäre dir das zenämen, noch hundert weiber deines
 30 gleichen, darumb ich will das du yeczund durch dich selbs dein pein
 leyd vnd schmerzen vernäme, waz es ist erber weis mann sunder
 studenten zebetrügen dez du es vileicht keynem mer tûn wirst des wird
 ich vrsach sein ist anders sach das du mit dem leben von meinen hen-
 den komest, nun sag mir seitmale du so grosse begire hast herab ze-
 35 komen warumb würffest du dich nichte herab vnnnd brichest dir selbs
 den halße als du an mir wol verdienet hast wo du mich eynen red-
 lichen mane als du yeczunde gesprochen hast ich der sey, vmb sein
 leben bracht hetest der noch vil mancher person nützer sein mag dann

hundert deines gleichen tûn möchten, darumb im namen gotes würffe
dich herab so komest du aller marter ab darinne dich duncket du
seyest, vnd mich den frölichesten man machest der auff erden ye ge-
boren ward, ich will dir yeczund nicht mer sagen dann eynes ich dir
5 zewissen thû das ich so vil gestudiret hab das ich dich hab bringen
kûnnen do du bist, gedenck nun das du komest do du warest. Die
weil der student also redet die [293^c] nackend fraw stâts weynet, vnnd
ir leyde got klaget. In dem die zeit weg gienge vnd die sunn gen dem
mittentag aufsteyg vnnd sy in schweigend vernam czû im sprach. O
10 ir herter vnarmhercziger man do euch die vermaledeit nacht so schwâr
was vnd euch mein widerdriß so groß daucht mochtet ir euch in
keynen andern weg an mir rechnen dann auf disen hohen turn cze-
bringen, vnd mich an der heyssen sunnen also zebraten das euch
es gott vergebe das ir mir heut vnnd heynt gethan habt, es wâr
15 zevil het ich euch vatter vnd mütter getödet, nun seitmale mein
schöne iugent czû keyner barmherczigkeyte bewegen mag so laßt
euch doch mein hertes weynen erbarmen vnd ringert mir mein grosse
pein laßt mich doch genûssen das ich euch so fest gelaubet vnd ge-
trawet hab vnnd euch alle mein verborgen heimlicheyte gesaget vnd
20 getrauet hab vnnd euch aller meiner sünde kuntschafft geben hab,
dann ich euch freüntlich getrawet hab vnd mein grosse treûe czû euch
mich betrogen hat got erbarms het ich euch nit getrawet so wære ich
von euch nicht betrogen worden, vnnd hetet euch an mir nicht [293^d]
rechnen mûgen, darumb thût noch heut bei tage vnd geweret mich meiner
25 bet laßt mich euch durch got befolhen sein lasset ab von eüerm herten
zoren vergebt mir mein missetat wo ir das thût vnd mich von hier nä-
met, so bin ich bereyt hinfür nymer mer nach meinem verloren lieb-
haber zefragen, sunder euch alleyn für meinen lieben herren vnd bûlen
haben wie wol ir yeczund meiner schöne kleyn acht, so weyß ich doch
30 wol ist sy vmb keynes werd gehalten so ist es vmb des willen das in die
iungen mann domit freud vnd luste geben, so seit ir doch nit alt vnd
nicht gesein mag oder ir müßt iung frawen liebhaben ir seit dann von
steyne, so kan ich nicht glauben das ir mir so herten tod vergûnnen
müget daz ich mich zû gesicht eüer augen ab dem turm würff es sey
35 dann sach das ich mich selbs betrüg vnd ir nicht eyn warsager seit,
dann ir vil dick mir enpoten habt ich liebe vnd gefalle euch vmb des wil-
len seit gebeten laßt mich euch befolhen sein dann die grosse hiez mich
anhebt zebrennen, vnd wes ich der kelten in der vergangen nacht zevil

het, also ich yeczund der hiez ze vil hab. Der student sprach als der sy
[294^a] im zeliub vnnd ir zeleyde auf dem turn hielt frawe Helena du
hast mir nit gelaubt noch getrawet deiner heymlicheyt vmb liebe willen
die du zů mir habest, sunder den czefinden den du verloren hast, dar-
5 umb du nicht alleyn diser pein sunder grösser vnd lenger wirdig bist
auch eyn grosse torheyte an dir czegelauben, das nicht ander weg heten
sein mügen dich deiner sünd czestraffen vnd mich czerechen, so sprich
ich das ich dir mer dann tausent läcz gericht het dich zefahren, vnd nicht
lang vergangen wär du von dir selbs wärest on läcz gefangen worden
10 vnd dir grösser pein vnd schaden zů gestanden wär dann die pein ist
darinn du yeczund bist, vnd wo mir keyner meiner anschlege geratten
wäre dich zestraffen solt mir mein schreibfedern nicht gemangelt haben
mit der ich von dir in solicher maß solt geschriben haben wenn du es
vernomen hetest du czetausendt malen des tages des todes soltest be-
15 geret haben, dann die macht vnd krafte der federn grösser ist dann die
der die ir nit kennen, besunder den die ire werck nit versücht haben
wie wol du sprichest wie nye mensch dein liebe czů andern [294^b] man-
nen vernomen hab dann dein meyde alleyne, so sprich ich du weyst
nichte was du sagest vnd ist nicht ware als du sprichest, dann in deiner
20 nachpaurschafte man von nyemand redet dann alleyn von dir, vnnd die
letsten den eyn soliches zewissen komet das sein die do von man saget
vnd die sach antrifft, vnd sere übel erwelest dich dem czegeben, dem du
dich geben hast vnnd auß mir dein gespöt gemacht hast vnd mich
eyner andern liessest, dann ich hab eyn liebe czüchtige frawen die mir
25 lieb vnd werd ist die fürwar entlicher mit besser vernunfte ist dann du
gewesen bist, vnnd domit du mit mer warheyte mein meynung in gener
welt tragest So sprich ich das du dich herab werffest domit der bös
veind dein sele in sein arm in abgrund der helle enpfahle aber ich be-
sorge du seyst mir des nicht gehorsam, vnd mich sein nicht erfröest,
30 Auch als du sprichest die sunn brenn dich do bei bedenck die winter
kalten nachte die du mir gabest misch mein kelte mit deiner hiez so
wirt dir bas vnd hast weder hiez noch frost das ist mein rat vnd dein
trost. Do die arm frawe des studenten herte worte vername keynes
[294^c] trostes mer von im hoffet von neuem kläglich anhüb zeweynen
35 vnnd zů im sprach. Seitmal ich bei euch weder gnad noch barmherz-
keyt gehalten mag so bitt ich doch vmb der edeln frawen willen die ir
am liebsten habt auf erden vnnd die weiser ist dann ich gewesen bin
nach dem ir sprechent gefunden habt aller tugente vol von der ir also

lieb gehabt seit vmb der willen mir vergebet vnnnd bringet mir mein gewand das ich mich kleyden vnd ab dem turn steigen müge des im der student lachet, vnnnd nun güt zeit über terczeit vergangen was ir antwurt vund sprach. Nun wol an ich mage dir nit mer neyn sprechen
5 vmb der frawen willen dobei du mich beschworen hast, nun sag mir wo ist dein gewand so wille ich dir das bringen vnd ab dem turn steigen machen, die fraw im des gelaubet vnnnd güten trost enpfing im das gewand do sy es gelassen hete weiset. In dem der student auß dem turn gieng seinem knechte befalhe das er nyemand in den turn noch zü dem
10 turn geen ließ also lang daz er wider käme vnd nicht ferre von dann in eines seinen güten freund [294^d] hauß ging, do er das mal auß darnach für etlich stund schlafen ging, die armen frawen auf dem turn an der sunnen braten ließ, die sich von eyner eynfältigen hoffnung eyn klein getröst het, vnd nach langem beyten mit schwärem gemüt vnd herten
15 seufzen sich von dem ligen aufricht vnder die mauren des turnes die eyn wenig schaten gab seczet, do sy mit pittern gedancken des herten studenten vnd ires gewands warten was yeczund mit weynen yeczund mit klagen ire ellende zeit vertreyb, als die do von pein leyd vnnnd schmerzen überwunden was dann die vergangen nacht nye geschlafen
20 het. in dem entschlief do die sunn an dem höchsten was vnd nun den mitten tag übergangen het, vnd der armen schönen frawen stäts in irem nackenden ruck lage der haubt leib vnd person alle bloß vnnnd endecket was, vnd nicht alleyn von der sunnen verbrant sunder aller irer leib als ferr er von der sunnen begriffen was geschunden vnd entheüt was, vnd
25 vmb solcher brunst vnnnd schmerzen willen sy von dem schlaf entwachet, über das ir daz haubt also wee thet das sy nicht an[295^a]ders daucht wie ir das hirn brechen wölt das kein wunder was, dann das pflaster des turns also heylß was das sy darauf weder gesiczten gesten noch geligen mocht kläglich weynend an der heyssen sunnen hin vnd
30 her lieff nicht alleyn die sunn ir pein gab, sunder auch die mucken vnd fliegen sy bitten vnnnd stachen in solcher maß außrichten das aller irer leib eyn eitel blüt vnd aller durchwundet was, es möcht eyn herten steyn erbarmet haben, nicht anders daucht dann wie sich eyn yegliche muck besunder an ir rechenn wölt sich der so sy best mocht mit henden vnd
35 füßen weret den studenten vnnnd iren verloren bülen wol zetausent malen vermaledeyet. Also das ellende weib von der sunnen vnd den fliegen hungers vnd durstes schir tod wär manch schwär herte gedanke ir gemüte durchgangen heten über die mauren des turnes über auß sahe

ob sy yemand ersehen oder gehören möcht, geschähe ir wie im wär ge-
 schickt was wen sy sähe dem zů ir zerüffen vnnd hilff begeren. Aber
 eyn soliches von dem gelücke ir nit solt beschert sein, dann zů der zeit
 vmb der hiez willen yeder [295^b] man zů hauß was, auch kein arbeyter
 5 desselben tages in derselben gegent gearbeytet het. als die do zů hauß
 das koren traschen, darumb nyemandt weder sahe noch vername dann
 alleyne das lauffende wasser rauschen vnd die schigalen singen höret,
 auch an vil enden vnder den baumen den külen schaten sahe die zesehen
 ir grösser pein brachten, sunder ire eygne heuser zesehen vnd darein
 10 nit zekomen mügen das alles ir pein vnd schmerzen meret. Was sol ich
 euch mer von dem vnsäligen weib sagen, die sunn von oben ab vnd pfla-
 ster von vnden auf vnnd die hertte beissenden mucken in solicher maß
 ir person zů bereyt heten wo sy die vergangen nacht mit irem schne-
 weissem leib die finsternen nachte überwunden hete, derselbig ir leib
 15 yeczund eyn eitel plüt vnd voller wunden was, vnd das in maße das vn-
 geschaffenst frawen bild nye mer gesehen ward, vmb des willen mer des
 todes dann anders begeren was. Do nun halbe nonezeit vergangen was,
 der studente von dem schlafe erwachedt auffstünde an seine frawen ge-
 dencken ward bald [295^c] ging zesehen wie es vmb sy stünd zů dem
 20 turn kam vnd seinen knecht der noch nüchtern was zeessen schicket.
 die frau den studenten mit dem knecht redend vername bald an das loch
 des turns ging zů im weynend schrey vnnd sprach. O Reyniere edler
 herre ir habt euch wärlich genüge an mir gerochen vergebt mir durch
 got erbarmet euch über mich tet ich euch in meinem hofe eyn lange
 25 winter nacht haben vnnd erfrieren so habt ir mich auf disen tag auf
 eynem hohen turn an der sunnen gebraten vnnd verbrannt do bei dur-
 stes vnd hungers sterben machen, darumb bit ich euch ir wöllet ablassen
 von eüerm herten zoren vnnd euer hercze gen mir erweychen vnd mich
 ab dem turn nāmon, seitmal ich nit so beherczend bin mich hinab cze-
 30 werffen vnnd mir selbs den tod zethün, so thüt doch ir mir in, domit ich
 auß diser pein kome, wölt ir aber des nicht enthün so laßt mir doch eyn
 gläselein wasser bringen domit ich mein hercz eyn kleyn laben müg, des
 meine herte zāher meiner augen nit eyn genügen sein also grosse ist die
 hiez vnd brunst meins leibs. Der student der frawen blödikeit an irem
 35 reden wol [295^d] vernam auch iren leib von der sunnen wund vnnd
 von den fliegen allen zerschrunden sahe, vmb eyns solichen gen
 ir in diemütigkeyt vnd erbarmung fiele im vmb sy sere leyd was,
 aber sich des gen ir nit mercken ließ vnd zů ir also sprach O du fal-

sches böses weib von meiner hand solt du nit sterben sunder von den
 deinen du solt als vil wassers in deiner brunst von mir haben als ich in
 meinem frost von dir fetirs het mich czeerwormen, vnd mein grosse
 kranckheyt die mir durch dich züstünd man mit dem übeltschmecken-
 5 denn mist erczeyen müßt wo man die kranckheyt deiner brunst mit
 edeln wolschmeckenden wassern erczeyen mag vnd wo ich meine ge-
 liden schiere verloren het so hast du dich alleyn ein wenig entheüt nach-
 dem dir als der schlangen geschicht wenn sy den palg würfet schöner
 dann vor sein wirst O ich armes ellendes weib sprach die frawe ich will
 10 solcher schöne gern enberen, aber du o du herter vnbarmercziger man
 wie mag dein herez vertragen frawen bilde also hertt zesein vnd mich
 also iämerlich außzerichten, wär ich eyn wild tiere ich gelaubet bei dir
 nun dolest genad funden [296^a] haben, nun het ich alles dein geschlecht
 getödtet, sein wäre genüg das du mir getan hast fürwar ich kan nit beden-
 15 cken was ergers du eynem verräter hetest tün mügen der land vnd leüt ver-
 raten hete, vnd die vmb leib vnd leben bracht het als du mir getan hast
 gott vergeb dirs mich also iämerlich an der heyssen sunnen ze rösten vnd
 den mucken zeessen zegeben, vnd über alles daz du mir nicht eyn gläs-
 lein wasser vergünnest, das man den die in den tod verurteylt sein nit
 20 versaget in mer zetrincken gibt dann in lieb ist. Nun wol an im namen
 gots ich vernyme wol das mein grosse bete weder pein noch schmer-
 czen dein hert gemüt nicht erweichen mag, vnd seitmal du ye meines
 plütes zü dem tod begerest so will ich mich schicken den mit gedult
 zeleiden, dann nicht der erst noch der letst zesterben sein wird zü
 25 dem geboren bin, vnd den almächtigen gott bitt er meiner sele in ge-
 ner welt genädig sey, vnd mit den augen seiner gerechtikeit dein hertes
 thün gen mir ansehe. Also gesprochen mit schwärer amacht nyder auf
 den estrich sanck on zweifel überflüssiges grossen durstes halben mei-
 net bald ir leben enden [296^b] mit kläglicher stimm zü got schrey vnd
 30 sprach. O almächtiger got erbarm dich über mich. nun was es nun
 wol auf vesperzeit, vnd der student sich beduncken ließ wie er seinem
 willen nun eyn güt genügen getan het, vnd seinen knecht der frawen
 kleyder nämen schüffe beyd mit dem gewande gen der frawen hauß-
 wercze gingen, do sy der frawen meyd alle betrübt vnd traurig funden,
 35 der student zü ir sprach. Sage mir gûte diern wo ist dein fraw, dem
 die meyd antwurt vnd sprach. Herr ich enweyß ir nicht, ich meynet
 sy an disem morgen in dem pete zefinden do ich sy nächten nach mei-
 nem geduncken ließ so finde ich sy weder do noch anderschwo, ich kan

nicht bedencken wo sy hin gangen ist des ich sere traurig vnd wär-
lich vnmütig bin, aber saget mir herr das euch gott behüt wisset ir
mir icht von meiner frawen zesagen. Der student sprach also, hete
ich dich mit sampt ir gehabt als ich sy gehabet hab domit ich dich
5 der sünd die du in mich begangen hast het büssen mügen als ich ir
gethan hab, Aber gelaube mir in der warheyt du solt mir sein nicht
entgeen, ich sol dir lonen nach dem du vmb mich [296^c] verdient hast,
du solt keynes mer spotten du solt an mich gedencken. Do er also
gesprochen het zů dem knecht sprach. Gib ir das gewand vnd sag
10 ir wo ir fraw ist vnnd das sy nach ir gee, die meyd das gewand nam
wol erkant das es irer frawen kleyder warn sere erschrack besorget der
student sy vileicht getödet het, grossen willen het waffen zeschreyen,
doch stille schweyg der student von dann gienge vnd sy mit grosser
eile czů dem turn lieff doch e sy dar zů kam sich begeben het das
15 irer pauren eyner zwey schwein verirret het die er sůchen gienge vnd
zů der frawen gelück on gefär czů dem turn kame die schwein ze-
sůchen. in dem das kläglich weynen auf dem turn höret vnnd ver-
name hin auf steyge so er höhest mocht anhüb czechreyen vnnd fra-
gen wer ist do wer weynet daroben, den die fraw an der stimm vnnd
20 rede bald erkant im bei seinem namen ruffet vnd sprach. Gee mir bald
nach meiner meyd schaff das sy herauff zů mir komen müg. Der paur
sein frawen an der rede erkant zů ir sprach. Awe frawe nun wer hat
euch auf den turn getan euer meyd ist euch disen vergangen tag sů-
chen gangen [296^d] aber wer het euch an dem öden ende gesůchet
25 vnnd gelaubt das ir do gewesen wärt bald die leytern zůbereyt domit
man auf vnd absteigen mocht, in dem die meyd mit der frawen kleyder
kam, vnd als bald sy vnden in den turn kame sich des nicht enthalten
mocht anhüb laut zeschreyen vnd sprach Awe mein liebe fraw nun
wo seit ir seit ir tod oder lebendig in dem auff den turn steyge, vnnd
30 do die fraw die meyde vernam fro was vnd sprach. O mein allerliebste
schwester lege mir bald mein gewande an. Do die meyd die frawen
noch lebendig sahe sich alle tröstet, doch sy nit eynem menschen sun-
der eynem besengten stock gleich fand, alle von amacht überwunden
auff der erden als lange sy was ligen sahe, ir hend in ir gesicht schlug
35 anhüb mit sampt der frawen zeweynen vnnd ir leyd czeklagen. Aber
die fraw als die nach irem schaden schand besorget die meyde freünt-
lich batt sy still schwig vnnd von dem weynen liesse, bei ir wol ver-
name das nyemand von iren vergangen sachen icht zesagen weist, dann

alleyne die meyde vnnnd der pauer, den sy auch freundtliche batt eyn
 soliches er bei im beleiben ließ [297^a] nicht fürpas brächt. der nach
 ettlicher rede die frawen auff sein aelßeln name die weder gen noch
 sten mocht auß dem turn trüg, vnd die meyd die do hinden beliben
 5 was in irem über die leytern absteigen zů irem vngelücke ir eyn fuß
 en gieng in solicher maß das sy über die leiter ab zů der erden fiel
 vnd ir ein beyn brach laut anhüb czeschreyen, der paur die frawen
 auf das gras nyder leget balde lieff czesehen wes der meyd gebräch,
 die er ligend mit dem beyne in czwey teyl gebrochen fand, die er auf
 10 hůb vnd auß dem turn zů der frawen auf daz gras trüg do die fraw
 dise netze zůgab zů irem anderen vngelücke sahe mer traurig vnnnd be-
 trübter dann fraw auf erden ye ward, dann alle hoffnunge in iren nö-
 ten zů der meyd was von neuem anhüb ir leyd czeklagen, auch der
 paur ir nit zetrösten weißt sunder mit beyden weiben auch anhüb ze-
 15 weynen. Nun was es zemal spat, vnnnd domit sy von der nachte an
 dem öden ende nicht begriffen würden. vnd als der frawen gefallen
 was der paur balde zů hauß lieff vnnnd zweyen seinen brüdern mit sampt
 den weyben rufft die frawen vnd die meyd auf eyner mischtpern zů
 hauß [297^b] trügen die frawen mit külem wasser vnnnd frischen weinen
 20 labten, vnnnd so sy best mochten trösten vnd nach dem besten ir ze-
 essen gaben die meid desselben abents in die statt den ärczten trü-
 gen, vnnnd domit nyemand solcher sach warnäme die fraw ir man-
 cherley neue histori vnnnd außrede bedacht wo sy der vrsach solcher
 krankheyt gefraget würde, iren brüdern vnd schwestern ze versteen
 25 gab wie sy durch die bösen geist wär betrogen worden vnd in solche
 krankheyt gefallen die ärczte ir von erst daz fieber namen darnach
 iren verbrunnen leib nit mit kleynen irer pein erczneyeten doch vil
 dick ir leib e sy wider gesund ward ir an dem leilach hangen beleyb,
 doch in etlicher czeit beyde fraw vnnnd meyd frisch vnnnd gesund war-
 30 den, vnnnd in solicher krankheyte die schön witwin ires bülen vergaß
 vnnnd hin füre sich vor vnmäßliche liebe vnd die mann zebetrügen be-
 sunder die gelerten weislich hütet. Vnnnd do der student vernam wie
 die meyd eyn beyn gebrochen het in daucht er an ir gerochen wäre
 nit weiter fraget. Also geschahe der schönen witwin die mit dem stu-
 35 denten meynet geschimpft het als wär er ein ley [297^c] vnd unge-
 lerter gewesen, nit bedacht was die studenten vnd schüler können,
 doch nit alle wol der merer teyl wissen sunder die von Parisii komen
 wo dem teufel der zagel hanget. Darumb mein allerliebsten frawen

wissent euch zehüten yemande czebetrügen. noch yemand zespoten voran der studenten daz rat ich euch in treuen.

Wie zwen güt gesellen yeglicher dem anderen sein weib beschlafet des der erst von dem andern warname zû seinem weib sprach. Nun gedенcke weib das mein geselle heynt mit dir schlafen kome das sy thet vnd in eynen kasten sperret vnd er des weib der in dem kasten was komen thût vnd auf dem kasten darinn ir man was mit ir seinen willen hat.

Dere schwär vund kläglich frawen Helena vund des studenten sach sich ergangen hat, doch durch die erbern frawen vnd auch mann erteylet ward wie frawen Helena kein vnrecht gesehen wär darumb ir liebhaben vnd was ir czûgestanden was mit gedultigem leyd geen liessen wie wol sy des studenten bestän[297^d]digkeyt lobten, doch was er mit der frawen begiege für eyn on maß grosse hertikeyt schäczten. Nach dem die künigin Fiametta gepot den gesagten hystori mit eyner irer neüen hystori nach zefolgen, des sy willig was anhüb vnd sprach. Ir czüchtigen frawen ich laß mich beduncken, wie euch des studenten hertikeyt gen frawen Helena eüere gemüte mit traurung durchgangen vund eyn kleyn betrübet hab, darumb mich güt vund billich duncket mit eyner frölichen histori eure betrübte gemüte wider in frid vnd freüd zeseczen, mein syn vnd meynung ist euch von eynem iungen man eyn neüe histori zesagen, der mit mer gedult vnd züchtigem gemüt eynen seinen empfangen widerdrieß mit mer maß dann der student tet rach. Also durch mein histori ir vernämen wert was üfels eyn yegliche person dem andern thût vnd zûzetucht eyns solichen widerumb soll warten sein, darumb wißt nach dem ich von erbern leuten vernomen habe wie in der statt Sena zwen iunge gesellen von genûg erberen geschlechten ir wonunge heten, der eyn genannte Spinelluczo, der ander Zeppa beyd nachpauren [298^a] vund gut gesellen miteynander waren. vnd ir yeglichen got mit eynem schönen weib begabet het. Nun sich begab als vil dick geschicht das Spinelluczo mit Zeppa weib grosse freundschaft nam, vund die in solicher maß das auß dem schympff eyn ernst ward vnd die gûten frawen czû seinem willen brauchet die zû vil manch malen beschlieff vnd sy willigklichen seinen willen thet. das also lange miteynander triben daz eynest Zeppa solcher arbeyt war name, das begab sich in dem form das eyneste Spinelluczo kame vund

nach Zeppa fraget vnd im rüffet daz weib im antwurt vnd sprach er
 wär nicht czū hauß als die sein nicht war genomen hete das er in dem
 hauß was. Do Spinelluczo die frauen vernam daz Zeppa nit zū hauß
 sein solt bald über die stiegen auf in den sal lieff do er die frawen
 5 allein fand die er mit seinen armen vmbfienge halset vnd küsset beyde
 nicht anders meynten dann Zeppa auß wäre beyder willen zū der stund
 eyn genügen theten, das Zeppa an dem end do er was alles sahe nach
 dem beyde von neuem in die kamern giengen, do hüb sich erste der
 betler tancz, des sich Zeppa sere betrüben ward, doch [298^b] bei allem
 10 zoren sein ere bedencken ward zū im selbs sprach Mach ich romor
 oder geschrey es stet darauf mir bekom e davon schand vnnd laster dann
 ere vnnd anhüb zebedencken wie er sich des on yemand wissen in der
 nachpaurschaft an Spinelluczo möchte rechen, domit er vnd sein ge-
 müt beyde in frid beliben. Also nach langem bedencken in dauchte
 15 er synn wege vnnd rat genüge czymlich solicher materi funden vnd
 bedacht het. Also lange verborgen lag das beyder kirchtag eyn ende
 het, vnnd als bald Spinelluczo von dem weib wege gienge. Zeppa in die
 kamern kame das weib fand die ir den stauchen wider vmb das haupt
 band den ir Spinelluczo in dem schercken ab dem haupt het fallen
 20 machen zū ir sprach Weib was thüst du, dem die fraw antwürtet sihest
 du nichte was ich thū. Zeppa sprach ia gar wol, aber ich hab auch an-
 ders gesehen des ich nicht gewölt het. Also mit ir anhüb von der ver-
 lauffen sach zereden, vnnd sy nach vil manchen neuen historien vnnd
 außzüge ir ere zebewaren im doch aller ding die warheyt saget was Spi-
 25 nelluczo bis auf dieselben zeit mit ir begangen het, vnnd in mit [298^c]
 weynenden augen vnd durch gots willen bat er solt ir vergeben. Zeppa
 zū ir sprach frau du hast sere übel gethan vnd ist wider got vnd götlich
 recht, doch wilt du das ich dir vergebe so wirst du thun als ich dir sage,
 vnnd das ich do will das ist daz du Spinelluczo bis morgen czū dir ze-
 30 komen zil gebest wenn ich vnd er bei eynander sein das er vrsache find
 von mir zegeben vnd her zū dir kom vnd ob sich begäb das ich in dem
 zū hauß käm so sperre in in den grossen kasten in vnser kamern, wenn
 du das getan hast so will ich dir sagen was du thū solt, vnnd hab
 weder sorge noch forcht das versprich ich dir bei meiner treūe das
 35 weder dir noch im von mir leyd zūsten sol. Die fraw daz im versprach
 zetū des er begeret vnd das thet. Do nun der morgen komen was
 Zeppa vnd Spinelluczo nach irer alten gewonheyt bei eynander waren,
 vnd nun terczeit komen was als Spinelluczo der frawen zū ir zekomen

versprochen vnd sy im zil geben het zů seinem gesellen Zeppa sprach. Ich muß auf disen morgen mit eynem meinem freunde czemorgen essen den will ich mein nicht warten lassen darumb stet mit got. Zeppa [298^d] sprach, es ist noch keyn essen zeit. Spinelluczo sprach daz gibt
 5 mir nichte czeschaffen ich hab auch anders mit im zereden etliches meins geschäfts halben darumb ich mich bei zeit bei im finden will, in dem von dann gienge czů Zeppa weib heym kame die in freüntlich eupfienge bald mit eynander in die kamern giengen vnnnd so balde darein nicht komen warn daz Zeppa auch zů hauß kame den das weib bald vernomen
 10 het die sich gen Spinelluczo sere forchtsam beweiset vnd nach dem ir von dem mann was befolhen worden in in den grossen kasten verbarge den gar wol versperret auß der kamern gienge. Zeppa czů der frawen sprach ob es noch essen czeit wär. Ja sprach die frawe es ist nun dolest wol zeit. Zeppa sprach Spinelluczo gienge neulich von mir vnd sprach
 15 er wölte auf disen morgen mit eynem seinem freund zemorgen essen hat sein weib allein doheyme gelassen gee hin an das fenster rüff ir das sy mit vns essen kom, daz sprach Zeppa alles dem in dem kasten zů gehör. Das weib die ir selbs besorget de mman gehorsam was bald an das fenster lieff vnd irer nachpaurin Spinelluczo weib rüffet czů ir sprach, wie
 20 [299^a] Spinelluczo auff disen morgen nicht ze hauß keme, vnd das sy mit in essen kem, Die sich nicht saumet palde kame, do sy vernam das ir man zů dem essen heym nicht komen sölt vnd als pald sy in Zeppa hauß kam Zeppa seinem weybe in die küchen zů gen gepote, vnd mit Spinelluczo weyb anhub zů schimpffen sy pey der hant nam mit in die
 25 kamern füret die kamer türe gar wol verrigelt. Do das die frawe sach zů im sprach Awe mir Zeppa was bedeüt das habt ir mich vmb des willen machen her komen? ist das die freuntschafft vnd prüderliche gesellschaft, die ir Spinelluczo meinem manne peweisen wölt, vmb des grossen getrauen willen das er stäcz zů euch gehabt hat; Zeppa die frawe mit
 30 den armen vmbfangen het starck vnd fest hielte, vnd sich mitt ir an den kasten darinne ir man verspert was leyne anhub vnd zů ir sprach Frawe ir euch icht über mich beklaget vor vernemet waz ich euch sagen will! Ir sült wissen das Spinelluczo euer man als meinen leiplichen pruder liebe gehabt vnd noch habe; aber geter des er villeicht nicht enweyße
 35 noch gemercket hat, ich fand vnd sichperlich sache [299^b] das grosse getrauen das ich zů ihm hette, Das ist das ich in gester pey meinem weybe ligen fand, vnd tet ir das er mit euch tut so ir zů pettt seyt vnd darumb daz ich in liebe habe als meinen prüdern ist mein meinung im

nicht anders zů thon dann als er mir gethon hat, ich euch das thon wille, vnd wie er mein weib zů seinem willen gehabt hat, Also will ich euch haben, vnd wo ir des nicht tun meint so müset ir gezwungen sein do wisset euch nach zerichten, dann das er mir peweyßt hat, will ich in
5 keinen weg vngerochen lassen. Ich sol sölche wege halten das weder ir noch er nymer sölt frölich wern, aber ich hoffe ir stült einem sölchen zů weyse sein vnd nitt darzů komen lassen. Do die frawe Zeppa vernam im kein vnrecht sprechen kunde; zů im sprache so gee es über mich vnnd damit auß übel nit ergers werde, ich geschicket pin ze leyden von
10 euch das euer weyb von meinem manne geliden hat, nür wir mit fride beleibenn, vnd mir euer weyb das nit in übel aufnem so will ich ir auch vergeben waz sy mir getun hat; Zů der Zeppa sprach; frawe daran habt keinen czweyfell ich sol euch mit meinem weyb [299^c] in gůten fride seczen über daz will ich euch ein schönes kleinet geben als ir ye keins
15 gehabt habt mit dem sy nam vnd auf den kasten niederleget darin ir man was, Do er mit ir nach allem seinem willen tet vnd das als lang vnd als vil im liebet er mit ir vnd sy mit im auß czweyen willen einen machten Spinelluczo der in dem kasten lage alle sach vnd des weybes red vnd antwort vernomen het vnd den tancz mit dreyen driten ob im auff dem
20 kasten lange zeit zů gehört in verdrissen ward vnd besunder pein bracht, vnd hette er sich vor Zeppa nit besorgt also versperter als er was er het dann weyb gescholten vnd ein pūbin geheissen doch bedacht wie aller anfang von im bekommen were vnd wie Zeppa tet vnd mit dem weyb beginge er recht vnd nicht vnrecht hette zů im selbes sprache, er
25 wölt mer vnd pesser sein geselle sein dann er ye gewesen were, doch so ferre wo es Zeppa gefiele; Do nun der gůt Zeppa ein genügen auff Spinelluczo weyb gewesen was dar abe steyge. In dem das die frau das verheissen kleynet an in begeret, Er palde die kamer tür auf tet seinem weyb rüffet die da kam nicht anders dann lachent sprach; Fraw ir habt
30 [299^d] mir got gesegens vns prote für kuchen wider geben; Zů der Zeppa sprach Frawe thue auf den kasten lasse mich geben daz kleynet daz ich vnser nachperin versprochen hab die frawe im den palde auff sperret do er Spinelluczo seinem weybe zeigt vnd sprach frawe das ist das kleynet daz ich euch verheyssen hab, Es wer vil zesagen welches von den zweien
35 sich am sersten beschamet sache Spinelluczo oder sein weyb die ob im auf dem kasten gedanczt het, do er Zeppa sache vnd peyder arbet auf dem kasten vernomen het vngeret auß dem kasten steyge mit wenig Worten zů Zeppa sprach wir sein geleich vnd geleich; darumb gůt ist

als du iczund zu meinem weyb gesprochen hast daz wir hinfür als wir
 piß her güt gesellenn sein stülen vnd als vnser peyder ding außgenommen
 die weyber gemein gewesen sein, wer mein syn vnd meinung dieselben
 vnser weiber hin für als die andern vnser ding sölten gemein sein; des
 5 Zeppa auch wol zů fride waz; Nach dem alle vire mit einander gingen
 das male essen, vnd hinfür igliche frawe zwen man vnd iglich man zwey
 weyber het also lang zeit mit grossem irem lust in fride vnd freuden mit
 einander lebten.

[300^a] Meister Symon arczt mit Bruno vnd Buffelmacho gesel-
 10 schafft macht, vnd Buffelmacho in eines nachtes in ein kotige lachen
 warff dar ine ir peyde liessen.

Wo nun die wirdig gesellschaft der kurezweyligen histori vnd der
 gemeinschaft der czweyer ired weyber halben in dem gar wol gelacht
 hetten vnd die künigin die alleine zů sagen noch beliben waz vnd do mit
 15 sy Dioneo keinen widerdrisse thet anhub vnd sprach, genug wol hat im
 Spineluczo mein lieben frawenn sein schand gewonnen die im als ir ver-
 nommen habt von Zeppa zůgestanden ist vnd mich in keinem weg düncket
 Zeppa zestraffen sey nach dem Pampinea gewölt het; Aber für ware
 dem in dem versperten kasten mit vnrecht geschahe, dann ein sölches
 20 selbes suchen ginge Als ich euch auch von einem sagen mein, was im
 üfels zů stünd die im das teten nicht darumb ze schelten, sunder das sy
 im theten des zeloben sein; Nun was der der ein sölches als ir ver-
 nemenn wert zů stunde ein arczt vnd als die andern esel mit feche aller
 über zogen, als wir dann stäcz sehen wie vnser purger [300^b] von den
 25 hohen schueln etlicher ein doctor etlicher ein baccalarius etlicher ein
 arczte von Boloni kamen in sölchem scharlachen röcken vnd menteln
 alle hermlein vnd feche über vnd vnder zogen; Auch wie sie in den kün-
 sten fertig sein wir das teglich sehen vnter sölchen vnsern gelerten vnd
 doctoren ein arczt kam der waz genant meister Symon mere reiche an
 30 fetterlichem erbe dann an synnen vnd künsten, der da aller mit schar-
 lach vnd feche als der gröste doctor der ye warde verdecket was, Nach
 dem er im selbes zů versten gabe der sich in der gassen genant Chuchumero
 zů hause seczet. Nun diser netter vnser meister Symon arczt vnd
 doctor der da netlich von dem studio komen was der vnter andern
 35 seinen mercklichen sytten ein gewonheit het wem er auff der gassen be-
 kame der seiner kuntschaft nicht het dem er sich zů erkennen gab, vnd

wie man alle erczney geben vnd prauchen sölt, vnd nach etlicher zeit in seinem also hin vnd hergen ze sůchen daz ander leůt fluchen, vnd vnter andern mannen die im zů gesichte kamen, daz warn czwen maler vonn den er auf denselben tage vil het hörn sagenn, der ein genant [300^c] Buffelmacho der ander Bruno die stăcz ir wonung mit einander hetten, vnd warn peyde meister Symon nachpern nit ferre von im mit hause gessen, die in dauchten mer frůchls lebens vnd stăcz gůtes můtz dann yemant anders diser welt als dann wol ware was vil manchen der ir kuntschafft hette ires wessen fraget von yedermann vernam wie es arm
10 hantwėcker vnd maler wern, Das in sere fremd name nicht můglich sein daucht das sy in sůlcher armůt also frůlich leben vnd gesein mőchten, wol vernomen het wie sy gar abenteuerliche vnd listige menner wern auch vil mere ander abenteuer die nit iglichem kunt were; kůnden nicht alleine ires malen lebten Do das meister arczte vernam im
15 gedacht ir peyder oder zů dem minsten dez einen kuntschafft ze nemen, Das sich palde fűgt on grosse műe Bruno kuntschafft nam, der gar in wenig stunden erlernet hett das ein pűffel was, vnd im etliche gůte tag mit essen vnd trincken mit dem arczt schuff vnd der arczte in vmb seiner neten histori willen gar dick ze hauű lude damit er sein not-
20 norfft gar wol mit im reden mőchte, vnd vnder anderm [300^d] fragen er in einest fraget vnd zů im sprach wie in ser fremd nem von im vnd seinem gesellen Buffelmacho das sy peyde so arme weren vnd pey sůlicher armut also frůlich leben mőchten, vnd pat in des freuntlich das er in leret vnd zů versten gebe wie er vnd Buffelmacho doch theten stăcz so
25 frůlich ze sein. Do Bruno des arczte vngesalzne frag vernam anhub zů lachen in dem im ein antwort bedacht nach dem die frage was vnd sůlcher frage zů gepűret anhub vnd sprach meister ich saget das nitt vil person wes wir leben vnd was wir thon; aber ich wille euch sein nit verpergen, dann ir seyt mein gůt freunt vnd gűnner, vnnd weyű
30 das ein sőtches pey euch nicht minder als pey mir verporgen ist. meister ir stűlt wissen vnd ist war das ich vnd mein geselle also wol vnd frůlich leben als euch dann bedűncket wir thon, euch die warheit zů sagen mit vnserm malen wir nicht das wasser gewinnen wir habenn weder gelegne gűter noch anders darauf wir műssig gen mőchten,
35 Doch will ich nitt das ir meinete wir villeichte stelen gingen; Es ist war wir gen in cursu dovon wir alles des wir nottorfftig seinn on [301^a] yemant schaden haben, dovon vnser leben frůlich ist als ir sechet; Do das der arczt vernam im gancz gelaubet, aber nicht weste waz er

gelaubet in großes wunder nam vnd ein gächlinger will ein fiele ze
 versten in dem cursu ze gen was das doch gesein möchte zû Bruno
 sprach, er on czweyfel sein sôlt waz er im sôlcher seiner heymlicheit
 ôffnet das von im nye mant sôlte zû wissen komen Awe meister sprach
 5 Bruno? wes seyt ir an mich begeren Es ist ein grosse sache das ir
 von mir wissen wôlt; ich besorge ir wert mich verderben vnd auß der
 welte treyben vnd den Lucifer von sant Gallen in sein maul farn thon
 wo das yemant ze wissen kem, Aber die liebe vnd das groß getrauen
 das ich euer qualitatina meluagine von Lengnaia trage; Das ich euch
 10 des ir an mich zû wissen begeret nit versagen noch versmeygen mage,
 beczwungen pin euch das ze sagen, doch das so ferre das ir mir des
 einen eyde pey dem kreucze von monte Syon sweret das nyemant ze
 sagen. Der arczte sprach daz will ich gern thon, So sôlt ir wissen
 mein süsser meister sprach Bruno daz in diser stat des nicht lange ver-
 15 gangen ist; Ein groß mei[301^b]ster der swarczen kunst was mit na-
 men genant Michel Schoto dann er was ein Schote aus Schotlant; Der
 von den erbern vnd edeln vnser stat der heut pey tage gar wenig ist ser
 geert was, vnd do er von hynne wege zoche czwen seiner lerrungen hie
 liesse den er in besunderheit befalhe das sy den erben hern von den
 20 er ere entpfangen het mit irem dienst in allem dem des sy an sie begern
 wegern weren zû willen würden; Dieselben czwen iungen den edeln in
 allen sachen dienten sunder in aller irer pulerey, Nach dem in der statt
 wesen; In sôlcher masse lieben warde das sy sich berieten hie stâcz ze
 wonen grosse freûtschaft mit yederman namen sunder der edeln die
 25 iren meister geeret hetten In der dienst alzeit bereyt warenn, Doch
 ydermans kuntschaft namen nyemancz freûtschaft wer, wer er wôlt nitt
 außslugen es wer reich oder arme edel oder vnedel, vnd do mit sy sôl-
 chen iren gûten freunden mit mer lust vnd freuden möchten zû liebe
 wern sy ein gesellschaft von fünfundczweinczig person machten, Die sich
 30 zû dem minsten des monecz ein fart pey einander funden vnd das an
 sôlchem ende [301^c] das sy zû iren geschefften am fûglichsten daucht,
 do iglicher besunder dem andern seinen syn vnd meinung ôffnet vnd
 dem auch also des selben nachtes ein genûgenn thon, Mit den selben
 czweyen ich vnd Buffelmacho grosse kuntschaft vnd ir besunder mer
 35 dann yemant freûtschaft hetten Vmb dez willen wir in ire gesellschaft
 genomen worden vnd noch dar ine sein; Mer sôlt ir wissen wenn wir
 vns zesamen fûgen ir grosses wunder sechet wie der sale do wir ein
 kamen also künstlich nach kûniclicher art zû bereyt ist darinn wir essen

vnd trincken von köstlichen diern von edeln frawen vnd mannen, die zů igliches willen bereyt sein, die pecke krüge vnd kandeln mit allem trinck geschirre alles von silber vnd golt ist über das gar vil mancherley edele speyse man vns zů essen vnd trincken geyt vnd daz nach
 5 iglichs lust vnd gefallen im für getragen werden, Ich möcht euch weder gesagen noch zů versten geben, die lieplichen süssenn seyten spile vnd edel gesang das man hört, vnd das groß wachß das man zů sölchemn nechten verprente, noch wie vil güts confection vnter vns verzert, der edeln köstlichenn [301^d] weine ich gesweyge der ich euch nicht ver-
 10 loben möchte Aber ich wölt nicht on salcze das ir gelaubet vnd meinert wir stünden vnd weren in vnsern kleydern als wir iczund sein vnd ir vns sechet, Neyn nicht also, Ir sült wissen es ist vnser keiner er deucht euch zů derselben nacht ein keiser sein also köstlichen sey wir gekleydet vnd geornirt vnd ob allen freüden die wir haben eine ob allen ist,
 15 das sein die schönen frawenn die aus aller welte; Nür ir von vns begert wern dar kumen müssen vnd vns pracht werdenn Ir secht do des grossen Barbanichi weyb die künigin von Baschi des soldan weybe die keyserin von Osbeth die Ciencliaferin von Norbegen vnd vil manche andre edel frawen der ich euch nicht allen nennen mage, vnd wenn wir
 20 gar wole gessen vnd getruncken haben Igliche mit dem der sy hatt kumen thon in sein kamern get; ir sült wissen das dieselben kamern ein paradeyße zů sechen düncken also schön vnd wol geschmacke sy sein, vnd das in form als wern sy aller specerey vol, vnser pette euch schöner das des herczogen von Venedig deuchten do iglicher mit der seinen ein
 25 slaffen get [302^a] Do secht ir wunder von hindern rüren vnd als die weyber thon die kasten an sich ziehen wenn sy die tücher enge slagen der weberin ich gesweyg, vnd vnder andern die da wol sten nach meinem gedüncken das sein wir czwen ich vnd Buffelmacho dann Buffelmacho im vil kumen macht die künigin von Franckreiche, vnd ich die
 30 auß Engellant das sein czwü die schönsten frawen auß aller welte vnd wir haben mit in also thon können das sy nit ander augen zesechen in dem haubt haben dann vns allein Darumb her lieber bedencket vnser wesen vnd ob wir nit mer dann ma auf erden frölich leben mügen; Das bedacht daz wir sölcher czweyer frawenn vnd küniginn willen zů vnserm gefallen haben, on das wenn wir tausent oder czweytausent gulden von in begern daz wir nicht haben, Dar ist das das wir in cursu gen
 35 geleich als die rauber thon, die anderen leüten das ir nemen, also wir auch thon; Aber die vnterscheyd czwischen vns vnd in ist was sy rau-

ben vnd nemen das geben sie nicht wieder des tu wir nit, dann wenn wir das genomen geprauch haben so gebe wir das zů hant wider, also gůter mein meister [302^b] sůlt ir nun wol vernomen haben was in cursu gen oder faren ist, wůlt ir nun das pey euch behalten vnd nyemant
5 do von sagen so můget ir dise gehörte wunder sechen. Der gůte meister arczte des lere vnd kunst nicht ferrer reichet dann kinder zů erczeneyen die reůdig oder grindig warenn, Bruno wort so grossen gelauben gab also wer es im ein wißliche warheit gewesen, vnnnd also grosse begire gewan in sůlcher gesellschaft zů sein daz ich es nicht gesagen
10 kan vnd Bruno antwort vnd sprach; In nudalest nit mer wunder nem ires frůlichen leben, mit marter verzoche in zů piten, dann mit mere treůe vnd grůssern eren piten meinete das er im gehilfflich were; In sůlche ire gesellschaft ze komen, daz auf dise stunde sten liesse, vnd fůrpaß nach seiner gewonheit in vil dicke zů hauß lud mit im zů essen
15 grosse vnmessige liebe zů Bruno gewan kein stunde on in gesein mochte Nun in sůlcher gůter gesellschafte peydenthalben Bruno sich bedůncken liesse sich mit dem arczte genug wol daran wāre vnd in widerkerung der entpfangen dienst vnd da mit er von dem meister arczte nicht [302^c] verdacht were in in seinem sal die fasten vnd über die tůre ein agnus dei
20 gemalet hette, vnd ob der haußtůr an dem weg ein harm glaß, domit die krancken person die sein nottorftig weren das sechen vnd in zů suchon westen vnd fůr andre arczte erkanten; Auch in einer seinen leuben der raczen vnd kaczen streyte malet des der arczte besunder freudhet vnd gar fůr ein kůstlich wercke hielte, vnd zů zeiten wenn er mit
25 dem arczt nit zů nacht gessen hette zů im sprach; dise vergangne nacht ist vnser gesellschaft pey einander gewesen vnd mich ist der kůnigin von Engellant verdrissen worden, vnd thet mir komen Gumedea des grossen kam von Kathey weyb. Do fraget in der arczte waz Gumedea wůlt sprechen er verstůnde des namen nicht, O lieber meister es nymet mich
30 nicht wunder, ich gedenck mir Porco Grasso vnd Vanacena nit dovon schreiben sůllen, Do sprach der meister du wilt sprechenn Yppocrasso vnd Vincenna, traun ia sprach meister Bruno ir habt es werlich erraten, ich meinete wol dieselben, aber ich verstee gleich als wenig eůere laperleinisch namen als ir in meinem arabeische tut, Aber ir sůlt wi[302^d]ssen
35 das Gumedea in des grossen kam sprach als vil bedeůten will als in vnser zungen ein keyserin, O meister es daucht mich ein schůn weybe sein sůlt ir dieselben sechen sy sůlt euch werlich alle argument der erczeney vergessenn machen, Sůlcher mere im Bruno vil dicke vorsaget,

die im alle grösser begir machten in die genanten gesellschaft zů k-
 men. Nun eines nachtes sich begab das der arczte Bruno leuchtet do
 der raczen meüse vnd kaczen streyt malet peyde alleine pey einander
 warn Er anhub vnd Bruno sein meinung saget zů im sprach lieber
 5 Bruno got sey mein zeüge so sprich ich das ich heute pey tage nitt man
 auff erden lebet dem ich zů lieb thet daz ich dir thet; Ich gelaub on
 czweyfel sprechest du ich sölt dir zů liebe ein meyle gen ich thet es
 lasse dich nicht fremde nemen das ich so eynfeltig mitt dir mein ge-
 spreche hab, ich tů es auß grossem getrauen daz ich zů dir hab, Dar-
 10 vmb ich an dich begere ist es anders möglich, der sache halben als dir
 wissent ist, Nit lange ist darauß du mit mir redest eüerr frölichen ge-
 gesellschaft halben die zů sechen mer begire mir komen ist dann keines
 andern [303^a] dinges diser welt vnd für ware nicht sol on grosse vr-
 sache sein als du dann wol sechen solt ist anders sache das ich in eüer
 15 gesellschaft kom, vnd sölt wissen kum ich darein das auß mach kein ge-
 spötte, ich sol dir die schönsten meit komen thon die du ye mit augen
 sachest die ich daz vorder iare Cacanintigli sache der ich alleine alle
 mein hulde gab, vnd werlich werlich ist gesworn ich wolt ir einest
 czweinczig Bolonier geben haben daz sy meinen willen gethon het aber
 20 die preckin wolt ir nicht nemen; Darumb mein lieber Bruno freünt vnd
 güter gesell piß gepeten gib mir lere vnd anweyßung wes ich mich hal-
 ten sol zů euch ze komen, vnd das du dich vmb meinen willen müest
 dez wil ich dir ewig verpunden sein, dann für war ir an mir einen güten
 getreuen gesellen haben sült; du sichst wol ich pin ein man schönes
 25 gerades leybes darzů kunstreiche von vil tugent gecziret wie wol mir
 die pein vnder dem leybe sten, so hab ich doch ein rosenfarbes ange-
 sicht, über das pin ich ein doctor der erczney der ir villeicht keinen
 vnder euch habt, Darzů gar vil güter spruch kan, Durch mein lieplich
 gesange der ich [303^b] dir einen singen will, vnd zů hant anhube vnd
 30 sang, Des Bruno von gelechter schier zůsprungen wer, vnd do der
 meister sein gesang verpracht het zů Bruno sprach? wez düncket dich
 kann ichs aber nicht wol zů dem Bruno sprach für war die Cettera mit
 euch verlürn so vil künt ir sein ich het daz pey euch nit gesucht; der
 meister sprach des gelaub ich dir vngesworen, Ia wol lieber Bruno ich
 35 kan ir noch vil mere, ich gelaub es für war sprach Bruno ir seyt sein
 meister, der meister sprach; lasse wir iczund dise märe sten, vnd nyme
 war wie du mich iczund sichest so solt du doch wissen das mein vater
 wie wole er auff dem dorffe wonet ein gůt edelman was, so pin ich von

muter geporn von dem geslecht Vallechio, vnd als du wol gesehen hast so hab ich die schönsten röcke, vnd vil pücher mer den kein arczte der statt vnd kosten werlich vil gutz geltes mer dann hundert pfunt haller alter alter münche, Des pey neün iaren vergangen ist, Darumb
5 lieber Bruno piß gepeten thue so wol an mir vnd schaffe daz ich zû euch in eüer gesellschaft kom! tûst du das ich versprich dir wûrstu ymer kranck daz ich meiner kunst [303^c] halben nicht ein pfenning von dir ze nemen begeret; do Bruno den arczte aller seiner red vernomen het in wol bedauchte er der were nach dem im in seinem beduncken er-
10 schynnen was mer einem altreüssenn dann einem arczte geleich were. zû im sprach meister leucht ein klein paß her zû lasset euch nit verdrissen also lange das ich den meusen die zegel gemacht hab nach dem wil ich euch antwort geben, vnd do er die zegel gemacht het des geleichens thet als ob im des meisters piten sere zû herczen ging zû
15 im sprach meister grosse dinge das sein die ir mir zû liebe thet die ich wol erkenne, auch do pei dez ir an mich begeren seyt pey eüern synnen ein klein sache ist, Aber mir zû male grosse ir sült wissen wie kein person in diser welt nicht enist für die ich tete daz ich für euch tun sol, dann ich hab euch lieb vnd wert als dann pillich
20 ist, sunder vmb eüer süssen wort willen die alle mit lauter synne gemischet sein, vnd ye mer ich pey euch wone ye weyser ich euch finde, mer sült ir wissen wer nit anders daz mich euch machet liebe haben; so müsset ich euch lieb haben vmb des willenn das ich sich vnd vernym daz [303^d] ir ein puler vnd schöner frawen hofirer seyt, Doch ze komen on die materi
25 des ir begeren seyt, so sült ir wissen das ich in disen sachenn nit als geweltig pin als ir villeichte meint; Doch wo ir mir auff etier trewe versprechet daz verporgen ze halten so will ich euch lern vnd wege gebenn wes ir euch in disen sachenn halten sült, vnd lasse mich on czweyfel bedüncken seytmal ir mit püchern vnd schönen röcken so köstlich seyt
30 als ir mir vor gesaget hab, des ir begeret stülle euch wern zû dem der seüe arczte sprach Bruno sage mir vnd verpirge mir nicht du weist nit das ich so geheyme vnd verswigen pin, Du kenst mich noch nicht recht, Es waren gar wenig verpornner sache die her Kaspar Salicete thet do er zû Fürlipoli richter was das er mich nit wissen liesse, vnd das alles
35 darumb das ich also ein güt secretari was, wiltu sechen daz ich ware sag; Ich was der erste man dem ich ze wissen tet daz er die Bergemena zû einem weybe genomen hette, Darumb bedencke gar wol was ich dir sag, Es ist gar güt vnd gefelt mir wol von euch sprach Bruno, seytmal

euch derselbig so großer sache getraut hat so ma[304^a]ge auch ich euch wol trauen; vnd den weg den ir haltenn wert das ist der; wir haben stätz in vnser gesellschaft einen hauptman mit czweyen räten die man alweg über sex monet verneüt vnd andre machet vnd on czweyfel Buffelmacho
5 mein geselle am nechsten ich vnd er des neuen hauptman räte sein wern, vnd wer hauptman ist der mag mit seinen räten tûn vnd lassen was im eben ist Also mein rate were ir tet wie ir möcht damit ir Buffelmacho kuntschafft het; Dann er ist ein sölch man wenn er euer weyß geperde vnd vernunft pey euch sicht vnd vernymt wirt er zû hant grosse liebe
10 zû euch gewinnen, vnd wenn ir in mit euern vernünftigen synnen zû euch als ir mich gethon habt geczogen hat so müget ir mit im eüer nottorffte reden vnd an in begern waz euch liebe ist so mage er euch nit nein sprechen so hab ich im auch wol meinen teyle von euch gesaget, vnd wenn ir daz getun habt so lasset mich darnach die sache handeln,
15 Der arczte sprach Bruno dein rate ist gût gefelt mir wol; kome ich mit im zû red ist er anders ein man als du sprichest der da weyse man liebe habe, ich sol mit meinen worten thon daz [304^b] er mich sol suchen gen, Dan ich hab so manche synne ich wölt ein stat damit regiren; vnd genug geben vnd ir nitt dester minder haben mit dem sich peyder rede endet,
20 Bruno Buffelmacho alle sache ze wissen thet, den tausent iare daucht das er mit dem kûe arczt zû hauffen kem im zû gebenn das er dann suchen ging, vnd der meister der da grossen willen het in cursu ze gen nit nach liesse piß er Buffelmacho freuntschaft erworben het im köstlich essen vnd male machet, teglich zû hauß lud in vnd Bruno, die in ire
25 peüche mit den gûten weinen vnd feysten kapaun gar wol an fûlten, vnd do nun den arczte zeit dauchte vnd wie er Bruno der sach halben gepeten het als er Buffelmacho pate, vmb des willenn Buffelmacho in gleichnûße sich gen Bruno betrûbet vnd groß romore über in machet, vnd schwur pey dem hohen got von Pasingano vnd sprach ich weyß nicht
30 wie ich mich sein enthalte das ich dich nit über den grint slache daz dir die nasen für die fersen felt, du lotter pub schalcke vnd verreter der du pist nyemant anders dann du hat dem meister dise sach ze wissen getun, aber der meister in des entredet vnd sein stusa tet [304^c] vnd sprach er het ein sölches von andern leüten vernomen vnd mit seinem
35 fürsichtigen reden vnnd weysen worten nach seinem gedüncken Buffelmacho wider zû fride seczet, Der sich gen dem meister keret vnd sprach; meister es thut wol schein daz ir in der hohen schul gestudirt habt; ir habt nit daz abc vnter den öpfeln gelert als vil manch weyß

tun wol auf dem langen kürbis das lernen möcht, vnd für ware ich sey
sein dann betrogenn so würt ir an dem suntage geporn vnd getaufft wie
wolle mir Bruno gesagt hat, wie ir in erezney gestudirt habt, so be-
dunckt mich ir habt gestudirt die manne zů fachen daz ir werlich paß
5 künt dann ich keinen ye gesache mit eütern grossen synnen vnd netten
histori Der arczte im daz wort in dem munde prach vnd sprache? wie
ist es hoch ein ding mit weysen leütten zů reden, vnd mit in ze wonen;
wer het so pald alle ecke meiner synne erkennen mügen als der erber
man getun hat Bruno du hast mit mir gůt zeit dein wonung gehabt, vnd
10 hast eins sölichen nye war genomen als ich geren gewölt het; hest du im
gesagt als du mir sagst wie Buffelmacho liebe vnd lust ze wei[304^d]sen
mannen het; ich wolt dich eins bescheiden haben, wie düncket dich aber
hab ich in zů mir pracht, traun ia ir sprach Bruno; ir seyt der kunst
ein meister; Do sprach der arczt; Buffelmacho hettst du mich in der
15 hohen schul zů Boloni gesechen? was hettst du do von mir gesagt; dann
es waz weder iunck noch alte klein vnd groß von doctor vnd studenten
die mich nit alle erten vnd wol wolten Ich kunde sy alle mit meinen
synnen bezalen, ich redt gar selten das sy mein nicht von freüden lach-
ten als grosses gefallen sy meines reden hetten, vnd do ich von Boloni
20 schiede alle als die kinder vmb mich weinten gern gesechen hetten daz
ich lenger pey in beliben were vnd mir alleine in erezney zů lesen der
eren vergünnen wolten also grosse was die liebe die sy mir hetten Aber
in keinen weg das zů thon geschicket was, Sunder her zů euch ze komen
mein vetterlich lant mit meiner kunst zů erfreüen vnd meine erbe zů
25 besizen als ich dann gethon hab; Do sprach Bruno zů Buffelmacho wie
düncket dich du woltest mir nit glauben do ich dirs saget; ich spriche
vnd schwere pey dem euangelium Es hat vnser stat nicht einen
[305^a] arczte der sich esels harm verste Das ist der, der du keinen nye
mer gesechen hast, seines gleichen ist nit von hier piß an die porten
30 gen Parisy. Nun ge hin du vnd enthalt dich nitt ze thon sein gefallen,
der arczte sprach Bruno du sagest die warheit aber ich pin noch nit
erkant, Werlichen meister ir wist vnd künt vil mere dann ich gelaubenn
kan ir seyt ein schrein der weyßheit. darumb suchen will da mit ir in
vnser gesellschaft komet; Des der arczte ser wol ze müte was, das er
35 der czweyen freuntschafft vnd gůten willen het, do hin ze komen do sein
wille hin stunde, In peyden grosse ere thet, vnd sein begire pey in zů
sein sich stäcz meret vmb Buffelmacho verheyssung willen des sy peyde
besunder freüde hetten, vnd in den esel gar woll reyten lerten, vnd im

die margraffin von Ciuilaz für sein liebe frawen verheissen, daz die
schönest frawe gehalten waz die man in allem Culactano finden mocht.
Der arczt fraget wer die margrefin were; Buffelmacho sprach Pincamea,
Es ist ein grosse mechtige frawe, vnd gar wenig heüser in der welt sein
5 oder sie habe darinn zû richten; sölche mechtige frawen wölle wir euch
[305^b] geben, Darumb wert ir sten lassen eüer Cacumcigli, ich sage
euch es zû rynne vns dann synne wir süllen euch in die süssen brachia
pringenn, Der arczte der zû Boloni gestudirt vnd erwachsen was, Buffel-
macho rede vmb der wunderlichen vocabel willen nitt vernam, doch der
10 grossen edelen frawen dovon er vernomen het wol ze müß waz, mit dem
von einander schieden, nach dem nit lang verging, peyde maler im märe
prachten wie er in die gesellschaft auff genomenn were, Zû hant dar-
nach zeit kam das sich sölche gesellschafte des nachtes zû einander
fügen sölt, Buffelmacho zû im sprache, meister ir wert ein gûß hercz
15 haben, dann wert ir nicht als beherczent als euch not ist beherczent ze
sein, so möcht euch villeichte schaden zû sten, daz were vns ein grosse
schande, vnd darumb ir beherczent sein müß, das sült wissen ir wert
gedencken in diser nacht in dem ersten schlaffe auf der toten greber
einem ze sein, die am neulichsten auff dem freythoffe gemachet sein pey
20 vnser frawen kirchen, vnd das thun wertt in dem pesten vnd schönsten
kleyd als ir das habt, damit ir auf die erst nacht mit größern ern
[305^c] vnd wurden empfangen werd vnd auch was von euch ist gesaget
vnd geret worn sich an der warheit finde, Dann ir seyt ein edel man
vnd die grefin in der meinung ist auf ir speyß vnd kost euch zû ritter
25 ze machen, do wert ir warten also lange das wir nach euch schicken,
vnd damit ir aller sach vnterricht seyt; Es wirt vmb euch komen ein
swarcz tiere nit sere groß mit hörnern vnd wirt vor euch auf dem placze
hinher springen euch zû erschrecken, vnd wenn er vernympt vnd sicht
das ir mannes hercz habt vnd euch vor im nitt besorget so wirt es sich
30 züchtiglich zû euch näheden wenn ir das secht so steyget ab dem grabe
on alle forcht vnd on alle gedechtnuß weder got noch der heiligen, siczt
darauf vnd halt peyde hende an eüer prust vnd rürt das tiere nitt an-
ders an vnd lasset es seinen wege gen so würt es senftig von dann gen
vnd euch zû vns pringen, Aber wo ir got vnd der heiligen gedeckt oder
35 forcht het, so möcht euch daz tier an sölches ende tragen, oder werffen
daz euch villeicht stincken vnd übel schmecken würd Darumb seyt ir nit
freyes leben, so vnterwint euch icht ze thon dann ir thet vns schaden
[305^d] vnd precht euch keinen frumen Der meister im palde antwort

vnd sprach ich wol ir habt mich noch nit recht erkante Ir secht vil-
leicht an das ich hentschû an den henden vnd langes gewant an trag
darumb verczaget sey vnd nicht hercze habe, sôltet ir wissenn was ich
zû Boloni des nachtes gethon hab ir sôltet eûch gesegen, sunder wenn
5 ich mit den gesellen zû schönen frawen ging, werlich werlich pey got
gesworen es ist wol die nacht gewesen daz etliche nitt mit vns komen
wolt zû vor an eine die waz gar ein frische pûbin aber kaum einer spanne
lang, der ich vor gûte streich gabe darnach auf mein achßeln nam vnd
wol ein gûten steinwurff trug so vil tet es wer ir liebe oder leyt das sie
10 komen must. Noch mer mir zû gedencke komet, wie ich vnd mein knecht
allein eins abencz nach aue Maria neben einem kirchhoff für gingenn do
des selbes tages ein altes weyb was pegraben worden ich kein het forcht
noch sorg Als dann mancher getûn hat Darumb czweyfelt nichte ich hab
gar ein gût starck hercze vnd pin sere freydig wenn ich erbarme, Mer
15 sage ich euch, nûr das ich erbelich kome sol [306^a] sich meinen schar-
lach in dem ich die wirdikeit meiner doctorey enpfinge zû dreien malen
anlegen, vnd stûlt sechenn das sich die gancze gesellschaft mein freûen
sol wenn sy mich ansichtig wern in meinen schönen kleyde vnd mich
zû hant capitano machen wern Ir wert wunder sechen wie mich die
20 schöne grefin so liebe haben wûrt, vnd als ir spricht mich zû ritter
machenn wirt, lasset nûr mich mitt ir schaffen, ir saget wol secht nûr
das wir von euch nicht betrogen wern sprach Buffelmacho das ir nicht
komet vnd euch nicht finden lasset wenn wir vmb euch schickten dann
es ist iczund kalte, vnd ir herren erczte euch gern vor keltenn hût; Des
25 wôll got nit sprach her arczte dann ich pin nitt der der den frost be-
sorget, es warde nye so kalt das ich dez nachtes nicht auffstee meines
leybes nottorfft ze thon vnd nicht anders dann allein meinen pelcze auf
plosse haut anwürffe; Darum piß on czweyfel ich kome! do du mich auff
das toten grabe hin bescheiden hast, mit dem aber von eynander gingen,
30 vnd als pald die nacht komen waz der meister in dem hauß sein außred
mit seinem weyb fandte vnd ver[306^b]porgen seinen schönen scharlach
anleget, vnnd do in zeyt daucht auff das beschiedenn toten grab ginge
zû besechen was sich doch schicken vnd begeben wûrde auff das grabe
sasse vmb der kelten willen sich gesmûcket hielte des swarzen tîers ze
35 warten; vnnd Buffelmacho in seinem abscheyden von dem arczte sein
ordnung gabe zû haben einen grausamen schenpart als man geren zû
den faßnacht prauchet vnd ein swarzen pelcze anleget das rauch herauß
kerett, vnd sich also einem pern mer dann menschen pilde gelei-
che

machet In der person vnd in dem anpicke vnd haubt einem teuffel mer
 dann anderin tiere mit grossen hörnern geleiche was. Do er nun also
 gancz bereyt was sich gen den kirchoffe wercz füget, Vnnd Bruno im
 von ferren nachfolget vmb wunder zů sechenn wie sich doch der arczte
 5 stellen wölte, wann das vngestalt tiere zů im keme in der forme als ir
 vernomen habt, Nun Buffelmacho auf den placz oder freythoff kam vnd
 des meisters auff dem toten grab wargenomen het zů hant anhub zů
 springen zů plosen tobenn grausamlich zů schreyen als dann der vnge-
 hetter gewonheit ist [306^c] Do das der arczte sache vnd höret im alle
 10 seine hare geperge gingen, citern warde als ein espe laub, Als der min-
 der dann eins weybes hercz hette, seinen schönen scharlach gern dar-
 umb geben hette das er zů hauß gewesen wer, doch wie er mochte die-
 selben seine forcht über wante, vnd daz alles die wunderlichen ding zů
 sechen vnd ze komen do er lange zeit hin begert het, als im die czwen
 15 maler hetten ze versten geben. Do nun Buffelmacho seinen narrenweyße
 gůt zeit getriben het, des abliesse vnd sich zů dem grabe füget darauff
 der arczte saß; do still vnd züchtig stunde, vnd der arczt der von
 forchte aller cittert nicht weste was er tun sölt auff das tiere ze siczen
 oder nicht; Doch nach langen bedencken im gedacht sesse er nicht
 20 darauf das tiere in on czweyfel ein teuffel sein daucht, im villeicht scha-
 den thon vnd den halb prechen möcht Also mit der ersten forchte die
 andern forcht von im sluge, ab dem grab steyg zů im selbes gemelich
 sprach; Nun helffe mir der liebe got, Mit dem er auf daz selbig tier
 saß cittern sich schicket so er peste mocht sein hende auff seine prust
 25 leget als im von dem ma[306^d]ler was befolhen worden, also in das
 tier gemelich auf allen virn durch die gassen auß zů der stat mauern
 pracht do gar vil mist gruben warn do etliche pauern den mist vnd
 sprachhetiser raumung darein schütten ire felder zů düngen, Daz waz
 die grosse vnd schöne marggraffin die im waz verheissen worn; Nun was
 30 des selbenn tages ein sprachhauß geraumpt vnd in derselben grüben
 eine getragen worden dez Buffelmacho des tags gar eben wargenomen
 het, Do er zů derselben gruben kam; im zeit nam vnnd peyde hende
 dem arczte vnder die füß thet mit dem hindern auf gnappet vnd den arczte
 über daz haubt aus abe in die kotigen stinckeden gruben warff nach
 35 dem greulich anhub zů prumeln vnd toben als des pern gewonheit ist,
 Also den arczte mit dem haubt in dem vnflat stecken liesse von dann
 ginge zů Bruno kam der im von ferre nach gefolget het, peyde in der
 grossen püberey wol lachten mit einander auf ein ort gingen zů sechen

wes der arczt in dem kote begünne, vnd do sich der arczte in also grausamen end sache sere betrübet waz nicht weste. wie er doch auß derselben gruben komen sölt, dann [307^a] sy was ser tieffe vnd wenn er auff halben weg komen waz so fiele er wider zu rücke hinabe, also in der
 5 kotigen gruben in dem langen scharlachen rocke hin vnd here wute von dem haubt piß auff die füsse ein eytel kote vnd gestancke was, auch derselben prüe do er mit dem haubt darinne steckt mer dann einen truncke gethon het, doch nach langer arbet sich so sere müet das er auß der gruben kam aber sein scharlach cappen darinne beleyb vnd so
 10 er pest mocht mit den henden das kote ab im streich vnd so er peldest mocht sich zů hauß füget, do er so lange anklopffet das man im auf thet, vnd so palde die tür nicht zugethon het daz peyde maler da waren zů vernemen wie der arczt also kotig er von seinem weyb enpfangen würde, vnd in irem zuhören wol vernamen das in daz weyb schelt übel
 15 handelt als pösem man ye gethon ward Ey wie wol ist dir geschehen du nährischer man sprach das weyb zů im? wo gingstu hin ander frawen ze suchen du woltest ir traun erberlich in scharlach zu hauß komen; hast du an mir kein genügen du seßarczte! nun traut ich sein einem ganczen connent genuge. [307^b] geben ich gesweige dir alleine, Nun wolt got
 20 daz sy dich in dem kote ertrenckt hette darein du geworffen warest als du dann wol wirdig warest! Nun secht nür an meinen erbern arczte der ein frumes erber weyb hat vnd zů andern pübin get Also die güt fraw piß auff mittenacht genug zeschaffen het den arczte ze waschen; Des morgens früe Bruno vnd Buffelmacho sich an dem leyb gemalet
 25 heten als weren sy hert geslagen worden zů dem arczte heym kamen der neulich aufgestanden was vnd das hauß von vureinickheit noch stanck, dann alle ding noch nit gancz gewaschen waren, vnd do der arczt die czwen vernam in entgegen kam zů in sprach das in gott ein seligen morgen gebe dem Bruno vnd Buffelmacho mit czornigem angesicht ant-
 30 worten vnd sprachen, ein söliches sprech wir gar nicht zů euch, sunder das euch got als vil pöser iare vnd tage gebe vnd pöses todes sterben müset! ir vngetreüer zů nichter pößer verreter der ir seyt, dann on euch nicht gemangelt hatt, wo wir euch zů grossenn ern pringen meyn- ten daz ir vns nit schir vmb vnß leben pracht hab [307^c] dann so vil
 35 herter streich vnd slege vmb eüern willen wir gehabt haben daz mich wunder nimpt das wir lebendig sein; es were ein esel mit minder slegen für war gen Rom gangen, on das daz wir besorgten wir auß der geselschaft gestossen würden, dar ein wir euch pringen meinten, vnd domit

ir gelaubet was ich sage war sey, Nemet ware vnd besecht vnsern leybe
 peyde arm vnd peyne, vnd sich peide ab zugen vnd ir gemele dem arczt
 weysten vnd sprache daz alles stecken slege weren, palde ir gewant
 wider an wurffenn Der arczte sein außred suchet In seinen iamer sagen
 5 vnd klagen meinete wo er hingetragen vnd geworffen warde des sy sein
 spotten vnd Buffelmacho zû im sprach; ich wölt das ir ab der hohen
 prucken in das wasser geworffen weret, warumb gedacht ir got vnd der
 heiligen, warde es euch nicht vor gesaget werlich vnd pey got sprach
 der arczt ich bedacht das selbig nicht es waz mir vergessen das ir mir
 10 vor saget, Nun wie sprach Buffelmacho gedacht ir nitt daran Nun saget
 vns vnser pote ir het gecitirt als ein gerten vnd west nicht forcht halben
 wo ir wert, ir habt vns wol auß [307^d] gericht, aber ir seyt der erste
 gewesen vnd stult auch der lezte sein, keiner vnd het er Salamon kunst
 soll es vns mer tun vnd wir sullen euch geleihe tun als ir vns gethon
 15 hab! Der arczte peyder grossen czorn sache sich von neuem vor in
 besorget palde an sy genade begeret vnd pat sy vmb gotz willen ver-
 geben sölten vnd nicht zû schanden machen; Also so er pest mocht
 mit seinen süssen worten vnd grossem verheissen sich mit in wider zû
 fride seczet, vnd hin für mit grössern ern vnd freuntlicher liebe mit
 20 essen vnd trincken sich mer genn in peweyset dann er vör ye gethon
 hette Also ir vernemen sülte wie man synne vnd weistum leret wer ir in
 der hohen schul zû Boloni nicht gelert hat.

Wie ein schöne pulerin in Cicilia einem iungen haufman nam
 was er het daz selbiger ir wider vmb thet ir zû versten gabe wie er
 25 von neuem mere dann er vor gethon het kaufmanschacz pracht habe
 auff die er ir gelt entlechet vnd ir on öle stat fesser vol wasser vnd
 grosse pallen vol werck liesse von dann als vor auß der inseln gen
 Napels floche.

[308^a] Ob der künigin neue histori die frawen hat lachen machen
 30 do frag nyemant nach! es waz ir keine mer dann zû zehen malen die
 zeher für ir augen kamen alles vmb des grossen gelechters willen, das
 sy den arczte von den malern vnd seinem weyb also außgericht vernam-
 en, doch do das zû ende kam Dioneo wol erkante ze sagen; nudalest
 an im was anhub vnd sprach; Ir edeln schönen frawen! Es was vor
 35 zeiten vnd villeicht noch heüt pei tage sein mage in den steten die pei
 dem mere gelegen sein ir porten haben, darein die kauffleut mit irem

güt schiffen, nach dem söliche ire kauffmanschaft abe vnd in das czoll-
 hauß laden; daz an vil enden genent ist dogana vnd ist eins hern oder
 der gemeine darein iglich kaufman den ceöllern sein güt beschriben
 geyt, Dopey den wert igliches dings besunder nach dem die kauffleute
 5 gewelbe vnd leden auf nemen ir güt darein legenn vnd do verkauffen
 vnd die vnterkeüfel auß der zölner pücher nemen den wert der kauf-
 manschacz vnd das den die da kauffen wöllen ze wissen tûn, söliche ge-
 wonheit wie sie in allen andern steten waz also zû Paler[308^b]ma in
 Cicilia was; Auch fürpaß wissen sült nit minder do als anderswo auß
 10 dermassen schöne frawen warn, aber zucht vnd ern grosse feindin wa-
 ren, vnd wer ir natur nitt gekennet het sy für die züchtigisten frawen
 aller welt gehalten het, vnd nit alleine den schurn der ir nicht kennet,
 sunder sich vlissen die zeschinden vnd die haute ganz ab ziehen, wenn
 nun die kauffleut ir güt in dem zole haben dieselben frawen fragen vnd
 15 suchen gen was güt des kaufman hat sy erforschten, nach dem sich
 vleissen sölicher kauffleute kuntschaft ze nemen, vnd sy mit iren süßen
 worten leiplichen geperde zû in ze ziehen, Nach dem mit in iren willen
 zû verpringen vnd wol söliche kauffleut funden haben dem sy alles das
 er het auß den henden gezogen haben; Auch etlich nit alleine ir kauf-
 20 manschacz mit sölichen frawen verczert haben sunder auch den leib mit
 sampt dem güt verloren vnd do gelassen haben, also schöne vnd wol
 haben in dieselben palirerin scheren kûnen des nicht lange zeit ver-
 gangen ist gar schir einem vnserm kaufman zûgestanden were, Sich
 begabe nicht lange zeyt ist das ein iunger vnßer Florenczer [308^c] von
 25 seinem meister gen Salerno mit wûllen tûchern gesant warde von den
 im etliche beliben vnd nicht verkauft worden mit den er über mer gen
 Palerma fure, vund nach gewonheit als die andern teten seine tûcher
 in daz zolhauß antwort nach dem die auß dem zole nam vnd in ein ge-
 welbe leget, nicht sere achte het die zû verkauffen vnd in sölicher zeit
 30 in der stat vil hin vnd her spacziren ginge als gern der fremden iungen
 gewonheit ist wenn sie in die fremde stet komen; Nun waz derselbig
 iunge gerades hübsches leybs mit namen genant Nicolo Cingano, Des in
 sölichem seinem spaciru gen derselben vorgeanten schönen schererin
 eine wargenomen het die was genant frawe Bianchafiore die im zû ir
 35 rüffen thet, die nun etwas sein vnd seiner tûcher halben vernomen het,
 darumb ir gesichte auf in hett, auch er des wargenomen het; aber er
 im nicht anders gedacht dann sy were ein edel frawe, vnd er ir vmb
 seiner iugent vnd geradykeit willen gefiele; darumb sy in so ernlich

an seche, vnd sölche liebe er in grosser stille vnd geheym füren meint, vnd nyemant davon nicht saget vnd des nachtes vil dicke ir hoffi-
[308^d]ren liesse, des sy alles ware nam; im ir gesicht stäcz in geleich-
nüss grösser liebe peweyset, vnd do sy in gancz in lieb gen ir enczündet
5 het im heimlich irer alten weyber eine zû schicket die ein meister söl-
ches geschefftes waz, dieselbig im mit züchern ir augen nach vil man-
chen mären irer frauen willen zû wissen tet; zû im sprach; wie er mit
seiner leiplichen zucht irer frawen gemüte gen im enczündet vnd ir ir
hercze in freuntlich liebe verwunt het, vnd das in sölcher masse daz sy
10 weder tag noch nacht mer rûe hetten, darumb sy in freuntlich pete daz
im liebet sich pey ir an verporgem ende ze finden, vnd nach disen wort-
ten auß irem peütel ein gülden rinck zoche in dem von irer frawen we-
gen schencket Do der iunge des alten weyb rede vernam nach dem
einen guldin ring von der schönen frawen enpfing; sich der frölichest
15 vnd pas zemütes man daucht der auf erden nye ward, den ring nam
sein angesicht vnd augen do mitt bestreich lieplich küsset, nach dem
zû dem alten weyb sprach hat mir frawe Bianchafiore ir liebe vnd hulde
gebenn, ist mir von herczen liebe desselben ich ir die meinen auß grundt
[309^a] meines herczen geben hab, vnd sy ob allen frawen der welte
20 liebe hab geschicket vnd bereit pin zû aller stunde wo ir hin liebet vnd
ir gefallen ist, mit disen Worten das alte weybe wider zû hauß ging, ir
frawen des iungen antwort prachte vnd nach langem bedencken das alte
weyb wider zû dem iungen schickt im enpote wie ir gefallen were in
dem pade genant Salabaetto sich pey einander ze findenn, Do er das
25 vernam sein gût gefallen waz sich palde in daz pad fertiget vnd fand das
man das auff die schönen frawen bereyt het die er all zû hant komen
sache vnd nach ir czwen schläuen der eine mit einem paum wollen
pette vnd der ander mit anderm geräte. Do die fraw daz pette in ein
frische kamern legen thet, vnd mit schönen leylachen als die seyden
30 bedecken schuffe auff die einen samaten golter, Nach dem peyde der
iunge vnd die frawe in daz pade gingen von den czweien schläuen sau-
ber gewaschenn worden; nach dem die frawe mit czweyen iren meyden
in die kamern vnd zû pette ging palde dem iungen rüffen tet Der sich
nicht saumet palde kam, Dem sy grosse ere vnd zucht peweiset, mit
35 schweren [309^b] seufcen in lieplich halset vnd küsset zû im sprach,
Ich enweyß nicht wer der hette gesein mügen der mich zû dem pracht
hette darzû du mich pracht hast, do mit einander peyder wille ver-
pracht ward nach dem wider in das pad gingen vnd in nyemant an-

rüren liesse sy selbes in mit edeler pisen salben vnd wolsmeckenden
seyffen reyß vnd wusch Nach dem sich ire meyd reyßen vnd waschen
thet, vnd daz gethon in czwey weysse leylache prachten die von ge-
smache rosen dauchten darein sich iglichs in eins wickelt, vnd iglichs
5 besunder von den czweyen meyden in das pett getragen warde, vnd do
in daz swiczen vergangen was die meid die nassen leylach von in na-
men peyde nackent in dem trucken beliben, Nach dem die meide auß
einem korbe ein silberen fleschlein nam darinne rosen wasser was 'do
sich peyde person besprengten vnd erfrischten darnach etlich schateln
10 mit confect vnd güten wein domit sy sich labten in sölcher masse die
schön fraw in zů bereyt er het dafür in dem paradyse nicht sein wöl-
len, Die frawen wol zů tausent malen ansache halset vnd küsset, in die
schönst frawe sein daucht [309^c] die ir mit augen nye gesache Auch
die on czweyfel schön was, vnd iglich stund in ein iare daucht daz die
15 meyd aus der kamern kemen damit er wider mit der frawen ze ringen
komen möchte vnd sich in iren arme besliessen. Ein sölches die frawe
an im wol vernam vnd die meyd aus der kamern schicket, vnd der iung
kauffman mit lust vnd freuden sich in ir schneweysse arm beschlosse,
vnd in nicht anders daucht dann wie die fraw vmb seinen willen zergen
20 wölt; also peyde ein grosse stund mit einander ir freude hetten, nach
dem als der frawen gefallen was den meyden ruffet peyde auff stun-
denn von nettem anhuben zů essen vnd trincken sich gar wol confect-
tirten, ir hende vnd angesicht mit den wolsmeckenden rosenwasser er-
frischten. Do nun die czwü person auf ein stunde ein gut gentügen
25 gethon hetten, Die frawe zů dem iungen sprach Mein außerweltes lieb
wenn es dein gefallen wäre so liebet mir das du auff dise nacht mit mir
essen vnd also pey mir slaffen kömest; der iung kaufman gancz in die
schönen frawen enczündet was die gifft der liebe empfangen het, vnd
für ware gelaubet die frawe inn [309^d] mit treuen meinet vnd in von
30 gütem herczen liebe het; ir antwort vnd sprach frawe was ench liebe
ist das sol ich gern tun, vnd das nicht allein auf dise nacht, sunder alle
nacht vnd stunde zů eüerm dienste bereyt pin; Nach disen worten die frawe
wider zů hauß ging vnd das hauß mit irem gesmeyde nach dem köstent-
lich zů bereytet besunder ir kamern vnd den sale die kamern mit schö-
35 nen kleydern vnd tebichen vmbhinge; dez selben gleichen den sale mit
lichem harnisch nach ritterlicher art zů bereytet, Nach dem ein köst-
lich nachtmale ordinirt, mitt dem sy dem iungen iren kaufmans wartet,
der sich zů der beschieden zeyt in der finstern nacht zů ir füget; Do

er von lieplich enpfangen ward vnd nach dem enpfangen nachtmale mit
einander in die kamern gingen die von köstlichem geschmacke von aloe
vcelletti cipriani alle berochen waz vnd do der iunge das reiche pette
vnd die köstlichen kleyder auf den stangen sache in sere fremde nam
5 vnd nitt anders im gedencken noch gelauben mocht dann daz sy wer
ein grosse edele frawe, wie wole er auch was anders von irem wesen
vernomen het, Doch [310^a] darumb von ir nicht arges gelauben mocht,
vnd ob er nun in meinung gewesen wer, daz sie etlichem über den
syn vnd betrogen het; doch in keinen weg gelauben mocht das im ein
10 sölches zů sten sölt vnd dieselben nacht mit grossen seinen freuden
vnd lust pey ir schlieff stätz mer in prinende liebe in sy enczündet,
vnd do sy nun des morgens peyde auff gestanden warn sie im zů einem
gůten morgen, ein silberene gürtel mit einem schönen seckel vmb sei-
nen leyb gürtet zů im sprach mein aller liebster iunckher ich befilhe
15 mich dir vnd mein person zů deinem willen alzeit bereyt ist, domit
alles das ich hab zů deinem dienst, Der iunge kauffman der frawen
rede vnd irer gabe ser wol ze mute waz sy frölich halset und küsset,
mit dem vrlaub nam von ir schied vnd ging do kauffleut ir wonung
betten, Also er zů vil manchen malen on alle sein kostunge von ir ab
20 vnd zů ginge, auch in sölcher zeit ires wesen vnd leben genug wol
vnterricht was; In dem sich begab das er seine tücher mit genug gutem
gewin verkauft vnd geendet het, Das die schöne frawe nicht von im;
sunder von andern vernomen het, vnd do [310^b] er eines nachtes pey
ir was sy mit im anhub zeschimpfen mit halsen vnd küssenn, sich mit
25 aller liebe gen im beweiset, nit anders dann wie sy vmb sölcher grosser
vmessiger liebe willen die sy im trüge sterben müsset, vnd wolt im
zů der stunde ye czwen silbernen köpffe schencken, der er in keinen
weg nemen wolte als der zů mermalen pey dreysig guldin wert von
ir gehabt het vnd dez seinen nye pfening wert von im nemen wolt Do
30 sy in nun gen ir in liebe genug enczündet het, mit einer irer meyde
ir ordnung geben het, dieselbig den iungen zů der frawen in die ka-
mern pracht nicht lange also pey ir waz sy anhub sich zů klagen wei-
nen vnd ser traurig zesein sich auff das pette warff mit sölcher kleg-
licher weyse vnd geperde als man von frawen ye mere gesache. Do
35 das der iunge vernam in ein fremde sach daucht, das die frawe also
güchling in sölchen vnmute gefallen was, sy in sein arme nam mit
samt ir anhub zeweinen zů ir sprach; Nun saget mir mein eller
liebste frawe meines herczenn troste vnd freude? was ist die vrsache

eüers grossenn vnmütes also gächling saget mir das, [310^c] des pit
ich euch Do sich nun die frawe güt zeit het pitten lassen zů im sprache
awe mir du mein allerliebste liebe vnd herre mein ich enweyß nicht
wie ich meinen dingen thön sol Ich hab in diser stunde von Missina
5 von meinem pruder brieffe gehabt, der mir zewissen thut mich pit-
gepeüt vnd schafft das ich im schicke sölt ich verkauffen vnd verseczen
alles das ich habe, inderhalbe acht tagen tausent ducatenn anders er
sterben müß vnd im sein haubt abgeslagen werd Darumb lasse dich
nit fremde düncken ob ich betrübet vnd vnmütig pin vnd weyß nitt
10 wes ich mich halten sol, söliche summe geltz in also kurczer zeit ze-
haben vnd im zů schicken; het ich doch ein wenig lenger frist so sölte
ich im wol zewegen pringen, dann ich sol ir vil mer hin vnd her mei-
nen schuldigern haben, Aber in sölicher kurczer zeit nit müglich ist
die zů haben noch ein zů pringen, auch mer wer mir die zeit nicht so
15 kurcz so hette ich vnser gelegen guter eins mügen verkauffen oder
verseczen Vnd darumb das ich siche daz ein söliches nicht gesein mag
ich vil lieber tod dann lebendig sein wölt söliche pöse märe zů habenn;
Also sich die schöne [310^d] schererin mit kleglichem weinen mit grosser
betrübung gen irem iungen kaufman peweiset, Der güt iunge man den
20 die flamme der liebe in sölicher masse prantte vnd geplent het das er
durch seine synne der frawen listickeyt nit erkennen mocht, fürwar
gelaubet als im die frawe gesaget het, Zů ir sprach fraw ich möcht
euch mit tausent guldin nit gehelffen noch gedienen, Aber mit fünff-
hundertenn palde vnd wol wo ich die inderhalbe fünfzehen tagen möcht
25 wider haben, vnd daz wirt eüer gelück sein das ich gester alle meine
tücher vmb bereyt gelt verkauffet anders ich euch nitt mit einem gro-
schen het gedienen mügen, Awe mir so hast du hie pey mir not geltes
halben geliden? warumb hast du mir das nicht gesaget, dann mit hun-
dert oder noch czweyhundert guldin het ich dir alweg wol dienen mü-
30 gen, Du hast kein getrauen zů mir wie sol ich nun deinen dienst auf-
nemen, seytmal du kein hoffnung zů mir hast, Der iunge vmb irer
sölicher freüntlicher wort willen gen ir in noch grösser liebe enczündet
vnd zů ir sprache frawe ich wille nicht vmb desselben willen mein klein
vermögen auß schlahet, Dann [311^a] wer mich note an gestossenn als
35 euch iczund tüt; Ich het euch ger wol künnen anruffen, Die frawe
sprach du mein außerweltes liebe, Ich hab dein freuntschaft die du
mir tregest gar wol erkante got lasse mich es vmb dich verdienen, das
du mir vnbegert mit sölicher summe geltes in meinen also grossen nö-

ten wilt gehilfflich sein, ich was vor alle dein, nun zů tausent male mer dann ye dein pin, vnd sein wil Nür ich meines pröder leben retten vnnnd in von dem tode erledigen müge Aber got weyß mein hercze ich entlehe nicht geren gelte von dir, Dann ich bedenck das du ein kauff-
 5 man pist, vnd kaufleut stätz geltz nottorfftig sein ir gescheffte auß zu richtenn, Aber ich von note iczund beczwungen pin vnd wes du dich iczund gen mir gewilliget hast das nicht außschliche Sunder hoffe in wenig tagen dir dein gelt wider schaffen vnd vmb das übrig mir anderswo hin zů besechen; wer dann sache das ich sölche deine fünff-
 10 hundert guldin peyden genanten vierczehen tagen nicht gehalten möcht dir wider ze geben so hab ich sovil schöner kleynett die alle stunde vmb sölche summe gel[311^b]tes verseczen mage, Also geret wider anhub kleglich zů weinen vnd sich dem iungen in seinen gern neyget, der gůt geplent iunge die frawen tröstet vnd also dieselben nacht pey
 15 ir schlaffen beleybe, domit er sich ir mit leib vnd gůt gancz ir diener peweysen möcht vnd des morgens früe so er peldest mochte ir die fünffhundert guldin pracht, die sie mit lachedem herczen vnd weynenden augen von im enpfinge, Do nun die schön frawe von dem gůten eynfeltigen iungen das gelt enpfangen vnd gehabt hette nicht lange verginge die sach sich allenthalben verkeren ward, dann wo vor dem iungen alle weg vnd stunde zů ir ze komen offen waren frey was nach
 20 allem seynen willen mit ir ze thon sein gefallen, Nun sich teglich vrsache begeben würden das er nicht wol in syben malen die er sy suchen kam ein male zů ir komen mocht, noch im mer von ir lieplich
 25 angesicht beweist ward, als sy im dann vormals gethon het, vnd nun wol nicht allein die virczehen tagen vergangen waren, sunder mer dann zů dreyen malen virczehen, das er seines geltes nit gehabt het, vnd wenn er des an sy begert sie in mit [311^c] Worten bezalet vnd von ir weyset; Doch nach langem peyten des pösen weybs falsche list ver-
 30 nomen vnd mercken vnd sein wenig synne was er gethon het bedencken ward sich des geltes gancz verwage dann weder geschrift noch geczeugen hette das er der frawen icht gelichen het, Noch vil mere vnd arger er muste sich schamen das zů klagen, do von nyemant sagen dorste dann er was etlichs vor hin gewarnet worden; Darumb ge-
 35 spöttes besorgt als im dann von recht sölt zů gestandenn sein vnd er warten was; darumb sölches seines handels on masse traurig vnd übel zemute waz, mit im selbes sein grosse eynfeltickeit begonde zů weinen, dann nun vil manche prieff von heymet gehabt hette das er das gelte

durch wechsel zů hauß schicket; darumb besorget wo er das nit palde
tet sein meister sich arges gen im verdencken würden vnd in seine
verporgne schande ze wissen kem vmb des willen im für nam von dann
zefarn vnd auf ein schiff sasse nicht heim gen Pisa do er hinfarn sölt
5 sunder gen Napels fure. Nun was zů der zeit zů Napels Pietro Chani-
giano der keyserin von Constantinopel [311^d] schaczmeister Ein wir-
diger man von hohen synnen vnd weystum gar subtiler natur ein be-
sunder groß freünt des egenanten iungen kaufman Dem der gůte iung
sein leyt klaget vnd was im in Cicilia von dem falschen weyb zů ge-
10 standen was, daz im alles saget vnd zewissen thet; An in vmb gotz
willen rate vnd hilf begeret, domit er zů Napolis on sorge sein wesen
fůren mőchhe, dann sein meinung was nit mere weder gen Pisa noch
gen Florenz ze komen. Dem erbern weysen man des iungen schade
leyt was zů im sprach werlich du hast grőßlich ũbel gethon, dich vnd
15 deine meister zů schande vnd schaden pracht vnd gar zů vil geltes in
stůsem holze auß geben aber es ist geschehen vnd mag nicht wesen
das es nicht geschehen sey; man sol sechen vnd gedencken wie man
sőlches schadens mőcht wider ein komen, vnd als ein fürsichtiger man
gar palde gesechen hette was ze thon was, Zů dem iungen sprach riete
20 vnd saget was er thon sőlte, dem iungen sőlcher rat wol gefiele sich
dem gelůcke befalhe des weysenn mannes rat volget, dann im noch
ein klein gelt beliben waz zů dem im der erber sein rate[312^a]geber
auch mit etlichem gůlden zů hilffe kam zů hant vil pallen zů bereyten
tet vnd pey czweinczig fessern kauffet dar inne őle gewesen was, die
25 er alle mit wasser anfüllet vnd die mit sampt den pallen auf ein schiffe
lude vnd wider gen Palerma fur, den czőlnern alle ding peschriben
gabe wes sie wert sein mőchten vnd was alle ding kosten, nach dem
alles in ein gewelbe leget zů versten gabe er wolt nit verkauffen also
lang piß das im ander gůt keme das er da hinder gelassen het. Nun
30 sein schöne frawe palde vernomen het das er wider komen waz, vnd
mer dann vor gutz pracht het, vnd noch mere dann tausent gulden
wert warten waz, daz im in kůrcze komen sőlte, vnd do das die frawe
sache vnd vernam die fůnffhundert gulden die sie von im gehabt het,
ein klein dinge vnd nicht sein dauchte, ir fůrname sich wőlln ver-
35 suchen ob ir die grősser sume werden mőchte dann die erste gewesen
was, palde den iungen beschicket, aber er listiger vnd gescheider
mer dann sy wordenn was, palde zů ir kam, vnd sy keines gelei-
chen tet als ob ir icht wissent wer was er pracht hette, im grosse

freude vnd feste machet sere [312^b] freüntlich enpfinge zû im sprache
Nicolo also genant mein allerliebstes lieb, du warest sere gen mir in
deinem abscheiden in czorn gefallen das ich dir dein fünffhundert guldin
nicht wider gabe zû der zeyte als ich dir versprochen het werlich nit on
5 grosse vrsache waz Des er anhub ze lachen vnd zû ir sprach, für war frawe
es thet mir ein klein ant von euch, Als der der im sein hercz auß seinem
leybe genomen het daz euch ze geben wo es eüer gefallen gewesen wer ir
stilt auch wissen wie ich gen euch in czorn gefallenn pin; Es ist die liebe
die ich zû euch habe also grosse daz ich den merern teyle meiner ge-
10 legenn güter verkaufft hab, vnd pey czwei tausent guldin wert iczunde
mit mir her pracht hab vnd noch so vil inerhalbe virczehen tagen warten
pin das alles pey virtausent guldin pringen wirt vnd pin in der meinung
hie hauß vnd hoff auf zenemen leiplich, hie pey euch wonen damit ich
euch nächer sey vnd euch nach meinem willen sechen vnd haben müge,
15 dann eüer hulde vnd liebe ze haben ich mich seliger düncke dan man
auf erden; Dem die frawe antwort vnd sprach Nicolo du liebes lieb
mein, waz dir [312^c] liebet ze thon ist mein güt gefallen, dann du mir
liebest als mein leben vnd hoffe mit dir grosse freude vnd lust zehaben
vnd will mich gen dir entreden vnd entschuldigen was die vrsach gewe-
20 sen sein e du am nechsten vor hier schiedest das du nicht alzeyt nach
deinem willen zû mir komen möchtest als du dann lange zeit gethon het-
test, Auch villeicht nach deinem gedüncken nicht so willig gesechen
warest als du gewölt hetttest vnd was ich dir versprach deines geltes
halben ich dir nit hielt Die vrsach eins sölchen waz daz ich zû der zeit
25 als dir wol wissent ist in grossem leyt vnd vnmut was, Dann wer möchte
ymmer frölich oder wol zernute sein dem zû stünde als mir zû der zeit
zûgestanden was meines pruders halben pey dir selbes wol bedencken
macht, was müe es einer betrübten frawen sein mag tausent guldin ze
wegen zû pringen den man stäcz lügen vnd nicht die warheit saget vnd
30 irer wort vnd rede kein acht hat als man der manne thut man helt in
was man wille Darumb wir auch nicht halten mügen waz wir verspre-
ch[312^d]en vnd zû zeiten wider vnsern willen ligen müsen Also ge-
schahe mir do ich dir deines geltes nach dem ich dir versprochen het
nicht wider geben möcht, doch ward es mir zû hant nach dem do du
35 weg gefaren warest vnnd sölt ich gewist haben wohin gelaub mir fürwar
ich het dir es nach gesant. darvmb hab ich sy behalten piß auff dein
widerkomen, vnd palde ir schüffe pringen einen seyden seckell darine
dieselben fünffhundert guldin waren die er ir gelichen het im die in sein

hant gabe zû im sprach; Nun ze le sy vnd besihe ob ir fünffhundert sein
 Der iunge kaufman alles seines vergangen vnglück vergasse, frölicher
 ward dann er alle seine tag ye gewesen waz das gelt palde zelet, doch
 daz der frawen zû liebe dann er nit weiter gefragt er het es gern vnge-
 5 zelte genomen, dan in wol daucht wie es dieselbig summe sein sölte, als
 er dann an dem zelen fande vnd wol erkant das es dieselben guldin
 waren die er ir geben het Zû ir sprach frawe ich erkenn wol das ir mir
 stäcz die warheit gesagt hab; Darvmb ge[313^a]laubet mir in der war-
 heit vmb desselben vnd der liebe willen die ich zû euch habe, Das die
 10 summe nit so grosse gesein möchte die ich vermöchte, das ich der euch
 in euern nöten nit zewillen würde, vnd wenn ich mich eingesezt vnd zû
 hause geschicket hab so müget ir mich von neuem versüchen mit disen
 Worten nach der frawen meinung doch nicht nach der seinen ir liebe
 sich von neuem bestat vnd sy beschlossen sein daucht, Also der gut
 15 iunge man hinder seinen listen von ir abe vnd zû ginge, vnd sy in
 grösser ere vnd zucht mer dann ye beweyset. Aber er als der mit sei-
 nen gescheyden listen der frawen pöse falscheit meinte ze püssen, vnd
 sie in desselben tages zû dem nachtmale vnd pey ze schlaffen geladen
 het, des er ze komen ganz willig was, vnd nun zeit daucht des er ze-
 20 thon willen het, vnd desselben abencz ganz traurig vnd betrübet zû ir
 kam in massen als ob er vnmutes halben sterben wölt des die frawe in
 tröstet halbet vnd küsset getreulich fraget was sein gepreden were, Des
 er sich lange zeit piten [313^b] liesse, doch zulecz ir antwort vnd sprach
 Frawe ich pin verdorben dann der kaufmanschacz der ich wartet die ist
 25 mir von den corsale genomen worden vnd die wider ze haben trifft mich
 an zû bezalen vund die wider zelösen tausent guldin in golde, vnd hab
 iczund nit einen pfening, dann die fünfhundert guldin die ir mir gabet
 ich auf dieselben stunde gen Napels schicket leinwat zekauffen vnd her
 zû pringen das ist mein vnmüte den ich habe, dann sol ich mein güt
 30 iczund verkauffenn tausent guldin ze machen, so muß ich das hin werf-
 fen vnd vmb ein spot geben, dann es wider alle zeit, vnd hab darumb
 nit den halben teyle des er wert ist, als wenn sein zeit komet; so pin
 ich hie nicht erkant das ich yemannt fünde der mir mit sölcher summe
 gelcz gehilflich were, vnd ich des meinen nicht bedörffte hin zewerffen
 35 darumb nicht enweyße wes ich mich halten noch meinen dingenn thon
 sol, damit ich nicht so größlich zû schadenn kam, vnd wo ich sölche
 summe geltes nicht pald schicke so besorge ich mir werde daz selbige
 gute alles verlorenn [313^c] Die frawe alle czorniclichen als die da

daucht wie ir das gůte vnd nicht im verlorn were pald syn fandē vnd erdacht het, damit es nicht verloren wůrde zů im sprache; Nun weiß got wol das mir vmb dich von herzen leytt ist; Aber was ist dir damit geholffen das du dich des also sere betrůbest, oder got helfe mir nit het
 5 ich es ich sůlt dir getreůlichen dienen, als du dann mir in meinen nůten testest. Es ist wol ware do ich der fůnfhhundert gulden zů den die du mir lechest nottorfftig was, dieselben mir ein gut person leche aber das mit grosser kostung, vnd wolt nit minder dann czweinczig von hundert haben wo du dann sůlich gelt von der person nemen wůltest so můst du
 10 gůt pfant vnd půrgschafft gebenn so pin ich bereyt alles mein gewante vnd kleynet dir zů liebe derselben person fůr dich einseczen, damit du der summe der du nottůrfftig pist gedienet seyest, Aber wie magstu der purgschafft ein genůgen thon; der iung kaufman palde der frawen meinung vnd waz vrsache sy darzů zoche damit er gedienet wůrde erkante,
 15 im wol gedacht die gancz summe des geltē auß ir komen wůrde [313^d] sein gůt gefallen was, nicht allein zweinczig von hundert sunder vierundzweinczig zů geben; nůr er palde gedienet wůrde, kein gelte noch kostung nit ansechen wůlt, seytmale er von note bezungen were, Zů der frawen sprache; wie er alle sein kaufmanschacz die in dem zolhaů
 20 vnd seinem gewelbe lege der persone die im das gelt liech wůlt zů pfant geben vnd im zůschreiben Doch selbes den schlůssell zů sůlichem seinen gůte behalten wůlte, damit er das weysen můcht wer des zů sechen begeret, vnd im nicht verrůret oder verwechselt wůrde, die frawe sprach er redet wol vnd wer wol ein gůt genůgen mit dem sich zů pette schick-
 25 ten vnd do der morgen komen was die frawe einen vnterkeuffel beschicket zů dem sy besunder getrauen het im ir sache fůrleget, vnd im tausent guldin in sein hende gabe vnd zů Nicolo irem iungen kauffman in daz zolhaů schicket der die tausent guldin von dem vnterkeuffel enpfing vnd im alle sein kaufmanschacz zů schreybenn aller sach mit ein-
 30 ander eins worden nach dem yeder partey ging wo er zů schaffen hette, Der iung kaufman sich nitt hindern ließ so er peldest můcht [314^a] auf ein schifflein saß gen Napels wercz fure nach dem wider heym gen Florenz kame, Doch zů Napels seinen herren Canigiano begrůsset seines gůten rates freuntlich dancket, im ein genůgen thet des daz er im ge-
 35 lichen het, nachdem seinen meistern zů Florenz ein volkomne rechnung thet alles des das er mit in zů schaffen het. Nun nach etlichem vergangen tage frawe Bianchafiore etwas fremde nam das sy ires iungen kaufmans so lange nit gesechen het, ein klein czweyfeldn warde, vnd nu

wol pey czweyen moneden vergangen warn sy die gewelb darinne sein
 güt lage aufprechen liesse, vnd die fesser die sy meynet alle voller öle
 wern, sy alle vol mit wasser fande, wol in etlichem fasse oben pey einen
 halben eymer öle was, nach dem die pallen auf pundenn In allen auß
 5 genomen czwen darinn tücher waren eytel wecke funden, kurz abe ge-
 redt alles das die schöne pulerin fande pey czweihundert guldin wert
 sein mocht, vnd do sy sich also betrogen fand lange zeit mit weinen vnd
 klagen ire tage vertreib nicht alleine die fünffhundert gulden die sie
 wider geben het, sunder die tausent die sie im gelichen het [314^b] Ir
 10 besunder pein leyt vnd smerczten prachten, Darnach zů vil manchen malen
 sprach wer den andern betruget vnd widerdrisse peweyset der sol eins
 sölchen wider stäcz wartenn sein, Also ir zů dem schaden die schande
 hette, vnd fande das ein ander als vil list het als sie.

Nun hat der edel iunge Dioneo sein histori zů ende pracht, vnd
 15 frawe Laureta mit sampt der wirdigen gesellschaft das ende ires regi-
 ment vernomen het den weysen rate herren Peter Canigiano sere lob-
 ten, Der dem iungen kaufman wider daz falsch weybe also treulich ge-
 ratenn vnd geholfen het, nach dem die künigin auf stunde das krenzclein
 ab irem haubt nam das frawen Emilia aufseczet freülich zů ir sprach?
 20 fraw ich weiß nit was züchtiger künigin wir an euch haben wern wol
 schöne wir euch on czweyfell sprechen mögen. Darumb secht vnd thut
 damitt eütere wercke etler schöne gleichen mit dem sich wider nyder
 seczet frawe Emilia nit allein daz sy irer schöne also öffentlich gelobet
 waz des sich etlich frauen e schamen dan nit also sy [314^c] auch des ein
 25 kleine schame vnd röte in irem angesichte enpfiege, in masse den roten
 rosenn geleiche wenn sy des morgens enspriessen; vnd schame halben ir
 angesicht vnter sich slug, ein klein also gestanden nach dem sich auf-
 richtt vnd mit irem marschalck zů leben die weyle ir herscheffte weret
 ir ordnung gabe, Darnach anhube vnd sprach, Ir züchtigen edelen frawen
 30 wir öffentlich sechen wenn die ochßlein ein teyle des tages sich vnder
 dem goch gemtiet vnd gearbet haben darnach von dem genommen vnnd
 frey an die weyd gelassen sein zegen wo in hin liebet in die grünen
 welde ir narung zesuchen also ich vns sprechen mag vnd nit minder
 sunder mere vns zethon ist in die schönen lustigen garten die mit also
 35 mancherley plümlein vmbgebenn sein zů gen, Do vnser freüde mer dann
 in den welden vnder den eychen vnd tannen zesuchen, angesehen daz
 wir vnder also hertem gesece etlich tag vertriben haben darvmb wir
 wol ruens nottorftig sein, Nach dem piß morgen wir vnser angefangen

materi nachvolgen mügen, vnd mein syn ist in keinen wege euch icht
vnter keinem gesezze noch ge[314^d]pote sagen lassen, noch vonn keiner-
ley materi besunder zů sagen dann alleine was eüer iglichem zesagen
liebet, mir czweyfelt nicht von mancherley materi ze sagen wir nicht
5 minder freude dovon habenn süllen als wir von den gesagten gehabt
haben, wer dann nach mir in die herschaft drit der mag seczen vnd ge-
pieten was im liebet vnd sein gefallen ist; Also nach diser rede auff
stund der gesellschaft spacziren ze gen das vrlaub gab Der künigin mei-
nung vnd rat das sagen halben yedermans gefallen waz; alle geleich auf
10 stunden in den schönen gartten spacziren krenczlein ze machen piß auff
das nachtmale gingen, nach dem pey dem külen fließeden prünlein ir
essen enpfingen vnd frölihen anhuben zů singen, darnach die künigin
ze ruen vnd schlaffen ze gen gepote.

Hie hat die acht tagreyß ein ende

VND HEBT SICH AN DIE NEÜNT

vnder dem gewalte vnd regiment der frawen Emilia do die wirdig gesellschaft sagen wirt iglich person besunder was im liebet vnd sein gefallen ist.

5 [315^a] Das liechte, dez klarer schein die finsternen nacht fliechenn thut, den achten hymel in hymelploe nu bekeret het, vnd nun die schönen plümlein in dem grünen anger enprossen waren, vnd die neue künigen von irem slaffe erstanden was, Ir gesellschaft auch aufgewecket het, die ir mit senften driten in den grünen walde der nicht ferre von danne
10 was nachuolgten, do sy die wilden tiere hin vnd her lauffen vnd springen sachen die sich mer heymlichen oder zame dann wilde peweysten des sy besunder freude hetten Vnd do nun die sonne in die höche gestigen was vnd der künigin liebet, sich wider zû haußwercz füget; vnd die züchtigen frawen mit krenzlein machen vnd püschelein plümlein in iren henden ir
15 fuß für fusse nachuolgten, In masse wer in begegnet hette, nicht hette sprechen mügen, Dann die gesellschaft von dem tod nicht hette mügen überwunden sein, oder er würde sy alle frölich sterben machen, also alle frölich iagent die wilden tiere mit singen schimpfenn vnd scherzen zû hauß kamen Do sy alle ordnung daz mal zû essen bereyt funden zetsch [315^b] gingen do in die köstlichenn richt vnd edel speyß für ge-
20 tragen worden, vnd do sy gessen hetten frölich anhuben zû danczen vnd singen mit dem auch etliche stunde vertriben nach dem alle ruen gingen, vnnd do ir gewöhnliche zeit komenn was sich in den schönen garten zû dem frischen prünlein fügten, Do die neue künigin ir erstes gepote frawe
25 Philomena thet wie sy anhebenn sollte vnd auff disen tage den andern zesagen vrsach gebe Die da lachent anhübe vnd sprach.

Wie ein erbere frawe von czweyen iungen manne, der ein genant Rinuczo der ander Alexander liebe gehalten vnd gepuelet was, der sy keinen lieb hette, vnd damit sy ir peyder mit güter vrsache
30 ledig würde, den einen für tode in eines toten grabe legen schuffe von denselben ir den andern auß dem toten graben nemen vnd für

einen toten leichnam pringen schuffe; Also ir peyder ledig warde dann nicht verprachten nach dem sy an pede begert hette Als ir lesent hernach vernemen wert.

[315^c] Edele frawe vnd künigin es ist mir sere liebe seytmal es
 5 etter gefallen ist, in disem freyenn offen felde, do vns etter wirdickeit
 hin pracht hat nette histori zû sagen Des ich die erste sein sol vmb den
 ringe ze lauffen, thûe ich dann wol vnd etter gefallen, so czweyfelt mir
 nicht die mir nachuolgen weren mit iren sagen mer vnd paß dann ich
 tun wern; Darumb mein lieben frawen ir habet vil dicke gehört vnd in
 10 vnserm vergangen sagen vernomen wie grosse vnd mechtig die stercke
 der liebe ist, doch darumb nitt gelauben mag nach meinem gedüncken
 das von ir in vnsern gesagten histori oder fabeln ein genügen sey ge-
 sagt worden; Noch mer gelaube wenn man von ir ein ganzes iare
 sagt, wir alle nicht vermöchten ir mechtickeit durch gründen; Dann nit
 15 alleine etliche liebhaber in den tod pracht hat, sunder die für tod in der
 toten greber hat machen ein gen; darumb mir liebet vnd ist mein syn
 über die history, die von vns sein gesagt worden euch eine von neuem
 zû sagen do ir nicht allein e der liebe stercke, sunder auch einer erbern
 frawen synne vnd weyß[315^d]heit vernemen wert wie die selbig erber
 20 fraw ab ir czwen iunge man nam; Die sie peyde mit gewalt vnd wider
 iren willen lieb hetten in der stat Pistoia was ein auß dermassen schöne
 frawe vnd wittib dieselben czwen gesellen peyde Florenczer vnd puelten;
 der ein was genant Rinuczo der ander Alexander keiner des andern
 willen gemercket hette Nun die erber frawe die mitt namen fraw Fran-
 25 sceho genant was, von den czweien pulern teglich durch potschafft vnd
 piten sere sollicitirt was, Ir kein rue liessen vnd villeicht zû etlicher fart
 nich sere weyßlich ir oren sölcher potschafft verlichen het, des sy ir ge-
 wissen straffen warde, vmb des willen ir für nam sich hin für eins sol-
 chen überheben, vnd sich sölchen vnerlichen sache entschlahen vnd ir
 30 dise stäte derrung ab dem halß nemen Ir gedacht da mit sy ir vnd irer
 potschafft ledig werden möchte iglichen besunder vmb einen dienst piten
 wölt ir wol gedacht ir keiner des sy begeren wölt tun sölte, wie woll
 das ze thon mütlichen was wo dann ir keiner das thete sy gûte vrsach
 hett im vnd seiner potschafft vrlaub zegeben des sy nun begern wolt daz
 35 [316^a] was das. Es was einer auf disen tage auch in der stat Tode, vnd
 wie wol sein geslecht edel vnd gûte leüt gehalten waren, so was er doch
 nichtt alleine von der stat Pistoia sunder in aller welte für einen pösen

man gehalten, über das der vngeschaffenst man der ye warde, sein groß
 vngestalte manchen der in gächling ansichtig warde erschreckt Er nach
 seinem tode zů den parfusen auff den kirchhoffe in ein gemauert grabe
 geleet, Des leben tode vnd wesenn die erber frawe gar wol besunnen
 5 het, vnnd on czweyffel meinet das er der sein solt der ir ein teyle irer
 fürsaczung der czweyer puler halben sölt gehilfflich sein, Das bedacht
 einem iren knecht zů ir rüffet, zů dem sy sprach knecht als ir wol wis-
 sent ist, Die müe vnnd vnruue die mir von den czweyen iungen Floren-
 czern vnd iren potschafft stälcz getun ist; Nun pin ich in keinem wege
 10 geschicket in mit meiner liebe zů willen weren, vnd mir sy pald ab dem
 halse zenemen ich mir für genomen hab sie peyde versůchen vnd an sy
 begern des ich gewiß pin sy nit thun wern; Also ich ir vnzucht abe kam
 vnd mich hinfür mit fride lassen; Nun vernim [316^b] was mein syn ze-
 thon ist, Du weyst wol daz an disem morgen zů den parfüßen pegraben
 15 warde der pöse man Schanadio den nicht allein also töten sunder leben-
 dig ein iglich beherczent man der in gächling ansichtig warde erschre-
 cken muste, Darumb gee mir von ersten zů Allexander vnd sage im von
 meinen wegen, vnd spriche; mein fraw enpeüt dir vnd spricht iczund
 komen sey die zeit ir liebe vnd hulde zů haben der du so lange zeit be-
 20 gert hast, doch das in sölichem form wo es dein gefallen ist, Du solt wis-
 sen das ir auff-dise nacht vnd das vmb grosser vrsache willen von einem
 iren fretünde sol zů hause prachtt wern der tot cörper Stanadio der auff
 disen morgen zů den parfusen pegraben ward den sie forchte halben in
 keinnenn wege also toten zů hauß haben noch sechen wölte, Vmb dez wil-
 25 len an grossen dienstes stat sy dich piten thut dir liebe ir zů dienst
 heint in dem ersten schlaffe der nacht zů gen vnd dich zů dem toten
 Stanadio in das grab ze fügen, vnd sein toten kleyde anzelegen vnd dich
 halten in masse als du Stanadio werest, vnnd do also lange ligen vnd
 warten piß man nach dir nun komet [316^c] Darnach vngeret dich lasse
 30 darauß nemen vnd zů ir heyme pringen, do sy dich lieplich enfahen
 wirt, vnnd also die ganczen nacht mit ir dein freüde haben macht, Nach
 dem wenn dein wille ist du wider von ir gen macht vnd sy ir dinge
 schaffen lassen, mer sprach die frawe zů dem knecht; Düncket dich
 dann daz er des willig sey ze thon wol vnd güte! spricht er aber neyn
 35 vnd will des nicht enthon so sage im von meinen wegen daz er in keinen
 weg mir mer potschafft schicke noch mer kome do ich sey als liebe er
 sein leben habe Darnach gee zů Rinuczo vnd sage im Rinuczo mein
 frawe schickt mich zů dir spricht vnd enpeüt dir sy sey bereit zetun

dein gefallen, doch daz wo du ir vor einen grossen dienst tun wilt, vnd
des sy an dich begeren ist, das ist daz du heynt zů mitternacht ir den
toten cörper Stanadio pringest der an dem vergangen morgen zů den
parfusen pegraben ward, den ir in in stille vngeret also wie du in fin-
5 dest heyne zů hause tragest wo du das thuste sy zů allem deinen willen,
will alzeit bereyt sein, vnd wo dir das zethon nit in wille were so enpeut
sie dir als liebe dir dein leben sey ninner zekomen [316^d] do sie ist,
noch deiner potenn keinen mer verhören wille da wisse dich nach ze
richten, also der gůte knecht zů in peyden ginge iglicher besunder der
10 frawen meinung ze wissen thet, Dem iglicher antwort vund sprach er nit
alleine ir zů liebe in ein toten grab sunder in die helle bereyt wer ze
gen, Nůr er ir gefallen thon möcht; der knecht der frawen peyder gůten
willen vnd antwort prachte des die fraw wol zemute was wol gedacht ir
vor bedachte meinung sich zů irem willen gleichen würde vnd sechen
15 wolte ob die czwen so nārrisch wern ze thon das sie begert het. Do nun
die finster nacht vnd die stunde des ersten schlaffs komen was, Alexan-
der sich in die iopen abe zoche zů seinem hauß auß ging sich an dez
toten grab an Stanadio stat zů legen, in sölchem gen im forcht vnd er-
schrecken zů sten wurden zů im selbes sprach; Ey was grossen eynfel-
20 tigen tieres ich pin! nun wo gee ich nůr hin wer weyß ob meiner lieben
frawen freunde meiner lieb zů ir war genommen haben, vnd villeicht ge-
lauben vnd meinen daz niht enist; vnd mich also villeicht durch der
frawen ordnung in dem toten grab meinen zů tōten, [317^a] wo sich dann
ein sölches begebe ich mir den schaden hette vnd keinem menschen der
25 welte mein tode wissent würde oder was weyße ich ob mir das etwen
meiner feynde einer zůgericht hat, der villeicht die frawen auch lieb hat
vnd ein sölches ir zů dienste thut, Doch secze wir das diser dinge keines
sey, Nun was möchten der frawen freund nůr mit Stanadio toten cörper
tun wōllen, fürwar in nit in iren armen ze halten meinen, Es hat ye
30 kein gestalt oder sy müssen was üfels mit im begen wōllen, oder er vil-
leicht ir etlichem in seinem leben widerdrisse gethon hat der sich pey
leben an im nicht hat rechen mügen, nun sich tote rechen meinte; Mer
enpeut mir die frawe was ich höre oder verneme das ich stille sey weder
rede noch antwort gebe, vnd ob ich geplent wůrd als man gern den
35 toten tut oder mir die czen außsprechen oder die hende abe hauen oder
mir waz anders vnglückes zů richten wie bestünde ich wie möcht ich ein
sölches vertragen, vnd stille sweygen, es wůrd mir sicher herte ligen zů
sweygen begebe sich dann das ich icht spreche so würde ich vonn in er-

kaute, so möchten sy mich [317^b] aber töten, geschehe dann daz nitt so
 habe ich aber icht auß gericht; Dann pey der frawen sy mich aber nit
 allein lassen, So möchte dann die frawen sprechen ich hette ir gepot ge-
 prochen vnd gehalten, vmd würde meinen willen nicht then Der güt
 iunge in seinen gedancken sere betrübet was nicht west was er thon
 10 sölte vnd sich wider zů hauß fügen meinete, Doch nach langem be-
 gencken die groß überflüssig liebe die er zů der frawen hette in czwange
 für sich vnd hinder sich ze gen zů dem totenn grabe kam daz auf thet
 darein steyge dem toten sein toten kleyde abe zoche vnd das anleget
 15 vnd das grabe ob im wider zů thet den toten leichnam an ein ort rücket
 vnd sich an sein stat leget Nach dem im grausame gedanke einfielen
 Stanadio halben, wie der sein tage also ein pöse man gewesen was, vnd
 was sich der toten vnd totengreber des nachtes zů manchenmalen begeben
 hat, nach dem er vil dicke vernomen het, vmb des willen in grossen
 20 angsten was, in sölcher masse das im alle seine hare geperge stunden,
 in stäcz daucht wie Stanadio auf stünde vnd in würgen wölt Aber von
 der vnmessigen liebe [317^c] getröst vnd beezwungen die herten vnd
 forchtsamen gedanke zů überwinden, vnd ligen beleybe als ob er der
 tote wer wartet was sich seinthalben ergen wölt, In dem es sich gen der
 25 mitternacht nechnete Der ander genant Rinuczo zů hauß auß ging seiner
 lieben frawen gepote ze verpringen, dem auch gar mancherley gedanke
 in seinem geen züstunden besunder der müglichen dinge die sich alzeit
 begeben mochten; Als wie er mit dem toten körper den stat knechten
 möchte in die hend komen, vnd als ein pöse man in das feier möcht
 30 geurteilt werden, oder wo daz seinen freunden ze wissen kem, das er
 Stanadio auß dem grab genomen het; in vngelück darvmb anlegen
 möchten. In söllichen gedancken nit west waz er thon oder lassen sölt,
 doch als der vorig Alexander getun het er auch thet wider keret vnd
 sprach. Nun wie möcht ich meiner lieben frawen erstes begern vnd ge-
 35 pote neyn sprechen, die ich ob allen frawen lieb habe; ir liebe vnd
 hulde zehaben, vnd sölte ich hertes todes sterben so müß es sein vnd
 für sich ginge; zů dem toten grabe kam daz gerincklich auff tet dar ein
 sache vnd [317^d] do Alexander der in des toten forme lage das grab auff-
 tun vernam stille lage gedultig leyde was Rinuczo mit im beginge, der
 35 palde in das grab steyge vnd den toten Stanadio nemen meinete; Alexan-
 der pey den füßen nam auß dem grabe zoch auf sein achseln nam gegen
 der erbern frawen hauß wercz ginge. In sölchem seinen gen nit wol
 gesechen mocht dann die nacht finster waz vmb des willen in hin vnd

her wider die mauern vnd ecke stiesse die an dem weg waren, dann die nacht so finster was das er ein sticke nitt gesache. Do nu der güt Rinuczo mit seinem toten für der frawen hauß komen was; die obenn an dem fenster lage ze sechen wie einer den andern precht vnd sich
5 pedacht vnd gewapent hett peyde fürpaß zeschiken, In dem sich begabe zû irem gelücke das sich die statknechte in derselben gassenn an die hute gelegt hetten; einen übelteter ze fachenn, In dem sie Rinuczo gen hörten, palde ein verporgen liechte her für zugen zû sechen wer do ginge Ire spiesse lanczen vnd tarschen zû den henden namen vnd fragten wer
10 do were! Die Rinuczo palde erkant im nicht zeit nam zû antworten, Den [318^a] gütten Alexander als ein mülsacke von im warff, vnd er waz sein füsse vnd pein ertragenn mochten floche, Desselbenn gleichen Alexander thet, wie wol er in dem langen toten kleyde was doch wie er mochte auch dar von lieffe. Die fraw von dem liecht daz die statknecht
15 herfür gezogen hetten Rinuczo mit Alexander auf dem rücke gar wol gesehen, vnd peyde erkant hette, sich nicht verwundern mocht ir peyder grosses hercz vnd nicht gelassen mocht do sy Alexander so vntugentlich zû der erdeenn werffen vnd peyde starck fichen sache lachen muste, vnd sölcher sache sere frölich vnd wol zemute was got danckt
20 vnd lobet das sich die sach also ergangen hette, Ab dem fenster in ir kamern ging zû ir selbes sprach, On czweyfell dise czwen iunge man mir grosse lieb getragen haben, Rinuczo übel zemüte seinem vngelück fluchet, vnd do die stathüter auß der gassen kamen er wider kam seinen totenn in der finster ze suchen der frauen gepot ze verpringen, vnd do
25 er in nit fande im gedacht die statknecht den wege getragen hetten, aller czornig vnd übel zemüte wider heym zû hause ginge, vnd des morgens [318^b] das toten grabe offen funden warde den Stanadio nyemant sache den Alexander in den winckel gestossen het, Darumb yederman sprach er wer nitt in dem grabe vnd die teüffell auß der helle in wege
30 getragen hetten vnd die czwen liebhaber iglicher der frawen zewissen thet waz im zû gestanden was vnd er gethon het, vnd das sy ir pote nicht volkomelich verpracht hetten, waz die vrsache gewesen was, Des iglicher besunder sich gen der frawen entredet ir genad, vnd hulde von neuem begeret, die frawe sich gen in peweysett, in masse als ob sy ir keinem
35 was er gethon het gelaubet, Also mit kurczer antwort in das vrlaub gab, an ir keinen nicht mer begern wölte, dann des sy von erste begeret hette ir keiner sy gewert hette, also die erber frawe mit güttem gelimpffe irer püler ledig warde hinfür in grosser zucht vnd eren mit fride vnd rûe lebet.

Wie ein ebtessin eines nachtes in grossem czorn vnd mitt grosser eyle auf stet ir nunnen eine zû besechen die gen ir verklaget waz vnd einen man pey ir slaffen het, vnd sy in irem aufsten den weyl auf ir haubte meinte nemen an desselben [318^c] stat eines
 5 pflaffen prûche der pey ir lage begreyffe, vnd auf das haubt tet, das die dasig die gen ir verklaget was ersache vnd des war nam den andern nunnen weyset, vmb des willen von der ebtessin freye gelassen warde vnd hinfür pey irem puelen nach irem willen sein mochte.

10 Do frawe Philomena ires reden geswigen was vnd die erber frawe irer synne vnd weystum, die ab ir zenemen die sie wider iren willen liebe haben wolten, Der lieb ir nicht zû herczen ging, von der wirdigen gesellschaft gelobet was vnd die czwen liebhaber ir grossen nicht liebe, Sunder torheit gescholtenn waren; In dem sich die künigin von Elisa
 15 keret zû ir sprach Frawe Elisa volget nach den gesagten historien saget vns waz neües! Die pald anhûbe vnd sprach; Lieben frawenn Nu wie so abentetüerlich als oben gesagt ist kunde frawe Francescha sich der czweyer ledig machen vnd mit ern entslagen, vnd als euch wol wißent ist wie der vnweysen person vil sein die da ander leüt meistern wöllen
 20 vnd sich selbes weder regirn meistern noch straffen können; nach dem ir [318^d] in meiner histori vernemen wert; Es begibt sich dick daz die, die sich am weysten düncken sich tórheiter dann ander leüt finden, als dann einer wirdigenn ebtessin zû stünde die sich weyser dann Sibilla sein daucht Die vnter irem gewalt ein schönes nünlein het von der ich euch
 25 sagen meine; Ir sülß wissen daz in Lombardia gar ein namhafftig frawennkloster was von heiligem orden, vnd vnter andern nunnen die darine waren ein iunges schönes nündlein darin von edelm geslecht was mit namen genant Lisabetta, Die eines tags heym zû hauß ire freünde ze sechen komen waz do sy zû einem schönen iungen edelmane grosse vnmessige
 30 liebe gewan, desselben gleichen auch er in sy in grosse liebe enczündet; Also sölche liebe on frucht lange zeit nicht mit kleiner pein peydenthalben getragen ward, doch nach langem peyten dem iungenn man verporgne wege zû gesichte kamen durch die er mit kleiner seiner müe zû dem schönen nünlein komen mochte des sy von ganzem herczen froe
 35 vund wol zemüte was, Also lange zeit mit peyder lust vnd freüden ir leben miteinander fürten vnd in sölichem [319^a] irem ab vnd zügen sich begab das er eines nachtes von einer andern nunen gesechen warde, do

er von nunen Lisabetta wege ginge dez weder er noch sy war genomen
 het; dieselbig nune ein sölches etlichenn andern klosterfrawen saget
 darüber ir besundern rate hetten, das der ebtessin die mit namen ge-
 nant was Sinibalda güt vnd heilig von yederman gehalten was zů ver-
 5 künden vnd die sünderin zů verklagen, Doch nach langem raten vnd
 bedencken damit Lisabette sölcher sünde nicht gelaugen möcht mitein-
 ander eins worden, daz die heilige ire ebtessin dasselbig sechenn vnd
 den iungen pey ir finden sölt Also alle stille swigen warten wenn der
 iung wider zů ir kem vnd im verporgne hut seczten Nun weste sich
 10 frawe Lisabetta vor sölcher hute nit ze hüten vnd den iungen nach irer
 gewonheit eines nachtes komen thet, das den andern nunen palde ze
 wissen kam, nach dem sy mit der hute bestellt hetten, vnd do sy den
 iungen pey Lisabetta in der kameran vernamen, ein teyle die kamern
 verhütten vnd die andern zů der ebtessin luffen an ir kamern klopfften,
 15 die da pald fraget wer ist da, die nunen spr[319^b]achenn; frawe palde
 stet auff wir haben einen iungen man pey swester Lisabetta in der ka-
 mern funden, vnd die ebtessin zů irem gelücke vnd der stunde einen
 pfaffen pey ir slaffen het den sy vil dicke in einem verschlossen kasten
 zů ir komen thet, do sy vernam das Lisabetta einen man pey ir het,
 20 vnd auch besorget die nunen vmb der grossen eyle willen ir die kamern
 auf stiessen, pald aufstunde, vnd so sy pest mochte sich in der finstern
 anleget, vnd in sölchem eylenden anlegen den stauchen auf dem haubt
 mit dem weyl meinte zů nemen do het sy an dem weilsstat des pfaffen
 prüch oder nider wat begriffen vnd auf ir haubte geleget, vnd nicht
 25 war genomen ob es der weyl oder anders was, Auß irer kamern ginge
 die wol versperte, Zů iren nunnen sprach; Nun wo ist die vermaledeyt
 von got also mit den andern frawen für Lisabetta kamern kam Die von
 sölchem romore nitt weste ze sagen; Die ebtessin mit hilff dern andern
 die kamern auff stiessen vnd die czwey liebe in iren armen mit einander
 30 beschlossen funden, Die peyde von sölchem gächlingen überfallen grosse
 erschrecken enpfingen nit westenn was [319^c] sy reden oder thon söl-
 ten, also stille lagen, Lisabetta von gepote der ebtessin von den andern
 nunnen genomen vnd in das capitell geführt warde, der iunge in der
 zellen beleybe sich anleget vnd wartet zů sechenn was sich doch seiner
 35 lieben nunnen halben ergenn wölte; Doch in sölcher meinung waz stünde
 ir was üfels zů er die nunnen mit sampt der ebtessin vngelücke thon
 wölte; vnd Lisabetta mit im auß dem kloster fürn; Do nun die ebtessin
 mit iren nunnen in das capitell kamen sich nyder seczet anhube gegen-

würtige aller frawen Lisabetta also auß zerichten vnd schelten als geistlicher frawen ye mer gethon warde, Also die das heylige gotzhauß mit iren vnzüchtigen wercken verunreynt het vnd im seinen gûten namen enpfremdet het; Mer die ebtessin sprach; Du vnseeliges pöses weybe!

5 wo ein sölliches als du begangen hast außeralbe vnsers klostere gehöret vnd vernomen wirt, wir alle mit sampte dir in ewiger versmechung sein, vnd ir grosses troen thet, Frawe Lisabetta die sich sölcher sünde schuld ie erkante forchte vnd scham halbenn nicht weste was sie thon oder antworten sölt, Dez [319^d] die andern nunnen mit sampt ir leyte trugen;

10 dann der ebtessin romore vnd geschrey sich stäcz meret, In sölchem numerdumb die iunge traurig Lisabetta ir haubt vnd gesichte in die höhe hub, vnd was die ebtessin auff irem haubte hette e dann yemant anders war genomen het, dann die prüche pendell ir über die oren abe hingenn Do das daz gûte nünlein ersehen het alle in ir selbes frölich

15 warde zû der ebtessin sprach; frawe daz euch pewar pintet auf die pendell an der nachthauben die euch über die oren abe hangenn! darnach saget mir was euch liebet! Die ebtessin die irer rede nicht vernam zû ir sprach? was hauben meinstu zû nichts weyb, ist es iczund zeit dir mit vns zû scherzen heltest du es für ein gespötte die schmach

20 cheit die vnserm orden peweyst hast, Die iunge aber sprach frawe ich pit euch ir wöllet die pendel an der hauben auf pinden, nach dem will ich eüer rede vnd wort gern gehorsam sein; die nunnen alle ir gesicht gen der ebtessin wurffenn, auch des warnamen vnd sichperlich erkannten warumb frawe Lisabetta zû der ebtessin also gesprochen het, vnd do

25 sich die ebtessin also von allen irenn [320^a] nunnen ansechen sach sy fremde nam vnd ir hant auf das haubt leget vnnd der nyder wat pey denn pendeln ware nam, also pey dem vername was Lisabetta hette sprechen wöllen, vnd do sy sich ir eygen sünde vnd schande endecket fande vnd das alle klosterfrawen gesehen hetten ir rede in predig be

30 keret saget vnd sprach wie es vnmöglichen were vmb der weycheit des fleischs willen stäcz in keüsche zû sten, vnd wo sy piß auf die stunde ir sache verporren gefürt het, Nun concludirt daz ir iglich wo sy möchte offenwarlich ir nach irem willenn gûte tage vnd zeit geb; also daz iunge schöne edel nünlein aller puß vnd pein erledigt warde, vnd mit seinem lie

35 ben pülen wider schlaffen vnd zû pette ginge; Desselbig die heylig ebtessin mit irem pfaffen thet, vnd hinfür das selig nünlein; es wer den andern lieb oder leyde ir den iungen zû manchenmalen komen thet, vnd die andern die nicht puelenn hetten verporren sich behulffen so sy peste mochten.

Wie meister Symonn Bruno Buffelmacho vnnnd Nello den dreyen zů liebe Calandrino zů versten geyt vnd in gelauben [320^b] machen wie er swanger sey, Denn Calandrin für erczneye gelte vnd feiste capaun geyt in also an geperrunge eines kindes wider gesunt machen.

Do frewe Elisa ir histori geendet het vnd von in allen gelobet was das daz iunge nünlein sein sache also zů gutem ende het schicken können, Nach dem die künigin Philostrato ir gepote tet; der on alle außrede anhub vnd sprach; Ir schönen frawen der vnzüchtig richter von dem ich euch gester saget mir ein histori von Calandrin zů sagenn auß meinem munde name, dann von dem selben ze reden nicht anders dann vnser freud meren mag wie wol von im vnd seinen gesellen etlich mer histori sein gesaget wordenn doch darumb nicht gelassenn mage; ich auch heüt euch von im eyne sagen musse.

Nun ist genug wol oben peweyst worden wer Calandrin vnd seine gesellenn gewesen sein, von den allen in diser histori begriffen sein wirt, vnd an icht anders mer gesprochen ich spriche. Das sich einest begabe, als dann got liebet vnd sein gefallen was, das ein [320^c] nachste freundin Calandrinn starb vnd mit tode abe ging Die selbig freündin in an dem tot pette pegabet vnd pey hundert pfundt münce pereytes geltz ließ, vmb des willen Calandrin mit außgeben sere reylich warde vnd sprach; er wölt nudalest anders leben vnd wölt güte gelegne güter kauffen, anhub mit allen vnterkeuffeln zů reden die in der stat waren; in masse als ob er ob czweyen tausent guldin in solchen gütern spendern wölte, Vil manche kauffe machet vnd allweg am lesten beschliessen sein kauffe im zestört warde er het nit wol mit allem dem seinen einen morgen acker bezalen mügen, vnd sein kauf stäcz über tausent gulden waren, Do Bruno vnd Buffelmacho sachenn das Calandrin ye kauffen wolt vnd nicht zů bezalen hette zů im sprachenn, Es wer pesser vnd vil paß getun sy schuffen in mit einander vmb die hundert pfundt ein guten müte, dann erden darumb ze kauffen heffen darauß zů machen; doch so vermügen nye waren noch in darzů pringen mochten daz er in nür ein candel meins do von bezalt het, Sich des von im klagten; In dem ein ir gutt gesell zů in kame genant Nel[320^d]lo; alle drey mit einander eins worden, damit sy auff Calandrin speise ire petche gar wol füllen vnd ire münde neczen möchten, Des sy zů hant ir ordnung gaben was zetün waz vnd den nechsten tag darnach warten das Calan-

drin auß seinem hauß ginge; Nello mit fleiß begegnet vnd einen gûten morgen gabe, Calandrin im antwort vnd sprach; so geb dir got ein guten ganczen tag damit ein gut selig iar! nach dem Nello in ansache Calandrin zû im sprach wie sichstu mich also an, Nello sprach hast du
5 dein in diser nacht übel empfunden oder wes enprist dir, du dünckest mich übel stenn; vnd nicht gesunt sein, du pist nicht der den ich dich gester sache, fürwar dir sol nit recht sein. Do das Calandrin vernam zû hant an im selbes czweyfeldn warde, vnd sprach awe mir nu wes düncke ich dich daz ich hab, Nello sprach des ensag ich dir nicht, aber
10 werlich du hast dich aller verkert es wirt villeicht anders sein dann du meinst; Calondrin aller erschracke, doch darumb keines wetung empfand noch sich kranck vername für sich seinen wege ging, Buffelmacho nach irer gegeben ordnung nicht ferre von dann was, Ca[321^a]landrin von Nello gen sache auch im entgegen kame in grüset vnd palde fraget
15 waz im gepreche daz er also ein pöse gestalt het dem Calandrin antwort vnd sprach Ich enweyß nicht wes mir geprechen müge; Nello saget mir iczund wie ich aller in meinem anpicke verkert were, mag es got geschaffen das mir sey als ir sprechet traun ia du magst gar wol was haben, dann du dünckest mich halber tod sein, Die wort Calandrin
20 forcht prachten in masse das er sich bedüncken liesse wie er ein fieber hette; In sölchem reden Bruno auch zû im kame vnd ee er ichs anders redet zû Calandrin sprach; was angesichtes hast du auff disen morgen, Du dünckest mich der grausamen tode sein? waz krancheit ist dich so gächling angestossen daz du also vngestalt pist; do Calandrin vernome
25 das im die alle drey auff ein meinung sagten für ware gelaubet er kranck were, sich sere betrûbet trauriglichen fraget waz er doch thon sölt mich deuchte du gingest wider zu hause vnd legest dich in das pette vnd schafest dich warm halten, vnd schickest deinen harm meister Symon arczte der vnser aller guter freünde ist, [321^b] als du wol weist; der
30 wirt dir zû hant sagen was zetun sey so wöllen wir mit dir heyne gen ob dir was zûstünd das du dich nicht alleine findest; In sölcher rede vnd gespreche Nello auch zû im kam alle drey in zû hauß beleyten zû pette legten vnd er dem weibe zû im rüffet vnd sprach weybe pald decke mich warm zû ich enpfinde mein übel, vnd palde seinen harm in ein harm
35 glase finge vnd den pey einer seinen meyde meister Simon schicket der zû der zeit seinen laden auff dem alten placz hett, Bruno zû seinen gesellen sprach Ir wert hie beleyben so will ich gen vernemen waz der arczte sprech, vnd ob es not thet in dar zû im füren Do sprach Calan-

drin Ach ja mein lieber Bruno gen hin vnd wisse mir zesagen wie mein
 sache stee, dan ich empfinde ye ich weiß nicht was inwendig des leybes;
 In dem Bruno von dann schiede vnd ee dann Calandrin meyde die den
 harn trug zů dem arczte kam vnd was sy mit Calandrin gethon hetten
 5 vnd thon meinten in des vnterrichte; In dem die meyte mit dem harm
 kam, vnd do den meister Symon gesechen hett zů dem meydlein sprach
 ge hin vnd sage Calandrin daz [321^c] er sich warn halte ich wölle all-
 zůhant zů im komen vnd sagen was er thon sülle! das meydlein Calan-
 drin des arczte antwort pracht. Nach dem nicht lange verginge der
 10 arczt vnd Bruno mit einander kamen, Der arczte sich neben Calandrin
 nyder seczet im seinen pulso begreiffe gegenwürtig seines weybes zů im
 sprach, Calandrin dir die warheit zů sagen, vnd als man mit einem gů-
 ten freunde tůn sol so sage ich dir das du einer creature swanger pist.
 Do daz Calandrin vername kleglichen anhůbe zů weinenn vnd sein leyt
 15 got vnd allen seinen heiligen zů klagen, vnd zů dem weybe sprach; Awe
 mir Tessa dar zů pringest du mich, du hast mir das gethon vnd hast
 allwegen oben ligen wöllenn Ich saget dir es wol aber du woltest mir
 nye gelaubenn, Das dir es got vergebe. Nun wie sol ich nůr meinen
 dingen thon. Die gůte frawe die genug zůchtig waz; Do sy in also
 20 reden hōret schame entpfinge, ir haubte vnder sich schluge vngeret auß
 der kamern ginge, vnd Calandrin sich ye lenger ye sere klagen vnd be-
 sorgen warde mit ho[321^d]her stymme schrey vnd sprach Ey ich ar-
 mer elender vngelůckseliger man nun wie sol mir geschehen wie sol ich
 nůr das kint ymmer gepern, Nun wo sol es mir nůr aus dem pauche
 25 gen; Nun secht an ir lieben freunde vnd gesellenn do pringt mich mein
 vnnůtzes pōses weibe zů daz sy got schinde an haut vnd fleische vnd
 30 das sy vnfrōlich weren můsse als ich gern mitt euch frōlich were, Aber
 were ich gesunt als ich nicht pin, Ich sōlte sy mit gůten schlegenn zů
 einem krůppel machen, aber mir geschicht werlichen recht dann ich
 35 sōlte sy nit auff mich haben steigen lassen vnd mich vnder sy geleet
 habenn als icht thet ich ze nichter man, Aber hilfft mir got darvon sy
 misset meinthalben eines sōlichen hin fůr sterben ich solt ir nicht mere
 vergůnnen anf mich zů steygen; sōlicher rede Bruno Buffelnacho vnd
 Nello so grossen willen zů lachenn hetten das sy schir zů sprungen we-
 ren, doch das verpissen vnd der arczte in sōlicher masse lachet man het
 im alle sein czen on wissen außsprechenn mügen, Doch nach langem be-
 dencken Calandrin sich dem [322^a] arczte befalche vnd pat in freunt-
 lich das er im rate vund hilffe geb; Der meister sprach Calandrin ich

will nicht das du also verczagest, dann got sey lobe wir haben deinen
 geprechen vnd krancheit palde vnd pey der zeit vernomen, Darumb ist
 es anders gotz wille so hoffe ich in wenigen tagenn dich wider zů deiner
 gesuntheit zepringen. aber es wirt dich ein klein kostenn, awe mir
 5 meister ich sol kein kostung an sechen; Ich habe hie ligen pey hundert
 pfunt pfening vmb die ich meinte gelegne güter kauffen bedörfte ir
 der so nemt sy hin nůr mir mein gesuntheit wider pringen müget vnd
 ich nicht gepere dann on czweyfel ich sein sterben müst; Der arczte
 sprach; Calandrin piß on czweyfel ich sol dir ein sölech edel getrancke
 10 zu bereyten daz dir inderhalben dreyen tagen dein krancheit alle min-
 deren sol, vnd solt hin für gesünter sein dan du ye gewesen pist, aber
 du must hin für weyser sein dan du piß her gewesen pist damit dir
 nicht mere sölichs vngelücke zů ste als in dem du iczund pist, vnnd
 wisse zů dem getrancke das ich dir ma[322^b]chen will muße ich drew
 15 par guter feister capaun habenn darumb dieselben vnnd auch etlich and-
 dre dinge ze kauffen der dasigen einen die dein gut freünde sein fünf
 pfunt gibe damit er kauffen můg nach dem ich nottorfftig sein würde
 vnd mir das pringe so er peldest müge, vnd piß morgen früe in dem
 namen gotes ich dir das selbig getrancke zů trincken schicken will, vnd
 20 alle morgen du des ein güten truncke trincken wirst, Calandrin sprach
 meister waz euch zů meinem heyle gůt dünckt das geschehe vnd gabe
 dem Bruno palde fünf pfunt vnd hiesse in thon waz der meister mit
 im schüffe vnd pat in freüntlich das er sich im zů lieb ein klein mütet
 Hülff im dann got wider auf seine füsse er wölte es freüntlich vmb in
 25 verdienen, mit der arczte von in schiede, vnd thet pald ein wenig klarea
 machen vnd schicket die Calandrin zů trinckenn vnd Bruno ginge die
 capaun zů kauffen damit alles das zů wol leben gehört, vnd die capaun
 zů bereyten liesse vnd mit sampt dem arczte vnd seinen gesellen die asse
 vnd wol lebet [322^c] vnd Calandrin drey morgen die calerea trancke,
 30 nach den der arczte mit seinen gesellen wider zů Calandrin kam; im
 aber sein pulse suchet, do er in gar wol begriffen het anhub vnd sprach
 Calandrin ich find vnd sich das vns got in deiner grossen kranckheit
 durch mein kunst palde erhört hat ich spriche du pist frische als ein
 fische gesunt, darumb ste auff ge wo du zů schaffen hast du bedafft nit
 35 mer ine ze ligen das gen vnd sten dir gesünter dann das ligen sein wirtt;
 Calandrin aller frölichen vnd wol zemüte auf stunde aus ginge, vnd wo
 er mit yemant zů rede kam wunder von der köstlichenn erzney saget die
 im meister Symon in dreyen tagen gethon hette, vnd in on alle pein vnd

smerczen eines kindes entswengert vnd in vnperhafftig gemachet hette; Des Bruno Buffelmacho vnd Nello alle wol ze müte vnd content waren Daz sy Calandrin grosse geytickeit also betrogen hetten, vmb des willenn sein weybe zû mermalen mit im krige gehabt hette; Doch do es
 5 sein gefallen waz sy gedulte vnd mit leyden haben must.

[322^a] Ciecho Fortaringo zû Bonconuent alles das er hette verpilet nacket in dem hemde beleyb vnd er meister Angoliere zû der stat auß also nackent nachlieffe, vnd do er in die felder kam do die pauern arbeyten er anhûbe zû schreyen er beraubt were die pau-
 10 ern alle zûluffen dem Angoliere alles das er hett namen vnd Cecco gaben; Der sich pald kleydet vnd auff Angoliere roß sasse in in dem hemde liesse vnd so er peldest mochte darvon reyte.

Mit grossem gelechter der ganczen gesellschaft Calandrin rede vnd wort als er zû dem weybe gesprochen hette von irem wöllen alzeyt
 15 oben ligen gehört wordenn, Vnnd als palde Philostrato der materi geswigenn was die künigin Neyphile ir gepote gabe die anhûbe vnd sprach Ir erbern vnd züchtigen frawen Es sein des nit vil iare [323^a] vergangen das in der statt Senis czwen man gesessenn waren peyde mit iren namen genant Cecco vnnd mit den übernamen der erste meister Ango-
 20 liere der ander Forteringo, dieselben czwen wie wol sy in vil vnzüchtigen pösen sachen einander vngeleich waren, Doch in einer gancz mit einander eins waren, daz was das sy. peyde iren väternn so neydig waren daz es on maß was das was ir grosse gesellschaft vnd freunt-
 25 schafft vrsache, stäcz ir wonung mir ein ander hetten, vnd Angoliere der ein gerade schöne iunge man waz, nicht wol von dem das im sein vater gabe zû Senis leben mocht, darumb im sein syn von dann zû zichenn stunde, vnd vernomen hette wie ein cardinale für legeto von dem pabst in die marcke gen Antona gesant were; der gar sein groß freün-
 30 te vnd güter gûnner waz, zû dem er sich meinet fügen do pey er villeicht sein wesen mer dann pey seinem vater pessern meinet, Das dem vater saget vnd ze wissen thet, mit dem er eins warde was er im in sex moneden geben sölt, im das in diser stunde gebe, des der vater willig was, Also er sich zû bereyt mit kleydern vnd roß[323^b]-
 35 en damit er erlich gen Ancona kem. In dem auch suchen ginge ob er yemant haben möcht mit im zû seinem dienst ze fûrn, Eins sölchen Forteringo in warde zû Angoliere kame vnd so er peste möchte in

pate das er in mit im füret, er wölt sein knecht vnd diener allein vmb die speyß sein Des im Angoliere antwort vnd sprach er wölt sein nicht mit im führen, nicht das er zů iglichem dienst nicht genuge außrichtig were, sunder in nitt pey im haben darumb das er also ein grosser
5 spiler were, vnd auch der wein im schedlich were; auff sölche wort Fortaringo zů im sprach Er sölt on czweyfel sein er wölte sich vor dem einen vnd andern hüten Des er an der stat zů got vnd allen heiligen swure, also Angoliere mit piten überwunden was zů im sprach, Nun wolan seytmal du das thon wilt als du geschworn hast so pin ich
10 wol zemute daz du komest. Nach dem nicht lange verginge an einem morgen früe sich peyde auf den wege gen Bon Conuent wercze machten do das male zů essen vnd do sy gessen hetten Angoliere ruen vnd schlaffen ginge zů Fortaringo sprach wenn man mittage leßt das er im ruffet [323^c] vnd nicht lenger schlaffen liesse, vnd do Angoliere ent-
15 slaffen was Fortaringo in ein tafern ginge vnd do er wol getruncken het mit etlichen die da waren anhubē ze spilenn Die im palde alles sein gelt ab gewonnen nach dem sein gewante vnd in dem hemde liessen; Er palde als er was in dem hemde zů Angoliere ginge den er noch slaffent fande vnd im alles das gelt daz er in der taschen het nam,
20 vnd wider zů dem spile ginge vnd geliche als daz vorig also auch dem thete alles verspilet, vnd do Angoliere von dem schlaff erbachet auf stugde sich anleget den wirt Fortaringo fraget den nyemant weste im wol gedacht er etwan truncken lege vnd slieffe als gern sein gewonheit waz; nicht fürpaß fraget vnd in da lassen meinert den wirt im
25 hiesse sein roß sateln; im gedacht einen andern knecht ze suchen, vnd do er den wirt bezalen wolt kein gelt in der taschen fande vmb des willen er ein groß romor machet das gancz hauß betrübet, dann er sprach er were in der herber beraubt worden dem wirt vnd allem haußgesinde troet sy zů fachen lassen In dem Fortaringo in dem hemde
30 nackent aber in die her[323^d]ber kame, vnd als dem Angoliere das gelt genomen hett, Also er im meinert auch das gewante ze nemen; fände er in noch schlaffen, vnnnd do er in zů reyten bereyt sach zů im sprach was bedeut das, der Angoliere sprach; Do wille ich weg reyten, Ach lieber peyt noch ein wenig! Es komet iczund her der hat
35 mein ioppen vmb fünff und dreissig schilling zů pfant die er mir gern vmb dreyssig wider geyt beczale wir in iczund! In dem kam einer vnd thet Angoliere zewissen wie im Fortaringo sein gelt genomen het, vnd im die summe saget des geltes daz er verspilet het, vnd er im an ge-

wonnen het, vmb des willen der Angollere sere vnmütige vnd czornig was zû Fortaringo sprach er wer ein pûbe schalcke vnd loter, vnd schonet er sein selbes nicht er machet in an ein galgen hencken, In sölchem romore vnd geschrey auff zû rosse saß vnd weg reyten meinet

5 Fortaringo sich an in hinge freüntlich pat zû im sprach ach lieber Angoliere lasse wir iczund dise wort vnter wegen vnd gedencken das mir mein iopen vmb die dreyssig schilling wider werdenn, Dann lassen wir die sache piß morgen an sten so wirt [324^a] er wöllen fünffunddreyssig haben als er mir gelichen hat dann ich seczet vnd sluge im

10 in die schancz nach seinem willen des will er mich genissen lassen vnd mir fünf schilling schencken; Der güt Angoliere sölcher rede hette verczagen mügen, sunder do er sich von den die vmb in stunden also ansechen sache, die in dauchten wie sie fürmar gelaubten das Forteringo im sein gelte nicht genomen noch daz verspilt hette, sunder

15 des seinen in den henden het, vnd im schuldig were zû im sprache? was hab ich mit deiner ioppen zû schaffen das du erhangen werest, du hast mich nicht alleine beraubt vnd mir daz mein verspilet, sunder über daz mich meiner reyse geirret vnd nun dein gespötte auß mir machest; Aber Fortaringo stäcz in einer meinung feste stunde in masse

20 als ob Angoliere nicht mit im sunder mit einem andern redet von neuem zû im sprache. Nun warumb wiltu mich fünf schilgen iczund verliesen machen besorgestu das ich dir fünff schilgen abe dienen müge was bedarffst du also darvon zû eylen wir stülen pey genüg güter zeit heiner an die herber komen; darumb gee hin nym den peutel [324^b] vnd gib

25 dem güten gesellen sein dreyssig schilgen, Dann ich in einem ganczen iare nye kein iopen finden mocht die mir den leybe pewart als die getan hat, vnd du wilt das ich sy im vmb fünffunddreissig schilling lasse vnd wilt mir czwifach schaden thon, Der Angoliere in grossem czorn waz das er sich von dem der in beraubt het, vnd darnach also

30 mit gespöttigen worten aufhalten sach, an icht geantwort sich also zû rosse von im keret zû der porten der stat außreyte; Do daz Fortaringo sache ein behende subtile listige poßheit im einfiele vnd also nackent in dem hemde zû der porten auß so peste er mocht im nachvolget vnd stäcz vmb die iopen pate die im zû lösen, daz Angoliere in keinen weg

35 tun wolt, vnd do sy pey einer halben meyle von der stat warn vnd do mit Angoliere sölcher derrung im abe dem halß prechte anhübe zû traben, do daz Forteringo sache anhübe laut zû schreyen etlichen pau-
renn die vor im nachent pey der strassen arbeten forn für forn fure

facht den pöblich der mich beraubt vnd mir das meine mit gewalt
 genomen hat, Die paueren das grosse geschrey gar wol hörten, vndd
 [324^c] on czweyfel meinten im wer als er schrey dan in nackent nach
 dem reyter lauffen sachen palde im den weg furlaffen vnd mit gewalt
 5 auff hielten vnd in fingen der sich sache gern entschuldiget hette do
 warde im nicht so vil weyl gelassen das er sich hette entreden mügen;
 In dem Fortaringe geloffen kam mit pösem angesicht zû im sprache;
 Ich weyß nitt wie ich mich des enthalt daz ich dir nit den halse abe
 stiche vnd dich töde du gotz verretter vnd pöser stasserauber du mei-
 10 nest mit dem meinen darvon ze reyten sich zû den pauern keret vnd
 sprach, Nun sechet an ir pider leüte wie hett er mich auf der herber
 gelassen do er alles das er hat verspilet hette vnd seines schaden an
 mir ein ze komen meint, darum ich wol sprechen mag got vnd ir auff
 disen heütigen tag seyt pey mir gewesen dez ich euch ewigen dancke
 15 sage, vnd das gen euch erkennen wille, Desselben gleichen auch An-
 goliere sprache; Aber seine wort vmb stünst vnd nicht verhöret wor-
 den, Also Fortaringo mit hilffe der pauern in abe vonn roß seczet na-
 cket abe zoche; daz selbig gewant anleget auf ze rosse saß Angioliere
 den pauern in den henden liesse vnd [324^d] er gen der hohen Syn
 20 werce reyte; Der gût Angoliere der reiche vnd köstlich zû dem car-
 dinal komen meinet arm vnd elende naked in dem hemde wider gen
 Bonconuent alleine ze fusse ginge, vnd vrsach grosser schame vnd
 schande gût zeit gen der hohen Syne nit komen dorste Do warden im
 kleyder gelichen vnd auff das roß sasse das Fortaringo geritten het vnd
 25 zû seinen freunden gen Corsingano reyte, da er so lange lage piß im
 von neuem von dem vater hilffe kam. Also Fortaringo grosse subtile
 listickeit betrübet vnd überwant Angioliere gûte fürsaczung wie wol ein
 söliches mit der zeit von im nicht vngerochen beleybe.

Wie Calandrin ein iunge frawen pulet dem Bruno ein brief-
 30 lein schreybt vnd zû versten geyt wen er sy damit anrüre sy im
 nachlauffe vnd seinen willen thon were, das er also thet vnd von
 seinem weibe pey derselben gefunden ward darvmb grosser kriege
 vnd vneinigkeit peydenhalbenn wuchse.

[325^a] Neiphile ir fabel mit lachen vnd mancherley rede der wir-
 35 digen geselschafft zû ende pracht hat; Nach dem sich die künigin
 gegen Fiametta keret ir gepote den gesagten histori nachzûvolgen; die

frölich sprach sy willig were mit dem also anfinge ze reden vnd sprach. Ir edelen frawen nach dem ich gelaube vnd euch wol mag wissentse in, wie kein materi do von man so vil gesagen müge, das söliche materi nit mit liebe vnd freüden gehalten vnd gehört sey wo die zû irer zeit
 5 als pillich ist von dem sager gesagt würt, sunder wann ich bedencke vnd vnser herkomen an siche das wir hie sein alleine vns freüde vnd lust ze geben, vnd alles das ze thon daz vns freüde geben mag, wie wol von Calandrin von vns ist vil gesaget worden als dan nicht lange ist Philostrato sprach, vnd noch mer von in ze sagen vns nit anders
 10 dann freüde vnd frölich sein zû lachen pringen sol, dann alle seine werck vnd handel kürzweylig sein vmb den willen ich nicht gelassen mag. Ich muß euch auch von im mer sagen, vnd das ich von im sagen meine also ware ist als war ich es euch [325^b] sage, Dann wo ich von der warheit abe keret als ich gar wol thon möchtt wann ich wölt; vnd
 15 meine histori vnder andern namen sagen; aber von der rechten warheit abe zesten der geschehen dinge weder vor got noch der welte wol getun ist vnd den weysen ir freüde mindert wider alle gerechtikeit ist; Darumb sult ir wissen wie vnser purger einer mitt namen genant Nicolo Rāblein ein reiche wolmügent mane was; der vnter andern seinen
 20 gelegen gütern in dem tale genant Kamerata einen hoffe het, do ließ er ein ser schönes köstlich hauß pauen, daz selbig er Bruno vnd Buffelmacho verdinget im za malen vnd domit sy söliches gemele dester pelder zû ende kömen Nello vnd Calandrin zû in an die arbet namen, Nun hat der selbig genant Nicolo einen sun der hiesse Philipp der was
 25 iunck vnd on weybe, vnd zû zeiten ein schöne frawe in daz netze hauß verporgen füret, mit ir seinen lust vnd willen ze haben, dann in dem hause nyemant wonet dann allein ein altes weybe, das des hauses hütet vnd den hennen zû essen gabe, Vnd wen er im die schönen frawenn komen tet so hielt er sy doch alwegenn [325^c] czwen oder drey tag
 30 nach dem wider weg schicket Nun vnter andern malen eins mals sich begab das er eine mit im füret die was genant Nicolasa, Dieselben ein pösen leichnam zû seinem willen hielte vnd zy zû zeiten vmb lon auß-
 35 leche vnnnd über felte schicket sy waz von geradem leib schöne vnd wol gerüst, vnd nach irem wesen genug züchtig vnd wol redent, vnd eines tages zû ymnes zeit sy in einen weysen parchet mit auf gepundem hare was auß der kamern in den hoffe des hauß zû einem prunne gangen ire hende vnd angesichte zû waschen, in dem Calandrin on gefere zû dem prunne vmb wasser kam, die schönen frawen sache vnd freüntlich

grüssset dez sy züchtig antwort gabe vnd sere ansechen warde, vnd mer darumb das er sy ein netter holczpock sein daucht dann anders, desselben gleichen Calandrin sy auch ansache In zû masse sere liebet vnd wol gefiele zû hant vrsache bedencken warde da mit er nicht so
 5 palde zû den gesellen an die arbeit kem mit dem wasser, doch nicht zû der schönen frawen sprechen dorste dann er ir kein kuntschafft hette, vnd sy als die seines ernstlichen ansechen ware ge[325^d]nomen het vnd damit sie in paß volgen machet auch in zû weylen an sache, vmb dez willen zû hant Calandrin zû ir alle seine syn keret vnd in liebe
 10 enczündet, vnd so palde aus dem hoffe nicht komen was das Nicolosa pey Philippo in der kamern was, vnd do Calandrin wider an die arbeit kam nicht anders dann plasen vnd seüfczen thet, Das Bruno palde gemerckt het dann im stäcz in die hende sache, als der mer dan yemant seines arbeiten freude het zû im sprach; welt den teüffel hastu
 15 socie daz du nit anders dann plasen thûst, Zû dem Calandrin sprach; socie socie het ich der mir hülff vnd peystant tet, ey verheyter teüffel wie wol wölt ich sten, wie das sprach Bruno; Calandrin sprach, sweyg durch got rede gemelich man sol es nyemant sagen; Ach lieber Bruno es ist hier inne als ein schöne iunge fraw als ich ye mer keine gesache
 20 print eytel feüer vmb meinen willenn, Du soltest dich sein groß wunder nemen Dann ich mercket es gar wol do ich vmb das wasser ginge das sie mich wolte, Awe sprach Bruno schawe das es nit Philippo weybe sey, werlichen sy mag es gar fast wol seinn sprach Calandrin dann er rüff[326^a]et ir in die kamern, Sey nu wie im wölle ich thet es
 25 Cristo ich gesweyg Philippo, ich will dir die warheit sagen socie ich düncke sy also ich künde dirs nicht sagen socie karissime ich wil dir ersprechen wer sy ist sprach Bruno? ist sy dann Philippo weybe so wil ich dir dein sache gen ir in czweyen Worten außrichten, dann ich pin mit ir sere wol darann aber wie thet wir das Buffelmacho des nicht
 30 warneme, Calandrin sprach Buffelmacho acht ich kleyne; hûte wir vns nûr vor Nello der meines weib geporner freünt ist, dann wo im das zewissen kem so verderbet er vns alle dinge, du hast wol geret sprach Bruno, Nu west Bruno gar woll wer die schöne fraw waz, dann er het sy zû mer malen komen sechen auch Philippo ir nicht vor ir ver-
 35 parge. Nicht lange nach disen Worten, Calandrio abe der arbet gangen waz, die schönen frawen zû sechen, in dem Bruno Nello vnd Buffelmacho alle sache Calandrino halben saget vnd in zû wissen thet, Des sy heymlich ir ordnung gaben waz diser sache halben freude zehaben

zetun were, vnd do Calandrin wider an die arbet kam Bruno verpor-
 gen zů im sprach hast du sy ge[326^b]sehen Calandrin sprach, awe
 mir ia ich hab sy gesehen, sy tödet mich; Do sprach Bruno ich wil
 gen sehen ob es die sey die ich mein; ist sy es dann so lasse nůr mich
 5 mit ir schaffen, vnd ab dem gerüst steyg zů Philippo ginge im vnd
 ir was er Calandrin pulerey halben thon wölte, vnd was ir anlage
 were sein freude vnd kürzweyle ze haben, des sie peyde vnterricht
 waz ir igliches reden vnd antwort geben sōlt; Nach dem wider an die
 arbeit ginge zů Calandrin sprach sy ist es gar wol die ich da meinete,
 10 Darumb müsse man ger weyßlichen mit der sache vmb gen damit vns
 nit schanden zů stee, dann wo Philippe des ware nem, alles dazs was-
 ser in dem Jordan vns die stůnde vnd schande nicht abe waschen möcht;
 aber sag mir ob sich begeben das ich mitt ir zů rede kem waz sol ich
 ir von deinen wegen sagen, Calandrin sprach traun mein lieber socie,
 15 Do sage ir ich wöl mer dann tausent sůmeren der rechten gutenn wol
 wöllung zů swāngern. Nach dem sage ir wie ich ir getretter diener
 sey vnd beger sy icht von mir daz hastu genug wol vernomen Bruno
 sprach; nu laß mich schaffen thue nůr als ich dir sag [326^c] Do nu
 die zeit daz nachtmale zů essen komen was, vnd von irer arbeit ge-
 20 lassen hetten In dem hofe an der frische hin vnd her gingen, in dem
 Philippo mit der schönen frawen zů in komen was vnd Calandrin zů
 liebe sich mit sampte der frawen zů den malern nidersezet, do het
 der man von Calandrin ein schön guczenn sehen dann die frawen durch
 sehen wolte sich mit manchem wunderlichem geperde gen ir nach sei-
 25 nem gedůncken in liebe peweyset vnd daz in masse daz es nit allein
 die sechentt sunder die vnsehent gemercket vnd gesehen hetten, Des-
 selben gleichen als sie dann waz vnterweist worden auch thete, damit
 er in mer liebe enczůndenn sōlt, als ir dann was von Bruno ze thon
 befolhen worden, Die zůsecher grosse freude vnd kürzweyle hetten
 30 Calandrin weyß geperde vnd pulerey Philippo vnd die andern man-
 cherley gesprech mit einander hetten vnd das mit vleiß theten damit
 Calandrin nach seinem willen mit sehen pūlen möchte; darumb keines
 gleichen theten ob sy icht von im sehen vnd merckten; Doch nach
 langen reden mit Calandrin grosse pein von dan geh der statwercz
 35 ging[326^d]en vnd Bruno zů Calandrin sprach. Nun sprich ich wol das
 du sy kanst zergen machenn als die sunne das eyß tut; wer het des
 immer gelaubet daz ein sōliches in dir gesteket were werlich ich sprich
 vnd swer pey dem leichnam gotz nymstu dein fideln zů deinen henden

vnd singest ir darauff ein lytlein du machst sy das sie sich zů dem
fenster auß ab zů dir würfft. Nu wie meinstu socie sprach Calandrin;
düncket dich ich künne sy komenn machen, traun ia sprach Bruno das
ist das daz ich da sag Calandrino sprach; nu woltestu mir nit gelau-
5 ben, do ich dirs heüt saget; Ich sage dir Bruno socie ich weyß sein
mere denn kein man? welcher het also palde als ich ein sölliche schöne
iunge frawe zů seinem willen pringen mügen, als ich gethon hab; für-
war keiner, Ia piß morgen ein ander hette es thon können; Ich tůa
nicht als die iungen narren thon die den ganczen tag auf der gassen
10 auff vnd abe gen, vnd in tausent iaren nitt ein hantvol kern zů ein-
ander prechen, Aber sechest du mich mit meiner fideln so würstu erst
wunder von mir sagen vnd nettes spile sechen, du solt wissen das ich
nit so alt pin als ich [327^a] düncke; Ich mag noch woll gott sey lobe,
Des hat sy gar wol wargenomen aber sy sol mich anders erkennen lege
15 ich mein hant auf sy, werlich werlich das ist geschworenn ich sol ir
ein dinge ein tun sie sol mir nachlauffenn als die narren den kinden
tun, O sprach Bruno du wirst sy swellen vnd essen mit dein czen, die
lauten negeln gleichen, diser wort Calandrin also frölich vnd wol zemüte
warde daz er kaum in der haut sten mocht vnd zů hant an dem morgen
20 sein geygen prachte vnd mit grossen freüden vil güter lüglein sange, kurz
abe geret, zů sölcher grosser freüde bekam die schönen frawen zů sechen
daz er aller arbet vergasse woll zů tausentmalen des tages an das fenster
lieffe iczunde an die portenn, iczunde in den hoffe also vmb zelaffen iczund
vmb wasser zů dem prune iczund vmb wein alleine sein mensche zů se-
25 chen, vnd sy als die von Bruno gemeistert waz im des güte vrsache gabe
zů zeiten gar lieplichen an sache Auch Bruno im seiner potschafft von
der frawen stätz güte antwort pracht, vnd wenn sy in der stat was er
im vor ir prieffe pracht die im besunder hoffnung gabe. In densel-
[327^b]ben preffen im zů versten geben warde wie sie iczund pey iren
30 freunden were, vnnd ir smerczenn prechte das sie im nicht nächer
sein möchte, In pate das er ein klein gedult hette piß sy wider kem,
Also Bruno Buffelmacho die aller sache on richter warenn, Ire freüde
mit sampt den andern von Calandrin hetten, vnd von der frawen
wegen zů zeyten etwas an Calandrino begerten als einen helffenpeinen
35 kamp ein schönen seckel oder ein par messer vnd im etwas anders dann
widerumb prachten, als sy im daz schicket als messene ringlein die da
nit wert waren, Domit Calandrin sein besunder freude het; über das er
in gab der frawen zepringen sy von im vil güter märende hetten; da-

mit sy desten pessern vleiß theten seinthalben, Do sy nun in pey czweyen moneten also aufgehalten hetten vnd des malen zů ende komen waren; Calandrin zů Bruno sprach das sein nicht vergesse im sein sache befolhen liesse sein In dem die iung frawe auch wider komen was Bruno
 5 mit Philippo vnd ir ein ordnung gabe wes man sich freůde ze haben haltenn sůlte Nach dem zů Calandrin ging zů im sprach socie die schöne [327^c] frawe der hercze du in liebe verwunt hast mir zů tausent malen versprochen hat deinen willen zethon, vnd des doch noch nicht gethon hat, vnnnd lasse mich bedüncken sy füre vns vmb die wege pey der
 10 nasen Darumb deucht mich seytmale sy vns also vil verspricht vnd wenig helt sy darzepringen es sey ir liebe oder leyde ist es anders dein gefallen, vnsern willen ze thon, Calandrin pald antwort vnd sprach Ach ia lieber Bruno vmb gotz willen kome der sache zů ende wilt du mich pey leben behalten! dann ich stirbe, Bruno sprach pistu so beherzent
 15 daz du sy darst anrůren mit einem priefflein das ich dir geben wille, Calandrin sprach traun ia gar wol so ge hin vnd pringe mir ein wenig netzer vngeporner karten vnd ein lebendige fledermause vnnnd drey kůrner weyrach vnd ein geweichtes liecht oder kerczen vnd lasse mich machenn, Calandrin palde ginge vnd mit allen seinen kůnsten pey
 20 dreyen ifachten vmb lieffe ee er die fledermauß zů wegen pracht, Nach dem doch eine fing die er mit sampt den andern dingen Bruno prachtt, Der sich in ein kamern verparge vnd auff die karten sein [327^d] abeiß schreybe mit etlichenn kreuczen vnd karaktern vnd das Calandrin prachte zů im sprach, Du solt wissen wo sy mit disem prieffe an plosse
 25 haut růrst so muß sy dir nachlauffet so macht du mit ir tune was dir liebe ist, Darumb nym war wenn Philipp heut außget so nechent dich zů ir vnd růre sy mit dem prieffe an, vnd wen du das gethon hast so gee palde in den stadel auf das stroe dann ich sich nicht verporgner noch pesser ende zů deinen sachen dann daz ist, dann gar selten yemante
 30 in den altenn stadel get, So wůrst du sechen das sy zů dir komen muß, wenn sy dann pey dir ist so weistu wol was du thon solt bedarffe ich dich nit zů lern, des Calandrin der frůlichest man warde der auf erden ye bekame Die geschrift von Bruno nam vnd sprach socie lasse mich nudalest schaffen! Nun Nello vor dem sich Calandrin besorget der sach
 35 nitt minder als die anderen sein freůde hette vnd nach der gegeben ordnung er in die stat zů Calandrin weybe ginge zů ir sprach Tessa Du weyst wole wie vil manche herte schlege dir Calandrin on alle vrsache geben hat; Ist mein meinung das du dich der iczund an im [328^a] rechest,

wo du das nit tuest; so solt du wissen daz ich dein freunt nymmer mer
 sein wille da wisse dich nach zû richten Du solt wissen das er ein ander
 vuntze pûbin liebe hat, dar oben in Kamerata do wir arbeiten vnd sy
 also zû nichte ist das sy sich offte wenn er arbeiten sôlt mit im ein ver-
 5 sperte, vnd ist nicht lange daz sy peyde einander an ein verporgen
 ende zile gaben, Darumb wer mein syn du kemest daz zû sechen vnd
 selbes die warheit finden vnd in zû bereytest als er dann verdienet het
 vnd wirdig were; Do das frawe Tessa vernam sie kein schimpf sein
 daucht pald von dem rocken auf fure vnd sprach; Ey der offentlich diebe
 10 vnd verrâter thut er mir das, pey der marter gotz ich sol in bezalen
 palde den mantel vnd sleyer name mit einem alten mûlterlein vnd halben
 trabe mit Nello sich auf den wege machet vnd in Kamerata kame, Die
 Bruno von fêrren komen sache zû Philippo sprach Do komet vnser freunt;
 do wirstu gute swencke hœren; Nun ge vnd thue als ich die befolhen
 15 hab Philippo zû den malern an die arbet ginge zû im sprach meister ich
 muÿ gen Florenz reyten arbet redlich des pitte ich [328^b] euch mit dem
 von dann ginge vnd verparge zû sechen was doch Calandrin thon wôlt,
 do nun Calandrin daucht Philipo wege geriten were, In den hoffe kam
 die iunge frawen alleine fande mit ir anhuben zû reden vnd sy als die
 20 der sache gemeistert was sich zû im nechnet mer dann sy vor ye gethon
 het; In dem er sy mit dem priefflein berûret vnd von dann in einen
 alten stadel der neben dem hauß was ging, des im zû hant die iunge
 frawe nachuolget, vnd do sy in den stadel kam die stadel tûre zû sperret
 vnd Calandrin in ire arme fasset auf das stroe nider warffe vnd gritling
 25 auff in sasse zû in sprach O mein aller liebster Calandrin du mein liebstes
 lieb mein trost freude vnd hilffe meines herczen wie so lange zeit hab
 ich dein begert got sey lobe du pist mir doch worden! du hast mir mit
 deiner leiplichen zucht den faden auß dem hemde gezogen, du hast mein
 hercz mit deiner süssen fideln durchgangen, mag es gesein das ich dich
 30 in meinem arme hab es czweyfelt mir ob ich dich habe oder nitt Den
 sy so starcke vnd enge hielte das er nicht wortt gesprechen noch sich
 berûren mochte, Doch einest ein attem [328^c] finge vnd sprach O du
 mein süsses lieb lasse mich dich ein wenig küssen, Nicolosa sprach nicht
 eyle also laÿe mich dich vor ein gentigen ansehen vnd mich deipes süssen
 35 angesicht meiner augen erfüllen, Bruno vnd Buffelmacho an dem ver-
 porgen ende pey Philippo waren alles sachen vnd hœrtenn wie Nicolosa
 mit Calandrino vmb ginge vnd wie er sie so gern gekûsset het; In dem
 Nello vnd frawe Tessa Calandrin weybe an die stadel tûre kamen, vnd

frawe Tessa als die zorn übergangen het mit der feüste an die türe
 schlug vnd sprach; Ich sprich vnd swere pey dem leichnam gotz finde
 ich sy pey einander ich soll sie peyde vngelücke anlegenn, Sey wer sy
 wölle so mag sy nicht anders dann ein zenichte pübin sein das sy got
 5 schende das sy lust zů sölchem esel hat als mein man ist Mit disen wor-
 ten zů der stadel türe einging vnd Nicolosa auff Calandrino siczen sache,
 do hub sich czwischen weyb vnd man ein grosser streite mit dem Nico-
 losa do sy Calandrin weybe ersache dar von lieffe zů Philipppo vnd zů
 dem andern kam vnd frawen Tessa sich über Calandrin leget ee er auß
 10 dem stroe kam im sein angesichte [328^d] zů kraczet als wern hundert
 kaczen ob im gewesen pey seinem hare nam in dem stadel von einem
 ecke zů dem andern zoche zů im sprach; ey du zenichter pöser hunt, du
 tust mir das ich sol dich werlichen bezcalen, du alter esell vermaledeyt
 sey mein wol wöllen daz ich dir gewölt hab du unbeschamter narre hastu
 15 daheyme nicht genug stroe zů reytern vnd must anderswo hin gen das
 ze tun Nun secht nür an was schöner liebhaber daz ist, Erkenst du dich
 noch nit feyger man, der dich in ein pressen leget der möchte aus dir
 nicht so vil safte gedrücken das er ein wenig salssen machet; Es was
 iczund nit dein Tessa die dich swanger machet das dich vmb sy got
 20 vngelück anlege wer sy ist, so mag sy doch wol ein außerwelte pübin
 sein das sy lust zů sölchen vnlüstigen dingenn hat als du pist; do Ca-
 landrin sein weibe zů dem stadel tore ein gen sache so sere erschrack
 das er weder lebendig noch tod waz noch so beherczent was sich ir zů
 wern alles daz sy im tet leyde, doch wiè er mocht also zů kraczter sein
 25 kappen von der erden aufhube vnd er auch auf stunde diemütiglich das
 weyb pate das sy nit so laut [329^a] schrie, wölt sy anders das er nicht
 zů stücken geslagen würde, Dann die frawe die sie pey im gefunden
 het des hern von dem hauß weybe were, Des gebe ir got ein pöb iare
 vnd dir darzu, sölches schreyenn vnd romors Philipp Bruno Buffel-
 30 macho vnd Nicolosa in genug lachten sich alle zů dem romore fügten vnd
 nach mancherley rede vnd neuen fabeln Calandrin mit dem weib wider
 in fride seczten, im rieten er mit ir heym ginge, vnd in keinen wege
 mer hin wider kem, Dann wie Philipppo was verneme im villeichte neue
 vngelück zů sten möchte, Also der arm eynfeltig Calandrin aller kra-
 35 czet vnd zů rissen mit dem weybe zů hauß ginge so beherczent nit was
 mer hin wider ze komen tag vnd nacht seines liebhabenn vnd pülerey
 geungsäliget was Also Calandrin pülen ein ende nam das nicht mit
 kleinem gelechter vnd grossen freüden seiner gesellen Philipppo vnd der

frawen Nicolosa.

Wie czwen gesellen pey einem wirt herbern, vnd der eine mit des wirtz tochter schleift pey dem andern des wirczs weybe on gefere leyt, vnd der die tochter beslaffen het, sich [329^b] darnach
 5 zû irem vater leget vnd meinte er pey seinem gesellen lege alles das er getun het im saget, der wirt romor macht; Das weybe der verlossen sache erst ware name, palde auf stet do sy pey dem andern gesellen lage vnd sich zû der tochter legt nach dem mit züchtigen worten den man stillt.

10 Calandrin der die züchtigen gesellschaft so ofte hat lachen machen auch iczund seines pulen in gar wol gelachet haben. Nach dem die künigin Pamphilo zû sagen das zeichen gabe der also sprach. Ir züchtigen diemüttigen frawen Nicolosa die von Calandrino gepûlet was der name mir auch eine histori in meine gedancke pracht hat, euch
 15 von einer andern Nicolosa ze sagen do ir einer guten frawen schnellen rate vernemen wertt; wie die grosser schande entginge vnd die ab ir nam; In der eben ob vnser stat genant Mongone nicht lange ist ein gût man gesessen was, Der zû zeiten fremden fûrgenden leûten vmb ir gelt essen vnd trinken gabe, auch zû zeiten wie wol er ein arm man
 20 waz vnd ein enges heûßlein hette [329^c] etlichen seinen kenßwol herber gabe Nun hette derselbig gût man ein sein weybe noch genug schön mit der er czwu tûchter hette, Die erste was ein schöne iunckfraw züchtig vnd vnuerheyret pey czwelff iaren alte, Die ander noch ein kint pey einem iare was vnd derselben seiner ersten tochter ein
 25 iung edel gesel ir liebe vnd hulde tragen warde, sein gemût ganz zû ir seczet, stâcz sein wonung ir zû liebe in der gegent hette Sie auß grunt seines herczen liebe hette vnd sie die sich von sôlichem edeln hübschenn iüngling gefreyt sache sich des grosse hielt, vnd grosse ere zû zoche, vnd in in irer liebe zû behalten sy allen fleyß thet vnd
 30 nicht minder liebe zû im het als er zû ir thete, vnd peyder liebe zû manch malen zû irem leczten ende komen were; hette der iung nicht besorget im schande dovon bekeme, Doch von tage zû tage sôliche liebe sich ee meret dann mindert, doch dem iungen einest in willen vnd begire kam sich eines nachtes pei der iunckfrawen zû finden, vnd sôlicher
 35 seiner liebe ein genügen thon mit ir seinen willen zû verpringen, syn vnd wege des bedacht het, dann die iunckfrawen zû seinem willen ge-

schicket [329^a] west; Darvmb on czweyfel was des er sich bedacht hett;
im nicht felen noch yemant eins sölchen war nemen sölt vnd wie sein
anslage waz also er das zů ende pracht vnd einen seinen getreuen ge-
sellen zů im nam dem allen sein gescheffte wissent waz; Eins abentz
5 czwey roß namen czwen batsecke vol mit stroe darauf legten vnd zů der
stat auß riten, in piß in die dūnckel der nacht einen vmb rite namen,
darnach von oben abe in masse als ob sy von Boloni kemen, vnd nu wol
pey czwey stunden der nacht vergangen waz daz sy zů des guten manne
hauß kamenn darinne die schöne iunckfrawen was, da anklopfften den
10 der wirt der ir peyder gäter freunt was, palde auff thet zů dem der
iunckfrau pule sprach; Nun sich guter man du wirst vns heynt beher-
bern dann wir sein zů spet komen vnd mügen nicht in die stat, Darumb
wirstu auff dise nacht mit vns gedulte haben dann wir mügen nitt ferrer;
Der gut arm wirt sprach, Ir wisset wol wie ich in meinem hauß arme
15 vnd enge stee, vnd sölche person als ir seyt nit zů herbern hab, doch
seytmal ir nicht fürpaß mügt wille ich gern gen euch mein [330^a] ver-
mügen thon; Die czwenn iren rossen sassen in daz hauß gingen, vnd so
sy pest mochten ire roß stelten nach dem mit dem wirt zů tische sassen
vnd assen. Nun het der gut wirt nicht mere dann ein kamern zů mall
20 kleine darinne drew kleine petlein, die alle drew ein ander an rürten
vmb der enge willen daz man mit marter czwischen einem vnd dem an-
dern gen mocht Von denselben dreyen petten der wirt das peste für sein
geste bereit vnd schlaffen weiset das ander pette für die tochter liesse
an dem dritten er vnd das weyb schlieffe; Do sy nu alle zů pette gingen
25 warenn, Die czwen gesellen theten als ob sy starcke schlieffen, des ir
keiner thet, vnd do die wirtin slaffen ginge die wigen mit dem iungen
kinde nebenn ir pette seczet vnd alle dinge gestillet waren der wirt vnd
die wirtein entschlaffen waren Der iunckfrauenn pulen in stille aufstunde
sich zů ir leget, do er von ir wie wol sy in grossen sorgen was mit
30 grossen freuden enpfangen warde, do sie peyde von einander die freude
vnd den lust sölcher liebe namen, als dann peydenhalben lange zeit
waz begert worden; Do sie nu gut zeit in söl[330^b]cher liebe gelegen
warn, sich begabe das ein kacze in dem hauß was het fallen machen mit
dem die wirtin erwachet in der finster anstund anders schaden besorget,
35 vnd ginge do sy daucht das fallen geschehen were; In dem der ander
geselle nicht der iunckfrauen pule leybes nottorft halben auf sten must;
der in seinem gen in der enge des Kindes wigen fande vnd nit fürpaß
gen mocht er hüß sy dann auß dem wege, die er name vnd für sein

pette seczet do er inne lage ginge vnd verpracht vmb des willen er auf-
gestanden was, nach dem wider zů pette ging nicht gedacht die wigen
wider ze seczen do er sy fuder genomen het, vnd do die wirtin funden
het das die kaczen das romor gemacht hetten, sich in der finster wider
5 in die kamern füget, vnd do sy der wigen mit dem kinde nicht fand zů
ir selbes sprach, awe mir secht nůr waz ich schire gethon het pey dem
waren got ich wer schir in der geste pette schlaffen gangen! fürpaß
greyffe vnd die wigen fande die sy meinete vor irem pette stůnde sich zů
dem gaste leget, vnd nicht anders meinete sy sich zů irem manne gelegett
10 het, der gute geselle der noch [330^c] nicht entschlaffen was, Die frauwe
mit frůlichem verporgem herczen enpfinge, vnd on icht anders gespro-
chen zů dreien malen sein armprust spannet vnd abschosse, vnd daz nit
mit minderm lust der frawen als sein; Do nun peyde gesellen gut zeit in
sůlchen freůden gelegen waren, Der erste der pey der iunckfrawen lage
15 besorgen warde das der wirtt der sache nicht ware nem vnd nun seinem
willen ein gut genůgen gethon het, auf stund zů seinem gesellen an daz
pette gen meinete, vnd do er die wigen dar vor fande er meinete, das des
wirtes pette were, fürpaß ginge an das ander pette kam vnd wo er sich
zů seinem gesellen leget meinete sich zů dem wirt leget, der da wachet
20 vnd nicht schlief, anhube vnd mit seinem gesellen reden meinte vnd
sprach Adriano guter geselle Nun kan ich dir das wol gesagen das ich
sůsser dinge alle meine tage nye versucht hab als Nicolosa ist vnsers
wirtes tochter, Ich hab grosser freůde mit ir gehabt dann ich mein tage
mit iunger frawen ye getun hab Mer sag ich dir daz ich wol zů sechs
25 malen über felt geriten [330^d] pin syder ich von dir aufstunde, Do das
der wirt vernam in nicht gut daucht zů im selbes sprach, welt den
teůffell thut der hie pey mir, nach dem mer betrůbt dann wol beraten
zů dem gesellen sprach werlich du hast źbel vnnnd nicht wol gethon ich
het dir sein nitt getraut aber got helffe mir nitt ich sol dir des lonen,
30 Der iunge der auch nicht am klůgsten was zů dem wirt sprach; wes
wilt du mir den lone gebenn Nun was magst du mir nůr gethon wenn
du gleich źbel tun wilt, Die wirtin die pey dem andern lage vnnnd noch
pey dem man ligenn meinete zů im sprach, Nu was haben vnsere geste;
hůre man was sy sagen der gut geselle der frawen antwort vnd lachent
35 sprach lasse sy nůr schreyen got gebe in ein pōß iare sy truncken nech-
ten zů vil; Die wirtin den gast vnd auch den man erkennen warde wol
daucht sy źbel gethon het vnd als ein weyse palde auff stunde die wi-
genn für der tochter pette seczet vnd sich zů ir leget, vnd in gleicher

weyß thet als ob sy von dem geschrey der czweyer erwachet were, dem
 man rüffet vnd in fraget was ro[331^a]mores er hette, Der man sprach
 hörst du nicht was der dasig spricht wie er vnser Nicoloso das schamper
 dinge gethon hab, des leuget er in seinen halße, pey Nicolosa ist er
 5 nicht gelegen, dann ich pin selbes pey ir gelegen, Ich leget mich in der
 stunde zû ir daz ich sider her keinen schlaf nye mer hab thon mügen,
 vnd du pist auch ein recht narre das du im gelaubest, Ir trincket euch
 so vol dez abentz daz euch darnach die ganczenn nacht traumt vnd get
 hin vnd her als das viche thut vnd enpfindet eüer selbes nicht vnd euch
 10 bedüncken lasset wie ir grosse wunder tût, Es ist sünde daz ir euch sel-
 bes nicht die helse abe stosset, Nu was tut doch der pey dir; warumbe
 leyt er nicht pey seinem gesellen, do das der vernam pey dem die wir-
 tin gelegen was; Die frawen für weyse hielte der tochter vnd auch ir
 schande zû bedencken, seinem gesellenn rüffet vnnd sprach, Ich habe
 15 dirs zû hundert malen gesaget, Daz du des nachtes nitt also vmb die
 wege geest, vnd in dem schlaffe also aufsteest So kan ich dir sein nicht
 erwern, du wilt ye lügen vnd [331^b] fabel sagen Die dich der tags vn-
 glücke anlegen wern, ge her in dein pette das dich ein pöß iare nu an-
 gee. Do der wirt des gaste rede vnd auch des weybes vernomen hette
 20 on czweifel meinete vnd gelaubete dem gesellen der im die warheit gesaget
 het in dem traume geret het, vnd in pey der achseln name gar wol
 schütet vnd im rüffet zû im sprach Pinnuczo stee auff gee hin an dein
 pette, Der gute iung geselle der alle rede vnd wort zû im genomen hett
 des gleichen thet als er erste von dem schlaffe erbachet were, vnd als
 25 im getraumet hette Zû hant in andere wort sprange, als gern der trau-
 mer gewonheit ist, Des im der wirtt freude vnd kürzmeyle nam vnnd
 fraget ob es noch tage were das man im also rüffet des im sein geselle
 antwortt vnd sprach Ja es ist tag kom her zû mir an mein pette, Er auff
 von dem wirt stunnde vnd zû seinem gesellen schlaffen ginge, In dem
 30 der tage kam der wirt yederman aufwecket vnd die czwen iungen ge-
 sellen mit dem wirt ir rechnung machten ire rosse sattelten [331^c] Nach
 dem ein gut collacion mit dem wirt machten, dar nach auf sassenn heym
 in die stat riten peyde der verloffnen sache frölich vnd wol zemute waren,
 vnd hin für ander weg mit dem iungen schönen meydlein eins worden
 35 wen in liebet pey einander zû sein, auch Nicolosa irer müter zû versten
 gabe wie on czweifel dem iungen der sich zû irem vater geleyet hat im
 getraumet hette, Die gute frawe das lieplich vnd süsse halsenn das sy
 von dem andern iungen knaben empfangen het, das gar wol bedacht in

irem herczen zû ir selbes sprach, so pin ich allein die, die da gewachtet vnd nitt geslaffen hat.

Wie Thalano traumet daz im ein wolffe sein weybe wûrget,
Das er ir zû wissen thet ir saget das sy sich weste zû hûten des sy
5 nicht tet, Darumb ir zû stunde als er ir gesaget het.

Pamphilo history vnd netie fabel zû seinen ende komen ist In dem die kûnigin Pampinea gepot, doch vor das weißlich wûrcken peyder [331^d] der muter vnd auch der tochter Nicolosa von den zûchtigen fra-
wen gelobet warde; Nach dem Pampinea anhub vnd also sprach.
10 Mein aller liebsten frawen nach dem vormalen mere von dem traumenn ir vernomen hab vnd ist beweist worden, die zû zeiten an der warheit fundenn sein vnd zû zeiten nicht, doch darumb nicht gelassen mage ich euch derselben einen sagen muß nach dem einer meiner nachperin zû stunde dez nit lange vergangen ist Die irem man nicht gelauben wolt als
15 im von ir in einem traum erschienen was, mir ist nit wol wissent ob ir Talano Imolose kuntschafft gehabt hab oder nitt doch eines ir wissen stilt wie er ein zûchtig gut schlecht man was, vnd het ein genug schöne frawen mit namen genant Margaritta, aber ob allen frawen die czörnig-
20 st die ye warde vnd in keinen weg nach nyemant rate noch synne thon wolt noch nyemant waz, der nach irem willen thon möchte vnd wie wol ein sölches irem man Talano zû vertragen swere was, Doch dem nicht anders tun mocht mit ir gedult het; In sölchem sich begabe das Talano auch mit dem selbenn weybe in dem dorffe [332^a] auff einem seinen hofe was, vnd im eins nachtes in einem schlaffe traumet vnd für
25 kam in dauchte wie er seche seine frawen durch einen grünen walt gen der nicht ferre von irem hauß was, vnd in sölchem iren gen sich bedünckenn liesse wie er an einen ort des waldes einen grausamen grossen wolffe seche der sich zû hant auf das weybe wûrfte pey dem halse neme zû der erden zûge des sy laut schrie vnd hilff begeret, der wolff sie
30 nam vnd wege ze tragen meinete, doch im auß dem maule kem mer in daucht wie er der wolff den halß vnd das angesicht alles zû rissen het; Nun des morgens frûe do er auf gestanden was zû ir sprach Frawe wie wol dein widerbertikeit gen mir so groß gewesen ist, das ich nye guten tag mit dir habe mûgen haben, doch das selbig nicht an-
35 siche wo dir schaden zû stünde mir ye leyt were; darumb wöltest mir gelauben vnd meinem rate volgen so gingest do heût nicht auß dem

hauß. Sy in der vrsach fraget des er sy palde vnderricht vnd ir den traume saget, der im in der vergangenn nacht für komen was, daz weybe ir gespötte darauß treybe mit rütelttem haubt sprache, [332^b] wer üfels vnd pöses pegeret dem komet es gern für in dem schlaffe, wie pistu nür
5 iczund gen mir so diemütig worden das dir also von mir traumet das du gern sechest das es mir gesche Ich sol mich wol heüt vnd alwege vor wolffen vnd vngelücke hüten, das du dich weder dises noch anders meines vngelückes erfretten solt, ich gedacht mir wol sprach Talano ein sölches würde dein antwort sein, Es ist noch ware were grint strelt der
10 hat söllichen lone; Ich sage dir daz nit von meinen wegen sunder dir zů liebe, Nach dem thue nür dein gefallen, doch von neuem riete ich dir du belibest heüte zů hauß, oder zů dem minsten dich hüttest heüt in vnserenn walte ze gen. Die frawe sprache des sol ich dich woll gewern vnd nicht darein gen Nach dem zů ir selbes sprache hast du gemercket Margaret wie dich der meint zů erschrecken damit ich heüt
15 nicht in den walt gee do er villeichte einer pübin sol hin geczielt haben vnd besorget ich in vnd sy finde; Er het gut plindenn zů essen, wer ich also eynfeltige das ich sein swencke nitt erkant vnd im gelaubet werlich es sol im nymmer so gut wern [332^c] ich sol der warheit inne wern
20 sölt ich den ganczenn tage in dem walde ligen zů sechenn was kauffmanschacz das sey die er da kauffen meinte Do sy nu gut zeit in sölchen iren gedancken gestanden vnd der man zů dem hauß außgangen was, Des selben gleichen auch sy thet, vnd so sy verporgenst mocht in den walde ginge vnd do er an dem dicksten was sich hin verparge
25 do gut zeit in der hüten lage stäcz hin vnd here sache ob sy yemant komen seche, vnd die weyle sy in solchem form on alle sorge der wolffe lage, sich gächling begabe das ein grausam groß wolffe nahent pey ir auß einer dicken stauden sprange der ir nicht so vil weyle ließ daz sy het sprechen mügen helffe mir got ir auff dem galß waz
30 gar wol mit dem maul fasset vnd wege truge, sy selbes weder gehelffen noch geschreien mocht also enge er sy pey dem halse het, vnd on czweyfel der wolffe sy erwürget vnd getöt hette wer er nicht den hirtten begegnet die in mit grossem romor vnd geschrey czwungen die frawen ze lassenn, Die von den hirtten zů hant erkant warde vnd zů
35 hause trugen, vnd nach langer zeit von den erczten wider zů irer ge- [332^d]suntheit kam, doch das zeichen an dem halse vnd angesichte wo sy vor schöne was, nu alle vngeschaffen beleyb des sie sich ewig schamen muste wo das gesehen warde das sy zů manch malen kleglichen pe-

weinet, Das ir grosse widerwertikeit vnd wenig synne vrsache gewesen was, nit zů glauben das sy zů glauben nicht kostet als ir dann der man getreulich geraten vnd ir gesaget het.

Wie Bondello betrüget Ciecco mit einem essenn des er sich
5 züchtiglichen an im richet im sein haut vol schlagen thut.

Gemeiniglich iglich person von der wirdigen gesellschaft sprache was Talano gedeucht het kein traume sunder ein gesichte gewesen waz, dann ganz wie er gesehen hette sich erginge; vnd do yederman geswygen was die künigin frawen Lauretta zů sagen gepote, die also
10 sprach; Meine lieben frawen waz auf disen heütigen tage ist geret worden, Auch mir vrsach geyte von dem herten gächlingen czorenn auch zů sagenn [333^a] vnd sich enpfangner widerdrieß zů rechnen als dann gester von Pampinea dez studenten halben beweist warde, Doch nicht so herte als des studenten gewesen ist mein meinung ist euch zů sagen;
15 Darumb ich ich spriche wie in vnser statt einer wonet von yederman genant Ciecco, derselbig als ein grosser füller vnd fressig man was als er ye mer gesehen warde, vmb des willen er von im selbes der grossenn füllerey halben im sein leben nicht wol auf gehalten mocht Nach dem sein fauler fressiger wille gewölt hette, vnd doch in vil andern dingenn
20 genug züchtig vnd togethafftig was, sunder mit edelen guten sprüchen meister was vnd vmb des grossen gesleckers willen er sich ganz zů den hoffleuten vnd mechtigen, der gewonheit ist wol zů essenn vnd paß ze trincken sich machet vnd zů in gabe sein geslecker nach seinem willenn zů haben er würde geladen oder nicht geladen sich als die klette
25 an hinge, Auch ein ander genant Geonello des selbenn hantwercke waz aller füllerey nach lieffe; In dem er Ciecco geleich sein freude hette, der selbig an einem morgen eins tages in der fastenn an den [333^b] fischmarcke fische ze kauffen gangen waz, do er czwu groß lampreden für einen ritter genant her Vicri Reyfer kauffet das Ciecco gesehen hette
30 sich zů dem Geonello füget zů im sprach Geonello waz wil daz bedeten; Dem Geonello antwort vnd sprach mir wurden nechten drey vil grösser vnd schöner geschencket, do mitt ein störe hern Cursu Donati der etlichen hern do von ein essen geben wille, In des störe zů wenig daucht der mich here gesant hat zů dem störe zwu lamprede ze kauffen,
35 komest du nicht auch dazů es ist für sechlich ich kome sprach Ciecco, mit dem iglicher seinenn wege ginge, vnd do Ciecco daz male zů essen

zeit daucht sich zů hern Cursu heym füget den er mit etlichen seinen nachpern die noch nicht essen gangen waren vnder der tür sten fande, Der Ciecco fraget waz was er so spat do suchen ginge, Er dem hern antwort vnd sprach; herre ich kom mit euch vnd eüer geselschafft das 5 male zů essen, dez piß mir got wilkomen sprach der herr vnd seytmal es zeit ist so gee wir essen, Sich zů tische secztenn vnd von erste ein salat darnach daz menestern von kichern darzů ein wenig saczen tun-[333^c]nen, nach dem etliche kleine pachfischlein, vnd do das Ciecco sache das klein lampreden vorhanden was palde vernam das im Geonello daz ze leyde vnd hasse gethon hett, Sich in im selbes betrüben 10 warde, vnd in grossen czorn wider Geonello fiele vnd sich des an im meinete ze rechnen, Nach dem nicht vil tage vergingenn er im an der gassenn begegnet, vnd Geonello diser sache etlichen vil manchen het lachenn machen; Ciecco grüsset vnd lachent zů im sprach wo die lampreden hinbekomen wern die er mit hern Cursu essen meinete, Dem 15 Ciecco antwort vnd sprach Geonello ee acht tage gancz vergangen sein du solt mer dann ich do von zů sagenn wissen. Nach dem nit lange verginge er bedacht het wie er sich des empfangen widerdrieß an Geonello wölt rechnen vnd zů einem pösenn pūben ging mit dem er eins 20 warde seinen lone ze geben Dem er ein grosse flaschen gabe vnd nit ferre von dan an daz ende füret do ein ritter saß mit namen genant her Philipp Argent, das der czörnigest man was aller welt, Dem er dem puben weyset vnd zů erkennen gabe vnnd zů im sprach, Nun ge hin zů dem ritter mit [333^d] diser flaschen in der hant vnd sprich zů im, 25 Herrē mich schicket zů euch Geonello vnd pit euch das ir im dises fleischlein mit eüerm gūten süssen roten wein berötet, dann er will ein klein freude mit etlichen seinen göczen haben, vnd so du die potschafft geworben hast sich eben auff das er dich nicht begreyffe dann er leget dich vngelücke an, vnnd du mir alle meine sache entwichtest Nun gee 30 palde vnd thue als du vernomen hast nach dem kome zů mir so will ich dich schöne bezalen, der pube palde mit der flaschen zů dem ritter der mit andern hern an der frische sasse lieffe, vnd im sein potschafft warbe. Do der ritter des puben wort vernam, als der auch nit übriges salczes het vnd meinete Genello daz im ze schande vnd zů gespötte thet aller in 35 czorn bekert vnd sprach was falchen rōten vnd göczen proten das dich Genello gott schende palde auf sprang sein arme nach dem pubed strecket, aber er als der vorgewarnet was palde von dan floche durch andre gassen wider zů Ciecco kam, Der alle ding wol gesechen hette im saget

- was her Philipp im het zû antwort geben, dez Ciecco sere content vnd wol zemute waz, dem puben [334^a] seinen lone geb gen liesse vnd er nicht nach liesse also lange das er Geonello fande Zû dem er sprach pist du icht neulich pey hern Philippo gewesen, neyn ich sprach Geonello;
- 5 Do sprach Ciecco so sage ich dir das er dich suchen tut ich weysse aber nicht warumb Geonello sprach daz sey im namen gotz Ich pin iczund auf dem wege zû im ze gen vnd fragen wes er begere, vnd von Ciecco weg zû herren Philippo ging, Dem Ciecco von ferren nach volget zû sechen wie er von dem ritter empfangen würde, Der ritter der sich an
- 10 dem puben mit der flaschen nicht het gerechen mügen, der on masse noch in allem czorn waz vnd fürwar gelaubet Geonello im das zû gespötte getun hette, vnd do im Geonello in sölchem czorn für kam im entgegenn kam einen grossenn maustreich gabe, Des Geonello sere erschracke anhub vnd sprach! awe mir herr wie hab ich das verschult.
- 15 Der ritter vngeantwort in pey dem halse nam zû der erden warff mit füssen stiesse vnd sein haut gar wol durchschlug, Zû im sprach du gotz dieb vnd verräter du solt sechen was falschenn verräter du mir zû schickest, bedüncke ich dich ein kint sein [334^b] mein zû spotten vnd stäcz mit feüsten in in geslagenn kein hare im auf dem haubt liesse
- 20 das in mit treüen meint. In dem kote hin vnd here zoche alles sein gewant von im reysse! im nicht so vil weyl ließ das er der vrsache hette fragen mügen warumb er im das thete; Er höret in wol von flaschen verräter sagen aber er verstunde nicht wie er das meinete; Doch do den ritter daucht er im ein genüge gethon het vnd auch vil
- 25 erber leüte darzû geloffen waren im Geonello auß den henden zû nemen als sy dann theten, vnd im sagten warumb im her Philippo das gethon het In mit worten strafften vnd sprachen er vnrecht gethon het; im sölche wort zû enpieten, dan er solt in nudalest wol kennen, was nature er were dann er wer nicht ein der sein spotten liesse, der arm Geonello
- 30 weinen sein leyt klagt vnd sprach es sol sich mit der warheit nicht erfinden das er vmb keinerley zû im geschicket hette; Noch im nicht enpoten, Vnd do er sich ein wenig wider in sein gewentlein gerüst hett traurig vnnd vngemute zû hauß ginge, wol gedacht daz alles Ciecco wercke vnd auch die ordnung solte gewesen sein [334^c] Doch nach
- 35 etlichem vergangen tage wider zû im selbes kam vnd auß ginge, vnd eines tages Ciecco begegnet der in lachent fraget vnd sprach Gionello wie düncket dich vmb hern Philippo guten roten süssen wein, Geonello sprach also hetten dich gedeucht hern Cursu lampreden, Cietto sprach

Geonello es ste nudalest zû dir thue was dir eben vnd dein gefallen ist
geystu mir ein gut male zû essen als du mir eins geben hast so sol ich
dir als wol vnnd pas zû trincken geben als du von herren Philippo ge-
habt hast Geonello wol erkante das er an Ciecco weder in ernste noch
5 in schimpffe nicht geben mocht dann übel; Darumb im got vmb seinen
fride pat sich hinfür hütet sein nicht mer zû spotten.

Wie czwen iunge gesellenn an Salamone rate begern; der
erste begeret wie er müge liebe gehabt sein, Der ander wie er sein
widerwertickeit weybe straffen sülle, Dem ersten er zû antwort
10 geyt das er liebe habe, Dem andern das er an die gens prucken gee.

[334^d] Nyemant anders dan alleine die künigin Vnd Dione der
alweg durch statut der letzte zû sagen was, Die nach dem do die frawen
in Geonello vngelücke genug gelacht hetten anhuben vnd sprack Ir züch-
tigen vnd mein lieben frawen wölle wir vns recht ansehen vnd die
15 guten ordnung aller ding bedenckenn so müge wir sehen vnd erkennen
wie gemeinlichenn die menge der frawen von natur vnd güter ge-
wonheit, auch alle recht geben das wir den mannen süllen vntertenig
vnd gehorsam sein, vnd vns nach iren synnen regiren; weliche anders
mit in in fride vnd freude leben wöllen, Die süllen stäte züchtig die-
20 mütig gehorsam geduldig vnd mitleydig sein, Ein solche frawe ist ge-
heysen ein schacz ires mannes vnd wo solche tugent durch recht vnd
güter gewonheyt nicht beweist würde die dann alle kraft haben so ist
es vns genuge durch die nature beweist worden, die vns vnser cörper
vnd leibe also schöne begabt hat, vnser gemüt geringe geschemig vnd
25 forchtsam; damit leylich stercke wol redende styme vns vnser leybe
nach aller grosser nottorfft der gelider gecziert hat [335^a] Doch darumb
on hilff vnd rate der mann wir zû nicht sein. Wer nun solicher hilffe
notturftig ist so will ein yeglich recht daz die selbig person seinem helffer
regierer vnd gubernirer gehorsam sey sich gen im in zucht beweisen.
30 hab wir nun nyemand anders dann alleyn die mann zû regierer, dar-
umb wol billich ist sy zeeren vnd in allen sachen gehorsam vnnd vnder-
tänig sein, vnnd weliche von solchem abstet vnd das nicht tût, ich sy
yegklicher grossen schwären pein vnd büß wirdig vrteyle. nach dem
oben von Pampinea von eyner widerwärtigen frawen ist beweist wor-
35 den, die auch mich darzû bringt euch von eyner zesagen der got in irer
widerwärtigkeyt besunder straff zû sant, des ir ir man auch im on eyns

andern rate nicht gehelffen kund, darumb als ich yetzund gesprochen hab. ein solich weib aller straff wirdig ist, darinne weder zucht liebe noch freundschaft ist. nun mercket wie Salomon zweyen iungen riete vnd rat gab das solicher kranckheyt eyn besondere ercznei was, aber ich

5 sag nicht von den die solicher erczney nicht notturtig sein, noch vmb iren willen das red wiewol vnder den mannen [335^b] eyn soliches sprichwort ist. daz gůte vnd auch das bös roß sporen bedürffen, also das gůt vnd bös weib den brűgel wűllen, wo ir das in kurzweile aufnemen wűlt vnd recht bedencken so weyße ich wol ir wert mein red

10 nicht schänden noch das ich sprich des neyn sprechen, dann die frawen gemeyncklichen von natur alle wanckel vnstāt vnd weyche sein mer dann die mann zum ũbel geneyget sein, darumb soliche sűnd vnnd ũbel bei den frawen czestraffen die in ũbel thűn sich czeferre verschiessen lassen man den brűgel brauchen műß vnnd den gűten der brűgel gehűret

15 das sy sich vor ũbel hűten vnd nicht als die bűsen verschiessen lassen, doch laß wir nun dolest ab von vnserm predigen vnd keren an das nach dem vnser meynung ist zesagen. Zű den zeiten do sich Salomon grosse weisűheyť in aller welt auß gebreyt het, vnd wie er der die sűlicher weisűheyť an in begerten der er eyn milter geber was vnd vnder andern die

20 in in irer notturt anrűften seines rates begerten. das waren zwen iung gesellen der eyn ein iung edel reich man genant Melisso von der stat Iacza do er außzoch vnd gen Iherusalem wercz reyť doch [335^c] vor gen Anthioca kam do sich ein ander iunger genant Ioseph czű im gesellet der auch in der meinung was Salomon czesűchen. Also beyd miteynander von Anthioca auß ritten keyner des andern geschefte weisť,

25 vnnd als der gern gewonheyt ist die czű zeiten ongefär mit eynander ũber land reitten eyner den andern fraget wo hine er reitt was sein geschafť sei, also auch die zwen iungen miteynander zű rede kamen yeglicher den andern fraget wo sein syn hin stűnd Vnnd do Melisso Ioseph sein

30 meynung het ze versten geben auch er Ioseph begunt zefragen der im antwort vnnd sprach. wie er zű Salomon ritt von im rat zenemen seins weibs halben das die vnrichtigest vnd das widerwärtigest weib wär aller welt die er weder durch bete liebe vnnd freundschaft in keynen weg von irer widerwärtigkeyt bringen noch ziehen műcht Nach dem Ioseph

35 Melisso bas der vrsach seines reyťten zű Salomon fraget, dem Melisso antwort. Ich bin von der statt Iacza vnd wie du in eyner vngenad betrűbet bist, also auch ich in eyner bin, daz ist die, ich bin iung vnd reich gib daz mein auß in wolleben in essen vnnd trincken mein [335^d] purger

ezeeren, Nun nymet mich fremd bei allem dem daz ich in freundschaft tû
das ich nyemand finde der mir wol wölle noch mich mit treuen meyne,
darumb ich reitte dohin du reittest rat vnnd hilff zebegeren wes ich
mich halten sölle domit ich liebgehabt sey. Also beyd iungen gen Ihe-
5 rusalem vnd durch Salomon diener eynen für Salomon kamen dem Me-
lisso mit wenig worten sein noturft zewissen thet wie er möcht lieb ge-
habt sein, dem Salomon kurz antwurt vnnd sprach. Hab lieb das
gesprochen zehand Melisso von im geweißt ward vnd Ioseph für in
kame der auch vmb des willen er dar komen was das Salomon czewissen
10 thet, dem Salomon keyn ander antwurt gab, dann gee an die gänß br-
ugen, daz geret Ioseph auch von im geweißt warde. do er Melisso fand
der sein wartet yeglicher dem andern waz er zeantwurt gehabt het sa-
get, vnnd nach langem bedencken in des künigs antwurt keyn frucht
nāmen mochten wider zeruck heymwercz ritten, vnnd nach ettlichem tag
15 zû einem grossen wasser kamen darüber gar eyn schöne brugg gieng,
vnd zû der stund do sy über die bruggen reitten [336^a] meynten sovil
geladner roß vnd metüler darüber gingen das sy darüber nicht komen
mochten, also lang bis die geladen metüler darüber komen waren, vnder
denselben metulern eyn sere scheuhend maul was, do das mitten auff
20 die bruggen kam in keinen weg weder hinder sich noch für sich geen
wolt, vmb des willen der maultreiber eyn gûten brüggell nam vnd das
maul auß allen seinen kreften mit demselben brügel vmb den grind
vmb den ruggen vmb die bein schlüge, aber alles nicht sein daucht
noch halff, des beyde iungen war namen dez maultreiber übel sprachen
25 das er daz maul also hartt schlüg, in fragten ob er es zetod schla-
gen wölt vnd das er es mit liebe versüchet fürpas czebringen. Der
maultreiber zû in sprach Lieben herren ir kennet eüere roß so kenn
ich meine meuler laßt nun mich mit dem maul tûn des natur ich
weiß. nach dem wider anhüb zeschlagen fester dann er ye gethan
30 hete das also lang thet bis das es hinüberging. Also der maultrei-
ber mit gûten trucken schlegen sein maul überwande, vnnd über die
bruggen treyb Nach dem die czwen iungen auch darüber ritten, auff der
[336^b] bruggen in eyn man der sein wonung darauf het begegnet. den
Ioseph fraget wie die bruggen hieß, dem der gut man antwurt vnd
35 sprach. es heyßt an der gänßbruggen, vnd alsbald Ioseph der bruggen
namen vernam Salomon wort bedencken ward als do er czû im sprache,
Gee an die gänßbruggen, czû Melisso seinem gesellen sprach. Melisso
güter freunde erste hab ich vnsers herren Salomon rat vnnd red ver-

nomen, do er mich an die gänßbruggen schickt sein rat möchte mir noch
 gûte vund nützper sein hast du war genomen des maultreibers mit dem
 maule auff der bruggen bey dem hab ich vernomen vnnd gelernet wes
 ich mich mit meinem weib halten muß vnnd nach etlichem vergangen
 5 tage gen Anthioca bekamen, do Joseph Melisso grosse ere etlichen tage
 beweiset, doch genüge schlechtlich von Ioseph weib empfangen warden.
 Ioseph czû ir sprach das sy ir ordnung gâb domit man Melisso ere thûn
 möcht, vnd das nach Melisso ordnung vnd gefallen, vnd do Melisso
 vernam das man nach seiner ordnung leben solt die frawen vnderricht
 10 was sy thûn solt, Die fraw die von böser natur [336^c] was nicht nach
 Melisso ordnung sunder nach irem bösen willen thet alle dinge wider
 syns thet. Do das Ioseph vernam czû ir sprach. fraw ward dir nicht
 heut gesagt was du vns auf disen abent zeessen bereyten soltest. Dem
 das weib üpigklich antwurt vnd sprach Was sagest du es wâr besser du
 15 ässest vnd liessest vns mit fride ward mir anders gesaget so daucht mich
 das gûte zethûn gefelt es dir so gefall. gefelt es dir dann nicht dein ver-
 heiter schad. Der frawen wort dem gast Melisso nicht von ir gefielen
 sere fremd dauchten, des Ioseph gar wol war genomen het zû ir sprach
 weib du bist noch in deinem alten wesen, gelaub mir du solt dich balde
 20 verkeren Nach dem sich gen Melisso keret, vnnd sprach, wir sollen bald
 sehen wie fruchtper mir Salomon rat sein wirdt, aber eyne bitt ich du
 lassest dich nicht verdriessen zesehen was spiles ich treiben würd vnd
 domit du mich nicht hinderest so bedenck Salomon rate vnnd des maul-
 treibers worte die er vns cze antwurt gab do wir in strafften. Zû dem
 25 Melisso sprache, Ich bin in deinem hauß eyn gast vnd sol von deinem
 willen nicht keren, darumb thû [336^d] nach deinem gefallen. Ioseph
 von dem tisch auffstünd eyne guten brügel zû seinen henden nam in
 die kamern gieng darein das weib von zoren geflohen was bei irem hare
 name czû der erden zohe mit gûten schlegeln vnnd streychen also zûbe-
 30 reytet es het eyn steyn erbarmet weder beyne noch adern ir an dem leib
 ganz ließ doch darumb nichte abe ließ, nun hertte in sy geschlagen.
 Die gût frawe iâmerlich schrey gott vnnd allen heyligen ir leid klaget an
 in durch got genad begeret, dann hinfür nymer mer von seinem willen
 czekeren, die er stâtes nun fester schlûg daz also lang treyb das er
 35 müde halben ablassen muß vnnd wider in den sale zû Melisso kam zû
 dem er sprach, bis morgen wir sehen werden was Salomon rate vnnd
 mich an die gänßbruggen ze schicken gewûcket hab, nach dem nicht
 lang vergieng vnd ir gefallen was miteynander zû pete gingen, das arm

weib mit grosser marter sich von der erden aufricht, vnd so sy best mocht auch zů pete ging, des morgens frü auffstünd iren man fraget was sy czemorgen essen bereyten solt, des er lachend mit Melisso eyens ward sy vnderrichten was sy thūn [337^a] solt beyd aufstünden außgingen, 5 vnnd do essenczeit was wider ze hauß kamen alle ding nach irer gegeben ordnung bereyt fundenn, daran beyde mann besunder gefallen heten künigs Salomon rate lobten, der des ersten von in vnuerstanden was, Nach dem nit lang vergieng Melisso von Ioseph daz vrlaub name zů hauß gen Iacza reytt vnd ettlichem seinem gūten freund vnd weisen 10 man saget was er von Salomon zeantwurt gehabt het die im czūsagten wie er im nit bessern rat het geben mügen, desselben sy im auch rieten, vnd zů im sprachen du weyst wol das du nyemand lieb hast vnnd was miltikeyt du pfligest dar zů keyn liebe sunder hochfart dich bringet, darumb hab lieb so bist du lieb gehalten, also das vnrichtig weib be- 15 keret vnnd der iunge edel man lieb gehabt ward.

Wie pfaff Gianni seinem gefattern Peter das weib zů eyner roß mutter machen wille des Peter wol zemūt ist, vnd do er kam ir den zagel anzeseczen Peter schrey vnnd sprach er des nicht leiden wölt, darumb alle ding verdarben.

[337^b] Der künigin gesagte histori vnd nette märe die iungenn 10 frawen eyn kleyne murmeln vnd die mann het lachen machen, nachdem Dioneo anhub vnnd sprach. Ir schönen frawen vnder der grosse mänge der weissen tauben der schwarcz rab ir schöne mer wachßen macht dann der weiß schwan thūt. Also auch vnder vil weisen personen zů zeyten 25 eyner mynder weiser ist, der ich mich vnder euch sprechen mag bin, derselbig nit alleyn der andern weisen weißheyte meret, sunder in grosse freud vnd solacz gibt, vnnd ich der eynes solichen mangel vnnd schaden enpfindt euer tugent vnd weißheyte erleichte vnnd die euch mere, daran ir besunder gefallen haben solt. Nun ich der euch wer ich bin durch mein 30 red beweiset hab, vmb des willenn meine wort von euch mit mer gedulte sollen aufgenommen sein. dann wäre ich weiser czesagen gewesen, sunder von der materi zesagen die ich in willen hab euch zesagen, mein syn vnnd meynung ist euch durch ein kurcze vnnd nicht lange histori zebeweisen will wie man mit besunderm vleiß halten sol der ding halben die 35 durch gewalt [337^c] vnnd krafft der wort als mit beschweren geschehen sollen, vnd wie eyn solches also gar durch eyn kleyn ding gehindert vnd

verderbt wirt. nach dem eynem gûten pfaffen genant domine Iohannes
 des vergangen iares czû Berletta zûstünd der do nicht gar eyn reicher
 pfarrer was, vnd sein leben auff zehalten mit eyner seiner roß mütter
 auf die wuchenmarckt von eynem dorffe zû dem andern für etliche kleyne
 5 ding zekauffen vnd ze verkauffenn in solichem seinem hin vnnd her faren
 er grosse kuntschaft name eynes schlechten armen mans genant Peter
 von allen heyligen, der als der domine Iohannes auch mit eynem seinen
 eselein auf vnnd ab fûre sein narung ze sûchen, ir freundschaft beydent-
 halben also groß warde das sy eynander geuatter hiessen vnnd als oft
 10 der gûte man gen Barletta kam der pfaff in zû hauß in sein kirchen
 fûret, vnd wie er mocht in eret. Nun was geuatter Peter gar eyn arm
 man vnnd het nicht anders dann eyn kleyn heußlein czû allen heyligen
 do er vnnd sein esell vnnd sein weib mit marter ine wonen mochten,
 doch als oft pfaff Gianni czû allen heiligen kam er in auch [337^a] zû
 15 hauß fûret vnd nach seinem vermügen eret vnd herberge gab als er im
 dann zû Berletta thet; aber czeschlafen compar Peter nicht mer dann
 eyn pet het darinn er mit seinem weib die do iung vnnd schön was
 schlief, darumb er den pfaffen übel eren mocht nach dem er gewölt het.
 Nun het er neben der kamern eyn kleyn ställein darinn der esell stünd
 20 do er auf eyn wenig stroe dem pfaffen ein dürres petlein machet. nun
 het das weib von dem mann wol vernomen wie der pfaff in zû Berletta
 geeret het, vmb des willen gern auß dem hauß gangen wäre mit eyner
 iren nachpaurin genant Charapresa schlafen domit der domine bei dem
 mann het schlafen mûgen, aber der pfaff das ir nye verhängen wolt, vnd
 25 vnder etlichen malen eyns mals zû ir sprach. Geuatterin nicht bekümer
 dich meines schlafen ich stee wol hie, du solt wissen wenn ich will so
 mach ich dise meine roß mûter zû eyner schönen iungen frawen vnd
 schlafe bei ir, darnach wenn ich dann will so mach ich sy wider zû der
 roß mütter, darumb ich in keinen weg von ir schlieffe Die iung fraw
 30 sich des pfaffen wort fremd nam das bald dem mann saget vnd sprach.
 [338^a] ist er nun dein als groß freund als du sprichest warumb heyssest du
 dich dise kunst nicht leren domit du mich wenn du wöltest czû eyner
 roß mütter machtest so möchtest du mit mir vnd vnserm esell zwifach
 wol thûn, vnd wenn wir dann wider von marckt zû hauß komen wärenn
 35 so möchtest du mich wider machenn als ich bin. Der gût compar ge-
 uatter götz Peter der nit gar sere eyn subtile man was dem weib ge-
 laubet vnnd miteynander der sach eyns warden den pfaffen batten das
 er geuatter Peter sein kunst leret, der pfaff allen vleiß thet den geuatter

ab solichem glauben zenämen aber vmb keynen was er wolt ye die
 kunste habenn. Do der pfarrer vernam das es nicht anders gesein
 mochte czü im sprach. Nun wolan im namen gottes seitmal ir dann das
 ye wölt gehabt haben so bin ich bereyt czethün was euch lieb ist, mor-
 5 gen frü wenn wir auffsteen so will ich euch weisen vnd leren wie man
 tüt, aber euch die warheytt zesagen was in diser sacht am schwäresten
 zetün ist das ist den zagell anzesetzen nach dem du wol sehen wirst, den
 gütten Peter mit samt dem weib dieselben nacht hundert iare daucht von
 [338^b] grossen freuden nicht geschlafen mochten, vnnnd do nun der tag
 10 komet was auffstünden dem pfarrer rüften der vnangeleget in dem hemd
 auff stünd zü in in die kamern kame vnnnd sprach. Nun weyß ich auf
 erden nyemandt dem ich das tüt dann euch alleyn geuätterin meinem ge-
 uatthern zeliß, aber ir wert ye tün als ich euch sag vnd mir in allem daz
 ich euch thū gehorsam sein wölt ir anders das vns gerate des ir begeret.
 15 Die czwü person beyd ia sprachen zetün was er sy hieß, nach dem pfaff
 Gianni eyn liecht compar Peter in sein hand gab zü im sprach. nun
 merck gar eben wie ich thū vnnnd was ich sprich, vnd hüt dich als lieb
 du hast des du begerest ob sacht wäre das du was sähest oder hörestest das
 du keyn wort sprechest, sunder alleyn stäts got bitt das der zagel wol
 20 angehenget werd das an dem besorglichsten zetün ist. Der güt geuatter
 Peter das liechte czü handen nam vnnnd sprach, er wölt den sachen
 recht thün, nach dem der pfaff die geuätterin schüff nackend außziehen
 vnnnd nyder an die erden auf alle viere stellet in maße als die roß müt-
 teren steen, die er auch vnderriichte was sy sähe [338^c] oder was ir von
 25 im geschähe oder gethan würd das sy beileib nicht spräch, nach dem
 anhöb czebegreifen von erste ir haubt vnnnd angesicht vnnnd sprach,
 darauß werd eyn schönes roßhaubte, darnach das hare in sein hend
 nam vnnnd sprach. darauß werden schöne roßhare, nach dem zü iren
 armen sprach. darauß sollen schöne roßbeyn werden, darnach an ire
 30 schöne brüstlein kame die er hert vnd steif fand, die bei im erweckten
 der do nicht gerüffet was, vnd in desselben auffsten er sprach, darauß
 werde eyn schöne roßmutter brust, also an dem bauche an den beynen
 an allem end des leibs thet, vnd do er kam der frawen den zagel anze-
 hencken er ir das hemde über den hindern aufhüb, vnd den nagel domit
 35 man die menschen pfanczet name, vnnnd darzū er gemacht was darein
 stieß vnd sprach. das werd eyn schöner roßzagel. Do das geuatter
 Petter ersahe der bis auff dise stund stille geschwigen vnd alle ding ge-
 litten hete anhöb czechreyen das er sahe in nicht schympffe daucht vnd

sprach compar pfarrer ich will keyn zagel haben. nun was nun dolest der safft vnd feuchtikeyt douon die pflanczen wurczeln [338^d] komen, vnd der pfaff sich czurucke zohe zû Peter sprach. Awe mir geuater was hast du getan befalhe ich dir nicht du soltest stille schweigen was du
 5 sähest, die roß mütter wâr yeczund gancz bereyt gewesen hetest du stille geschwigen die du redend entwicht hast vnd keyn wege nichte mer ist die ymer wider czemachen, dem geuatter Peter antwurt vnd sprach. Ir saget nun eüern syn ich sprich das ich des czagels nicht haben will, darumb saget ir mir das nicht vor daz ich in gen ließ, aber ye nach
 10 meinem beduncken so hienget ir in zenyder das sahe ich gar wol Do sprach herr Gianni das laß dich nicht fremd duncken ob es czû dem ersten male nicht als wol gerat. Do das iung weib beyder rede vnnnd wort vernam von der erden auf stünde, vnnnd in gûter meynunge czû dem mann sprach. Ey du torheter mensch wie hast du vns vnser eygen
 15 geschäft also bösllich entwichte wo hast du ye mer roßmüttern on czagel gesehen, wârllich vnd als mir got helff du bist arm aber es wære eyn almûsen das du noch ärmer wärest. Do nun keyn syn mer was das weib zû eyner roßmütter zemachen vrsach compare Peter wort des [339^a] die frawe mer dann yemand betrübet was ire gewândlein wider anleget vnd
 20 geuatter Peter on eyn roßmüter als er vor getan het alleyn mit dem esell gen holcz vnd gen marckt für an den pfaffen hinfür soliches dinges mit mer begeret.

Ob die edeln frawen compare Peter vnd seines weibs lachten das bei euch selbs bedencket. In dem die sunn sich gen dem nydergang
 25 nâchnet vnnnd der künigin regimente sich geendet het von dem siczen auffstünde das krânczlein ab irem haubt nam vnd das dem iungen Pamphilo auff sein haubt seczet zû im sprach Gott dir genad verleihe das künigreich czeregieren als er mir vnd die vor mir gewesen sein gethan hate. Pamphilo soliche ere mit freuden seines herczen enpfieng vnd sprach. Fraw
 30 die eüer vnd der andern meiner vntertan tugent mir gehilfflich sein wirt, vnd das in maß als ich hoff mir nichte anders dann ere zûsteen sol, mein allerliebsten frawen mich gût deucht etier yegliche sich gar eben bedächte, dann mein meynung ist bis morgen von den personen zesagen der frey vnnnd herrlich gemüt in der liebe oder andern herrlichen [339^b] sachen
 35 redlich gewürckt hat von solcher wirdigen materi czesagen mir czweifelt nicht vnser gemüte douon besunder freud haben werden, vnd vnser leben in diser welt das do kurz ist in vnserm tötlichen leib vns eyn kleyn lob bringen wirt, das der wirdigen gesellschaft gefallen was, nach

dem mit seinem vrlaub auff stunden yederman nach seinem gefallen thet, vnd do hin yegkliches von seiner begire gezogen was gieng, also lang bis die zeit zeessen bereyt was in dem sy mit allem vleiß gedienet waren, nach dem als ir gewonheytt was zetanczen singen vnd frölich zesein, vnd als des künigs gefallen was Neyphile gepot zesingen, der gesange von in sere gelobedt ward, nachdem er aber yederman czeschlafen geen das vrlaub gab.

[339^e] Hie hat die neünt tagreyß ein end

HEBT SICH AN DIE ZEHENT

vnder dem gewalte vnnnd regiment des künigs Pamphilo do die wirt-
dig gesellschafte sagen wirt von den personen die mit redlichem
freyem müte etliche grosse werck der liebe oder anders verbracht
5 haben.

Die röte der gewülcken domit der sunnen schein vns den neuen tag
bracht haben. In dem der künige von dem schlaf erstanden was seiner
gesellschaft schüff rüffen, Do sy nun alle auffgestanden vnd bereyt waren
mit sampt dem künig spaczieren zegeen eyns warden, der sich auf den
10 wege machet vnd sy im mit senften tritten nachfolgeten vnnnd er besun-
der von Philomena vnnnd Fiametta beleytet was mit den er von der ver-
lauffen zeit sein gespräch het, In dem die sunn in die höhe gestigen vnd
die hiez angangen was, sich wider zů hauß [339^d] fügten vmb den külen
brunnen sich radescheib seczten, do sy die cristallen gleser zetrincken
15 vnnnd collacion von edelm Malfasyer bereyt funden vnd wem liebet der
trincken mocht, nach dem-bis gar auf essenczeite in den schönen giardin
spaczieren giengen, darnach das herlich mal enpfingen. Nach dem aber
nach irem gefallen rüen giengen. Do nun none zeit vergangen vnd der
vndern komen was sich aber an ir gewonlich end fügten neue histori
20 zesagen. Do der künig sein erstes gepot zesagen frawen Neyphile thet
die frölich anhüb vnd also sprach.

[340^a] Wie eyn ritter dem künige von Hispania dienet, der sich
beduncken ließ wie er seines wol dienens nit gelonet noch des wider
keret wäre, dem der künig durch warheyt beweiset wie das nicht
25 sein schulde, sunder des bösen gelückes gewesen seye, nach dem
in herlich vnd er wirdig was begabet.

Ich schäcz mir das in besunder ere vnd genade mein aller liebsten
frawen, nach dem mir vnser künig auf den heutigen tag gepoten hat
als von der mächtigenn grossen milten herrlicheyt der liebe zesagen die
30 wir wol sprechenn mügen geleich sey der sunnen vnd schöne des hy-

mels, eyn liechte aller tugent, darumb mein syn ist euch eyn kleyne
 vnnnd genüg züchtige histori nach meinem geduncken ze sagen, die euch
 fürwar nicht anders dann nucz vnd frummen bringen sol. Ir solt wissen
 wie vnder anderen redlichen rittern die von lange zeit her in vnser stat
 5 gewonet haben. eyner was der vileichte von mer synnen vnd weißtumb
 was dann die andern, vnd [340^b] was mit namen genant herr Rugiere
 czemal reich vnd von hohem edeln gemüte, sein selbes tugent angesehen
 vnd seines landes sytten darinne er wonet, do er weder synn noch weiß-
 tumb gebrauchen mocht vmb des willen im fürname für etliche zeit zü
 10 künig Alfonso von Hispania czeziehen dem zedienen, des lob zü der
 zeit über alle andere künige was Nach solichem fürnāmen nit lang ver-
 ging sich mit roß vnd harnasch genüg wol in orden auf den weg machet
 zü dem künig reyten von dem er erlich empfangen vnd aufgenommen ward,
 do er lang zeit mit grossen eren vnnnd leuchtedem leben sein wesen
 15 füret, in streitten vnnnd kriegien grosse redlicheyt begieng. Do nun der
 edel ritter lang zeit also an des künigs hof gestanden was, vnnnd der
 der künig täglich seine ritter begabet heut eynen morgen den andern
 eynen mit steten den andern mit schlössern. vnd auch zü zeiten die be-
 gabet die solicher gab nicht wirdig waren, vnd sein weder in wol noch
 20 übel nye gedacht ward. der sich solicher vnd grösser gab wirdig schätzet
 vnd er meynet wol verdienet hete, vmb des willen sich ein klein betrübt
 [340^c] vnd gedacht sein ere vnd lob sich mynderet vnd nicht meret
 stünd er lenger an des künigs hof, darumb im fürnam nicht lenger cze-
 steen, das vrlaub an den künig begeret daz im williglichen verlihen
 25 ward vnd darczū den besten maul zereitten den der künig in seinem
 stall het im gegeben vnd geschäncket warde, der dem ritter vmb der
 langen reyße willen die er tūn meynet on maß lieb was. Do nun der
 riter zereiten aller ding wege fertig was, der künig eynem seinen ge-
 treuen diener zü im ruffet mit dem er schüff vnd gepot das er synn
 30 funde mit herr Rugiere etlich tagreyß ze reitten, doch sich nicht mer-
 ken ließ das er von des küniges geschäfte wegen mit im ritt, vnd das
 er gar eben mercket vnd war nāme was der ritter vnder wegen von im
 saget vnd redet, domit wenn er wider vmb zü im kām im eyn solichs
 zesagen weißt. nit lang vergienge der ritter czū der stat außreytt des
 35 künigs knecht im nach eilet vnd sich czū im gesellet vnnnd cze versten
 gab wie er auch gen Italia werce reitten wölt. also von mancherley
 miteynander ir gespräch heten, in dem die zeit [340^d] zeessen komen
 was, der ritter der den maul reytt der im von dem künig was gegeben

worden zů seinen gesellen sprach. Mich deucht gůt wir liessen die roß stallenn vnnd in eyn wierzhauß ritten die roß stallen liessen, vnnd alle roß stalleten außgenommen der maul der im von dem künige was gegeben worden, nach dem weiter ritten vnd des küniges diener stätz bei
5 dem ritter reytt ob er icht vermerckenn möcht nach dem im was von dem künig befolhen worden. In solichem irem reitten czů einem wasser komen do sy ire roß trenckten, vnd der maul den der ritter reydt der in dem stalle nicht gestallet het in dem wasser stallet. Do das der riter sahe anhub vnnd sprach. Ey das dich gott schände bestia die du bist
10 dem gleich der mir dich geben hat, dise wort des künigs diener zů im name wie wol der ritter vil von dem künig geredet het, doch alles in des küniges ere vnd lob waren, vnnd an dem andern tage do er gen Tuschana werce reiten meynet im von dem künig eyn gepote kame widervmb zů im zereiten daz der ritter bald thet, wider zů dem künig
15 kam vnd von im [341^a] frölich empfangen ward. Nun solt ir wissenn do der ritter in dem wasser das maul czů dem künig vnd den kung zů dem maul geleichet het, des küniges diener dem künige e der ritter czů im kame alles was der ritter geret het im das zewissen gethan het, vnd do der ritter für in kam zů im sprach warumb er in zů eynem tier vnnd
20 maul geleichet het, der ritter mit auffgerichtetem anplick zů im sprach. Gnädiger herr warumb ich das tet das mercket. ir gebet do nicht hinzegeben ist vnd dohin zegeben gepürt ir nicht hin gebet. also thet auch der maul den ir mir gabet an dem ende do er stallen solt nicht stallet, vnnd do er trincken vnd nicht stallen solt do stallet er. Der künige im
25 antwurt vnd sprach. Herr Rugiere edler ritter das ich euch nicht begabet hab als ir wirdig gewesen wäret vnd als ich vil manchenn gethan hab die gen euch czegeleichen kinder gewesen sein daz ist nit darumb geschehen das ich euch nicht für eynen redlichen man gehalten hab, vnd der eyner yegklichen grossen gab nicht wirdig sey. Aber das euer
30 gelücke nichte gewesen ist bis auf dise stund icht von mir zehaben, darumb demselbenn [341^b] eüerm vngelück soliche sünd vnnd schuld züziehen müget vnd nicht mir, vnd das eyn solichs war sey ich euch offenbarliche das beweisen wille. Der ritter dem künige antwurt vnd sprach. Genädiger künige ich betrübe mich des nicht das ich von euch nichte
35 begabet bin, dann ich begeret nye reicher zesein dann ich bin vnd das ich euch nicht in etlichen sachen meiner tugendt mer geczeucknuß geben hab. das ist mir leydt, doch wie dem sey ich euch on alles beweisen vnnd des mir ander gezeucknuß geben ich euch gelaube vnd alle zeit

bereyt bin in etterm dienst. Nach disen worten der künig in bei der hand nam in sein kamern füret darinne er vor was er dem ritter geben wölt sein ordnung geben het, darein er czwen versperret kasten het tragen schaffen, vnd gegenwürtig yederman zů dem ritter sprach. Her
 5 Rugiere in einem disen kasten ist mein künigklich kron der zepter vnd der apfel do bei vil ander schöner kleynet, vnd in dem anderen kasten ist nicht anders dann erden, nun nāmet welichen ir wölt welichen ir nāmt der ist eüer mit dem schacze der darinne ist, do bey solt ir sehen vnnd erkennen, [341^c] wer wider etter redlicheyt ich oder eüer gelück
 10 gewesen ist Do der ritter den künig also wol redend vnd milt sahe der kasten eyenen nam den der künig bald schüff aufsperrren in dem man nicht anders daun erden fande. Der künig lachend zů dem ritter sprach. Nāmet war herre Rugiere ob ich euch die warheyt gesagt hab das die schulde euch czebegaben nicht mein, sunder eüers bösen gelückes ge-
 15 wesen ist. Aber fürwar etter weißheyte würdig ist das ich die begabe, vnd wider das vngelück in fride secze, ich weyß das euer will nicht ist eyn Spagnole ze sein domit ich euch mit schlössern oder stetten het begaben mügen; darumb ist mein meynunge euch den kasten czegeben den euch euer gelücke nit vergünnet sunder genomen hat, demselben
 20 euern vngelücke czeleyd ich will das der kast mit dem schacz euer sey vnd den mit euch als er stet in euer land vnnd gegent Tuschana füret, vnd mit meiner milten geczeugnuß vnnd gab eüer tugent erlichen mit eüern freunden gloriren müg. Der ritter frölich vnd wol zemüt die grossen gab nam dem künig den danck saget des soliche gab würdig was
 25 von neuem [341^d] von dem künige das vrlaub nam frölich von dann heyme in Tuschana reytt.

Wie Chino von Tacco den abt von Klingen eyner kranckheyt die er an dem magen het gesunt machet, darnach gen Rome komet vnd der abt in widerkerung des mit dem pabst so vil tůt das er in
 30 zů sant Iohanns ritter vnd spittelmeyster zů Rodi machet.

Des künigs Alfonso von Hispangna herrlich miltikeyte in den Tuschanner ritter gewürcket von der würdigen gesellschaft sere gelobet was besunder von irem künig der sich zehand gen der iungen frawen Elisa keret ir gepot fürpas zesagen, die balde anhůb vnd sprach. Ir czüch-
 35 tigen schönen frawen das eyn künig milt sey gegen dem der im getreulich gedienet hat, das gröslich zeloben ist, aber was grossen wunders

muß ich euch sagen von eynem clerico vnd geistlichen die alle von natur e
geitig [342^a] dann milt sein, was grosser herrlichen miltikeyt er eynem
beweiset wär er sei tod veind gewesen im wäre darumb nit übels geret
worden, vnd was der künige mit dem ritter in miltikeyt begieng on
5 zweifel grosse tugent was, aber was der clerico vnd geystlich man in
miltikeyt tet das eyn groß wunderczeychen ist, dann sy alle der tugent
der miltikeyt groß veind sein, vnd wie wol eyn yegliche person en-
pfangner widerdrieff sich der begeret zerechen, vnnd die geystlichen als
wir stäts sehen paciencia vnd gedult der empfangner widerdrieff predigen
10 die ze vergeben vnnd das loben, vnd sy selbs mit mer inbrünstiger
begire dann ander personen in solich sünde fallenn nach dem ir in eyner
meiner nachfolgenden histori vernämen wert. Es was in Tuschaner
gegent eyner genant Chino von Tacco ein freydig man seines leibes, der-
selbig vmb übel thûn vnd raußerey willen von der stat Sene auß getri-
15 ben ward, die zû der zeit des grafen von santa Fiore abgesaget veinde
waren, bei dem Chino den Senesern zeleyde sein auffhaltung het, vnnd
wer in der gegent auff vnd ab gieng oder reyt den er beraubet. Nun
waz [342^b] zû der zeit pabst Bonifacio der acht, czû dem geritten kam
der reich abt von Klingen der für den reychesten prelaten aller welt ge-
20 halten was, den eyn kranckheit in dem magen angestossen was dem sein
ärcht rieten in der Seneser wildbad czereitten das im on czweifel seinen
gesund wider brächt, daz vrlaub von dem pabst nam. vnd on alle sorg
weder Chino von Tacco noch yemande anders mit herlicher gesellschaft
sich auf den wege machet, daz Chino von Tacco zewissen kam wie der
25 reich abte käme, der bald seine necze vnnd lacz geicht in maß im wäre
nit eyn rägäcz entgangen den abt mit aller seiner gesellschaft in eyner
enge versperret, do er daz gethan het eynen seinen wolrededen diener
zû dem abt schicket, der im von Chino wegen freüntlich saget, das im
lieb wäre mit Chino in das castell zereitten. Do das der abt vernam
30 aller in zoren enczündet zû dem diener sprach, des wölt er gar nicht
thûn, als der do mit Chino nicht zeschaffen het er wölt seinen weg rei-
ten vnd sehen wer im das wern wölt Chino potschaft züchtiklich zû im
sprach. Herr ir seit an solichs end komen do man niemand dann gots
gewalt allein fürcht [342^c] vnnd do alle bann oder scommunicacion in
35 dem bann sein darumb bitt ich euch vmb des besten vnnd etern willen,
ir wert des Chino czelieb vnnd des sein gefallen thûte, wärlich es sol
euch nicht gereuen vnnd die weile Chino diener mit dem abte redet,
das end do der abte was alles mit söldnern vmbgeben was, dobey der

abt sahe vnd mercket das er mit allen den seinen gefangen was, wider Chino potschafte sere zornig was, den weg mit im gen dem castel wercz nam vnd in Chino palast mit aller seiner geselschafte absaß vnd als Chino gefallen was, den abt alleyn in eyn genüg finster kamern legen schüffe vnnd sein geselschafft in dem castell hin vnd her herberg geben schüff roß vnd harnasch czü seinen henden name das gar wol bewaren thet das gethan er zü dem abte gieng zü im sprach herr. Chino des gast ir seyt laßt euch bitten vnnd fragen wo doch ewer meynung hin czereitten sey das ir im das czewissen thût vnnd was die vrsach eüers reittens zü der zeit in dem iar sey das von euch begert zewissen. Der abte als eyn weis man thete seinen hohen übermüt nyder leget vnd wo er hin ritte im [342^d] saget vnnd zewissen thet. Do das Chino vernam daz er vmb gesuntheit willen des magen in das wilbad reitten meynet, im gedacht ön baden gesund zemachen eyn groß feur im in der kamern machen schüffe darbey gar wol behüten thet. vnd bis auf den andern morgen nit mer zü im kame vnd do er an dem andern morgen wider vnerkannt czü im kam im czwü schniten geröstes brot vnd eyn groß glas mit Vernacza wein von Cornilia bracht, den der abt mit im in das bad füren meynet czü dem abte sprach. Herr do Chino eyn iunge man was er in erczneye studiret, der spricht keyn erczney dem magen besser sey dann die er euch thûn wille, vnd dise ding die ich euch von seinen wegen bring, die sollen der anfang zü eüer gesuntheit sein, darumb nâmet hin esset vnnd trinckedt tröst euch vnd seit gûts mûtes. Der abt der grössern hunger vnnd willen hete czeessen dann czeschimpffen wie wol er in zoren vnnd grossem vnmût was, doch die czwü schniten brot nam aß vnd tranck nach dem vil hoher wort treyb mancherley von Chino redt vnd fragt, vnd in besunder gnad begert Chino zesehen. Do das [343^a] Chino vernam über etliche seine gerete wort im eyn züchtige antwurte gab vnnd sprach. Herre gehabt euch wol ich sol thûn so Chino erst mag er zü euch komen sol, das geret von im gieng vnd aber nicht e zü im kame bis auf den andern morgen. Do er aber mit als vil brot vnnd wein kam als er an dem ersten tage gethan het, also in vil manchen tage hielt vnnd wol gedacht er vil manche dürre bonen nun solte geessen haben die er mit vleiß in die kamern het tragen thûn, vnnd in aber von Chino wegen fraget wie er an dem magen stünde vnd ob es sich gebessert het, zü dem der abte sprach. Ich deuchte mich gesund vnnd wol steen wâr ich nun auß Chino henden, nach dem ich nichte grösser begire hab dann mir eyn fart genüg zeessen. Chino der

von des abtes güt seine deiner eyn schöne kamern het zübereiten tûn do bei eyn köstlich essen bereyten thet; darczû er des abtes gesellschaft alle vnd die besten personen von dem castell lûd Nach dem wider zû dem abt gieng zû im sprach. Herr seit male ir gesund seit so ist czeit
 5 auß der siechen kamern zegen in bei der hand nam vnnd in die schönen kamren füret, do [343^b] er in bei den gesten vnd seiner gesellschaft ließ von im gieng vnnd gedacht wie das essen herrlich czügericht wâr. Der güt abte sich mit den seinen trösten warde, vnd was sein leben bis auf die selben stund gewesen was, vnnd wie in die durren bonen vor dem
 10 hunger vnnd tode erneret heten das seine diener im nicht gelaubten, sunder sprachen Chino in geeret hete. Do nun die zeit komen was der abte sich zû tisch seczet der von köstlichen essen vnnd trincken gedienet was, vnd Chino sich dem abte noch nicht het zeerkennen geben, vnnd do nun mein herr der abte etlichen tage in solichem gûten veyßten leben
 15 gestanden was, vnd sich seines hungers gar wol ergezset het. Chino alles das er im genomen het in eynen seinen hof komen schüff, vnder dem alle seine roß vnnd harnasch was, er czû dem abte gienge vnd sprach. Herr abte wie enpfindet ir euch briefet ir zereitten mûgen der abte ia sprach, der magen in nicht mer irret nun er auß Chino hende wâr. Do
 20 nam in Chino bei der hand vnd füret in an ein fenster in dem sale vnd ließ in alles daz sein mit sampt seiner gesellschaft roß vnd harnasch sehen [343^c] vnd zû im sprach. Herr abte ir solt wissen das ich ein edelman bin von meiner stat vnd vätterlichem erbe außgetriben vnnd arm bin vil mächtiger vnnd vermügter veind hab. vnd domit ich meinem
 25 edeln stant vnd leben mûg ein genügen thûn ich Chino di Tacco mich auf die strassen geworffen habe czeberauben alle die mynder dann ich mûgen vnd der cort zû Rom tötlich veind bin. Nun laß ich mich beduncken wie ir eyn weis edel man seit vnd ich euch eüer kranckheyt ledig vnd frey gemacht hab, ist mein meynung euch nicht zethûn als ich vileichte
 30 manchem getan het wenn ich in in mein henden als ich euch hab gehabt hete, das ich mit euch in keynen wege tûn will Aber in besunderheyt begere vnnd euch freüntliche bitt ir wöllt mein in grosse not bedencken vnd ansehen, vnd mich des eüern nach eüern willen vnnd gefallen seitmal ir also eyn wol mûgendt mane seit des eyn kleyn teylhaftig machen.
 35 Nach dem ir alles das eüer vnuerrucket vor eüeren augen sehet darumb den teyl ganz halb oder gar nâmt vnd zû der stund mein vrlaub habt zereitten oder zesten wo euch hin liebet. Der abt sich Chino [343^d] züchtige wort nicht verwundern mochte, das in eynem offen straßrauber

solche milte wort gesein möchten, douon besunder freud het allen seinen verborgen czoren fallen ließ, vnnnd sein hercz sich gancz czû Chino in liebe vnnnd freundschaft keret in mit seinen armen vmbfieng czû im sprach. Ich schwere zû got dem herrn eynes solichen freundschaft ze haben nach dem ich gelaub du seyest ich gedultig wâr grösser widerdrieß czeleiden dann die gewesen sein, die du mir gethan hast vermaledeyt sei dein böses gelück oder vngelücke daz dich zû also böser arbeyt bracht hat. Nach dem alles das der abte mit im hete von rossen kleynet, vnnnd harnasch das von ganczem gûtem willen in getrefliche mitteylet czû im sprach das er selbs nâme was im gefiele des Chino nicht enthûn wolt sunder seiner genad leben wolt. Do der abte sahe das Chino von in selbs nicht nâmen wolte er selbes von seinen ergesten rossen etlichen nam, also auch von allen anderen seinen dingen das allerschlechtest nam von allen dingen Chino das beste ließ auff sasse wider gen Rome reytt.

15 Nun hete der pabest des abtes gefâncknisse [344^a] wol vernomenn, in schwäre vnd sere übel gethan daucht doch do der abte für in kame in lachent fraget wie wol im das baden gethan hete, dem der abte auch lachendt vnnnd gûts mûtes antwurt vnnnd sprach. Heyliger vatter ich fand nâhner denn das bad eynen gûten arczt der hat mich got sey lob gesund gemacht, anhûb vnd alles daz sich seinthalben ergangen het saget, des der pabst grosse freud name. vnd er seiner red fürpas nachfolget, vnd als der von hohem edeln gemûte bezwungen waz an den pabst eyn genad begeret, des der pabst willig was als der im nicht wol icht versagen mocht, doch meynet er was anders begeren würde dann er begerte.

25 Der abte sprach, heyliger vatter des ich begere das ist das ir eûer gnad vnd huld Chino di Tacco meinem arczte wider faren lasset dann on zweifel er vnder allen mannen die hent bei tage in disen landen sein er der redlichest ist vnd alle die übel die er tût mer seines böses gelückes sünd vnd schuld ist dann sein, darumb begabt ir in mit etwan kleynen mir czweifelt nicht in kürcz ir sehen solt als ich gesehen hab das es ware ist was ich euch sag. Do das [344^b] der pabst vername der auch von hohem gemûte was vnd redlich weis leut bei im zehalten in gût daucht zû dem abt sprach er wölt gern thûn waz im lieb wâr, vnd das er Chino freylich aller sicherung komen machet daz der

35 abt Chino bald czewissen thet eyn freye sicher leibs vnd gûts geleyt schicket Do das Chino von dem abte het auff saß gen Rom reyrt für den pabst kam sich freüntlich mit dem pabst vereynet, der pabst im alles vergab das er wider die heyligen kirchen begangen het, darnach zehand

in prior zů Rodi ritter vnd spitellmeyster machet, do er als ein diener der heyligen kirchen vnd des abtes von Klingen bis in sein end lebet.

Wie der neydig man Mitridates den milten Nathan vmb seiner grossen miltikeyt willen töten meynet vnnnd vnerkant czů im kam
 5 von Nathan selbs vnderriecht Nathan alleyn zefinden vnnnd mit im seinen willen tůn, den er nach Nathan ordnung alleyn in einem wald fand, do sich Nathan im zeerkennen gabe des Mitridates grosse scham vnd leyd het sein gröster freünd ward.

[344^c] Soliches wunnder nach der edeln frawen aller meynung
 10 nye mer weder gesehen noch gehört ward das eyn clerico pfaff oder geystlich man so herrlich in miltikeyte gewürcket het. nach dem sich der frawen rede gestillet hete der künig dem iungen Philostrato sein gepot thet, der sich nit hindern ließ bald anhüb. vnd sprach. Ir edelen frawen groß was die gab vnd miltikeyt des künigs von Hispania auch
 15 vileicht eyn solches nye mer gehört ward als des abtes von Klingen. Aber nichte mynder vnd grösser wunder eüch duncken sol zehören was eyner vmb seiner freyen miltikeyt willen eynem andern vergünnet im nit alleyn sein eygen blůt vergünnet, sunder der seines geystes vnd leben begeret sich schicket vnnnd bereyt was im das zegeben, daz er on
 20 zweifel gethan het, het er das nāmen wōllen der im das zenāmen czů im komen was, nach dem ir in eyner meiner hystori oder netten māre vernāmen wert. Es ist sicher vnd on czweifel war soll wir anders gelaubenn nach dem vns ettlich Genoueser vnnnd auch ander gesaget haben die in dem land vnd der gegent [344^d] gewesen sein, wie in dem land
 25 vnd künigreich Katthey wonet ein reich mächtig edel man des gleichen in keynem land mer gesehen ward, der was mit namen genannt Nathan der selbig Nathan eyn sein gesāß nahend bei eyner landstrassen het, do sere eyn yeglicher der von dem nydergang der sunnen in den aufgange der sunnen reiten geen oder faren wolt bezwungen was do für zeziehen,
 30 vnd domit er als des gemüte edel frey vnnnd milt was seinen namen außbreyten mocht sich einem yeglichen der do fürzoch zeerkennen gab, vnnnd an disem end eynen köstlichen reichen palast des gleichen in keinem land was het machen lassen, darinn bereyt was eynem yeglichen grossen fürsten zeeren do er mit seinem hofgesinde sein leben vnd we-
 35 sen füret vnd alle die do für gingen oder ritten von im vnnnd seinem haußgesind mit grossen freüden enpfangen vnnnd geeret warden. Also lang

zeit in solchem löblichen leben sein wonung het das nit alleyne sein lob
 in dem auffgang der sunnen gebreiset waz sunder in allem nydergange
 der sunnen erklang vnnnd erkant was, vnd wie wol er eyn alte betaget
 mann was, [345^a] doch darumb seiner herrlichen miltikeyt nicht müd
 5 warde. in sollichem sich begab das sein grosses lob eynem iungen edel-
 man genant Mitridates czewissen vnnnd gehöre kam. Der sich nicht
 mynder milte vnd reich daucht als Nathan was, der selbig Mitridates
 Nathan vmb seines lobes vnnnd grosser miltikeyt willen gen im in gros-
 sen neyd fiel vnnnd im gänzlich fürnam mit mer vnd grösser miltikeyt
 10 Nathan miltikeyt vnd lob vndertrucken vnd die zů nicht machen vnnnd
 die seinen meren, nach sollichem willen vnd bedencken zehand anhub
 einen reichen palast Nathan geleich zebawen, domit er in vnmässiger
 miltikeyt yederman begaben vnd eren möcht vnnnd fürware in kurzer
 czeit eyn groß lob gewan, doch Nathan lob vngeleich was. Nun sich
 15 eyns tages begab das der selbig iung edel man ganz alleyne sich in
 dem hofe seines palasts fand, in dem eyn armes ellendes fräwlein zů
 eyner porten des palast einget das almüsen durch got an in begeret,
 das ir von im geben ward, die czů derselben porten wider außgieng vnd
 zů eyner andern wider eingieng aber das almüsen begeredt das ir
 20 [345^b] vnuersaget was. also wol zů zwelf malen czů im kame allweg
 begabet was, vnd do sy zů dem dreizehesten mal kam Mitridates zů ir
 sprach. Frau ir seit traun gar vleissige herwider zekomen das almüsen
 zebegeren, doch darumb ir daz nicht versaget. Do das arm fräwlein Mi-
 tridates wort vernam trauriglichen sprach. O du freye süsse miltikeyt
 25 des edeln herren Nathan, wie so groß vnnnd mächtig du bist, durch czwů
 vnnnd dreissig porten die sein palast als der hat ich zů im eingangen bin
 des almüsen zebegeren, vnnnd ich in nye verdroß stātes von im begabet
 was vnd hiercin bin ich nicht mer dann dreizehen malen komen, vnnnd
 mir ist übel zůgesprachen vnd meines herkomen ist verdrossenn worden,
 30 also geret iren weg gieng nicht mer wider kam Mitridates der des ar-
 men weibs wort vnd red gar wol vernomen vnnnd gemercket hete, sich
 beduncken ließ wie Nathan lob im sein lob nām vnd mynderet, zehand
 in grossen überflüssigen haß neyde vnd zoren wider Nathan enzündet
 zů im selbs sprach. Awe mir wie sol ich nun Nathan grosse werck lobe
 35 vnnnd freye miltikeit erreichen oder dem [345^c] geleich thůn ich ge-
 schweige als ich sůchen gee über die zekomen so ich im in den kleynen
 nicht zů komen mag ich besorg mein müe vnd arbeyt vmb sunst sey ich
 nām in dann ab dem ertrich, seitmal in daz alter nit wege nymet so

müß ich selbes in zû dem tod richten, nach solchem bedencken in zoren
vnd böser meinung aufstünd on yemand rate zepflegen mit kleyner ge-
sellschaft auf zû roß saß in dreyen tagen reytt do Nathan sein wonung
het. do er seinen knechten befalhe das sy des gleichen thäten als ob sy
5 im nicht gehörten noch sein kuntschaft heten, vnd das sy in stant vnd
herberg fürsähen also lang bis er wider zû in käm alleyn von in reytt
zû Nathan schönem palast bekame den er alleyne in schlechtem kleyd
nicht verre von dem palast spacziren gen fand, aber sein nicht erkennet
noch weißt daz er Nathan was doch in fraget ob er im Nathan geweisen
10 vnd zeerkennen geben möcht, dem Nathan frölich antwurt vnnd sprach.
Lieber sun nyemand in diser welt ist der dir in bas dann ich czeerken-
nen geben mûg, darumb wenn es dir füglich ist so will ich dich zû im
führen. Der iung Mitridates zû im sprach Es [345^d] wäre im alle zeit
füglich, aber er wölt von Nathan in keynen weg gesehen noch erkant
15 sein Zû dem Nathan sprach des sol ich dir auch geren zeliieb werden
seitmal es also dein gefallen ist Nun was Mitridates zû roß bald absaß
vnd Nathan in mit züchtigen kurzweiligen worten bis zû dem palast
füret do er eynen knecht Mitridates pfärd nämen schüff verborgen zû
im sprach das er bald zû dem haußgesinde lieff yederman saget das
20 niemand dem fremden iungen saget das er Nathan wär geschaffen vnd
getan eyn ding was, nach dem Nathan den iungen edel man in den pa-
last fûrt, do im eyn schöne kamern gegeben ward do in nyemande ge-
sehen mocht dann alleyn die zû seinem dienste bereyt waren Nathan
in mit grossem vleiß dienen vnd eren thet. Nun in solichem beyder
25 stant Mitridates vmb des alters willen in in eren hete vnd in fraget wer
er wär, dem Nathan antwurt vnd sprach ich bin Nathan mynster diener
vnnd von meiner iugent bis in mein alter als du mich sihest eraltet bin
nicht anders hab dann wie du mich sihest also mich schreibe, vnnd wie
wol sich alle mann von im ser [346^a] loben so mag ich mich sein gar
30 wenig loben, söliche wort dem iungen Mitridates trost vnd hoffnung ga-
ben bas vnd mit mer heyl vnd rate seinen fürgenomen bösen willen ze
verbringen, nach dem auch in Nathan fraget wer er wär vnd was vr-
sache in do her bracht het, im seinen rate vnnd hilff verhiesse in allen
sachen nach seinem vermügen sich gen im erpot, des Mitridates besunder
35 gefallen het, eyn kleyn vngeret auf im selbes gestanden, nach dem im
fürnam dem alten man wölle er getrawen vnd von ferr vmb rede seiner
treû begeret, darnach rat vnd hilff vnd wer er wär warumb er dar ko-
men wär im czewissen tet, die vrsach aller seiner synn vnd meynung im

gancz öfnet Do der güt alte weis Nathan des iungen Mitridates hertten
fürsacz vnd böse meynung vernomen hete sich aller in im selbs veränd-
ret, doch nit lang vergeen ließ im mit festem stättem gemüt frölichem
anplick antwurt vnd sprach. Mitridates dein vater was ein mächtig
5 edel wirdig erenreiche man, vnd das du soliche ere meren meynest daz
lob ich vnd ist wol gethan, vnd das du Nathan neidig bist des schilt ich
auch nit, dann wo solicher [346^b] edler gemüte in der welt vil wären
als du hast, die welte sich alle in wol thûn bekeren würd, dein will vnd
meynung bei mir sol verborgen sein, zû dem ich dir e nützen rat dann
10 grosse hilff geben will, darumb wiß den wald den du hie nahend vor dir
sihest in den Nathan alle morgen alleyn ein spaczieren get, do du in
gar wol sehen vnd töten macht deinen fürsacz vnd willen verbringen
vnd wenn du das mit im verbracht hast, vnd domit du dester sichrer
wider heym komest so wirst du nicht den wege hin reitten den du her
15 geriten bist, sunder einen andern weg den du auf die lincken hand auß
dem walde geen finden wirst wie wol er dich etwas wilder zereiten
duncken wirt so ist er doch sicher vnd deinem heymet nächner. Do der
iung Mitridates von Nathan aller sach vnderriecht was wes er sich solt
halten Nathan zefinden vnd nach dem verbrachten von dann czekomen
20 vnd Nathan von im gangen was Er heymlich aus der kamern vnd czû
seinen gesellen ging die auch in den palast komen waren, den er saget
vnd befalhe wo sy bis morgen vor dem wald sein warten solten. nach
dem schlafen vnd czû pete gieng, [346^c] vund do der neu tag komen
was Nathan seinen gegeben rate dem iungen er nicht verkeret, sunder
25 mit festem gemüt dem also nachfolget, vnd sich alleyn in den wald von
Mitridates hend zesterben füget Mitridates auch auffstünde sein schwertt
vnd waffen bogen zeschiessen zehanden nam auf zeroß saß in den wald
reytt do er von ferren Nathan allein spacziren sein gebet zesprechen
gen sahe, doch vor im fürnam e er im icht tät vor in gar eben be-
30 schawen sehen vnd in reden hören wölt, vnd dem roß die sporen gab
in überrannt, vnd bei der seiden binden nam die vmb sein haubte ge-
bunden het, mit dem zû im sprach. Du alter man befilhe dich got dann
du müst sterben. Nathan nit anders sprach, dann wo hab ich das vmb
dich verschult. Do Mitridates die stimm hört vnd in ansahe zehand er-
35 kant das es der was der in gester czeabent also züchtigklich empfangen
vnd im so getreulich geraten het zehand aller seiner neid haß vnd zorn
in groß leyd scham vnd freundschaft bekeret sein außgezogen bloß
schwertt zû der erden warff. von seinem roß abstünd mit kläglichem

weynenn sich für Nathan füß nyder warff zû im [346^d] sprach. Nun erst mir mein allerliebster vatter etter grosse freye miltikeyt die on masse ist kunt worden ist das ir zû mir komen seit den ettern geyste zegeben darzû ich weder recht noch vrsach hab den euch ezenâmen, aber got
5 besunder genade mir gethan hat mer dann ich ye wirdig ward dann mir zû der stund do ich ir am notturftigisten gewesen bin die vernunft meines gemût aufgetan hat die mir von dem bösen neyd vnd haß verspert was mir das groß vnrechte hat zeerkennen geben, darumb ye mer ir mir zû meinem willen seit bereyt gewesen, sovil ich mich mer euch schuldige
10 erkenn pein vnd büß meines grossen irren vnd übeltûn von euch beger, darumb büßt mich meiner sünd nach eüerm willen vnd nach dem ich vmb euch verdienet hab. Der alte greiß vnd weis Nathan den iungen von der erden aufhûb lieblich halset vnd küsset czû im sprach. Mein lieber sun nach dem dein meynung was mir mein leben ezenâmen dir
15 nicht not thût an mich des vergebung czebegeren, dann vmb neides willen du es nicht getan hetest, sunder das du bey leben auf erden besser dann ich gehalten wärest daz bekomet [347^a] alles von hohem edelm gemût vnd nicht von der vntugent des neides, darumb lieber sun leb frölich bei mir bis on alle sorg vnnnd gelaub mir in der warheyt ich
20 liebers mans auf erden nit hab als du mir bist angesehen dein edel gemût das den pfenning nit als die geitigen lieb hat, sunder die außzegeben lieb hat auch hab nit scham ob du mich hast töten wöllen mer lob vnd ere zehaben daz mich nit fremd nymt dann die grossen künig vnd keyser mit keyner andern kunst dann mit blûtvergiessen vnd nit
25 alleyn eynen man czetöten sich bentügen lassen, sunder land vnd leut verbrânt vnd zerstöret haben ire ere vnd reich ze meren, also auch ich dir sprechen mag, aber du alleyn dein lob zemerer mich woltest getödet haben, darumb keyn wunder noch dir das in übel auff zenâmen ist. dann täglich soliche ding geschehen. Mitridates seiner bösen meynung kein außred gab, noch sich in keynerley entschuldiget, wol Nathan züchtige gefundne außred sere lobet, nach dem zû Nathan sprach. Nathan lieber vater wie mag das nun mögliche gesein das ir euch so gänzlich habt zû meinem bösen willen schicken mögen mir rat vnd
[347^b] hilff geben hat domit euch selbes der tod geschähe. über das
35 Nathan im antwurt vnd sprach. Mitridates ich will nit das du dich meus ratz noch das ich zû deinem willen bereyt was dir mein leben zegeben fremd nâmen lassest, dann seider ich zû meiner vernunft vnd freyem willen kam eyns yeglichen willen zetûn keyner nye ward der zû

mir in mein hauß kām das ich demselben des er an mich begeren was
 nit nach allem meinem vermügen zeliieb wūrd, nun bist du zū mir ko-
 men vnd hast meines leben vnd geyst begeret. vnd domit du nit der
 alleyn seyest der sprechen müge des er an mich begeret hab im dez sey
 5 versaget worden, ich geschickt vnd bereyt was dir daz czegeben, vnd
 domit dir das vnuersaget wār vnd dir on allen deinen schaden wūrd ich
 dir riete der rate mich dir an dem besten daucht vnd noch heut bei tag
 dich bit gefelt es dir so nyme es in des namen der mich vnd dich be-
 schaffen hat, dann ich kan nit bedencken wie ich das bas anlegen möcht
 10 dann dir zegeben dann ich hab es bei achtzig iarn gebraucht in grossem
 meinem lust vnd freuden. vnnd nach lauf der natur ich wol weyß [347^c] sol
 mir anders als den andern geschehen, das mir noch gar kleyn zeit ze-
 leben verlihen ist darumb ich sprich vnd vrteyl das besser sey zegeben
 sunder eynem der des begeren ist dann das also lang zebehalten das ich
 15 sein selbs vrdrucz vnd verdrossen wūrd. oder mir von der natur wider
 meinen willen genomen wūrd, es ist eyn kleyn ding hundert iar zegeben
 so vil mynder sechß oder acht die ich vileicht noch leben möchte, darumb
 Mitridates lieber sun liebet dir mein leben so nyme es des bitt ich dich.
 dann seider ich an die welt kam keynen nye fand der des als du begert hab,
 20 auch weyß ich nicht ob ich ymer mer keynen find nymest du es nit der sein
 begeren ist, so weyße ich wol ye lenger ich daz bewar ye vnwerder es
 wirt darumb e es vnwerder vnd mir in meinem alter ze vertragen herter
 wirt nyme es von mir des bit ich dich freündlich. Mitridates aller voller
 scham czū Nathan sprach. des wöll got nit das ich also liebs ding als mir
 25 euer leben ist ab der welt nām. sunder des mer dann ir begirig bin ze-
 bewaren, vnd nicht euch etere iar mynder, sunder wo das mütlich wāre
 die ze meren euch die meinen gern [347^d] mitteylen vnnd geben wölt. Zū
 dem Nathan sprach, vnd ob du macht wilt du daz tūn, vnd mir meine
 iare meren so sol ich gen dir tūn daz ich keynem nye mer getan hab,
 30 vnd das du thūn solt das ist das ich wille des deinen nāmen wo ich keynes
 andern ding alle mein tag nye genam, des Mitridates ia sprach vnd czū
 seinem gefallen bereyt wāre. Nathan sprach so thū als ich dir sage, du
 beleibest iung als du bist hie in meinem palast vnd besiczest alles mein
 gūte vnd reichthumb vnd nānnest dich Nathan so will ich mich heym in
 35 deine gūter seczen vnd Mitridates nānnen Do sprach Mitridates, ia wenn
 ich also wol tūn vnd wūrcken kūnd als ir thūt so wār es mir gar wol
 zetūn on langs bedencken, aber mir zweifelt nit meine werck e Nathan
 lob mynderten dann merten. Darumb mein syn nit ist in ander person

das cze verderben das ich durch mich nit machen künd. Dise vnd ander vil züchtige wort mancherlei materi halben sich zwischen dem iungen vnd dem alten verlossen, nach dem vnd als Nathan gefallen was den iungen bei der hand nam in seinen reichen palast füret do er in vil man-
 5 chien tag in grossen [348^a] eren vnd freuden hielt in tröstet vnd stercket seinem edeln hohen gemüt vnd fürsacz dem bis in sein tod in miltikeyt also nach zekomen, nicht lang vergieng Mitridates sich schicket mit seiner gesellschaft wider zû hauß zereyten. dem Nathan genûg wol het ze versten geben, wie keyner auf erden gesein möcht der im in williger
 10 freyer miltikeyt geleichet mit dem im sein vrlaub gab. vnnd Mitridates frölich von im reytt.

Wie eyn ritter genannt herr Gentile von Modona reytt eyne die er huldet vnd lieb het. die zesehen die für tod vnnd schwanger begraben ward, dieselben er auß dem grab nam wider czû leben
 15 bracht bei im eynen knaben gebar die er nach etlicher vergangen zeit mit samt dem kind mit grossen freuden irem mann wider gab der nit anders gelaubt dann sy tod wär.

Grosses wunder die edelen frawen mit sampt den mannen heten daz eyn person seines eygen blûts vnd lebens so milt gesein mocht das
 20 vrteylten vnd sprachen das Nathan des kûngs von Hispan[348^b]gna des abts von Klingen beyder miltikeyt mit der seinen übergangen het keyne der seinen geleich was, nach dem der kûng sich gegen der züchtigen frawen Lauretta keret, durch das ir beweiset wie sein syn wär daz sy fürpas der angefangen materi nachfolget die on alles verziehen also
 25 sprach. Ir erbern iungen diemütigen frawen wirdige vnnd schöne materi auf disen tage sein gesagt worden, vnd laß mich beduncken wie vns zesagen nit mer beliben sei, vnd nit wol weyß was ich sagen sol es sey dann sach daz ich sag von etlicher verlauffen herrlichen miltikeyt der liebe die alweg cynem yeglichen sager von ir zesagen genûg zesagen
 30 gibt, vnd wenn ich bedenck daz ich do sagen meyn so duncket mich daz ich do sagen will euch nicht mynder wunder nâmen sol als die gesagten getan haben, ist anders war daz die schâcz vnd reichthumb durch miltikeyt willen gegeben werden vnnd der grossen veindschaft vergessen wirt, vnnd das man das eygen leben lobe vnd ere an also grosses besorgliches end seczet, das zehaben vnd czebesiczen das der man lieb
 35 hat, darumb nâmet war meiner rede vnd mercket daz [348^c] ich euch

sagen will. in der edeln wirdigen stat Boloni in Lombardia waz eyn ritter von blüt vnd tugent genüg edel vnd reich der was mit seinem namen genant herr Gentile Carisandi eyn iung frölich wol geschicket man, derselbig zû eyner erberen iungen czüchtigen frawen genant fraw

5 Cattelina eyns erbern manns weib genant Nicoluczo Iagenfeind grosse liebe gewan gancz zû ir in liebe enzündet, aber er der frawen huld kleyn hoffnung het Nun in solchem sich begab daz er gen Modona für sechß monet czû eynem haubtman erwelet ward vnd do hin reytt vnd die weil er zû Modona was sich füget daz Iagenfeind nicht zû Boloni do

10 heym was vnd sein fraw die do eyns kindes groß schwanger was vnd auß der stat auff eyn ir gesäß das bei eyner halben meil von der stat was gieng do etlichen tag zesten lust czenämen. In dem ir züstünd als gern schwangern frawen züstet das ir eyn gächlinge amacht czüfü, die von solcher stercke vnd natur was das sy bei ir alle zeychen ires lebens

15 erleschet, auch von den ärzten nämlich tod geurteylet was, vnd alle ire freund sprachen das kind das sy bei ir het nicht möcht bei leben [348^d] sein, dann noch so lang nicht getragen het, vnd on anders bedacht sy bald in eyn kirchen die nicht ferr von dann was trügen, do sy die gûten frawen nach langem weynen für tod in eyn gemauret grab

20 oder sarch legten, solche sach dem edeln ritter herr Gentile desselben tags gen Modona zewissen kame, des im der ritter wie wol er wenig in irer genad was grossen vnmût name czû im selbs sprach. Nun wol hin im namen gotes du edle schöne fraw mein Cattelina du bist tod vnd auß diser welt gescheyden, vnd ich von dir in deinem leben nye mocht eyn

25 lieblich ansehen gehaben nun macht du dich des yeczund nit erwerben das ich von dir also tod du bist nicht eyn lieblich halsen vnd küssen nâme, also gesprochen in dem im die finster nacht bereyt was. verborgen mit eynem knecht auf zû roß saß nit raste bis er kam do sein allerliebste fraw begraben was, do er abstünd das grab auf thet züchtiglich darein steig

30 sich der frawen an ir seiten leget sein angesicht zû der frawen angesicht kert mit weynenden augen zetausent malen kûset. Aber als wir stâts sehen das der wille vnd die lieblich begire der mann [349^a] die mann in keynen weg wenn es an eyn lieblich kûssen komet sich des content sten lassen sunder allweg fürpas ze sûchen begerent, also auch der iung edel

35 ritter thet zû im selbes sprach, warumb seitmal ich hie bei ir bin greiff ich ir nit an ire liebliche brüstlein die ich nye mer begriffen hab, noch vileicht mer begreiff von grosser liebe bezwungen vnd begir überwunden sein hand ir vnder das kleyd auf ir brust leget, vnd darauf eyn gûte

weil gehalten, in dem in beduncken ward wie er ir hercz vnder der
hend klopfen vnd lebendige empfünd, in dem in eyn kleyne forcht an-
stieß, doch die balde von im schlug vnnd mit mer vleiß vnd synn süchet
vnd für war fand das sy nit tod sunder in grosser amacht lag, daz ver-
5 nomen bald mit seins knechtes hilffe sy aus dem grab nam, vnd für sich
auf sein roß seczet verborgen gen Boloni in sein hauß füret vnd sy seiner
müter die ein weise erbere frau was befalhe, vnd die güt alte fraw sein
müter alle sach von dem sun vernomen het auch sy von diemütikeyt be-
zwungen vnd mit güttem fetir Malfasier vnnd baden die verschwunden geyst
10 der schwangern frawen wider bracht vnd [349^b] zů irem leib ruffet, in gar
wenig stunden gancz zů ir selbs kam, in dem eynen schwärn seufzen
thet mit dem sy erwachet vnd sprach. Awe mir nun wo bin ich, der
die erber fraw des ritters müter antwurt vnd sprach. Liebe tochter
tröst dich gehab dich wol du bist an güttem end. Die schwanger fraw
15 vmb sich sahe nit erkennen mochte wo sy wäre wol den iungen ritter
vor ir sten sahe daz sy on maß fremd nam des müter sy freuntlich batt
das sy ir zewissen thät wie sy doch also in ir hauß komenn wär, das ir
der ritter alles waz sich irenthalben ergangen het saget, des die güt
frawe sere traurig vnd vnmütig was, doch im den danck saget den sy
20 vermocht, darnach in freuntlich batt vmb der liebe willen die er ir also
lang czeit getragen hete das sy in seinem hauß nicht anders empfinde
dann das ir vnd ires mannes ere wär im ir ere ließ befolhen sein, vnnd
wenn der morgen käm daz er sy heym in ir hauß schicket, über das ir
der ritter antwurt vnnd sprach. Fraw was mein wille vnnd begire in
25 der vergangen zeit gen euch gewesen ist. Also mein syn vnnd meynung
yeczund [349^c] vnd hinfür nicht anders sein sol seitmal mir got die
gnad getan hat mir euch von dem tod czů dem leben geben vnd ver-
günnet hat, des mein grosse liebe zů euch vrsach gewesen ist, darumb
euch von mir nicht anders dann liebe zucht vnd ere also wäret ir mein
30 leibliche schwester zůsten sol, aber on zweifel mein mü liebe vnd dienst
durch mich in euch in diser vergangen nacht gewürcket widerkerung vnnd
lon wirdig ist darumb ich an euch begere vnnd will das ir mir des nicht
neyn sprecht. Die fraw im mit zucht vnd diemütikeyt antwurt vnd
sprach. Herr Gentile zů allem dem daz nicht wider ere vnd zucht ist
35 ich alle zeit czů euerm willen bereyt bin. Fraw sprach der ritter in
diser stat man nicht anders meynet dann ir seit tod noch in etüerm hauß
niemand ist der euer warte, darumb ich an euch begere vnd das in be-
sunder genad, das euch liebe vnd gefall hie bei meiner müter verborgen

zewonen also lang das ich von Modona wider kom, das sich über fünff
 vnd zweynzig tag nicht verziehen mag, vnd warumb ich des an euch
 beger das die vrsach ist. das ich gegenwirtig erber leut eüerm man daz
 köst[349^a]lichest kleynet geben will als ers lang ye gesehen hat, des die
 5 fraw willig vnnnd wol ze müte was im versprach das zetün des er begeret
 het dann sein begeren sy züchtig vnnnd erber daucht wie wol sy gern
 ire freund ires lebens erfreut het die do meynten das sy tod wär, doch
 sich williglichen schicket czetün des der ritter begert het im das auf ir
 treu zetün versprach vnd dise wort zereden nicht gancz verbracht het,
 10 das ir zeit daz tragend kind czegebenen komen was, des ir des ritters
 mütter getretulich halff vnd nicht lang vergieng eyne schönen knaben
 gebar, das dem ritter seiner mütter vnd auch ir besunder freud bracht,
 der sein ordnung gab aller notturfftigen ding eyner kintpeterin. das die
 zehand do vnd bereyt waren domit sy in maß gedient würd als wäre sy
 15 sein elich weib, nach dem verborgen wider gen Modona reytt vnd nach
 seinem verbrachten ampt wider gen Boloni reytt, vnd in seinem ein-
 reitten er auf denselben tage eyne köstlich male het czübereyten lassen
 darczü er het schaffen laden die mächtigsten der stat Boloni vnder den
 Nicoluczo Iagenfeind der frawen man eyner was, [350^a] die er alle in
 20 seinem absitzen in seinem hauß fand, des selben gleichen sein allerliebste
 frawen schöner vnd gesunder fand dann sy ye gewesen was domit auch ir
 iunges kinde, Nach dem mit grossen freuden seine gest czü tisch seczet.
 die mit köstlichen herrlichenn gerichtten gedienet warn vnd do man nun zü
 dem end des essen komen was, er die züchtigen erbern frawen aller sach
 25 vnderricht het was sein meynung zethün wär des mit, ir sein ordnung
 geben het was sy thün solt, darnach anhub czü seinen gesten also sprach.
 Mein lieben herrn freünd vnd günner ich vil dick vnd auch vileicht ir
 solt vernomen haben wie in dem künigreich Persia eyne sölich züchtig
 güte gewonheyt sey, wenn eyne erber man eyne seinen freund eren will
 30 vnd zü hauß ladet das er im alles daz zeyge vnd sehen laß daz er am lieb-
 sten hab als sein weib kinder oder güt freundin oder was kleynet er
 hat bei dem er beweisen will möcht er im sein hercz weisen vnd mit-
 teylen das er daz gern tät Also auch mein syn vnd meynung ist in der
 stat Boloni zetün ich danck euch freuntlich des des ich an euch begeret
 35 hab ir mich gewert habt czü [350^b] mir in mein hauß zekomen, Darumb
 auch ich euch nach Persier syten eren sol vnd euch das czeygen vnd
 sehen lassen das ich in diser welt am liebsten hab vnd die weil ich leb
 haben sol, aber e ich das tû vor euch bitt ir mich eyne zweifels vnder-

richt vnd klar machet. Es ist eyn burger vnd gůte person die hat eyne
 seinen getreuen diener der selbig diener nach dem als gotz gefallen was
 in grosse vnd schwäre kranckheit fiel des sein herr nicht zů end beyten
 meynet vnd den gůten seinen diener also krancken auf die freyen
 5 strassen tragen thet hin für sein keyn acht mer het, in dem eyn fremder
 komet dem der kranck nicht ist sich über in erbarmet vnnd heym czů
 hauß tregt, des mit grossem vleiß warten tůt vnd wider zů seiner ersten
 gesuntheit bringet Nun beger ich von euch zewissen ob sich der erst
 herr ab dem andern beklagen můg wenn er solichs diners dienst zů sei-
 10 nem dienst brauchet vnd ob er verbunden sey dem ersten herrn den
 diener wider zegeben wo er des begeret. Die erbern mann diser materi
 halben mancherleye gespräch vnder in hetten. Doch czeletzte sich des
 begaben daz Nicoluczo der [350^c] eyn kůstlich weis reder was über dise
 sach sein vrteyl sprach vnd wie er die außspräch demselben sy alle vol-
 15 gen wůlten, alle rede vnd antwurt zů im seczten. Der czum ersten der
 Persier gůt syten lobet vnd sprach er mit samt den andern in der meyn-
 ung wār das der erst herr keynen zůspruch weder zů dem diener noch
 czů dem andern herren gebaben můcht. seitmal er den diener nit allein
 von im getriben sunder auf die gemeynen strassen geworffen het, vnnd
 20 wie der ander herr den diener brauchet das mit gůtem rechten thůn
 můcht. Solicher red vnd vrteyl alle die an dem tisch sassen nachfolgten
 vnd sprachen. Nicoluczo het wol vnd recht geret. Der ritter solicher red
 wol zemůt was vnd sprach auch er in der meynung wār, mer er sprach.
 Lieben herrn es ist nun wol zeit nach dem ich euch versprochen hab
 25 mein liebsts ding sehen lassen, zweynen seinen knechten zů im rűffet
 nach der frawen schicket die er erberlich gekleydet het sy bitten ließ
 daz ir liebet in den sal czekomen, die edeln herren irer gegenwirtigkeyt
 frůlich zemachen Do die fraw des ritters potschaft vernomen het balde
 ir schönes kind in ire arm nam [350^d] die zwen diener ir gesellschaft
 30 theten vnd in den sal do die erbern herren mit sampt irem eman zů
 tisch sassen kam, vnd nach dem des ritters gefallen was sich zů eynem
 erbern weisen mane an den tisch nyderseczet. Nachdem der riter aber
 anhůb vnd sprach. Lieben herren das ist das, das ich euch hab für mein
 liebsts kleynet weisen wůllen vnnd fürwar ewig haben will, dunckt euch
 35 ob ich des recht vnnd billich lieb hab, die erber herren die frawen an
 allen sachen ir schöne lobten vnd sy ereten zů dem ritter sprachen er
 nit vnrecht tāt sůliche schöne frawen lieb zehaben vmb irer grossen
 schöne vnd zůchtigen gebārd willen von yederman angesehen was, vil

waren die gern gesprochen heten sy die sein deucht die sy meynten vor
etlichem monet tod wär, vnd Nicoluczo der ir eman was sy ernstlicher
dann keyner ansahe, als der aller von begir brann gruntlich zewissen
wer die fraw die der seinen also geleich was, gesein möcht, sich nit ent-
5 halten mocht fragen müßt wer sy wär vnd ob sy eyn Bologneserin wär
oder eyn gästin. Die fraw sich iren eygen man rafgen sahe sich mit
grosser marter enthielt im zeantwurten [351^a] doch nach dem ir von
dem riter was befolhen worden sy still schweyg. Etlicher ander sy fra-
get ob das kind ir wär etlicher sprach ob sy herr Gentile weib wär oder
10 in anderm weg sein freundin. Solches fragen sy keyn antwort gab In-
dem der ritter der von dem tisch gangen was wider kam vnnd etlicher
von den gesten zů im sprachen. Herr Gentile das ist ein schöne fraw,
aber sy duncket eyn stumm sein, ist im dann also so ist es wärlich
grosser schad. der ritter sprach Lieben herrn das sy yeczund nicht ge-
15 redt hat ist nicht eyn kleyn zeychen irer tugent, so saget vns sprach der
der die frawen gefraget het, wer ist die züchtig fraw. der ritter sprach
das sol ich geren tůn, doch so ferr das sich etter keyner von seinem
siczen verrůre also lang bis ich mein red verbracht hab des sy alle wil-
lig warn. in dem die tisch weg genomen warn der ritter der neben der
20 schönen frawen saß anhub zereden vnd sprach. Ir lieben freunde vnd
herren dise fraw das ist der getreu diener von dem nit lang ist ich euch
saget vnd fraget, die von den iren vnwerd vnd wenig lieb gehabt was
vnd als eyn ze nicht ding auff die strassen geworffen was, [351^b] vnnd
von mir aufgehoben in mein hauß gefůrt vnnd dem grausamen tod auß
25 seinen henden genomen, vnnd got der almächtigt mein grosse trew an ir
angesehen hat vnd iren vngestalten erschrockelichen leib zů sölcher
schöne als ir sy yeczund secht mir geben hat, vnd domit ir mein red bas
vernämet wie sich das begeben hat daz ich euch durch wenige wort ze
versteen geben will, Also der edel ritter anhub vnd von dem ersten an-
30 fang seiner huld vnd liebe die er der edeln frawen getragen het bis in
daz end was sich sein vnd irenthalben verlauffen het alles den erbern
herren saget vnd zewissen^{thet} vnd das mit grossem wunder aller zu-
hörer fürpas redet vnd sprach. Es sey dann sach mein lieben herrn das
ir etter vrteyle wölt zeruck gen voran mein gůt freund Nicoluczo so ist
35 dise fraw vor gott von dem rechten mein vnnd hoff nyemand mir die mit
keynem redlichen rechten abteylen mág, über daz im nyemand antwort
gab alle schwigen, vnd zewissen begerten zů waz end er doch komen
wölt dann sein rede noch von nyemand verstanden was. Nicoluczo dem

vileicht die schöne fraw der seinen geleich im sein hercz [351^e] erweychet, mit samt etlichen andern vnd auch der schönen frawen nit gelassen mocht zähern vnd weynen müßt Do daz der ritter sahe aufstünd daz iung kind an sein arm vnd die frawen bei irer hend nam sich gen Nicoluczo kert
5 zû im sprach. Nun wolan mein lieber geuatter nun stet auff vnd empfahet mein gab aber ich gib euch nicht etter hin geworffen weib, sunder mein liebe schöne geuätterin mit samt irem schönen vnd euerm kind euch gib des mir nichte czweifelt es auß euch beyden empfangen vnd geboren ist vnd ich zû der taufe getragen vnd gehalten hab vnnd ist ge-
10 nant mit namen Gentile, vnnd bitt euch daz ir euch keynes argen gen ir verdencket das sy drey monet in disem hauß gewesen ist ich schwere euch bei dem der vns alle geschaffen hat vnd mich in sy in also hohe liebe enzündet hat, die ires leben heyl vnnd vrsach gewesen ist das sy weder mit euch noch mit vater vnd mütter in mer zucht vnd eren hete
15 sten mtügen als sy hie bei meiner mütter gestanden ist, des nyme ich got vnd alle heyligen gezeuge, das gesprochen sich gen der frawen keret zû ir sprach. Liebe fraw vnd geuäterin ich gib vnnd [351^d] laß euch freye in Nicoluczo etters lieben manns hend, mit disen wortten Nicoluczo das kind in sein arm gab vnd die frawen im an sein seiten seczet vnd er
20 wider zû den andern herren siczen ging. Nicoluczo mit grosser inbrünstiger liebe vnd freud sein verlorne frawen mit samt dem kind lieblichen enpfiehg gott dem almächtigen vnd dem edeln ritter dancket vnd also ferr er von aller hoffnung was das czehaben das im geben warde so vil dester grösser sein freud was, dem riter den danck saget des dann solche
25 gab würdig was. Eyn solichs die zûseher eyn fremd vnd sere erbärmlich sach sein daucht alle von liebe vnd weycher freundschaft zähern müßten. Der ritter von in ob allen mannen gelobt vnd seiner diemütigen miltikeyt gebreiset was, nachdem die frawenn heym in ir hauß beleyten do sy von nettem lieblich empfangen ward lang zeit von yderman für
30 ein wunder angesehen ward Der edel riter herr Gentile von Nicoluczo vnd allen seinen freunden stäts in grossen eren vnd reuerenz gehabt was. Nun wolan ir edeln züchtigen frauen wes bedunckt euch meiner gesagten materi was wolt ir nun sprechen. der künig mit [352^a] seiner kronen vnnd czepter, vnd der abt mit seiner kleynen kostung eynen
35 straßrauber mit eynem pabst ze vereynen oder eyn alter man sein haubt vnnd leben vnder das schneidend schwertt seines tötlichen veinde czelegen, welches vnder den dreyen sachen oder miltikeyt ist zû des edeln ritters herren Gentile miltikeyt zegeleichen, der do iung vnd in hoher

wirdiger liebe mer dann man auf erden brinnend was vnd alle recht czü dem het das von eynem andern für nicht an die strassen geworffen waz vnd er das auf gelück zü im genomen het, vnd er nicht alleyne sein brinnend feür mit zucht temperiret vnd mässigēt sunder mit freyem
 5 eygen güten willen, dasselbig des er von ganczem herczen begeret het, das zerauben gesücht het vnd do im das ward vnd in seinen gewalt kam, das als ir oben vernomen habet mit grossen freuden vnd reichen eren wider gab, fürware ich sprich gelaub vnd vrteyle keyne der gesagten historien auff disen heutigen tage der yeczund gesagten gleich sey.

10 Wie fraw Dianora an den riter Ansaldo zü mitem winter einen schönen grünen rosen[352^b]garten begert in maß als wär es zü mitem meyen der sich eynem nigromant mit grossem güt verband der im den garten machet, vmb des willen fraw Dianora man ir das vrlaub gab für eynmale des ritters willen czetün, vnd do der ritter
 15 der frawen man freye miltikeyt vernam die frawen ires gelübds frey vnd ledig saget, auch vmb des willen der nigromant sich nit mynder in der tugent der miltikeit beweisen wolt als der ritter, auch er von dem ritter seins lons halben nicht nämen wolt.

Durch yegklich person der frölichen gesellschaft der edel ritter herr
 20 Gentile seiner züchtigen tugent auff bis in den hymele gelobet was, Nach dem der künig Emilia sein gepot tet, die frölich mit grosser begire also sprach. Ir edeln frawen keyn vernünftige person mit recht anders sprechen mag dann das der edel ritter riterlich vnd wol getan hab, vnnnd ob etlich sprechen eyn soliches vnmüglich wär das selbig zebeweisen das
 25 alle ding wo got verhenget müglich sein mir vileicht schwär sein wirt, doch wils got ich mein vermügen tün sol nach dem ir [352^c] in meiner hystori vnd neuen märe bald vernämen solt. Ir solt wissen das in dem land vnd der gegent Friaul gar frisch küll brunnen fließend wasser vnnnd hohe kalte gebürge sein, darinn eyn stat gelegen ist mit vns genant zü
 30 der weiden in der eyn auß der massen schöne iunge fraw mit irem mann wonet mit namen genant fraw Dianora gar eynes reichen erbern mannes weib genant Gilbert, dise frawenn eyn mächtig herr vnd ritter vmb irer grossen schöne willen huldet vnd bület der was geheysen herr Ansaldo eyn eren reich man von grossen geschäften in miltikeyt vnd streiten in
 35 allen landen erkannt. der zü frawen Dianora gancz in liebe enczündet was on alle maß lieb het, ir zeliab keyn ding in zeschwäre daucht alles

das thet daz durch ein liebhaber mocht getün werden. nun er ir huld
 het gewinnen vnd gehaben mügen, durch vil manche potschafte ir sein
 überflüssige liebe zewissen tet. Aber kein sein potschaft noch liebe ir zū
 herczen gieng stäts ir hercz vnd gemüte nach erber frawen gewonheyt
 5 gen im kalt was in maß daz ir soliche seine potschaft grosse mü vnd
 vnruhe brachten im in keinen [352^d] weg keyner irer liebe zūsagen wolt
 stäts alles sein begeren im abschlūg vnnd versaget. Aber darumb der
 ritter nit nachließ sunder mit mer inbrünstiger liebe die frawen sūchen
 tet. Do die zūchtig erber fraw vername das der ritter nit abließ sy ir
 10 nach irer meynung ir in ab dem halß zenāmen eyne neuen syn vnnd
 fund erdacht vnd eyne tags zū der frawen die von dem ritter täglich czū
 ir gesant was sprach. Nun sag mir gūte frau du bringest mir stäts pot-
 schaft von deinem herrn Ansaldo vnnd sprichest wie er mich so lieb hab
 grosser gab vnd schanckung er sich mir durch deine wort erpeute, aber
 15 ich vernym noch nicht was ich gelauben sol, dann weder vmb gab noch
 schanckung ich zū seinem willen nymer kome doch wo ich seiner liebe
 zū mir nach dem du mir zeversteen gibst eyne eygenschaft weißt, on zwei-
 fel ich mich zū seinem willen schicket. darumb wo du mir des ich an in
 begeren bin eyne eygenschaft von im bringen möchtest, ich on zweifel
 20 des er vnd du von seinen wegen begeren bist tāt, das alt weib bald
 sprach. Frawe was ist das des ir begeredt, die edel fraw sprach. Des
 ich [353^a] begere das ist das ich will vnd das an in beger das er mir ze
 mittem winter nächsten komend vor der stat eyne schönen grünen
 rosen garten vol aller frucht vnd blūmen mache in maß als wär es zū
 25 mittem meyen wo er das zetün meynet wol vnd gūt, wo er aber das
 nicht thūn meynet weder dich noch nyemande anders mer czū mir schicke,
 wirt er aber mer zū mir schicken, so würd ich nicht thūn als ich bis her
 getan hab, sunder vmb seines vnzüchtigen begeren willen es meinem
 mann vnd allen meinen freunden von im klagen die in mir bald ab dem
 30 halß nāmen werden wo er mich seines zū mir schicken nit überhebt mit
 disen worten dem alten weib das vrlaub gab, die bald irem herren der
 frawen begern vnnd potschafte bracht, vnd do der ritter der edeln fra-
 wen begeren vnnd meynung vername. vnnd was sy im in widerkerung
 vnnd zelone versprach wie wol es in schwär vnnd vnmöglich zethūn
 35 dauchte, wol vernam vnd erkannt das die fraw des vmb anders nit be-
 geren was dann alleyn im sein hoffnung des des er an sy begert die ze-
 nāmen, doch im fürnam alles das czetūn das [353^b] man tūn vnd ver-
 sūchen möcht bald auß in alle land schicket zesūchen ob man indert eyne

finden möcht der im in diser sach gehilfflich gesein möcht dem bald eyner
 zů handen kame der zů im sprach wo im darumb eyn gůt lon vnd ge-
 nügen geschähe er durch sein schwarcze kunst in eynen köstlichen giar-
 din vnd rosen garten machen wölt, des der ritter bald mit im vmb ein
 5 gůte summ gelts eyns warde, nach dem mit grosser hoffnung vnd freuden
 der zeit wartet, in dem die gegenwirtig zeit flohe vnd der kalt winter
 komen was vnd daz ertrich alles mit schne vnd eiß bedecket was, der
 nigromante in eynem schönen anger vor der stat mit seiner schwarzen
 kunst in der ersten nacht genaio eynen schönen grünen giardin vnd
 10 rosengarten machet, Als dann an dem ersten morgen des genanten
 monet erscheyn vnd nach dem vns gezeücknuß geben. die in gesehen
 heten, wie es der schönest giardin wär der auf erden mit augen nye
 mer gesehen ward darinne allerley natur frucht blůmen vnd kreüter.
 Do daz der edel ritter sahe wer fröer vnd bas zemūt dann er bald von
 15 den besten fruchten rosen vnd blůmen nāmen [353^c] schüff vnd ver-
 borgen seiner allerliebsten frawen Dianora bringen schüff, do bei ir en-
 pot in den schönen garten czekomen den er ir nach dem sy an in begert
 het bereyten machen domit sy sein liebe erkennet, vnnd was sy im ver-
 sprochen het das im zehalten. die frau die blůmen frucht vnd rosen vmb
 20 wunders willen czů ir name, Auch die schöne des garten von mer per-
 son vernomen het, vnd wes sy sich dem ritter zethū verbunden het sy
 ũbel vnd nicht wol getan daucht sy von ganzem herczen gereüen ward,
 doch vmb des willen nicht gelassen mocht mit andern erbern frawen als
 die alle gern nette ding sehen den schönen giardin sehen ging den sy
 25 nit mit kleynem wunder lobet, vnd das mer dann yemand anders doch
 traurig vnd betrűbt daraů vnd heim zů hauß gieng, sich in solcher maß
 betrűbt ires gelűbds. daz soliche inwendige pein vnnd schmerczen an ir
 außwendig erscheyn, des ir man bald war genomen het die vrsach irer
 betrűbtnuß begeret zewissen daz im die fraw grosser forcht vnd scham
 30 halben lang zeit verschweyg, doch czeletst von im bezwungen vnd sich
 nit mer enthalten mocht sagen müßt waz [353^d] ir gebrāch, anhűb vnd
 waz sich ir vnd des ritters halben, doch alleyn durch wort verlauffen het
 im alles saget. Des sich Gilberte der frawen man von erst eyn wenig
 betrűbet vnd in ũbel het, doch czehand der frawen gůte vnd ir lauter
 35 reyne meynung bedacht wol erkannt was sy dem riter versprochen het
 das in keynem argen fürsacz geschehen wär sunder sich sein on sűnd
 ledig machen, vmb des willen seinen zoren von im schłůg zů der frawen
 sprach. Dianora liebes weib es ist gar ein bös zeychen an eyner erbern

frawen solche potschaft ze verhören, noch vnder keynerley bittung oder verheyssung ir kettscheyt verseren dann alle wort die durch die oren empfangen sein dieselben kraft vnd stercke haben, dann nyemand von im selbs gewissen mag dann dem liebhaber oder büler keyn ding zethûn
 5 czeschwär ist bei in alle dinge mütlich sein, darumb wärlich liebes weib du hast an dem ser übel getan, von erst seiner potschaft deine oren ze verleihen nach dem dich vnder bittung verbinden, aber mir zweifelt nicht was du gethan hast in keynem argen fürsacz als ich vormals gesprochen habe gethan hast, dann dein reynes [354^a] gemüt mir erkant ist, dar-
 10 umb ich dir waz du im versprochen hast zegeben vnd verhängen will das vileicht keyn ander man seinem weib tät, darzü mich forcht vnd sorg des nygromant zwinget, dann wo herr Ansaldo vernäm das du im nit hieltest als du im versprochen hast on zweifel wider dich in zoren fallen würd vnd meynete du auß im dein gespöt machest, vnd durch den
 15 nigromant dich vileicht zû eyner ellenden frawen machen möcht, darumb das ze vndersten ist mein syn vnd meynung vnd will das von dir gehabt haben daz du zû im geest vnd nach allem deinem vermügen dein reyne kettscheyt fräwlich ere vnd zucht bewarest vnd dich von im mit lieb ist es anders mütlich deins gelübds frey vnd ledig machest, wäre
 20 aber sach das eyn soliches nit gesein möcht, so bin ich zefrid auf eyn fart vnd nicht mer im mit deinem leibe aber nit willen noch gemüt im zû seinem willen gehorsam seyest. Das die fraw widerredt vnd in keynen weg tûn meynet, doch do sy sahe das ir man das wolt gehabt vnd sy im nicht anders tûn mocht sich williget wider iren willen des manns
 25 willen zethûn, vnnd [354^b] an dem andern tag ze morgen on alle ornamment ires leihs mit zweyen iren knechten vor ir vnd zweyen iunckfrawen nach ir sich in des ritters herr Ansaldo hauß zû im füget. do das der edel riter vernam vnd das im sein allerliebste fraw zû hauß komen was in fremd vnd eyn groß wunder name bald aufstünd den nigromant
 30 zû im ruffet vnnd sprach. Ich will daz du sehest was grossen edeln schacze mir dein kunst bracht vnd geben hat mit dem der frawen on alle vnerliche begire engegen kam mit grosser zucht vnd eren enpfiehg bei irer hend nam in eyn schöne kamern czû eynem grossen feür füret, do er sy schüff nyder seczen zû ir sprach. Edle fraw ich bitt euch vmb
 35 der liebe willen die ich euch also lange in zucht vnd eren getragen hab die on zweifel lon vnd widerkerung wol wirdig ist das ir mir saget welliche vrsache czû diser zeit euch her zû mir bracht hat mit solcher gesellschaft Die edel diemütig fraw mit grosser scham vnd czäherden augen

dem riter antwurt vnd sprach. Herr weder freüntliche liebe noch versprochne treffe mich her gefüret noch herbracht haben, sunder allein durch meins mans gepot her komen [354^c] bin der mer eüern vnordenlichen willen vnd begir besorget dann sein vnd meiner eren, der hat
 5 mich tûn zû euch komen vnd ich durch sein gepot auff eyne fart geschickt vnd bereyt bin zetûn eüer gefallen. Het sich der ritter der frawen wort vor sere gewundert, nun sich Gilberto der frawen man grosse freye miltikeyt noch vil serer wundern ward vmb des willen sein grosse inbrünstige vnordenliche liebe in eitel diemütige pein be-
 10 keret zû der frawen sprach. Edle frawe nun wöll got nicht ist im anders als ir gesprochen habt daz eüer reyne ketische weybliche ere durch mich verseret vnd geunreynt werd, vnd daz ich des ere eyn czerstörer sey der mein vnd meiner überflüssigen liebe pein leyd vnd schmerzen getragen hat, darumb vmb solcher freyen eüer vnd
 15 eüers manns diemütige miltikeyt willen eüer her komen zû mir nit anders sein sol dann als wäret ir czû eüerm leiblichen brüder komen, vnd wenn euch liebet wider heym zegen das stee zû euch vnd sagt eüerm mann mein danck vnd lon nach dem euch füglich duncket seiner miltikeyt die er mir durch euch beweist hat, ich hin für vmb solicher
 20 freüntschafft willen sein [354^d] vnd eüer brüder sein will. Do die frawe dise züchtige wort vernam alle wol zemüt ire tag nye fröer ward zû dem ritter sprach. Herr keyn ding mich nye mocht gelauben machen wann ich eüer zucht ere vnd tugent bedacht hab daz es mir anders von euch ergeen solt dann es mir bis her ergangen ist, vmb des willen ich
 25 euch stäts pflichtig bin eüer lob ze meren. nach disen Worten von im vrlaub begeret daz er ir williglich gab vnd mit vil manchem seinen diener mit grossen freuden vnd eren zû hauß beleyten thet. Do die edel fraw Gilbert irem mann alle sach, wie sy der ritter empfangen vnd nach dem das freündlich vrlaub geben het saget. des Gilbert be-
 30 sunder freud het vnd hin für des ritters gröster freünd was. Nun der nigromant dem von dem ritter grosser lon vmb des schönen garten willen bereyt was beyder grosse redliche miltikeyt sahe vnd die vername, sunder des ritters gen der frawen do er sprach, des wöll got nit do er Gilbert freye miltikeyt sahe das zenämen das er nit geben
 35 mocht darumb er Gilbert miltikeyt ferr über die seinen achtet auch er in der edeln tugent der miltikeyt nicht der mynste wolt [355^a] gehalten sein, den riter was er im versprochen het frei vnd ledig saget, des der ritter e scham het dann nicht allen vleis thet domit der nigro-

mant den versprochen lon nām, aber alles vmb sunst was dann er sich
 nit minder tugenthaftig als beyd herren sein daucht, vnd nach dem
 dritten tage seinen schönen garten weg nam den ritter vnd die andern
 got befalhe von dann schied, also in des ritters hercz die vnmässig liebe
 5 sich endet vnd erlasch sich alle in züchtig liebe vnd caritat bekeret.
 O ir edeln frawen waz wöll wir nun sprechen wer hat do an dem wir-
 digisten gewürcket der edel ritter Ansaldo oder Gilibert oder der ny-
 gromant. ich laß mich beduncken der ritter der aller sach eyn anfang
 vnd vrsach gewesen ist am freyesten sein miltikeyt gebraucht hab der
 10 mer dann yemand in liebe enzündet was den gewunnen raub in seinem
 gewalt het, vnnd so vil nachfolget das mich sere fremde deucht cze-
 gelauben das man Gilibert vnd des nigromant czû des edeln ritters
 Ansaldo miltikeyt gleichen möcht.

Wie künig Carlo zû eyner vnedeln doch eyns ritters tochter
 15 aber küniglicher art vnge[355^b]leich iunckfrawen lieb gewan der
 sich seiner eynfältigen gedanken selbes schāmen ward nach dem
 er die selben iungen mit samt eyner irer schwester erberlich begabt
 vnd verheyret.

Wer möcht volkomenlichen das mancherley gespräch der wirdigen
 20 gesellschaft sagen welicher vnder den dreyen mer tugent gebraucht het,
 etlich sprachen der ritter. etlich Gilibert, etlich der nigromant in frawe
 Dianora sach, daz vns klar zemachen zelang würd, vnd domit sich der
 frauen krieg bald stillet der künig frawen Fiametta gepot fürpas ze-
 sagen, die sich nicht hindern ließ anhub vnd sprach Ir leüchtenden
 25 frawen ich bin allwege solicher meynung das man in solicher gesellschaft
 als die vnser ist klärlich vnd lauter reden solt domit die verborgen rede
 vns nicht vrsach geben die gesagten meynung zedisputiren, dann solchs
 disputiren den schülern vnd studenten zûgebürt, vnd vns spinneln vnd
 rocken zûgehöret douon zereden vnd ich als die auch willen het euch
 30 was zweifelhafter materi czesagen, die will ich faren lassen seitmale
 ich euch vmb der gesagten willen [355^c] in krieg vernym vnd ist mein
 syn euch eyne nit von eynem schlechten mann, sunder von eynem gros-
 sen künig zesagen wie der von eren wegen vnbeczwungen also ritter-
 lichen würcket vnd sein miltikeyte brauchet als eter yegliche vileicht
 35 wol mag vernomen vnd gehört haben. wie künig Carlo der alt den hey-
 ligen sig gewan wider den künig Manfrede, zû der zeit die Gibellini

von vnser stat außgetriben vnd die Gwelffen eingesezet warden vmb
 des willen eyn ritter genant herr Neri Linbeti sich mit allem seinem
 haußgesind vnder nyemants gewalt seczen wolt dann alleyn künig Carlo
 gewalt vnd das in dem land an eyn eynig end, do er on sorg vnd mit
 5 frid bis an sein end leben meynet vnd wol auf eyn vierteyl meil von
 eynem castell genant Stabia in den ölbaumen kesten vnd nußbaumen
 nach dem die selbig gegent gab im eynen schönen köstlichen palast bauet
 mit eynem lustigen weiten garten von allerley gefrucht, vnd mitten in
 dem garten nach vnser gewonheyt eynen schönen weyer darinn allerley
 10 visch do der edel ritter nit began dann täglich seine bewē czebessern,
 vnd fruchtper machen. In solichem seinem stant vnd wesen [355^d] eins
 tags sich begab daz künig Carlo über land reytt in die gegent do der
 riter wonet bekam do er von dem schönen palast vnd köstlichen garten
 vernam den bald begert zesehen, vnd dem ritter enpot wie er auf den
 15 selben abent mit vier gesellen czû im komen wölt daz nachtmal mit im
 zeessen in seinem schönen garten, daz des ritters grosses gefallen waz
 bald herrlich zûbereyten thet mit seinen dienern sein ordnung gab den
 künig zeeren, in frölich do er kam in seinem garten enpfing vnd do
 der künig den schönen gartten höstlichen palast gar wol durchsehen
 20 het den er nach seinen wurden lobet nach dem sich zû dem schönen
 weyer dobei die tisch bereyt waren das nachtmal zeessen nider seczet
 vnd grafen Guido Manfort der seiner gesellen eyner was zû im zesiczen
 gepot, nach dem herren Neri dem riter das selbig gepot thet, den
 andern dreyen die in seiner gesellschaft komen waren er gepote das sy
 25 nach herrn Neri gegebne ordnung in zû tisch dienten. nach dem von
 erste die köstlichen wein vnd edle gericht mit loblicher ordnung on re-
 den vnd alles geschrey an dem der künig besunder gefallen het sein freud
 vmb des eynigen gelegen end [356^a] sich stäts meret. In dem czwû
 schön iunckfrawen yegkliche bei zwelf iaren alt zû dem garten eingien-
 30 gen der schönes hare auf irem haubt dem gold geleich was darauf
 yegliche ein köstlich von berlein vnd gold eyn kränzlein het, in irem
 angesicht beyd engel dauchten mit subtilen schneweissen hemdlein ir
 schöner leib bedeckt was von der gürtel hinab padeglione geleich, vnd
 yegliche auf irer achßeln mit eynem vischnecz von seiden gestricket vnd
 35 in ir rechten hand eyn steüre stecken also gegangen kamen den eyn
 iungs meydlin mit eyner pfannen vnd treifûs vnd eyn püntlin reisach
 vnder dem arm in nachfolgt, do nahend bei dem tisch vnd bei dem
 weyer bald angezünt vnd eyn röschs feürlin gemacht, daz den künig

fremd nam eyn klein vngeret auf im selbs gestanden zesehen was doch die schönen iunckfrawen tûn wölten, beyd als oben gesprochen ist für den künig kamen mit grösser zucht vnd scham im ere vnd reuerenz theten, nach dem beyd iunckfrawen mit den neczen vünd stecken in
 5 den weyer giugen den daz wasser bis an ir brüstlein schläge, in dem eyner des ritters knecht den treifûs vnd die pfannen mit dem öl zebachen [356^b] auf daz feûr seczet vnd wartet wenn im die iunckfrawen der visch auß dem weyer wûrfen do die eyne das necz hielt die ander steûret, des in der kûng mit grossen freûden zûsahe vnd in kürcze ein
 10 schöne brü visch gefangen heten die sy zûsehent des kûngs auß dem weyer dem knecht bei dem feûr zebachen zû wûrfen der sy also lebendig in die pfannen leget vnd nach dem beyd von eygner tugent gemeystert waren die schönsten fisch also lebendig fûe den kûnig auf den tisch trûgen vor im auf dem tisch springen vnd zabeln liessen, des der
 15 kûng im grösser freûd vnd kurzweile nam dann het er eyn grosses turniren gesehen, in dem die visch in der pfannen bereyt waren, die selben nit von herren Neri dem kûng für köstlich essen geben vnd geordiniret warn sunder vmb eyner seltsamkeyt willen in maû als ir vernomen habt von den zweyen iunckfrawen gefangen waren Do nun die
 20 iunckfrawen ir vischen verbracht heten auß dem kûlen weyer gangen warn in ir schneweiß subtiles schönes nasses hemdlein an irem schneweißen leib behing als dann nasses gewand, sunder leinwant an irem leib verbergen mochten das des form von dem kûng [356^c] vnd den andern nit gesehen wûrd, in diser maû auß dem weyer gingen vnd sich
 25 beyd mit dem schnellsten zû hauû in ir kamern fûgten. Der kûnig der graf vnd ire diener yeglicher besunder der iunckfrawen grosse schöne weis vnd zûchtig gepârd nit verloben mocht, doch daz mer der kûnig dann anders nyemand als der do mer die schöne ires leibs acht vnd wargenomen het dann die andern, vnd do sy auß dem wasser kamen
 30 fürwar mit wem sy wâren gestochen worden sein niemand empfunden het auch er mer ir überflüssige schöne bedencken ward daz er nit weût wer sy waren das im in seinem herczen eyn brinnende begire erwecket durch die er vernam daz er in vnnûssige liebe fallen vnd enzündin müût wo man der iunckfrawen nit hût het. Auch nit wol weût weliche
 35 vnder in die sein solt die im am meysten lieben vnd gefallen solt, also gancz was eyne der andern geleich geschicket. do er nun gût zeit in solchen gedancken gestanden was sich gen dem ritter kert vnd fraget wem die zwû also zûchtig iunckfrawen zûgehörten. zû dem der ritter sprach.

Genädiger herr es sein mein töchter vnd beyd zû eyner stund auß müter
leib [356^a] geboren worden, die erst genant Genetra die schön die
ander Isota die weis. Der künig sy dem ritter über alle iunckfrawen
lobet in tröstet bald männer zegeben. des sich herr Neri entredet czû
5 dem künig sprach er yeczund daz zetûn nit wol geschicket wâr, doch
wenn im got zû besserm vermügen hâlf er sy versehen wölt. Nun waz
der künig nit anders mer warten zeessen dann allein der frucht In dem
die zwû iunckfrawen in zweyen seiden schauben kamen yegliche in der
hend ein silberin schalen darinn etlich manch frucht nach dem die zeit
10 gab, die sy mit grosser reuerencz vnd züchtigem gepârd für den künig
auf den tisch seczten, das getan sich beyde eyn kleyn zeruck czugen
anhûben zesingen der gesang so süß vnd lieblich was daz den künig nit
anders daucht wie alle englische schare do wâren seines munds vnd
augen offen vergaß die schönen iunckfräulein hören zesingen, vund
15 do sy ir lieblich gesang von hoher liebe verbracht heten mit züchtigem
gepârd nyder für den künig knyeten seins vrlaub begerten dem ir ab-
scheyden nit lieb waz doch sein vrlaub vergûnnet mit dem daz nachtmal
eyn ende het der künig mit seiner gesellschaft [357^a] auf zû roß saß,
den ritter mit seinen schönen töchteren ließ von dann in den künig-
20 lichen stant reytt. Der künig der in der flamm der brinnenden liebe
enczündet was daz er nit mit kleinen schmerczen verborgen hielt. vnd
vmb keyns geschäfts willen die sich täglich begaben, er der schönen
beyder iunckfrawen vergessen mocht In solicher maß in hoher liebe
enczündet was daz er an keyn ander geschäft mer mocht gedencken,
25 erst anhûb des ritters herr Neri kuntschaft zenâmen domit er mit
mer gelimpf zû dem komen möcht das er in seinem herczen verborgen
trûg vmb des willen gar oft in den garten kam seinen lust zenâmen
die schönen iunckfrawen zesehen, in solche liebe enczündet das er das
in keyn weg mer vertragen mocht, dem grafen Guido seinem iner-
30 sten rat das zewissen thet vnd das auf solche meynung das der graf
nit alleyn dem gûten ritter eyn tochter sunder alle beyd nâme. Aber
der graf der ein weis fürsichtig man was zû dem künig sprach. Genä-
diger herr mich nymet fremd vnd das vileicht mer dann eynen andern
deucht das ir mir gesagt habt, als der mer dann keyn ander vnser syten
35 vnd [357^b] gewonheyt erkant hab vnd mich hat in vnser iugent nye
bedeücht darinne die liebe mer stercke kraft vud macht hat dann in
dem alter, solcher sach halben das ir nie weder pein noch smerczen ge-
tragen habt vnd yeczund in eüerm alter also eynfältig worden seit das

ir euch vmb vnmässiger liebe willen in solche irrung fallen laßt das vor
 allen weisen mannen wol ein groß wunder mag geheysen sein, ich
 sprich vnd sag euch vnd wär mein rat ir sähet an das ir eyn neu künig
 in disem künigreich seit ettern harnasch vnd waffen noch nit von euch
 5 gelegt habt das künigreich on sorg vnd frid zebesiczen vnd seit noch
 vnder vnerkanten volck das aller list vnd boßheyt vol ist vnd habt euch
 noch nye nun eyn male mit frid vnd on sorg mügen zû tisch seczen
 vnd ir alle dise sache czeruck legen wölt vnd der vnmässigen liebe die vil
 manchen fürsten als ir wol wißt sein ere lob leib vnd gût genomen
 10 hat, darumb ich mich wundern muß dann das sein nicht zeychen des ir
 willen habt euer künigliche kron zemerer vnd die zeerhöhen, sunder
 die zenydern vnd eynem iungen on synn euch gleich machen noch mer
 vnd erger ist, das ir den [357^c] gûten herrn vnd armen ritter seiner
 töchtern also berauben meyner der euch mer dann sein vermügen ist in
 15 seinem haûse zucht vnd ere erpoten hat vnd euch zeeren vnd nit zû
 vneren die schier nackenden seine schönen töchtern hat sehen lassen,
 domit ir sein trawen vnd hoffnung zû euch vernâmen müget vnd er on
 zweifel euch für eyn redlichen künig vnd nit ein rauber helt, wie ist
 euch so bald die groß schmacheyt die Manfredi frawen getan ward ver-
 20 gessen die euch aufgetan vnd den eingang des künigreichs geben haben,
 wo ward ye verraterschaft wirdig grosser pein dann die wär dem armen
 ritter czû eyner stund sein ere trost vnd hoffnung zenâmen, wo das ge-
 schâhe was wûrd man nun gûts von euch sagen euch deficht vileicht
 gnûg gût außzûg zehaben zesprechen. ich tet es darumb das der ritter
 25 eyn Gibelin was, wär aber daz eyns künigs freye gerechtikeyt daz die
 dosigen die vnder seine arm vnd beschûczunge fluhen sein wer sy wöllen
 solten also außgericht werden gelaubt mir herr es wûrd got vnd die
 welt verdriessen, darumb ich euch gedenck als ir künig Manfredi mit
 der hilff gots gesiget vnd überwunden habt, also euch selbs überwindet
 30 des bit ich [357^d] euch. vnd tût als der die andern straffen sol euch
 selbs straffet vnd euer vnmässige begir in euch selbs mässiget vnd von
 euch schlahet vnd nit mit sollichem mackel das ir redlich gewonnen habt
 das ze verderben vnd entwicht machen mit dem der graf sein red endet
 des red vnd wort dem künig sein gemût sere beschwâren vnd im des
 35 so vil mer pein gaben als so vil mer er erkant das der graf im die war-
 heyt gesagt het, ein klein in gedanken auf im selbs stünd, vnd nach
 etlichem verborgen seûfzen zû dem grafen sprach. Graf Guido für
 war keynen meinen veind ich so starck nit erkenn den ich nit e vnd

gerincklicher mit meiner tugent überwinden meynet, dann ich in diser
 sach mich selbes vnd meinen brinnenden willen tûn meinete, doch wie
 wol mein vnrũ pein vnd schmerczen groß ist so haben mich doch etwere
 züchtige wort in solicher maß durchgangen das ich e lange zeit verget
 5 euch durch meine werck sol sehen machen als ich ander leüt wider
 sten vnd überwunden hab also auch mich selbs tûn sol. Nach disen
 Worten der kûng aufsaß gen Napels reyte alle vrsach übel ze tûn die
 weg zenâmen vnd der vergessen vnd dem riter der empfangen dienst vnd
 10 ernen lonen [358^a] vnd im die widerkeren, vnd wie wol es im ein schwâr
 ding was ein andern das zebesiczen machen, des er ob allen dingen der
 welt am liebsten het, doch sich gedultiglich schicket vnd bereyt den
 iunckfrawen mânnen zegeben vnd die nit als des ritters tœchter sunder
 als sy sein eigne tœchter wâr verheiret vnd mit reicher heimsteur
 grossen herrn beyd zeweiben gab die schönen Genevra herrn Maffeo
 15 von Paliczi gab vnd Isota herr Wilhalm eynem fürsten von teutschen
 landen der bei im eyn grosser herr was. Do er nun die zwû sein aller-
 liebsten iunckfrawen versehen het mit grosser verborgner pein leyde vnd
 schmerczen auf zeroß saß in Pûllen reytt do er also lang wonet bis die
 keten der gebunden liebe brach vnd daz brinnend vnmässig feur seiner
 20 überflüssigen liebe erlasch. Nach dem er bis in sein end seins lebens
 frei vnd frölich lebet. Nun möchten vileicht etlich sprechen das eynem
 kûnig eyn kleine gab wâr zweyen iunckfrawen mânnen czegeben daz
 gib ich nun zû. aber groß vnd noch vil grösser ich sprich daz es sey,
 das ein liebhabender kûnig vnd bûler daz getan hab die dosigen eynem
 25 czû eynem weib zegeben die er ob allen creaturen der welt am liebsten
 het vnd er seiner gro[358^b]ssen liebe weder frucht noch blûmen nye
 empfand. Also der herrlich kûng würckt miltiglichen den ritter auch
 begabet die iunckfrawen seine tœchter loblichen eret vnd sich selbes
 überwand.

80 Wie eins schlechten manns tochter genant Lisa zû kûnig Peter
 von Cicilia in vnmässige liebe enczündet vnd daz in maß daz sy in
 grosse kranckheyt fiel das dem kûng ward zewissen getan der sy
 persönlich sehen kam sy tröstet, nach dem sy eynem edelmann zû
 eynem weib gab, vnd in widerkerung irer liebe zû im er nit ander
 85 frucht solicher liebe von ir enpfeng, dann eyn mal an iren rosen-
 farben mund küsset vnd hinfür stâts ir ritter wolt genant sein.

Frawen Fiametta histori vnd netz mår zû end komen ist vnd der künig solicher milten tugent die zwû schönen iunckfrawen zebegaben von allen frawen vnd mannen gelobet waz Nach dem der künig Pampinea der züchtigen frawen sein gepot thet fürpas zesagen die anhub vnd sprach. Ir edeln frawen ich gelaub nymand sey der nit sprech als ir gesprochen habt in künig Carlo lob außgenommen etlich die im neid tragen vnd Gibelin sein. Nun seitmal wir von [358^e] künigen vnd irer miltikeyt sein zered komen, so ist mir auch zû der stund eyn materi von eynem künig eingefallen nit minder zeloben als die vor gesaget gewesen ist, vnd was im eyner schönen Florenczer iunckfrawen zûstünd mein will ist euch das zesagen. Zû den zeiten do die Franzosen von dem künigreich Cicilia ausgeschlagen worden, in der stat Palermo vnser Florenczer einer gesessen was der was eyn specier oder apotecker der was mit namen genant Bernardo Puzini eyn genûg wolmügend man seins handelns der von seinem weib nit mer dann eyn eynige tochter het mannes zeitig vnd czû der zeit künig Peter von Aragon sich der inseln Cicilia herr gemâchet het. vmb des willen in der stat Palermo eyn herrlich stechen vnd turniament mit allen seinen herrn vnd fürsten machet, in solichem stechen vnd grossen freuden Bernardo Pucini tochter die mit irem taufnamen Lisa genant was an eynem fenster mit andern frawen stünd das küniglich stechen zesehen. die künig Peter reitten vnd rennen sahe daran sy grosses gefallen het das sy zû im in solch grosse liebe enzündet das es nit zesagen ist Do nun das turniren vnd stechen eyn [358^d] end het sy zû hauß gieng alle ire synn gemüte vnd gedanck des künigs halben beschwärt waren an keynerley anders dann alleyn an den künig gedencken mocht vnd des sy sich am meysten beschwäret sein dauchte das was das sy sich von nydrer gepurt erkant vmb des willen irer brinnenden liebe in den künig sy kleyne hoffnung het der ein genügen zetûn wol dauchte vnmüglich wår solicher irer liebe zû gûtem end zekomen, doch darumb nit ablassen meynet, noch sich solcher vnmässiger liebe zeruck ziehen, sunder der mit macht nachfolgen wölt, doch daz grosser scham sorg vnd forcht halben nyemand öffen noch sagen dorst, vnd ir pein so vil dester grösser was das ir liebe dem künig vnwissend was vmb des willen sich ir liebe pein leyd vnd schmerzen stâts meret. vnd das in solicher maß das sy in schwäre kranckheyt fiel vnd von tag czû tag an irem leib abnam nit mynder als der sehne an der sunnen tût des sich ir vatter vnd mûter sere betrübten als die der vrsach solicher irer kranckheyt nit vernâmen mochten. doch stâtes mit

- rat der ärztz trost vnd hilf alles das theten daz sy daucht zethün wär, aber alle ercznei [359^a] vmb sunst was als der hercz in liebe verbrant was, vnd sy als die irer hoffnung der liebe eyn genügen zetün verzaget het nit lenger zeleben. Der güt ire alter vatter vnd auch mütter als
- 5 die sy on maß lieb heten sich gen ir zū allem dem das ir liebet stätz erputen, aber grosser scham halben die vrsach irer krankheyt in verschweig vnd nicht saget. In solichem ir zū gedanck kam wie sy wol mit gūten iren eren e sy stürb dem künig ir brinnende liebe möcht zewissen tūn, vnd eyns tags iren vater bat daz er ir komen schüff eyne
- 10 geiger der was von Regio vnd mit namen genant Minuczo derselbig geiger czū der zeit der best geiger vnd meystergesang czesingen was den man in vil manchen landen het finden mügen vnd waz Bernarde ires vatters gütter freünd vnd gūnner des Bernardo der tochter czelieb willig waz bald nach im schicket vnd zū der tochter komen thet, aber nit anders
- 15 meynet dann die tochter des geygers begeret het in auf der geigen singen ze hören, vnd do Minuczo czū ir komen waz vnd sy irer krankheyt getröst hete anhub mit eynem seinen geiglein mit süsser lieblicher stim zesingen daz der schönen kranken iunckfrauen-[359^b] e ir pein vnd flamm der liebe mert dann trost vnd hilff gab, wo er sy domit trö-
- 20 sten meynet. do nun die iunckfraw seins singes güt zeit czūgehöret het sy begert alleyn mit im zereden. des vater vnd müter willig waren sich zeruck zugen ander geschäfte außzerichten, sy anhub zū Minuczo sprach. Minuczo ich hab mir dich erwelt zū eynem getreuen hūter meiner eren vnnd eyns meinen geheym, vnd hoff zū dir du das nyemand dann dem
- 25 alleyn den ich meyn das zewissen tūest vnd mir in meinen nöten gehilfflich seyest des bit ich dich durch got vnd aller liebe willen darumb merck eben was ich dir sag. Du solt wissen do vnser genädiger künig Peter an dem andern tag sein stechen vnd turnieren nach katelanischem syten machet, er mir in solicher zeit vnd stund zū gesicht kam das sich in mir vmb
- 30 seinen willen eyn feür der hohen liebe enzündt ist daz ich besorg wo mir das durch in nit geleschet wirt daz ich sein in kürcze sterben muß dann mein hercz vnd gemüt sich des in solicher maß betrübet het, das ich dohin komen bin als du mich sihest wie wol ich erkenn das mein liebe vnd liebhaben czū eynem künig vnfüglich ist mir [359^c] nit zū-
- 35 stünd dann nit geborn darzū noch des wirdig bin, doch darumb nit gelassen noch solche vnmässige liebe von mir geschlagen mag, vnd seitmal ich das nit lenger vertragen mag e wöllen sterben vnd mir selbs den tod tūn dann in solicher pein leyd vnd schmerczten der liebe also

zeleben. Aber wo ich mit tod vergee vnd dem künig mein liebe vnwis-
 send sein wirt daz mir besunder pein bringet, darumb ich dir zû mir
 gerüffet hab nyemand vernim der mir in disen sachen besser sein müg
 dann du vnd dem ich mer dann yemand getrawen müg nun bitt ich dich
 5 durch got vnd aller liebe du wöllest mich meiner bete geweren vnd mir
 die nit versagen. vnd wenn du meinem genädigen herren mein liebe leyd
 pein vnd schmercen daz ich vmb seinen willen trag. als du wol sihest
 zewissen getan das du mich daz selbige wider vmb wissen lassest, domit
 ich frölich sterben vnd auß diser pein in gene welt farn müg Nach disen
 10 Worten kläglich anhüb zeweynen vnd ir leyd zeklagen. Minuzo der
 iunckfrawen hohes edels gemüt vnd herten fürsacz sich wundert vnd
 fremd nam in ir kläglich weinen erbarmt, zehand gedacht ir mit zuchte
 vnd eren vor dem [359^d] künig zedienen czû ir sprach. Lisa ich gib dir
 des mein treü vnd leb des on zweifel du solt von mir getretliche ge-
 15 dienet vnd vnbetrogen sein, nach dem sy irer hohen liebe sterckt lobt
 vnd tröst das sy ir hercze liebe vnd gemüt also edelm wirdigem künig
 geben het sich aller in iren dienst erpot vnd freüntlich bat sy sich trösten
 vnd wol gehalten solt, E der dritt tag verging er hoffet also zewürcken
 das sy von im gûte mâr haben solt, ir trost rat vnd hilf on czweifel brin-
 20 gen wölt, vnd domit er nit zeit verlûre yetzund gen vnd der materi den
 anfang geben wölt, die iunckfraw in von neuem batt er sy im ließ be-
 folhen sein mit dem er von ir schied vnd czû eynem genant Micho von
 Senis ging der gar ein köstlich reder vnd tichter was den er durch bet
 zwang das er im das hernach volgend lied vnd gesang machet. Nun wol-
 25 auf du edle liebe far hin für meinen herren tû im zewissen mein herte
 tragende pein sag im wie ich des tods begern bin vnd forcht halben mei-
 ner überflüssiger liebe geschweig mit auf gehalten henden genädiger herr
 vnd liebe mein genad vnd hilff an euch beger. Nun gee hin liebe zû
 meinem herrn do er ist den ich ob allen [360^a] mannen liebhab sein
 30 beger der mir mein hercze in süsser liebe verwunt hat, vmb des willen
 ich des forcht hab des stunde zekomen nyemand wissend ist. Groß vnd
 schwâr ist mein pein die ich liebe durch dich trag, darum tû im das
 czewissen so will ich nit mer klagen noch lenger leyd tragen seitmal ich
 o liebe zû im liebe gewan, hast du mich nit so beherczend als forchtsam
 35 gemacht daz ich nun eynmal mein begeren vnd willen dir het beweisen
 mügen. dem der mich also gefangen vnd beschwärt helt, vmb des willen
 also zeleben mir besser der hert tod wäre, es möchte im vileichte noch
 leyde sein wo er vernâm mein grosse pein, wâr mir nun verlihen im

mein kläglich wesen vnd herten schmerczen zewissen zetün. Aber seid
 es liebe dein gefallen nit gewesen ist das du mir so vil hercz geben
 hetest daz ich meinem herrn mein hercz het offen mügen so send mir
 doch bald den tod des bit ich dich doch noch zû dir in hoffnung stee,
 5 deiner genad begere, o herre süsse liebe bis mein ingedenck als ich
 sein was des tags do ich in mit schilt vnd wapen, verdeckt sahe mit
 andern rittern lanzen vnd spieß brechen do ich von erst zû im liebe ge-
 [360^b]wan, edle liebe gedenck daran nit laß mich entgelten das ich
 arm vnd sein nit wirdig bin Dise wort Minuzo in sein geigen tönnet in
 10 maß als dann soliche materi begern was, darnach gen hof für des königs
 tisch an dem dritten tag kam zû dem der künig sprach das er im was
 neus in die geigen sung. Minuczo der sich nit saumet mit süsser die-
 mütiger senfter stimm anhüb in sein geigen zesingen in sölicher maß
 vnd form sein gesang leytet daz alle die in dem küniglichen sal waren
 15 nit menschen sunder menschen schaten sein dauchten, alle schweigend
 mit samt dem künig zûhörten dann solch lieblich gedicht mit süsserm
 tone nie mer was gehört worden vnd do Minuczo sein gesang verbracht
 het der künig in fraget wo das neu gesang herkäm er het in des nit mer
 singen hören. Genädiger herre sprach Minuzo es sein noch nit drey
 20 tag das die wort in den tone getönet worden, wem daz zeliieb sprach
 der künig. Minuzo sprach. herr es ist verborgen außgenommen euch allein
 ich es sagen mag. do daz der künig vernam mer begiriger dann vor daz
 zewissen vnd als bald er geessen het von dem tisch aufstünd Minuzo zû
 im in die kamern rüfft, do [360^c] im Minuzo alle sach der krancken
 25 iunckfrawen halben sagt vnd im ir grosse liebe zewissen thet, des im
 der künig besunder freud name die iunckfrawen lobet vnd sprach. Nicht
 alleyn er sunder eyn yeglich person irer kranckheyt pein vnd schmer-
 czen mit samt ir leyd tragen solt im sy lassen erbarmen vnd zû Minuzo
 sprach das er von seinen wegen zû ir ging sy tröstet vnd wie derselbig
 30 tag nicht vergen solt er wölt komen sy czesehen, wer fröer dann Minuzo
 das er also gûte mâr der iunckfrawen erworben het vnd ir bringen solt
 von dem künig vrlaub nam nicht rast bis er mit seiner geigen zû der
 iunckfrawen kam ir des künigs potschaft warb, nach dem was er dem
 künig von iren wege gesungen hete auch ir das in die geigen sang des
 35 die iunckfraw also grossen trost enpfing das man czehand alle zeychen
 gûter gesuntheit bei ir vername vnd das an keyn person des hauß ver-
 dencken Also mit grosser lieblicher begire des künigs ires allerliebsten
 herren zûkunft was beyten, vnd der edele künig der von natur ein milt

diemütig man was, der iunckfrawen liebe pein vnd schmerczen im sere
 zů herczen geen ward, der [360^d] iunckfrawen schöne vnnnd ir freunt-
 liche tugent ye lenger ye mer bedencken ward als der sy kant vnd irer
 zucht vnd schöne gůte kuntschaft het, vmb des willen gancz in diemü-
 5 tigkeyt vnd erbarmung gen ir fiel vmb vesperzeit auf ze roß saß spaczi-
 ren zereiten in meynung die iunckfrawen zesehen, vnd do er bekam do
 der speciale ir vater mit hauß saß vnd eynen seinen garten den er het
 im schůff auf tůn, darein er mit etlichen seinen herren spaczieren ging,
 nach dem der iunckfrawen vater zů im rűffet im seinen schönen garten
 10 lobet vnnnd in fraget wo sein schöne tochter wär vnd ob er sy noch ver-
 heyret het. Der erber man dem kűnig antwurt vnd sprach. Genädiger
 herr sy ist noch nicht verheyret, sunder sere kranck doch got sey lob
 seyder none czeite her hat es sich sere wol vmb sy gebessert. Der kűnig
 wol vernam was ir besserung bedeuten wolt czů dem gůten man sprach.
 15 wärlich nun wär es sere schad das soliche schöne creatur als sy ist so
 gächeling on frucht irer schöne auß diser welt so bald vergen solt wir
 wöllē geen sy czesehen, vnd mit zweyen seinen dienern vnd iunck-
 frawen vatter auß dem garten zů der iunck[361^a]frawen in ir kamern
 gingen do sich der kűnig zů dem pete darinn die iung lag nyder seczet
 20 die in dem pete aufgesessen waz. vnd sein von ganczer freud ires her-
 czen wartet die freuntlich grűsset bey irer schneweißen hand nam zů
 ir sprach Schöne iunckfraw was bedeut daz was will das sprechen das
 ir euch laßt wee haben wir wöllē euch bitten vmb vnsern willen ir wölt
 euch vns zeliēb trösten vnd wol gehalten, domit euch euer gesuntheyt
 25 bald wider kom vnd frölich zů götlicher e greiffen müget, do zů wir
 helffen vnd raten wöllē. Do sich die schön iunckfraw den angreifen
 vername den sy ob allen mannen am liebsten het, ob sich ir hercz in
 freud seczet das bedenck cyn yeglich liebhabende person bei im selbes,
 vnd wie wol sy scham het doch als grosse freud enpfing das sy sich
 30 gancze bedüncken ließ sy in dem paradeyß wāre vnd so sy best mocht
 dem kűnig antwurt vnd sprach. Genädiger herr die vrsach meiner gros-
 sen kranckheyt ist das ich mein kleine stercke vnd vermügen grösser
 pein hab vndertan machen wöllē dann mir czetűn műglich gewesen ist,
 doch zů got vnd euern genaden hoff ir mich balde sölt [361^b] gesund
 35 sehen. Der kűnig alleyn der verborgne rede vernam, vmb des willen
 sy stātes in mer vnd hűher tugent achtet, mit im selbs das bűs vngelűck
 vermaledeyet das soliche schöne creatur vnd tugentreiche iunckfraw also
 von schlechtem vnedeln mann solt geboren sein. Also eyn gůte weil

bei ir was vnd nach mancherley rede vnd trösten von ir vrlaub name
 wider auf zû roß saß wege reyitt. Des grosse diemütigkeyt des künigs
 die iungen zesehen czekomen von yederman des gelobet was vnd der
 iunckfrawen in grosse ere zûgezogen warde, die nach ires allerliebsten
 5 herren vnd bûlen abscheyden alle wol zemût frölich vnd content beleyb,
 vnd mer dann iunckfrau ires bûlen ye gethet vnd hinfür stäts von mer
 hoffnung getröst vnnd geholffen was. in wenig tagen frisch vnd gesund
 ward frölicher vnnd schöner ward dann sy ye gewesen waz. Nach dem
 nit lang verging der künig mit der künigin sein ordnung geben het die
 10 iunckfrawen ze verheyren vnd was er ir in widerkerung irer grossen
 liebe zû im geben vnd tûn wölt mit samt der künigin auf zû roß saß in
 der iunckfrawen garten ritten, do sy der iungen Lisa [361^c] vnd irem
 vater für sich rûften der künig zû ir sprach schöne iunckfraw, die groß
 liebe vnd freundschaft die ir vns getragen habt euch bei vns grosse ere
 15 vnd genad erworben hat darumb ist vnser will vnd begeren an euch daz
 ir euern willen zû dem vnsern willen schicket domit auß zweyen willen
 eyn will werd, vnnd das vnser meinung ist das ist daz ir euch begetet
 vnd willig seit den man zenämen den wir euch geben meynen. doch dar-
 umb wir euer nimer mer vergessen wöllen vnd hin für alzeit euer ritter
 20 wöllen geheysen sein, vnd nit anders vmb solcher euer grossen liebe
 willen weder begeren noch nämen wöllen dann alleyn eyn mal an euern
 rosenfarben mund zeküssen, Die czüchtig iunckfrawe die schamhalben
 in irem angesicht röte empfangen het mit senfter diemütiger stimm also
 sprach Genädiger herr vnd künig mir zweifelt nicht wem das zewissen
 25 komet das ich euch lieb hab der mich für vnweis vnd eyn törin halten
 wirt glauben wirt ich von synnen komen sey vnd meinen nidern stant
 vnd arm gebornes wesen von dem euern nit erkenn so weyßt gott der
 almächtig das solchs als vileicht etlich [361^d] meynen meine gedanck
 seyen des nit enist, sunder alleyn do ich euch von erst sahe ir mir ob
 30 allen mannen liebet, vnd euch für eynen mächtigen herren vnd mich
 Bernardo specier tochter erkant mich eûer nit wirdig schätzet, aber
 von grosser überflüssiger liebe bezwungen an als hohes wirdiges end
 die brunst meines gemütes czeseczen als ir mer dann ich erkant vnd ge-
 sehen habt, daz nyemand in liebhaben oder gar selten im seinen gelei-
 35 chen erwelet, sunder alle nach der begire vnnd willen das sûchen geen,
 wider solichs ich mich vil dick geseczet hab, vnd do ich nicht mer mocht
 ich mir euch lieb zehaben erwelet vnd haben will die weile ich lebe,
 auch die warheyte zesagen do ich von erst zû euch in liebe enzündet ich

mich schicket stätz ettern willen meinen willen machen, ich rede das nit darumb das ich ettern willen eynen man czenämen den ir mir gebet das nicht gern thū, vnd das nicht liebhab das ir mir gebet vnd euch gefelt mir ze geben, sunder in eyn brinnend feür zegen ich willig bin wo daz
 5 eüer gefallen ist, vnd als ir gesprochen habt euch meinen riter zenännen eyns solchen ich nit wirdig bin des freüntlichen [362^a] küssen halben des ir von mir alleyn begeren seit der mit vrlaub vnser genädigen frawen der künigin gegenwirtige ir euch alzeit bereyt ist den zenämen wen euch liebet. Der grossen milten diemütigkeyt eüer vnd vnser frawen
 10 die mir vnwürdigen durch euch ist beweiset worden got der almächtig des an meiner stat euch lone mit disen worten schweig. der künig an der iunckfrawen antwurt grosses wol gefallen het des selben gleichen die künigin sy weiser vnd vernünftiger daucht dann iunckfräulicher natur gewonheyte ist sy ob allen andern iunckfrawen lobet. Nach dem der
 15 künig eynem iungen edelman czū im rüffet wol nit sere reich doch von güter narung mit namen genannt Pericon, dem gab er etlich gulden ring in die hand mit den er iunckfrawen Lisa mächlet vnd zū der götlichen e nam. Der künig vnd künigin die iungen mit köstlichen reichen kley- neten vnd Pericon mit czweyen steten begabten zū der iunckfrawen
 20 sprachen Lisa das sey dein heymsteüer was dir hinfür von vns gegeben wirt daz solt du wol sehen, mit disen worten der künig sich gen ir keret zū ir sprach Nun wir die frucht iunck[362^b]fraw vnser liebe von euch begeren zenämen. mit dem sy mit beyden armen vmbfing züchtig an ire beyde wang küsset In dem Pericon mit der iunckfrawen vater vnd mütter
 25 im grosse freüd nam, alle wol zemüt eyn köstlich frölich höchzeit machen. Auch vil manche sein die fürwar sprechen, wie der künig frawen Elisa hielt als er ir versprochen hete sich stäts iren riter nännet, auch hinfür nye mer weder in streit noch turner reytt das er das oberkleyd nicht anfüret das im von frawen Elisa gegeben vnd gemacht was worden,
 30 Also die tugenthaftigen vndertänigen edeln gemüte in liebe gefangen werden, vnd in wol tūn ewigs lob erwerben, aber heut bei tag ir gar wenig sein oder keyner ist der den bogen der vernunft zū anderm gereyßt trag dann alleyn die menschen zeberauben als ir dann täglich secht wie der merer teil der herren alles tiranni vnd wütrich worden sein.

35 Wie Sofronia meynet sy Gisipo Atenesy weib sey, do wy sy Tito Quinto Fulsio des Römers weib mit im gen Rom zohe, vnd Gisipo in grosse armüt felt vmb des willen gancz verzagt zeversten git wie

er ein getöt hab [362^c] domit er auch getöt werd, in dem von Tito erkant ward in von dem tod nam vnd sprach. er das mort gethan hete von eygem gñten willen sich des schuldig gab, in dem der der das mort getan het kam vnd sprach er der wär der den man getöt
 5 het vnd weder Gisippo noch Tito das gethan heten, vmb des willen Ottauia der keyser demselben der das mort gethan het vmb der andern zweyer willen vergab.

Do Pampinea irer rede geschwigenn was, vnnnd künig Peter seines edelen würcken in die iunckfrawen Lisa von den schönen frawen gelobet
 10 waz. Philomena durch gepot des künigs anhüb vnd sprach. Ir züchtigen frawen wer ist der der nicht wiß daz die künig wenn sy wöllen alle grosse ding vermügen vnnnd den in besonderheit züset herliche miltikeyte cze-
 brauchen, Wer nun vermag vnd thüt das im züset zethün der tüt wol, doch eynes solichen sich kein vermügeder rümen noch mit lob erhöhen
 15 sol als eynem zetün gebürt der eyn solichs thät vnnnd minder dann eyn künig vermöcht, vnnnd vmb mynder vermügen willen nit [362^d] mynder lobes' wirdig ist als eyn künig, mir czweifelt nit euch nit mynder gefallen vnd von euch gelobt sein sollen die do vnsers gleichen sein vnd dem künig gleich würcken als ir dann in eynem löblichen herrlichen
 20 würcken czwischen zweyen burgern vnd grossen freünden vnd meiner histori nach dem ich mir fürgenomen hab euch zesagen ir vernämen werdt. Zü den czeiten des hochwirdigen Ottauiano noch nit genant Augusto wol eyn regirer des keyserlichen amptes, in der stat Rom eyn edel man gesessen was genant Publio Quinto Fulvio, der het eynen
 25 seinen eynigen sun genant Tito Quinto Fulvio von sere subtilem gemüt vnd grosser lernunge, vnd domit der iung ein mächtiger philosofo würde in gen Attheni in die hohen schül schicket vnd so er best mocht in eynem seinen alten gütten freund befalhe genant Crement der den iungen Tito seinem vatter zeliß in sein eygen hauß nam in zü eynem seinen sun genant
 30 Gisippo gesellet, die beyde in eynem alter waren, vnd czü dem grossen philosofo Aristipo philosophia zelernen beyd iungen Tito vnd Gisippo von Cremente getan worden, also beyd iungen in [363^a] zucht kunst lere vnd tugent gleich in philosophia aufstigen, vmb des willen zwischen in solch brüderschaft vnd freüntschaft wüchß daz die nyemand dann allein
 35 der tod mocht scheyden, ir keyner on den andern weder rü noch rast haben mocht on eynander in keyn weg weder bei tag vnd nacht gesein mochten, ir lere von irem meyster zü eyner stund iren anfang het beyd

mit grossen synnen vnd subtilem gemüt von got begabet warn geleich
mit grossem wunder der andern czû hohen eren der philosophia bekamen
vnd daz mit grossen freuden des erbern alten Crement der nit mynder
den eynen als den andern für seinen sun hielt Also bei dreyen ganzen
5 iaren die zwen iungen ir wonung bei eynander heten, vnd in dem ende
derselben iar der alt Crement Gisippo vatter mit tot abgieng, die zwen
iungen in geleichem form in klagten beyd sich in schwarcz kleyten vnd
weder freünd noch yemand weist vmb des gächlingen todes willen wel-
chen von den zweyen iungen sy trösten vnd sein leyde klagen solten,
10 vnd nach etlichem vergangen monet Gisippo freünd mit im vnd Tito
waren in sterckten vnd trösten ein weib zenämen, vnd [363^b] im ein
schöne edele iunckfrawen von dem besten geschlecht der stat Athene er-
welet heten die was mit namen genant Sofronia vnd bei fünffzehen
iaren alt, dieselben vnuerzogen mit beyder iungen willen Gisippo zû
15 eynem weib gaben, vnd die zeit komen waz hochzeit zemachen eyns
tages Gisippo Tito seinen gesellen bat das er im gesellschaft tät sein
weib vnd braut zesehen, der ir noch nit gesehen het beyd miteynander
zû der iunckfrawen kamen die zwischen beyd iungen gesezt ward. Also
nach langem siczen vnd züchtigem gespräch Tito der Römer die grossen
20 schöne der iunckfrawen seins gesellen braut bedencken ward, im in
solicher maß lieben vnd gefallen ward daz in bedacht er mit augen sein
tage schöner züchtiger wolgeschickter frawen bild nye mer gesehen het
sy mit im selbs ob allen iunckfrawen lobet, doch des sich nit mercken
ließ zû ir in als grosse liebe enzündet als liebhaber zû schöner frawen
25 ye enzündet ward. Do sy nun also güt zeit bey eyander gesessen waren
aufstünden von der iunckfrawen beyd das vrlaub namen heym zû hauß
giengen. Tito allein in sein kamern ging von neuem der züchtigen iunck-
frawen [363^c] schöne bedacht, vnd ye mer er ir gestalt weis vnnd ge-
pärđ bedencken ward ye mer sy im lieben vnd er in liebe brinnen vnd
30 enczünden ward, des er nach etlichem schwären seüfczen wol enpfand
das im der stral der liebe sein hercz vnd gemüt verwunt het czû im
selbs sprach. O du ellends leben auf erden o Tito Quinto Fuluio wo
seczest du hin dein gemüt lieb vnd hoffnung, erkennst du nit durch die
empfangen dienste von Cremente vnd seinem haußgesind Gisipo meinem
35 liebsten freünd des die züchtig schön iunckfraw ist das ich die im ze lieb
in sölichen eren vnd reuerencz haben muß als wäre sy mein leiblich
schwester wes bedarft du dich ir dann also bekümern dich vnd dein
gemüt vmb iren willen in also grosse vnrü seczen sy liebzehaben wo

last du dich die blinden liebe hin füren vnd also blenden vnd betriegen,
 wo ist dein grosse hoffnung lere kunst vnd weißtumb tû auf die augen
 deiner vernunft erkenne dich selbs. O du ellender Römer bedenck die
 stat der gerechtikeyt zäum deinen vnkeüschlichen bösen willen mässig vnd
 5 schick dein begire zû andern sachen widerste vnd überwind dich selbs
 die weil du czeit hast, du solt, [363^d] nit wöllen noch des begeren daz
 do vnzüchtig vnd nit erber ist darzû du dich yeczund bereytest vnd wenn
 dir wissend wär das es dir werden solt. du soltest es mit aller deiner
 macht fliehen wöltest du anders der rechten waren freundschaft nach
 10 dem der lerer Tulio spricht eyne genügen tûn, vnd als dann soliche
 freundschaft begern ist, darumb Tito bedenck dich recht laß dein vn-
 mässig liebhaben, du solt das deinem freund tûn als du wöltest er dir
 tät. Also der güt iung Römer nach langem seinem mit im selbs reden
 gedanken vnd klagen, der iunckfrawen Sofronia schöne von neuem be-
 15 dencken ward, vnd alles das er wider sich vnd sein vnmässige liebe ge-
 sprochen het zeruck leget vnd sprach. Die gesez der liebe stercker vnd
 mächtiger sein dann andre gesez oder gepot, sy brechen nit allein die
 gepot der freundschaft, sunder die hymelischen gesez brechen wie oft
 hat sich begeben das der vatter die tochter liebgehabt vnd die beschlafen
 20 hat, der brüder die schwester, die stieffmütter den stieffsun das erschroc-
 kenlichere vnd vnerlichere ding sein. dann das ein güte freünd seines
 freündes weib lieb hat, das sich über zû [364^a] tausent malen bei
 vnsern zeiten begeben hat über daz so bin ich iung vnd die iugent ist
 keynem gesez der liebe verbunden noch vndertan, darumb was der
 25 liebe gefallen ist auch das mein gefallen sein sol, dann die züchtigen
 werck mer den betagten personen zûgehören dann den iungen, ich mag
 nit mer noch anders wöllen dann was die liebe will vnd ir gefallen ist,
 die grosse schöne daz züchtig gepärd diser iunckfrawen wol wirdig ist
 von einem yegklichen lieb zehaben dann ires gleichen in keynem land
 30 ist, vnnd wie wol sy meines freünds Gisippo ist vnnd ich als der do
 iung ist vnd sy lieb hab, wer mag mich des straffen ob ich ir liebe trag,
 Nun sei im wie im wöll so will ich sy liebhaben vnnd het sy lieb wär sy
 wes sy wölte, hier an sündet das gelück das sy e Gisippo meinem freünd
 ist verlihen worden dann eynem andern, sol sy nun liebgehabt sein vmb
 35 irer schöne vnd zucht willen als dann billich ist sy lieb gehabt sey, eyns
 solichen Gisipo von mir wo im daz zewissen käm sol wol zemüt vnd
 content sein daz ich sy vor andern mannen liebhab. Nach sölicher red
 vnd gedanken wider auf sein erste meynung kam [364^b] im selbs sei-

ner überflüssigen liebe übel zû reden ward vnd auß im selbs sein gespöt zetreiben, also von einem gedanck zû dem andern auß eyner red in die andern in solchem nit alleyne den selben tag sunder auch die selben nacht mit schwärem gemüt vertreyb vnd das in maß das im
 5 die selben herten gedancken nit alleyne den schlaf sunder auch die speiß vnd willen zeessen namen vmb des willen bezwungen was schwacheyte halben nyder in kranckheyt zefallen. Gisippo der in vil manchen tagen in gedancken vnd traurig gesehen het, nun in ganz kranck vnd zû pete ligen sahe das im besunder pein vnd leyd bracht sein grösten
 10 freünd also kranck czeschen, mit allem vleiß sein wartet stätz bei im was in zetrösten, vnd mit stätem fragen die vrsach seiner kranckheyte begeret czewissen, des im vil dick Tito neü historien zeantwurt gab, die Gisippo wol erkant, vmb des willen nit abließ mit grossem biten die warheyte begert zewissen, doch nach langem beschwern vnd biten Tito
 15 mit weynenden augen vnd schwären seüfzen Gisipo antwurt vnd sprach Gisipo liebster freünd wo es vnser gött gefallen wär so wär mir vil [364^c] lieber der tod dann das leben wenn ich bedenck das ich von dem gelück bezwungen bin meines leben proba zetûn vnd ich des mich mit schanden überwunden find, doch bald des lones warten bin den
 20 ich billich verdienet hab das ist der tod der mir zetausent malen lieber ist dann also mein hertes leben darumb ich dir keynen meinen gebrechen verbergen noch keyn mein geheym verschweigen sol vnd will dir daz nit mit kleyner meiner müe vnd betreuung meines herzen entdecken Also Tito zû der stund anfieng Gisippo allen anfang vnd end
 25 seiner pein vnnnd schmerczen saget vnd zewissen thet die vrsach aller seiner schwären gedancken den streitt vnnd sig den er mit im selbs vmb der schönen Sofronia willen het im öffnet do bei sich schuldig gab wie eyn soliches im nit züstünd zetûn vnd wider alle göttliche recht wär darumb er im zebûß den tod erwelet het des er bald hoffet im
 30 werden solt. Do Gisipo die vrsach seiner kranckheyt vernam daz kläglich weynen vnd erbärmkliche wort in reden hört eyn kleyn vngeret auff im selbes stünd als der die iunckfrawen mit mynder liebe vnd mer mässigkeit dann Tito liebhet, on anders [364^d] bedacht im fürnam zû im selbs sprach meins grossen freünd vnd güten gesellen leben sol mir
 35 lieber dann Sofronia sein mit samt Tito anhüb kläglich zeweynen vnd zû im sprach. Wärest du nicht trosts notturftig als du dann bist so klaget ich dir selbes über dich als der vnser grosse liebe vnd freundschaft gebrochen vnd die entwichet hat das du mir soliche deine pein

leyd vnd schmercen nit e geöffent hast vnnnd das also lange vor mir
 verborgen hast, wie wol es dich nit zimlich sein dauchte, so sein doch
 weder die züchtigen noch vnzüchtigen sach dem getreüen freünd zever-
 bergen, dann welicher eyns andern getreüer güter freünd ist der selbig
 5 yeglicher züchtigen erbern sach seines freünds im freüd nymet also
 auch er in den vnzüchtigen allen vleiß tüt im darinne helfen vnnnd ra-
 ten domit der güt sein freünd in frid vnd rü gesezet werd. Also auch
 ich dir zü trost vnd hilff tün meyne vnd dohin komen will do mich be-
 duncken laße dein notturft sey, nach dem ich von dir vernym wie du
 10 in Sofronia die mein haußfrawe sein sol in vnmässige liebe enzündet
 seyest vnd in dem feür der hohen liebe brinnest das nimet [365^a] mich
 keyn wunder, wol mich fremd detücht wo im anders wär angesehen ir
 grosse schöne zucht vnd tugent, aber mich fremd nymt an dich an-
 gesehen were du bist das du dich überwinden lassest der tugenthaftigen
 15 ding pein zetragen, als ich wol sihe du tüst sunder der ding die do
 leben. vnd als dich billich sein duncket Sofronia liebzehaben, so vil
 mer vnrecht hast dich ab dem gelück zeklagen vnd zesprechen das dein
 liebhaben erber vnd züchtig wär wo sy eynes andern weib vnd nit mein
 gewesen wär bist du nun weis als dann dein gewonheytt ist vnnnd du
 20 allwege gewesen bist so hat das gelück Sofronia nyemand geben mügen
 dem du mer ze dancken habest als mir dann alleyn ich dir gehelffen
 mage dann welichem andern das gelück sy geben vnd beschert het wie
 wol dein liebhaben zü ir czüchtig vnd erber gewesen wär, so het er sy
 doch vil e für sich behalten dann dir sy geben hast du mich nun für
 25 dein getreüen freünd als ich dann on zweifel bin, so solt du czü mir
 hoffen vnd keynen zweifel haben, dann als dir wol wissend ist seyder
 wir güt freünd vnd mer dann brüder gewesen sein das alles das ich
 hab geleich [365^b] dein als mein gewesen ist, wär dann sach daz sich
 die materi als dann mein meynung zetün ist sich so ferr verlauffen het
 30 daz es nicht anders gesein möcht, so müßt ich dem tün als ich vil
 manchmal getan hab Aber vnser sach ist noch an dem end vnnnd in
 sölicher maß geschicket das ich Sofronia alleyn dein eygen machen mag,
 dann ich weßt nit was dir mein freündschafft güt vnd nütz wär wenn
 ich eyner sach die do züchtig wär vnd dir ze lieb die mit eren tün
 35 möcht, das ich nit eynen meinen willen den deinen machet. Es ist war
 Sofronia ist mein vnbeschlafen eliche braut, vnd hab sy lieb irer hoch-
 zeit mit grossen freüden warten bin, vnd du als der ir mit mer brinnen-
 der liebe begert vnd liebhat als sy dann wol wirdig ist, darumb nit

mein sunder dein sein sol vnd in meiner kamern die ersten blümen der
 göttlichen e mit ir abbrechen solt, darumb schlach von dir alle deine
 schwäre gedanck leb frölich tröst dich vnd hin für ir mit freuden vnd
 mer wirdiger liebe dann meine gewesen ist ir warten bis. Do Tito
 5 seinen freünd Gisippo in seinem trost so züchtigklich reden vername,
 des worte im grosse freude vund [365^c] besunder hoffnung brachten,
 doch domit als dann wol müglich was grosse scham hete, dann ye grös-
 ser in Gisipo miltikeit daucht so vil mer in daucht er wider alle recht
 tät stäts weynend sein leyd klaget, doch nach etlichem seüfzen mit
 10 grosser scham Gisippo antwurt vnd sprach. Gisippo edler freünd mein
 dein freie redliche milte freundschaft mir heüt von dir beweist ist, nun
 wöll got nit das ich von dir nāme des du wirdiger zehaben dann ich
 bist dann wār ich Sofronia wirdiger dann du gewesen weder du noch
 yemand anders gelauben sol das sy dir von mir wār beschert gewesen,
 15 darumb volg mit freuden nach dem daz dir von got gegeben ist, vnd
 mir als der sölicher edler gab vnwirdig was mit kläglichen zähern mei-
 ner augen begabt hat vnd mich domit lassen verwesen, vnd der zweyer
 eyns sein wirt ich würd solche pein überwinden vnd von dir lieb ge-
 habt sein, oder sy wirt mich überwinden vnd von aller pein vnd schmer-
 20 czen nāmen über solche red Gisipo im antwurt vnd sprach. Tito wo
 mir von dir vnd deiner freundschaft mag verlihen werden eyn mein ge-
 fallen in deinem dienst zetün vnd du dem also nachzekomen [365^d] wilt
 du anders meinem willen rat vnd bete zeliub werden vund das mit aller
 kraft als dann solicher vnser freundschaft zethün gepürt, so will ich
 25 vnd ist gancz mein meynung das Sofronia dein elich weib sey, dann
 die stercke der liebe on maß vnd mir kunt ist, das vil manch liebhaber
 ires liebhaben vnsäligen tod empfangen haben. Nun sihe ich dich in
 maß von solcher liebe gebunden daz du on deinen grossen schaden die
 zāher deiner augen nit überwinden möchtest das dir on zweifel dein
 30 leben nām wo ich das nit selbs versāhe. wo das geschāch ich daz in
 die lenge nicht vertragen möcht dir mit tod nachfolgen müßt darumb
 sey Sofronia dein dann vileicht dir keyne mer zehanden kām die dir
 liebet vnd gefiel als sy tūt, so will ich mein weyche liebe andern weg-
 keren dich vund mich zū eyner stund content vnd wol czemüt machen,
 35 des ich vileichte nit so milt wār wenn weiber zenāmen also teüer wāren
 als die getrefen freünd zefinden sein. seitinal ich nicht mit grosser müe e
 eyn ander weib dann gūten freünd finden mag so will ich sy vil e ich sprich
 nit verlieren die ich nicht verletire wo ich sy dir gib, sunder sy eynem

[366^a] andern der du sein solt e vergünnen will dann dich ze verlieren.
 Darumb Tito liebster freünd vnd brüder haben meine bete indert kraft
 bei dir so gewär mich meiner bete vnnd schlach von dir deinen vnmüt
 vnd zů eyner stund dich vnd mich tröst schick dich zů meinem willen
 5 die freünd zenämen der dein brinnennde liebe alle zeit begert hat, wie
 wol sich Tito willigklichen schicket daz Sofronia sein weib würd, doch
 das nicht mit kleiner scham thet also ein klein zeit vngeret auf im selbs
 stünde, nach dem von grosser liebe vnd Gisippo trösten bezwungen also
 zů Gisippo sprach. Gisippo gütter freünd mir ist nicht wol wissend
 10 was ich tůn oder lassen sol, vnd ob ich mein oder dein gefallen tů nach
 dem du mich gebeten vnd dich mir erpoten hast dein rat vnd will werde
 doch seitmal dein miltikeyte also groß gen mir ist das sy mein scham
 überwunden hat. so bin ich bereit zetůn dein gefallen, doch solt du
 wissen das ich das nit thů als eyner der nicht erkenne das ich von dir
 15 nicht allein die liebhabenden frawen enpfahē, sunder auch domit mein
 leben ich sprechen mag von dir hab got laß mich [366^b] es vmb dich
 verdienen das du mir diemüttiger gewesen bist dann ich mir selbs ge-
 wesen bin. Nach dem Gisipo zů Tito sprach, domit ich die sach zů
 gůtem end bring beduncket mich disen weg zehalten als dir wol wissend
 20 ist wie nach langem rat vnnd bedencken meiner freünd Sofronia mir
 zů eynem weib gegeben ist. wo ich nun gieng vnd 'sprach ich wölt ir
 nicht on czweifel sich grosse schand begäb vnd beyder teyl freünd sich
 betrüben würden, des ich alles kleyn acht nun sy dir würd, aber ich
 besorg wo ich mich eyns sölichen endecket vnd mich des ich willen hab
 25 mercken ließ, das sy ir freünd czehand nit eynem andern geben des
 freünd du vileicht nicht wärest als du mein bist also du verloren hetest
 das mir noch nit worden wär, darumb mich gůt deucht wo es dein ge-
 fallen ist was ich angefangen hab dem also nachzekomen vnd mein syn
 vnnd meynung stet also, ich wille Sofronia als mein elich weib zů hauß
 30 fůren vnd mein hochzeit machen, vnd wenn vns zeit duncket nach dem
 ich mein ordnung mit dir geben würd du verborgen an meiner stat sy
 als dein elich weib [366^c] beschlafen macht, nach dem vns aber czeit
 nämen mügen die sach cze öffen, ist es dann ir gefallen wol vnd gůt, ist
 es aber nit so ist es ye geschehen, vnnd was geschehen ist das mag nicht
 35 wider zeruck gen sy vnd ire freünd mit gewalt es seye in lieb oder leyd
 was geschehen ist des content sein müssen, söliche meynung vnd rat
 Tito wol gefallenn was, Nach dem nit lang verging Gisippo sy als sein
 braut in sein hauß enpfinge, in dem Tito wol geschicket vnd zů seiner

gesuntheit wider komen was Do man eyn köstliche reiche hochzeit zů bereyt het, vnd do die nacht schlafen zegeen komen was vnd die neu braut alleyn von den frawen bei Gisipo gelassen ward. nun warn beyd kamern Tito vnd Gisipo an eynander vnnd auß eyner in die andern
5 man gen mocht. Do sich nun alleyn Gisipo in der kamern bei Sofronia fand vnd die liecht gelescht het er zů Tito ging zů im sprach das er zů Sofronia seiner iunckfrawen schlafen gieng. Do das Tito vernam vnnd die letst stund die rosen seiner liebe zeempfahen eyn kleyn scham halbenn reu vnd leyd het, zů der braut [366^a] schlafen zegen das wider-
10 redet Aber Gisipo von ganzem gůten willen seinen worten gleich zů Tito ersten willen geschicket was, vnd nach langem verziehen vnd außreden in doch czů der iunckfrawenn bracht, vnd do Tito zů der iunckfrawen in das pete kam in schympfes form sy in sein arme nam mit nydrer stimm zů ir sprach. Ob sy sein eliche haußfraw sein wölt, vnd
15 sy als die meynet er Gisipo wär im antwurt vnd sprach. ia. In dem er eynen gulden ring ab seiner hand zoch vnd den ir an ir hand stieß mit dem czů ir sprach. so wille ich dein elich man sein, nach dem dem heyligen matrimoni vnd göttlicher e eyn genügen teten, den lust vnd freud von eynander namen, den dann sölche liebe gibt, also gůt zeit on ir
20 noch yemande wissen Tito sy stäts beschlieff, vnd sy stäts in der meynung was wie Gisippo vnnd nicht Tito bei ir schlieff. In söllichem sich begab daz Tito Publio des iungen Tito vatter zů Rom mit tod abgieng vnnd starb das im bald zewissen getan ward do bei sich schicket gen Rom ze komen seine geschäft czebesehen. Do Tito seins vatters tod
25 [367^a] vername sich bereyt vnd sein ordnung gab gen Rom zeziehen vnd Sofronia mit im czefüren des mit Gisipo sein ordnung gab, doch nachdem ir vernomen vnd die sach eyn gestalt het Sofronia in keynen wege von Athene füren mochten, es müßt offentlich werden daz do noch verborgen was, vnd ir eyns tages zů in in die kamern rüften, vnd ir alle
30 sach waz sich allenthalben ergangen het sagten vnnd zewissen theten Do sy das vernam sere erschrack vnd beyd mit zorn vnnd betrübtem gemüt ansahe anhub zeweynen vnd schwärlich über Gisipo czeklagen das er sy also bösllich betrogen het on icht anders gesprochen auß dem hauß heym zů irem vatter gieng im vnd irer müter saget wie sy von
35 Gisipo betrogen wäre, vnnd wie sy Tito Quinto Fuluio weib wäre vnd nicht Gisipo als dann sy meynten sein sölt. Do Sofronia vatter vnnd müter Gisipo schalckheyt vernamen ir hercze beschwarte vnd in groß vnru seczet Gisipo freünd beschicket groß red der verlauffen sach hal-

ben heten, sich alle betrübten vnd wider Gisippo in vnmüt vnd grossen zoren fielen beyd par[367^b]tey im haß vnd neid trügen alle sprachen er nicht alleyne darumb zů red zeséczen, sunder grosser straffe wirdig wäre, Nach dem in beschickten mit grossem tröen in zů rede seczten
5 den er zů antwurt gab, wie er wol vnd recht gethan het, vnnd was er gethan het darumb im lob vnnd danck zegeben wär, daz er sy besserm erberm reicherm edlerm dann er wär geben het. Do Tito als der der kriechischen herren syten vnd hochfertigen gewonheyt weßt vnd wol erkannt lang zeit vertragen het vnnd in keynen weg vernam das sy sich
10 wider Gisippo erweychen wölten, das nicht lenger vertragen mocht, als der do römisch gemüt vnnd Atheneser synn het beyden parteyen Gisippo vnd Sofronia freünd antwurt vnnd czů in sprach. Es ist aller philosofo red vnd meynung was die tötlichen thū anheben vnd verbringen das eyn sölliches aller vntötlichen gött geschickung vnd ver
15 hengnuß sei, vnd etlich wölten es notturftig sey vnd sein muß wes ir wil begert. wölt ir nun diese sach recht bedencken, so wert ir klärlich sehen vnd mit ganczer warheit vernämen [367^c] geschechne. dinge czestraffen. vnd euch wider die czeseczen die nicht wider czeruck geen mügen, in dem ir nit anders tū müget dann alleyn euch weyser vnd
20 fürsichtiger dann die göt beweisen wölt, vnnd wir doch glauben waz sy tū das sy das billich vnnd mit recht tū on alle irrung alle ding ordinieren gubernieren vnd regiren darumb sy zestraffen das an euch nit weißtumb sunder grosse torheyt ist, grosser büß vnd pein die so beherczent sein sy in irem würcken zestraffen von in sölten warten nach
25 dem ich sihe ir alle getan habt, vmb des willen das Sofronia die ir Gisipo geben het. mein worden ist, nicht angesehen habt waz von ewigkeyt geschicket gewesen ist mein ze sein vnd nicht Gisipo als ir sehet sy ist von der heymlicheyt der göt zereden den tötlichen schwär ist, darumb laß wir ab vnd seczen das sy sich keynerley vnser geschäft bekū
30 mern darumb mein meynung wär wär es anders eüer gefallen der weisen rat zepflegen, darinn ich czwey dinge wider mein natur thū muß, das erst ist mich selbs zeloben, das ander eynen andern zeschelten vnd weder eins noch anders mich [367^d] von der rechten warheyt keren will nach dem vnser gegenwirtige materi begern ist ich tū sol, eüer
35 czorn neid vnnd haß sich mer von vnfür dann von gerechtikeit begibt, ir verdammet Gisippo in lestert vnd schänt daz er mir Sofronia geben hat vnd das von eygem rat, die ir im mit allen eüern räten geben hete, darumb im besunder lob czegeben ist vnd das er wol vnd recht getan

hab daz sölt ir wissen, von erst hat er gethan als eyn rechter getreuer
freünd dem andern tûn sol, das ander das er weislicher dann ir getan
hat, dann die heyligen gesez der freundschaft begern vnd haben wöllen
das eyn yegklich getreü freünd für seinen freünd tûn sol das er für sich
5 selbs tät. dobei sölt ir mercken die kraft vnd macht der freundschaft
das die grösser vnd würdiger ist, wo sy mit rechten treuen gemeynet
wirt nach dem mir durch Gisipo ist beweist worden des freundschaft
gen mir grösser gewesen ist dann billich ist, dann die gen seinen ge-
boren freünden dann wir haben die allein für freünd die vns zû freün-
10 den erwelen vnd die vns von dem gelücke gegeben sein, darumb ob
Gisippo [368^a] mein leben lieber hate, dann etter freundschaft seitmal
ich sein freünd bin des sol sich niemand wunder nâmen, doch laß wir
yeczund von der rede vnd komen an die andern sach do ir bas versten
wert wie Gisipo weislicher getan hat dann ir, ich laß mich beduncken
15 wie ir die geschick vnd fürsehung vnser göt gar kleyn vernâmt des
selben gleichen noch vil mynder die geschäft der freundschaft, darumb
ich sprich daz ir mit eüerm rat vnd etter fürsehung Sofronia Gisippo
geben het, der eyn iunger philosofo ist etter will vnd rat gab sy eynem
von der stat Athene so gab sy Gisippo rat eynem Römer vnd philosofo
20 etter will gab sy eynem edeln iüngling von etter stat, vnd Gisippo eynem
vil edlern von der stat Rom ir nach eüerm beduncken gabet sy eynem
reichen vnd Gisipo eynem vil reichern, ir gabet sy eynem iungen der ir
mit alleyn kleyne liebe trüg sunder mit marter erkant, so hat sy Gisipo
eynem iungen geben der sy ob aller sâligkeyt vnd mer dann sich selbs
25 lieb hat, vmb des willen mit der warheyt czereden ist Gisipo mer zelo-
ben dann ir seit darumb mercket gar eben alle ârtikeyt vnser materi,
ich bin iung vnd eyn philosofo als. [368^b] Gisippo als euch durch mein
lere vnd langes studiren wol mag kunt sein wir sein beyd in einem alter
mit gleichem schritt auff zû der hohen lere vnd kunst gestigen, vnd
30 er ist eyn Atheneser so bin ich eyn Römer wöll wir nun von der wir-
digkeyt vnd eren der stat sagen vnnd disputiren so würd ich sprechen
ich sey auß eyner freien stat vnd er auß eyner vndertânigen vnnd tri-
butoria stat mer mag ich sprechen ich seye von der stat die eyn fraw
aller stett der welt sey vnd er auß einer verbunden der meinen vnder-
35 tan, mer mag ich sprechen ich auß eyner keyserlichen stat sey eyn
überwinderin aller streitt so mag er die seinen mit nicht anders dann
alleyn ir hohen schül loben: auch sölt ir wissen das ich nit von den
mynsten vnser stat sunder von den besten geschlechten geboren bin

vnd meine heüser vnd palast an dem wirdigisten der stat Rom gelegen sein. auch die stat alle vol ist meiner eltern bilder vnd wapen, die eze vil manch malen den schal vnd triumpho auf vnser Campidoglio brachte haben, vnd noch alters halben nit vergangen sey sunder mer
 5 heut bey tage dann ye, die ere vnsers namen blüend tûn meines reich-
 tumb [368^c] scham halben ich geschweig, ich sprich vnd gelaub daz euch Gisippo freundschaft sol lieb gewesen sein, auch der meinen czû Rom ir euch nit schamen sôlt, vnd euch nicht mynder sol zû Rom ere
 vnnnd nütz sein als euch Gisipo hie gewesen wâr, dann fürwar an mir ir
 10 eynen getreuen freünd haben sôlt nicht allein mit meinem reichtumb
 sunder mit ganczem gewalt vnser policey vnd regiment, darumb volget mir vnd meinem iungen rat laßt von eüerm fürgenommen bösen willen do-
 mit ich eüern rat mer dann Gisippo rat loben müge dann on zweifel nye-
 mand sein wirt der nicht sprechen werd daz Sofronia Tito Quinto Fulvio
 15 dem edelen Römer wol verheiret sey der eyn reicher mächtiger burger
 der stat Rom vnd Gisipo grosser freünd ist wer sich nun des beklaget
 der weyßt nicht was er thût noch wes er begert. Nun werden vileicht
 etlich sprechen Sofronia klage nit das sy Tito weib sey. sunder sich klag
 das er ir in dem form als oben gesprochen ist verstolen on ir vnd irer
 20 freund wissen gegeben sey das ist keyn neü ding noch ding das nit mer
 geschehen sey, ich geschweige der die wider ires vätter vnd mütter wil-
 len in män[368^d]ner genommen haben vnd die mit iren bülen vnd lieb-
 habern weg gelauffen sein, vnd e ir freündin dann eliche weiber worden
 sein, vnd etlich die e mit hübscheyt kinds gepurt die e geöffent haben
 25 dann mit der zungen, der ist keynes Sofronia zügestanden, sunder or-
 denlich mit zucht vnd eren von Gisippo ist Tito gegeben worden, etlich
 möchten sprechen er het gethan das im zethün nicht zügestanden wâr,
 dann sein alles eynfältige weibische ding, wißt ir nit waz mancherley
 weg das gelücke besücht zû end zebringen daz do geschehen sol, doch
 30 wie dem seye so sôlt ir wissen das ich mit keynem betriegen gesücht
 hab eüer blût vnd tochter Sofronia zeschänden wie wol sy verborgen
 mein elich weibe worden ist, so bin ich doch nit zû ir komen als eyner
 der sy irer eren vnd iunckfrawschaft hab berauben wöllen oder als eyn
 veind vnd mynder dann zû eren gehöret eüer freündschaft außgeschla-
 35 gen hab, wol vmb irer grossen schöne vnnnd tugent in sy in brinnend
 liebe enzündet bin, daz euch nun yeczund pein gen mir bringet das ich
 mein sach also verborgen gefüret hab, bet ich sy nun mit der ordnung
 gesücht vnd an euch für mein [369^a] eliche haußfrawen begert als dann

wol billich gewesen wär besorg ich ir het ir mir nit widerfaren lassen,
vnd wär mir nit worden das ist die vrsach was ich getan hab verborgen
durch Gisippo meinen getreuen freünd gethan hab in in meinem namen
schicket czethûn was allenthalben bis her geschehen ist, vnnnd wie wol
5 ich sy auß ganzem herzen lieb het doch das nit als eyn liebhaber sunder
als eyn getreuer e man sy zebeschlafen sûchen gieng. ich füget mich nit
e czû ir als sy selbs mit der warheit sprechen mag das ich sy nicht vor
mit züchtigen erbern worten vnd eynem gulden ring gemähelt het vnd
ob sy mein eliche fraw sein wölt, des sy mir züchtiglich antwurt vnd ia
10 sprach, beduncket sy sich nun betrogen sein des bin ich nicht zestraffen
sunder über sich selbs zeklagen hat, warumb fragt sy mich nit wer ich
wär weder ir noch sy anders zeklagen haben dann das sy durch Gisipo
verborgen mein weib worden ist, darumb tût vnd laßt was euch eben ist
nâmet es in gût oder übel auf so ist sy ye mein weib. Nun was würt ir
15 nun sprechen wann sy Gisippo eynem groben pauren geben het, an we-
licher marter vnd gefänck[369^b]nuß würt ir euch ein genügen lassen,
doch laß ich yeczund ze weil von meiner red dann die zeit mir komen
ist der ich noch nit warten was das ist meines vatters tode, vmb des wil-
len ich mich wider gen Rom fügen muß vnd domit ich Sofronia mit mir
20 fûren müge. hab ich euch endecken wöllen das ich vileichte noch lange
czeit euch het verborgen gehalten seit ir nun weis so wert ir frölich
vnnnd mit gûtem frid gedult haben, dann het ich sy vnd euch betriegen
wöllen ich het sy also beschamet siezen lassen Aber do sey got vor das
in eynes Rômers geyst söliche vnere herbergen söl, also ir gnûg wol
25 vernomen habt wie Sofronia durch geschick der göt vnd kraft mensch-
licher gesezze löblicher synn meus freûnds Gisippo vnd meiner brin-
nenden liebe willen mein worden ist darumb ich euch freündtlich bitt ir
bessers rats pfleget vnd leget eüern vnmût vnd zorn von euch laßt mir
Sofronia frölich widerfaren domit ich frölich eüer freünd sein müge,
30 dann es gefall euch oder nit so ist sy vor got vnd der welt mein vnd wo
eüer will anders stünd dann daz Sofronia mein wär, so sölt ir wissen daz
ich euch Gisipo nym vnd kom ich gen Rom daz [369^e] ich die haben
will es sey euch lieb oder leyde die mit recht mein ist, vnd ir sehen solt
waz die römischen gemût darczû tûn werden, mit dem Gisipo bei der
35 hand nam in maß als er ir kleyn acht hete auß dem tempel gieng, vnd
etlich von den die in dem tempel warn Tito nit vnrecht gaben, doch am
letsten der sach alle eyns warden wie Tito freûndschaft aufzenâmen vnd
nicht außzeschlahen wär besser dann Gisippo freûndschaft wär, seitmal

Gisipo ir freundschaft außgeschlagen het alle miteynander zů Tito gingen
 zů im sprachen ir aller güter will vnd gefallen wär das Sofronia sein
 wär in für eynen iren lieben freünde haben wölten vnd Gisipo für iren
 güten gönner, des Tito alles wol zemüt waz do ir neu freundschaft be-
 5 schlussen vnd Söfronia im heim zů hauß schickten die do thete als weiser
 frawen zetün gebürt, alle liebe die sy zů Gisippo het zů Tito keret vnd
 frölich mit im gen Rome für, do sy von seinen freünden mit grossen
 eren vnd freüden eupfangen warden, Gisippo der zů Athene beleib hin-
 für von yederman eyn vnnüczter man gehalten was. Nach dem nicht lang
 10 verging zwitrachtung halben seinem geschlecht [369^d] vnd anderm arm
 vnd ellend von Athene außgetriben warden nit in armüt lebet sunder
 czeleben das almüsen süchen gieng, vnd wie er mocht gen Rom kam ze-
 süchen vnd sehen ob sich sein güt freünde Tito sich in seiner grossen ar-
 müte über in erbarmen wölt, dann wol vernomen het wie er bei leben
 15 vnd in hohem wirdigen stant wär grosse gnad bei allen Römern het. Do
 sich Gisippo für sein hauß füget zebesehen ob er im in seinem außgen
 züspräch vnd erkennet, do also lang wartet das Tito mit vil andern bur-
 gern beleyt zů dem hauß außgieng Gisippo wol sahe, aber nit war nam
 wer er wär noch am mynsten gedacht das er Gisipo wär vnd Gisippo
 20 vmb seiner grossen armüt willen in der er sich selbs sahe nicht so be-
 herczend was Tito züzesprechen noch sich im zeerkennen czegeben, sunder
 do er sahe vnd wol vername das er von Tito gesehen worden was, vnd
 Tito im nicht zügesprochen het; sunder nach seinem beduncken in e ge-
 scheühet hette, in grossen vnmüte vnd verczagnuß fiel bedencken warde
 25 was er im czü Athena in Sofronia beweist hete vnd yeczund in wider-
 kerung desselben von im verschmächet [370^a] wäre trauriglichen von
 dann gieng nacht was vnnd des selben tages keynerley speys versücht
 het dann arm elend vnd on gelt waz nit weißt wohin, willen het im selbs
 den tod zetün, in solchem seinem leyd er in der stat gar an eyn wild end
 30 bekam do er ein gruft oder höle ersahe darinn er desselben nachtes her-
 bergen meynet vnd sich auf daz bloß ertrich genüg übel gekleydet nyder
 leget, vnd von langem klagen vnnd weynen entschieff. In dem sich be-
 gab daz zwen dieb mit dem das sy gestolen heten in die höle kamen das
 czeteylen vnd vmb solicher diebstal willen in der teylung zekrieg vnd
 35 streitt kamen, vnd der eyn der mer dann der ander mocht den ander
 erstach vnd tödt, nach dem weg gieng den erstochen man seinen gesellen
 ligen ließ. alle dise ding Gisippo gar wol gesehen het zehand im gedacht
 wie das im eyn güte vrsache des tods des er stäts begern waz sein solt.

Do nun der liecht tag komen was der tot man vorn in der gruft von den fürgängden gesehen was die ein solchs den richtern zewissen teten, der knecht bald gelauffen kamen Gisipo in der gruft funden mit grossem romor fügen für den richter fürten, der [370^b] vngenöt dem richter ver-
5 iahe wie er den man getöt het vnd nach dem auß der hôle nicht mocht, vmb des willen Marco Varrone der zů der zeit pretore was schaffet vnd gepot das man Gisippo kreüziget, als dann zetün zů der zeit gewonheyt was. Nun was zů der stund on gefür Tito auf daz richthauß komen vnd den armen verurteylten Gisipo ernstlich in seinem gesicht ansahe die
10 vrsach warumb er verurteylt was vor vernomen het. vnd in solichem seinem ansehen erkannt das er sein getreuer freünd Gisippo was seins vngelückes sich groß wunder nam wie sich daz begeben het bald auß brinnendem herczen im begeret zehelffen, Aber so schnell keyn weg seins heyls sahe, dann allein sich selbs des verbrachten mortes schuldig ze-
15 geben, vnd bald für den richter trat mit hoher stimm schrey Marco Varrone der arm man ist des tods vnschuldig den du verurteylet hast schaff in bald widerumb führen ich hab das getan vnd mit der sünd wider vnser gōtt getan den czetöten den deine knecht an disem morgen in der hôle toten funden, darumb nit straf den der nit schuldig ist. Varrone groß
20 wunder nam vnd [370^c] ser fremd daucht sich betrübt das Tito gegenwürtige aller menge sich des morts schuldig gab, dann die gesez der gerechtikeyt iren weg haben müßten bald gepot Gisipo wider für in zeführen zů im sprach wie hast du so toret sein mügen dich des schuldig zegeben vnd doch wol weyst daz er dir daz leben gilt des du vnschuldig
25 bist vnd nit gethan hast du sagest vns on alle marter vnd pein wie du in der vergangen nacht den man getöt hetest so komet yeczund her zů vns Tito Quinto Vuluio vnd spricht. Nit du sunder er den man getöt hab. In dem Gisipo Tito ansahe vnd erkant das er Tito sein grosser freünd was der im der empfangen dienst zů Athena yeczund lonen vnd wider-
30 keren wölt diemütiglich vnd weynend sprach. Varrone fürwar ich hab dem man den tod getan, vnd Tito miltikeyt meins heyls nun zespat komen ist. auf dem andern teyl Tito sprach. Varrone du macht wol vernämen das der arm man eyn gast vnd on alle waffen vnd bei dem toten funden worden. auch vernämen macht das in sein grosse armüt vnd
35 verzagnuß darzů bracht hat, also zereden vnd mit willen on vrsach sterben wöllen. [370^d] darumb sag in ledig vnd mich richte das ich verschult hab. Varrone sich ir beyder beständigkeyt vnd stäter meynung nit verwundern mocht wol gedacht ir keyner des er sich schuldig gāb.

vnschuldig wär vnd wie er sy beyd mit eren ledig sagen möcht sůchen
 ging In dem sich begab als vileicht gotes gefallen was das eyn iunger
 mit namen genaunt Publio Ambusto ein verwegen böser wůtrich von
 yederman eyn offen verräter vnd dieb gehalten der das mort getan het,
 5 dem wol wissen was daz der zweyer keyner den todschlag getan het,
 nach dem sich ir yeglicher schuldig gab vnd vnschuldig was, er beyder
 veriehen vnd vnschuldig zesein im sein hercz erweychet in maß daz er
 beyder halbenn grosse pein trůg gancz in barmherczikeyt bewegeet die
 zwen zeerledigen vnd sich selbs schuldig zegeben, für Varrone kam czů
 10 im sprach. Pretore gerechtikeyt mich zwingt der zweyer vnschuldigen
 streitt zerichten, ich enweyß nit welicher got mich inwendig also schicket
 vnd müet mein grosse sünd ze öffnen, darumb wißt daz der zweyer keyner
 an dem verbrachten mort schuldig ist als sy beyde euch bekent haben
 vnd schuldig geben [371^a] Ich pin der, der den man in der vergangen
 15 nacht getött hat vnd disen armen man sache der da stet vnd in der hōle
 liesse, Tito den erben bedarffe ich nicht entschuldigen dann yederman
 sein lobe wissent ist, Darumb Varrone ledig sy vnd richte mich nach
 meinem verdienen, Nun hat Octavianus des keysertum ein verweser die
 verlossen sache auch vernamen, die drey schaffte für sich komen ze wis-
 20 sen begeret was vrsache iglichen czwang ze thon das er getun het, Das
 iglicher besunder im saget vnd ze wissen thet, Daz Octauiano ein sere
 fremde sache daucht iglicher des todes zů begern. Den czweyen vnschul-
 digen vnd dem dritten schuldigen vmb der czweyer willen vergabe frey
 vnd ledig saget, Nach dem Tito Gisippo seinen freunt pei der hant nam
 25 heym zů hauß füret, do in Sofronia mit beichen zächern irer augen die-
 mütiglich enpfing Nach dem mit essen vnd trincken labet vnnnd stercket
 vonn neüem kleidet in wenig tagen gancze zů im selbes wider prachte;
 Darnach Tito im alle seine schäcze vnd gůter mit teylet vnd gemeine
 machet, vnd im eine sein swester genant Fuluia zů einem weybe gabe,
 30 im zů der wal gabe pey [371^b] im zů Rome zůsten oder mit allem daz
 er im geben het gen Athene zů zichen daz zů im stůnde, Gisippo die
 grossenn empfangen freůntschafft, vnd wie er vonn seiner stat Athena
 ein vertriben man was, das bedencken warde Auch grosse liebe die er
 zů Tito het in czwang vnd des mit im selbes eins ward ein Růmer ze
 35 sein; pey Tito zů Rome beleybe do er mit frawen Fuluia vnd Tito mit
 Sofronia in einem hause lange zeit mit grossen freůden lebten stäcz mere
 ir freuntschaft wuchse. O du edele heilige freuntschaft nicht alleine
 . aller ern vnd reuerencz, sunder alles lobes wirdig, ein zůchtig muter der

ern ein swester aller dancksamkeit, Ein prinende liebe der myne gotz!
 der vntugent dem neyde vnd hasse tötlich feint, Alwegen vngepoten be-
 reyt pist, In tugent einem iglichen ze dienen; aber deine werck heut bey
 tag wenig gebraucht sein, dann alleine in vntugent, Des am meisten die
 5 vntugent der geytickeyt vrsache ist die allein iren nucze vnd eins an-
 dern schaden suchenn get, welich liebe vnd reichthum welich freunt-
 schafft weliche zecher vnd seüffcen als Tito theten hetten Gisippo hercz
 also durch gen mü [371^c] praute die er mer dann sich selbes liebe hette
 Tito vergünet vnd geben het, dann alleine die getreüe liebe vnd freunt-
 10 schafft, welicher hette seinen reichthum hohen stant vnd seine liebe fra-
 wen verliesen wöllen seinem freünde zû dienen Noch der pösen rede der
 gemeine kein acht ze haben als Gisippo thet, nür er seinem freünde sein
 getreüe freuntschaft hette peweysen mügen, Auf dem andern teyle Tito
 vnanders bedacht seinem freund zû liebe seines eygenn todes procu-
 15 rator zû sein vnd den suchen ginge, seinem freunde von dem tode zû
 dem leben helffen vnd Gisippo ab dem kreticze zû nemen, da pey ir peyder
 grosse freütschaft mercken müget, wer anders hette Tito also milte
 machen mügen alles sein gute vnd veterliche erbe Gisippo zegeben, Dem
 daz vnseelig gelücke das sein genomen hette, dan alleine die tugent der
 20 liebe, Auch sein leyplich swester im vor allen andern manner in seiner
 armut vergünnet; Darumb ir manne bedencket volget nach in rechter
 liebe vnd freütschaft, den czweyen freünden flicht neyde haß vnd ge-
 ytigkeit nemet zû euch die edeln tugent der [371^d] miltikeit! Als der
 künig von Hispangna der milte Nathan der ritter Gentile von Boloni
 25 theten also auch ir thut.

Wie der soldan von Babiloni in kaufmans form in welsche lant
 komet do er von hern Torello von Pauia geert warde Nach dem die
 kristenn sich eines zuges über mer vermasen das heilig grabe zû
 geminen Die von dem soldann gesprochen worden, vnd her Torello
 30 von dem soldan gefangen vnd erkant warde, sein falckner warde
 vnnd ere thete, vnd nach etlicher vergangen zeit mit grossem reich-
 thume durch artem magicam; die wir die swarczen kunst nennen, In
 einer nacht heym gen Pauia tragen het. Do er auf die hochzeit kam
 die sein weybe mit einem andern edel manne hette von ir palde er-
 35 kant auff stunde mit im heym zû hauß ginge.

Frawe Philomena irer histori vnd rede zû ende komen ist, vnd die
 herlich miltikeit Tito Quinto Fulvio von der wirdigen gesellschaft ge-

lobet was, vnd der künge die lesten histori Dioneo zů sa[372^a]gen behilte vnd er also anhub vnd sprach; Ir edeln züchtigen frawen on czweyfell nachdem Philomena vonn der getreuen waren freuntschaft gesaget hat alles ware ist, vnd als sy sich in dem ende irer rede beklaget wie
 5 euch pey tag sölche freuntschafft von den tötlichen so gar wenig erkant vnd so vnwert gehalten sey Aber ich zů anderm ende mein meinung kere, Dann mir iczund in mein gedanke ein ser lang histori genug frölich komenn ist; Durch die ir ein grosse herliche miltikeit des grossen soldan von Babiloni vernemen wert, vnd damit ir euch sölcher materi
 10 freude nemet wie wol ir etliches freuntschafft vmb vnser vntugent willen nicht volkomenlich gehaben müget So stůt ir doch euch zů dem minsten freude nemen zů dienen vnd diensthaftig zů sein vnd daz mit der hoffnung etwe, des lone zů empfahen, Vmb des willen ich sprich; auch daz vil manche andre sprechen vnd formiren wie zů den zeiten keyser Fri
 15 derichs des erstenn das heilig grabe vnd Jerusalem zů gewinnen, Die Kristen einen gemeinen zuge über mere theten, Ein sölches etliche [372^b] zeit vor dem soldan von Babiloni ze wissen kam, der im für nam persönlich der Kristenn ordnung vnd ir zů bereytenn sechen wollen; domit er auch sich darnach weste zů richten vnd seine lant ver
 20 sechen, vnd in Egiptenn lant alle eine geschefft versache seinem volck zů versten gab wie er wallen farn wölte, Sich mit czweyen seinen lanthern vnd dreyen knechtenn in kauffmans form auf den wege gen kristenlichen landen machet, vnd nu vil manche lant durchsuchet het, In Lombardia bekam in teütsche lant zů reyten, vnd von Meylant gen Pauia
 25 wercz reyte, In sölchem seinen reyten in der abent begreyffe vnd gen Pauia pey tage nicht komen mocht; In dem im einem edeln manne bekamenn genant her Torello der von Pauia mit etlichem seinen falc kenn spaczieren auf ein sein gesesse also vogeln vnd iagen reyte, Do herre Torello dise fremde geste sache in on czweyfel edel erber leüte sein
 30 daughtenn; grossen willen hette sy zů ern Der soldan einen seinen knechte fragenn hiesse wie ferre noch gen Pauia sein möchte; vnd ob sy pey tage dar komen möchten; Vber sölche frage [372^c] her Torello selbes antwort vnd sprach, Lieben hern es ist nit müglich pey tage gen Pauia ze komen, So pit wir euch sprach des soldan diener dann wir
 35 sein frömde vnerkante geste in disem lande, das ir vns vnterricht wo wir heynt herbern möchten, Zů dem her Torello sprach das will ich geren tun, ich will iczund einen meinen diener nicht ferre von hier schicken mit dem reyten der sol euch fürn do ir villeicht genug gute herber für

ein nacht haben wert, vnd einen seinem diener der in an dem füglichen
 stenn daucht zů im ruffet mit dem er sein ordnung gab waz er thon
 solte, vnd wie er die erbern leüte auff sein gesesse füren sölt, vnnd so
 er peldest mocht sich selbes vor in darfüget vnd ein herlichs nachtmal
 5 zů bereyten thet, die tisch vnd taffeln in einem seinem garten zů berey-
 ten schüff nach dem vnter die porten des palast ginge des knechtes mit
 den gesten zewarten, der knecht mit den gesten etliche krumme weg reyte
 damit sein herre ee dann er zů hauß kem, vnd do sy zů dem palast kom-
 men abegesessen waren her Torello in entgegen came frölich lachent sy
 10 freuntlich enpfing, der [372^d] soldan als ein weise man im wol gedacht
 het er sy auff dem wege zů hauß geladen sy villeicht nicht komen wern,
 vnd da mit sy im seines laden vnd beherbern nicht versagen möchten er
 den wege hielte als ir vernomen habt. Der soldan vnd seine hern dem
 ritter hern Torello seines empfangen freuntlich danckten zů im sprachen;
 15 herre wen man sich milter leüte irer miltikeit besweren sölte so het wir
 größlich über euch zů klagen wie ir vns vnsern wege villeicht gelenget
 habt; Doch got laß vns das vmb euch verdienen, daz wir vmb eines eini-
 gen grüssenn willèn söliche freuntschaft empfangen süllen! Der ritter weiß
 vnd wol redent in antwortt vnd sprach; Lieben herren ich mag euch
 20 übel tun des ir wirdig weret, doch von hier pis gen Pauia für eine nacht
 nitt pessern stant gehaben möcht Darumb hab gedult ob ir den den
 wege verlenget het, In dem des ritters knechte alle vmb die edelen her-
 ren warn die rosse von in namen, vnd der ritter sie alle drey in den
 palast füret, do vil schöner kamern bereyt waren; do er sie schüffe auß
 25 zichenn ir gehesse von in legen, vnd mit guten [373^a] wein do erfris-
 schet, an hubenn züchtiglich piß auf daz nacht male von mancherley abe-
 teüer zů reden Dann der soldan mit allen den seinen gut lateinisch
 reden kunde, Darvmb an allen enden verstandenn waren vnd ir notorfft
 reden mochten; die gutenn herren sich alle bedüncken liessen wie her
 30 Torello der edelst pas redenst, ritter were den sy in kristen landen fun-
 den vnd gesechen hetten; Auch in on czweifel daucht daz grosse wirdige
 hern vnd nicht kauffleüt sein sölten, sich mit im selbes klaget daz er sy
 nicht ern mocht nachdem er gewölt het doch gedacht was er des selbenn
 abencz nicht gethon hett des morgens thon wölte, vnd palde einen sei-
 35 nen diener gen Pavia zů seiner frawen schicket ir sein meinung die
 fremden hern zů ern zů wissenn thete Nach dem in den schönen garten
 gingen das nachtmal zů essen; doch vor her Torello sy freuntlich pate
 daz in liebet im zů sagen wer sy weren, Des im der soldan selbes ant-

wort vnd sprach; Edeler ritter wir sein kaufflütte Cipriani vnd komen
iezund her auß Cipry vnd vmb vnsers geschefftes [373^b] willen gen Pa-
risky reiten meinen; Do sprach der ritter; Nun wölt got das vnsere lant
sölche edel lütte precht als Cipri kaufflütet thut, Nach disenn Worten das
5 wasser zů den henden enpfingen vnd sich zů tische seczten, vnd nach
vnuersechen dingen genug zůchtiglich gedienet waren, vnd do sy nun
gessen hetten der ritter ir müe bedenckenn warde in schuffe zů pette
leuchten; desselben gleichen er auch schlaffen ging; Do der diener gen
Paia kam der frawen seines hern potschaft geworben het Die da nicht
10 mit weiplichem gemüte sunder mit menlichen herczen allen iren gutten
freunden vnd gůnnern zů ir rűffet in allen ires ritters gescheffte zů wis-
sen thet ir ordnung gab ein herlich kůstlich male zů bereyten schuffe,
dar zů vil erber ander hern vnd purger geladen wordenn, Nach dem ir
von hern Torello enpoten was; Do nun der morgen komen waz, der rit-
15 ter mit seinenn gestenn auff zů rosse saß seine falcken nemen schuff
nach dem wasser auff gen Paia wercz riten die falcken sechen fligen;
In sůlchem iren reyten der soldan etlichen von [373^c] den knechten fra-
get welichs die peste herber zů Paia were Vber das fragen her Torello
sprach Ich wůrde euer wirt sein, Des der soldan frůlichen vnd wol ze
20 mute was, vnd vmb terc z gen Paia kamen Doch der soldan nit anders
meinet dan er were von hern Torello auff die herben vnd nitt zů im
heym in sein haůße geladen, Also mit im zů hause kamen; Do sy nun
von den herren die mit dem ritter daz male zů essen komen warenn er-
berlich enpfangen worden den fremden hern an ire zaume fielen des der
25 soldan im wol gedacht daz alles des ritters geschefft were, in zů ern
Der soldan zů dem ritter sprach her Torello das ist nichte des wir be-
gerten, wir begerten in die herber so habt ir vns zů hause gefůrt, dann
wir haben in der vergangen nacht so vil freuntschaft von euch gehabt
das es wol ein genůgen were alleine das selbig wir vmb euch nymmer
30 mere verdienen můgenn; Darumb ir euch sůlcher müe vnd vnruē vnsern
halben hettet wol überheben můgen, vnd vns auff die herber reyten las-
sen; Der ritter antwort vnd sprach, Lie[373^d]ben hern was euch nāch-
tenn gutz geschahe des hab ich dem gelůcke zů dancken vnd nitt euch,
das ich euch zů der zeit an dem ende fande, Do ir bezungenn wart
35 zů mir ze komen; Aber auff disen morgen pin ich euch pflichtig was zů thon,
dann ir seyt in meiner gesellschaft her komen, vnd wer es euer gůt wol ge-
fallen vnd willen, vnnd bedůncket euch mit in zů essenn, das in zů versagen,
für war nein sprach der soldan; Also er vnd sein gesellschaft von des

ritters grosse miltikeit überwunden, abe von rosse sassen, von neuem
 von den hern empfangen vnd in ein köstlich kamern ze rüen geführt wor-
 denn, Do ir stiffel sporen vnd swert von in legten vnd ein klein er-
 frischet vnd rüe namen nach dem in den reichen köstlichen vnd wol zů
 5 bereyten sale das male zů essen gingen do man in das wasser zů den
 henden gabe frölich zů tischen sassen Do sy mit grosser ordnung von
 edelen speysen gedienet waren, vnd daz in masse einem keyser hette
 man nit mer ere thon mügen; wie wol der soldan mit sampt seinen
 hern grosse köstliche dinge ze sechen [374^a] gewonet warenn, Doch
 10 darvmb sich sölcher köstlicheyt nicht verwundern mochten sy sere fremde
 nam dann wol vernomen heten das er weder herre noch fürste, sunder
 ein schlechter ritter vnd mitpurger seiner stat sein mocht Do man nun
 mit zucht vnd ere vnd in aller frölicheit gessen hette die hern vnd purger
 der stat nach mancherley gespreche vnd rede alle zů hauß rüen gingen,
 15 vnd hern Torello mit den dreyen fremdenn hern auch in ein schöne
 kamern ginge, do er alles das er hette von kleineten vnd andern das
 er liebe hette in zeyget vnd sechen liesse, zů dem er auch seiner frawenn
 ruffet die in on masse schöne grosse vnd gerade voun leybe was mit
 köstlichem kleyde geziret zwischen czweyen iungenn iren kinden die
 20 engel dauchten für die fremden hern mit züchtigem geperde vnd die-
 mütigem grusse in die kamern kome, Die schnelle gen ir auff stunden
 vnd mit würdiger reuerenz vnd eren entpfingen, Sy zů in nyder seczten
 grosse mechtige freude der czweyen schönen kinde hetten Vnd also gůt
 zeit ir züchtigs [374^b] gesprech mit ein ander vonn mancherley hettem,
 25 vnd die edel frawe vnder etlicher ander rede vnd frage wo ir syn hin
 stünde vnd von wann sy kemen der die edeln herren die antwort gaben,
 als sy misser Torello geben hetten; nach dem die fraw mit frölichem
 angesichte zů in sprach; Lieben herren seytmal eüere reyse so lange
 in fremde lant ist, so hoffe ich mein weyplich fürsechen euch nicht
 30 schad sunder nütz sein sülle; Darvmb ich in besonderkeyt einer genade
 an euch begere, Das ist das ir eine meine kleine gabe nit außschlachen,
 sunder die in gůte auff von mir nemenn wölte; Nicht ansechen wölt daz
 kleine gemüte der frawen, in geben sunder iren gůten willen Nach disen
 Worten iglichem herren czwů seyden schauben mit feche vnterzogen
 35 schencket vnd gab, die nicht nach purgerischem syten oder kauffletten.
 Sunder einem iglichen grossen fürsten erlich zetragen gewesen werenn,
 Mit dem zů in sprach Lieben heren nemet vnd habt vergut die gabe
 ist klein aber der wille groß Ir seyt ferre von eüern frawen, vnd wie

wol dise gabe [374^c] kleins wert sein, so sält ir doch ye liebe haben, vmb des willen das ir so ferre von heymet seyt vnd die eütern kleyde nicht prauchenn müget! Die edeln hern nicht alleine sich des ritters sunder auch seiner frawen grosse miltikeit nicht verwundern mochten
 5 wol erkanten kein teile seiner edeln tugent; in nicht verhalten wolte, vnd vmb sölcher reichen kleider schanche gabe vnd ere willen besorgten, das sy von dem ritter nicht erkante weren; Dan sölche kleider kaufflütten nicht zů gehörten; doch ir einer der frawen antwort vnd sprach edele frawe daz sein grosse köstliche dinge, die mit einem igli-
 10 chen zů nemen sein Aber wir vmb eüer pete willen beczwungen sein nit neyn zů sprechem, vnd ir alle den dancke sagten des sölche gabe wol wirdig waz, mit dem sy von inschiede vnd got befalhe, Auch ire knechte wes in nottorft waz für sache; nach dem in der stat vmb spacziren riten von dem ritter vnd vil andern purgern beleyt, vnd an dem andern mor-
 15 gen do sie wege reyten meinten an irer kleinen rößleinn stat sy drey grosse hengste fundenn des [374^d] selben gleichen ire knechte mit pessern pferden versechen waren. Do das der soldan sach zů seinen hern sprach; ich schwere pey dem ewigen vnd vutötlichen got daz ich milttern paß verprachtern mann mit augen nye gesache, dann der ritter
 20 ist vnd sein alle kristen kunige vnd fürsten geschaffen als der ritter ist, für ware der soldan von Babiloni bedarffe ir nicht zů warten Nach dem sy ir ordnung geben auf in zů ziehen, nach dem die drey hern dem ritter vnd seiner frawen freuntlichen danckten auff zů rosse sassen von dann riten vnd der ritter in mit vil guten seinen freünden in ein gut
 25 teyle wegs das geleyte gab vnd als des soldan gefallen waz den ritter nicht weyter wolt reyten lassenn von im vnd seiner gesellschaft das vrlaub name. Der ritter sy freuntlichen pate das sie in irem herwider komenn sein herber nicht außslügenn, mer zů in sprach lieben herren nun seyt wer ir wölt des ich euch nicht weyter müen wille daz zů wissen;
 30 doch gebt mir nitt zů versten daz ir kafflüt seit damit seyt got befolhen, Do der soldan von yederman daz [375^a] vrlaub genomen het zů dem ritter sprach; Herre es möcht sich noch gar wol begeben daz wir euch vnser kauffmanschacze mochten sechen lassenn, Dem soldan sein abscheyden von dem ritter im schwer waz Dann im ganz sein huld vnd
 35 freuntschaft geben hett; Mit dem in got befalhe von dann schiede; der soldan vnnd sein gesellschaft in gedachten vnd für namen wer sache das sie des krieges nicht verdürben des sy von den Kristen warten waren sy on czweyfel den ritter seiner freuntschaft ergezzen wölten vnd nicht

minder ern meinten als er sy gethon het; Auch sein frawen ob allen frawen lobten vnd preisten; Also der soldan allen nydergange der sonne durchsuchet, Nach dem wider auff ein schiffe sasse vnd heym gen Alexandria fure vnd do her Torello wider gen Pauia kame in keinen wege
5 bedenckenn mochte wer die drey hern gesein möchten, Noch im nye noch zů gedanck noch synne kam das es vngelaubig leůte waren; Nach dem nit lange verginge das die Kristen bereyt waren iber mer zů dem heiligen grabe ze farn; Zů dem [375^b] auch Torello bereyt vnd geschicket was, vnd weder pitenn noch weinen seiner frawenn in nicht
10 hindern möchte, vnd in seinem abesheyden er zů der frawen sprach die er ob allen dingen der welte liebe hette, Liebes weybe du sichest wol ich fare do hin in fremde lant meiner außfart ich gewise pin Aber mein herwiderkomen zů got stet vnd was ich thůe das ist zů ere dem leybe vnd heyle der sele; Darumb ich dir alle vnserre gescheffte beflche
15 da pey trewe lobe vnd ere mer will ich von dir gehabt haben das du mein wartest wo du nicht anders potschafft von mir heltest, ein ganz iare ein monet vnd einen tage vor dem dich keinem manne zů der götlichen ee verpindest, nach dem thue dein gefallen, Die fraw die kleglichen weinet doch zů im sprach; Herre ich enweyß nicht wie ich mein
20 pein in eűerm abscheiden on tode tragen mag, darin ir mich lasset vnd seyt on czweyfel geschehe euch wie got wölle ir sterbet oder genest so sol ich hern Torello vnd seiner gedechtnűß weybe ersterben! Der ritter sprach Frawe mir czweyfelt nicht als ferre dein verműgen [375^c] mage, was du mir versprichest es also geschicht Aber du pist ein iunges schůnes weyb von edelm guten geslecht vnd grossen tugent; darvmb ich wol
25 weyß wo ich nicht pald wider zů lande kem das ich tode vnd erslagenn verdacht wűrde vnd vil edeler herren dich an deine brűder begern wern, vnd deiner prűder gefallen mit liebe oder leyd tun muste, vmb des willenn ich dir ein benante zeit bescheyde nach der thue dein gefallenn Die
30 frawe im antwort vnd sprach; herre ich sol mein verműgen in allem dem das ir mir gepoten vnd befolhen habt tun; Aber ich hoffe zů got es sűlle nicht zů sűlchem komen damit sich peyder rede endet die frawe weinent den man mit iren armen vmbűng vnd ab irer hende ein gűlden fingerlein zoch im das zů einer gedechtnűß gabe zů im sprach, Herre
35 ob sich begeben das ich mit tode abe ginge ee ir wider zů lande kemet so gedencket mein pey disem fingerlein, der ritter den ringe von der frawen nam auff zů rosse saß von yederman das vrlaub name, wege gen Genoua reyte, Do er mit aller seiner gesellschaft auff ein galle saß; nicht

lange verging gen Atri in Sürria ka[375^d]me mit andern kristen schif-
 fen Nach dem auch nicht lange verginge; ein groß sterbe von pestilenz
 vnder das kristenn volcke kam, vnd alle die pey leben beliben zů irem
 gelücke oder vngelücke von dem soldan gefangen vnd in gefencknůß
 5 gefürt worden; vnter den die in gefencknůß kamen her Torello der
 einer was gen Alexandria gefürt warde; do er vonn nyemant erkant
 was, auch sich nyemant grosser forcht halben wolt zů erkennen geben,
 vnd sich für einen falckner außgabe, dann ein grosser meister aller
 federspile was, Das dem soldan zů wissenn kam in auß der gefencknůße
 10 nam zů seinem falckner machet, vnd von dem soldann genant was Cri-
 stiano, vnd weder er den soldan noch der soldan in erkante, Dann
 seine synne vnd gemüte stäcz zů Pauia waren, vnd zů mer malen willen
 hett ze flichen; aber im nye so gůt wern mochte; In dem sich begab
 das etlich Genoueser räte gen Alexandria kamen; etlich gefangen Ge-
 15 noueser auß gefencknůß ze lösen pey denselben Genouesern her Torello
 seinem weybe schreib vnd ir zů wissen thete wie er noch pey leben wer
 vnd hoffet [376^a] palde pey ir zů sein, vnd das sy sein wer es anders
 gotes willen in kürcze warten sölt Do pey er einen derselben Genoueser
 freuntlichen pat des kuntschaft er het das er im seine prieffe liesse be-
 20 folhen sein vnd schůffe das sie dem abte von sant Peter Cieldoro wür-
 den dann er seines vaters pruder were; Also der edel ritter vil manche
 monet stünde, nach dem sich begabe das der soldan eines tags mit im
 zů reden kame von seinem vogelen vnd federspile; in dem her Torello
 anhube sere zů lachenn vnd in allem seinen lachen er gar ein seltsam
 25 geperde hette Das der soldan do er pey im zů Pauia was gemercket het
 In sölichem lachen vnd fremdem geperde her Torello dem soldan zů ge-
 dancke kam, in scharpff ansache vnd sich bedüncken liesse wie er her
 Torello der edel ritter were, sein erste rede des vogel halbenn alle
 fallen liesse zů dem ritter sprach; Nun sage mir Cristiano von was
 30 landenne pist du auß Ponent her sprach Torello Ich pin ein Lambardo
 von der stat genant Pauia ein arme man vom niderm stant; Do das
 der soldan vername das er sich von Pauia nante in wol [376^b] daucht
 daz er der were des er im gedachte er sein sölte; des er im pey im
 selbes grosse vnd besunder fretide name zů im selbes sprach. Nun hat
 35 mir got ein besunder genade gethon mir den zů zeschieckenn den ich ob
 allen kristen manne von hercze gern siche vnd ich im peweysen müge,
 wie lieb ich sein grosse miltigkeit gehabt habe, vnd on icht anders mere
 mit im geredt pald im komen schůffe vil manche reiche schöne kleyde,

vnder den die kleyde vnd schauben waren die im von herren Torello weibe gegeben worden; nach dem zů herren Torello sprach, Nym war Cristiano ob vnder disen kleyden yndert ein kleide sey das du vormals mere gesechen habest! Her Torello die hleyde eben beschauet sache fande
 5 vnd erkant daz sein frawe dieselbenn kleyde geben vnd dreyen edeln hern von im vnerkant geschenkt hette Doch das für ware nicht bekennen wolt zů dem soldan sprach herre ich kenne der kleyde keines; Es ist wol ware do sein czwu seyden schauben die gleichen czweyen schauben, darein mein weybe von dreyen kaufman Cipriani den einen kleydet vnd im
 10 die gab des nun gut zeit vergangen [376^e] ist Der soldan der nu eygentlich hern Torello erkant hette, sich nicht lenger enthaltenn noch verpergen mocht; in freuntlich mit seinem arm vmbfinge zů im sprach; Cristiano ir seyt der edel milt ritter her Torello, vnd ich pin der dreyer kauffmann einer die ir so freüntlich beherbert außeralbe vnd ineralbe
 15 eüer stat Pauia, vnd der von eüer schönen frawen mit disen kleyden begabet warde; Nun ist komen die zeit euch zů glauben machen waz kaufflute wir waren vnd iczund sein nach dem ir von mir in meinem abscheiden vernemet do ich zů euch sprache es möchte sich noch begeben ir vnser kauffmanschacz möcht sechen. Do der edel ritter den
 20 soldan vernam sache vnd erkante der fröest man warde der villeicht zů der stund auf erden sein mocht, das er einen sölchen gast in seinem hauß beherbert hette got vnd allen heiligen dancket Mer der soldan zů im sprache; Nun seytmale euch got zů mir her gesant hat so gedencet vnd wisset euch darnach zů richtenn hie als ich herre zů sein,
 25 vnd palde im fürstliche kleyde pringen schuffe anleget vnd in für [376^d] seine fürsten vnd lantherren füret, in des ritters redliche trewe vnd miltikeit zů wissen thet; In allen gepote pey seiner hulde sy den rittr hern Torello als in selbes ern sölten also sy alle theten sunder die czwen hern die mit dem soldan zů Pauia gewesen waren grosse zucht
 30 vnd ere mer dann yemant beweisten; Also daz gächling erhöhen vnd grosse ere, darinne sich hern Torello sache im ein teyle der sweren gedanck gen Pauia ringerten dann on czweyfel hoffet seine prieffe seinem vettern dem abt vnd auch nun seiner frawen sölten worden sein; Nun was ein ritter der tages do die Kristen gefangen worden erslagen
 35 worden der was auß Prouenza vnd mit namen genant her Torell vnd yederman nitt anders glaubt dann es wer her Torello von Pauia gewesen dann sein gefencknuß nit kunt waz; Darumb man sprach er tod were, vnd etliche Lombardy die wider zů hause kamenn auch sprachen

er tode vnd begraben were in lebendig vnd toten gesehen hetten; sölliche märe seiner frawen vnd freunden gen P'auia zû wissen kame, des alle grosses leytt tru[377^a]gen nicht alleine sein haubfrawen sunder alle die sein kuntschaft hetten vmb in betrübt waren, Es würde mir sere
 5 zû lang wern euch der frawen iamer vnd leytt zû sagenn; in dem sy vil manchen monet kleglich stunde; Nach dem ir grosse pein ein kleines warde nach lassen vnnnd sie von den mechtigisten des landes an ire prûder zû der ee begert warde, des sie von allen iren freunden getröst vnd gestercket warde wider zû der götlichen ee zû greyffen dann sy
 10 were iunck schöne vnd frisch ir nit wol mûglich were keuscheytt zû pflegen; Aber sölches trösten vnd begern sy in mit weinenden augen zû manchmalen abe sluge Doch nach langem verziehen bezungen waz iren willen ze thon; aber das mitt der vnterscheide das sie also lange witiben wölte als ir her Torello befohlen vnd sy im versprochen het; In
 15 söllicher zeit sich begabe das zû Alexandria einer hern Torello zû gesichte kam der mit den Genouesern râte von Alexandria wege gefarn waz, dem er zû im ruffet vnnnd fraget wie es in piß gen Genoua ergangen were; Der gûte man hern Torel[377^b]lo antwort vnd sprach; Herr ein herte grausame fart wir gehabt haben; Nach dem ich in Creti vernomen hab do ich beleyb vnd nicht weyter mit den Genouesern schiffet;
 20 Ich vernam do sy in Cicilia kamen von einem grausamen sturmwint angesprungen wurden derselbig die armen gallee in die Barbarey an einen kofell mit gewalt truge do sy prach vnd nicht ein mensch mit leben darvon kame, vnd czwen mein leiplich prûder darauff verlorn hab got
 25 erparme es misser Torello dem guten man gelaubet im nu wol gedacht seine prieff die er seiner frawen schreybe ertrunckenn vnd nicht zû lande komen weren vnd das zile vnd bescheyden zeit die er der frawen sich zû verheyren geben het nachent was, Vnnnd wie sein sache zû Alexandria stünde nyemant zû P'auia sölte wissennt sein, vnd für war
 30 gelaubet sein frawe nudalest einem anderen sult verheyret sein, vnd im des sölchen grossen vnnûte nam das er nicht mere weder essen noch trincken mocht, alleyn lust verloren het; sich zû hant krancke nider leget vnd von grossem leyde meinete zû ster[377^c]ben; Ein sölches dem soldan zû wissen gethon warde, der in ob allen mannen liebe
 35 hett Der sich nicht hindern liesse palde zû hern Torello kam, in der vrsache sölcher seiner kranckheit freget, Das im nach langem piten hern Torello zû wissen thet des der soldann an in czornig vnnnd vnnûtig was, Das er im ein sölches nicht ee bette wissen lassenn Doch in tröstet vnd

freuntlich pate das er sich woll gehübe vnd frölich wer, wo er das thete so vermöcht er daz ze thon, daz er auff die bescheyden zeit pey seiner frawen sich in der stat Pauia fünden solt vnd zû hant im zû versten gabe wie das gesein mocht, vnd müglich were; Herr Torello aller wol

5 zemûte dem soldan gancz gelaubet; dann ein sölches mere vernomen hett, sich tröstet frisch vnd gesunt warde, den soldan pate so er peldest möchte der sache zû ende keme; Der soldan palde einem seinen nigromant zû im rüffet dez kunst er zû mer malen versuchet vnd proba

10 gethon het mit dem er schuffe vnd im gepote, das er hern Torello in einer nacht schlaffent in einem pette gen Pauia tragenn thet [377^d] Der nigramant dem herren soldan antwort vnd sprach Herre das sol ich gern thon Nûr ir selbes in entschlaffen machet; so sol ich in priuigen do ir vnd er hin begeret, Der soldan sein ordnung gabe do er vernam das her Torello ye zû Pauia vor der bescheyden zeit sein wolt;

15 möcht es anders gesein; möcht es aber nitt gesein so wölt er weder essenn noch trincken sunder sterben wölte; Vmb des willen der soldan von grosser liebe vnd freûtschaft bezungen, In mit liebe reiche vnd frölichen heim zû seiner frawen zû pringen zû im sprach; Herr Torello eßer abscheydenn von mir ist mir on czweyfel swere, euch zû lassen;

20 Doch das ir eßer frawen lieb habt vnd begert pey ir zû sein das nymt mich nicht freinde, vnd damit sie nicht eines andern werde ich mein vermügen thon sol dann ich kein frawen mit augenn nye übersache der zucht tugent vnd geperde ir geleich were, Ich will irer grossen schöne geschweigen die ein plumen ob allen plumen zeloben ist; Nun wer mir

35 das ye ein besunder genad von got gewesen Seytmale euch mir das ge[378^a]lücke zû gesant hette daz wir vuser zeite die wir peyde leben sullen, geleich hern in disem regiment vnd herschafft dieselbenn zeit mit einander vertriben hettenn; Aber seyt euch ein sölches von got nitt sol verlichen sein hie mit sampte mir vnd als ich soldan ze sein,

30 so pin ich williglichenn bereit euch heyme ze schicken Nun wer mir ye von herzen liebe gewesen, Ich ein sölches zû rechter zeit vernomen hett da mit ich meinen eren euch heyme ze schicken vnd eßerm willen vnd tugent hette ein genügen thon mügen, vnd ire wirdige gewesen wert; aber seytmal der keynes hat gesein mügen, vnd ir iczund ye gen

35 Pauia begeret so wil ich euch schicken, in dem forme als ir oben vernomen habt; Her Torello dem soldan antwort vnd sprach; Herre mir ist genug durch eßer wort vnd wercke piß her eßer milte gütigkeyt beweist worden, vnd daz meré dann ich ye vmb eßer grosse wirdigkeit

verdienet hat, vnd seyt on czweyfell helfft ir mir nit so pin ich des
 todes; Darumb ich euch freuntlich pite ir komet meiner sach zů ende
 Dan piß morgen ist der lecz[378^b]te tage den ich meiner frawen mein
 zů peyten geben vnd bescheyden hab, Der zů im sprach, das er on
 5 czweyfell wer dann den nechste komedenn tage er sich zů Pauia se-
 chenn vnd finden sölte, des er in auf den nachsten abent wegfertigen
 wölte, Nach allenn disen worten er ein köstlichs pette zů bereyten thet
 nach irer fürstlichenn gewonheit, alles mit purper vnd seydem gewante
 überzogen, vnd ob allem ein reiche decke von perlen gesticket das in
 10 disen landen für einen grossen schacze gescheczet warde, Do pey her-
 lich küssen vnd pfulbenn als alsdann sölich reich pett würdig was. Do
 daz alles bereit waz, Der soldan im ein reiches kleyde schuff pringen
 nach heydenischer gewonheit; das herren Torello an leget ein köstlich
 seyden binden nach irer heydenischer gewonheyt im vmb sein haubt
 15 pinden schuff vnd do die zeit vnd nacht komen was der soldan zů hern
 Torello sprach, Nun wol an im namen gotz her Torello die zeit ist
 komenn daz wir vns scheiden müsen, vnd villeicht nymer mere sechen
 vnd das mich beswerte das ist; daz ich [378^c] euch nicht mage gesel-
 schafft thon nach dem ich gern thett Darumb ich iczund von euch das
 20 vrlaub nemen will, vnd ee ich euch got befilhe vor euch pitte vmb
 aller liebe vnd freuntschaft willenn das ir mein nicht vergesset, vnd
 ist das müglich ee sich vnsere leste tage enden vnd ir alle etüre sache
 in guten stant vund wesen pracht hat, daz ir mich nür ein fart komet
 zů sechen damit ich meinen willen paß mit euch müge ein genügen thon
 25 des ich iczund eyle vnd kurzzer zeit halben nicht thon mag; Mer pit
 ich euch ir wöllet mich mit ettern priefenn trösten vnd wie es vmb
 euch vnd etiere liebe hauß frawen stee wenn ir zů hauß komet das
 mich mit dem ersten wissen lassen, vnd ist euch icht zů willen von mir
 zů haben das lasset mich versten! dann keinem man auff erden ir lie-
 30 ber seyt dann mir; Darumb schaft vnd begert vnd gepiet! dann zů
 allem eterm begern ich bereyt pin zethon etier gefallen Her Torello
 sein weinen vnd zecher der augen nicht verhalten mocht, das in ein
 kleine in seinem reden irret; doch dem soldan antwort vnd sprach,
 [378^d] Herre es ist nicht möglichen das ich etier immer mer vergessen
 35 müg vnd seyt des on czweyfel wo mir vonn got so vil zeit vnd leben
 verlichen würt Ich des ir an mich begert euch gewern soll; Nach disenn
 worten der soldan in mit seinen armen vmb finge freuntlich küsset vnd
 zů im sprach Nun fart hin in dem namen gotz dem ich euch befilhe!

mit dem von im schiede aus der kamern in sein gemach ging Also auch alle andre fürsten vnd hern von hern Torello daz vrlaub namen in got befolhen mit dem soldan von dann gingen in den grossen sal kamen do der soldan das reiche pett bereyt het, darinne her Torello über mere
5 heym gen Pauia farn sölte, do der nigramant wartet wenn der zů farn fertig were. In dem dez soldan arczte kam hern Torello ze trincken gab des er angens enschlieffe vnd also schlaffendt auff das reiche pette getragen warde; zů dem der soldan ein köstlick güldene kronen legt Die nach dem yederman gelaubet er die hern Torello frawen schicket,
10 Nach dem, dem ritter einen gar köstlichenn ring an sein hant auch stiesse [379^a] Darein was auch ein reich karfunkel steyn gepunden, Der einer prinenden fackeln geleich erleuchtet, des köstlicheit nyemant geschaczen mochte, Nach dem im ein reiches schwert schuffe vmb gürtten Dez gesmeyde eines landes wert was, Ein reiches hefftlein von
15 golde perlen vnd edelm gestein im an sein prust hinge; zů iglicher seyten im ein guldin pecke voller dobel legt vnd vil mancherley andre kleinet do von vil zů sagen were Nach dem in von neuem also schlaffent halssset vnd küsset, mit dem das pette verswande vnd von dann genomenn vnd weg getragen ward, vnd ee der tage kam er mit sampt
20 dem pette vnd allem das im zů geleget was gen Pauia in sant Peters kirchenn Cieldoro also schlaffent getragen ward vnd do der sagrastano vor tage in die kirchen kam metten zů leütten des reichen pettes warname, daz mitten in der kirchen stunde des er forchte vnd erschrecken enpfinge zůrücke auß der kirchen floche dem abte bekam der sich seines flichen wunder nam zů im sprach? Warumb fleuchest du also wes
25 besorgestu dich pist du neue in diser kirchen, oder [379^b] pist du zů einem kinde worden; Gee wir besechen waz dich erschrecket hat, vnnd schuffe vil manche liechte an czünden vnd der abt mit allen seinen münchen in die kirchen ging das reiche köstlich pette alle sachen vnd
30 den ritter darauf schlaffen des sy alle in großem wunder stunden das reich pette von ferren an sachen vnd in sölichem sten das getranck daz des ritter von des soldan arczt zů Alexandria getruncken vnd enpfangen het; des krafft zů der stunde ein end het Mit dem der ritter auß dem schwerenn schlaffe erbachet, Do das der abte sach erschrockenlich
35 sprach; Herre almechtiger got! Nun helffe vns was bedeyt das das wir daz sechen; Der abt mit sampte den münchen sich zůrücke zoche; Der ritter in seinem erbachen sein augen auff thete vmb sich sach vnd wol erkante das er waz do er an den soldan zů sein hin begeret hett, des

er on masse freude hette sich auff richt vnd siczent beleyb den grossenn
 schacze der vmb in lage an sache, iglichs stücke besunder an sache vnd
 beschauet, vnd wie wol er vor des soldan grosse miltikeit er[379^e]kante,
 Doch nun mer dann ye vnd on anders icht gethonn dann die münche
 5 wol sache, vnd in flucht vnd erschrecken vernam, mit hoher stymm den
 abt pey seinem namen nante vnd zû im ruffet vnd sprach das er on
 sorge were kein forcht hette dan er wer sein vetter Torello do das der
 abt vernam mer forcht gewan als der in vor manchem monet tode ge-
 laubet, Doch nach etlicher rede hercz finge do er sich pey dem namen
 10 stâcz nennen horet, das kreucz für sich thet vnd in dem namen gocz zû
 dem pette vnd ritter ginge; der ritter also siczent zû im sprach, Herre
 vnd vater wes czweifelt ir ich pin lebendig frische vnd gesunt got sey
 lobe vnd dancke, vnd kam in diser nacht über mere von Alexandria
 vnd künig soldan here, vnd wie wol in der abte mit einem langen part
 15 vnd heydenischem kleyde sache; doch in nach scharpfem ansechen er-
 kennen wadre, vnnd pey seiner hant nam zû im sprach; mein lieber sun
 nun piß mir got wilkomen zû tausent malen! für paß sprach sun lasse
 dich nitt fremde nemen das wir dein forcht haben, Dann in diser stat
 kein mensche ist der nicht ge[379^d]laube das du tode vnd in dem heyd-
 20 nischen streyte erschlagen seyst; Mer ich dir zû wissen thue das Ada-
 lieta dein haußfrawe mit grossem troen irer freunde wider iren willen
 einen andern man hatte nemen müssen vnd auf den zükünfftigen tage
 sol ir hochzeit machen vnd zû dem man heym gen vnd was zû sölcher
 freude gehört schön bereyt ist; der ritter auß dem pett ginge dem abte
 25 vnd ganzem conuentt grosse freude machet vnnd sy pate daz sy nye-
 mant nicht von im sagtenn also lange das er ein klein sein gescheft auß
 gericht het; Nach dem, dem abte das reiche pette mit dem grossen
 schacze befalche vnd in daz bewaren schuffe, vnnd was sich nach seiner
 außart vonn Pauia piß in dieselben stund seinthalben ergangen het
 30 dem abt alles zû wissen thet, Der abte seines grossenn gelücke besun-
 der freude hette mit sampte im gott dancket vnd lobet, Nach dem der
 ritter fraget wer der netie ee man seiner haußfrawen were; das im der
 abte alles saget, zû dem her Torello sprach Ee yemant von meinem
 widerkomen icht vername Vor ich in meines weybes hochzeyt; ir zucht
 35 [380^a] vnd gepere sechen wille vnd wie wol nicht gewonheit ist geistlich
 leut als ir seyt zû sölchen freuden zû gen; So wer doch ye mein syn
 ir hettet des ordnung geben auf der hochzeit zû sein, des der abte willig
 ze thon was, vnd als palde der morgen kam zû dem neuen prettigan

schicket im enpote wie er auf disen morgen mit einem seinen gesellen
auf sein hochzeit essen komen wölt; Der preütigan dem abte enpote
Im besunder genade vnd freude vnd im gotwillkomen were. Do nun
die zeyt zů essen komen was der abt hern Torello in sein geselschafft
5 nam, in des neüen preütigan hause auff die hochzeit gingen Do sy
von dem preütigan erberlichen empfangen worden, vnd hern Torello
vmb seines langen parte vnd heydenischen fremde kleyde willen von
yederman als ein wunder angesehen waz doch von nyemant erkante,
vnd der abte sprache wer in fraget, wie er ein heyde von künig Sol-
10 dann zů dem künig von Franckreich in potschaft geschicket were, Nun
warde her Torello vmb mer eren willen gegen der preüte über zů tische
gesezte, Die er mit grossen freuden aus [380^b] grunt seines herzen
stälcz ansache, wol daucht wie sy nitt von ganzem herzen frölich were,
auch zů zeiten sie in ansache nicht das sy sein kuntschaft hette oder
15 die zů nemen begeret, dann der lange part vnd fremde kleyd pey im
verparge das er von nyemant mocht erkant sein, vnd do in zeit daucht
zů versuchen ob sy sein gedechtnuß hette, Das ringlein das sy im
seinem abscheiden von ir zů einer gedechtnuß gebenn het im sein hant
name vnd einen iungen der ir schencke was vnd trincken gabe zů im
20 rüffet vnd sprach sag der neüen preüte von meinen wegen wie in meiner
hern lant ein sölich syten vnd gewonheit ist wenn ein gast als ich pin
sich an sölichem ende findet, vnd da mit er vernemen müge das er gern
gesehen sei die neü praut im auß irem silber geschirre zů trincken
peüt nach dem sy selbes dem gaste zů liebe Auch auß dem gulden oder
25 silbren geschirre trincket, der iunge der preüte hern Torello potschaft
pald prachte, vnd sy als ein weyse ernreiche frawe die da meinete er gar
ein grosser lant herr were vnd ze pweisen wie ir sein komen sere liebe
wer, den [380^c] guldin kopffe der vor ir stunde wol waschen schuffe,
vnd den vol wein hern Torello schicket, Her Torello den gulden ringe
30 in den mund nam vnd in dem trincken den in den gulden kopffe fallen
ließ; dez nyemant ware nam vnd gar ein wenig wein darinne liesse den
kopfe zů bedeket der preüte zů trincken schicket vnd sy als die dem
fremden hern seiner gewonheit ein genügen thon wolt, den kopfe ze
trincken zů iren henden nam an iren munt seczet In dem sie den gul-
35 den ringe ersache den sy on grosses beschauen palde erkant het daz es
der ringe waz den sy irem hern Torello zů einer gedechtnuß gebenn
hette do er am lesten dez ein iar monet vnd tage was von ir schide,
den zů iren henden name vnd der sy ein fremde gast sein daucht ernst-

lich ansache; In dem ein fackel fetter ir auß prinender liebe von irem herczenn auß ginge, die taffel vnd tische zů der erden stiesse, nicht anders dann als sy von synne komen were anhubē mit lautter stymme zů schreyen vnd sprache, Daz ist mein rechter herre vnd etlich man den
5 ich vor mir als einen fremden gast siche; das ist mein edeler herr vnd ritter Torello, Zů hant [380^d] sich an icht an gesechen über die tafeln warff mit iren armen vmb finge lieplich halset vnd küsset; in langer zeyt nyemant sy im ab dem halse pringen mochte vnd das also lange treyb daz her Torello selbes zů ir sprach liebe frawe nu rüe ein wenig
10 dann genug zeite wir vor vns haben vns freude zů geben, also die edel frawe abe liesse ir arme vnd hende zů ir zoche des sich die gancz hochzeit betrübt, doch auch etlich des mere dann vor freude hetten, daz also ein redlicher ritter den yederman tode vnd verlorn gelaubet wider funden vnd zů lande komen was. Nach dem der edel ritter yderman pate
15 zů sweigen vnd sein rede zů vernemen anhubē vnd von dem anfang seines außzichen piß in dieselben stunde was sich seinthalben ergangen het, das saget vnd zů wissen thet, vnd in seinen lesten Worten concludiret vnd zů versten gabe wie der edelman der sein frawen zů der ee genommen het nicht vnrecht gethon hette, do er von yderman tode gesaget was, doch seytmale er noch nicht tode were in wol muglich vnd
20 pillich dauchte sein frawen wider zenemen; Darumb im der neüe preütigan keinen vnmüt gen, das er seine schöne liebe [381^a] nemen sölt; Des im der nüe preütigan antwort vnd sprach wie wol er sich ein klein beschamet sache; Herr Torello mit den etern dingen ir tun
25 vnd lassen müget was euch liebe ist, den ringe vnd gabe das die frawe von dem neüen preütigan gehabt hett im wider gabe vnd den ringe den sy in dem kopffe fandē an ir hant stiesse; die gülden kronen die ir von dem soldan gesant was auff ir haubt seczet nach dem von allenn den die auf der hochzeit waren heyme in hern Torello hauß beleyt warde do der edel ritter von allen herren vnd purgern der stat
30 Paugia für ein wunder angesehen ward, In mit grossen freuden erten vnd er dem neüen preütigan alle gethone speyse wider keret, da pey im ein schönes seltsam kleynet schenckt Also auch alle seine güte freunde begabet; Nach dem zů hant seinem hern dem soldan sein frölich
35 heyme komen zů wissen thet Also vil manche iare mit seiner lieben frawen in grossen ern vnd seligem leben mit mer miltikeit dann er ye gethon het sein zeit vertreybe; Also ir des edeln ritters hern Torello vnd seiner frawen müe vnd arbet in irem [381^b] miltikeit vernommē

habt, den lone vnd widerkern des künige Soldan; der in den edeln ritter vmb so gar kleiner enpfangner dienst so grosse herliche freye miltikeit prauchet Des sich vil manche die da wol möchten nöten vnd vngern thon, vor offte kauff machen mer dann ir miltickeyt wert ist
 5 ee sie sich schicken die yemant ze thon, ob in do von klein lone zû stet des sol sich nyemant wunder nemen.

Der marckgrauē von Salucz von seiner armer leüte pete bezwungen ein weybe ze nemen, vnd er die nach seinem willen ze haben eines armen pauern tochter name mit der er czwey kinde het
 10 ir zû versten geyt dieselben kinder zû tōten nach dem ir peweist wie er ir müde sey vnd ein ander weybe genomen hab, sein eygen tochter an desselben weybes stat im komen schuffe, vnd daz erste weybe nacket in dem hemde heym irem vater sant; die er in allen sachen gedültig fande sy wider zû hauße name lieber vnd werder
 15 hielte dann ye stäcz als ein marckgräfin eret vnd liebe het.

[381^c] Do die lange histori zû irem ende komen was; Dioneo lachent sprach; der gute neüe preütigan der des selben nachtes die fantasma mit ragedem zagel meinēt danczen machen, hette nicht czwen heller vmb alles das lobe geben daz ir hern Torello nach dem an im
 20 was die letsten histori ze sagen vnd also sprach ir edelen vnd züchtigen frawen nach meinem bedüncken so ist der heütig tage künig Soldan gegeben worden vnd damit ich mich nicht von eüer meinung lenge; Auch ich euch von einem edeln hern; doch nicht herlich materi, sunder eine seine grosse torhet sagen meine vnd wie sich sölche seine vnweyß-
 25 lich würcken zû gutem end füget; darumb nyemant rate sölchem nachzevolgen dann für war es ein groß sünd waz im also wol zû ergen, Es ist etwan lange zeit das vnder den marckgrauen von Salucz einer genant was Gualtiere der on weybe vnd kind was noch willen het keine zû haben, alle seine zeit in iagen vnd vogelen vertreybe, weder ein weyb ze
 30 nemenn vnd kinder zû haben keinen gedanck het Des er nicht dest weyser ge[381^d]halten was, sunder seine arme leüte des grossen vnmut hetten; In zû manch malenn patenn das er zû götlicher ee griffe vnd ein weyb nem damit er vnd sein herschaft nach seinem tod nicht on erben belibe vnd sich gen im freüntlich erputen im eine seines gelei-
 35 chen zû finden die von sölchem vater vnd muter sölt geporn sein das man ir grosse hoffnung haben möchte; Der marckgrauē seinen leüten

antwort vnd zů in sprach. Liebe freunde mein ir nōt vnd czwinget mich, des ich ze thon gar kleinen willen habe, vnd das darumb wann ich bedenck wie es also ein swere ding ist ein frawen ze finden die sich gancze zů ires manns gewonheit vnd willen schicke, wol widersins ich
5 sy zethon am meisten vernym man sy finde; Nu mag es ye nicht anders dann ein sweres hertes dinge sein wo sich czwey eleüte zů einander fügen, die in syten vnd gewonheit einander vngeleich sein; wie wol er mir eine gebenn meineth, die mir lieben vnd gefallen sol, das gib ich euch zů aber an euch ein grosse torheit ist also zů gelauben; Dann
10 vater vnd muter mügee ir wol kennen aber irer kinder nichtt dann offte vnd dick die kinder [382^a] von ander natur sein dann vater vnd muter ist; Doch seytmale ir mich mit disen keten pinde wöllte, so will ich euch des zů willen wern, vnd damit ich weder über euch noch yemant anders habe zů klagen, dann allein über mich, so will ich mir
15 selbes eine suchen vnd weliche ich mir nym sey wer sy wölle, wirt sy von euch nicht als ein marckgrafin enpfangen vnd geert; so wert ir mit grossem eüerm schaden sechen was ir mich wider allen meinen willen habt thon machen; die erbern seine leüte im antworten vnd sprachen Herre waz ir thut nūr ir ein weybe nemet wir willig sein Nun gut zeit
20 was das dem graffen eines armen pauern tochter sere geliebet hette die nicht ferre von dem palast wonet, die in schöne vnd sere züchtig daucht, mit der er meineth ein genug züchtig lebenn in freüden zefürn nicht weiter suchet im gancz fürname die zů einem weybe zenemen vnd eins tags irem vater zů im rüffet der ein armer man was mit im der sache eins
25 warde, die tochter für sein weyb wöllen, do er das gethon het allen seinen guten freunden zů im rüffet in sein heyret zů wissen thet zů in sprach; lieben [382^b] freunde es ist eüer vnd auch mein gefallen das ich mich mer euch dann mir zů liebe geschicket hab ein weyb zenemen, vnd nach dem ir mir versprochen habt weliche ich nyme dieselben in
30 eren vnd reuerencz halten, Vnd nu die zeit komen ist euch zů halten als ich geret hab, also ich auch von euch will gehabt haben, daz ir mir haltet als ir mir versprochen habt, dann ich hab mir ein schöne iunckfrawen nicht ferr von hier funden, vnd mir zů einem weyb erwelet die ich in kurzen tagen meine zů hauß zefürn, Darumb gedencket das wir
35 ein fröliche hochzeit machen vnd ir sy mit freüden enpfangen müget, vnd ich eüers versprechen müge frölich vnd wol zemute leben Die erbern gūte leüt dem hern alle antworten vnd sprachen Her waz wir euch versprochen haben das wöllen wir halten piß in den tode mit euch gen,

wir süllen vnd wöllenn vnser frawen ern sey wer sie wölle, so wöllenn wir sy für vnser liebe frawen halten Nach dem sy alle bereyten ein köstlich hochzeit zů machenn den hern vnd die frawen zů ernen vnd er alle seine fretinde dar zů lude, vnd vil herlicher reicher kleyder von
 5 golde seyden [382^c] vnd silber einer iungen an schneyden liesse die von leyb der geleich waz die sein weyb sein sölte, damit köstlich gülden gürteln gülden ring reiche kleynet als dann einer neuen pretüte zůgehört, er zůbereyten thet; Do nun der tage die hochzeit zů machen kommen was, der marckgraffe mitt seiner gesellschaft vmb tercze zeit auff
 10 zů rosse saß vnd alle die in ernen wolten mit im riten in wenig stunden bekomen do die iunckfrawe mit irem armen vater in einem kleinen dorffheüßlein ir wonung hett Do er sie fande mit grosser eyle von einem prunne mit einem krüge mit wasser kamen Die auch meinet mit den andern frawen die neuen praut komen sechen, vnd do sy der marckgraffe
 15 ersache ir rüffet zů ir sprache? Gresedia wo ist dein vater, dem sy mit grosser schame antwort vnd sprach genediger herre mein vater ist in dem hauß; Der marckgrawe abe von rosse sasse yderman gepote nyemant sich verrüren sölte allein in das heüßlein ginge; Do er der iunckfrawen vater fande der mit namen genant was Ganucolo zu dem er
 20 sprach Ganucolo Ich pin komen Greseida zů mecheln vnd mit mir zů hauß fürn [382^d] Doch von erste von ir vernemen wölte wo er sy für sein elich haußfrawen neme ob sy sich vleissen wölt seinen willen zethon vnd seine gepot zehalten noch was er mit ir schaffe sich des nicht betrüben vnd alle zeit im gehorsam vnd vutertan sein, auch vil mere
 25 ander sach an sy begeret des sie alles zethon willig was sich ganz zů seinem willen ergab Nach dem sy der marckgraffe pey ir hende nam auß dem heüßlein füret gegenwürtig aller menge sy mechlet vnd zů der ee nam; Nach dem nackent außziehen schuffe vnd ir die reichen kleyde anlegen thet, ein gülden kronen auff ir haubt seczet, des sich nyemant
 30 verwundern mocht, Daz der herre gethon hett, Nach dem er zů seiner gesellschaft sprach lieben freunde vnd hern, das ist die, die ich zů einem weyb haben wille wo sy mich anders für iren man haben wille Sich gen ir kert zů ir sprach Greseida gefalle ich dir zů einem man des sy ein klein auff ir selbes stund nach dem mit grosser schame sprach
 35 her ich pin geschicket ze thon eüer gefallen; Aber ich vnwürdige eüer genaden zů der götlichenn ee nicht würdig pin Der marggraffe so will ich dich für mein [383^a] eliche frawen haben, Des er ir zů der stunde einen guldin ringe anstiesse, auff zů rosse seczet heym in den fürst-

lichen palast füret, Do man grosse hochzeit vnd freude machet, Nicht
 minder als wer Gresedia eins grossen fürsten vnd des küniges tochter
 gewesen Die iunge praut nitt anders erschein als wie sich ir gemüte
 mit sampt dem fürstlichen kleyde verendert vnd als wer sy an grossem
 5 fürstlichen hoff erczogen worden, Sy was schönes leibes vnd angesicht
 nicht vil frawen ires gleichen in dem lande was vnd in masse als sy
 schöne was also auch züchtig diemütig vnnd von wirdigem geperde was
 Nicht eins armen mans sunder eins grossen fūsten tochter sein daucht,
 Des sich yederman wunder nam die sy für ein scheffhirten erkannt het-
 10 ten vnd iczund sy aller ern vnd tugent vol sachen, vnd über das dem
 marckgraffen ser vntertan vnd gehorsam was, das er sich der seligiste
 man auff erden sein daucht; Auch wider ires hern arme leüt so die-
 mütig milte vnd diensthafft was das sy mer dann ye fraw von yederman
 liebe vnd wert gehalten was, alle ires hohen stant wol ze mute vnd
 15 con[383^b]tent waren, got stäcz für sie paten nicht sprachen als etlich
 am ersten gethon hetten wie der marckgraffe so vnweißlich gethon
 hette; Sunder sprachen er paß vnd weißlicher dann kein man gethon
 hette der im sölche weise tugentreiche frawen hette finden vnd erkennen
 können, die vnder dem schafhirten gewentlein verporgen gewesen was;
 20 Der zucht vnd tugent sich in also kurzzer zeyt in als ferre gegent auß-
 gepreyt het; Nach dem nicht lange verginge das sy swanger warde vnd
 zū der zeit ein schöne tochter gepere, des der marggraffe besunder freude
 nu het Doch nicht lange verginge im neüe gedanken zū stunden, das
 was das er sein frawen mit langer experienz in gedulte versuchen wölte
 25 anhube sy mit worten zū stechenn sich gen ir betrübte beweyset zū ir
 sprach wie sich seine arme leüte ab ir vnd im klagten vnd darumb das sy
 vnedel vnd von also schnöder gepurt komen were, Des sy alle ser übel
 zemute weren, sunder seyt male sy sechen daz sy kinder trüg vnd ein
 tochter pracht hette; Vmb des willen stäcz wider in mormelten. Do die
 30 frawe des hern rede vername mit vnuerkertem anpicke vnd [383^c] red-
 licher fürsaczung also sprach genediger herr mein tāt mit mir des ir
 ere nucze vnd freüd habenn meinēt des pin ich albeg willig von euch zū
 leyden nūr ich thue etter gefallen Dann mir wol kunt ist der ern vnd
 der werden darinne ich mich finde ir nit wirdig pin An der der frawen
 35 antwort der marckgraff grosses gefallen het wol erkante daz sy sich
 ires erhöchen nicht übernam Sunder diemütiger dann ye on alle hoffart
 freuntlichen geschicket fande Doch sich wie er dez gefallen het nitt
 mercken liesse, Nach dem aber nitt lang verging er in zū versten gab

wie sein armen leüte der tochter von ir geporn nit leyden möchten,
 vnd eins tags einen seinen diener vnterricht wes er sich halten solte,
 Die frawen aber zů versuchen, der von seines hern wegen zů ir kam mit
 genug grausamen angesichte zů ir sprach, frawe ir wert gedult haben,
 5 Dann will ich nicht sterben so muß ich meines hern gepote verpringen;
 Er schafft vnd gepeut das ich eüer iunge neü geporne tochter nem die
 weg trag vnd ab der welt dilge, do die züchtig frawe den knecht ver-
 nam vnd mit also pösem angesicht sache sere erschracke, [383^d] vnd on
 czweyfel gelaubet im were als er saget, vnnnd das kint zů töten im von
 10 den marggraffen befolhen wer, daz kint palde aus der wigen name halset
 vnd küsset im iren segen gabe on vnuerkertes angesichte es dem knecht
 in sein hende gabe, diemütiglichen zů im sprach Nym hin das vnschul-
 dig plute verpringe vnsers hern gepote! Doch pitte ich dich durch got
 das du es nicht den vogeln der lüfft vnd den hundenn zů essen gebest
 15 es sey dann meines hern gescheffte. Der knecht das kin zů seinen hen-
 den nam wege ginge dem marggraffen was im die frawe het zů antwortt
 geben im zů wissen thet, des der marggraffe ser wol ze mute waz sich
 irer grossen bestendigkeit fremde nam, daz kind palde einer seiner
 mummen gen Boloni schicket sy freüntlichen pate das sy im das kint
 20 auffzüge vnd nyemant saget wer sein vater noch muter wern Die es mit
 grossem vleiße in zucht vnd eren erzoche; Nach dem aber nicht lange
 verging Die marggraffin von neuem eines kindes von dem marck graffen
 swanger warde, vnd zů seiner zeite eines schönen suns genas; Des der
 marckgraffe von ganzem herczenn [384^a] froe was; Aber sich nicht be-
 25 mügen liesse als er der frawen mit der tochter gethon hette, von neuem
 ir, ir hercze mit pein leyte vnd schmerzen durchginge, vnd eins tages in
 masse als er gar sere betrübet were zů der frawen sprach; Liebes
 weybe! Syder du disen vnsern sun geparest ich mit meinen leüten nye
 habe mügen rue haben also groß ist ir leyte vnd klage deines neü ge-
 30 poren sune der des groben eynfeltigen paueren tiechter ist, vnd nach
 meinem tode ir herre vnd mein erbe sein sol, darvmb ich besorg wölle
 ich anders mit in mit fride sten ich müsse mit vnserm disen sun thon,
 als ich mit vnser tochter gethon hab; noch mer vnd erger ich besorge
 daz ich dich nicht lassen müsse vnd ein andre nemen. Do die gut fraw
 35 des herren rede vernam im mit gedultigem diemütigem gemüte antwort
 vnd sprach Herre thut eüer gefallen vnd gedencket stäcz zethon, das
 eüer nucze vnd frome ist, nit bekümer euch mein dann grosser freud ich
 nit gehaben mag dann ze thon das euch liebet, vnd nach etlichem ver-

gangen tage der marckgraffe aber in dem form als er vor mit der
 [384^b] tochter gethon het zû der frawen vmb den sun schicket, ir zû
 versten geben thet, den zû töten vnd zû hant gen Boloni schicket als er
 die tochter getun het; Die gute frawe aber gedult het weder minder
 5 noch mer wort machet als sy vmb der tochter willen gethon hett das
 den margraffen ein seltsam vnd fremde sache sein dauchte seiner frawen
 grosse bestendigkeit Zû im selbes sprache; Für war kein frawe der welt
 das gethon het das die gethon hat, vnd wer nitt gewesen das er eygent-
 lichen wêste das sie peyde kinde getragen het Er hette gesprochen die
 10 kinde nit ire kinde gewesen weren, vmb des willen sy ir klein acht hett
 wie in geschehe; Auch sein arme leûte nicht anders gelaubten dann er
 die kinde getöt het, im darvmb übel retten vnd für einen herten vnwey-
 sen mann hielten; Der guten frawenn Greseida groß erpärmung hetten
 nit sampte ir die kinder klagten; Aber ander rede von ir nye gehört
 15 warde, dann waz irem hern von dem sy die enpfangen hette damit ze
 thon gefiele das auch ir gefallenn sein sölt; Also etliche vil manche iare
 gestanden, den mar[384^c]graffen zeit daucht sein frawen zû dem dritten
 vnd lestenn male in gedulte zû versuchen vnd mit vil manchen den sei-
 nen des zû rede kam vnd sprache? wie er Greseyda für sein weybe
 20 nicht mer geleidenn möchte, erste er erkente das er in seiner iugent
 vnrecht gethon het sie zû nemen vnd alles sein vermügen tun wölte ob
 der pabst mit im dispensirn wölte vrlaub zegebenn ein ander weyb sei-
 nem adel geleich ze nemen; Eins sölichen er von vil manchem seinem
 freunde gestraffet ward; des er kein ander antwort gabe Dann er im das
 25 für genomen het vnd sein müst, Ein söliches frawen Greseyda ee vonn
 andern leûten dan von im zû gehöre kam, Des sy sich klein betrübet ir
 wol gedacht nitt erger ir geschehen möcht dann wider ze komen der
 schefflein zû hüten als sy vor getun het alleine sich des betrübet das
 der den sie ob allen mannen lieb het ein ander frawe ir in enpfremden
 30 solt; Doch ir fürnam thon als sy vormalis gethon hette, alle dinge mit
 gedult zû leyden, vnd die übel vnd schmacheit auch zû vertragenn; Nach
 dem nicht lange verging der marckgraffe seine [384^d] contrafat prieffe
 öffnet in masse als ob sie von dem pabst komen weren, die seinen leûten
 thet lesen, Die inne hielten wie im der heilige vater verliche vnd zûgeb
 35 ein ander weybe zenemen vnd Griseyda zû lassen Zû hant ir für sich
 rüffet gegenwürtig allem volcke zû ir sprach; Frawe Griseyde du solt
 wissen wie durch geschefte vnd verhengung vnsers heiligen vaters des
 pabstes mir verlichen ist ein ander weyb zû nemen vnd dich zû lassen

Dann alle die mein vergangen mechtige wirdig hern gewesen sein, So
 sein deine ewig pauern gewesen; Darumb ist mein syn das du fürpaß
 mein weyb nicht mer seyest, vnd daz pald heym mit der heymsteuer
 geest die du her zû mir pracht hast; Damit ich ein andere die mir füg-
 5 licher dann du pist nemen müge; Do die züchtig frawe ires hern vnd
 mannes rede vername; nicht mitt kleiner pein ires herzen wider alle
 freuntliche natur daz weynen verhielt zû im sprach; edeler herre mein
 Ir sult wissen das ich mein schlechte nydere gepurt stäcz wol erkant hab
 vnd das ich etters adels vnwürdig noch euch füglich zû einem weyb was,
 10 vnnnd die [385^a] zeit die ich pey euch gewesen pin das von got vnd euch
 in besunderheit erkenne, Nach euch nye mein schaczet noch euch für
 mein hielte; Sunder euch mir als einen gleichen man geacht hab; Seyt-
 male nu etter gefallen ist euch mir wider ze nemen; so sol es auch mir
 lieben vnd mein gefallen sein, Ir euch selbes euch wider zû geben, so
 15 nemet hin eüern ringe mit dem ir mich mechlet, Ir gepiet vnd schafft
 mit mir das ich mit meiner heymsteuer zû haüße gee die ich zû euch
 pracht; darzû ich weder some noch seckel bedarffe daz meine mit mir
 ze tragen dann mir wol ingedenck ist daz ich nackent zû euch kom;
 darumb ir mir nicht schuldig seyt zû geben; Düncket euch dan daz der
 20 leybe der von euch kinde enpfangen vnd getragen hat vor aller meng
 nackent ze hause gen gesechen sey, so will ich aber gern also nackent
 von euch gen; doch ich eins euch pit vnd begere vnd das in widerke-
 rung vnd lone meiner reinen iunckfrawenschaft, die ich zû euch pracht
 vnd der nitt wider von euch trag, Das ir mir doch alleine einn armes
 25 hemdlein meinen leyb zû bedecken über mein heymsteuer [385^b] ver-
 günnet. Der marckgraffe der da mer willen het zû weynen als den die
 frawe erparmet dan anders zethon; doch feste in seinem fürsacz stunde
 Zû der frawen sprach; Nu wolan im namen gotz so trag ein hemde mit
 dir vnd gee heym wenn es dir am füglichsten ist vil manche die da
 30 gegenwürtig warn sich des hern grosse hertikeit nicht verwundern
 mochten, In freuntlich paten das er ir doch einen eynigen rocke gebe
 Damit sy als die da czwelf iar sein haußfrawen gewesen was nicht also
 schentlich vnd armglicheinn auß seinem hauß ginge, vnd in einem hemd
 parhaupt vnd parfuß gesechen würde; Aber aller erbern leüten piten
 35 vmbstünst was, Also die gut frawe alleine in dem hemde von dann schiede
 heyme zû irem vater ging; Der auch nye von ganzem herzen glauben
 mochte, das der marggraffe sein tochter für sein weybe hielte Des alwegen
 gewart het daz iczund der tochter zügestanden was, vmb des willen der

tochter ir armes gewentlein gar schöne behalten hette, daz ir der mark-
 graffe außgezogen hette an dem morgen do er sy mechlet vnd wege fü-
 ret [385^c] Dieselben ir der vater pracht vnd sy die wider anleget; nach-
 dem sich palde zû dem vaterlichen haußdinst schicket als vormals ge-
 5 thon hette, Also auch iczund thet vnd mit stetem festem gemüte den
 ansprunge des vnseligen pösen gelücke widerstund; Do nu der mar-
 graffe seinen willen Griseida halben verpracht het seinen leüten zû ver-
 sten gab wie er het des graffen tochter von Panagho zû einem weibe
 genommen grosse hochzeyt vnd freude zû bereyten thete vnd eines tages
 10 wider nach Griseyda schicket zû ir sprach Griseyda du solt wissen das
 ich von neuem ein weybe zû hauß führe die ich in irem ersten zû mir
 komen fürstlichen ern meine; Nun weistu wol das in meinem hanße nye-
 mant von frawenn pilde ist die mir alle kamern zû bereyten künde;
 Nach dem sich zû söleher sache gepürt; Darumb du dieselbig sein wirst,
 15 Als die sich eins sölechen mer dann laß dir die schlüssel zû allem kein
 ander frawe verstet, ich dem das dir nottörfftig sein wirt; Darumb gib
 ordnung schaff vnd gepeüt als wer es dein geschefte lad alle die frawen
 der stat, die dich zû söli[385^d]chen eren füglich düncken vnd wenn die
 komen so enpfah sie vnd ere sy als werest du die markgraffin, vnd
 20 wenn vuser hochzeit ein ende hatt so magst du wider zû hause gen dei-
 nem geschefte auß warten; Alle dise wort der armen guten frawen nicht
 anders waren dann wie ir ein swert ir hercze durch ginge, Dann die
 grossen liebe die sie zû im hette, noch nicht gancz von ir geleget het,
 Dem herren antwort vnd sprach; Allerliebster herre ich pin stäcz be-
 25 reyt ze thon eüer gefallen, darumb mit mir schaff vnd gepietet als mit
 eüerm minsten diener, Also die gute frawe sich zethon aller sache vnter-
 finge In irem groben gewentlein in den palast zû einer kamern in die
 andern, die alle reyne vnd sauber ze machenn nicht minder als ein
 ander haußtiren thut sy thete, sich zû aller schnöden arbeit schicket,
 30 nicht ruet piß sy alle kamern vnd pette bedecket vnnd zû bereyt het;
 Nach dem alle erbere frawen der stat von dem margrafen wegen auff
 die hochzeit lude vnd do der hochzeit tage komen was wie wol sie in
 armen gewentlein gekleydet was, Doch mit züchtigenn freöli[386^a]chem
 geperde alle frawen lieplichen enpfinde in die ere tet die sölechen frawen
 35 füglich waz, Der markgraffe der da seine peyde kind sun vnnd tochter
 zû Boloni hette, In grossenn eren zucht vnd wirdeu auferziehen machen,
 pey einer seiner mumen die dem graffenn von Panagho verheyret was
 Vnnd dieselbig sein tochter nun pey dreyzehn iaren alte was, Die

schönste iunckfrau was die in vil manchen iaren in Boloni gesechen
warde, vnd do mit der marckgraffe seiner angefangen sache zû ende
keme seiner mumen vnd irem man gen Boloni schreyb das sy im
zû dienste auff einen benannten tage die tochter vnd auch den sun
5 mit einer wirdigen gesellschaft prechten, zû yderman sprechen wie
sy dise schöne iunckfrawe dem margraffen gen Saluczo zû einem
weybe heyme fürten, Nyemant sagten wer sy were; also nach et-
lichem vergangen tage der graffe vnd die greffin mit der iunck-
frawenn vnd irem pruder vnd wirdiger schöner gesellschaft auf zû
10 rosse sassen gen Salucz riten; Do des margraffen gancze lantschaft
der neuen preute wartent was, Sy mit grossen eren vnd freü[386^b]den
enpfingen; In den reichen wol gezirten palast fürten Do die tische zû
essen bereytt waren, Auch die arme Griseyda in irem groben gewentlein
der schönen iunckfrawen entgegen kam lieplich enpfinge zû ir sprach;
15 Mein aller liebste frawe mein nu seyt mir zû tausent malen got wilkomen!
Die edeln frawen von der stat den marckgraffen paten das er Griseyda
in ander gewant kleydet oder schüffe das sy in der kamern belibe, vnd
nit in also zû rissem kleyde vor den gessen vmb ging Dann er wer im
klein ere sy lassen also gen, Aber ir aller piten verlorn was, Nach dem
20 yederman zû tisch gesezset warde von köstlichem essenn vnd trincken
frölich gedienet worden, Die iunckfrawen vmb irer grossenn schöne
willenn von yederman angesechen waz Doch mer von Griseyda dann
yemant anders alle geleihe sprachenn der margraffe het einen gûten
wechsel gethon Do man nun schir gessen het den marckgraffenn nun
25 wol genug daucht vnd seiner gedultigen frawen Griseida gehorsam vnd
gedult im ein genügen versucht vnd in gedult [386^c] gesechen het,
sache vnd erkant sy sich keinerley vnmut oder betrübung mercken liesse
vnd an dem als ein weyse fürsichtige frawe thet; Auch wolte erkante
ein solches an ir von nicht anders bekommen mochte, dan allein von der
30 tugent der gedulte, kein ding sy czwange mitleydig vnd gedultig zû sein,
dann alleine ir grosse tugent; Nach dem solchem seinen bedencken der
tugentreichen frawen zû im rüffet zû ir sprach; Griseyda wes bedüncket
dich vnser schönen preüt Edeler herr sprach Griseyda mich bedüncket
wol vnd gûtt got gebe euch gelücke! ist sie also weysse als sy schöne ist,
35 dez mir nicht czweyfelt ir euch den seligisten hern sprechen müget aller
welte, Doch so ich pest mage euch freuntlich pite, die herten pein die
ir der, der andern eüern gabet, vnd der ir nun nicht gebett Dann ich
kann nicht gelauben das sy die ertragenn möchte Dann ze iunck vnd

weyche an iren iaren ist, vnd nicht in müe vnd arbeit als die vorig auff erden erzogen ist. Nach der frawen rede der marggraffe wol sache vnd erkant das Griseyda on czweyfel gelaubet das die schön iunckfrawe [386^d] die ir peyder tochter waz; sein weybe were vnd auff von dem
5 tische stunde Griseida pey der hant name sie zü im an seinen seyten seczet züchtiglich zü ir sprach; Griseyda liebes weib Es ist nudalest wol zeit, das du die frucht vnnnd den lone deiner grossen gedulte vnnnd mit- leyden enpfahest, vnd damit ich von den die mich pöß vnd für herte hielten erkennenet werde, vnd was ich in dich begangen hab nicht in
10 argem sunder in gutem gethon hab Dise vnser tochter zü leren ein züchtig weyb zü sein, vnd vnsern sun wie man ein weibe balten sülle, vnd nun mir mit dir einen ewigenn fride schaffen die weil wir mit ein- ander leben, Dan ee ich dich versuchet ob du gedultig werest ich stäcz in sorgenn lebet mir von dir schande züstünd das nun nicht geschehenn
15 ist des ich got dancke; Darumb mein syn ist dir zü einer stunde wider zü geben das ich zü mermalen genomen het, vnd dich aller pittern wi- derdrisse ergeczen die dir von mir gegeben worden. Darvmb nym hin vnd enpfah mit frölichem hēzen die iunckfrawen die du mein weybe meinest sey, vnd gelaub das sy vnser [387^a] peyder tochter sey, des-
20 selben gleichen den iungen iren pruder, vnsern liebe sun vernym vnd nicht gelaub als vil manche andre meinten ich sy hertes todes getött het Also gesprochen sy mit seinen armen vmbfinge halset vnd küssett fürpaß sprach Ich mich des wol rümen mage kein man auff erden seiner elichen fraw paß ze mute sein mag als ich Nach dem Griseyde ir tocht-
25 ter vnd den sune erkante peyde lieplichen halset vnd küssett von dem tische auff stunden in die kamern gingen do Griseyde in ire reiche kley- der gekleydet warde wider in den sale gingen; Do sich von neuen neuen freude enpfinge, des yederman froe vnd frölichenn was, vil manchen tage also in grossen freudenn lebtenn. Etliche den marggraffenn für
30 weyse hielten; etliche herte; etliche seine wercke lobten; etliche sy schulten vnnnd pey im peyspil nomen vnd frawe Griseyda ob allen frawen die weysect gehalten was, vnd nach etlichem vergangen tage der graffe von Panagho mit seiner geselschaft wider gen Boloni reyte, vnd der marggraffe seinen alten swäher Ganucolo von seiner herten arbeit nam [387^b] In
35 hohen wirdigen stant seczet; Do er mit grossen eren piß in sein ende sein leben fürett, Nachdem sein tochter wirdiglichen verheyret vnd dem sun ein edele schöne iunckfrawe zü einem weybe gab, Also der vater vnd sun iglicher mit seiner haußfrawen lang zeit mit grossen freuden

- lebten; Was wölle wir nu sprechen ir edeln frawen; Ich laß mich gar wol bedüncken wie das auch in der armen geheuse vonn hymel abe regent die götlich genade vnd edeln geiste nit minder als in die fürstlichen thut, die zů zeiten mit vrlaub des viches zů hüten wirdiger wern,
- 5 dann herschafft über menschen zů habenn Nu wer were die tugentreiche vnd gedultig frawe gewesen anders dann Griseyda die mit trucken augen vnnerkerten anpicke frölich vortragen vnd mit diemütiger gedulte söliche grosse hertickeyt ires mannes het erleyden mügen fürwar keine noch sölich probe in kein frawen nye mer gehört worden als der marggraffe
- 10 Gualter seiner frawen thet; Nun saget mir ir lieben frawen welichem were nitt sere recht geschehen wo der ein weybe gehabt hette, wenn er [387^c] sy nacken auß getriben hette Das sy sich vnder einen andern ir schame zů verdecken geleet hette, ir hette den pelicz strelen machen, damit ir ein rocke worden were, wo das geschehen were, wer hett ir
- 15 des vnrecht geben mügen Mit dem hat Dioneo history vnd neüe fabel ein ende, got vns ein kleine nachred auch zů ende pring. Nun vonn den züchtigen frawen etlich dinge gelobet etlich gescholten worden; Doch alle die züchtigen Greseyde irer gütigen gedult lobten, In dem der abent vnd vesper zeit komen was; Der künige sein augen gen himell hube got
- 20 lobet vnd sprach; Ir edeln frawen ich gelaube wie euch der tölichen syne genug wol süllen erkant sein, Das die nicht anders dann alleine der vergangen dinge gedechnuß sein, vnd die gegenwürtigen zů erkennen zů verseeen daz da noch geschehen sol; Ein solches von grossem weistum zetun gemeint wirt; darum deücht mich wer es anders etter
- 25 gefallen wir fürpaß suchten vnser leben zů fristen dann nun pey vierzehen tagen wir hie gewesen sein, vund nach meiner vrteyle ich sprich wir piß auff disen heutigen tage genug züchtiglich vnser we[387^d]sen mit einander gefürt haben wen ich vnser rede vnd gesagte histori bedenck; dovon mancherley abentteüer ist gesagt worden; auch dapey wol
- 30 gessen vnd paß truncken mit singen sagen danczen vnd springen vnser zeit vertriben haben das doch alles dinge sein ee vnser gemüte zů vnzucht zů ziehen dann nicht, der ich von den genaden gotz keines gernercket hab, sunder alleine in zucht vnd pröderlicher treü vns gesechen hab, Das mir on czweyfel in vnser aller dienste besunder freüde pringet
- 35 Doch wer mein syn vnd gefallenn ee sich anders begeben dann der falschen zungenn vil sein; Seytmale vnser igliches sein tagreise künig zů sein verpracht vnd dieselben ere gehabt hat; das wir vns wider fügten von dan wir her komen sein, Dann nudalest yder man hierumb wissent

ist, daz wir hiepey eine sein vnnnd sich ee vmb neyde vnd haß willen dann anders begeben möcht Das sich alle vnserere freüde in betrübung vnnnd traurigkeit keren möchte; vmb eins sölichenn willenn wölt ir anders nu meinem rate folgen vnd behalten so behalt ich mir die kronen piß
 5 auf vnser abscheiden, Das ich meine piß [388^a] morgen sein stülle; wer euch aber anders zü willen so habe ich mir fürgenomen wer auff den nechsten tage vnser künige sein sol, Die rede vnder den frawen vnd auch man mancherley was; doch vmb des pesten willen des küniges rate folgten der seinem haußmeister zü im rüffet was er pis morgen tun sölte
 10 dem sein ordnung gab; nach dem der wirdigen gesellschaft piß auff das nachtmale sein vrlaub gabe, Also auff stunden yderman nach seinem gefallen spacziern ginge, In dem die zeit daz nachtmale zü empfangen komen was das ein namen nach dem zü pette ruen gingen vnd des morgens früe yderman auffgestanden waz der haußmeister alle ding weg
 15 gesant het Nach dem die gesellschaft auffstunde dem künig alle gen der stat wercz nach folgten, vnd die drey iungen manne vnd die syben iungen frawen in der kirchen liessen von dann sy außgeschieden waren, vnd do die frawen zeit daucht igliche mitt irer meyd wider zü hauß ging.

20 Den edeln schönen frawen zü freuden lobe vnd ern den ich mich zü liebe zü also lannger müe vnd arbeit geben hab des [388^b] mir die götlich genade gehilfflich gewesen ist, vnd daz vmb der diemütigen edeln freülen pete vnd nicht meines verdienen willen, das volkomelich nach dem ich in dem anfang vnseres werckes versprache verpracht hab; Des
 25 ich von erste got darnach euch schönen frawen dancke sage, vnd nun meiner federn vnd haut rue gebenn will; Doch ee ich ganz abe lasse vor mit kürze euch etlich wort sagen muß Dan villeicht ir oder etliche ander sprechen möchten des mir nicht czweyfelt geschehen wirt Dann mein wercke kein besunder breuilegio haben sol dann andre wercke
 30 haben; Es wern villeicht etlich sein die da sprechen wern ich hab mir in meinem reden vnd schreiben zü vil gewalte vnd vrlab genomen, vnd das zü zeyten das ich die frawen hab hören machen, materi nicht füglich den züchtigen frawen zü hören des ich laugen vnd nein spriche, dann kein ding so vnzüchtig zü reden nicht ist wo das mit züchtigen Worten
 35 geret wirt daz das nit züchtig geheissen sey, vnd auch nyemant mit recht anders reden mag Darumb mich bedüncken laß wie ich hie nicht übels begangen hab; sunder als pillich ist [388^c] gethon habe; Doch secze wir daz im were als ir meint dann mit euch ich in keinen weg

kriegen wil, dann ich wer von euch überwunden; Doch sprich ich vnd antwort, vil guter vrsache sein warumb ich das gethon hab, von erste etliche materi vnsers werckes wo ir die recht vernemen wölth daz sy das also wöllen gehabt haben, vnd ob ich mir indert in etlichen worten
 5 mer gewalt vnd freyheyt zů reden genomen het dann villeicht geistlichen frawen ze lesen zů gehöret so mügen sy dieselbenn sten lassen vnd nicht lesen; vnd andere für sich nemen. So meine ich doch ye meiner federn stülle nicht minder als dez malers pensel gelaubt sein, denn nyemant straffet was er malet; Sant Michel mit der lanczen oder swert den
 10 tracken zů stechen Sant Iörgen den lintwurm wie im daz am gefelsten ist er macht, auch Kristum ein man vnd Eua ein frawen, vnd wie Kristus auf dem kreütze für die menschen sterben wolte; etwann er in mit einem nagel in den füßen, etwan mit czweyen nageln machet; doch darumb von nyemant gestraffet ist; Auch stült ir wol wissen daz wir
 15 dise materi nicht geschriben haben zů [388^d] kirchen zů lesen; der wort vnd wercke alle heilige sein sullen Dann ir heilige histori anders dann die von mir geschribenn sein man findet Auch in der hochenn lerer vnd filosofy schule do man nicht minder dann anderswo zucht pflegen muse Sy sein gesagt vnd in kürzweyle geschriben worden; Auch
 20 vnter iungen vnd alten wol zeytigenn die sich vmb fabel willen nit erweichen lassen, zů fretide vnnd kürzweile zů manchenmalen sein gesagt worden sy sein wie sy wöllen so mügen sy geleiße so wol nuczper als schentlich sein als alle andre dinge sein wer weiß nicht daz der wein den lebendigen gůte vnd nütz ist nach dem Cintiglione vnd Scolapio
 25 sprechen, vnnd doch dem krancken schedlichen ist wöll wir dann sprechen das er dem fibrigen schade ist daz er pöß sey; wem ist nit wissentt daz das feuer gut vnd nuczper ist vnd des in keinen weg geraten mügen; wöll wir darumb sprechen daz es hauß vnd hofße zů zeiten verprent daz es pöß vnd zů nichte sey, desselben gleichen alle waffen die der men-
 30 chen heyl vnd die in fride leben wöllen ir beschützung sein vnd auch vil dicke die töten Aber nicht vrsache ir, sunder [389^a] der die sy übel prauchen, Also kein fraw nye waz die da übel geschicket wer daz dieselbig icht gutz verstünde, vnd gleich als ir das züchtig reden keinen frumen pringet Also auch die vnzüchtigen wort der bestendigen wol ge-
 35 schickten vnd züchtigen frawen keinen schaden pringen mügenn ir nicht anders thut dann als der sonnen schein in der weltlichen vnreinickheit thut; Nun weliche pücher weliche wort weliche puchstaben sein wirdiger mer reuerentz vnd ern wirdig dann die der heiligen geschriff vnd

ir doch sovil gewesen sein die sy also pöblich verstanden vnd gepraucht haben, sich selbes mit sampt andern zů der ewigen verdammuß pracht haben; Ein iglich dinge in im selbes zů etlicher sache gut ist, vnd doch auch schetlich mag gepraucht weren; also mag ich meinen neuen historien sprechen, wer do von pösen rate nemen wille vnd do durch übel würckenn do nöten sy nyemant zů; wer aber dovon nucze nemen wil dem verlaugen sy sein nicht, vnd nicht anders dann als ich vor gesprochen hab züchtig gut vnd nützperlich sein, besunder wenn sy von den person gelesen wern, durch die [389^b] vnd der willen sy sein gesaget worden, vnd wer pater noster pfannen kuchen oder fladen zů pachen hat der lasse sy sten dann meine histori nyemant nach lauffen sy zů lesen nun wie wol die peteswester vnd nunnenn das ir auch darzů reden so thon sy doch auch zů zeiten minder dan wol des ich geschweige; Es möchten auch etlich sprechen es weren vil vnder disen neuen historien es were pöser sie werenn nicht, das gib ich in zů; Aber ich weder mocht noch solt anders schreibenn dann als die würdig gesellschaft gesaget het Darumb hetten dieselben pesser vnd schöner histori gesaget so hett ich sy schöner vnd anders schreiben mügen; doch ob wir sprechen wölten das ich der materi ein vrsache vnd anfang gewesen were, des ich nicht enpin, so spreche ich das ich mich des nicht schamen wölten ob sie nicht alle schöne wern dann kein meister got außgenommen nye warde der alle dinge volkomlich macht oder verpracht, kein acker warde nye sowol durch pauet daz darinne nit vnnützes kraute wuchße; an das das wir mit iungen züchtigen eynefgen frawenn als ir seyt zů reden habenn; Darumb ein grosse [389^c] torheyte were subtiler materi suchen gen grosse sorge zů haben mit vil masse zů redenn, Doch sprich ich ir allerliebsten frawen weliche vnter meinen neuen historien zů lesenn suchen get die laß sy sten die da stechen vnd lese die ir lieben domit sol nyemant betrogenn sein dann ser iglich person an seiner stirn bezeichent hat waz in im inwendig verporgen ist Auch etlich ander sprechenn möchten dise histori werenn gar zů lang Zů den ich sprich wer anders zethon hat dem ein torheit sey in diser materi zů lesen sein zeit zů verliesenn wen sy nu gleich gar kurcze weren; Darumb ir sült wissen das ich mein müe vnd arbeit den müssigen vnd nicht den die da zů schaffen haben zů schreibe, Dann wer sein zeit mitt lesen vertreiben will dem sein sy nicht zů lange, Die kurczenn materi mere den studentenn dann andern zů gehörrn die da nicht vmb kürzweyle sunder vmb gewins willen studirn vnd lesen? was geyt es euch zů schaffen ir edeln

frawen ob sy lange oder kurcz sein, den so vil zeit über wirt, die ir in
 lieplichem luste nit auß gebt Auch czweyfelt mir nicht etliche sein wern
 die da sprechen weren vnser materi zů vil vn[389^d]nützer wort in hal-
 ten, die bedagten schweren man als ich pin zeschreiben nit züste, den-
 5 selben pin ich schuldig danck zesagen, das sy mein so grosses leyte tra-
 gen in von gutem gemüte bekomet sich meins guten lobe ze klagen den
 ich also antwort; Ich bekenn das ich ein schwere alte man pin aber sy
 mich nicht gewegen haben; Doch ich in sage das ich nicht swere pin
 sunder also ringe das ich in dem wasser enporste, das mich der münch
 10 predigen bedencken machte die, die menschen durch ire rede vmb irer
 sünde willenn strafen peysen vnd stechenn vnd sy auff den heütigen tag
 mer vnd völler vnutzer wort vnd werck sein dann meine histori, Der
 wort rede weyse vnd geperde in meinen histori nicht übler geschriben
 gestanden weren als die geschriben sein den iungen frawen iren vnmute
 15 ze ringern, weliche dann eins sölchen verdrossen hett zů lesen diesel-
 bigen hette für sich zů lesen nemen mügen, der Magdalena klag sant
 Francischen leben den passion vnsers herren von sölchem lesen sy palde
 irer kranckheit genesen vnd gesunt werenn Wer gedencket nichtt das
 noch etlich mer sein werden [390^a] die da sprechen weren ich ein ver-
 20 gifte pöse zunge hab; darumb das ich an etlichem ende in vnserm werck
 von den münchen die warheit geschriben hab, Denselben die also von
 mir redenn man mir vergeben sol dann wol zů gelauben ist nicht anders
 dann gute vrsache sy darzů pringe, also zů reden; Dann die münche
 sein alle gute person flichenn gern alle grosse müe vmb gotes willenn,
 25 Doch wie dem sey so bekene ich das alle dinge zergencklich vnd vnstäte
 sein teglich sich verkern; also möcht auch meiner zungen geschehenn
 sein des ich doch nicht gelaube, vnd das nach allem meinem vermügen
 stäcz geflochen hab, Auch nit lange vergangen ist mir eine mein nach-
 perinn saget wie ich die süsten vnd pesten zungen der welt hette, vnd
 30 die warheyt zů sagen do das geschahe, do was nicht vil mere der obge-
 schriben histori zů schreibenn Also den die mir zů leyde übel geret vnd
 mein gedacht haben will ich daz sy sich an meiner antwort bentügen las-
 senn vnd ich yderman will reden vnd gelauben lassen, meinen worten
 vnd wercken ein ende geben, vnd dem diemütiglich dancken der mich
 35 also lan[390^b]ger müe mit seiner hilf zů dem begerten ende pracht hat,
 vnd euch züchtige frawen in götlicher genade vnd seinem fride lasse,
 da pey auch mein gedencket wo ir leset das euch freüde vnd nucze
 bringet.

ANMERKUNGEN DES HERAUSGEBERS.

LITTERATUR.

Über das leben und die werke Heinrich Steinhöwels verweise ich auf folgende schriften:

G. W. Panzers annalen der ältern deutschen litteratur. Nürnberg, 1788. s. 462.

Nachrichten von gelehrten, künftlern und andern merkwürdigen personen aus Ulm, von Albrecht Weyermann. Ulm, 1798. s. 484.

Vier schwäbische ärzte aus der zweiten hälfte des 15ten jahrhunderts, von Moll, im medicinischen correspondenzblatt des württembergischen ärztlichen vereins 1852, n. 18 f.

G. Scholl und F. Scholl, deutsche litteraturgeschichte. Stuttgart bei Metzler, 1855. 1^c, 589.

C. F. v. Stälin, württembergische geschichte. Stuttgart, 1856. 3, 764. 769. 775.

LEBEN DES VERFASZERS.

Der name Steinhöwel d. h. Steinhöuwel oder Steinheuel, richtig ausgesprochen *stœnhœuəl*, ist derselbe, der, fast gleich ausgesprochen, aber Steinheil geschrieben, noch jetzt als familienname in Schwaben bekannt ist. Die schreibung Steinhövel ist unrichtig.

Über das wappen der familie Steinhöwels theilt mir herr professor Haßler in Ulm folgendes mit: »Sein wappen (steinhauen oder steinschlägel) findet sich mehrfach in den von ihm herausgegebenen oder übersetzten werken in verbindung mit dem Ulmer stadtwappen in Johannes Zainers drucken, wenn ich mich recht erinnere, in der übersetzung des Boccaccio de claris mulieribus und im brieft des Petrarca über die Griseldis (s. meine buchdruckergeschichte s. 107 f.); vielleicht auch in der deutschen chronik (s. a. a. o. s. 97).«

Mit welchem rechte Karl Pfaff (geschichte der reichsstadt Eßlingen

s. 232) Heinrich Steinhöwel aus einer alten Eßlinger familie stammen läßt, weiß ich nicht.

Heinrich Steinhöwel ist um 1420 in Weilderstadt an der Wirm geboren und war ein verwanter des arztes Johann Widmann genannt Maichinger.

Aus seinem akademischen titel, doctor utriusque medicinæ d. h. der medicin und chirurgie, meister der sieben künste, geht hervor, daß er eine für seine zeit umfaßende jugendbildung genoßen. Moll im medicinischen correspondenzblatt 22, 149.

Er promovierte in Padua in der medicin 1442 und war daselbst rector der artisten. C. v. Stälin in der beschreibung des oberamts Leonberg, herausgegeben von dem k. statistisch-topographischen bureau s. 249. Wirtembergische geschichte 3, 775.

Dort erwarb er wohl auch kenntnis und vorliebe für italiänische litteratur, aus welcher er später manches ins deutsche verpflanzte.

In den vierziger jahren des fünfzehnten jahrhunderts war Steinhöwel arzt in Eßlingen. Es war diß eine zeit des aufschwungs und der blüte dieser reichsstadt. Seit 1434 herrschte friede mit Würtemberg. Diese ruhige zeit benützte die stadt zur erbauung der schönen frauenkirche. J. J. Kellers geschichte der stadt Eßlingen. Pleidelsheim, 1814. s. 128. Nicht lange hernach baute der spital zu Eßlingen auch die unvergleich schöne spitalkirche durch denselben großen kirchenbaumeister Hans Böblinger, der die frauenkirche gebaut hatte und ein bürger der stadt war. Die frauenkirche steht noch, aber die spitalkirche ward unter könig Friedrich von Würtemberg gegen das ende seiner regierung wider seinen willen auf stadtobrigkeitliche anordnung abgebrochen. Auch andere bauten, wie der begonnene umbau der kirche in Mettingen, fallen in diese zeit.

Herrn professor Haßler in Ulm verdanke ich folgende nachricht über Steinhöwel: »Im jahr 1443 bringt bürgermeister und rath zu Ulm in Steinhöwels namen bei dem abte Johannes von Ursperg, von welchem er güter gekauft hatte, beschwerde vor, einmal, daß sie ihm die versprochene päbstliche bestätigung noch nicht verschafft, sodann, daß ihm verschiedene bezüge von den gütern, theils wegen ansprüche, welche andere daran machen, theils wegen schulden des klostere, die darauf haften, erschwert werden.« Ohne zweifel ist diese rechtssache in eine spätere zeit zu setzen, denn 1443 lebte Steinhöwel noch in Eßlingen.

1449, wo nicht früher, ward Niclas von Wil aus Bremgarten, seit-

her stadtschreiber in Nürnberg, in gleicher eigenschaft nach Eßlingen berufen, wo er sich neben verwaltung dieses amtes mit dem unterrichte junger leute in der kunst schreibens und dichtens beschäftigte und wo auch der größere theil seiner schriftstellerischen arbeiten entstand. Erst 1469 verließ er Eßlingen in folge von streitigkeiten, in die er sich mit dem rathe verwickelt hatte. Scholls litteraturgeschichte 1^c, 590.

1449 sagt Steinhöwel nebst mehreren Eßlinger patriciern im kriege Württembergs mit den reichsstädten dem benachbarten adel ab, der es mit Württemberg hielt. J. P. Datt de pace imperii publica s. 118 sagt davon: »Eodem anno et post, cum occasione belli württembergici vicina nobilitas esslinganæ civitati esset infestior, qui patriciæ in urbe dignitatis erant, faidam nobilitati missis literis denunciabant. Extant in mss. horum nomina Eberhard Holdermann, burger zu Eßlingen, Konrad von Fürst, Wilhelm und Peter von Waldhausen, beede burger zu Eßlingen, porro Hans Mäblin, burgermeister, Lienhard Schappel, Hans Freyburger, Hans Schon Melchior von Gorkheim. Accesserunt his etiam alii et inter illos Heinrich Steinhovel med. d. und medicus zu Eßlingen, Nicolaus von Wyle stadtschreiber und dessen substitut vel, ut scheda vetus habet, des stadtschreibers knecht.« K. Pfaffs geschichte der reichsstadt Eßlingen s. 343. C. F. v. Stälin. württembergische geschichte 3, 478.

Es ergibt sich hieraus auch, daß Steinhöwel in Eßlingen noch mit Niclas von Wil zusammentraf und mit wahrscheinlichkeit, daß sie einander kannten.

Beide stunden in hoher gunst bei der gräfin Margarete von Württemberg und unterhielten mit dieser fürstin, wie auch mit Eleonore von Schottland, gemahlin Sigismunds von Österreich einen fortwährenden verkehr. Scholl a. a. o.

Am 13 juli 1450 ward Steinhöwel zum stadtarzt nach Ulm berufen mit dem für jene zeit großen gehalt von 100 fl., welchen gehalt er hauptsächlich darum erhielt, weil er auch zugleich wundarzt war. Weyermann s. 484. Medicinisches correspondenzblatt. Stuttgart, 1847. 17, 173. Moll im medicinischen correspondenzblatt 22, 149. Scholl 1, 591. Gödekes grundriß s. 139.

In diesem reichsstädtischen dienst ist Steinhöwel ohne zweifel bis zu seinem tode geblieben. Moll a. a. o. 22, 149.

Von dort aus versah er zugleich die stelle eines württembergischen leibarztes. Moll bemerkt mit recht, der fehdebrief vom jahr 1449

scheine bald vergeßen worden zu sein.

In Ulm war Steinhöwel ein großer beförderer der von Zainer errichteten ersten buchdruckerei. Weyermann a. a. o. Moll a. a. o.

Im jahre 1454 lebte er in Freiburg im Breisgau, wie es scheint, dorthin zu ausübung seiner ärztlichen kunst geliehen.

1473 zeichnet er sich in der zueignungsschrift seiner verdeutschung von Boccaccio *liber de claris mulieribus* an frau Eleonore herzogin von Österreich als Hainricus Steinhöwel von Wyl an der Wirm, doctor in erznei, meister der siben künst, geschwornor arzt ze Ulm.

1473 sagt Steinhöwel in seinem »nützlich regiment«, daß er zu Ulm schon 22 jahre so vil gutheit, er, gunst vnd nutz von den fürsichtigen, ersamen und wysen burgermeistern, rät [? raut d. h. rät] und ganzen gemaind empfangen habe. G. W. Zapf, älteste buchdruckergeschichte Schwabens. Ulm, 1791. s. 46 f. Moll im correspondenzblatt 1852, 149.

Ein bildnis Steinhöwels aus dem jahre 1473 steht in der ausgabe der deutschen chronik Frankfurt, 1531.

In Sattlers geschichte von Württemberg unter den grafen 5, 162 steht von ihm: Steinhöwel schrieb freitag vor pfingsten 1474 an des grafen dritte gemahlin Margarete von Savoyen einen scherzhaften brief, worin er sie um verzeihung bat, daß er sie bei dem gebrauche des Liebenzeller bades noch nicht besucht habe; er liege selbst am zipperlein krank; er schicke ir zur abbüßung seines verbrechens als kostbares geschenk 22 pomeranzen und etliche limonien, die er von Como erhalten habe. A. Weyermanns nachrichten von gelehrten aus Ulm s. 484.

Im Ulmischen war er reich begütert.

Steinhöwel starb ohne zweifel 1482. Donnerstag vor pfingsten dieses jahrs war die erbschaft seines vermögens vollendet.

Joh. Dieterich Leopold in seiner memoria physicorum ulmanorum bezeichnet 1483 als Steinhöwels todesjahr. Vgl. Weyermann s. 484. Ebenso C. F. v. Stälin 3, 764. Die angabe in der beschreibung des oberamts Leonberg s. 249, er sei 1496 gestorben, ist irrig.

Steinhöwel hinterließ eine tochter Adelheid, welche an Stäßlin Mang Kraft verheirathet war. Haßlers buchdruckergeschichte Ulms s. 94.

Sie gebär ihrem gatten zwei söhne, Matthäus und Georg von Kraft, welche beide in Ulm bürgermeister waren. Weyermanns nachrichten s. 484.

Adelheid überlebte ihren gatten. Der buchdrucker Zainer war der

witwe und Jörg Hutter in Memmingen 1488 70 fl. schuldig, wovon er jedes quartal 2 fl. zu zahlen versprach. Haßler a. a. o.

STEINHÖWELS SCHRIFTEN.

Ich zähle die ihm mit mehr oder weniger wahrscheinlichkeit zugeschriebenen schriften in alphabetischer reihenfolge auf.

ADERLASZTAFEL.

Gedruckt ohne namen des verfaßers in Ulm bei Hans Zainer 1489, in groß folio. Moll, correspondenzblatt 1852, 150.

ÄSOP.

Das buch vom leben und den fabeln Äsops beweist, daß Steinhöwel nicht nur das lateinische, sondern auch das griechische verstand. Der verfaßer hat dabei, wie er selbst sagt, nicht wort aus wort, sondern sinn aus sinn übersetzt. Die schrift ist dem erzherzog Sigmund von Österreich gewidmet. Moll, medicinisches correspondenzblatt 1852, 150.

Das buch enthält fabeln des Äsop, extravagantes, Rimicius, Avianus, Aldefonsus d. h. Petrus Alfonsi, Poggio, denen die deutsche übersetzung von Heinrich Steinhöwel beigefügt ist. Gödekes grundriß s. 139.

Zwischen 1476 und 1480 setzen den ersten druck Scholl, deutsche literaturgeschichte 1^c, 590 und C. v. Stälin, württembergische geschichte 3, 764 f.

Panzer, annalen der ältern deutschen litteratur s. 47 unterscheidet 2 ausgaben dieses buchs ohne ortsangabe. Die erste beschreibt er unter n. 85 so: »Hye hebt sich an das buch vnd leben des fabeltichters. Esopi aus kriechischer zungen in latin gemacht. Auch etlich ander fabel als Aviani, Doligani, Adelfonsi vnd etlicher schimpfreden Pogii. In folio. So wird diese ausgabe im 2ten theil des schwarzischen catalogi s. 41 n. 25 angezeigt, mit dem zusatz: Verdeutschet aus dem latein von Heinrico Steinhöwel. ze ere dem durchl. fürsten vnd herrn Sigmunden, hertzog zu Österreich. Siehe die ausgaben von 1487 und 1498.«

S. 448 kommt Panzer wieder auf diese ausgabe zurück mit den worten: »Unter den schriften ohne jahr s. 47 n. 85 ist zwar eine ausgabe aus dem schwarzischen catalogo 2, 41 von Steinhöwels übersetzung der fabeln Esopi kurz angezeigt worden. Da mir aber indessen der herr geh. rath Zapf eine beschreibung dieser ausgabe nach seinem eignen exemplar mitgetheilet hat, so will ich hier das wesentliche derselben

beifügen. Die erste seite des ersten blats ist leer. Auf der rückseite steht ein holzschnitt, welcher den Esop vorstellt. Auf der ersten seite des zweiten blatts steht *Vita Esopi fabulatoris clarissimi e greco latina per Rimicium facta ad reverendissimum patrem dominum Anthonium tituli sancti Chrisogoni presbiterum cardinalem*. Hierauf heißt es: das leben des hochberühmten fabeltichters Esopi auß kriechischer zunge in latein durch Rimicium gemacht an den hochwirdigen u. s. w. Vnd fürbas daz selb leben Esopi mit seinen fabeln u. s. w. Das leben Esopi beträgt 37 bl. Am ende steht: Hie hat ein ende das leben Esopi. Dann folgen die fabeln selbst. Auf der ersten seite des ersten blats steht oben: Das erst blat; vnd dann folgt das register des ersten buchs des hochberühmten fabeldichters und meisters Esopi. Vor jedem buch steht ein register. Am 50sten blatt heißt es: Hie endet sich das vierd buch — und hebet sich an die mitlaufenden alten fabeln, die man züschreibet Esopo. Auf der letzten seite des 72sten bl. steht: Hie enden sich die mitlaufenden falblen (sic) von Rimicio u. s. w. Mit dem 83sten bl. vahet an die fabeln Auiani u. s. w. Das 100ste bl. hat die aufschrift: Gesamlet fabeln. Auf der ersten seite des xxviii (vielmehr cxxviii) bl. steht: Hyenach volget daz register über die gemeinen puncten der materi diß büchlins. Dieses register gehet über alle fabeln und ist 5¹/₂ bl. stark. Titel, custos und signatur fehlen. Blätterzahlen und große anfangsbuchstaben sind da. An holzschnitten mangelt es, wie leicht zu erachten ist, auch nicht.

Von dieser ausgabe unterscheidet nun Panzer s. 47 eine andere, die er unter n. 86 so beschreibt: »Das buch und leben des fabeldichters Esopi. Am ende: geendet säliglich von Johann Zainer zu Vlm. In folio. Diese ausgabe ist in der herzoglichen bibliothek zu Meiningen. Zuerst stehet der lateinische text; dann folgt die deutsche übersetzung. Wird vermuthlich die steinhöwelische sein. Ist mit holzschnitten geziert.«

Ein exemplar dieser ausgabe ist auch in Wolfenbüttel. Lessings beiträge zur gesch. 1, 64.

Diese beiden ausgaben erklärt nun Haßler in der buchdrucker-geschichte Ulms s. 107 für höchst wahrscheinlich identisch.

Vgl. Hains repertorium n. 330 ff.

Eine andere ausgabe des steinhöwelischen Äsops, die in Augsburg bei Schonberger 1473 erschien, erwähnt Weyermann, nachrichten von gelehrten aus Ulm s. 486.

Wieder gedruckt ist das buch Augsburg bei A. Sorg, 1483, fol.,

Augsburg, Joh. Schobßer, 1485, fol. Wieder ebendasselbst 1487, fol. Diese ausgabe gebraucht Grimm zum wörterbuch. S. daselbst 1, lxxxviiij. Eine ausgabe von Lienhart Yssenhuot, Basel, um 1440, benützt W. Wackernagel, lesebuch 1^d, 1259. Wieder ist das buch gedruckt Augsburg, Hans Schönsperger, 1491, fol. 1496, fol. 1498, fol., ferner Augsburg bei Joh. Froschower, 1504, fol. Weyermanns nachrichten s. 486. Wieder, vielleicht 1508, fol. mit Brants fabeln. Mit Brants fabeln Freiburg im Breisgau, Joh. Fabr. 1535, 4. Ein exemplar in Wolfenbüttel 243. 1. Quodl. 4. HB: 1882. Wieder Freiburg im Breisgau, St. Graff, 1539, 4. Exemplar in Dresden. Wieder daselbst 1555. Vgl. Grimm, deutsches wörterbuch 1, lxxxviiij. Exemplar in Dresden und wahrscheinlich in Berlin. Wieder ebendasselbst 1569, 4. Exemplar in Dresden. Wieder Frankfurt 1608, 8., ohne ortangabe 1616, 8. Erfurt 1617. Frankfurt 1622, 8. Nochmals Basel 1676, 8.

Eine probe aus dem Äsop nach der Freiburger ausgabe von 1539 gibt W. Wackernagel im deutschen lesebuch 1^b, 1055, nach der ausgabe von Lienhart Yssenhuot 1^d, 1259.

APOLLONIUS.

Die fabelgeschichte von Apollonius von Tyrus wird Steinhöwel zugeschrieben. Scholl, deutsche litteraturgeschichte 1^c, 590. Sie ist nach dem lateinischen des Gotfrid von Viterbo behandelt. Gödekes grundriß s. 119.

Ausgaben: von Gintherus Zainer von Reutlingen, Augsburg 1471, fol. Panzer s. 61. Hain n. 1294 ff. Augsburg, Binder. 1476, 79 bl. 4. Augsburg, Sorg. 1479, 71 bl. fol. Augsburg, Steiner 1540, 4. Augsburg, Hans Zimmermann. 1552, 4. Niederdeutsch Hamborch 1601, 64 bl. 4.

ARZNEIBUCH.

Ein zu Ulm bei Konrad Dänkmüt 1482 in folio gedrucktes arzneibuch schreibt Moll im medicinischen correspondenzblatt 1852, 150 Heinrich Steinhöwel mit höchster wahrscheinlichkeit zu, »denn die zeit, der druckort und die art des schreibens berechtigten vollkommen zu dieser annahme.«

CHRONIK.

Die deutsche chronik Steinhöwels ist zum theil übersetzung der

der minoriten Martin und Hermann. C. v. Stälin 3, 765.

Sie ist die erste gedruckte deutsche chronik. C. v. Stälin a. a. o.

Hie hebt an ein tüttsche cronica von anfang der welt uff keiser Friedrich. Gedruckt von J. Zainer in Ulm, 1473. Beschrieben bei Weyermann s. 484. Hain, repert. bibliogr. n. 15054. Gödekes grundriß s. 139. Diese chronik gehört zu den seltensten büchern. Sie befindet sich in München und Gießen; in den bibliotheken von Tübingen, Stuttgart, Frankfurt fehlt sie. Hain und Haßler (buchdruckergeschichte Ulms s. 97) nehmen Steinhöwel für den verfaßer dieser chronik, mit unrecht, wie Adrian in Naumanns Serapeum 1846, 220 aus einer stelle des buches selbst, bl. 29^a, nachweist, wo es heißt: So ferr hat den meister disser cronic die er flores temporum genennet hat, das ist die blümen der zyt, geschrieben, vsz den ich ouch ditz büchlin gekürtzt vnd getüttschet hab. fñrbas ist es von ainem andern gemeret. Adrian bemerkt dazu s. 221, daß die flores temporum von Hermann Gigas oder Gygas herrühren und bis zum jahre 1349 gehen. Meuschen hat 1743 diese flores herausgegeben und Eccard sie in seinem corp. hist. ungefähr in der weise wie Steinhöwel gekürtzt.

Eine vermehrte ausgabe besorgte 1531 zu Frankfurt Jakob Köbel, stadtschreiber zu Oppenheim. Auf dem titel ist Steinheils bildnis in holz geschnitten mit der umschrift: Henricus Steinhöwel utriusque medicinæ ac philosophiæ doctor, vixit anno 1473. Moll im medicinischen correspondenzblatt 1852, 150^b.

Von dieser chronik ist ein anderes, wie es scheint, gänzlich verlorenes buch unsers schriftstellers zu unterscheiden, welches er selbst in der deutschen chronik bl. 21^b mit den worten erwähnt: Zu denselben zyten dett herczog Gotfrid die groszen herfahrt, das heilig grab zegewinnen, das er och gewan. Vnd lyt allda begraben, als syn cronick vszwysset, die doctor Gwido gemacht hat vnd ich Heinrich Steinhöwel doctor getutschet. Adrian, welcher bei Naumann 1846, 220 zuerst auf diese stelle aufmerksam gemacht hat, bemerkt dazu, der erwähnte doctor Gwido sei wahrscheinlich Guido Adduanensis mit dem beinamen princeps latini eloquii. Aus diesem ehrentitel schließt Adrian, daß seine geschichte von Jerusalem in den mittleren zeiten sehr verbreitet gewesen sein müsse. Die arbeit Steinhöwels war vielleicht ein auszug dessen, was sich auf das leben Gotfrids von Bouillon bezieht.

Schon Weyermann s. 486 erwähnt als ein werk Steinhöwels: Cronick von Gottfrieds von Bouillion heerfahrt ins gelobte land, so d. Guido

lateinisch beschrieben.

C. F. v. Stälin, württembergische geschichte 3, 765 bemerkt dazu:
»nicht gedruckt, wofern das buch nicht die bei Hain n. 8753 verzeich-
nete historie von der kreuzfahrt nach dem heiligen lande ist.«

CONSTANTINI ARZTBUCH.

Weyermann s. 486 erwähnt: »Maister Constantini, so ein münch
war von Amenberg genant Cassin, buch gemacht auß allen andern guten
arzetbüchern, die er in latein ie erfuhr. (Aus Zapfs schw. buchdr.
gesch.; handschr. nachr.)«

DECAMERON.

Über das original dieses von Giovanni Boccaccio zwischen 1348
und 1358 verfaßten berühmten werkes wird man hier keine eingehenden
betrachtungen erwarten. Ausführliche belehrung und nachweis
weiterer litteratur findet sich bei F. Liebrecht, John Dunlops geschichte
der prosadichtungen. Berlin, 1851. s. 214. 548.

Schon Panzer vermuthet, daß das werk von Steinhöwel herrühre.

W. Wackernagel, lesebuch. Basel, 1853. 4, 359 spricht nicht
von einem verfaßer dieser übersetzung; nur die Griseldis schreibt er
Steinhöwel zu.

J. Grimm vindiciert ihm das werk mit bestimmtheit. Deutsches
wörterbuch. Leipzig, 1854. 1, lxxxviii: »Verdeutschung des decamerone,
welches sein hauptwerk ihm noch gar nicht beigelegt wird. In der ein-
leitung heißt es ausdrücklich: und damit die beschwerten und betrüb-
ten frewlein auch ein teil irer verborgen traurigkeit mögen ein klein
frid geben und die mit zucht in freud keren, hab ich Arigo (d. i. Hein-
rich Steinhöwel) in das werke machen und in tütsche zungen schreiben
wöllen.«

C. v. Stälin, württembergische geschichte. Stuttgart, 1856. 3, 765
schreibt Steinhöwel das buch unbedenklich zu.

Ziehen wir Steinhöwels sonstige beschäftigung mit Boccaccio und mit
übersetzungen ins deutsche, sowie sein verhältnis zu J. Zainer in betracht,
so wird an der urheberschaft nicht zu zweifeln sein. Arrigo ist wohl
die form, unter welcher einst den Wälschen der deutsche name des Pa-
duaner studenten mundgerecht gemacht ward und es ligt in der annahme
dieser form, 30 jahre nach seinem aufenthalt in Italien etwas, was wie
eine warme jugenderinnerung anmutet. Vielleicht mochte ihn auch der

inhalt des buchs veranlaßen, eine halbe maske vorzunehmen.

Über die ausgaben s. Hains repertorium n. 3279 ff. (Bei Stälin 3, 765 steht 327).

Die erste ausgabe, welche in dem vorstehenden neuen abdrucke genau widergegeben ist, beschreibt G. W. Panzer, annalen der ältern deutschen litteratur. Nürnberg, 1788. s. 49 unter n. 89 und 90. Beide numern unterscheiden sich aber nur dadurch, daß n. 90 am schluß die worte hat »geendet seliglichen zu Ulm«, welche in n. 89 fehlen. Diß hat schon Haßler in der buchdruckergeschichte Ulms s. 106 nachgewiesen; ich habe mich durch genaue vergleichung zweier jene verschiedenheit zeigender exemplare von der richtigkeit dieser ausführung überzeugt. Panzer sagt über diese bearbeitung des decameron: »Sie hat alle merkmale des höchsten altertums und ist vermutlich eine mit von den ersten producten, die aus den Augspurger oder Ulmer druckereien kamen. Man hat von dem original eine Venezianer ausgabe, die 1471 gedruckt worden ist. Es ist aber wohl noch eine ältere ohne jahr vorhanden, die auch Clement (bibliothèque curieuse 4, 347) anführt. Bald darauf muß auch unsere deutsche übersetzung erschienen sein. Sie ist auf sehr starkes papier von größtem format, mit gespaltenen columnen und ziemlich großen typen gedruckt. Blätterzahlen und neben denselben eine anzeige der zehen tagreisen sind da; custos aber, titel, signaturen und die anfangsbuchstaben fehlen noch. Auf der ersten columnne des ersten blats steht die anzeige [Hie hebt sich an u. s. w.] mit der überschrift Die vorred. Dann fängt die vorrede selbst an und die zweite weitläufigere, worinnen die pest, welche 1348 zu Florenz wütete, weitläufig beschrieben wird, hebt auf der ersten columnne des zweiten blats an und endiget sich in der mitte der zweiten columnne des elften blats. Unmittelbar darauf stehet der inhalt der ersten tagreise. Mit dem folgenden zwölften blat fangen die blatzahlen an und diese gehen bis 390. Die zweite columnne der ersten seite dieses blats hat 7 zeilen; das übrige dieser seite ist so wie die rückseite leer und also nicht die geringste anzeige des druckorts u. d. vorhanden. Ein exemplar von dieser sehr seltenen deutschen übersetzung besitzt unsere dilherrische bibliothek in dem Sebalder pfarrhof.«

Dieselbe ausgabe mit der bezeichnung des druckorts am schluß besaß Uffenbach. Catalog. II, append. s. 129. Ein exemplar der großherzoglich badischen universitätsbibliothek in Heidelberg habe ich benützen können. Ein exemplar besitzt auch die k. bayerische hof- und

staatsbibliothek in München. Das Heidelberger exemplar hat jene schlußbemerkung, das Münchener nicht.

Die ganz gleiche erscheinung von zweierlei exemplaren derselben ausgabe, theils mit theils ohne angabe des ursprungs, haben wir vorhin bei dem steinhöwelischzainerischen Äsop gefunden.

Der drucker dieser ausgabe ist ohne zweifel Johann Zainer aus Reutlingen. Panzer a. a. o. s. 50. Haßlers buchdruckergeschichte Ulms s. 106. Hain im repertorium bibliographicum I, 1, 450^b theilt die erste ohne datum dem Günther Zainer in Augsburg zu, die zweite dem Johann Zainer. Es ist diß ein irrthum, wie bereits bemerkt worden. Jene angabe könnte nur etwa den sinn haben, daß die exemplare ohne druckortsbezeichnung zum verkaufe durch Gunther Zainer in Augsburg bestimmt sein mochten.

Über eine ausgabe von Augsburg 1490 s. Panzer s. 187. Hain n. 3281. W. Wackernagels lesebuch 4^o, 359.

J. Grimm braucht für das wörterbuch die ausgabe Frankfurt 1588.

Eine ausgabe des Decameron von Straßburg 1591, fol. erwähnt Grimm a. a. o.

Die ausgaben des 16ten jahrhunderts weichen sehr von einander ab.

VON ETLICHEN FROWEN.

Steinhöwel bearbeitete auch Boccaccios schrift de præclaris mulieribus deutsch.

Eine ausgabe Augsburg 1471 fol. erwähnt Weyermann s. 485. Ich bezweifle ihr vorhandensein wegen des gleich nachfolgenden.

Hie nach volget der kurz sin von etlichen frowen von denen Johannes Boccacius in latin beschriben hat, vnd doctor Hainricus Steinhöwel getütschet. Am ende steht: Geendet seliglich zu Vlm von Johanne Zainer von Rütlingen. In folio. So beschreibt Panzer (annalen s. 50) die ausgabe. Vgl. weiter Hains repertorium n. 3333 f. Haßler, buchdruckergeschichte Ulms s. 107. Das buch ist 1473 der herzogin Eleonore von Österreich zugeeignet und nach Haßlers vermuthung zugleich in demselben jahre gedruckt. Haßler beschreibt die ausgabe näher so: »Ohne eigentlichen titel fängt das werk mit der zueignungsschrift des übersetzers an: Der durchlütigisten fürstin und frowen u. s. w. Schluß der zueignungsschrift: Geben zu Vlm . . . im tusendfierhundert dry vnd sibenzigsten jar. Bl. 4 a beginnt die inhaltsanzeige, mit bl. 9 das werk selbst. Das letzte capitel, von Steinhöwel selbst hinzugesetzt, hat

die überschrift: Was die puncten bedüten vnd wie man darnach lesen sol das .c. capitel. Das ganze in folio 28 ungezählte und 140 gezählte blätter; 76 holzschnitte; initialen in holz, sogenannte literæ florentes, auf dem 24 holzschnitte die jahrszahl 1473. Der holzschnitt zum 96 capitel zeigt die geschichte der päpstin Johanna. Keine custoden und signaturen.*

Ausgaben von Augsburg fol. 1473 und 1479 finde ich bei Weyermann a. a. o. erwähnt.

Davon unterscheidet Panzer s. 52, Weyermann a. a. o., Hain n. 3334 und Haßler s. 108 eine andere bearbeitung dieses buchs ohne zeitangabe, welche letzterer gleichfalls in Johann Zainers zweite periode, 1470 bis 1478, verlegt. Haßler beschreibt sie so: »Hienach volget der kurz sin von etlichen frowen von denen Johannes Boccacius in latin geschriben hat und doctor Hainricus Stainhöwel von Wil getütset. Folio, 80 holzschnitte, dieselben wie in der vorigen ausgabe und im lateinischen original, im ganzen aber nur 21 blätter, denn der text der vorigen ausgabe ist nicht abgedruckt, sondern nur über jedem holzschnitt eine ganz kurze erklärng.*

Weyermann beschreibt diese bearbeitung s. 485 genauer so: »Diese ausgabe ist nicht wie die vorhergehende, sondern ist weit weniger, als ein auszug. Sie enthält bloß holzschnitte, über denen jedesmal nur eine kurze oft aus einer einzigen zeile bestehende erklärng befindlich ist. Auf jeder seite sind 2 holzschnitte befindlich, mithin auf jedem blatt 4. Der holzschnitt von der pabstin Johanna ist auch in gesellschaft mit den andern und hat die überschrift: Johannes babst, was ein wyb. Das werkchen hat im ganzen 21 blätter, und holzschnitte sind 80; auf der 24 tafel ist die jahrszahl 1473 befindlich.*

Vgl. noch über diese ausgabe Panzers annalen s. 51. Weyermann s. 485. Scholls deutsche litteraturgeschichte 1^c 590.

Eine probe aus dem werke (c. 15) gibt Scholl, deutsche litteraturgeschichte 1^c 597.

GARTEN DER GESUNDHEIT.

Ortus sanitatis auf teutsch. Ein garten der gesuntheit. Ulm, Konrad Dünkmüt, 1487. Panzers annalen der ältern deutschen litteratur s. 167.

Der verfaßer ist nicht genannt. Moll vermuthet, es sei Steinheil. Ein exemplar in der stadtbibliothek in Ulm.

GRISELDIS.

Die deutsche bearbeitung dieser boccaccischen novelle (Decam. 10, 10) ist auch einzeln erschienen. Steinhöwel ist dabei (Wackernagel, lesebuch 4^e, 360) der petrarchischen lateinischen übersetzung, nicht dem italiänischen texte gefolgt.

Über die verschiedenen bearbeitungen dieser erzählung s. Liebrechts Dunlop s. 253.

Den ältesten druck setzt Haßler in das jahr 1473 und beschreibt ihn (buchdruckergeschichte Ulms s. 108) so: 68. »Ain epistel Francisci Petrarche von großer stätikeit ainer frowen Grisel gehaissen. Folio, nur 12 blätter, mit holzsehnitten; nach der vorrede als anhang zum vorhergehenden größeren werk [de claris mulieribus] von Heinrich Steinhöwel aus dem lateinischen übersetzt. Ohn Zweifelhaftes gleichzeitiges product der zainerischen presse.« Es ist diß derselbe druck, den Panzer s. 52 beschreibt, aber früher zu setzen scheint.

Ausgabe von Augsburg, bei Ginther Zainer, 1471. Panzer s. 61.

Ausgabe von Augsburg, bei Johannes Bämmler. 1472. Panzer s. 69.

Ausgabe von 1478 Panzer s. 108.

Eine handschriftliche bearbeitung der geschichte aus dem 15ten jahrhundert findet sich in Leipzig. Haupts altdeutsche blätter 1, 115.

PESTILENZ.

Von der pestilenz. Ulm, Conrad Dinkmuth 1482. Fol. So erwähnt Weyermann das buch s. 485. (Panzer s. 126.) Wieder ebendasselbst s. 486: von der krankheit der pestilenz. Am ende: gedruckt zu Vlm von Conrad Dinkmuth. Fol.

Es ist wohl nur eine andere ausgabe desselben buches, was Haßler in der buchdruckergeschichte Ulms s. 126 unter den undatierten drucken Konrad Dinkmuths in Ulm aufführt und so beschreibt: »Heinrich Steinhöwel, von der pestilenz. Am ende: Getruckt zu Vlm von Cunrat Dünckmut. Klein folio; initialen in holz; keine custoden, signaturen und blattzahlen. Es ist diß die von Zapf unter n. 32 zum jahr 1482 angeführte ausgabe; sie hat aber keine jahrzahl. Ohne zweifel ist sie auch identisch mit dem von Zapf unter 95 angeführten werkchen, denn die angeblichen titelworte sind buchstäblich der vorrede entnommen.«

Ein exemplar mit jahrzahl war früher in Buxheim. Moll, correspondenzblatt 1852, 150.

Ein undatiertes exemplar in der bibliothek zu Irse. Moll a. a. o.

Moll unterscheidet beiderlei ausgaben als verschiedene schriften. Als inhalt der undatierten schrift »von der krankheit der pestilenz« gibt er an: diätetische regeln, vorsichtsmaßregeln gegen die pest; es handle von denen, welche von der pest befallen worden, und lehre, wie sie zu heilen. Hiernach könnte der inhalt von dem des »regimen in der pestilenz« nicht sehr verschieden sein.

REGIMENT.

Haßler, buchdruckergeschichte Ulms erwähnt s. 96 wahrscheinlich nach Weyermann s. 484 folgende schrift: »Hionach Volgstein [? Hienach folgt ein] nützlich regiment u. s. w. Am ende: gedruckt tzu Vlm von Johann Tzainer von Rütlingen am montag nach Erhardi. Nach Christi geburt M^oCCCC^oLXXiii^o. Laus Deo. In folio, 40 blätter ohne zahlen. Anfangsbuchstaben. Der verfaßer ist der arzt Heinrich Steinhövel [Steinhöwel]. Mit diesem werk ist höchst wahrscheinlich identisch das folgende: Regimen in schweren läuften dieser krankheit der pestilenz der stadt Ulm gesammelt. Gedruckt zu Ulm von Joh. Zainer von Rütlingen im jahr 1473. Angeblich in quart.«

Die identität der beiden schriften nimmt Moll im medicinischen correspondenzblatt 1852, 150 nicht an. Das erste regiment ist allgemeineren inhalts, wie sich aus dem vollständigeren titel ergibt: Regiment, wer sich daran haltet, der mag sein lebenlang gesunt bleiben. Es ist nach Moll ohne blätterzahlen, in zwei theile abgetheilt und 40 blätter stark.

Das buch befand sich früher im kloster Pollingen und Wiblingen. Moll a. a. o.

REGIMEN IN DER PESTILENZ.

Regimen in schweren läuften dieser krankheit der pestilenz der stadt Ulm gesammelt. Ulm, Zainer 1473. 4. Panzer s. 126. Zapf s. 47. Moll correspondenzblatt 1852, 150.

Ein exemplar befand sich in der trewischen bibliothek zu Altdorf. Haller, bibliotheca medicinæ pract. 1, 466. Moll a. a. o.

Zapf s. 126 und Moll erwähnen noch eine schrift: ordnung wie sich der mensch zu den zeiten diser grausanlichen krankheit der pestilenz halten soll, in quart. Moll bemerckt, sie sei ohne zweifel in Ulm bei Dünckmut gedruckt, habe aber keine jahrszahl.

SPIEGEL DES MENSCHLICHEN LEBENS.

Das buch genandt der spiegel menschlichs lebens. Am ende: Deo gracias. In folio, ohne custoden, signaturen und blattzahlen, mit holzschnitten, wahrscheinlich von J. Zainer in Ulm gedruckt. Es ist eine übersetzung des lateinischen *Speculum vitae humanæ* des Rodericus Sanctius bischofs von Zamora, † 1470, welches Günther Zainer 1471 gedruckt hatte, und zwar von Heinrich Steinhöwel. Das buch ist dem herzog Sigmund von Österreich zugeeignet und wohl bald nach 1471 von Steinhöwel dem Johann Zainer zum druck übergeben. Vgl. Weyermanns nachrichten s. 486. Hains repertorium n. 13948 ff. Haßlers buchdruckergeschichte Ulms s. 107.

BEDEUTUNG STEINHÖWELS.

G. Scholl und F. Scholl, geschichte der altdutschen litteratur 587: »Nielas von Weil, Heinrich Steinhöwel und Albrecht von Eib bilden ein kleeblatt von übersetzern, das uns den wohlthätigen einfluß recht anschaulich machen kann, welchen das von Italien aus neu belebte und in Deutschland hauptsächlich durch Rudolf Agricola und Johann Reuchlin geförderte studium der classiker auch auf die deutsche sprache und litteratur ausübte. Zwar sind Nielasens und Steinhöwels translationen noch sehr slavische und daher großentheils undeutsche nachbildungen der lateinischen und italiänischen werke, die sie übersetzen; aber auch in dieser unvollkommenen gestalt trugen sie wesentlich zur hebung der bis dahin so dürftigen vaterländischen prosa bei und auf die bildung des geschmacks musten schon die von ihnen bearbeiteten stoffe vortheilhaft einwirken.

ANMERKUNGEN ZU EINZELNEN STELLEN.

Indem ich noch einige bemerkungen über einzelne stellen beifüge, muß ich eine schon früher gemachte bemerkung widerholen. weil sie selbst von freunden vergeßen scheint. Mit fragezeichen versehe ich verbesserungen, nicht gerade um »zaghaft« einen zweifel an ihrer richtigkeit anzudeuten. Andere würden diese verbesserungen unbedenklich und stillschweigend in den text setzen oder auf die ungenauigkeit im text durch ein sic aufmerksam machen. Das ist geschmackssache. Wem die fragezeichen nicht gefallen, der möge die betreffende bemerkung streichen und sich an ihrer stelle im text ein sic einzeichnen. Übrigens meine ich keineswegs, daß mit diesen bemerkungen alle bedenken über

den text berührt oder gar erledigt werden sollen.

1, 1 Die ersten blätter sind in der originalausgabe nicht gezählt. Ich füge die zählung bei. 9 ?recht, die ze clagen. 13 ?trostes. 23 ?ofte. So 5, 15.

4, 23 ?sich. Das s scheint im satz zu anfang der zeile weggefallen.

5, 32 ?mensch.

6, 27 ?irer.

10, 19 ?meniglicher wol sicht. 25 ?bedenken.

12, 19 ?verschmahen.

13, 37 ?Pampinea.

14, 24 ?zñ.

17, 30 Diß die stelle, in der sich der übersetzer nennt.

19, 7 ?ser. So 20, 3.

20, 3 ?ser. ?lieber zehen falsche. 10 ?und da.

21, 31 ?sündc.

22, 21 ?maister. 33 ?sprach. 35 ?meiner.

23, 3 ?und. 35 ?großef.

24, 20 ?schelten.

25, 16 ?keren meinen knecht. 35 ?aller menschen.

26, 25 ?alles. 30 ?herberge geben.

27, 21 ?Ser Ciapellet.

29, 4 ?ser. 16 ?Abraham der. 21 ?Ciuigni.

30, 27 Die blattzählung im original ist nicht genau. Nach der vorrede wird wieder vorn mit 1 zu zählen anfangen; hier sind ohne denkbaren grund die zahlen 7 bis 9 ausgelassen. 35 ?nottorft.

31, 29 ?gabe.

32, 20 ?heiligen. 29 ?leben.

60, 15 ?lobe. 27 ?zñ. 34 ?vrend.

61, 3 ?dein sant. 27 ?hat.

62, 5 ?marggrafen.

63, 3 ?gots und hern. 31 ?vilen.

65, 24 ?mit der.

66, 12 ?falken. 17 ?ze versetzen.

68, 4 ?dispensieret.

72, 26 ?Siena. 31 ?freuntschaft.

76, 7 ?sein. 9 ?behalf.

80, 32 ?vogel.

84, 26 ?mensche. 28 ?sein.

86, 30 ?erschracken.

87, 8 ?werden. 25 ?das.

91, 15 ?schwanger.

92, 7 ?sölicher. 18 ?got. 33 ?milch. 34 ?vertrucknet.

111, 21 Beide mir vorliegende ausgaben haben hier den druckfehler, daß die blattzahl 61, statt 59 heißt. 22 Das Heidelberger exemplar hat hier wureffn, das Münchner wurffen.

- 113, 10 ? mit.
 117, 10 ? meine. 13 ? geflogen.
 118, 3 ? Türken.
 119, 33 ? begunde.
 120, 10 Die blattzahl 64 steht in dem Münchner exemplar nicht, aber in dem Heidelberger.
 143, 16 ? der man.
 153, 30 ? künig. 33 ? lange.
 159, 26 ? Deiner.
 177, 27 hat das Heidelberger exemplar müchta mit verkehrtem e, das Münchner möchtt.
 180, 19 ? geben.
 185, 17 ? geschimpfet.
 227, 34 ? stamme.
 230, 19 ? den grafen het ir zuo eim man geben.
 233, 27 ? einsidel.
 242, 37 Ein blatt mit der zahl 136 ist nicht vorhanden.
 307, 24 ? und dem, des.
 332, 3 ? sicher.
 337, 17 ? welichem.
 346, 28 ? von P.
 353, 36 ? gelaube. ? gelübde. ? Peter.
 356, 26 ? des herren irem vater.
 372, 13 ? schad.
 377, 21 ? gespiln. 36 ? abeis.
 378, 5 ? mir mit.
 422, 27 ? Rinaldo.
 425, 28 ? mir.
 429, 35 ? nider.
 430, 27 ? die.
 432, 17 ? an mitter stiegen. So z. 35. 38 ? und do:
 433, 31 ? dich peicht. Vgl. 434, 5.
 442, 3 ? halse.
 446, 32 ? anhöb.
 453, 22 ? doch.
 454, 19 ? toren.
 455, 4 ? tochter.
 469, 15 Über bestoben s. Grimms wörterbuch 1, 1678.
 505, 37 ? der.
 517, 34 ? gester.
 529, 15 Es scheint hier etwas zu fehlen. Im original steht: E dicovi che io, per venirvi bene orrevole, mi metterò la roba mia dello scarlatto.
 531, 19 ? convent.
 532, 23 ? kaufman.
 546, 24 Sie heißt bei Boccaccio Francesca de Lazzari. Auch bei den männern gibt unser dolmetscher nur die vornamen an.

553, 7 ? schuldig.

558, 27 ? legato. 28 ? Ancona.

567, 14 ? dir.

606, 6 ? fragen.

611, 10 ? zugeben.

613, 19 Der miniator des Münchuer exemplars hat Der. Im Heidelberger fehlen diese großen initialen durchweg.

615 13 ? für.

656, 4 ? eelich.

664, 15 Es sind 2 zeilen verstellt; ? mer dann kein ander frawe verstat.
Ich laß dir die schlüssel zñ allem dem u. s. w.

INHALTSÜBERSICHT.

	seite
Die vorred. Hie hebt sich an das pñch von seinem meister In greckisch genant decameron, daz ist cento nouelle in welsch Vnd hundert histori oder neüe fabel in teutsche, Die der hoch gelerte poete Johannes Boccacio ze liebe vnd frñntschafft schreibet dem fürsten vnd principe Galeotto. Die in zechen tagen von syben edeln frawen vnd dreyen iungen mannen zñ einer tötlichen pestilenczischen zeiten gesaget worden .	1
I. Die erste tagreyse. Von erste vnter dem gewalt vnd reigiment der künigin Pampinea Die wirdig gesellschaft sagen wirt von abenteuerlichen ergangen gescheften vnd von der künigin gepote iglicher person auf disen ersten tage frey ist zesagen waz im liebe vnd sein gefallen ist	19
1. Wie ein notari oder offen schreiber genant der Ciapelleto mit einer seiner peicht einen heiligen hochgelertenn man betroge vnd nach seinem tode für heilig an gepett ward	19
2. Wie Abraham vnd der Iude durch freuntschafft vnd rate Gianotto kaufman von Parisy, Wie wol er der Cristen herren pñse werck vnd übel gesehen het zñ einem güten Kristen warde	29
3. Wie ein Iude genant Melchisedech mit einer natürlichen histori vnd neuen fabel grosser sorge vnd angste entging die im von künge Soldan bereyt was	32
4. Wie ein iung mñch in sünd felt, wirdig grosser pein; der seinem abte auch söleche sünd probirt vnd in dar ein füret, Also sich selbes sölecher bereyter pein frey vnd ledig macht	35
5. Wie die marggreffin vonn Monferrato des küniges von Franckreich grosse vnorliche liebe mit etlichen hübschenn Worten straffet	39
6. Wie ein weise man mit einer züchtigen rede die grossen geytikeit vnd ypocrisia der prelaten vnd aller geistlichen straffet	41
7. Wie Bergamino mit einem seinenn neuen historien den abte von Grñning hern Caneschala Einer geytikeit sticht vnd mit Worten peyset, Nedlich zñ gestanden	44
8. Wilhalm Vorsiere mit etlichen hübschen züchtigen Worten her Erminio Grimaldi vonn Genoua einer seiner geitikeit sticht vnd peisset	47
9. Wie ein künig von Cipri von einer edeln frawen von Guaschongna mit Worten gestochen was, vmb des Willen von einem nichten man redlich warde	49
10. Meister Albert arczte von Boloni züchtiglichen ein schöne frawen straffet vnd beschamet, die im daz meint zettñ	50
II. Hie hat die erst tagreiß ein ende hebt sich an die ander vnder dem gewalt vnd regimente der künigin Philomena do die züchtig gesel-	-

	seite
schaft sagen wirt von den person den grosse vngelücke vnsälige widerwertigkeit zů gestanden ist vnd nach langer trübsal vnd traurigkeit sich doch ze gütem seligen ende gefüget hat	54
1. Einer genant Martellino zů versten gabe wie er lam were an allem seinem leibe, Vnd wie in der heilig sant Arigho von Teruise wider gesunt machte; sein grosse schalcheit erkant ward gefangen vnd wol geschlagen warde. Auch nit ferre dar von er wer an den galgen gehangen worden. Die erste histori der andern tagreiß	54
2. Von Rinaldo dAsti wie der peraubet ward naked in eynem hemde in einer kalten winter nacht zu dem castel Gilielmo kam beherbert von einer schönen frawen, vnd seiner schaden wider ein kam frisch vnd gesunt wider heim kame	59
3. Wie drey iunge gesellen von grossem reichthum in grosse armůt kamen. vnd von einem der ir fetter was genant Allessander aller irer schäden wider komen Der mit einem abte auß Flandern gen Rome reyzt vnd fande das der abte des küniges von Engelant tochter waz; die den genanten Allessander zů einem manne nam Darnach künig in Schotten lant warde	65
4. Von einem kaufman genant Landolffo Ruffelo; der zů einem rauber oder Corsale auf dem mere ward. Darnache von den Genouesern gefangen ward; Der schiffe in dem mere zoprachen, vnd Landolffo auf einen kasten darinn waz grosser schacze; mit dem leben darvon kam	73
5. Von einem genant Andreuczo vonn Paruse der gen Napols reyte roß ze kauffen; den drey tötliche sache oder trübsal in einer nacht an stinssen. Da pei er alles das er do hat verlosse doch im got von in allen halfe vnd mit einem köstlichen rubin wider heim gen Paruse kam	78
6. Von einer edeln frawen genant Beritola Die mit czweien rechern auff einer inseln in dem mere von dem marggraffenn Mala spini funden ware; die iren man vnd czwei kinder peyde knaben verloren het. Darnach über lang zeit der selben ir sün einer des marggraffen diener warde im ein tochter schwechet peyde von dem marggraffen gefangen worden. Darnach er von dem hern erkant warde vnd im die tochter zů einem weib gab vnd der ander sein pruder auch funden ward vnd, ir mütter mit den czweyen sün in Cicilia in irem ersten stant vnd herschaft wider gesezt worden	90
7. Künig Soldan von Babiloni, Eine sein tochter dem künige Garbo verheyret vnd zů einem weyb geben het die er im über mere schickte vnd der schiffe in dem mere versancke nyemant mit dem leben dar von kam dann alleine die iunckfraw mit czweyen person, Die in vier iaren manchen man zů vneren ze teyle ward auch manch man vmb ir grossen schöne willen sein leben verlose, von künigen herczogen hern vnd fürsten, vnd doch an dem letstenn irem vater Soldano für ein ketische iunckfraw wider geben warde, des selben gleichen künig Garbo irem man geantwort warde	104
8. Wie ein edelman von Angfers von einer künigin von Franckreich falschlichen verklaget warde, Vnd vmb grosser forrecht willen alles	

das sein gelassen vnd mit czweyen seinen kinden einem knaben vnd tochter in das elende floche peyde kinder in Engellant hier vnd dort liesse alleine in Schotlant zoche ze dienen, vnd nach etlicher vergangen zeit in armen knechtes weise wider in des künigs von Franckreiche lant vnd hofte kame do erkant warde vnd wiger in seinen ersten stant vnd erste herschaft geseczet warde 125

9. Barnaba von Genoua falschlichen von Ambrogiole von Piaczenza betrogen, fünff tausent gulden verlose in verczagnuß fiele mit seinem knechte schafte daz er sein weybe töte; Dem sie mit pete vnd diemütigen worten überwant pey leben beleybe in mannes foru auß dem lande floche gen Alexandria fure, lange zeit dem soldan dienet, Darnach den betrügner Ambrogiole in Acri fandte in schwerlich straffet, nach Barnaba irem manne gen Genoua sante, vnd gegenwürtig des soldan wider frawen orden an sich nam frölichen vnd reiche mit Barnaba gen Genoua fure 141

10. Wie Pagamino der mer raubermeister Rinaldo sein weyb nimet, Nach dem meister Ricciardo sein groß freünt wirt, Das weybe an in begert des er sich gen im gar willige peweyset, doch so ferre daz er der frawen willen habe, dem sy neyn sprache mit im nicht mer zū sten, die Pagamino nach ires mannes tode für sein elich weybe nam 154

III. Hie hat die ander tagreyse ein ende vnd hebt sich an die dritte vnter dem gewalt vnd regiment der künigin Neyphile Do die edel gesellschaft sagen wirt, von den die mit grosser begire vnd willen was begert haben, vnnd ein sölches durch ire subtile liste gehabt haben, oder das verlorn wider gewonnen vnd zu wegen pracht haben 163

1. Wie Masetto von Lampolechio sich zu einem stummen machet vnd in einem nunnenkloster zu einem gartner warde Dieselben nunnun mit sampt der ebtissin er beschlieffe alle mit im die süssikeit der welte versuchten 165

2. Wie dem künige Gulfrede von einem seinem diener Die künigin beschlaffenn warde Die do meinete es der künige were, vnd der künige durch der frawen rede ein sölches sölches vernahme, doch sich von ir nicht merken liesse, vnd damit er denselben erkennen müchte, im ein teyle des hares abschneide vnd der knechte allen andern knechten daz ir abschneide also allem seinem bereitem vnglücke entginge 171

3. Vnter geleichnuß einer lauern peichte vnd reinen gewissen Ein hochgelerter weiser man von einer frawen die einen iungen man liebe het betrogen warde. doch on sein wissen demselben iungenn man durch in der frawen liebe zu wissen gethon warde vnd sy mit im iren willen verpracht 176

4. Münch Felix einen genant pruder Puccio lernet wie er durch ein puse in kurzzer zeit on grosse müe sich mücht selig vnd heilig machen vnd in daz paradeisse komen, daz pruder Puccio thet, vnd die weyle er in sölcher puse stund münch Felix im ein güten müte mit seinem weybe schafte desselbenn sie mit dem münche thut 184

5. Ein iunge man liebe het vnd puelet eins ritters weybe dem er schencket vnd gabe ein köstlich roß do mit er im mit seinem vrlaub vergünnet mit der frawen zereden; des im der ritter vmb der gabe willenn vergonde, vnd er mit ir sein not redt; aber von ir nye antwort het, vnd er im selbes an der frawen stat antwort gabe vnd zû hant nach sölicher seiner antwort mit freuden die werck folgten 189

6. Wie einer genant Riecardo einen andern genant Filipello vmb sein weyb puelet, die da sere eyferet vnd sie ires mannes Filipello vor andern frawen grosse sorge het; Riecardo ir zû versten gabe wie Filipello im vmb sein weyb puelet, vnd des nachten tages darnach peyde mit einander freude ze haben sich in einer padstuben pey ein finden sölten ir so vil vor saget daz sie in daz pade kam vnd wo sie pey Filipello irem man meinet gewesen sein, sie pey Riecardo gewesen was 194

7. Ein iunge man genant Thedaldo mit einer frawen die er von ganzem herzen liebe het sere betrübet was vnd grosses vnmütes vnd traurikeit halben von Florenz seiner stat wege zoche vnd nach etlicher vergangen zeit in pilgrems form wider kam mit der frawen redet ir zû versten gabe das groß übel das sy wider in begangen het Das sy ir von herzen leyt sein ließ vnd er ir zeliebe ir man auß gefencknüß vnd von dem tode lediget der in sölt getöt haben Darnach lange zeit mit weißheit vnd freüden der frawen willen mit dem sein vermischt 201

8. Wie ein abte einem genant Ferondo ein puluer ze essen gab von dem er entschliefte vnd für toten begraben ward; darnach auß dem grab genomen in ein finster prisaun gelegt vnd do er entbachte im ward zû versten geben wie er tode were vnd im dem purgator were in diser zeit der abt im mit seiner frawen güte tage gabe, vnd nach etlicher vergangen zeit als des abt gefallen waz er wider erstunde, vnd zoche für sein eyn kint das sein weyb durch den abt empfangen het 216

9. Wie ein iunckfrawe genant Giletta den künig von Franckreiche einer krankheit gesunt machet; die für iren lone an den künig begeret zû einem emanne den iungen graffen Beltramo von Ronsiglione den er ir wider seinen willen vnd dancke zû der ee gabe; Des er in zorn von ir reyte in Tuschana vnd stat Florenz kam; Do er vmb ein iunckfrawen huldet vnd an der selben stat sein weyb Gilette pey im schliefte vnd von im in czwey kinde peyde knaben swanger warde; darnach nicht lange verginge er sy zû genaden name vnd von herzen liebe het 225

10. Wie ein heydenin genant Alibech von Rusticho dem eynsyde zû kristenlichem gelauben vnd gotzdienst gemeistert ward vnd wie man den teuffell in die helle tet; darnach von dann genomen vnd einen genant Lerbole zû einem weyb geben warde 233

IV. Hie hebt sich an die vierde tagreyse. In diser vierden tagreyse vnder dem gewalte vnd regiment des küniges Philostrato die wirdig gesellschaft sagen würt von den der graffe überflüssige liebe vnd freütschaft sich alle ze klaglichem vnd pösen ende gefüget hat 241

1. Wie Tancrede fürst vnd princeps von Salerno seiner tochter iren

bülen vnd liebhaber tötet vnd ir sein hercz in eynem gulden kopf schicket darein sy vergift wasser goß daz tranck also ir selbes das leben nam vnd den tod thet 247

2. Münch Alberto von Imola einer iungen frawen zñ versten gab wie der engel Gabriel vmb sy bñlet vnd in sy in liebe enczündet wår, vnd an des engels stat er die frawen zñ mermalen beschlieffe vnnd bei ir lage. Darnach grosser forcht halben irer freünde in eyner nacht nackent zñ eynem fenster auß der frawen kamern sprang in eyns armen manns hauß floche, der in des tages darnach in eyns wilden mannes form auf sant Marx placz fñrt do er von aller menge vnd seinen mñchen erkant vnd in gefäncknuß gefñrt ward 256

3. Wie drei iunge gesellen lieb heten drei schwester mit den sy wege in die insel Creti fluben. die elter schwester vrsach grosses eifern irem bñlen vergab vnd tötet, vnnd die ander schwester domit die erste nicht ir leben verlñre dem herczoge zñ seinem willen verlichen ward darumb sy der ander ir bñle tötet vnd mit der eltesten wege flohe, beleyb der drit mit der dritten schwester gefangen beide marter halben veriahen sy des todes vrsach wåren, vnd die hñter der gefäncknuß mit gelt brachen vnd übergaben weggefuhen beide arm vnd ellendiklichen starben, vnnd ir leben in Candia endeten 265

4. Gerbino eines kñniges von Cicilia diechter wider seines anherren geleyte vnd gepote eyn schiff des kñnigs von Tunici bestreyt dem eyn tochter die er bñlet vnd darauf was zenåmen die selbigen iunckfrawen die von irem eygen schiffe theten vnnd in das mere wurffen, vmb des willen Gerbino die auf dem schiff warn alle tötet vnd verbrant, vnd sein anherr kñnig Wilhalm gerechtikeyt zethån in Cicilia im darumb das haupt abschlñge vnd tötet 272

5. Wie frawen Lisabetta brñder ir iren liebhaber vnnd bñlen tñten vnd er ir eyns nachtes in dem schlaf fñrkam vnd ir ze versten gab wie vnnd wo sy in getñtet vnd begraben heten, die sich des tages darnache dohin fñget do er tod lage in auß der erde nam vnd im das haupt ab dem leib schneid vnnd das in eynen schñnen scherben leget darein sy basicho vnd masaron sñket all tag eyn stund darob weynet vnd ir leyt klaget vnnd mit iren herten zñhern neezet vnnd begoß, des iren brñder warnamen vnd ir den scherben stalen des sy von leyd auch starb 277

6. Wie fraw Andreola einen genant Gabrioto lieb het dem sy eynen iren traume der ir des nachtes in dem schlaf erschienen was saget, vnd er ir auch einen saget, in dem also in iren armen starb, vnd sy mit eyner irer meyd in zñ seinem hauß trñgen in dem von den statt knechten gefangen vnnd fñr den richter gefñret warden, dem sy alles saget waz sich irent halben verlauffen het, vnnd der richter sy zñ seinem willen nñten wolte des sy im nit gestat, das irem vatter zewissen kam sy des todes vnschuldig funden vnd frei golassen ward 281

7. Fraw Symona eyn iungen lieb het genant Pasquino mit dem sy in eynem iren garten was mit im freñde czechaben, vnnd Pasquino sein

zäne mit eynem salueplat reyß vnd bestrich gächling nyder fiel vnd starb, vnd des willen die fraw gefangen vnd für den richter geführt ward vnd dem richter wolt zu versten geben vnd weisen wie Pasquino getan het vnd denselben salue auch nam mit einem plat ir zän reyß als Pasquino thet, das getan nit anders dann als Pasquino gächling oder vrbering zu der erden sank vnd starb 287

8. Geronimo het lieb eyn iunckfrawen genant Siluestra, vnd domit er sy nicht czu der e nam vnd ir vergaß sein mütter in gen Parisii sant nach ettlicher vergangner zeite wider kam do er fand das man der iunckfrawen eyn e man geben het. er sich eynes nachtes verstolen in ir kamern verbarg vnd sich czu ir leget vnd ir an der seiten starb 290

9. Herr Wilhalm ritter von Ronsiglione gab seinem weyb cze essen eines andern ritter herze den sy ob allen mannen lieb het genant herr Wilhalm Guarda Stagno dem er das leben nam, vnd do die frawe solichen tod vernam zu eynem fenster ires palast außwarffe ir selbs den tod thet 296

10. Wie eynes arczte weib eynen bülen vnd liebhaber der do twalm getruncken het für tote in eynen kasten auff die gassen leget vnd czwen iung wüchrer den kasten mit dem der darinn was stalen vnd in ir hauß trügen, vnd der in dem kasten was nach etlicher stund sein selbs empfinden ward vnd von den wüchtern für einen dieb gefangen vnd für den richter geführt ward, vnd des arczte meyd für den richter gieng im sagt wie sy den gefangen iungen für toten in den kasten gelegt het den die wüchrer dem schreiner gestolen hetten, also den gefangen von dem tode vnd galgen erlediget 299

V. Hie hat die viert tagreyß ein end, hebt sich an die fünfte vnder dem gewalte vnd regiment der künigin Fiameta, do die wirdig gesellschaften sagen wirt von ettlichen liebhabern, der liebe nach etlicher grossen trübsal vnd traurung sich zu güttem säligen end füget 310

1. Wie eyn iung edelman von wenig synnen genant Cymone von liebhaben weis vnd gütter synne ward, vnd die iunckfrawen die er huldet eynem andern czu eynem weib geben ward die er im auf dem mere mit gewalt nam die im zu Rodi wider genommen vnd er gefangen ward, vnd eyn iunger Rodianer genant Lismacho in auß dem gefäncknuß nam beyd die hochzeit überfielen do ir lieb frawen breüt waren. Lismacho die seinen nam genant Cassandra, vnd Cymon die seinen genant Esigenia mit gewalt wider nam vnd mit beyden frawen in die inseln Creti fliehen vnd für ire eweiber namen, vnd nach etlicher vergangen zeit beyd mit grossen freuden czu hauß von iren freunden geruffet worden 310

2. Wie iunckfrawe Costanza einen iüngling lieb het genant Martho Gomitto, Den sie nach dem ir gesaget ward tode vernam, vnd grosses leyden halben in verzagnuß fielen sie alleine in ein schiffe an rymen vnd segel seczet, vnd von einem gächlingen wint in der Morn lant in die stat Susa getragen ward vnd zu Tunici in der Banbarey an des küniges hofe in einen grossen hern fandte sich im zu erkennen gab vnd peide mit grossen freuden wider zu hause furn 320

3. Wie ein iunger Römer genant Petro Bochamaza mit einer iunckfrawen die er lieb hette, von Rome floche vnd in einem walde von etlichen strassen raubern gefangen warde Die iunckfrawe in den wald floche auß dem zñ einem Castell kame, vnd Petro den raubern auch entginge vnd zñ demselben castel do die iunckfraw was become do er sie zñ einem weybe nam mit grossen freüden wider heym gen Rom kome . . . 327

4. Wie her Licio von Balbona ritter einen iungen edelman genant Riciardo pey seiner tochter schlaffent fande; die er zñ der ee name vnd mit dem ritter in güttem stant vnd fride beleyb . . . 333

5. Guidotto von Cremona befilhet ein sein tochter einem seinem gñner genant Kasparolo vnd er mit tod ab get vnd stirbet; die selben iunckfrawen ir czwen der ein genant Gianello der anner Mingino zñ Foenza vmb sie pulten peyde, vmb iren willen zñ kriege vnd streit kamen; In dem gefunden warde das die selbig iunckfrawe des einen genant Gianello swester was vnd dem andern er sie zñ einem weybe vergñnet . . . 339

6. Wie Giano von Procida ein iunckfrawen huldet vnd von herczen lieb het, die kñig Friderich von Cicilia geschenckt wart, vnd er von dem kñige pey ir eines nachtes slaffend gefunden ward peyde von im in den tode vnd das feñer verurteylt wurden vnd mitten auf dem placce zñ verprennen peyde an ain señle gepunden worden In dem er von des kñiges hoffmeister erkant wurden alle peyde freye vnd ledig mit grossen iren eren gelassen wurden vnd der kñig Giano im sie zñ einem elichen weybe gabe vnd vergñnet mit grossen eren vnd freüden heym gen Yschia ze fñren . . . 344

7. Wie Theodoro liebe het Violante seines herren tochter die er swāngeret; vmb des willen an den galgen geurteylt warde, vnd in dem auß zñ dem tod ze fñren er von seinem vater erkant warde ledig vnd frey gelassen warde, vnd mit grossen freüden Violante zñ der ee nymet . . . 350

8. Anastasio ein frawen pñlet vnd von herczen liebe het alles das sein ir zñ liebe ausgibet vnd an wirt, vnd von ir vnliebe gehalten ist seinen freñden zñ liebe wege in die gegent genant Chiassi zoche, Do er einen ritter mit czweyenn hunden ein iunckfrawen iagen töten vnd zñ reysen fand, vnd nach sñlichem gesechen wunder er die iunckfrawen die er liebe hette mit sampt iren freñden zñ hause lude auch sie daz wunder gesechen hette, sñliches auch besorget ir zñ stñnd vmb des willen den iungen Anastasio zñ der götlichen ee nam . . . 357

9. Wie Friderich Alberigo ein schöne frawen liebe hette, vnd von ir vnliebe gehabt waz, Ir zñ liebe alles daz er het an warde außgenommen einen seinen falcken den er ir eines tages an einer hennen stat ze essen gabe vmb den sy zñ im komen waz in zñ begeren aber im vmb des willen sy dar komen was nicht mer auch wissent was vnd do sie vernam daz sy den falcken gessen het; in widerkerung sñliches ir gemñte sich gen im neyget; in fñr iren ee man name wider reiche vnd selig machet . . . 363

10. Peter Vinchola mit einem seinen gñten freñde vnd gesellen das nachtmal essen get, in dem sein weybe ir einen iungen schönen knaben

zû ir schaffte komen mit dem ir freude ze haben in dem Peter vngessen wider ze hause komet der frawen saget wie seines gesellen weib mit dem er essen sôlt einen iungen knaben in dem hause verporgen hette, den ir man fande darauff sich grosse schande begeben hette vmb des willen er wider heym essen komenn were das sein weybe der andern sere verübel hette ir übel redet vnd fluchet, In sölchem reden sich füget Ein esell ledig in dem hause vmb ginge zû einem korb kam darauff grasse lag vnder dem die gût fraw iren iungen knaben vnd puclen verporgen het dem der esell auf einen finger drate das der gût iunge on schreyen nit verdragen moecht mit hoher stymme schrey awe mir meiner hant! Do das Peter höret palde zû dem korbe lieffe der frawen betriegen erkante die seines gesellen weib so übel vmb der verlossen sach zû geret hett, Peter sich mit der frawen palde einet vnd frid machet vnd nicht minder dem iungen wol ze müte vnd content als sein weybe was 369

VI. In diser sechsten tagreyse vnder dem gewalt vnd regiment der künigin Elisa dise würdige gesellschaft sagen würt von etlichen die mit hübschen sprichworten fürsichtiger schneller antwort etlichem sein red haben prechen vnd mit den iren Worten haben züchtiglichen stechen vnd peyssen können. Hie hebt sich an die sechst tagreyse 379

1. Wie ein ritter frawe Oretta pitt, vnd sie mit einem übel gesezten neüer histori sich ze rosse seczte, vne do sy dez ein teyle vernomen hette in pate seines sagen nicht mer ze hören das er sie abe zû fässe setzen sölte 381

2. Wie ein pecke genant Cisti mit eynem eynigen wort cynes ritters eynfeltig begerung schänt 382

3. Wie fraw Nanna mit eyner schneller züchtiger antwort in schympfes form eynem bischoff seiner vnzüchtigen red stilltet vnd schweigen machet 385

4. Wie Chichibio der koch mit eyner schnellenn rede seines herren zoren erweicht vnnnd grossem vngelück das im bereyt was engieng 387

5. Wie herr Forese Rabatta vnnnd meyster Giotto der maler beyd miteynander von dem dorff gen der stat wercz ritten vnd yeglicher des andern vngestalte schalte eynander mit Worten stachen vnd bisßen 389

6. Hie will Michel Sealeze beweisen wie eyn geschlecht von vngeschaffen leüten genant Baronei die elsten vnd edelsten aller welt sein 391

7. Wie fraw Philippa von irem man bei irem bülen vnd liebhaber schlafend funden ward von im vmb der sünd willen für recht gefodert ward, die sich mit eyner schnellen antwort frei vnd ledig redet daz recht wider sy erweychet vnd ganz diemütiget 393

8. Wie Frescho czû eyner seiner mûmen spricht vnnnd tröst sy das sy sich nicht mer spiegel noch anstreiche 396

9. Gwido Chaulchanti mit eynem züchtigen wort etlich ritter die in mit Worten vnd werken gestochen heten schilt vnd straffet 397

10. Münch Zwifell den von Zertaldo verheyßt sant Gahriel feder

	seite
eyne zeweisen vnd an derselben stat in kolen weist vnnnd in ze versteen gibt wie es die sei, domit sant Lorenz geröst ward	399
VII. Hye hat die sechste tagreyß ein end Got vns die sibenden zû gûtem end wend. Vnder dem gewalte vnd regiment des künigs Dioneo dise würdig gesellschaft sagen wirt von den frawen die vmb liebe vnd beschûczung irer eren willen ire mann betrogen haben, vnnnd die soli- cher betrûgung nit war genommen noch die erkannt haben, vmb des wil- len die frawen bei iren eren heliben sein	409
1. Wie Iohannes Lotringer eynes nachtes an sein haustûr klopfen höret das in czû der zeit freind sach nam vnd sein weib als die do wol weist wer es waz im zû versten gibt wie es ey vngeheûr fantasma sei beyde aufsten zû der haustûr geen den geyste beschweren, vnd er ze- hand seines klopfen aufhöret	410
2. Wie ein iunge fraw genant Peronella einen iren puelen in ein öll- faß verporgen het daz ir man zû der stunde einem andern verkauft het mit dem er nach dem faß kam; zû dem die frawe sprach sy hette es einem andern vor verkauft vnnnd wer darinne zû sechen ob es ganz reyne vnd vnzeprochen were	414
3. Wie münche Rinaldo sein gefetterin besleift vnd pey ir leyt, darzû der man kam dem sie peyde zû versten gebenn wie sy dem iungen kinde die wûrm in dem pauche beschweren	418
4. Wie Toffano eines nachtes sein weybe außeralbe des hauses ver- spert vnd sie des gleichen tut als sie sich in dem prunne wûrffe der an dem hause was; Einen grossen stein darein fallen lest vnd Toffano palde auß dem hauß laufft ir ze helffen, In dem sy in das hauß get vnd Tof- fano heraußen versperte	423
5. Wie ein grosser eyferer in pristers form sein weybe peicht hört dem sie zû versten geyst wie sy einen pfaffen puele vnd lieb habe; der alle nacht mit ir schlaffen kam, vnd die weil der eyferer hinder der tûr doz hauß in der wart lage ze sechen wenn der frawen puele keme. In dem die frawe iren puelen oben über daz tache ein zû ir komen thet mit im ir freude hette	427
6. Wie Lisabetta pey Lionetta irem puelen ist, Die von heren Lam- precht dem ritter auch liebe gehabt was zû der selbenn stunde auch zû der frawen kam mit ir freude ze nemen, vnd die weyle sy peyde in sol- chen freuden sten der frawen man zû hauß komet, vnd die frawe denn ritter mit plossem schwert in der hant über die stiegen abe weist vn- geret auff zû roß siczet wege reyt vnnnd der frawen man Leonetto selbes heym beleyt	434
7. Wie her Ludwig frawe Beatrice sein grosse liebe öffnet, vnd ir die zû wissen thut, vnd wie die frawe iren man der Giani genant was in irem forme vnd gestalt in den garten sant; In dem her Ludwig pey ir leyt nach dem vonn ir auff stet in den garten get vnd Giano sein haut mit trucken streichen vol schlecht	438
8. Wie ein grosser eyferer seins weybes besorget vnd sy eins nach-	

tes ir selbs ein faden an die zehen des fuß pint, do pey sie vernemen mücht wan ir puele zû ir komen wolt, des der man ware nam demselben iren püelen mit plossem swert zû dem hauß auß nach laufft In dem die frawe ein ander frawen in das pett an ir stat legt; Die der man do er wider ze hauß kam gar wol schlecht, vnd ir die züpfle abe schneit; Nach dem zû dez weybs prüder ginge; in über das weyb klaget vnd was er ir gethon bet in saget mit im zû hause pracht vnd nicht war funden was er ir gesaget het wider in in zorn fielen vnd im sein haut vol schlägen . 444

9. Fraw Lidia Nicostrato weyb het einen iungen lieb mit namen genant Pietro der an sy dreü dinge begern ist, die sie im zû liebe alle thut über das gegenwürtig Nicostrato mit Pietro schimpffet vnd scherz vnd im zû versten geyst es sey nicht ware das er da gesechen habe . . . 451

10. Wie czwen Seneser beyd eyn frawen bülen vnd liebhaben. vnd sy des eynen geuatterin ist, die selben zwen beyd cyner dem andern verspricht welicher vnder in beyden am ersten stirbet widerumb komen sol vnnd dem andern czewissen tûn was man in gener welt thût . . . 461

VIII. Hie hat die sibent tagreyß ein end vnd hebt sich an die acht vnder dem gewalt vnd regiment der künigin Lauretta. do die edeln frawen sagen werden von den mannen die ire weiber vnd weiber die ire mann vnd eyn man den andern betrogen haben . . . 466

1. Wie Giulfardo von eynem kaufman genant Kasparolo des weib er bñlet gelt entnanc, mit dem weib eyns ward vmb gelt bei ir zeschlafen vnd ir daz selbig gelt gab das er von dem man entnomen het, darnach gegenwürtig Kasparolo er sprach wie er der frawen daz entnomen gelt het wider geben des sy bekennet also er solches gelts wider zegeben sich ledig machet, vnd vmb das selbig gelt die frawen zû seinem willen gehabt het . . . 467

2. Wie eyn pfaff fraw Belcore beschlafet vmb des willen ir ein korrock czû pfande laßt nach dem von ir eyn mörser entnymet vnd den ir wider heym schicket vnnd seinen korrock fodern laßt den er ir vmb des mörsern willen hab zû pfand vnd gedächtnuß gelassen den im die gñt frawe in grossem zoren wider gab . . . 469

3. Calandrino Bruno vnd Buffelmacho die drei nach dem wasser das neben der mauren vnser stat abe rint genant Mongone auf wercz gingen czesüchen eynen edeln steyn genant Ritropicho der nach dem ir etlich sprachen, wer den steyne bei im hat das derselbig solt vnsichtig sein, den der erste genant Calandrino meint er den funden het gar wol geladen mit steynen zû hauß ging Auß dem sein weib ir gespöte treyb darum er sy hart schlecht vnd seinen gesellen sagt, was sy im thet do er den steyn funden vnnd vnder den andern bei im het . . . 473

4. Wie ein probst eyn witwe lieb hat vnd von ir vnlieb gehalten ist vnnd eynest bey ir meynet czeschlafen, do hete sy im eyn ire vngeschaffe meyd zû geleget, vnd der frawen brüder den bischof zû hauß fürten im seinen probst bei der meyd zeygten den er schwärlich büsset vnd in gefäncknuß beschloß . . . 481

	seite
5. Wie drei iung gesellen eynem richter do er zñ gericht saß sein nyderkleyd on sein wissen ab dem hindern zugen	486
6. Wie Bruno vñnd Buffelmacho Calandrino eynen schweinen pachen stelen vnd im ze versteen geben den mit wernacza wein vnd galli von grünem ingewer gemachet mit hunczkot vnd aloe gemischet mit czucker überczogen im zeessen gaben, durch dise dinge in überweisen das er im selbs den schweinen pachen müßt gestolen haben vñnd eyn andern pachenn kauffen müßt, wolt er nicht das sy es seinem weib sageten vñnd er von ir nicht geschlagen sein	489
7. Wie eyn student eyn iunge witwin bñlet die eyn andern lieb het den sy eyn lang herte kalte winternacht in einem iren hof in den schne steen machet ir czewarten, die er darnach zñ mittem augsten nackend auf eynem öden turen an der heysen sunnen vñnd an den fliegen steen machet	494
8. Wie zwen gñt gesellen yeglicher dem anderen sein weib beschlafet des der erst von dem andern warname zñ seinem weib sprach. Nun gedencke weib das mein geselle heynt mit dir schlafen kome das sy thet vnd in eynen kasten sperret vnd er des weib der in dem kasten was komen thñt vnd auf dem kasten darinn ir man was mit ir seinen willen hat	515
9. Meister Symon arczt mit Bruno vnd Buffelmacho gesellschaft macht, vnd Buffelmacho in eines nachtes in ein kotige lachen warff dar ine ir peyde liessen	519
10. Wie ein schöne pulerin in Cicilia einem iungen haufman nam was er het daz selbiger ir wider vmb thet ir zñ versten gabe wie er von neuem mere dann er vor gethon het kaufmanschacz pracht habe auff die, er ir gelt entlechet vnd ir on öle stat fesser vol wasser vnd grosse pallen vol werck liesse von dann als vor auß der inseln gen Napels floche	532
IX. Hie hat die acht tagreyß ein ende vnd hebt sich an die neünt vnder dem gewalte vnd regiment der frawen Emilia do die wirdig gesellschaft sagen wirt iglich person besunder was im liebet vnd seingefallen ist	545
1. Wie ein erbere frawe von czweyen iungen manne, der ein genant Rinuczo der ander Alexander liebe gehalten vnd gepuelet was, der sy keinen lieb hette, vnd domit sy ir peyder mit güter vrsache ledig würde, den einen für tode in eines toten grabe legen schuffe von denselben ir den andern auß dem toten graben nemen vnd für einen toten leichnam pringen schuffe; Also ir peyder ledig warde dann nicht verprachten nach dem sy an pede begert hette Als ir lesent hernach vernemen wert	545
2. Wie ein ebtessin eines nachtes in grossem czorn vnd mitt grosser eyle auf stet ir nunnen eine zñ besechen die gen ir verklaget waz vnd einen man pey ir slaffen het, vnd sy in irem aufsten den weyl auf ir haubte meinte nemen an desselben stat eines pffaffen präche der pey ir lage begreyffe, vnd auf das haubt tet, das die dasig die gen ir verklaget was ersache vnd des war nam den andern nunnen weyset, vmb des willen von der ebtessin freye gelassen warde vnd hinfür pey irem puelen nach irem willen sein mochte	551

3. Wie meister Symonn Bruno Buffelmacho vnnnd Nello den dreyen zů liebe Calandrino zů versten geyt vnd in gelauben machen wie er swanger sey, Denn Calandrin für erczneye gelte vnd feiste capaun geyt in also an geperrunge eines kindes wider gesunt machen 554

4. Ciecho Fortaringo zů Bonconuent alles das er hette verspilet nacket in dem hemde boleyb vnd er meister Angoliere zů der stat auß also nackent nachlieffe, vnd do er in die felder kam do die pauern arbeyten er anhöbe zů schreyen er beraubt were die pauern alle zůluffen dem Angoliere alles das er hett namen vnd Cecco gaben; Der sich pald kleydet vnd auff Angoliere roß sasse in in dem hemde liesse vnd so er peldest mochte darvon reyte 558

5. Wie Calandrin ein iunge frawen pulet dem Bruno ein brieflein schreybt vnd zů versten geyt wen er sy damit anrůre sy im nachlauffe vnd seinen willen thon were, das er also thet vnd von seinem weibe pey derselben gefunden ward darvmb grosser kriege vnd vneinigkeit peyden thalbenn wuchse 561

6. Wie czwen gesellen pey einem wirt herbern, vnd der eine mit des wirtz tochter schlegt pey dem andern des wirtz weybe on gefere leyt, vnd der die tochter beslaffen het, sich darnach zů irem vater leget vnd meinte er pey seinem gesellen lege alles das er getun het im saget, der wirt romor macht; Das weybe der verlossen sache erst ware name, palde auf stet do sy pey dem andern gesellen lage vnd sich zů der tochter legt nach dem mit zůchtigen worten den man stillt 569

7. Wie Thalano traumet daz im ein wolffe sein weybe wůrget, Das er ir zů wissen thet ir saget das sy sich weste zů hůten des sy nicht tet, Darumb ir zů stunde als er ir gesaget het 573

8. Wie Bondello betrůget Ciecco mit einem essenn des er sich zůchtighen an im richet im sein haut vol schlagen thut 575

9. Wie czwen iunge gesellenn an Salamone rate begern; der erste begeret wie er můge liebe gehabt sein, Der ander wie er sein widerwertikeit weybe straffen sůlle, Dem ersten er zů antwort geyt das er liebe habe, Dem andern das er an die gens prucken gee 578

10. Wie pfaff Gianni seinem gefattern Peter das weib zů einer roß mutter machen wille des Peter wol zemůt ist, vnd do er kam ir den zagel anzeseczen Peter schrey vnnnd sprach er des nicht leiden wůlt, darumb alle ding verdarben 582

X. Hie hat die neůnt tagreyß ein end hebt sich an die zehent vnder dem gewalte vnnnd regiment des kůnigs Pamphilo do die wirdig geselschafft sagen wirt von den personen die mit redlichem freyem můt etliche grosse werck der liebe oder anders verbracht haben 587

1. Wie eyn ritter dem kůnige von Hispania dienet, der sich beduncken ließ wie er seines wol dienens nit gelonet noch des wider keret wůre, dem der kůnig durch warheyt beweiset wie das nicht sein schulde, sunder des bůsen gelůckes gewesen seye, nach dem in herlich vnd er wirdig was begabet 587

2. Wie Chino von Tacco den abt von Klingen eyner kranckheyt die er an dem magen het gesunt machet, darnach gen Rome komet vnd der abt in widerkerung des mit dem pabst so vil tht das er in zñ sant Iohannis ritter vnd spittlmeyster zñ Rodi machet 590

3. Wie der neydig man Mitridates den milden Nathan vmb seiner grossen miltikeyt willen töten meynet vnnnd vnerkant czñ im kam von Nathan selbs vnderriecht Nathan alleyn zefinden vnnnd mit im seinen willen thn, den er nach Nathan ordnung alleyn in einem wald fand, do sich Nathan im zeerkennen gabe des Mitridates grosse scham vnd leyd het sein grösster freünd ward 595

4. Wie ein ritter genaunt herr Gentile von Modona reytt eyne die er huldet vnd lieb het. die zesehen die für tod vnnnd schwanger begraben ward, dieselben er auß dem grab nam wider czñ leben bracht bei im eynen knaben gebar die er nach etlicher vergangen zeit mit samt dem kint mit grossen freuden irem mann wider gab der nit anders gelaubt dann sy tod wär 601

5. Wie fraw Dianora an den riter Ansaldo zñ mittem winter einen schönen grünen rosengarten begert in maß als wär es zñ mittem meyen der sich eynem nigromant mit grossem güt verband der im den garten machet, vmb des willen fraw Dianora man ir das vrlaub gab für eynmale des ritters willen czetñ, vnd do der ritter der frawen man freye miltikeyt vernam die frawen ires gelübds frey vnd ledig saget, auch vmb des willen des nigromant sich nit mynder in der tugent der miltikeit beweisen wolt als der ritter, auch er von dem ritter seins lons halben nicht nñmen wolt 608

6. Wie kñig Carlo zñ eyner vnedeln doch eyns ritters tochter aber kñiglicher art vngeleich iunckfrawen lieb gewan der sich seiner eynfältigen gedanken selbes schñmen ward nach dem er die selben iungen mit samt eyner irer schwester erberlich begabt vnd verheyret 613

7. Wie eins schlechten manns tochter genant Lisa zñ kñig Peter von Cicilia in vnmässige liebe enezündet vnd daz in maß daz sy in grosse kranckheyt fiel das dem kñig ward zewissen getan der sy personlich sehen kam sy tröstet, nach dem sy eynem edelmann zñ eynem weib gab, vnd in widerkerung irer liebe zñ im er nit ander frucht solicher liebe von ir enpfing, dann eyn mal an iren rosenfarben mund küsset vnd hinfür stñts ir ritter wolt genant sein 618

8. Wie Sofronia meynet sy Gisipo Atenesy weib sey, do wy sy Tito Quinto Fulsio des Rñmers weib mit im gen Rom zohe, vnd Gisipo in grosse armüt felt vmb des willen ganz verzagt zeversten git wie er ein getöt hab domit er auch getöt werd, in dem von Tito erkant ward in von dem tod nam vnd sprach. er das mort gethan hete von eygeñ gñten willen sich des schuldig gab, in dem der der das mort getan het kam vnd sprach er der wär der den man getöt het vnd weder Gisippo noch Tito das gethan heten, vmb des willen Ottavia der keyser demselben der das mort gethan het vmb der andern zweyer willen vergab 626

9. Wie der soldan von Babiloni in kaufmans form in welsche lant komet do er von hern Torello von Pauia geert warde Nach dem die Kristenn sich eines zuges über mer vermasen das heilig grabe zů geminen Die von dem soldann gesprochen worden, vnd her Torello von dem soldan gefangen vnd erkant warde, sein falkner warde vnnnd ere thete, vnd nach etlicher vergangen zeit mit grossem reichthume durch artem magicam; die wir die swarzen kunst nennen, In einer nacht heym gen Pauia tragen het. Do er auf die hochzeit kam die sein weybe mit einem andern edel manne hette von ir palde erkant auff stunde mit im heym zů haub ginge 641

10. Der marckgraue von Salucz von seiner armer leüte pete bezwungen ein weybe ze nemen, vnd er die nach seinem willen ze haben eines armen pauern tochter name mit der er czwey kinde het ir zů versten geyt dieselben kinder zů töten nach dem ir peweist wie er ir müde sey vnd ein ander weybe genommen hab, sein eygen tochter an desselben weybes stat im komen schuffe, vnd daz erste weybe nacket in dem hemde heym irem vater sant; die er in allen sachen gedültig fande sy wider zů haube name lieber vnd werder hielte dann ye stätz als ein marckgräfin eret vnd liebe het 657

Anmerkungen des herausgebers	673
Litteratur	673
Leben des verfaßers	673
Steinhöwels schriften	677
Aderlaßtafel	677
Äsop	677
Apollonius	679
Arzneibuch	679
Chronik	679
Constantini arztbuch	681
Decameron	681
Von etlichen frowen	683
Garten der gesundheit	684
Griseldis	685
Pestilenz	685
Regiment	686
Regimen in de pestilenz	686
Spiegel des menschlichen lebens	687
Bedeutung Steinhöwels	687
Anmerkungen zu einzelnen stellen	687



